

Namo tassa bhagavato arahato sammāsambuddhassa

Vinayapiṭake

Pācityādiyojanā

Pācittiyajojanā

Mahākāruṇikaṃ nāthaṃ, abhinatvā samāsato;
Pācityādivaṇṇanāya, karissāmatthayojanāṃ.

5. Pācittiyakaṇḍaṃ

1. Musāvādasikkhāpada-atthayojanā

Khuddakānanti sukhumāpattipakāsakattā appakānaṃ, gaṇanato vā pacurattā bahukānaṃ. Yesaṃ sikkhāpadānanti sambandho. “Yesa”nti padaṃ “saṅgaho”ti pade sām्यatthachaṭṭhī. Saṅghāyate **saṅgaho**. “Navahi vaggehī”tipadaṃ “saṅgaho, suppatiṭṭhito”ti padadvaye karaṇaṃ. **Dānīti** kālavācako sattamyantanipāto idāni-pariyāyo, imasmiṃ kāleti attho. **Tesanti** khuddakānaṃ, ayaṃ vaṇṇanāti sambandho. **Bhavatīti** ettha ti-saddo ekamsatthe anāgatakāliko hoti “nirayaṃ nūna gacchāmi, ettha me natthi saṃsayo”tiādīsu (jā. 2.22.331) viya. Kiñcāpettha hi yathā ekamsavācako nūnasaddo atthi, na evaṃ “bhavatī”ti pade, atthato pana ayaṃ vaṇṇanā nūna bhavissatīti attho gahetabbo. Atha vā avassambhāvīyatthe anāgatakālavācako hoti “dhuvaṃ buddho bhavāmaha”ntiādīsu (bu. vaṃ. 2.109-114) viya. Kāmañhettha yathā avassambhāvīyatthavācako dhuvasaddo atthi, na evaṃ “bhavatī”ti pade, atthato pana dhuvaṃ bhavissati ayaṃ vaṇṇanāti attho gahetabboti daṭṭhabbaṃ.

1. “**Tatthā**”ti padaṃ “musāvādavaggassā”ti pade niddhāraṇasamudāyo, tesu navasu vaggesūti attho. Paṭhamasikkhāpadeti vā, tesu khuddakesu sikkhāpadesūti attho. **Sakyānaṃ puttoti** bhaginīhi saṃvāsakaraṇato lokamariyādaṃ chindituṃ, jātisambhedato vā rakkhituṃ sakkuṇantīti **sakyā**. Sākavanasaṇḍe nagaraṃ māpentīti vā sakyā, pubbarājāno. Tesāṃ vaṃse bhūtattā etarahipi rājāno sakyā nāma, tesāṃ puttoti attho. “Buddhakāle”ti padaṃ “pabbajimsū”ti pade ādhāro. Sakyakulato nikkhamitvāti sambandho. “**Vādakkhitto**”tyādinā vādena khitto, vādamhi vāti atthaṃ dasseti. **Yatra yatrāti** yassaṃ yassaṃ diṭṭhiyaṃ pavattatīti sambandho. **Avajānitvāti** paṭissavena viyogaṃ katvā. Avasaddo hi viyogattavācako. “Apajānitvā”tipi pāṭho, paṭiññātaṃ apanītaṃ katvāti attho. **Dosanti** ayuttidosāṃ, sallakkhento hutvāti sambandho. **Kathento kathentoti** antasaddo mānasaddakāriyo. Kathiyamāno kathiyamānoti hi attho. **Paṭijānitvāti** paṭiññātaṃ katvā. **Ānisamsanti** niddosaṃ guṇaṃ. Paṭipubbo carasaddo paṭicchādanatthoti āha “paṭicarati paṭicchādetī”ti. “Kiṃ pana rūpaṃ niccaṃ vā aniccaṃ vā”ti vutte “anicca”nti vadati. Kasmāti vutte “jānitabbato”ti vadati. Yadi evaṃ nibbānampi jānitabbatā aniccaṃ nāma siyāti vutte attano hetumhi dosaṃ disvā ahaṃ “jānitabbato”ti hetuṃ na vadāmi, “jātidhammato”ti pana vadāmi. Tayā pana dussutattā evaṃ vuttanti vatvā aññenaññiṃ paṭicarati. “Kurundiya”nti padaṃ “vutta”nti pade ādhāro. **Etassāti** “rūpaṃ aniccaṃ jānitabbato”ti vacanassa. **Tatrāti** kurundiyaṃ. **Tassāti** paṭijānanāvajānanassa. “Paṭicchādanattha”nti padaṃ “bhāsati”tipade sampadānaṃ. “Mahāatṭhakathāya”ntipadaṃ “vutta”nti pade ādhāro. “Divāṭṭhānādīsū”ti padaṃ upanetabbaṃ. Idaṃ “asukasmiṃ nāmapadese”ti pade niddhāraṇasamudāyo.

3. Sammā vadati anenāti **saṃvādanaṃ**, ujjātikacittaṃ, na saṃvādanaṃ **visaṃvādanaṃ**, vañcanādhīppāyavasappavattaṃ cittanti dassento āha “visaṃvādanacitta”nti. “Vācā”tyādinā vacati etāyāti **vācāti** atthaṃ dasseti. **Hīti** dalhikaraṇajotakaṃ, tadaminā saccanti attho. “Vācāyevā”ti padaṃ

“byappatho”ti pade tulyattham, “vuccati”ti pade kammaṃ. Pathasaddaparattā vācāsaddassa byādeso kato. Suddhacetanā kathitāti sambandho. **Tamsamuṭṭhitasaddasahitāti** tāya cetanāya samuṭṭhitaena saddena saha pavattā cetanā kathitāti yojanā.

“Eva”nti padaṃ “dassetvā”ti pade nidassanaṃ, karaṇaṃ vā. “Dassetvā”ti padaṃ “dassento āhā”ti padadvaye pubbakālakiriya. **Anteti** “vācā”tiādīnaṃ pañcannaṃ padānaṃ avasāne. “**Āhā**”ti ettha vattamāna-tivacanassa akāro paccuppannakālavācakena “idānī”ti padena yojitattā. “Tatthā”ti padaṃ “attho vedītabbo”ti pade ādhāro. **Etthāti** “adiṭṭhaṃ diṭṭhaṃ me”tiādīsu. “Pāliya”nti padaṃ “desanā katā”ti pade ādhāro. Nissitaviññānavasena avatvā nissayapasādavasena “cakkhunā diṭṭha”nti vuttanti āha “oḷārikenevā”ti.

4. Tassāti “tīhākārehī”tiādivacanassa. “Attho”ti padaṃ “vedītabbo”ti pade kammaṃ. **Hīti** visesajotakaṃ, visesaṃ kathayissāmīti attho. **Tatthāti** catutthapārājike. **Idhāti** imasmiṃ sikkhāpade.

9. Ādīnampīti pisaddo sampiṇḍanattho.

11. Mandasaddo jaḷatthavācakoti āha “mandattā jaḷattā”ti. Yo pana aññaṃ bhaṇatīti sambandho. “Sāmaṇerenā”ti padaṃ “vutto”ti pade kattā. Apisaddo pucchāvācako, “passitthā”ti padena yojetabbo, api passitthāti attho. “Adiṭṭhaṃ diṭṭhaṃ me”tiādivacanato añña pūraṇakathāpi tāva atthīti dassento āha “añña pūraṇakathā nāma hotī”ti. Appatāya ūnassa atthassa pūraṇavasena pavattā kathā **pūraṇakathā**. Esā pūraṇakathā nāma kāti āha “eko”tiādī. Esā hi gāme appakampi telaṃ vā pūvakhaṇḍaṃ vā passitvā vā labhitvā vā bahukaṃ katvā pūraṇavasena kathitattā pūraṇakathā nāma. Bahukāni telāni vā pūve vā passantopi labhantopi appakaṃ katvā ūnavasena kathitattā ūnakathāpi atthīti sakkā vattum. **Aṭṭhakathāsu** pana avuttattā vīmaṃsitvā gahetabbaṃ. Bahukāya pūraṇassa atthassa ūnavasena pavattā kathā **ūnakathāti** viggaho kātabboti. Paṭhamaṃ.

2. Omasavāda sikkhāpadaṃ

12. Dutiye masadhātu vijjhanatthe pavattati “omaṭṭhaṃ ummaṭṭha”ntiādīsu (saṃ. ni. aṭṭha. 1.1.21) viyāti dassento āha “omasantīti ovijjhantī”ti.

13. “Idaṃ vatthu”nti padaṃ “āharī”ti pade kammaṃ. Nanditabboti **nando** vaṇṇabalādi, so etassatthīti nandī. Visālāni mahantāni visāṇāni etassatthīti **visālo**, nandī ca so visālo cetī **nandivīsāloti** vacanattham dasseti “nandivīsālo nāmā”tiādīnā. **Soti** nandivīsālo, “āhā”ti pade kattā. **Tatthevāti** yuñjitaṭṭhāneyeva. **Ahetukapaṭisandhikālepīti** pi-saddo anuggahatthavācako, pageva dvihetuka tihetuka paṭisandhikāletī attho. “Tena cā”ti cakārassa avuttasampiṇḍanatthattā “attano kammena cā”ti attham sampiṇḍetīti āha “attano kammena cā”ti. **Attanoti** nandivīsālassa.

15. Etthāti etissaṃ padabhājanīyaṃ, “āhā”ti pade ādhāro. “Yasmā”ti padaṃ vibhajitukāmo”ti pade hetu. Aṭṭhuppattiyāmyeva “hīnenāpī”ti vatvā padabhājanīyaṃ avuttattā idaṃ vuttanti daṭṭhabbaṃ. **Veṇukārajātīti** vilīvakārajātī. **Nesādajātīti** ettha kevaṭṭajātīpi saṅgahitā.

Pu vuccati karīsaṃ, taṃ kusati apānetīti **pukkuso**. Pupphaṃ vuccati karīsaṃ, kusumaṃ vā, taṃ chaḍḍetīti **pupphachaḍḍako**.

Kuṭati chindatīti **koṭṭho**, soyeva **koṭṭhako**. Yakārabhakāre ekato yojetvā “yabhā”ti yo akkoso atthi, eso hīno nāma akkosoti yojanā.

16. Sabbapadesūti nāmādīsu sabbapadesu. **Etthāti** imasmiṃ sikkhāpade. **Alikanti** asaccaṃ, micchāvācanti sambandho. Yopi vadatīti yojanā.

26. Pariharitvāti parimukhaṃ kathanam apanetvā. Davaṃ parihāsaṃ kāmetīti **davakāmo**, tassa bhāvo **davakamyam**, taṃyeva **davakamyatā**. Anupasampannanti ettha akārassa sadisatthamaggahetvā aññatthova gahettabboti āha “ṭhapetvā bhikkhu”ntiādi. Yadi hi sadisattho bhavēyya, sāmaṇero va anupasampanno nāma siyā saṅghānena ca purisabhāvena ca sadisatthā, tasmā aññatthova gahettabboti daṭṭhabbaṃ. **Sabbasattāti** ettha **sabbasaddo** anavasesattho manusse upādāya vacanattahajānanājananapakatikānaṃ sabbasattānampi gahitattā.

35. Atthapurekkhāro nāmāti veditabboti sambandho. Sikkhāpadamapekkhiya napuṃsakaliṅgavasena “kiriya”ntiādi vuttaṃ. Āpattimapekkhiya itthiliṅgavasena “kiriya”ntiādi vuttaṃ. Vajjakammasaddā sikkhāpadamapekkhantāpi āpatti, mapekkhantāpi niyatana puṃsakaliṅgattā napuṃsakāyeva, tasmā te dve āpattiṭṭhāne na vuttāti daṭṭhabbanti. Dutiyam.

3. Pesuññasikkhāpadaṃ

36. Tatiye “jātabhaṇḍanāna”nti vattabbe agyāhitotiādisu viya visesanaparanipātavasena “bhaṇḍanajātāna”nti vuttanti āha “sañjātabhaṇḍanāna”nti. “Pubbhāgo”ti vatvā tassa sarūpaṃ dasseti “iminā ca iminā cā”tiādinā. Viruddham vadati etenāti **vivādo**, viggāhikakathā, taṃ āpannāti **vivādāpannā**, tesam. Pisati sañcuṇṇetīti **pisuṇo**, puggalo, tassa idanti **pesuñnam**, vacananti attham dassento āha “pesuññanti pisuṇavāca”nti.

37. Bhikkhupesuññeti bhikkhūnaṃ santikaṃ upasaṃhaṭṭe pesuññavacaneti chaṭṭhīsamāso.

38. “Disvā”ti padaṃ “bhaṇantassā”ti pade pubbakālakiriya, dassanaṃ hutvāti attho. Tatiyam.

4. Padasodhammasikkhāpadaṃ

44. Catutthe paṭimukhaṃ ādarena suṇantīti **patissā**, na patissā **appatissāti** dassento āha “appatissavā”ti.

45. “Padaso”ti ettha so-paccayo vicchatthavācakoti āha “padaṃ pada”nti. **Tatthāti** tesu catubbidhesu. Padaṃ nāma idha atthajotakaṃ vā vibhatyantaṃ vā na hoti, atha kho lokiyehi lakkhito gāthāya catutthamso pādova adhippetoti āha “padanti eko gāthāpādo”ti. Anu pacchā vuttapadattā dutiyapādo **anupadaṃ** nāma. Anu sadisaṃ byañjanaṃ **anubyañjananti** attham dasseti “anubyañjana”ntiādinā. Byañjanasaddo pada-pariyāyo. Yamkiñci padaṃ anubyañjanaṃ nāma na hoti, purimapaḍena pana sadisaṃ pacchimapaḍameva anubyañjanaṃ nāma.

Vācento hutvā niṭṭhāpetīti yojanā. “Ekamekaṃ pada”nti padaṃ “niṭṭhāpetī”ti pade kāritakammaṃ. “Therenā”ti padaṃ “vutte”ti pade kattā, “ekato”ti pade sahattho. Sāmaṇero apāpuṇitvā bhaṇatīti sambandho. **Mattamevāti** ettha evasaddo mattasaddassa avadhāraṇattham dasseti, tena pakāraṃ paṭikkhipati. “Anicca”nti ca “aniccā”ti ca dvinnam padānaṃ satipi liṅgavisesatte anubyañjanattā āpattimokkho natthīti āha “anubyañjanagaṇanāya pācittiyā”ti.

Brahmajālādīnīti ettha ādisaddena sāmaññaphalasuttādīni dīghasuttāni (dī. ni. 1.150 ādayo) saṅgahitāni. Casaddena oghataraṇasuttādīni saṃyuttasuttāni (saṃ. ni. 1.1) ca cittapariyādānasuttādīni aṅguttarasuttāni (a. ni. 1.2 ādayo) ca saṅgahitāni. **Soti** devatābhāsito veditabboti yojanā.

Kiñcāpi vadatīti sambandho. Ettha ca kiñcāpisaddo garahatthavācako, panasaddo anuggahatthavācako. **Meṇḍakamilindapañhesūti** meṇḍakapañhe ca milindapañhe ca. **Yanti** suttaṃ vuttanti sambandho. Āramaṇakathā buddhikakathā daṇḍakakathā ñāṇavattthukathāti yojetabbaṃ peyyālavasena vuttattā. Imāyo pakaraṇāni nāmāti vadanti. Mahāpaccariyādīsu vatvā pariggahitoti yojanā. **Yanti** suttaṃ.

48. Tatrāti “ekato uddisāpento”ti vacane. **Uddisāpentīti** ācariyaṃ desāpenti bahukattāramapekkhiya bahuvacana vasena vuttaṃ. **Tehīti** upasampannānupasampannehi. **Dvepīti** upasampanno ca anupasampanno ca.

Upacāranti dvādasahatthūpacāraṃ. **Yesanti** bhikkhūnaṃ. **Palāyanakaganthanti** parivajjetvā gacchantāṃ pakaraṇaṃ. Sāmaṇero gaṇhātīti yojanā.

Opātetīti avapātetī, gaḷitāpetīti attho. **Suttepīti** veyyākaraṇasuttepi. **Tanti** yebhuyyena paṇṇaganthaṃ. **Parisāṅkamānanti** sārājjamānaṃ. Yaṃ pana vacanaṃ vuttanti sambandho. **Kiriyasamuṭṭhānattāti** imassa sikkhāpadassa kiriyasamuṭṭhānattāti. Catutthaṃ.

5. Sahaseyyasikkhāpadaṃ

49. Pañcame muṭṭhā sati etesanti **muṭṭhassatī**. Natthi sampajānaṃ etesanti **asampajānā**. **Bhavaṅgotiṇṇakāleti** niddokkamanakāle.

50. “Pakatiyā”ti padaṃ “dentī”ti pade viśesanaṃ. Te bhikkhū dentīti sambandho. “Gāravenā”ti padañca “sikkhākāmatāyā”ti padañca “dentī”ti pade hetu. Sīsassa upadhānaṃ **ussisaṃ**, tassa karīyate **ussisakaraṇaṃ**, taṃyeva attho payojanaṃ **ussisakaraṇattho**, tadatthāya. **Tatrāti** purimavacanāpekkhaṃ, “sikkhākāmatāyā”ti vacaneti attho. Nidassananti seso. Atha vā **sikkhākāmatāyāti** paccatte bhummavacanaṃ. “Idampissa hoti sīlasmi”ntiādīsu (dī. ni. 1.195 ādayo) viya. Idampi sikkhākāmatāya ayaṃ sikkhākāmatā sikkhākāmabhāvo hotīti yojanā. Esa nayo “tatridaṃ samantapāsādikāya samantapāsādikattasmi”ntiādīsūpi. Bhikkhū khipantīti yojanā. **Tanti** āyasmantaṃ rāhulaṃ. **Athāti** khipanato pacchā. **Idanti** vatthu. Sammuñcanikacavarachaddānakāni sandhāya vuttaṃ. Tenāyasmatā rāhulena pātitaṃ nu khoti yojanā. So pañāyasmā gacchatīti sambandho. **Aparibhogā aññesanti** aññehi na paribhuñjitabbā.

51. Hīti saccāṃ, yasmā vā. Sayanaṃ **seyyā**, kāyapasāraṇakiriyā, sayanti etthāti **seyyā**, mañcapīṭhādi. Tadubhayampi ekasesena vā sāmāññaniddesena vā ekato katvā “sahaseyya”nti vuttanti dassento āha “seyyā”tiādi. **Tatthāti** dvīsu seyyāsu. **Tasmāti** yasmā dve seyyā dassitā, tasmā. “Sabbacchannā”tiādinā lakkhaṇaṃ vuttanti yojanā. **Pākaṭavohāranti** loke viditaṃ vacanaṃ. **Dussakuṭiyanti** dussena chāditaṃ kuṭiyaṃ. Aṭṭhakathāsu yathāvutte pañcavidhacchadaneyeva gayhamāne ko dosoti āha “pañcavidhacchadaneyevā”tiādi. Yaṃ pana senāsaṇaṃ parikkhittanti sambandho. **Pākārena vāti** iṭṭhakilādārunā vā. **Aññena vāti** kilañjādinā vā. **Vatthenapīti** pisaddo pageva iṭṭhakādināti dasseti. **Yassāti** senāsanasaṅkhātāya seyyāya. Uparīti vā samantatoti vā yojanā. Ekena dvārena pavisitvā sabbapāsādassa vaḷaṅjitabbataṃ sandhāya vuttaṃ “ekūpacāro”ti. Satagabbhaṃ vā catussālaṃ ekūpacāraṃ hotīti sambandho. **Tanti** senāsanasaṅkhātāya seyyāya.

Tatthāti senāsanasaṅkhātāyaṃ seyyāyaṃ. Sambahulā sāmaṇerā sace honti, eko bhikkhu sace hotīti yojanā. “Sāmaṇerā”ti idaṃ paccāsanna vasena vuttaṃ, upalakkhaṇa vasena vā aññehipi sahaseyyānaṃ āpattisambhavato. Teti sāmaṇerā. **Sabbesanti** bhikkhūnaṃ. **Tassāti** sāmaṇerassa. **Eseva nayoti** eso eva nayo, na añño nayoti attho. Atha vā **eseva nayoti** eso iva nayo, eso etādiso nayo iva ayaṃ nayo datṭhabboti attho.

Api cāti ekaṃsena. **Etthāti** imasmiṃ sikkhāpade. **Catukkanti** ekāvāsaekānupasampannaṃ, ekāvāsanānupasampannaṃ, nānāvāsaekānupasampannaṃ, nānāvāsanānupasampannantī catusamūhaṃ, catuparimāṇaṃ vā. **Yoti** bhikkhu. **Hisaddo** vitthārajotako, taṃ vacanaṃ vitthārayissāmīti attho, vitthāro mayā vuccateti vā. **Devasikanti** divase divase. **Ṇikapaccayo** hi vicchatthavācako. Yopi sahaseyyaṃ kappeti, tassāpi āpattīti yojetabbo. **Tatrāti** “tiracchānagatenāpi”ti vacane.

“Apadānaṃ ahimacchā, dvipadānañca kukkuṭi;

Catuppadānaṃ majjārī, vatthu pārājikassimā’’ti. (pārā. aṭṭha. 1.55);

Imaṃ gāthaṃ sandhāya vuttaṃ ‘‘vuttanayenevā’’ti. **Tasmāti** yasmā veditabbo, tasmā. **Godhāti** kuṇḍo. **Biḷāloti** ākhubhujo. **Maṅgusoti** nakulo.

Asambaddhabhittikassa katapāsādassāti yojanā. **Tulāti** ettha tulā nāma thambhāna, mupari dakkhiṇuttaravittthārasena ṭhapito dāruviseṣo thalati thambhesu patiṭṭhātīti katvā. Tā pana heṭṭhimaparicchedato tisso, ukkaṭṭhaparicchedena pana pañcasattanavādayo. Nānūpacāre pāsādeti sambandho.

Vālasaṅghāṭṭhādīsūti vālarūpaṃ dassetvā katesu saṅghāṭṭhādīsū. Ādisaddena tulaṃ saṅghāṭṭhāti. Ettha ca **saṅghāṭṭho** nāma tulāna, mupari pubbacchimāyāmasena ṭhapito kaṭṭhavisese sammā ghaṭenti ettha gopānasyādayoti katvā. Te pana tayo honti. **Nibbakosabbhantareti** chadanakoṭṭiabbhantare. Parimaṇḍalaṃ vā caturassaṃ vā senāsanāṃ hotīti sambandho. **Tatrāti** tasmim̄ senāsane. Aparicchinno gabbhassa upacāro etesanti **aparicchinnaḡabbhūpacārā** sabbagabbhā, te pavisaṅgātīti attho. Nipannānaṃ bhikkhūnanti yojanā. **Tatrāti** tasmim̄ pamukhe. Pamukhassa sabbacchannattā, sabbaparicchannattā ca āpattim̄ karotīti yojanā. Nanu pamukhe channameva atthi, no paricchannanti āha ‘‘gabbhaparikkhepo’’tiādi. **Hīti** saccam̄.

Yaṃ pana andhakaṭṭhakathāyaṃ vuttanti sambandho. **Jagatīti** pathaviyā ca mandirāḷindavatthussa ca nāmametaṃ. Idha pana mandirāḷindavatthusāṅkhātā bhūbheda gahitā. **Tatthāti** andhakaṭṭhakathāyaṃ. Kasmā pālīyā na sametīti āha ‘‘dasahatthubbedhāpi’’tiādi. **Hīti** yasmā. **Tatthāti** andhakaṭṭhakathāyaṃ. Yepi mahāpāsādā hontīti yojanā. **Tesupīti** mahāpāsādesupi.

Sudhāchadanamaṇḍapassāti ettha ‘‘**sudhā**’’ti idaṃ upalakkhaṇavasena vuttaṃ yena kenaci chadanamaṇḍapassāpi adhippetattā. Maṇḍaṃ vuccati sūriyārasmī, taṃ pāti rakkhati, tato vā jananti **maṇḍapaṃ**. Nanu ekūpacāraṃ hoti pākārassa chiddattāti āha ‘‘na hī’’tiādi. **Hīti** saccam̄, yasmā vā. Vāḷaṅjanatthāya evāti evakāro yojetabbo. Tenāha ‘‘na vāḷaṅjanūpacchedanatthāyā’’ti. Atha vā ‘‘saddantarattāpohanena saddo atthaṃ vadatī’’ti (udā. aṭṭha. 1; dī. ni. ṭi. 1.1; ma. ni. ṭi. 1.1. mūlapariyāyāsuttavaṇṇanā; saṃ. ni. ṭi. 1.1. oghataraṇasuttavaṇṇanā; a. ni. ṭi. 1.1. rupādivaggavaṇṇanā) vuttattā ‘‘na vāḷaṅjanūpacchedanatthāyā’’ti vuttaṃ. **Kavāṭṭanti** ettha dvārameva adhippetam̄ pariyaṇena vuttattā, asati ca dvāre kavāṭṭassābhāvato. Saṃvaraṇavivaraṇakāle kavati saddam̄ karotīti **kavāṭṭam̄**.

Tatrāti ‘‘ekūpacārattā’’ti vacane. **Yassāti** paravādino. Anuyogo siyāti yojanā. **Idhāti** imasmim̄ sahaseyyasikkhāpade, vuttanti sambandho. **Tatthāti** pihitadvāre gabbhe. **Soti** paravādī. Sabbacchannattā āpatti itī vutteti yojanā. Eseva nayo ‘‘sabbaparicchannatā na hotī’’ti etthāpi. **Paccāgamissatīti** pati āgamissati, puna āgamissatīti attho.

Byaṅjanamattenevāti ‘‘sabbacchannā’’tiādiakkharapadamatteneva, na atthavasena. ‘‘Evaṅca satī’’ti iminā abyāpitadosam̄ dasseti. **Tatoti** anāpattito, pariyaṇeyyāti sambandho. **Tasmāti** yasmā aniyatesu vuttaṃ, tasmā. **Tatthāti** aniyatesu. **Idhāpīti** imasmim̄ sikkhāpadepi. **Yaṃ yanti** senāsanāṃ. **Sabbatthāti** sabbesu senāsanesu, sahaseyyāpatti hotīti sambandho.

53. Dvīsū aṭṭhakathāvādesu mahāaṭṭhakathāvādova yuttoti so pacchā vutto.

Imināpīti senambamaṇḍapenāpi. **Etanti** jagatiyā aparikkhittam̄. **Yathāti** yaṃsaddattho tatiyantaniṇṇāto, yena senambamaṇḍapenāti atthoti. Pañcamam̄.

6. Dutiyasahaseyyasikkhāpadam̄

55. Chaṭṭhe āgantukā vasanti etthāti **āvasatho**, āvasatho ca so agārañceti **āvasathāgāranti** dassento āha “āgantukānaṃ vasaṇāgāra”nti. Manussānaṃ santikā vacanaṃ sutvāti vacanaseso yojetabbo. **Sāṭakanti** uttarasāṭakaṃ, nivatthavattantipi vadanti. **Accāgammāti** tvāpaccayantapadassa sambandhaṃ dassetumāha “pavatto”ti. Yathā omasavādasikkhāpade akkosetukāmatāya khattiyaṃ “caṇḍālo”ti vadato alikaṃ bhaṇatopi musāvādasikkhāpadena anāpatti, omasavādasikkhāpadeneva āpatti, evamidhāpi mātugāmena saha sayato paṭhamasahaseyyasikkhāpadena anāpatti, imināva āpattīti daṭṭhabbanti. Chaṭṭhaṃ.

7. Dhammadesanāsikkhāpadaṃ

60. Sattame **mahādvāreti** bahi ṭhite mahādvāre. Āgamma, pavisitvā vā vasaṇaṭṭhānattā ovarako āvasatho nāmāti āha “ovarakadvāre”ti. **Suniggatenāti** suṭṭhu bahi nikkhamitvā gatena saddena. “Aññātu”nti padassa “na ñātu”nti atthaṃ paṭikkhipanto āha “ājānitu”nti. Iminā nakāravikāro aiti nipāto na hoti, āiti upasaggoti pana dasseti. “Viññunā purisenā”ti ettakameva avatvā “purisaviggahenā”ti vadanto manussapurisaviggahaṃ gahetvā ṭhiteṇa yakkhena petena tiracchānagatena saddhiṃ ṭhitāya mātugāmassa desetum na vaṭṭatīti dasseti. **Na yakkhenāti** yakkhena saddhiṃ ṭhitāya mātugāmassa desetum na vaṭṭatīti yojanā. Esa nayo “na petena, na tiracchānagatenā”ti etthāpi.

66. **Chappañcavācāhīti** ettha “pañcā”ti vācāsiliṭṭhavasena vuttaṃ kassaci payoṇassābhāvā. **Tatthāti** “chappañcavācāhī”ti pade. Eko gāthāpādo ekā vācāti vadanto cuṇṇiye vibhatyantam ekaṃ padaṃ ekā vācā nāmāti dasseti, atthajotakapadaṃ vā vākyapadaṃ vā na gahetabbaṃ. “Ekaṃ padaṃ pālito, pañca aṭṭhakathāto”ti iminā “dve padāni pālito, cattāri aṭṭhakathāto”tiādinayopi gahetabbo. Chapadānatikkamoyeva hi pamāṇaṃ. **Tasminti** ettha sati vibhattivipallāse līngassāpi vipallāso hoti “tasmi”nti pullīngena vuttattā. Sati ca vibhattivipallāse “tassā”ti itthilīngabhāvena pavattā. “Mātugāmassā”ti niyatapullīngāpekkhanassa asamभवतो atthavasena “ekissā”ti itthilīngabhāvena vuttaṃ. Iminā bhedaṅganissito viśesanavisesyopi atthīti dasseti. **Tumhākanti** niddhāraṇasamudāyo. “Suṇāthā”ti avatvā ābhogopi vaṭṭatīti āha “paṭhama”ntiādi. **Paṭhamanti** ca paṭhamameva. Tena vuttaṃ “na pacchā”ti. Puṭṭho hutvā bhikkhu kathetīti yojanāti. Sattamaṃ.

8. Bhūtārocanasikkhāpadaṃ

67. Aṭṭhame **tatthāti** catutthapārājikasikkhāpade. **Idhāti** bhūtārocanasikkhāpade. **Hīti** saccam, yasmā vā. **Payuttavācāti** paccayehi yuttā vācā. **Tathāti** tato guṇārocanakāraṇā, ariyā sādhiṃsūti yojanā.

Yatasaddānaṃ niccasambandhattā vuttaṃ “ye”tiādi. **Sabbepīti** puthujjanāriyāpi. **Bhūtanti** vijjamaṇaṃ. Kasmā sabbepi paṭijāniṃsu, nanu ariyehi attano guṇānaṃ anārocitattā na paṭijānitabbanti āha “ariyānampi”tiādi. **Hīti** saccam, yasmā vā. Ariyānampi abbhantare uttarimanussadhammo yasmā bhūto hoti, tasmā sabbepi “bhūtaṃ bhagavā”ti paṭijāniṃsūti yojanā. Yasmā bhāsito viya hoti, tasmāti yojanā. Ariyā paṭijāniṃsūti sambandho. **Anādīnavadassinoti** dosassa adassanadhammā. **Tehīti** ariyehi, bhāsītoti sambandho. Yaṃ piṇḍapātaṃ uppādesunti yojanā. **Aññeti** puthujjanā. **Sabbasaṅgāhikenevāti** sabbesaṃ puthujjanāriyānaṃ saṅgahaṇe pavatteneva. **Sikkhāpadavibhaṅgepi** sikkhāpadassa padabhājanīyepi. **Tatthāti** catutthapārājike. **Idhāti** imasmiṃ sikkhāpade.

77. Uttarimanussadhammeva sandhāya vuttaṃ, na sutādiguṇanti attho. **Antarā vāti** parinibbānakālato aññasmiṃ kāle vā. **Atikaḍḍhiyamānenāti** atinippīliyamānena. **Ummattakassāti idaṃ panāti** ettha iti-saddo ādyattho. Tena “khittacittassā”tiādiṃ saṅgaṇhāti. **Diṭṭhisampannānantī** maggapaññāya, phalapaññāya ca sampannānaṃ. **Anāpattīti** pācittiyāpattiyā anāpatti na vattabbā, āpattiyeva hoti, tasmā “ummattakassa anāpattī”ti na vattabbanti adhippāyoti. Aṭṭhamam.

9. Duṭṭhullārocanasikkhāpadam

78. Navame **tatrāti** tassam “duṭṭhullā nāmā” tiādipāliyaṃ, tāsū vā pāliatṭhakathāsu. **Vicāraṇāti** vīmaṃsanā. **Upasampannasaddeti** upasampannasaddatṭhabhāve. Ettha hi sadde vuccamāne avinābhāvato saddena atthopi vutto, vināpi bhāvapaccayena bhāvattassa nātābattā bhāvopi gahetabbo, tasmā vuttam “upasampannasaddatṭhabhāve” ti. Eseva nayo “duṭṭhullasaddē” ti etthāpi. Etaṃ parimāṇaṃ yassāti **etaṃ**, “terasa saṅghādisesā” ti vacanaṃ. Etaṃ eva vattabbaṃ, na “cattāri ca pārājikāni” ti idanti attho. **Tatthāti** pāliyaṃ. Kassaci vimati bhaveyya, kiṃ bhaveyyāti yojanā. Āpattim ārocentena akkosantassa samānattā vuttam “evaṃ sati” tiādi. **Pācittiyameva cāti** casaddo byatirekattho, na dukkaṭam āpajjati attho. **Hīti** saccam. **Etanti** pācittiyāpajjanatam, “asuddho hoti...pe...omasavādassā” ti vacanaṃ vā, vuttanti sambandho. **Etthāti** pāliyaṃ. **Aṭṭhakathācariyāveti** ettha evakāro aṭṭhānayo, pamāṇanti ettha yojetabbo, kāraṇamevāti attho. Tena vuttam “na aññā vicāraṇā” ti. Atha vā **aññāti** sāmyatthe paccattavacanametam, na aññesaṃ vicāraṇā pamāṇanti attho. Evañhi sati evakāro ṭhānayo gova. **Pubbepi cāti** ganthārambhakālepi ca.

Etanti aṭṭhakathācariyānaṃ pamāṇatam. Saṃvaratthāya eva, anāpajjanatthāya eva ca anuññātanti yojanā. Tenāha “na tassa” tyādi. **Tasmāti** yasmā bhikkhubhāvo nāma na atthi, tasmā suvuttamevāti sambandho.

80. **Sāti** bhikkhusammuti, saṅghena kātabbāti yojanā. **Katthacāti** kismiñci ṭhāne. **Idhāti** imasmim sikkhāpade. “Vuttattā” ti padam “kātabbā” ti pade hetu. **Esāti** eso bhikkhu. **Hitesitāyāti** hitassa esitāya, atthassa icchatāyāti attho.

82. **Sesānīti** ādimhi pañcasikkhāpadato sesāni upari pañca sikkhāpadāni. **Assāti** anupasampannassa. **Ghaṭevāti** sambandham katvāti. Navamaṃ.

10. Pathavīkhaṇasikkhāpadam

86. Dasame bhagavā dasseti yojanā. **Etthāti** pathaviyaṃ. **Tatthāti** tesu pāsānādīsu. **Muṭṭhippamānatoti** khaṭakapamānato. **Sāti** adaḍḍhathavī. **Hatthikucchiyanti** evaṃnāmake ṭhāne. Ekapacchipūraṃ pathavinti sambandho. **Tesaṃyevāti** appapaṃsuappamattikāpadānaṃ eva. **Hīti** saccam, yasmā vā. **Etanti** yebhuyenapāsānādīpañcakaṃ. **Tanti** kusītam. **Āṇāpetvāti** ettha “āṇa pesane” ti dhātupāṭhesu vuttattā āṇadhātuyeva pesanaṣṅkhātam hetvattham vadati, na ṇāpaccayo, so pana dhātvattheyeva vattati. Na hi tassa viṣuṃ vutto abhidheyo atthi dhātvatthato aññassa abhidheyassābhāvā. **Tāvāti** paṭhamam pāḷimuttakavinicchayassa, tato vā.

Pokkham padumaṃ neti **pokkharāṇi**. “Sodhenteḥi” ti padam “ussīñcituṃ apānetu” nti padesu bhāvakattā. **Yoti** “tanukaddamo” ti padena yojetabbo. Yo tanukaddamoti hi attho. **Kuṭehīti** ghaṭehi. **Ussīñcītunti** ukkhipitvā, uddharitvā vā siñcituṃ. **Tatrāti** sukkhakaddame, “yo” ti pade avayavādhāro. **Yoti** sukkhakaddamo.

Taṭanti kūlam. **Udakasāmāntāti** udakassa samīpe. **Omakacatumāsanti** catumāsato ūnakaṃ. **Ovaṭṭhanti** devena ovassitam hoti saceti yojanā. **Patatīti** taṭam patati. **Udakeyevāti** pakatiudakeyeva. **Udakassāti** vassodakassa. **Tatthāti** pāsānapitṭhiyaṃ. **Paṭhamamevāti** soṇḍikhaṇanato paṭhamam eva. **Udake pariyaḍiṇṇeti** udake sukkhe. **Pacchāti** udakapūrato pacchā. **Tatthāti** soṇḍiyaṃ. **Udakeyevāti** mūlaudakeyeva. **Udakanti** āgantukaudakaṃ. **Alliyatīti** piṭṭhipāsāne laggati. **Tampīti** sukhumarajampi. **Akatapabbhāreti** vaḷaṅjena akate pabbhāre. Upacikāhi vamīyati, gharagoḷikādayo vā satte vamatīti **vammiko**.

Gāvīnaṃ khuro kaṅṭakasadisattā **gokaṅṭako** nāma, tena chinno kaddamo “gokaṅṭako” ti vuccati.

Acchadanam vā vinaṭṭhacchadanam vā purāṇasenāsanam hotīti yojanā. **Tatoti** purāṇasenāsanato, gaṇhitum vaṭṭatīti sambandho. **Avasesanti** vinaṭṭhacchadanato. Avasesam iṭṭhakam gaṇhāmi iti saññāyāti yojetabbo. **Tenāti** iṭṭhakādīnā. **Yā yāti** mattikā. **Atintāti** anallā, akilinnāti attho.

Tasminti mattikāpuñje. **Sabboti** sakalo mattikāpuñjo. **Assāti** mattikāpuñjassa. “Kappiyakārakehī”ti padaṃ “apanāmetvā”ti pade kāritakammaṃ. Kasmā vaṭṭatīti āha “udakenā”tiādi. **Hīti** saccam, yasmā vā.

Tatthāti mattikāpākāre. **Aññampīti** maṇḍapathambhato aññampi. **Tena apadesenāti** tena pāsāṇādipavaṭṭanalesena.

Passāvadhārāyāti muttasotāya. **Kattarayattihīyāti** kattaradaṇḍena. Ettha hi kattarayati aṅgapaccāṅgānam sithilabhāvena sithilo hutvā bhavatīti katvā **kattaro** vuccati jīṇṇamanusso, tena ekantato gahetabbatā kattarena gahitā yatthi, kattarassa yatthīti vā katvā kattarayattihī vuccati kattaradaṇḍo. Dantajapaṭhamakkharena sajjhāyitabbo. **Vīriyasampaggahaṇatthanti** vīriyassa suṭṭhu paggaṇhanattham, vīriyassa ukkhipanatthanti attho. Keci bhikkhūti yojanā.

87. Tatrāpīti iṭṭhakakapālādīsipi. **Hīti** saccam. **Tesam anupādānattāti** tesam iṭṭhakādīnam aggissa anindhanattā. **Hīti** saccam, yasmāvā. **Tānīti** iṭṭhakādīni. **Avisayattāti** āpattiyā anokāsattā. **Tiṇukkanti** tiṇamayam ukkam. **Tatthevāti** mahāpaccariyam eva. Arīyati agginipphādanattham ghaṃsīyati etthāti **araṇī**, heṭṭhā nimanthanīyadāru. Saha dhanunā eti pavattatīti **sahito**, upari nimanthanadāru. Araṇī ca sahito ca araṇīsahito, tena aggim nibbattetvāti yojanā. Yathā kariyamāne na ḍayhati, tathā karohīti sambandho.

88. Āvāṭam jānāti āvāṭam kātum, khaṇitum vā jānāhīti attho. “Evaṃ mahāmatikam jāna, thusamattikam jānā”ti etthāpi yathālābham sampadānavācaka padaṃ ajjhāharitvā yojanā kātabbā. **Sāti** pathavī. **Tenāti** pavaṭṭanādīnāti. Dasamaṃ.

Musāvādavaggo paṭhamo.

2. Bhūtagāmaṅgavaggo

1. Bhūtagāmasikkhāpada-atthayojanā

89. Dutiyavaggassa paṭhame **tassāti** devatāya. **Ukkhittam pharasunti** uddham khittam kuṭhāriṃ. **Niggahetunti** saṅghātam, nivattetum vā. **Cakkhuvisayātīti** pasādacakkhussa gocarātikante. **Mahārājasantikāti** vessavaṇamahārājassa santikā. **Thanamūleyevāti** thanasamīpeyeva. **Himavanteti** himauggiraṇe vane, himayutte vā. **Tatthāti** himavante, devatāsannipāte vā. **Rukkhadhammoti** rukkhasabhāvo. Rukkhadhammo ca nāma chedanabhedanādīsū rukkhānam acetanattā kopassa akaraṇam, tasmim rukkhadhamme ṭhitā devatā rukkhadhamme ṭhitā nāma, chedanabhedanādīsū rukkhassa viya rukkhaṭṭhakadevatāya akopanam rukkhadhamme ṭhitā nāmāti adhippāyo. **Tatthāti** tāsū sannipātadevatāsū. **Itīti** imassa alabhanassa, imasmim alabhane vā, ādīnavanti sambandho. **Bhagavato cāti** ca-saddo “pubbacarita”nti ettha yojetabbo. Imañca ādīnavam addasa, bhagavato pubbacaritañca anussarīti vākyasampiṇḍanavasena yojanā kātabbā. **Tenāti** dassanānussaraṇakāraṇena. **Assāti** devatāya. Saṃvijjati pitā assāti **sapitiko**, putto. (**Tāvāti** ativiya, paṭisañcikkhantiyāti sambandho) “mariyādam bandhissatī”ti vatvā tassa attham dassento āha “sikkhāpadaṃ paññāpessatī”ti. Iti paṭisañcikkhantiyā assā devatāya etadahosīti yojanā.

Yoti yo koci jano. **Veti** ekantena. **Uppatitanti** uppajjanavasena attano upari patitam. **Bhantanti** bhamantaṃ dhāvantaṃ, **vārayeti** nivāreyya niggaṇheyyāti attho. **Tanti** janam. Ayaṃ panettha yojanā –

sārathi bhantaṃ rathaṃ vāraye iva, tathā yo ve uppatitaṃ kodhaṃ vāraye, taṃ ahaṃ sārathiṃ iti brūmi. Itaro kodhanivārakato añño rājauparājādīnaṃ sārathibhūto jano rasmiggāho rajjuggāho nāmāti.

Dutiyagāthāya vejjo **visaṭaṃ** vitthataṃ **sappavisam** sappassa āsivissassa viṣaṃ garaḷaṃ **osadhehi** bhesajjena, mantena ca vineti iva, tathā yo bhikkhave uppatitaṃ kodhaṃ mettāya vineti, so bhikkhu **urago** bhujago **purāṇaṃ** pure bhavaṃ **jiṇṇaṃ** purāṇattā jiṇṇaṃ tacam jahāti iva, tathā **orapāraṃ** apārasaṅkhātaṃ pañcorambhāgiyasamyojanaṃ jahātīti yojanā kātābbā.

Tatrāti dvīsu gāthāsu. Vatthu pana vinaye ārūḷhanti yojanā. **Athāti** pacchā. **Yassa devaputtassāti** yena devaputtena. **Pariggahoti** paricchinditvā gahito. **Soti** devaputto. **Tatoti** upagamanato. Yadā hoti, tadāti yojanā. **Mahesakkhadevatāsūti** mahāparivārāsu devatāsu, mahātejasu vā. **Paṭikkamantīti** apenti. Devatā yampi pañhaṃ pucchantīti yojanā. **Tatthevāti** attano vasanaṭṭhāneyeva. **Upaṭṭhānanti** upaṭṭhānatthāya, sampadānatthe cetam upayogavacanaṃ. Atha vā upagantvā tiṭṭhati etthāti **upaṭṭhānaṃ**, bhagavato samīpaṭṭhānaṃ, taṃ āgantvāti attho. Nanti taṃ, ayameva vā pāṭho.

90. “Bhavanti”ti iminā virūḷhe mūle nīlabhāvaṃ āpajjitvā vaḍḍhamānake taruṇarukkhaḡacchādike dasseti. “Ahuvatthu”nti iminā pana vaḍḍhitvā ṭhite mahantarukkhaḡacchādike dasseti. “Ahuvatthu”nti ca hiyyattanisaṅkhātāya tthuṃ-vibhattiyā hū-dhātussa ūkārassa uvādeso hoti. Potthakesu pana “ahuvatī”ti pāṭho dissati, so apāṭhoti daṭṭhabbo. “Jāyanti”ti iminā bhū-dhātussa sattatthabhāvaṃ dasseti, “vaḍḍhanti”ti iminā vaḍḍhanatthabhāvaṃ. **Etanti** “bhūtagāmo”ti nāmaṃ. Pīyate yathākāmaṃ paribhuñjīyate, pātabbaṃ paribhuñjitabbanti vā **pātabyaṃ**, pāsaddo yathākāmaparibhuñjanattho. Tenāha – “chedanabhedanādīhi yathāruci paribhuñjitabbatāti attho”ti.

91. “Idānī”ti padaṃ “āhā”ti pade kālasattamī. **Yasminti** bīje. **Tanti** bījaṃ. **Pañca bījajātānīti** ettha jātasaddassa tabbhāvatthataṃ sandhāya aṭṭhakathāsu evaṃ vuttaṃ. Tabbhāvatthassa “mūle jāyanti”ti imāya pāḷiyā asaṃsandanaṃ sandhāya vuttaṃ saṅgahakārena “na samenti”ti. Aṭṭhakathācariyānaṃ matena satī jātasaddassa tabbhāvatthabhāve “mūle jāyanti”tiādīsu mūle mūlāni jāyantīti doso bhavēyyāti manasi katvā āha “na hī”tiādi. **Hīti** saccaṃ, yasmā vā. **Tānīti** rukkhādīni. **Tassāti** “bhūtagāmo nāma pañca bījajātānī”ti padassa. **Etanti** “bījajātānī”ti nāmaṃ. Bījesu jātāni **bījajātānīti** vutte “mūle jāyanti”tiādinā sametī. **Etenāti** “bījato”tiādinā saṅgahoti sambandho.

“Yehī”ti padaṃ “jātattā”ti pade apādānaṃ, hetu vā “vuttānī”ti pade karaṇaṃ, kattā vā. **Tesanti** bījanaṃ. Rukkhādīnaṃ viruṇaṃ janētīti **bījaṃ**. “Bījato”tiādinā kāriyopacārena kāraṇassa dassitattā kāraṇupacāraṃ padīpeti. Aññānīpi yāni vā pana gacchavallirukkhādīni **atthi** saṃvijjanti, tāni gacchavallirukkhādīni jāyanti sañjāyantīti yojanā. **Tānīti** gacchavallirukkhādīni. **Tāṅca** mūlaṃ, pāḷiyaṃ vuttahaliddādi ca atthi, sabbampi etaṃ mūlabījaṃ nāmāti sambandho. **Etthāti** bījesu, khandhabījesu vā.

92. Saññāvasenāti “bīja”nti saññāvasena. “Tatthā”ti padaṃ “veditabbo”ti pade ādhāro. “Yathā”tiādinā kāraṇopacārena kāriyassa vuttattā phalūpacāraṃ dasseti. Yaṃ bījaṃ vuttaṃ, taṃ dukkaṭavattthūti yojanā. Yadetam ādipadanti yojetabbaṃ. **Tenāti** ādipadena. Ravīyati bhagavatā kathīyatīti **rutam**, pāḷi, tassa anurūpaṃ **yathārutam**, pāḷianatikkantanti attho.

Etthāti “bīje bījasaññī”tiādipade, imasmim sikkhāpade vā. Udaḡe ṭhāti pavattatīti **udakaṭṭho**, evaṃ thalaṭṭhōpi. **Tatthāti** udakaṭṭhathalaṭṭhesu. Sāsapassa mattaṃ pamāṇaṃ assa sevālassāti **sāsapamattiko**. Tilassa bījapamāṇaṃ assa sevālassāti **tilabījako**. Pamāṇatthe ko. Ādisaddena saṅkhapaṇakādayo sevāle saṅgaṇhāti. Tattha tilabījapamāṇo jalasaṅṭhito nīlādivaṇṇayutto sevālo **tilabījaṃ** nāma, sapatto appakaṇḡo ukkhalipidhānādīpamāṇo samūlo eko sevālaviseso **saṅkho** nāma, bhamarasāṅṭhāno nīlavaṇṇo eko sevālaviseso **paṇako** nāma. Udaḡaṃ sevātīti **sevālo**. **Tatthāti** sevālesu. **Yoti** sevālo. Patiṭṭhitaṃ sevālanti sambandho. **Yattha katthacīti** mūle vā naḡe vā patte vā. **Uddharitvāti** uppātetvā. “Hatthehī”ti padaṃ “viyūhitvā”ti pade karaṇaṃ. **Hīti** saccaṃ, yasmā vā. **Tassāti** sevālassa. **Ettāvatāti** ito cito ca viyūhanamattena. Yo sevālo nikkhamati, taṃ sevālanti yojanā.

Parissāvanantarenāti parissāvanachiddena. Uppalāni asmiṃ gaccheti **uppalinī**. Padumāni asmiṃ gaccheti **paduminī**, ino, itthilingajotako ī. **Tatthevāti** udayeva. **Tānīti** vallītiṇāni. **Hīti** saccaṃ, yasmā vā. **Anantakoti** sāsapamattiko sevālo. So hi natthi attato anto lāmako sevālo etassāti katvā “anantako”ti vuccati. Attanāyeva hi sukhumo, tato sukhumo sevālo natthīti adhippāyo. **Tatthāti** dukkaṭavattubhāve. **Tampīti** “sampuṇṇabhūtagāmaṃ na hotī”ti vacanampi. Pisaddo mahāpaccariādiatthakathācariyānaṃ vacanāpekkho. **Hīti** saccaṃ, yasmā vā. Na āgato, tasmā na sametīti yojanā. **Athāti** tasmim anāgate. **Etanti** anantakasevālādiṃ. Gacchissatīti vadeyyāti sambandho. **Tampīti** “gacchissatī”ti vacanampi. Pisaddo purimaṭṭhakathācariyānaṃ vacanāpekkho.

Abhūtagāmamūlattā tādisassa bījagāmassāti ettha bījagāmo tividho hoti – yo sayam bhūtagāmato hutvā aññampi bhūtagāmaṃ janeti, ambaṭṭhiādiko. Yo pana sayam bhūtagāmato hutvā aññam pana bhūtagāmaṃ na janeti, tālanāḷikerādikhāṇu. Yo pana sayampi bhūtagāmato ahutvā aññampi bhūtagāmaṃ na janeti. Pānīyaghaṭṭādīnaṃ bahi sevāloti. Bhūtagāmo pana catubbidho hoti – yo sayam bījagāmato hutvā aññampi bījagāmaṃ janeti, etarahi ambarukkhādiko. Yo pana sayam bījagāmato ahutvā aññam bījagāmaṃ janeti, ādikappakāle ambarukkhādiko. Yo pana sayam bījagāmato hutvā aññam pana bījagāmaṃ na janeti, nīlavanṇo phalitakadalīrukkhādiko. Yo pana sayampi bījagāmato ahutvā aññampi bījagāmaṃ na janeti, idha vutto anantakasevālādikoti. Tattha catuttham bhūtagāmaṃ sandhāya vuttam “abhūtagāmamūlakattā tādisassa bījassā”ti. Ayam pana tatiyabījagāmassa ca catutthabhūtagāmassa ca viseso – tatiyabījagāme mūlapaṇṇāni na paññāyanti, catutthabhūtagāme tāni paññāyantīti. Mūlapaṇṇānaṃ apaññāyanattā bījagāmoti vutto, tesam paññāyanattā bhūtagāmoti vutto. Itarathā hi virodho bhavēyyāti. Attano vāde pācittiyabhāvato garukaṃ, mahāpaccariādīnaṃ vāde dukkaṭamattabhāvato lahukaṃ. **Etanti** ṭhānaṃ.

Evam udakattam dassetvā thalaṭṭham dassento āha “thalaṭṭhe”tiādi. Thalaṭṭhe vinicchayo evam veditabboti yojanā. **Tatthāti** haritakhāṇūsu. **Uddham vaḍḍhatīti** navasākhāniggamanena chinnato upari vaḍḍhati. **Soti** khāṇu. Phalitāya kadaliyā khāṇu bījagāmena saṅgahitoti yojanā. Phalam sañjātam etissāti **phalitā**. **Tathāti** “bhūtagāmeneva saṅgahitā”ti padāni ākaḍḍhati. **Yadāti** yasmim kāle. **Ratanappamāṇāpīti** hatthappamāṇāpī. **Athāti** apādānattho, tato rāsikaraṇato aññanti attho. Bhūmiyam nikhaṇantīti sambandho. “Mūlesu ceva paṇṇesu cā”ti ettha casaddo samuccayatthova, na vikappatthoti āha “mūlamattesu panā”tiādi.

Bījānīti mūlādibījāni. Ṭhapitāni hontīti sambandho. “Upārī”ti padena heṭṭhā mūlāni cāti attham nayena ṇāpeti. Na ankure niggatamatteyeva, atha kho harite nīlapanṇavanṇe jāteyeva bhūtagāmasaṅgaho kātabboti āha “harite”tiādi. Tālaṭṭhīnaṃ mūlanti sambandho. **Dantasūci viyāti** hatthidantasūci viya. Yathā asampuṇṇabhūtagāmo tatiyo koṭṭhāso na āgato, na evam amūlakabhūtagāmo. So pana āgatoyevāti āha “amūlakabhūtagāme”ti. Amūlikalatā viya amūlakabhūtagāme saṅgaham gacchatīti attho.

Vandākāti rukkhādanī. Sā hi sayam rukkham nissāya jāyantīpi attano nissayānaṃ rukkhānaṃ adanattā bhakkhanattā vadīyati thutīyatīti “vandākā”ti vuccati. **Aññā vāti** vandākāya aññā vā. **Tanti** vandākādiṃ. **Tatoti** rukkhato. **Vananti** khuddako gaccho. **Pagumboti** mahāgaccho. **Daṇḍakoti** rukkho daṇḍayogato. **Tassāpīti** amūlikalatāyapi. **Ayameva vinicchayoti** vandākādikassa vinicchayo viya ayam vinicchayo daṭṭhabboti yojanā. “Dve tīṇi pattānī”ti vuttattā ekapatto sañjāyantopi aggabījasaṅgaham gacchatīti attho. “Anupasampannā”ti padam “littassā”ti pade kattā. **Nidāghasamayeti** gimhakāle. **Abbohārikoti** āpattiyā aṅganti na voharitabbo. Voharitam na arahatīti attho. **Etanti** abbohārikatam, “sace...pe... pamajjitabbā”ti vacanam vā.

Ahiṃ sappam chādetīti **ahicchattam**, tamyeva **ahicchattakam**. Yathākathañci hi byuppatti, ruḷhiyā atthavinicchayo. **Tasmāti** tato vikopanato. **Tatthāti** ahicchattake. Heṭṭhā “udakapappaṭako”ti vatvā idha “rukkhapappaṭikāyapī”ti vuttattā pappaṭakasaddo dvilingoti daṭṭhabbo. **Tanti** pappaṭikam. Ṭhitam niyyāsanti sambandho. Evam “lagga”nti etthāpi. **Hatthakukkucenāti** hatthalolena. “Chindantassāpī”ti pade hetu.

Vāsathikenāti vāsaṃ icchantena. “Ocināpetabbā”ti pade kattā. **Uppātentehī**ti uddharantehi. **Tesanti** sāmaṇeraṇaṃ. Sākhāṃ gahitanti sambandho. Thāpitassa siṅgīverassāti yojanā.

Chijjanakanti chijjanayuttaṃ, chijjanārahanti attho. “Caṅkamitaṭṭhānaṃ dassessāmī”ti iminā vattasīsenā caṅkamaṇaṃ vaṭṭatīti dasseti. “Bhijjati”ti iminā abhijjamāne gaṇṭhipi kātabboti dasseti. **Dārumakkaṭakanti** makkaṭassa hattho **makkaṭo** upacārena, makkaṭo viyāti **makkaṭako**, sadisatthe ko. Dārusaṅkhāto makkaṭako **dārumakkaṭako**. Taṃ ākoṭentīti sambandho. **Aniyāmitattā**ti imanti aniyāmitattā vacanassa. Idaṃ mahāsāmaññaṃ, visesasāmaññaṃ viyāyati āha “nāmaṃ gahetvāpi”tiādi. **Sabbanti** sabbāṃ vacanaṃ.

“Imaṃ jānātiādīsū”ti padaṃ “evamattho daṭṭhabbo”ti pade ādhāro. **Imaṃ mūlabhesajjaṃ jānāti** imaṃ mūlabhesajjaṃ yojitūṃ jānāti yojanā. **Ettāvatāti** “imaṃ jānā”tiādivacanamatthena. **Kappiyanti** samaṇavohārena, vohārassa vā yuttaṃ anurūpaṃ. **Etthāti** “kappiyaṃ kātabba”nti vacane. **Nibbaṭṭabjamevāti** phalato nibbaṭṭetvā viṣuṃ kataṃ bijaṃ eva. **Tatthāti** sutte. Karontena bhikkhunā kātabbanti yojanā. “**Kappiyanti vatvāvā**”ti iminā paṭhamāṃ katvā aggisatthanakhāni uddharitvā pacchā vattūṃ na vaṭṭatīti dasseti. **Lohamayasatthassāti** ayatambādilohamayassa satthassa. **Tehīti** manussādīnaṃ nakhehi. **Tehīti** assādīnaṃ khurehi. **Tehīti** hatthinakhehi. **Yehīti** nakhehi. **Tatthajātakehipīti** tasmīṃ satthe jātakehipi, nakhehīti sambandho.

Tatthāti purimavacanāpekkhāṃ. “Kappiyaṃ karontenā”tiādivacanamapekkhati. “Ucchuṃ kappiyaṃ karissāmī”ti ucchumeva vijjhāti, pageva. “Dāruṃ kappiyaṃ karissāmī”ti ucchuṃ vijjhāti, “dāruṃ kappiyaṃ karissāmī”ti dārumeva vā vijjhāti, vaṭṭati ekābaddhattāti vadanti. **Tanti** rajjūṃ vā vallīṃ vā. Sabbāṃ khaṇḍanti sambandho. **Tatthāti** maricapakkesu. **Kaṭāhanti** ekāya bhājanavikatiyā nāmametāṃ. Idha pana bījānaṃ bhājanabhāvena taṃsadisattā phalapheggupi “kaṭāha”nti vuccati. Ekābaddhanti kaṭāhena ekato ābaddhāṃ.

Tānīti tiṇāni. **Tenāti** rukkhapavaṭṭanādīnā. **Tatrāti** tasmīṃ thapanapātanaṭṭhāne. “Manussaviggahapārājikavaṇṇanāya”nti padaṃ “vutta”nti pade sāmaññādhāro. Bhikkhu ajjhottaṭṭho hotīti sambandho. **Opātetī** āvāṭe. So hi avapātanaṭṭhānattā “opāto”ti vuccati. **Rukkhanti** ajjhottaṭṭharukkhāṃ. **Bhūmīti** opātathirabhūmiṃ. **Jīvīti** nimittatthe paccattavacanāṃ, jīvītakāraṇāti attho. “Bhikkhunā”ti padaṃ “nikkhāmetu”nti pade bhāvakkattā, kāritakattā vā. “Ajjhottaṭṭhabhikkhu”nti vā “opātabhikkhu”nti vā kāritakammaṃ ajjhāharitabbaṃ. **Tatthāti** anāpattibhāve, anāpattibhāvassa vā. **Etassāti** suttassa. Paro pana kāruññaṃ karotīti sambandho. **Etampīti** kāruññaṃ. **Hīti** saccaṃ, yasmā vāti. Paṭhamāṃ.

2. Aññavādakasikkhāpadaṃ

94. Dutiye **anācāranti** acaritabbaṃ kāyavacīdvāravītikkaṃ. Sabbanāmassa aniyamatthattā idha vacananti āha “aññaṃ vacanena aññaṃ vacana”nti. **Soti** bhikkhu, vadatīti sambandho. **Koti** ko puggalo. **Kinti** kiṃ āpattim. **Kisminti** kismiṃ vatthusmiṃ. **Kinti** kiṃ kammaṃ. **Kanti** kaṃ puggalaṃ. **Kinti** kiṃ vacanaṃ.

Etthāti “ko āpanno”tiādiṇā. “Bhikkhūhī”ti padaṃ “vutto”ti pade kattā. **Asārūppanti** bhikkhūnaṃ asārūppaṃ. **Esoti** eso attho, vibhavoti attho. **Etanti** vatthu. Bhaṇanto vā hutvā aññaṃ paṭicaratīti sambandho. **Etthāti** paṭicchannāsane. **Sotanti** sotadvāraṃ. **Cakkhūti** cakkhūdvāraṃ.

98. **Aññanti** pucchitathato aññaṃ apucchitamatthāṃ. Bhāvappadhānoyaṃ kattaniddesoti āha “aññaṃ paṭiccarāṇasatthaṃ nāma”nti. **Tuṇhībhāvassāti** abhāsanassa. Ātyūpasaggo luttaniddiṭṭhoti āha “āropetū”ti. Evaṃ “aropite”ti etthapi. Tenāha “anāropite”ti.

101. Tanti aññavādakavihesakaropanakammaṃ. **Assāti** bhaveyya, hoti vā.

102. Kinti kiṃ vacanaṃ. **Yenāti** yena byādhinā kathetuṃ na sakkoti, tādiso byādhi mukhe hotīti yojanā. **Tappaccayāti** tato kathitakāraṇāti. Dutiyam.

3. Ujjhāpanakasikkhāpadaṃ

103. Tatiye **bhikkhū ujjhāpentī** ettha “bhikkhū”ti kārītakammattā karaṇatthe upayogavacananti āha “tehi bhikkhūhi”ti. Okāraviparīto ukāroti ca jhesaddo ñāṇatthoti ca dassento āha “avajānāpentī”ti. “Taṃ āyasmanta”nti padaṃ “avajānāpentī”ti pade dhātukammaṃ. Anekathattā dhātūnaṃ jhesaddo olokanattho ca cintanattho ca hoti, tenāha “olokāpentī”tiādi. **Etthāti** “bhikkhū ujjhāpentī”ti pade. **Chandāyāti** chandattham. Yesaṃ senāsanāni ca paññapeti, bhattāni ca uddisati, tesam attani pematthanti attho. Aṭṭhakathāyaṃ pana “chandāyāti chandenā”ti vuttaṃ. Iminā liṅgavipallāsanayo vutto. Paresam attano pemeṇāti attho. **Pakkhapātenāti** attano pakkhe pātāpanena.

105. Ujjhāpenti anenāti **ujjhāpanakaṃ**. Khiyyanti anenāti **khiyyanakanti** dassento āha “yena vacanenā”tiādi.

106. Upasampannaṃ saṅghena sammataṃ maṅkukattukāmoti sambandham dassento āha “upasampannaṃ saṅghena sammata”ntiādi. Sambajjhanaṃ **sambandho**, kātabboti yojanā. Upasampannassa saṅghena sammatassa avaṇṇaṃ kattukāmo ayasaṃ kattukāmoti vibhattivipariṇāmena sambandham dassento āha “vibhattivipariṇāmo kātabbo”ti. “Vasenā”ti padaṃ vibhattivipariṇāmo kātabbo”ti pade visesanaṃ. Yasmā viseso natthi, tasmā katanti yojanā. **Tanti** “khiyyanaka”nti padaṃ. **So ca bhikkhūti** ujjhāpanako ca khiyyanako ca so ca bhikkhu. **Athāti** tasmā ujjhāpanakakhiyyanakakarattā. **Assāti** bhikkhuno. **Assāti** bhaveyya.

“Upasampanna”nti padaṃ “ujjhāpetī”ti pade dhātukammaṃ “anupasampanna”nti padaṃ kārītakammaṃ, “anupasampanna”nti padaṃ “ujjhāpetī”ti kārītakiriyaṃ apekkhitvā kammaṃ hoti. “Khiyyati”ti suddhakiriyāya apekkhāya vibhattivipallāso hotīti āha “tassa vā”tiādi. **Tassāti** anupasampannassa santiketi sambandho. **Tanti** saṅghena sammataṃ upasampannaṃ. “Saṅghena asammatā”nti ettha na apalokanakammaena asammatam, kammavācāya pana asammatanti āha “kammavācāyā”tiādi. Dve tayo hutvā kammavācāya sammanitumasakkuṇeyyattā asammatanti ca dassento āha “yatrā”tiādi. **Yatrāti** yasmīṃ vihāre. “Anupasampannaṃ saṅghena sammata”nti ettha anupasampannassa sammutiyo dātumasakkuṇeyyattā pubbhavohāravasena sammataṃ vuttanti dassento āha “kiñcāpī”tiādi. **Tanti** anupasampannabhāve ṭhitam. **Byattassāti** viyattassa. Saṅghena vā katoti yojanāti. Tatiyaṃ.

4. Paṭhamasenāsanāsikkhāpadaṃ

108. Catutthe himameva himanto, himante niyutto **hemantiko**, kāloti āha “hemantakāle”ti. Otāpentā pakkamiṃsūti sambandho. Kālasaddassa sambandhisaddattā sambandhāpekkhoti āha “yassa kassacī”ti. **Himavassenāti** himena ca vassena ca.

110. “Vassiko”ti na saṅketāti **avassikasāṅketā**. “Aṭṭha māse”ti sāmāññato vuttepi “avassikasāṅkete”ti visesitattā hemantikagimhikamāsāyeva gahetabbāti āha “cattāro hemantike”tiādi. **Yatthāti** yasmīṃ rukkhe. Na ūhadantīti sambandho. “Kākā vā”ti ettha vāsaddo sampiṇḍanattho. Tenāha “aññe vā sakuntā”ti. **Tasmāti** yasmā anujānāti, tasmā. **Yatthāti** yasmīṃ rukkhe, vissamitvā gacchantīti yojanā. **Yasminti** rukkhe, katvā vasantīti yojanā. Aṭṭha māse evāti sambhavato āha “yesu janapadesū”tiādi. **Tesupīti** janapadesupi. Avassikasāṅkete evāti sambhavato āha “yatthā”tiādi. **Yatthāti** yesu janapadesu. “Vigatavalāhakaṃ visuddham nabham hotī”ti iminā sace avigatavalāhakaṃ avisuddham nabham hoti, nikkhipitum na vaṭṭatīti dīpeti. “Evarūpe kāle”ti padaṃ “nikkhipitum

vaṭṭatī”ti pade ādhāro.

Abbhokāsikenāpīti abbhokāsadhutaṅgayuttenāpi. Pisaddo rukkhamūlikassa apekkhako. Vattaṃ vitthārento āha “tassa hī”tiādi. **Tassāti** abbhokāsikassa. Hisaddo vitthārajotako. **Tatthevāti** puggalikamañcakeyeva. Saṅghikaṃ mañcanti sambandho. **Vītamañcakoti** vāyitamañcako. **Tasminti** vītamañcake. Purāṇamañcako nassantopi anagghoti āha “purāṇamañcako gahetabbo”ti. Cammena avanahitabboti **onaddho**, so eva **onaddhako**. Gahetvā ca pana paññapetvā nipajjitum na vaṭṭatīti yojanā. **Asamayeti** vassikasaṅkhāte akāle. **Catugguṇenāpī**ti catupaṭalenapi. Vaṭṭanti valāhakā āvaṭṭanti asmiṃ samayeti vaṭṭulo, so eva vaṭṭaliko, sattāhaṃ vaṭṭaliko, sattāho vā vaṭṭaliko **sattāhavaṭṭaliko**, so ādi yesaṃ tānīti sattāhavaṭṭalikaḍḍhāni. Ādisaddena sattāhato ūnādhikāni gahetabbāni. **Kāyānugatikkattāti** kāyaṃ anugamakattā kāyasadisattāti attho.

Paṇṇakuṭīsūti paṇṇena chāditakuṭīsu. **Sabhāgabhikkhūnanti** attanā sabhāgabhikkhūnaṃ, santikanti sambandho. Anovassake ṭhāneti yojanā. **Laggetvāti** lambetvā, ayameva vā pāṭho. “Sammajjani”nti padaṃ “gahetvā”ti pade avuttakammaṃ, “ṭhapetabbā”ti pade vuttakammaṃ. **Dhovitvāti** sammajjanimṃ suddhaṃ katvā. **Uposathāgārādisūti**ādisaddena pariveṇāḍḍhāni gahetabbāni.

Yo pana bhikkhu gantukāmo hoti, tenāti yojanā. **Tatthāti** sālāyaṃ. **Yattha katthacīti** yasmiṃ kismiñci ṭhāne. **Pākatikaṭṭhāneti** pakatiyā gahitaṭṭhāne. **Tatra tatrevāti** tesu tesu cetiyaṅgaṇādisuyeva. **Asanasālanti** asanti bhakkhanti assaṃ sālāyanti **asanā**, asanā ca sālā ceti **asanasālā**, bhojanasālāti attho. **Tatrāti** tassa sammajjantassa, tasmimṃ “vattaṃ jānitabba”nti pāṭhe vā. **Majjhatoti** pavittato, suddhaṭṭhānatoti attho. **Pādaṭṭhānābhimukhāti** sammajjantassa pādaṭṭhānaṃ abhimukhā. **Vālikā haritabbāti** paṃsu ca vālikā ca apānetabbā. Sammuñcanīsalākāya paraṃ pelletabbāti adhippāyo. **Bahīti** sammajjitabbatalato bahi.

111. Masārakotīti ettha itisaddo nāmapariyāyo, masārako nāmāti attho. Evaṃ bundikābaddhotītiādisupī. Pāde masitvā vijjhivā tattha aṇiyo pavesetabbā etthāti **masārako**. Bundo eva **bundiko**, pādo, tasmimṃ ābaddhā bandhitā aṇi yassāti **bundikābaddho**. Kuḷīrassa pādo viya pādo yassāti **kuḷīrapādako**, yathā kuḷīro vaṅkapādo hoti, evaṃ vaṅkapādoti vuttaṃ hoti. Āhacca aṅge vijjhivā tattha pavesito pādo yassāti **āhaccapādako**. **Āṇinti** aggakhilaṃ. Mañcati puggalaṃ dhāretīti **mañco**. Piṭṭhāti visamadukkaṃ hiṃsatīti **piṭṭhaṃ**. **Paṇavoti** eko tūriyaviseso, tassa saṅṭhānaṃ katvāti attho. Tañhi etarahi buddhapaṭimassa pallaṅkasaṅṭhānaṃ hoti. **Tanti** kocchaṃ. Karonti kirāti sambandho. **Etthāti** senāsanaparibhoge. **Hīti** saccaṃ. **Tanti** kocchaṃ mahagghaṃ hoti, mahagghattā bhaddapīṭhantipi vuccati. **Yenāti** yena bhikkhunā. “Thāmamajjhimassā”ti padena pamāṇamajjhimamṃ nivatteti.

Etthāti “anāpuccham vā gaccheyyā”ti pade. Thero āṇāpetīti yojanā. **Āṇāpetīti** ca āṇa-dhātuyā eva pesanaṅkhātassa hetvatthassa vācakattā ṇāpesaddo svatthova. **Soti** daharo. **Tathāti** yathā therena vutto, tathā katvāti attho. **Tatthāti** divāṭṭhāne, mañcapīṭhe vā. **Tatoti** ṭhapanakālato. Paribundheti hiṃ setīti **palibodho**, parisaddo upasaggo, so vikāravasena aññathā jāto. So palibodho aññattha āvāsādiko, idha pana santharāpitamañcādiko. **Sāyanti** sāyanhe, bhummatthe cetam upayogavacanaṃ. Thero bhaṇatīti sambandho. **Tatthāti** mañcapīṭhe. “Bālo hoti”ti vatvā tassa atthaṃ dassento āha “anuggahitavatto”ti. Anuggahitaṃ vattaṃ yenāti **anuggahitavatto**, thero. **Tajjetīti** ubbejeti. **Tasminti** dahare. **Assāti** therassa.

Āṇattikkhaṇeyevāti therassa pesanakkhaṇeyeva. Daharo vadatīti yojanā. “Thero”ti padaṃ “vatvā gacchatī”ti padadvaye kattā, “kāretabbo”ti pade kammaṃ. Nanti mañcapīṭhaṃ, “paññapetvā”tipadamapekkhiya evaṃ vuttaṃ. Nanti daharam vā. “Vatvā”ti padamapekkhiya evaṃ vuttaṃ. **Tatthevāti** mañcapīṭheyeva. **Assāti** therassa. **Tatthāti** divāṭṭhāne. **Bhojanasālato aññattha gacchantoti** bhojanasālato nikkhamitvā mañcapīṭhapaññāpanaṭṭhānato aññaṃ ṭhānaṃ gacchanto, theroti yojanā. **Tatthevāti** divāṭṭhāneyeva. **Yatricchatīti** yaṃ ṭhānaṃ gantumicchatīti attho. **Antarasannipātetīti**

sakalaṃ ahorattaṃ asannipātetvā antare sannipāte satīti yojanā.

Tatthāti tasmim̐ ṭhāne. Āgantukā gaṇhantīti sambandho. **Tatoti** gaṇhanato. **Tesanti** āgantukānaṃ. **Yehīti** āvāsiko vā hotu, āgantuko vā, yehi bhikkhūhi. **Teti** nisinnakabhikkhū. Uddhaṃ pāḷipāṭhaṃ sāreti pavattetīti **ussārako**. Dhammakathāyaṃ sādhuṭi **dhammakathiko**. **Tasminti** ussārake vā dhammakathike vā. **Ahorattanti** aho ca ratti ca ahorattaṃ, accantasamyogapadaṃ. **Itarasminti** paṭhamaṃ nisinnabhikkhuto aññasmiṃ bhikkhumhīti yojanā. **Antoupacāraṭṭheyevāti** leḍḍupātasāṅkhātassa upacārassa anto ṭhiteyeva, anādare cetam̐ bhummaṃ. **Sabbatthāti** āpattivāraanāpattivāresu.

112. Cimilikaṃ vātiādīsu vinicchayo evaṃ veditabboti yojanā. **Tanti** cimilikattharaṇaṃ. Uttari attharitabbanti **uttarattharaṇanti** dassento āha “uttarattharaṇaṃ nāmā”tiādi. **Bhūmiyanti** sudhādi-parikammaena akatāyaṃ pakatibhūmiyaṃ. **Cammakhaṇḍoti** ettha cammaṃyeva ante khaṇḍattā chinnattā cammakhaṇḍoti vuccati. Nanu sīhacammādīni na kappantīti āha “aṭṭhakathāsu hī”tiādi. **Hīti** saccaṃ. **Tasmāti** yasmā na dissati, tasmā. **Pariharāṇeyevāti** attano santakanti paricchindivā, puggalikanti vā pariggahetvā taṃ taṃ ṭhānaṃ harāṇeyeva. Pādo puñchīyati sodhīyati etāyāti **pādapuñchanīti** katvā rajjupilotikāyo pādapuñchanīti vuccatīti āha “pādapuñchanī nāmā”tiādi. Mayasaddalopaṃ katvā phalaka-pīṭhanti vuttanti āha “phalaka-pīṭhaṃ nāma phalakamayaṃ pīṭha”nti. Phalakañca pīṭhañca **phalaka-pīṭhanti** vā dassetuṃ vuttaṃ “atha vā”ti. **Etenāti** “phalaka-pīṭha”nti padena. “Saṅghita”nti pade karaṇaṃ, kattā vā. **Bijanipattakanti** caturassabījānyeva sakuṇapattasadisattā bījanipattakaṃ, sadisatthe ko. “Ajjhokāse”ti padaṃ “pacivā”ti pade ādhāro. **Aggisālāyanti** agginā pacanasālāyaṃ. **Pabbhāreti** leṇasadise pabbhāre. **Yatthāti** yasmim̐ ṭhāne.

Yasminti puggale. “Attano puggalikamiva hotī”ti iminā anāpattīti dasseti.

113. Yo bhikkhu vā lajjī hoti, tathārūpaṃ bhikkhuṃ vā ti yojanā. “Lajjī hotī”ti vatvā tassa atthaṃ dassento āha “attano palibodhaṃ viya maññatī”ti. **Yoti** āpucchako bhikkhu. “Kenaci upaddutaṃ hotī”ti saṅkhepena vuttamatthaṃ vitthārento āha “sacepi hī”tiādi. Hisaddo vitthārajotako. Vuḍḍhataro bhikkhu gaṇhātīti sambandho. **Taṃ padesanti** senāsanatṭhapitaṭṭhānaṃ. **Āpadāsūti** vipattīsūti. Catutthaṃ.

5. Dutiyasenāsanāsikkhāpadaṃ

116. Pañcame **mañcakabhisīti** mañce attharitabbo mañcako, soyeva bhisīti mañcakabhisī. Evaṃ pīṭhakabhisīpi. Pāvāro kojavoti dveyeva paccattharaṇanti vuttatī āha “pāvāro”tiādi. **Vuttanti** aṭṭhakathāsu vuttaṃ. **Dutiyātikkameti** dutiyapādātikkame. **Senāsanatoti** sace ekaṃ senāsaṃ hoti, tato. Atha bahūni senāsanāni honti, sabbapacchimasenāsanato. Eko leḍḍupāto senāsanassa upacāro hoti, eko parikkhepārahoti āha “dve leḍḍupātā”ti.

Sace bhikkhu, sāmaṇero, ārāmiko cāti tayo honti, bhikkhuṃ anāpucchitvā sāmaṇero vā ārāmiko vā na āpucchitabbo. Atha sāmaṇero, ārāmiko cāti dve honti, sāmaṇeraṃ anāpucchitvā ārāmikova na āpucchitabboti dassento āha “bhikkhumhi satī”tiādi. Tīsupi asantesu āpucchitabbavidhiṃ dassetuṃ vuttaṃ “tasmimpi asatī”tiādi. **Yenāti** upāsakena, “kārīto”ti pade kattā. **Tassāti** vihārasāmikassa. Tasmimpi asati gantabbanti yojanā. **Pāsāṇesūti** pāsāṇaphalakesu. **Sace ussahatīti** sace sakkoti. Ussahantena bhikkhunā ṭhapetabbanti yojanā. **Tepīti** upāsakāpi, na sampañcchantīti sambandho. **Tatthāti** dārubhaṇḍādīsu.

Paricchēdākārena veṇīyati dissatīti **pariveṇaṃ**. “Atha kho”ti padaṃ “veditabba”nti pade arucilakkhaṇaṃ. “Āsanne”ti iminā upacārasaddassa upaṭṭhānatthaaññāropanatthe nivatteti. Yasmā vammikarāsīyeva hoti, tasmāti yojanā. Upacinantīti **upacikā**, tāhi nimittabhūtāhi palujjati nassatīti attho. **Senāsananti** vihāraṃ. **Khāyitunti** khādītuṃ, ayameva vā paṭho. **Tanti** mañcapīṭhaṃ. Mañcapīṭhaṃ

vihāre apaññapetvā vihārūpacāre paññāpanassa visesaphalaṃ dassetuṃ āha “vihārūpacāre panā”tiādi. Vihārūpacāre paññāpitanti sambandho.

118. “Gacchantenā”ti padaṃ “gantabba”nti pade kattā. **Tathevāti** yathā purimabhikkhu karoti, tatheva. Vasantena bhikkhunā paṭisāmetabbanti yojanā. **Rattiṭṭhānanti** rattiṃ vasanaṭṭhānaṃ.

Yā dīghasālā vā yā paññasālā vā upacikānaṃ uṭṭhānaṭṭhānaṃ hoti, tatoti yojanā. **Tasminti** dīghasālādike. **Hīti** saccam, yasmā vā, santiṭṭhantīti sambandho. **Siluccayoti** pabbato, tasmim leṇaṃ **siluccayaleṇaṃ**, pabbataguhāti attho. **Upacikāsaṅkāti** upacikānaṃ uṭṭhānaṭṭhānanti āsaṅkā. **Tatoti** pāsānapitṭhiyaṃ vā pāsānathambhesu vā katasenāsanādito. Āgantuko yo bhikkhu anuvattanto vasatīti sambandho. **Soti** āgantuko bhikkhu. Puna **soti** āgantuko bhikkhuyeva. **Tatoti** gahetvā issariyena vasanato. **Ubhopīti** āvāsikopi āgantukopi dve bhikkhū. **Tesūti** dvīsu tīsu. **Pacchimassāti** sabbapacchimassa. **Ābhogenāti** ābhogamattena mutti natthi, āpucchitabbamevāti adhippāyo. **Aññatoti** aññāvāsato. **Aññatrāti** aññāsmim āvāse. **Tatthevāti** ānītāvāseyyeva. **Tenāti** vuḍḍhatarena, “sampaṭicchite”ti pade kattā. **Sampaṭicchiteti** vuḍḍhatarena sampaṭicchitepi itarassa gantuṃ vaṭṭati āpucchitattāti vadanti. **Naṭṭhaṃ vāti** naṭṭhe vā senāsane satī gīvā na hotīti yojanā. **Aññassāti** avissāsikapuggalassa. **Naṭṭhānīti** naṭṭhesu mañcapīṭhesu santesu.

Vuḍḍhataro bhikkhu ca issariyo ca yakkho ca sīho ca vālamigo ca kaṇhasappo ca **vuḍḍha...pe...** **kaṇhasappā**, te ādayo yesaṃ teti **vuḍḍha...pe...** **kaṇhasappādayo**, tesu. Ādisaddena petādayo saṅganhāti. **Yatthāti** yasmim ṭhāne. **Assāti** bhikkhuno. “Palibuddho”ti padassa atthaṃ dassetuṃ vuttaṃ “upadduto”ti. Pañcamam.

6. Anupakhajjasikkhāpadaṃ

119. Chaṭṭhe **rūmbhitvāti** nivāretvā, āvaraṇaṃ katvāti attho. **Vassaggenāti** vassagaṇanāya. **Anupakhajjāti** ettha khada hiṃsāyanti dhātupāṭhesu (saddanītidhātumālāyaṃ 15 dakārantadhātu) vuttattā khadasaddo hiṃsattho hoti. Anusamīpaṃ upagantvā khadanaṃ hiṃ sanaṃ nāma anusamīpaṃ pavisaṇamevāti dassento āha “anupavisitvā”ti.

120. “Jāna”nti ettha jānanākāraṃ dassetuṃ vuttaṃ “anuṭṭhāpanīyo aya”nti. **Tenevāti** jānanahetunā eva. **Assāti** “jāna”ntipadassa. **Hīti** vitthārajotako. Saṅgho pana detīti sambandho. **Yassāti** vuḍḍhādīsu aññatarassa. **Etthāti** vuḍḍhagilānādīsu. Gilānassapi detīti yojanā. “Gilāno”ti padaṃ “na pīletabbo, anukampitabbo”tipadadvaye vuttakammaṃ. “Kāmañcā”ti padassa anuggahatthajotakattā panasaddo garahatthajotako.

121. Mañcapīṭhānaṃ upacāro nāmāti sambandho. **Yatoti** yato kutoci ṭhānato. Yāva mañcapīṭhaṃ atthi, tāva upacāro nāmāti yojanā. Tasmim upacāre ṭhitassa bhikkhuno upacāreti sambandho.

“Abhinisīdati vā abhinipajjati vā”ti ettha vāsaddassa aniyamavikappatthaṃ dassetuṃ vuttaṃ “abhinisīdanamattenā”tiādi.

122. **Itoti** vārato. **Idhāti** imasmim pācittiyavāre. Yathā vutto, evanti sambandho. **Sabbatthevāti** sabbesu eva vihārapariveṇesu. **Assāti** visabhāgapuggalassa. **Idhāpīti** imasmimpi sikkhāpade. **Tatthāti** vissāsikapuggale.

123. Pāḷiyaṃ “āpadāsū”tipadaṃ “pavisatī”ti ajjhāhārapadena sambandhitabbanti āha “āpadāsūtiādi”ti. Chaṭṭhaṃ.

7. Nikkaḍḍhanasikkhāpadaṃ

126. Sattame ye pāsādā vā yāni vā catussālānīti yojanā. Catasso bhūmiyo etesanti **catubhūmakā**. Evaṃ pañcabhūmakā. **Koṭṭhakānīti** dvārakoṭṭhakāni. “Pāsādā”tipadamapekkhiya vuttaṃ “ye”tipadaṃ, “catussālānī”tipade apekkhite “yānī”ti līngavipallāso hoti. Senāsanesu ekena payogena bahuke dvāre bhikkhuṃ atikkāmetīti sambandho. Nānāpayogehi nānādvāre bhikkhuṃ atikkāmentassāti yojanā. “Dvāraṅānāyā”tiiminā payogaṅānāyātipi atthaṃ nāpeti atthato pākaṭṭā. **Anāmasitvāti** achupitvā.

Ettakānīti etapamāṇāni. **Tassāti** nikkāḍḍhiyamānassa bhikkhussa. **Gāḥanti** daḥhaṃ.

127. Idhāpīti imasmimpi sikkhāpade. **Pisaddo** purimasikkhāpadāpekkho. **Sabbatthāti** sabbesu sikkhāpadesu. **Yatrāti** yasmīṃ sikkhāpade.

128. Soti bhaṅḍanakārakalahakārako bhikkhu. **Hīti** saccaṃ, yasmā vā. **Pakkhanti** attano pakkhaṃ. Nikkāḍḍhiyamānapuggalapakkhe ummattakassa nikkāḍḍhati vā nikkāḍḍhāpeti vāti sambandhitabbaṃ. Nikkāḍḍhakapuggalapakkhe ummattakassa anāpattīti sambandhitabbanti. Sattamaṃ.

8. Vehāsakuṭisikkhāpadaṃ

129. Aṭṭhame acchannatalattā upari vehāso etissāti **uparivehāsā**, sā ca sā kuṭi ceti **uparivehāsakuṭīti** dassento āha “upariacchannatalāyā”ti. Tassā kuṭiyā sarūpaṃ dassetuṃ vuttaṃ “dvibhūmikakuṭiyā vā”tiādi. “Mañca”nti padaṃ “abhī”tiupasaggena sambandhitabbanti āha “abhibhavitvā”ti. “Nisīdatī”ti kiriyāpadena vā yojetabboti āha “bhummatthe vā”tiādi. **Etanti** “mañca”ntipade etaṃ vacanaṃ upayogavacanaṃ. Atha vā **etanti** “mañca”ntipadaṃ upayogavacanaṃ. Ettha ca pacchimasambandhe abhīyūpasaggo padālaṅkāramatto padavibhūsanamattoti āha “abhīti idaṃ panā”tiādi. **Padasobhaṅatthanti** padassa alaṅkāratthaṃ vibhūsanatthaṃ padassa phullitattanti adhippāyo. **Nīpatitvāti** ettha nīyūpasaggo dhātvatthānuvattakoti āha “patitvā”ti. Atha vā nikkhantattavācakoti āha “nikkhamitvā vā”ti. Iminā nīyūpasaggassa dhātvatthavisesakataṃ dīpeti, nikkhanto hutvā patitvāti attho. **Hīti** yasmā. **Āṇīti** aggakhilā.

131. Yā kuṭi sīsaṃ na ghaṭṭeti, sā **asīsaghaṭṭā** nāmāti yojanā. “Pamāṇamajjhimaṃ”tiiminā thāmamajjhimaṃ nivatteti. **Sabbahetṭhimāhīti** sabbesaṃ dabbasambhārānaṃ hetṭhā thitāhi. **Tulāhīti** gehathambhānamupari vitthāravasena thitehi kaṭṭhavisesehi. Iminā aṭṭhakathāvacanena ca tulāya sarūpaṃ pākaṭṭaṃ. Keci pana tulāya sarūpaṃ aññathā vadanti. **Etenāti** “majjhimaṃ purissa asīsaghaṭṭā”tivacanena dassitā hotīti sambandho. **Hīti** saccaṃ. Yā kāci kuṭi vuccatīti yojanā. **Uparīti** dvibhūmikakuṭiyā bhūmito upari bhūmiyaṃ. **Acchannatalāti** anullocatā, avitānatalāti attho. **Idha panāti** imasmīṃ pana sikkhāpade.

133. Hīti saccaṃ, yasmā vā. **Yāyanti** yā ayaṃ kuṭi. **Tatthāti** tassaṃ sīsaghaṭṭakuṭiyāṃ. Anōṇatena bhikkhunāti yojanā. **Yassāti** kuṭiyā. **Aparibhoganti** na paribhuñjitabbaṃ, na paribhuñjanārahanti attho. **Patāṇīti** patanassa nivāraṇā āṇi aggakhilā. Sā hi ābandhaṃ nayati pavattetīti **āṇīti** vuccati. **Yatthāti** yasmīṃ mañcapīṭhe. **Na nīpatantīti** nikkhanto hutvā na patanti. **Āhaccapādaketi** anṅe āhanitvā vijjhītvā tattha pavesitapādake. **Nāgadantakādīsūti** nāgassa danto viyāti nāgadantako, sadisatthe ko, so ādi yesaṃ teti nāgadantakādayo, tesu. Ādisaddena bhittikhilādayo saṅgaṇhātīti. Aṭṭhamaṃ.

9. Mahallakavīhārasikkhāpadaṃ

135. Navame **piṭṭhasaṅghāṭassāti** dvārabāhāya. Sā hi piṭṭhe dvinnaṃ kavāṭānaṃ saṃ ekato ghāṭo ghaṭṭanaṃ samāgamo etassatthīti piṭṭhasaṅghāṭoti vuccati. Kurundiyaṃ vuttanti sambandho. Mahāaṭṭhakathāyaṃ vuttanti yojanā. **Tanti** mahāaṭṭhakathāya vuttavacanaṃ. Evaṃ “tadevā”ti etthāpi. **Hīti** saccaṃ, yasmā vā. **Bhagavatāpīti** na mahāaṭṭhakathācariyehi eva vuttaṃ, atha kho bhagavatāpi katoti yojanā. Dvārabandhena aggaḷassa avinābhāvato “aggaḷaṭṭhapanāyā”ti vuttepi aggaḷena saha

dvārabandhaṭṭhapanāyāti atthova gahetabboti āha “sakavāṭakadvārabandhaṭṭhapanāyā”ti. **Aggaḷoti** kavāṭaphalako. **Imamevatthanti** mayā vuttaṃ imaṃ eva atthaṃ sandhāyāti sambandho. **Etthāti** “aggaḷaṭṭhapanāyā”tivacane. **Adhippāyoti** bhagavato abhisandhi. **Hi**-saddo vitthārajotako. **Kampatīti** bhusaṃ kampatī. **Calatīti** īsaṃ calatī. **Tenāti** tena sīthilapatanahetunā. Mātikāyaṃ, padabhājanīyañca “aggaḷaṭṭhapanāyā”tipadassa sambandhābhāvato tassa sambandhaṃ dassetuṃ vuttaṃ “tatthā”tiādi. Tattha **tatthāti** “aggaḷaṭṭhapanāyā”tivacane na vuttanti sambandho. Atthassa kāraṇassa uppatti atthuppatti, sāyeva **aṭṭhuppattīti** vuccati tthakārassa ṭṭhakāraṃ katvā. Adhikārato daṭṭhabboti yojanā.

Yaṃ pana vacanaṃ vuttanti sambandho. **Yassāti** mahāvihārassa. **Uparīti** dvārato upari. **Tīsu disāsūti** ubhosu passesu, uparīti tīsu disāsu. **Tatrāpīti** khuddake vihārepi. **Sāti** bhitti. **Aparipūraupacārāpīti** samantā kavāṭapamañena aparipūraupacārāpi. **Ukkaṭṭhaparicchedenāti** ukkaṃsapamañena. Hatthapāsato atirekaṃ na limpitaḷḷoti adhippāyo. Tīsu disāsu eva limpitaḷḷo na hoti, lepokāse sati adhobhāgepi limpitaḷḷoti āha “sace panassā”tiādi. **Assāti** vihārassa. Ālokaṃ sandhenti pidahantīti “**ālokasandhī**”ti vutte vātapānakavāṭakāyevāti dassento āha “vātapānakavāṭakā vuccantī”ti. Vātaṃ pivatīti **vātapānaṃ**, dvāraṃ, tasmim ṭhitā kavāṭakā **vātapānakavāṭakā**. **Teti** vātapānakavāṭakā paharantīti sambandho. **Etthāti** ālokasandhimhi. **Sabbadisāsūti** ubhosu passesu, heṭṭhā, uparīti catūsu disāsu. “Tasmā”tipadaṃ “limpitaḷḷo vā lepāpetabbo vā”tipadadvaye hetu. **Etthāti** “ālokasandhiparikammāyā”tipade.

Imināti setavaṇṇādinā. **Sabbametanti** etaṃ sabbam setavaṇṇādikam.

Yanti kiccaṃ. Kattabbaṃ kiccanti sambandho. Saddantarabyavahitopi dvattisaddo pariyāyasaddena samāso hotīti āha “chadanassa dvattipariyāya”nti. Dve vā tayo vā pariyāyā samāhaṭṭhāti **dvattipariyāyam**, samāhāre digu, tisadde pare dvissa akāro hoti. **Parikkhepoti** anukkamena parikkhepo. Apatyūpasaggassa paṭisedhavācakattā “aharite”ti vuttaṃ. **Etthāti** “apaharite”ti pade. “Harita”nti iminā adhippetanti sambandho. Ādikappakāle aparāṇṇato pubbe pavattaṃ annaṃ **pubbaṇṇam**, aparasmim pubbaṇṇato pacchā pavattaṃ annaṃ **aparaṇṇam**, nakāradvayassa nakāradvayaṃ katvā. **Tenevāti** adhippetattā eva.

Vuttanti vapitaṃ, yathā “sumedhabhūto bhagavā”tiettha bodhim asampattopi bodhisatto sumedhabhūto “bhagavā”ti vuccati avassambhāviyattā, evaṃ haritaṃ asampattampi khettaṃ “harita”nti vuccati avassambhāviyattāti atthaṃ dasseti “yasmimpi khette”tiādinā.

Ahariteyevāti haritavirahe eva khetteti yojanā. **Tatrāpīti** aharitakhettepi. “Pitthivaṃsassa”tipadaṃ “passe”tipade sāmyatthachattā, iminā pakatigehaṃ dasseti. “Kūṭāgāraṇṇikāyā”tipadaṃ “upari, thūpikāyā”tipade sāmyatthachattā, iminā ekakūṭayutte māḷādike dasseti. Ṭhitaṃ bhikkhanti sambandho. Nisinnakaṃ yaṃkañci jananti yojanā. **Tassāti** ṭhitatṭhānassa. **Antoti** abbhantare, **hi** yasmā **ayaṃ** okāso patanokāsoti yojanā.

136. Chāditaṃ nāmāti ettha chāditasaddo bhāvatto hoti, tenāha “chādana”nti. **Ujukamevāti** chadanuṭṭhapanato uddhaṃ ujukaṃ eva. **Tanti** chādanaṃ. **Apanetvāpīti** nāsetvāpi. **Tasmāti** yasmā labbhati, tasmā, pakkamitabbanti sambandho. **Parikkhepenāti** parivārena chādentassāti yojanā. **Idhāpīti** pariyāyachādanepi adhiṭṭhahitvāti sambandho. **Tuṇhībūtenāti** tuṇhībūto hutvā. **Chadanuparīti** chadanassa upari. **Hīti** saccaṃ. “Tato ce uttari”nti ettha tato dvattipariyāyato uparīti dassento āha “tiṇṇaṃ maggaṇaṃ vā”tiādi.

137. Karena hatthena lunitabbo, chinditabbo, lātabbo gahetabboti vā **kaṛaḷoti** kate atthapakaraṇādito tiṇṇamuṭṭhi evāti āha “tiṇṇamuṭṭhiya”nti. Navamaṃ.

10. Sappāṇakasikkhāpadaṃ

140. Dasame “**jāna**”nti gacchantādigaṇoti āha “jānanto”ti. Saṃ vijjati pāṇo etthāti **sapāṇakaṃ**. **Etanti** udakaṃ. Sayāṃ jānantopi parena jānāpentopi jānātiyeva nāmāti āha “yathā tathā vā”ti. **Sapāṇakaṃ udakanti** karaṇatthe cetāṃ upayogavacanāṃ, tenāha “tena udakenā”ti. **Pubbeti** pathavikhaṇanasikkhāpadādike.

Tatthāti “siñceyya vā siñcāpeyya vā”tipade. **Dhāranti** sotaṃ. **Mātikaṃ pamukhanti** mātikaṃ abhimukhaṃ. **Tattha tatthāti** tasmim tasmim ṭhāne. Aññato ṭhānato aññaṃ ṭhānaṃ netīti yojanā. “Sapāṇakaṃ udaka”nti sāmāññavacanassapi visese avatṭhānato, visesatthinā ca visesassa anupayo jittabbato idha visesaudakanti sandhāyabhāsitatthaṃ dassento āha “idaṃ panā”tiādi. Idaṃ pana na vuttanti sambandho. **Yanti** udakaṃ “gacchatī”tipade kattā. **Yatthāti** yasmiṃ udaketi. Dasamaṃ.

Bhūtagāmaṃvavaggo dutiyo.

3. Ovādavaggo

1. Ovādasikkhāpada-atthayojanā

144. Bhikkhuniṃvaggassa paṭhame **tesanti** therānaṃ. Mahākulehi nikkhamitvā pabbajitāti yojanā. Kuladhītarō vijjamaṇaguṇaṃ kathayantīti sambandho. “Ñātimaṇussāna”ntipadaṃ “kathayantī”tipade sampadānaṃ. **Kutoti** kassa therassa santikāti attho. **Tesanti** therānaṃ guṇanti sambandho. “Kathetu”ntipadamapekkhitvā “vijjamaṇaguṇe”ti vattabbe avatvā “vaṭṭantī”tipadamapekkhiya “vijjamaṇaguṇā”ti vuttaṃ. **Hīti** saccaṃ, yasmā vā. **Tatoti** kathanakāraṇā abhihariṃsūti sambandho. **Tenāti** abhiharaṇahetunā.

Tesanti chabbaggiyānaṃ. **Tāsūti** bhikkhunīsu. “Bhikkhuniyo”tipadaṃ “upasaṅkamtivā”tipade kammaṃ. Chabbaggiyānaṃ bhikkhunīsu upasaṅkamaṇaṃ lābhataṇhāya hoti, bhikkhunīnaṃ chabbaggiṃsu upasaṅkamaṇaṃ calacittatāya hotīti aññaṃaññūpasaṅkamantānaṃ viseso. Tiracchānabhūtā kathā **tiracchānakathā** niratthakakathāti dassento āha “tiracchānakathantī”ti. **Saggamaggagamanepīti** pisaddo mokkhagamane pana kā nāma kathāti dasseti. Rājāno ārabba pavattā kathā **rājakathā**. Ādisaddena corakathādayo saṅgaṇhāti.

147. Te bhikkhūti chabbaggiyā bhikkhū bhavyeyunti sambandho. Adiṭṭhaṃ saccaṃ yehīti **adiṭṭhasaccā**, tesāṃ bhāvo **adiṭṭhasaccattaṃ**, tasmā adiṭṭhasaccattā bandhitvāti yojanā. **Nesanti** chabbaggiyānaṃ. **Aññeneva upāyenāti** aladdhasammutito aññeneva laddhasammutisaṅkhātena kāraṇena kattukāmoti sambandho. **Paratoti** parasmim pacchā, uparīti attho. **Karonto vāti** paribāhire karonto eva hutvā āhāti yojanā. **Hīti** saccaṃ, yasmā vā. Yasmā na bhūtapubbāni, iti tasmā paribāhiraṃ karonto vāti attho.

Tatthāti “anujānāmī”tiādivacane. **Silavāti** ettha vantusaddo pasaṃsatthe ca atisayatthe ca niccayogathe ca hoti. **Tassāti** laddhasammutikassa. **Tanti** silaṃ. Pātimokkhasaṃvarasaddānaṃ kammadhārayabhāvaṃ, tehi ca saṃvutasaddassa tappurisabhāvaṃ dassetuṃ vuttaṃ “pātimokkhovā”tiādi. Tattha evasaddena kammadhārayabhāvaṃ, enasaddena ca tappurisabhāvaṃ dasseti dattabbāṃ.

Vattatīti attabhāvaṃ pavatteti. Kāritapaccayo hi adassanaṃ gato. Iminā iriyāpathavihāra dibbavihāra brahmavihāra ariyavihāresu catūsu vihāresu attabhāvavattanaṃ iriyāpathavihāraṃ dasseti. **Hīti** saccaṃ. **Etanti** “pātimokkhasaṃvarasaṃvuto viharatī”tivacanāṃ. **Vibhaṅgeti** jhānavibhaṅge.

“Sīla”ntiādīni aṭṭha padāni tulyādhikaraṇāni. Ayaṃ panettha sambandho – silaṃ kusalānaṃ dhammānaṃ samāpattiyā patiṭṭhā ādi caraṇaṃ saṃyamo saṃvaro mokkhaṃ pamokkhanti. **Samāpattiyāti** samāpattatthāya. “Upeto”tiādīni satta padāni aññaṃaññavevacanāni. Tattha **upapannoti**

yutto anuyutto. **Samannāgatoti** samantato anu punappunam āgatoti samannāgato, samaṅgībhūtoti attho. Ettha hi saṃsaddo samantatthavācako, anusaddo naupacchinnatthavācako. **Tenāti** tena kāraṇena. **Pāletīti** attabhāvaṃ bādhanato rakkhati. **Yapetīti** attabhāvo pavattati. **Yāpetīti** attabhāvaṃ pavattāpeti. Yapa yāpane. Yāpanam pavattananti hi dhātupāṭhesu vuttam (saddanīdhātumālāyaṃ 18 pakārantadhātu). **Viharatīti** ettha eko ākāratthavācako itisaddo luttaniddiṭṭho, iti vuccati, iti vuttanti vā yojanā.

Ācāragocarāsaddānam dvandabhāvaṃ, tehi ca sampannasaddassa tappurisabhāvaṃ dassento āha “**ācāragocarāsampanno**”tiādi. Tattha casaddena dvandabhāvaṃ, enasaddena ca tappurisabhāvaṃ dasseti. **Anusaddo** appattho, **mattasaddo** pamānatthoti āha “appamattakesū”ti. “Dassanasīlo”tiiminā “**dassāvī**”tiettha āvīsaddassa tassilatthabhāvaṃ dasseti. “Samādāyā”ti ettha sampubbāpubbassa dāsaddassa kammāpekkhattā tassa kammaṃ dassetuṃ vuttam “taṃ taṃ sikkhāpada”nti. Iminā “sikkhāpadesū”ti upayogathe bhummavacananti dasseti. Atha vā **sikkhāpadesūti** niddhāraṇatthe bhummavacanametam. “Taṃ taṃ sikkhāpada”nti kammaṃ pana ajjhāharitabbanti dasseti. “**Samādāyā**”ti ettha saṃsaddassa ca āpubbassa dāsaddassa ca yakārassa ca attham dassetuṃ “sādhukam gahetvā”ti vuttam. **Etthāti** imissam aṭṭhakathāyaṃ. Vitthāro pana gahetabboti yojanā. **Yoti** kulaputto.

Assāti laddhasammutikassa. Yam taṃ bahu sutam nāma atthi, taṃ na sutamattamevāti yojanā. **Mañjūsāyanti** peḷāyaṃ. Sā hi sāmikassa sadhanattam maññate imāyāti “mañjūsā”ti vuccati. Mañjūsāyaṃ ratanam sannicitam viya sutam sannicitam asmim puggaleti yojanā, **etenāti** “sannicita”ntipadena, dassetīti sambandho. **Soti** laddhasammutiko bhikkhu. **Sannicitaranassevāti** sannicitaranassa iva. **Tanti** “ye te dhammā”tiādivacanam. **Etthāti** imasmim sikkhāpade. **Assāti** laddhasammutikassa bhikkhuno. **Tatthāti** “vacasā paricītā”tiādivacane. Evamattho veditabboti yojanā. **Paguṇāti** ujukā. Ujuko hi ajimhattā pakattho uttamo guṇoti atthena “paguṇo”ti vuccati. **Anupekkhitāti** punappunam upagantvā ikkhitā, passitā dassitāti attho. **Atthatoti** abhidheyatthato, aṭṭhakathātoti attho. **Kāraṇatoti** dhammato, pālītoti attho. **Diṭṭhisaddassa** paññāsaddavevacanattā “paññāyā”ti vuttam. **Supaccakkhakatāti** suṭṭhu akkhānam indriyānam paṭimukham katā.

“Bahussuto”ti ettha bahussutassa tividhabhāvaṃ dassento āha “ayaṃ panā”tiādi. Nissayato mucatīti **nissayamuccanako**. Parisam upaṭṭhāpetīti **parisupaṭṭhāko**. Bhikkhuniyo ovadatīti **bhikkhunovādako**. **Tatthāti** tividhesu bahussutesu. Nissayamuccanakena ettakam uggahetabbanti sambandho. **Upasampadāyāti** upasampādetvā. Pañca vassāni etassāti **pañcavasso**. Tena uggahetabbanti yojanā. **Sabbantimenāti** sabbesam paricchedānam ante lāmake pavattena. **Paguṇāti** ajimhā ujukā. **Vācugatāti** tasseva vevacanam. Yassa hi pālīpāṭhā sajjhāyanakāle paguṇā hontī, tassa vācugatā. Yassa vā pana vācugatā hontī, tassa paguṇā. Tasmā tāni padāni aññamaññakāraṇavevacanāni. **Pakkhadivasesūti** juṇhapakkhakālapakkhapariyāpannesu divasesu. **Dhammasāvanatthāyāti** sampattānam parisānam dhammassa sāvanatthāya suṇāpanatthāyāti adhippāyo. **Sāvanatthāyāti** ettha yupaccayaparattā kāritapaccayo lopo hotīti daṭṭhabbam. Tasmā sāviyate suṇāpiyate **sāvananti** vacanatto kātabbo. Bhāṇavārā uggahetabbāti sambandho. **Sampattānanti** attano santikam sampattānam. **Parikathanatthāyāti** parissaṅgena āliṅganena kathanattham, appasaddasaṅkhātāya vācāya kathanatthanti attho. “Kathāmaggo”ti vuttattā vatthukathāyeva adhippetā, na suttasaṅkhāto pālīpāṭho. Anu pacchā, punappunam vā dāyakā modanti etāyāti **anumodanā**. Jhānam vā maggo vā phalaṃ vā **samaṇadhammo** nāma. Tassa karaṇattham uggahetabbanti yojanā. **Hīti** saccam, yasmā vā. Catūsu disāsu apaṭihatoti **cātuddiso**, apaṭihatatthe ṇapaccayo.

Parisupaṭṭhāpakena kātabbāti yojanā. **Abhivinayeti** aññamaññaparicchinne vinayapiṭake. **Dve vibhaṅgāti** bhikkhuvibhaṅgo ca bhikkhunivibhaṅgo ca. Asakkontena parisupaṭṭhāpakena bhikkhunāti sambandho. Evaṃ attano atthāya uggahetabbam dassetvā idāni parisāya atthāya uggahetabbam dassento āha “parisāya panā”tiādi. **Abhidhammeti** aññamaññaparicchinne suttantapiṭake eva, na abhidhammapiṭake. **Tayo vaggāti** sagāthāvaggo nidānavaggo khandhavaggoti tayo vaggā. **Vāsaddo**

aniyamavikappattho. **Ekanti** ekaṃ nipātaṃ. **Tato tatoti** nikāyato. **Samuccayaṃ katvāti** rāsiṃ katvā. **Na vuttanti** aṭṭhakathāsu na kathitaṃ. Yassa pana natthi, so na labhatīti yojanā. **Suttante cāti** suttantapiṭake pana. **Uggahitoti** sarūpakathanena gahito, uccāritoti attho. **Disāpāmokkhoti** disāsu ṭhitānaṃ bhikkhuādānaṃ pāmokkho. **Yena kāmaṃ gamoti** yathākāmaṃ gamo.

Catūsu nikāyesūti khuddakanikāyato aññesu dīghanikāyādīsū. **Ekassāti** aññatarassa ekassa. **Ekanikāyenāti** ekasmiṃ nikāye laddhanayena. **Hīti** saccaṃ, yasmā vā. **Tatthāti** catuppakaraṇassa aṭṭhakathāyaṃ. **Nānatthanti** nānāpajjanānaṃ. **Tanti** vinayapiṭakaṃ. **Ettāvatāti** ettakapamaṇena paguṇena. **Hotīti** itisaddo parisamāpanattho. Iti parisamāpanaṃ veditabbanti yojanā.

Ubhayāni kho panassāti ādi pana vuttanti sambandho. **Aññasminti** vinayapiṭakato itarasmim. **Tatthāti** “ubhayāni kho panassā”tiādivacane. Yathā yenākārena āgatāni, taṃ ākāraṃ dassetunti yojanā. **Padapaccābhaṭṭhasaṅkaradosavirahitānīti** padānaṃ paccābhaṭṭhasaṅkarabhūtehi dosehi virahitāni. Ettha ca **padapaccābhaṭṭhanti** padānaṃ paṭinivattitvā ābhassanaṃ gaḷanaṃ, cutanti attho. **Padasaṅkaranti** padānaṃ vipatti, vināsoti attho. “**Suttaso**”ti sāmāññato vuttepī khandhakaparivārasuttaṃ eva gahetabbanti āha “khandhakaparivārato”ti. **Anubyañjanasoti** ettha byañjanasaddo akkharassa ca padassa ca vācakoti āha “akkharapadapāripūriyā cā”ti. **Hīti** saccaṃ, yasmā vā.

“Sithiladhanitādīna”ntipadaṃ “vacanenā”tipade kammaṃ, “vacanenā”tipadaṃ “sampannāgato”tipade hetu, “vissatṭhāya anelagalāya atthassa viññāpaniyā”tipadāni “vācāyā”tipade visesanāni. **Sithiladhanitādīnanti** ādisaddena niggahitavimuttasambandhavatthitadīgha rassa garu lahu saṅkhātā aṭṭha byañjanabuddhiyo saṅgaṇhāti. **Yathāvidhānavacanenāti** akkharacintakānaṃ yathā saṃvidahanavacana. Vācāyeva karīyati kathīyati uccāriyati **vākkaraṇaṃ** cakārassa kakāraṃ katvā. **Hīti** tadeva yuttaṃ. Mātugāmo yasmā sarasampattirato, tasmā hīletīti yojanā. “Sarasampattirahita”ntipadaṃ “vacana”ntipade visesanabhāvena visesaṃ katvā “hīletī”tipade hetubhāvena sampajjanato hetuantogadhavisesananti daṭṭhabbaṃ. **Sabbāsanti** bhikkhunīnaṃ. “Sīlācārasampattiyā”tiiminā jāti gotta rūpa bhogādīnātiatthaṃ nivatteti. **Kāraṇāncāti** aṭṭhakathaṅca. **Tajjetvāti** ubbejtvā. **Tāsanti** bhikkhunīnaṃ. **Gihikāleti** bhikkhunovādakassa gihikāle anajjhāpannapubbo hotīti sambandho. **Hi** tadeva yuttaṃ. “Mātugāmo”tipadaṃ “na karotī”tipade suddhakattā, “uppādetī”tipade hetukattā. Ṭhitassa bhikkhuno dhammadesanāyāpīti yojanā. **Apisaddo** garahattho. **Visabhāgehīti** viruddhehi vatthārammaṇehi. **Ayuttaṭṭhāneti** pabbajitānaṃ ananurūpaṭṭhāne. **Chandarāganti** balavataṇhaṃ. **Tenāti** tena hetunā.

“Ettha cā”tiādimhi ayaṃ pana saṅgaho –

“Sīlavā bahussuto ca, svāgato ca suvācako;
Piyo paṭibalo cāpi, najjhāpanno ca vīsati”ti.

148. Vatthusminti aṭṭhuppattiyāṃ. Kakāralopaṃ katvā garudhammāti vuccantīti āha “garukehi dhammehi”ti. **Teti** garudhammā. **Hīti** yasmā. “Ekato”ti sāmāññena vuttavacanaṃ visesena gahetabbataṃ dassetuṃ vuttaṃ “bhikkhunīnaṃ santike”ti. **Yathāvatthukamevāti** pācittiyameva. Tañhi vatthussa āpattikāraṇassa anurūpaṃ pavattattā “yathāvatthuka”nti vuccati.

149. Pātoti pageva, paṭhamanti attho. Asammaṭṭhaṃ sammajjītabbanti sambandho. Asammajjane dosaṃ pākātaṃ karonto āha “asammaṭṭhaṃ hī”tiādi. **Hīti** tappākāṭikāraṇajotako. **Tanti** pariveṇaṃ. Disvā bhavēyyunti sambandho. **Tenāti** asotukāmānaṃ viya bhavanahetunā. Pariveṇasammajjanassa ānisaṃsaṃ dassetvā pānīyaparibhojanīyaupaṭṭhānaṃ tameva dassento āha “anto gāmato panā”ti ādi. **Tasminti** pānīyaparibhojanīye.

Sākhābhaṅgampīti bhañjitabbasākhampi. **Dutiyo**ti viññū puriso dutiyo. Nisīditabbaṭṭhānaṃ

dassento āha “nisīditabba”ntiādi. “Vihāramajjhe”ti sāmāññato vatvā visesato dassetum vuttam “dvāre”ti. Osaranti avasaranti etthāti **osaraṇaṃ**, tañca tam ṭhānañceti **osaraṇaṭṭhānaṃ**, tasmim. **Samaggaṭṭhāti** ettha saṃpubbo ca āpubbo ca gamusaddo hoti, tato hiyyattanīsaṅkhātamaṃ tthavacanaṃ vā hoti, pañcamīsaṅkhātassa thavacanassa tthattaṃ vā hoti, saṃyogaparattā ā upasaggo rasso ca hoti, iti atthaṃ dassento āha “sammā āgatathā”ti. Tattha “sammā”tipadena saṃsaddassa atthaṃ dasseti, “ā”tipadena ātyūpasaggaṃ, “gata”tipadena gamudhātum, “ttha”tipadena hiyyattanīsaṅkhātamaṃ tthavacanaṃ vā, pañcamīsaṅkhātassa thavacanassa tthattaṃ vā dasseti. Ayaṃ panetthatto – samaṃ tumhe āgatathāti. Pañcamīsaṅkhātassa thavacanassa tthattakāle samaṃ tumhe āgā attha bhavathāti. “Āgacchanti”tipadena “**vattanti**”ti ettha vatudhātuyā atthaṃ dasseti, “pagaṇā vācuggatā”tipadehi adhippāyaṃ dasseti. **Pāḷīti** garudhammapāḷi.

Tatthāti tassaṃ pāḷiyaṃ, tesu vā abhivādanādīsu catūsu. **Maggasampadānanti** maggaṃ pariharitvā bhikkhussa okāsādānaṃ. **Bījananti** bījanīyā vidhūpanaṃ. **Pāṇiyāpucchananti** pāṇiyassa āpucchanāṃ. Ādisaddena paribhojanīyāpucchanādikaṃ saṅgaṇhāti. **Ettha cāti** etesu catūsu abhivādanādīsu. “Anto gāme vā”tiādīni cha padāni “kātabbamevā”tipade ādhāro. **Rājussāraṇāyāti** rañño ānubhāvena janānaṃ ussāraṇāya. Mahābhikkhusaṅgho sannipatati etthāti **mahāsannipātaṃ**, tasmim mahāsannipāte ṭhāne nisinne satīti yojanā. **Paccuṭṭhānanti** paṭikacceva uṭṭhānaṃ. **Taṃ tanti** sāmīcikkamaṃ.

Sakkatvāti cittiṃ katvā, saṃ ādaraṃ katvāti attho. Tenāha “yathā kato”tiādi. **Tiṇṇaṃ kiccānanti** “sakkatvā garuṃkatvā mānetvā”tisaṅkhātānaṃ tiṇṇaṃ kiccānaṃ. Anīyasaddo kammaṭṭhoti āha “na atikkamitabbo”ti.

Natthi bhikkhu etthāti **abhikkhuko** āvāso, so kittake ṭhāne abhikkhuko, yo āvāso abhikkhuko nāma hotīti āha “sace”ti ādi. “Upassayato”tipadaṃ “abbhantare”tipade apādānaṃ. **Etthāti** abhikkhuke āvāse. **Hīti** saccam. **Tatoti** aḍḍhayaṃjanabbhantare ṭhitaāvāsato. **Paranti** aññasmim āvāse, bhummatthe cetamaṃ upayogavacanaṃ. **Pacchābhattanti** bhattato pacchā. **Tatthāti** abhikkhuke āvāse. “Bhikkhuniyo”tipadaṃ “vadanti”tipade kammaṃ. **Vuttappamāṇeti** aḍḍhayaṃjanabbhantarasaṅkhāte vuttappamāṇe. **Sākhāmaṇḍapeṭi** sākhāya chāditaṃmaṇḍapeṭi. **Pisaddena** āvāse pana kā nāma kathāti dasseti. **Vuttāti** vasitā. **Ettāvatāti** ekarattaṃ vasitamattena. **Etthāti** sabhikkhuke āvāse. Upagacchantīhi bhikkhunīhi yācitabbāti yojanā. **Pakkhassāti** āsaḷhīmāsassa juṇhapakkhassa. “Terasiya”ntipadena avayaviavayavabhāvena yojetabbaṃ. **Mayanti** amhe. **Yatoti** yena ujunā maggenāti sambandho. Tenāha “tena maggenā”ti. **Aññena maggenāti** ujumaggato aññena jimhamaggena. **Ayanti** ayaṃ āvāso. **Tatoti** bhikkhūnaṃ āvāsato, bhikkhuniupassayato vā, idameva yuttataraṃ. Vakkhati hi “amhākaṃ upassayato gāvutamatte”ti. **Khemaṭṭhāneti** abhayaṭṭhāne. Tañhi khīyanti bhayā etthāti **khemam**, khemañca tam ṭhānañceti khemaṭṭhānanti katvā “khemaṭṭhāna”nti vuccati. **Tāhi bhikkhunīhīti** aḍḍhayaṃjanamate ṭhāne vasantīhi. **Tā bhikkhuniyoti** gāvutamatte ṭhāne vasantiyo. **Antarāti** tumhākaṃ, amhākañca nivāsanaṭṭhānassa, nivāsanaṭṭhānato vā antare vemajjhe. Bhummatthe cetamaṃ nissakkavacanaṃ. Ṭhite maggeti sambandho “santikā”tipadaṃ “āgata”tipade apādānaṃ. **Tatthāti** aññasaṃ bhikkhunīnaṃ upassaye. Iti yācitabbāti yojanā. **Tatoti** bhikkhūnaṃ yācitabbato, paranti sambandho.

Cātuddaseti āsaḷhīmāsassa juṇhapakkhassa catuddasannaṃ divasānaṃ pūraṇe divase. **Idhāti** imasmim vihāre. “Ovāda”ntipadaṃ “anu”tipade kammaṃ. **Anujīvantiyoti** anugantvā jīvanaṃ vuttiṃ karantiyo. Vuttā bhikkhūti sambandho. **Dutiyadivaseti** āsaḷhīpuṇṇamiyaṃ. **Athāti** pakkamanānantaraṃ. **Etthāti** bhikkhūnaṃ pakkantattā apassane. “Ābhogaṃ katvā”tiiminā ābhogaṃ akatvā vasitum na vaṭṭatīti dīpeti. Sabhikkhukāvāsaṃ gantabbamevāti adhippāyo. **Sāti** vassacchedāpatti. **Hīti** saccam, yasmā vā. **Kenaci kāraṇenāti** bhikkhācārassa asampadādīnā kenaci nimittena. **Hīti** saccam. Bhikkhūnaṃ pakkantādīkāraṇā abhikkhukāvāse vasantiyā kiṃ abhikkhukāvāseva pavāretabbanti āha “pavārentiyā panā”tiādi.

Anvaddhamāsanti ettha anusaddo vicchatthavācako kammappavacanīyo, tena payogattā

bhummatthe upayogavacananti āha “addhamāse addhamāse”ti. **Paccāsīsitabbā**ti ettha patipubbo ca āpubbo ca sidhātu icchattheti āha “icchitabbā”ti. Sidhātuyā dvebhāvo hoti. Āpubbo sisi icchāyantipi dhātupāthesu vuttam. **Tatthā**ti “uposathapucchaka”ntivacane. **Pakkhassā**ti yassa kassaci pakkhassa. Mahāpaccariyaṃ pana vuttanti sambandho. Ovādassa yācanaṃ **ovādo** uttarapadalopena, soyeva attho payojanaṃ **ovādattho**, tadatthāya. **Pāṭipadadivasatoti** dutiyadivasato. So hi cando vuddhiñca hāniñca paṭimukhaṃ pajjati ettha, etenāti vā **pāṭipadoti** vuccati. **Iti**ti evaṃ vuttanayena. Bhagavā paññāpetīti yojanā. **Aññassā**ti dhammassavanakammato aññassa. **Nirantaranti** abhikkhaṇaṃ, “paññāpetī”tipade bhāvanapūmsakaṃ. **Hīti** vitthāro. **Evañca satīti** evaṃ bahūpakāre sati ca. **Yanti** yaṃ dhammaṃ. **Sāttikanti** sapayojanaṃ. **Yathānusiṭṭhanti** anusīṭṭhiyā anurūpaṃ. Sabbāyeva bhikkhuniyopīti yojanā. **Hīti** saccam.

Ovādaṃ gacchatiti ovādaṃ yācituṃ bhikkhusaṅghassa ārāmaṃ gacchati. **Na ovādo gantabboti** ovādaṃ yācituṃ bhikkhusaṅghassa ārāmo na gantabbo. **Ovādoti** ca upayogatthe paccattavacananti daṭṭhabbaṃ. Itarathā hi saddapayogo virujjheyya. **Ovādaṃ gantunti** ovādaṃ yācanatthāya bhikkhusaṅghassa ārāmaṃ gantuṃ.

“Dve tisso bhikkhuniyo”tipadaṃ “yācivā”tipade dutiyākammaṃ. “Pesetabbā”tipade paṭhamākammaṃ. **Ovādūpasāṅkamananti** ovādassa gahaṇatthāya upasāṅkamaṇaṃ. **Ārāmanti** bhikkhusaṅghassa ārāmaṃ. **Tatoti** gamanato paranti sambandho. **Tena bhikkhunāti** ovādapaṭiggāhakena bhikkhunā. **Tanti** sammatam bhikkhuṃ.

Ussahatiti sakkoti. **Pāsādikenāti** pasādaṃ āvahena pasādajanakena kāyavacīmanokammenāti attho. **Sampādetūti** tividhaṃ sikkhaṃ sampādetu. **Ettāvatāti** ettakena “pāsādikena sampādetū”ti vacanamattena. **Hīti** phalajotako. **Etanti** “tāhī”tivacanaṃ.

Ettha ca bhikkhūnaṃ saṅghagaṇapuggalavasena vacanavāro tividho hoti, taṃ tividhaṃ vacanavāraṃ bhikkhūnaṃ saṅghagaṇapuggalavasena tīhi vacanavārehi guṇitaṃ katvā nava vacanavārā honti, taṃ ākāraṃ dassento āha “tatrāyaṃ vacanakkamo”ti. **Tatrāti** purimavacanāpekkhaṃ. Vacanākāro pākaṭova.

Ekā bhikkhunī vā bahūhi bhikkhunīupassayehi ovādatthāya pesite vacanākāraṃ dassento āha “bhikkhunisaṅgho ca ayyā”tiādi.

Tenāpīti ovādapaṭiggāhakenāpi “ovāda”ntipadaṃ “paṭiggāhakenā”ti pade kammaṃ. Puna “ovāda”ntipadaṃ “apaṭiggahetu”ntipade kammaṃ. Balati assāsapassāsamattena jīvati, na paññājīvitenāti **bālo**. Gilāyati rujatīti **gilāno**. Gamissati gantuṃ bhabboti **gamiko**. Ayaṃ panettha yojanā – gantuṃ bhabbo yo bhikkhu gamissati gamanaṃ karissati, iti tasmā so bhikkhu gamiko nāma. Atha vā yo bhikkhu gantuṃ bhabbatā gamissati gamanaṃ karissati, iti tasmā so bhikkhu gamiko nāmāti. “Bhabbo”ti ca hetuantogadhavisesanaṃ.

Tatthāti bālādīsu tīsu puggalesu. **Dutiyaṃ pakkhadivaseti** pāṭipadato dutiyaṃ pakkhadivase. **Uposathaggeti** uposathagehe. Tañhi uposathaṃ gaṇhanti, uposatho vā gayhati asminti “**uposathagga**”nti vuccati. Tasmīṃ uposathagge. “Anārosetu”nti vacanassa nāpakaṃ dassetvā “apaccāharitu”nti vacanassa tameva dassento āha “aparampi vutta”ntiādi.

Tatthāti ovādapaṭiggāhakesu bhikkhūsu. **No cassāti** no ce assa. **Sabhaṃ vāti** samajjaṃ vā. Sā hi saha bhāsanti ettha, santehi vā bhāti dibbatīti “**sabhā**”ti vuccati, taṃ sabhaṃ vā upasāṅkamissāmīti yojanā. **Tatrāti** tasmīṃ sabhādike. Evam “tatthā”tipadepi.

Catuddasannaṃ pūraṇo **cātuddaso**, tasmīṃ pavāretvāti sambandho. **Bhikkhusaṅgheti** bhikkhusaṅghassa santike, samīpatthe cetam bhummavacanaṃ. **Ajjatanāti** ettha asmiṃ ahani ajja,

imasaddato ahanīti atthe jĵapaccayo, imasaddassa ca akāro, ajja eva ajĵatanā, svattho hi tanapaccayo. Aparasmim ahanī **aparajja**, aparasaddato ahanīti atthe jĵapaccayo sattamyantoyeva. **Etthāti** pavāraṇe, “anujānāmī”tiādivacane vā. **Hīti** saccaṃ.

Kolāhalanti kotūhalaṃ. **Paṭhamaṃ bhikkhunī yācitabbāti** saṅghena paṭhamaṃ bhikkhunī yācitabbā.

Tāya bhikkhuniyā vacanīyo assāti yojanā. **Passanto paṭikarissatīti** vajjāvajjaṃ passanto hutvā paṭikarissati.

Ubhinnanti bhikkhubhikkhunīnaṃ. **Yathāṭhāneyevāti** yaṃ yaṃ ṭhānaṃ yathāṭhānaṃ, tasmim yathāṭhāneyeva. **Kenaci pariyaēnāti** kenaci kāraṇena. Avapubbo varasaddo pihitathoti āha “pihito”ti. **Vacanaṃyevāti** ovādavacanaṃyeva. **Pathoti** jeṭṭhakaṭṭhāne ṭhānassa kāraṇattā patho. **Dosaṃ panāti** abhikkamanādīsu ādīnavaṃ pana. **Añjentīti** makkhenti. Bhikkhūhi pana ovaditum anusāsitum vaṭṭatīti yojanā.

Aññanti ovādato aññaṃ. **Esoti** garudhammo.

150. “Adhammakamme”ti ettha katamaṃ kammaṃ nāmāti āha “adhammakammetiādīsū”tiādi. **Tatthāti** adhammakammadhammakammesu.

152. Uddesaṃ dento bhaṇati, anāpattīti yojanā. **Osāretīti** katheti. **Catuparisatīti** catuparisasmim. **Tatrāpīti** tena bhikkhunīnaṃ suṇanakāraṇenāti. Paṭhamaṃ.

2. Atthaṅgatasikkhāpadaṃ

153. Dutiye **pariyāyasaddo** vāratthoti āha “vārenā”ti. Vāroti ca anukkamoyevāti āha “paṭipāṭiyāti attho”ti. Adhikaṃ cittaṃ imassāti **adhicetoti** dassento āha “adhicittavato”tiādi. Adhiccittaṃ nāma idha arahattaphalacittameva, na vipassanāpādakabhūtaṃ aṭṭhasamāpatticittanti āha “arahattaphalacittena”ti. “Adhiccitasikkhā”tiādīsū (pārā. 45; dī. ni. 3.305; ma. ni. 1.497; a. ni. 6.105; mahāni. 10) hi vipassanāpādakabhūtaṃ aṭṭhasamāpatticittaṃ “adhicitta”nti vuccati. **Na pamajjatoti** na pamajjantassa. **Sātaccakiriyāyāti** satatakaraṇena. Ubho loke munati jānātīti **munīti** ca, monaṃ vuccati ñāṇaṃ munanaṭṭhena jānanatthena, tamassatthīti **munīti** ca dassento āha “muninotī”tiādi. Tattha “yo munati... pe... munanena vā”tiiminā paṭhamatthaṃ dasseti, “monaṃ vuccati...pe... vuccati”tiiminā dutiyatthaṃ dasseti. Muna gatiyanti dhātupāṭhesu (saddanītidhātumālāyaṃ 15 pakārantadhātu) vuttattā “yo munati”ti ettha bhūvādigaṇiko munadhātuyeva, na kīyādigaṇiko mudhātūti daṭṭhabbaṃ. Atha vā muna ñāṇeti dhātupāṭhesu (saddanītidhātumālāyaṃ 17 kīyādigaṇika) vuttattā “munatī”ti kīyādigaṇikova. Dhātvantanakāralopoti daṭṭhabbaṃ. “Monaṃ vuccati ñāṇa”nti cettha ñāṇaṃ nāma arahattañāṇameva. Monassa patho **monapathoti** vutte sattatiṃsa bodhipakkhiyadhammāva adhippetāti āha “sattatiṃsabodhipakkhiyadhammesū”ti. Atha vā adhisīlasikkhādayo adhippetāti āha “tīsu vā sikkhāsū”ti. **Pubbabhāgapaṭipadanti** arahattañāṇassa pubbhāge pavattaṃ sīlasamathavipassanāsaṅkhātāṃ paṭipadaṃ. **Pubbabhāgeti** arahattañāṇassa pubbhāge. **Etthāti** “adhicetaso...pe... sikkhato”ti vacane. “Tādino”tipadaṃ “munino”tipadena yojetabbanti āha “tādīsassa khīṇāsavamunino”ti. **Etthāti** “sokā na bhavanti tādino”ti vacane. Rāgādayo upasametīti **upasantoti** dassetuṃ vuttaṃ “rāgādīna”nti. Sati assatthīti **satimāti** katvā mantusaddo niccayogathoti āha “satiyā avirahitassā”ti.

Na kasīyati na vilekhīyatīti **akāso**, soyeva **ākāso**. Antarena chiddena ikkhitabboti **antalikkho**. Ākāso hi catubbidho ajaṭākāso, kasiṇugghāṭimākāso, paricchinnākāso, rūpaparicchēdākāsoti. Tattha ajaṭākāsova idhādhippeto “antalikkhe”ti visesitattā. Tenāha “na kasiṇugghāṭime, na pana rūpaparicchēde”ti. Paricchinnākāsopi rūpaparicchēdākāsena saṅgahito. “Ma”nti padaṃ

“avamaññanti”ti pade kammaṃ. **Ettakamevāti** etappamāṇaṃ “adhicetaso”tiādisaṅkhātaṃ vacanameva, na aññaṃ buddhavacananti attho. **Ayanti** cūḷapanthako thero. **Handāti** vassagatthe nipāto. Mama ānubhāvaṃ dassemi, tumhe passatha gaṇhathāti adhippāyo. **Vuṭṭhāyāti** tato catutthajjhānato vuṭṭhahitvā. **Antarāpi dhāyatīti** ettha pisaddassa aṭṭhānatthaṃ dassento āha “antaradhāyatīpi”ti. Eseva nayo “seyyampi kappeti”ti etthapi. **Theroti** cūḷapanthako thero. Idaṃ padaṃ antarantarā yuttaṭṭhānesu sambandhitvā “tañceva bhaṇatī”tiiminā sambandhitabbaṃ. **Bhātutherassāti** jeṭṭhakabhātubhūtassa mahāpanthakatherassa.

Padmanti gāthāyaṃ tayo pādā indavajirā, catutthapādo upendavajiro. Tasmā padmanti ettha makāre pare dukārukārassa lopaṃ katvā parakkhamaṃ netvā “padma”nti dvibhāvena likhitabbaṃ. **Avītagandhanti** ettha vīti dīghuccāraṇameva yuttaṃ. Pañke davati gacchatīti **padumaṃ**. Kokaṃ duggandhassa ādānaṃ nudati apānetīti **kokanudaṃ**. Sundaro gandho imassāti **sugandhaṃ**. Ayaṃ panettha yojanā – yathā kokanudasaṅkhātaṃ sugandhaṃ pāto pageva bālātapena phullaṃ vikasiṃ avītagandhaṃ hutvā virocamaṇaṃ padumaṃ siyā, tathā aṅgīrasaṃ aṅgito sarīrato niccharaṇapabhassararasaṃ hutvā virocamaṇabhūtaṃ antalikkhe tapantaṃ ādiccaṃ iva tedhātuke tapantaṃ sammāsambuddhaṃ passāti.

Pagūṇanti vācuggataṃ. **Tatoti** asakkuṇeyyato. **Nanti** cūḷapanthakaṃ. **Theroti** mahāpanthako thero nikkāḍḍhāpesīti sambandho. **Soti** cūḷapanthako. **Athāti** tasmim̄ kāle. Bhagavā āhāti yojanā. **Buddhacakkhunāti** āsayānusayaindriyaparopariyattañāṇasaṅkhātena sabbaññubuddhānaṃ cakkhunā. **Tanti** cūḷapanthakaṃ. **Tassāti** cūḷapanthakassa. **Athāti** tasmim̄ ārocanakāle. **Assāti** cūḷapanthakassa, datvāti sambandho. Rajaṃ malaṃ harati apānetīti **rajoharaṇaṃ**, pilotikakhaṇḍaṃ. **Soti** cūḷapanthako. **Tassāti** pilotikakhaṇḍassa, “anta”ntipade avayavisambandho. **Parisuddhampīti** pisaddo aparisuddhe pilotikakhaṇḍe kā nāma kathāti dasseti. **Samveganti** santāsaṃ bhayanti attho. **Athāti** tasmim̄ ārambhakāle. **Assāti** cūḷapanthakassa. “Ta”ntipadaṃ “mamāyanabhāva”ntipadena sambandhaṃ katvā yojanā kātabbāti. Dutiyāṃ.

3. Bhikkhunupassayasikkhāpadaṃ

162. Tatiye “ovadati pācittiyassā”ti sāmāññato vuttepi visesato attho gahetabboti āha “aṭṭhahi garudhammehi ovadantasseva pācittiya”nti. **Itoti** imasmā sikkhāpadaṃhā. **Yattha yatthāti** yasmim̄ yasmim̄ sikkhāpade. **Sabbattha** tattha tatthāti yojanāti. Tatiyaṃ.

Pakiṇṇakakathā

Etthāti imasmim̄ sikkhāpade. Idaṃ pakiṇṇakaṃ vuttanti sambandho. **Tiṇi pācittiyānīti** bhikkhuno asammatattā ekaṃ pācittiyaṃ, sūriyassa atthaṅgatattā ekaṃ, bhikkhunupassayaṃ upasaṅkamitattā ekanti tiṇi pācittiyāni. **Kathanti** kena kāraṇena hotīti yojanā. **Tatthāti** bhikkhunupassayaṃ. **Tassevāti** sammatasseva bhikkhuno. **Aññena dhammenāti** garudhammehi aññena dhammena. **Divā panāti** sūriyuggamanato tassa anattaṅgateyevāti.

4. Āmisasikkhāpadaṃ

164. Catutthe bahuṃ mānaṃ kataṃ yehīti **bahukatā**. Bahukatā hutvā na ovadantīti atthaṃ dassento āha “na bahukatā”tiādi. **Dhammeti** sīlādidhamme. **Adhippāyoti** “na bahukatā”tipadassa, chabbaggiyānaṃ vā adhippāyoti yojanā. “Kattukāmoti ādīna”ntipadaṃ “attho”tipade vācakasambandho.

Asammato nāma ṭhapito veditabboti yojanā. **Sammutinti** bhikkhunovādakasammutiṃ. Pacchā sāmaṇerabhūmiyaṃ ṭhitoti yojanāti. Catutthaṃ.

5. Cīvaradānasikkhāpadam

169. Pañcame **rathikāyā**ti racchāya. Sā hi rathassa hitattā rathikāti vuccati. **Sandiṭṭhā**ti samodhānavasena dassīyitthāti sandiṭṭhā. Diṭṭhamattakā mittāti āha “mittā”ti. **Sesanti** vuttavacanato sesam vacanam. **Tatrā**ti cīvarapaṭiggahaṇasikkhāpade. **Hī**ti visesajotakam. **Idhā**ti imasmim cīvaradānasikkhāpadeti. Pañcamam.

6. Cīvarasibbanasikkhāpadam

175. Chaṭṭhe **udāyī**ti ettha mahāudāyī, kāḷudāyī, lāḷudāyīti tayo udāyī honti. Tesu tatiyovādhippetoti āha “lāḷudāyī”ti. Pabhāvena ṭhāti pavattatīti **paṭṭhoti** kate paṭibalova labbhati. Tenāha “paṭibalo”ti. **Nipuṇoti** kusalo. “Paṭibhānena katacitta”ntiiminā “**paṭibhānacitta**”nti padassa majjhe padalopam dasseti. **Soti** lāḷudāyī akāsīti sambandho. **Tassā**ti cīvarassa. “Yathāsaṃhaṭṭa”nti ettha evasaddo ajjhāharitabboti āha “yathāsaṃhaṭṭamevā”ti.

176. Yam cīvaram nivāsituṃ vā pārupituṃ vā sakkā hoti, tam cīvaram nāmāti yojanā. **Evaṃ hī**ti evameva. “Dukkaṭṭa”ntiiminā “sayam sabbati, āpatti pācittiyassā”ti ettha antarāpattim dasseti. **Ārāti** sūci. Sā hi arati nissāngavasena gacchati pavisatīti “ārā”ti vuccati, tassā patho gamanam **ārāpatho**, tasmim, ārāpathassa nīharaṇāvāsānattā “nīharaṇe”ti vuttam. **Satakkhattumpī**ti anekakkhattumpi. **Āṇattoti** āṇāpīyatīti āṇatto. “Āṇāpito”ti vattabbe ṇāpesaddassa lopam, ikārassa ca akāram katvā, “ādatte”ti ākhyātapade tevibhattiyā viya tapaccayassa ca dvibhāvam katvā evam vuttam. Tenāha “sakim cīvaram sabbāti vutto”ti. **Atha panāti** tato aññathā pana. **Āṇattassāti** āṇāpitassa. Sambahulānīpi pācittiyāni hontīti sambandho.

Yepi nissitakā sabbantīti yojanā, ācariyupajjhāyesu sabbantesūti sambandho. **Tesanti** ācariyupajjhāyanam. **Tesampī**ti nissitakānampi. Nātikānam bhikkhunīnam cīvaranti sambandho. “Antevāsikehī”tipadam “sabbāpentī”tipade kārītakammaṃ. **Tatrāpī**ti ācariyupajjhāyehi sabbāpanepi. “Antevāsike”tipadam “vañcivā”tipade suddhakammaṃ, “sabbāpentī”tipade kārītakammaṃ. **Itaresanti** ācariyupajjhāyananti. Chaṭṭham.

7. Saṃvidhānasikkhāpadam

181. Sattame “tāsam bhikkhunīnam pacchā gacchantīna”nti padāni “pattacīvara”nti pāṭhasesena yojetabbānti āha “pacchā gacchantīnam pattacīvara”nti. Tā bhikkhuniyo pacchā gacchantiyoti vibhattivipallāsam katvā “dūsesu”ntipadena yojetabbānti āha “tā bhikkhuniyo corā dūsayimsū”ti. Atha vā vibhattivipallāsamakatvā “acchindimsū”ti pade “pattacīvara”ntipadam ajjhāharitvā “dūsesu”ntipade “sīla”nti pāṭham ajjhāharitvā yojetabbanti daṭṭhabbam.

182-3. Saṃpubbo, vipubbo ca dhādhātu tvāpaccayo hotīti āha “saṃvidahitvā”ti. **Kukkuṭoti** tambacūḷo. So hi kukati āhārattham pāṇakādayo ādadātīti kukkuṭo. **Ayanti** gāmo. Adhikaraṇe ṇoti āha “sampadanti etthā”ti. **Etthāti** ca etasmim gāme. Uttarapadassa adhikaraṇatthattā pubbapadena chaṭṭhīsamāsoti āha “kukkuṭāna”ntiādi. Evaṃ ṇasaddassa adhikaraṇattham, pubbapadena chaṭṭhīsamāsaṇca dassetvā idāni ṇasaddassa bhāvattham, pubbapadena bāhiratthasamāsaṇca dassetuṃ vuttam “atha vā”ti. **Tatthāti** pacchimapāṭhe. **Uppatitvāti** uḍḍitvā uddham ākāsam laṅgitvāti attho. **Etthāti** pacchimapāṭhe. **Dvidhāti** padagamanapakkhagamanavasena dvipakārena. “Upacāro na labbhati”tiiminā gāmantaro na hoti, ekagāmoyeva pana hoti, tasmā āpattipi ekāyeva hotīti dasseti. **Paccūseti** pabhāte. So hi paṭiviruddham timiram useti nāsetīti paccūsoti vuccati. **Vassantassāti** ravantassa. “Vacanato”tipadam “āpattiyevā”tipade ṇāpakahetu. **Ratanamattantaroti** kukkupamāṇena byavadhāno.

Tatrāti “gāmantare gāmantare”ti vacane. **Hīti** vitthāro. **Ubbopīti** bhikkhubhikkhuniyopi

sam̐vidahantīti sambandho. **Na vadantīti** aṭṭhakathācariyā na kathayanti. Catunnaṃ maggānaṃ samāgamaṭṭhānaṃ **catukkaṃ**, dvinnaṃ, tiṇṇaṃ, catukkato atirekānaṃ vā maggānaṃ sambaddhaṭṭhānaṃ **siṅghāṭakaṃ**. **Tatrāpīti** upacārokkamanepi. **Gāmatoti** attano gāmato. Yāva na okkamanti, tāvāti yojanā. **Sandhāyāti** ārabha. **Athāti** tasmim̐ nikkhamanakāle. **Dvepīti** bhikkhubhikkhuniyopi gacchantīti sambandho. **Tanti** vacanaṃ.

Hīti viseso. “Gāmantare gāmantare”ti purimasim̐ naye atikkame anāpatti, okkamane āpattīti ayaṃ viseso.

184. Gatapubbatthāti gatapubbā attha bhavathāti attho. Ehi gacchāmāti vā āgaccheyyāsīti vā vadatīti yojanā. **Cetiavandanatthanti** thūpassa vanditum̐.

185. Visāṅketenāti ettha kālavisaṅketo, dvāravisaṅketo, maggavisaṅketoti tividho. Tattha kālavisaṅketeneva anāpattim̐ sandhāya “visaṅketena gacchanti, anāpattī”ti āha. Dvāravisaṅketena vā maggavisaṅketena vā āpattimokkho natthi. Tamatthaṃ dassento āha “purebhatta”ntiādi. **Cakkasamāruḷhāti** iriyāpathacakkaṃ vā sakaṭacakkaṃ vā sammā āruḷhā. **Janapadāti** janakoṭṭhāsā. **Pariyāyantīti** pari punappunaṃ yanti ca āyanti cāti. Sattamaṃ.

8. Nāvābhiruhanasikkhāpadaṃ

188. Aṭṭhame saha aññamaññaṃ thavanaṃ abhithavanaṃ **santhavo**, saṅgamoti vuttaṃ hoti. Mittabhāvena santhavo **mittasanthavo**, lokehi assādetabbo ca so mittasanthavo ceti **lokassādamittasanthavo**, tassa vaso pabhū, tena vā āyattoti **lokassādamittasanthavavaso**, tena. **Uddhaṃ** gacchatīti **uddhaṃgāminīti** dassento āha “uddha”ntiādi. **Uddhanti** ca idha paṭisoto. Tenāha “nadiyā paṭisota”nti. “Uddhaṃgāmini”ntimātikāpadaṃ “ujjavanikāyā”tipadabhājanīyā saṃsando āha “yasmā panā”tiādi. **Yoti** bhikkhu. **Uddhaṃ javanatoti** paṭisotaṃ gamanato. **Tenāti** tena hetunā. **Assāti** “uddhaṃgāmini”ntipadassa. Anusotaṃ idha adho nāmāti āha “anusota”nti. **Assapīti** pisaddo purimāpekkho. **Tatthāti** “uddhaṃgāminim̐ vā adhogāminim̐ vā”tivacane. **Yanti** nāvaṃ harantīti sambandho. **Sampaṭipādanatthanti** sammā paṭimukhaṃ pādanatthaṃ, ujupajjāpanatthanti attho. **Etthāti** nāvāyaṃ. “Ṭhapetvā”tipadabhājanimapekkhitvā “upayogathe nissakkavacana”nti āha. “Aññatrā”ti mātikāpade apekkhite nissakkatthe nissakkavacanampi yujjateva.

189. Ekaṃ tīraṃ agāmakam̐ araññaṃ hotīti yojanā. Addhajojanagaṇanāya pācittiyāni hontīti sambandho. **Majjhena gamanepīti** pisaddo agāmakaaraññatīrapassena gamane kā nāma kathāti dasseti. **Na kevalaṃ nadiyāti** kevalaṃ nadiyā eva anāpatti nāti yojanā, aññesupi samuddādīsu anāpattīti adhippāyo. Yopi bhikkhu gacchatīti sambandho. **Hīti** saccam̐, yasmā vā.

191. Kālavisaṅketo, titthavisaṅketo, nāvāvisaṅketoti tividho visaṅketo. Tattha kālavisaṅketena anāpattim̐ sandhāya “visaṅketena abhiruhantī”ti vuttaṃ. Aññena visaṅketena āpattiyeva, tamatthaṃ dassento āha “idhāpī”tiādi. Aṭṭhamaṃ.

9. Paripācitasikkhāpadaṃ

192. Navame **mahānāgesūti** mahāarahantesu **tiṭṭhamānesu** santesu, cetake pessabhūte navake bhikkhū nimantetīti adhippāyo. **Itarathāti** vibhattivipallāsato vā pāṭhasato vā aññena pakārena. Antaraṃ majjhaṃ pattā kathā **antarakathāti** dassento āha “avasāna”ntiādi. Pakiriyitthāti **pakatā**, na pakatā **vippakatāti** vutte kariyamānakathāvāti āha “kariyamānā hotī”ti. **Addhacchikenāti** upaḍḍhacakkhunā. **Tehīti** therehi.

194. Laddhabbanti laddhārahaṃ. **Assāti** “bhikkhuniparipācita”ntipadassa. Sammā ārabhitabboti

samārambhoti dassento āha “samāraddhaṃ vuccatī”ti. **Paṭiyāditassāti** paripācitassa bhattassa. Gihīnaṃ samārambhoti **gihisamārambho**, katvatthe cetaṃ sāmivacanaṃ. **Tatoti** tato bhattato. **Aññatrāti** vinā. Tamatthaṃ vivaranto āha “taṃ piṇḍapātaṃ ṭhapetvā”ti. Padabhājane pana vuttanti sambandho. “Ñātakapavāritehī”tipadaṃ “asamāraddho”tipade kattā. **Atthatoti** bhikkhuniaparipācītatthato. **Tasmāti** yasmā atthato samāraddhova hoti, tasmā.

195. Paṭiyāditanti paṭiyattaṃ. Pakatiyā paṭiyattaṃ **pakatipaṭiyattanti** dassento āha “pakatiyā”tiādi. Mahāpaccariyaṃ pana vuttanti sambandho. **Tassāti** tasseva bhikkhuno. **Aññassāti** tato aññassa bhikkhuno.

197. Bhikkhuniaparipācītepi pisaddo bhikkhuniaparipācīte kā nāma kathāti dasseti. Navamaṃ.

10. Rahonisajjasikkhāpadaṃ

198. Dasame **pāliattho cāti** ettha pālisaddo vinicchayasadde ca yojetabbo “pālivinicchayo”ti. **Hīti** saccaṃ, yasmā vā. “Idaṃ sikkhāpada”ntipadaṃ “ekapariccheda”ntipade tulyatthakattā, “paññatta”ntipade kammaṃ. **Uparīti** acelakavaggeti. Dasamaṃ.

Ovādavaggo tatiyo.

4. Bhojanavaggo

1. Āvasathapiṇḍasikkhāpada-atthayojanā

203. Bhojanavaggassa paṭhame āvasathe paññatto piṇḍo **āvasathapiṇḍoti** dassento āha “samantā”tiādi. **Parikkhittanti** parivutaṃ āvasathanti sambandho. Addhaṃ pathaṃ gacchantīti **addhikā**. Gilāyanti rujantīti **gilānā**. Gabbho kucchiṭṭhasatto etāsanti **gabbhiniyo**. Malaṃ pabbājentīti **pabbajitā**, tesam yathānurūpanti sambandho. Paññattāni mañcapīṭhāni etthāti **paññattamañcapīṭho**, taṃ. Anekagabbhaparicchedaṃ anekapamukhaparicchedaṃ āvasathaṃ katvāti yojanā. **Tatthāti** āvasathe. **Tesam tesanti** addhikādīnaṃ. Hiyosaddassa atītānantarāhassa ca anāgatānantarāhassa ca vācakattā idha anāgatānantarāhavācakoti āha “svepī”ti. Kuhiṃ gatā itī vutteti yojanā. **“Kukkuccāyanto”**tipadassa nāmadhātuṃ dassento āha “kukkuccaṃ karonto”ti.

206. “Addhayojanaṃ vā yojanaṃ vā”tiiminā “pakkamitu”ntipadassa kammaṃ dasseti. “Gantu”ntiiminā kamasaddassa padavikkhepatthaṃ dasseti. “Anodissā”tipadassa tvāpaccayantabhāvaṃ dassetuṃ “anuddisitvā”ti vuttaṃ. Pāsaṃ ḍetīti **pāsaṇḍo**, sattānaṃ cītesu diṭṭhipāsaṃ khipatīti attho. Atha vā taṇhāpāsaṃ, diṭṭhipāsaṃca ḍeti uḍḍetīti **pāsaṇḍo**, taṃ pāsaṇḍaṃ. **Yāvatattho paññatto hotīti** yāvatā attho hoti, tāvatā paññatto hotīti yojanā. “Yāvadattho”tipi pāṭho, ayamevattho. Dakāro padasandhikaro. **Sakiṃ bhuñjitabbanti** ekadivasaṃ sakiṃ bhuñjitabbanti attho. Tenāha “ekadivasaṃ bhuñjitabba”nti.

Etthāti imasmim sikkhāpade. Ekakulena vā paññattanti sambandho. Bhuñjituṃ na vaṭṭati ekato hutvā paññattattāti adhippāyo. Nānākulehi paññattaṃ piṇḍanti yojanā. Bhuñjituṃ vaṭṭati nānākulāni ekato ahutvā visuṃ visuṃ paññattattāti adhippāyo. Yopi piṇḍo chijjatīti sambandho. **Upacchinditvāti** asaddhiyādipāpacittattā upacchinditvā.

208. Anuvasitvāti punappunaṃ vasitvā. Antarāmagge gacchantattā “gacchanto bhuñjatī”ti idaṃ tāva yuttaṃ hotu, gataṭṭhāne pana gamitattā kathaṃ? Paccuppannasamīpopi atīto tena saṅgahitattā yuttaṃ. “Kuto nu tvaṃ bhikkhu āgacchasi”tiādīsu (saṃ. nī. 1.130) viya. Taṃsamīpopi hi tādīso. Nānāṭṭhānesu nānākulānaṃ santake pakatiyā anāpattibhāvato nānāṭṭhānesu ekakulasseva santakaṃ

sandhāya vuttam “anāpattī”ti. Āraddhassa vicchedattā “puna ekadivasam bhuñjituṃ labhatī”ti vuttam. “Odissā”ti sāmāññato vuttepi bhikkhūyeva gahetabbāti āha “bhikkhūnamyevā”ti. Paṭhamam.

2. Gaṇabhojanasikkhāpadam

209. Dutiye pahīnalābhasakkārassa hetum dassento āha “so kirā”tiādi. **Soti** devadatto. “Ahosī”ti ca “pākaṭo jāto”ti ca yojetabbo. **Ajātasattunā**ti ajātasseyeva pitorājassa sattubhāvato ajātasattunā, “mārāpetvā”tipade kārītakammaṃ. **Rājānanti** bimbisārarājam, “mārāpetvā”tipade dhātukammaṃ. **Abhimāreti** abhinilīyivā bhagavato māraṇatthāya pesite dhanudhare. **Gūlhapaticchannoti** guhito hutvā paṭicchanho. **Parikathāyāti** parigūhanāya kathāya. “Rājānampi”tipadam “mārāpesī”tipade dhātukammaṃ. **Pavijjhīti** pavaṭṭesi. **Tatoti** tato vuttato param uṭṭahimsūti sambandho. Nagare nivasantīti **nāgarā**. **Rājāti** ajātasatturājā. **Sāsanakaṇṭakantisāsanassa** kaṇṭakasadisattā sāsanakaṇṭakam. **Tatoti** nīharato. **Upaṭṭhānampīti** upaṭṭhānampi, upaṭṭhānatthāyapi vā. **Aññepīti** rājato aññepī. **Assāti** devadattassa. **Kiñci** khādanīyabhojanīyam “dātabba”nti iminā yojetabbaṃ. **Kiñci** vā abhivādanādi “kātabba”nti iminā sambandho. Kulesu viññāpetvā bhuñjanassa hetum dassento āha “mā me”tiādi. Posento hutvā bhuñjatīti sambandho.

211. Bhattam anadhivāsentaṇam kasmā cīvaram parittam uppajjatīti āha “bhattam agaṇhantāna”ntiādi.

212. Cīvarakārake bhikkhū bhattena kasmā nimantentīti āha “gāme”tiādi.

215. **Nānāverajjake**ti ettha rañño idam **rajjam**, visadisam rajjam **virajjam**, nānappakāram virajjam **nānavirajjam**. Nānavirajjehi āgatā **nānāverajjakā**. Majjhe vuddhi hotīti āha “nānāvidhehi aññarajjehi āgate”ti. **Aññarajjehīti** rājagahato aññehi rajjehi. Raññitabbanti **rañjanti** vutte niggahitassa anāsanam sandhāya vuttam “nānāveraññakeitipi pāṭho”ti.

218. **Gaṇabhojaneti** gaṇassa bhojanam gaṇabhojanam, gaṇabhojanassa bhojanam gaṇabhojanam, tasmim gaṇabhojane pācittiyanti attho. “Rattūparato”tiādīsu (dī. ni. 1.10; ma. ni. 1.293) viya ekassa bhojanasaddassa lopo daṭṭhabbo. Nanu uposathe viya dve tayo gaṇo nāmāti āha “idha gaṇo nāma cattāro”tiādi. Tena dve tayo gaṇo nāma na honti, cattāro pana ādim katvā taduttari gaṇo nāmāti dasseti. **Tam panetanti** ettha etasaddo vacanālanākāro dvīsu sabbanāmesu pubbasseva yebhuyyena padhānatā. **Pasavatīti** vaḍḍhati, jāyatīti attho. **Vevacanena vāti** “bhattena nimantemi, bhojanena nimantemī”ti pariyaēyena vā. **Bhāsantarena vāti** mūlabhāsāto aññāya bhāsāya vā. Ekato nimantitā bhikkhūti sambandho. **Hīti** saccam, yasmā vā. **Pamāṇanti** kāraṇam. “Cattāro”ti līngavipallāsam katvā “vihāre”tipadena yojetabbaṃ. **Thitesuyevāti** padam niddhāraṇasamudāyo. Eko nimantitoti sambandho.

Cattāro bhikkhū viññāpeyyunti sambandho. **Pāṭekkanti** patiekassa bhāvo pāṭekkam, visunti attho. Ekato vā nānāto vā viññāpeyyunti sambandho.

Chavisāṅkhātato bāhiracammato abhantaracammassa thūlattā “mahācammassā”ti vuttam. Phālam etesam pādānam sañjātanti **phālītā**, uppādentīti sambandho. Pahaṭamatte satīti yojanā. Lesena kappanti pavattam cittam **lesakappiyam**.

Suttañcāti sūcipāsapavesanasuttañca. Nanu visum cīvaradānasamayo viya cīvarakārasamayopi atthi, kasmā “yadā tadā”ti vuttanti āha “visum hī”tiādi. **Hīti** saccam, yasmā vā. Visum cīvaradānasamayo viya cīvarakārasamayo nāma yasmā natthi, tasmā “yadā tadā”ti mayā vuttanti adhippāyo. Tasmā yo bhikkhu karoti, tena bhuñjitabbanti yojanā. **Sūciveṭhanakoti** sibbanatthāya dve pilotikakhaṇḍe sambandhitvā sūciyā vijjhanako. **Viāretīti** pañcakhaṇḍasattakhaṇḍādivasena samvidahati. **Chindatīti** satthakena vā hatthena vā chindati. **Moghasuttanti** muyhanam mogho, atthato gahetabbachattetaḅbaṭṭhāne muyhanacittam, tassa chindanam suttanti moghasuttam. **Āgantukapaṭṭanti**

dupaṭṭacīvare mūlapaṭṭassa upari ṭhapitapaṭṭam. **Paccāgatanti** paṭṭacīvarādīsu labbhati. **Bandhatī** mūlapaṭṭena āgantukapaṭṭam. Bandhati. **Anuvātanti** cīvaram anupariyāyivā vīyati bandhīyatīti anuvātam, tam chindati. **Ghaṭṭetīti** dve anuvātante aññamaññaṃ sambajjhati. **Āropetīti** cīvarassa upari āropeti. **Tatthāti** cīvare. **Suttam karotīti** sūcipāsapavesanasuttam vaṭṭeti. **Valetīti** vaṭṭitvā suttavethanadaṇḍake āvaṭṭeti. **Pipphalīkanti** satthakam. Tañhi piyampi phāletīti pipphali, sāyeva pipphalīkanti katvā pipphalīkanti vuccati, tam **niseti** nisānam karotīti attho. Yo pana katheti, etam ṭhapetvāti yojanā.

Addhānamaggassa dvigāvutattā “addhayojanabbhantare gāvute”ti vuttam. Abhirūḷhena bhuñjītabbanti sambandho. **Yatthāti** yasmiṃ kāle. “Sannipatantī”ti bahukattuvasena vuttam. Akusalam parivajjetīti **paribbājako**, pabbajjavesam vā pariggahetvā vajati gacchati pavattatīti **paribbājako**. Vinā bhāvapaccayena bhāvattassa nātābbato paribbājakabhāvo paribbājako, tam samāpannoti paribbājakasamāpanno. Atha vā paribbājakesu samāpanno pariyāpannoti **paribbājakasamāpanno**. “Etesa”ntipadam “yena kenacī”tipade niddhāraṇasamudāyo.

220. Yepi bhikkhū bhuñjantīti sambandho. **Tatthāti** “dve tayo ekato”tivacane. Animantito catuttho yassa catukkassatī **animantitacatuttham**, animantitena vā catuttham animantitacatuttham. Eseva nayo aññesupi catutthesu. **Idhāti** imasmiṃ sāsane. **Nimantetīti** akappiyanimantanena nimanteti. **Tesūti** catūsu bhikkhūsu. **Soti** upāsako. **Aññanti** nāgatabhikkhuto aññaṃ, nimantitabhikkhuto vā. **Taṅkhaṇappattanti** tasmim pucchanakathanakkhaṇe pattam. **Hīti** vitthāro. **Tatthāti** tasmim ṭhāne, gehe vā. **Tehīti** karaṇabhūtehi bhikkhūhi.

Soti piṇḍapātiko. **Anāgacchantampīti** sayam na āgacchantampi. **Lacchathāti** labhissatha.

Sopīti sāmaṇeropī, na piṇḍapātikoyevāti attho.

Tatthāti gilānacatutthe, tesu catūsu vā. Gilāno itaresam pana gaṇapūrakato hotīti yojanā.

Gaṇapūrakattāti samayaladdhassa gaṇapūrakattā. **Catukkānīti** cīvaradānacatuttham cīvarakāracatuttham addhānagamanacatuttham nāvābhiruhanacatuttham mahāsamayacatuttham, samaṇabhattacatutthanti cha catukkāni. Purimehi missetvā ekādasa catukkāni veditabbāni. Eko paṇḍito bhikkhu nisinno hotīti sambandho. **Tesūti** tīsu bhikkhūsu, gatesu gacchatīti yojanā. Bhutvā āgantvā ṭhitesupi anāpattiyeva. Kasmā sabbesam anāpattī, nanu cattāro bhikkhū ekato gaṇantīti āha “pañcannaṃ hī”tiādi. **Hīti** saccam, yasmā vā. **Bhojanānamyevāti** na yāgukhajjakaphalāphalādīnaṃ. **Tāni** cāti yehi bhojanehi visaṅketam natthi, tāni ca bhojanāni. **Tehīti** catūhi bhikkhūhi. **Tānīti** yāguādīni. **Itīti** tasmā anāpattinti yojanā.

Koci pesito apaṇḍitamanusso vadatīti yojanā. Kattukāmena pesitoti sambandho. **Bhattam gaṇhathāti vāti** vāsaddo “odanam gaṇhatha, bhojanam gaṇhatha, annam gaṇhatha, kuram gaṇhathā”ti vacanānīpi saṅgaṇhāti. Nimantanam sādīyantīti **nemantanikā**. Piṇḍapāte dhutaṅge niyuttatīti **piṇḍapātikā**. Punadivase bhanteti vutteti yojanā. **Haritvāti** apanetvā. **Tatoti** tato vadanato paranti sambandho. **Vikkhepanti** vividham khepam. **Teti** asukā ca asukā ca gāmikā. Bhanteti vutteti yojanā. **Sopīti** apaṇḍitamanussopi, na gāmikāyevāti attho. Kasmā na labhāmi bhanteti vutteti yojanā. Evaṃ “katham nimantesuṃ bhante”ti etthāpi. **Tatoti** tasmā kāraṇā. **Esāti** eso gāmo. **Tanti** bhūmatthe cetam upayogavacanam, tasmim gāme carathāti hi attho. **Kiṃ etenāti** etena pucchanena kiṃ payojanam. **Etthāti** pucchane. Mā pamajjīthāti vadatīti sambandho. **Dutiyadivaseti** nimantanadivasato dutiyadivase. **Dhuragāmeti** padhānagāme, antikagāme vā. Bhāvo nāma kiriyattā ekoyeva hoti, tasmā kattāram vā kammaṃ vā sambandham vā apekkhitvā bahuvacanena na bhavitabbam, tena vuttam “na dubbacehi bhavitabba”nti. **Tesūti** gāmikesu bhojentesūti sambandho. **Asanasālāyanti** bhojanasālāyam. Sā hi asati bhuñjati etthāti asanā, salanti pavisanti assanti sālā, asanā ca sā sālāceti asanasālāti atthena “asanasālā”ti vuccati.

Atha panāti tato aññathā pana. Apādānattho hi athasaddo. **Tattha tatthāti** tasmim̄ tasmim̄ ṭhāne antaravīthiādīsūti attho. **Paṭikaccevāti** paṭhamam̄ katvā eva. Bhikkhūsu gāmato anikkhantesu pagevāti vuttam̄ hoti. **Na vaṭṭatīti** “bhattam̄ gaṇhathā”ti paṇṇattā na vaṭṭati. Ye pana manussā bhojenṭīti sambandho. **Nivattathāti vuttapadeti** “nivattathā”ti vutte kiriyāpade. **Yassa kassaci hotīti** yassa kassaci atthāya hotīti yojanā. **Nivattitum̄ vaṭṭatīti** “bhattam̄ gaṇhathā”ti avuttattā nivattitum̄ vaṭṭati. **Sambandham̄ katvāti** “nivattatha bhante”ti bhantesaddena abyavahitam̄ katvā. **Nisīdatha bhante, bhattam̄ gaṇhathāti** bhantesaddena byavahitam̄ katvā vutte “nisīdathā”tipade nisīditum̄ vaṭṭati. Atha bhantesaddena byavahitam̄ akatvā “nisīdatha, bhattam̄ gaṇhathā”ti sambandham̄ katvā vutte nisīditum̄ vaṭṭati. Icceṭam̄ nayaṃ atidisati “eseva nayo”tiimināti. Dutiyam̄.

3. Paramparabhojanasikkhāpadam̄

221. Tatiye “na kho...pe... karontī”tipāṭhassa atthasambandham̄ dassento āha “yena niyāmenā”tiādi. Tattha “yena niyāmenā”tiiminā “yathayime manussā”ti ettha yathāsaddassa yaṃsaddatthabhāvam̄ dasseti. **Tenāti** tena niyāmena. Iminā yathāsaddassa niyamanidditṭhabhāvam̄ dasseti. “Ñāyatī”tiiminā kiriyāpāṭhasesam̄ dasseti. “Sāsanam̄ vā dānam̄ vā”tipadehi idaṃsaddassa attham̄ dasseti. **Buddhappamukhe saṅgheti** sampadānatthe cetāni bhummavacanāni, buddhappamukhassa saṅghassa dānam̄ vāti attho. “Paritta”ntiiminā orakasaddassa attham̄ dasseti. “Lāmaka”ntiiminā parittasaddassa parivārattham̄ nivatteti. Kiro eva patibhāve niyutto **kirapatikoti** attham̄ dassento āha “kirapatikoti etthā”ti ādi. **Soti** kirapatiko. Kamam̄ kāretīti sambandho. **Upacāravasenāti** vohāravasena, upalakkhaṇavasena, padhānavasena vāti attho. Na kevalam̄ badarāyeva, aññepi pana bahū khādanīyabhojanīyā paṭiyattāti adhippāyo. Badarena misso **badaramisso**, badarasāḷavoti āha “badarasāḷavenā”ti. Badaracūṇṇena misso madhusakkharādi **“badarasāḷavo”**ti vuccati.

222. Uddham̄ sūro uggato asmim̄ kāleti **ussūro**ti vutte atidivākālōti āha “atidivā”ti.

226. Ayam̄ bhattavikappanā nāma vaṭṭatīti yojanā. **Pañcasu sahadhammikesūti** niddhāraṇasamudāyo, itthannāmassāti sambandho. Yadi pana sammukhāpi vikappitum̄ vaṭṭati, tadā attanā saha ṭhitassa bhagavato kasmā na vikappetīti āha “sā cāya”ntiādi. Sā ayam̄ vikappanā saṅghitāti sambandho. Kasmā bhagavato vikappetum̄ na vaṭṭatīti āha “bhagavati hi”tiādi. **Hīti** saccam̄, yasmā vā. Saṅghena katanti sambandho.

229. “Dve tayo nimantane”tipadāni liṅgavipallāsānīti āha “dve tīṇi nimantanānī”ti. Nimantitabbo etehīti **nimantanāni** bhojanāni bhuñjatīti sambandho. Dve tīṇi kulāni ākirantīti yojanā. **Sūpabyañjananti** sūpo ca byañjanañca sūpabyañjanam̄. **Anāpatti** ekato missitattāti adhippāyo. **Mūlanimantananti** paṭhamanimantanam̄ bhojanam̄. **Antoti** heṭṭhā. **Ekampi kabaḷanti** ekampi ālopaṃ. **Yathā tathā vāti** yena vā tena vā ākārena. **Tatthāti** tasmim̄ bhojane. **Rasam̄ vāti** khīrato aññam̄ rasam̄ vā. Yena khīrarasena ajjhotthataṃ bhattam̄ ekarasam̄ hoti, taṃ khīram̄ vā taṃ rasam̄ vā ākirantīti yojanā. Yaṃsaddo hi uttaravākye ṭhito pubbavākye taṃsaddam̄ avagamayati. Khīrena saṃsaṭṭham̄ bhattam̄ **khīrabhattam̄**. Evaṃ rasabhattam̄. **Aññepīti** khīrabhattarasabhattadāyakato aññepi. **Anāpatti** bhattena amissitattāti adhippāyo. “Bhuñjantenā”tipadam̄ “bhuñjitu”ntipade bhāvakattā. **Sappipāyāsepīti** sappinā ca pāyāsena ca kate bhattepi.

Tassāti mahāupāsakassa. Āpattīti ca vaṭṭatīti ca dvinnam̄ aṭṭhakathāvādānam̄ yuttabhāvam̄ mahāpaccarivādēna dassetum̄ vuttam̄ “mahāpaccariya”ntiādi. Dve aṭṭhakathāvādā hi sandhāyabhāsitamattameva visesā, atthato pana ekā. Mahāpaccariyam̄ vuttanti sambandho. **Ekovāti** kumbhiyā ekova. **Paramparabhojananti** parassa parassa bhojanam̄. **Nimantitamhāti** aham̄ nimantito amhi nanūti attho. **Āpucchitvāpīti** mahāupāsakam̄ āpucchitvāpi.

Soti anumodako bhikkhu. **Tanti** bhikkhum̄. **Aññoti** aññataro. **Kinti** kasmā. **Nimantitattāti**

nimantitabhāvato.

Sakalena gāmena nimantitopi ekato hutvāva nimantitassa kappati, na visuṃ visunti āha “ekato hutvā”ti. **Pūgepīti** samādapetvā puññaṃ karontānaṃ samūhepi. “Nimantiyamāno”tipadassa nimantanākāraṃ dassento āha “bhattaṃ gaṇhā”ti. **Yadaggenāti** yaṃ aggena yena koṭṭhāsēnāti attho. Dvīsu theravādesu mahāsumattheravādova yuttoti so pacchā vuttoti. Tatiyaṃ.

4. Kāṇamātāsikkhāpadaṃ

230. Catutthe “nakulamātāti”ādīsu (a. ni. 1.266; a. ni. aṭṭha. 1.1.266) nakulassa bhagavato mātā **nakulamātāti** ca nakulañca bhagavato taṃ mātā cāti nakulamātāti ca attho sambhavati, “uttaramātāti”ādīsu uttarāya mātā **uttaramātāti** atthoyeva sambhavati. Tesu “uttaramātā”tipadasseva “kāṇamātā”tipadassa kāṇāya mātā **kāṇamātāti** atthoyeva sambhavatīti āha “kāṇāya mātā”ti. Tassā dhītuyā “kāṇā”tināmena vissutabhāvaṃ dassento āha “sā kirā”tiādi. **Sāti** dārikā vissutā ahoṣīti sambandho. **Assāti** mahāupāsikāya. **Ye** yeti purisā. “Rāgena kāṇā hontī”tiiminā kaṇanti nimilanti rāgena purisā etāyāti **kāṇāti** atthaṃ dasseti. **Tassāti** kāṇāya. **Āgatanti** ettha bhāvatthe totī āha “āgamana”nti. **Adhippāyoti** “kismiṃ viyā”tipadassa, kāṇamātāya vā adhippāyo. **Rittāti** tucchā, suññāti attho. “Asmiṃ gamane”tiiminā bāhiratthasamāsaṃ dasseti. “Ariyasāvīkā”tiādinā ariyānaṃ bhikkhūhi apaṭivibhattabhogaṃ dasseti. Na kevalaṃ kiñci parikkhayaṃ agamāsi, atha kho sabbanti āha “sabbāṃ parikkhayaṃ agamāsi”ti. **Kāṇāpīti** pisaddo na kevalaṃ mātāyeva maggaphalabhāginī ahoṣi, atha kho kāṇāpi sotāpannā ahoṣīti dasseti. **Sopi purisoti** kāṇāya patibhūto sopi puriso. **Pakatiṭṭhāneyevāti** jeṭṭhakapajāpatiṭṭhāneyeva.

231. Imasmiṃ pana vatthusminti imasmiṃ pūvavatthusmiṃ. **Etanti** pātheyyavatthum. **Ariyasāvakkattāti** ariyabhūtaṃ sāvakaṃ bhāvato, ariyassa vā sammāsambuddhassa sāvakabhāvato.

233. Paheṇakapaṇṇākārasaddānaṃ aññaṃaññaṃavevacanattā vuttaṃ “paheṇakatthāyāti paṇṇākāratthāyā”ti. **Idhāti** “pūvehi vā”tipade, sikkhāpade vā. **Baddhasattūti** madhusakkharādīhi missetvā baddhasattu. **Thūpīkatanti** thūpīkatam katvā.

“Dvattipattapūre”tipadassa visesanuttarabhāvaṃ dassetuṃ vuttaṃ “pūre patte”ti. Dve vā tayo vā pattāti **dvattipattā**, vāsaddatthe saṅkhyobhayabāhiratthasamāso, tisaddaparattā dvissa ca akāro hoti, dvattipattā ca te pūrā cāti **dvattipattapūrā**, te dvattipattapūre gahetvāti yojanā. “Ācikkhitabba”nti vuttavacanassa ācikkhanākāraṃ dassento āha “atra mayā”tiādi. **Tenāpīti** dutiyenāpi. Paṭhamabhikkhu ekaṃ gahetvā dutiyabhikkhussa ārocanañca dutiyabhikkhu ekaṃ gahetvā tatiyabhikkhussa ārocanañca atidisanto āha “yenā”tiādi. Tattha **yenāti** paṭhamabhikkhunā. Paṭikkamanti bhuñjītvā etthāti **paṭikkamananti** vutte asanasālāva gahetabbāti āha “asanasāla”nti. **Yatthāti** yassaṃ asanasālāyaṃ. Mukholokanaṃ na vaṭṭatīti āha “attano”tiādi. **Aññatthāti** paṭikkamanato aññattha. **Assāti** bhikkhussa.

“Saṃvibhajitabba”nti vuttavacanassa saṃvibhajanākāraṃ dassetuṃ vuttaṃ “sace tayo”tiādi. **Yathāmittanti** yassa yassa mittassa. **Akāmāti** na kāmena. Kāraṇatthe cetam nissakkavacanam.

235. Antarāmaggeti maggassa antaro antarāmaggo, sukhuccāraṇattham majjhe dīgho, tasmiṃ. Bahumpi dentānaṃ etesaṃ ñātakapavāritānaṃ bahumpi paṭiggaṇhantassāti yojanā. Aṭṭhakathāsu pana vuttanti sambandho. Aṭṭhakathānaṃ vacanaṃ paḷiyā na sametīti. Catutthaṃ.

5. Paṭhamapavāraṇasikkhāpadaṃ

236. Pañcame **pavāritāti** ettha vassaṃvutthapavāraṇā, paccayapavāraṇā, paṭikkhepapavāraṇā, yāvadatthapavāraṇā cāti catubbidhāsu pavāraṇāsu yāvadatthapavāraṇā ca paṭikkhepapavāraṇā cāti dve

pavāraṇā adhippetāti dassento āha “brāhmaṇena”tiādi. Brāhmaṇena pavāritāti sambandho. **Sayanti** tatiyantaniṭṭhā “pavāritā”tipadena sambandho. Casaddo aññattha yojetabbo yāvadatthapavāraṇāya ca paṭikkhepapavāraṇāya cāti. Paṭimukhaṃ attano gehaṃ visanti pavasantīti **paṭivissakāti** vutte āsannagehavāsikā gahetabbāti āha “sāmantagharavāsike”ti.

237. Uddhaṅgamo ravo **oravo**, soyeva saddo **oravasaddo**, kākānaṃ oravasaddo **kakoravasaddoti** dassento āha “kākāna”ntiādi.

239. Tavantupaccayassa atītatthabhāvaṃ dassetuṃ vuttaṃ “tattha cā”tiādi. **Tatthāti** “bhuttāvā”tipade. Yasmā yena bhikkhunā ajjhoharitaṃ hoti, tasmā so “bhuttāvī”ti saṅkhyāṃ gacchatīti yojanā. **Saṅkhāditvāti** dantehi cuṇṇaṃ katvā. **Tenāti** tena hetunā. **Assāti** “bhuttāvī”tipadassa. Pavāreti paṭikkhipatīti **pavārito** bhikkhūti dassento āha “katapavāraṇo”ti. **Sopi cāti** so paṭikkhepo ca hotīti sambandho. **Assāti** “pavārito”tipadassa. **Tatthāti** “asanaṃ paññāyatī”tiādivacane. Yasmā bhuttāvītipi saṅkhyāṃ gacchati, tasmā na passāmāti yojanā. “Asanaṃ paññāyatī”ti padabhājanīyā “bhuttāvī”ti mātīkāpadassa asaṃsandanabhāvaṃ dassetuṃ vuttaṃ “asanaṃ paññāyatīti iminā”tiādi. **Yañcāti** yañca bhojanaṃ. **Dirattādīti** ettha ādisaddena pañcādivacanaṃ saṅgaṇhāti. **Etanti** “bhuttāvī”tipadaṃ.

“Asanaṃ paññāyatī”tiādisu vinicchayo evaṃ veditabboti sambandho. “Paññāyatī”ti ettha ñādhātuyā khāyanatthaṃ dassetuṃ vuttaṃ “dissatī”ti. “Hatthapāse”tipadassa dvādasahatthappamaṇo hatthapāso nādhippetoti āha “aḍḍhateyyahatthappamaṇe”ti. Vācāya abhilaraṇaṃ nādhippetāṃ. Tenāha “kāyena”ti. **Abhilaratīti** abhimukhaṃ harati. **Tanti** bhojanaṃ. **Etanti** pañcaṅgabhāvaṃ, “pañcahi... pe... paññāyatī”ti vacanaṃ vā.

Tatrāti “asanaṃ paññāyatī”tiādivacane. **Asnātīti** kīyādigaṇattā, tassa ca ekakkharadhātuttā sakāranakārānaṃ saṃyogo daṭṭhabbo. **Tanti** bhojanaṃ. Undati pasavati bhuñjantānaṃ āyubalaṃ janetīti **odano**. Yavādayo pūtiṃ katvā katattā kucchitena masīyati āmasīyatīti **kumāso**. Sacati samavāyo hutvā bhavatīti **sattu**. Byañjanatthāya māretabboti **maccho**. Mānīyati bhuñjantehīti **maṃsaṃ**. **Tatthāti** odanādīsu pañcasu bhojanesu. Sāro assatthi aññesaṃ dhaññānanti **sālī**. Vahati bhuñjantānaṃ jīvitanti **vīhi**. Yavati amissitopi missito viya bhavatīti **yavo**. Gudhati pariveṭhati milakkhabhojanattāti **godhumo**. Sobhanasīsattā kamaṇīyabhāvaṃ gacchatīti **kaṅgu**. Mahantasīsattā, madhurarasaṇāḷattā ca varīyati patthīyati janehīti **varako**. Koramaṃ rudhiraṃ dūsati bhuñjantānanti **kudrūsako**. Nibbatto odano nāmāti sambandho. **Tatthāti** sattasu dhaññesu. **Sālītīti** ettha itisaddo nāmapariyāyo. Sālī nāmāti attho. Eseva nayo “vīhīti”tiādisupi.

Etthāti tiṇadhaññajātīsu. Nīvāro sāliyā anulomo, varakacorako varakassa anulomo. **Ambilapāyāsādīsūti** ettha ādisaddena khīrabhattādayo saṅgaṇhanti. **Odhīti** avadhi, mariyādoti attho. So hi avahīyati cajīyati asmāti odhīti vuccati.

Yopi pāyāso vā yāpi ambilayāgu vā odhiṃ na dasseti, so pavāraṇaṃ na janetīti yojanā. Payena khīrena katattā **pāyāso**. Pātabbassa, asitabbassa cāti dvinnāṃ byuppattinimittānaṃ sambhavato vā **pāyāsoti** vuccati. **Uddhanatoti** cullito. Sā hi upari dhīyanti ṭhapiyanti thālyādayo etthāti uddhananti vuccati. **Āvajjitvāti** pariṇāmetvā. **Ghanabhāvanti** kathinabhāvaṃ. Etthāpi vākye “yo so”ti padāni yojetabbāni. **Pubbeti** abbhuṇhakāle. **Nimantaneti** nimantanaṭṭhāne. Bhatte ākiritvā dentīti sambandho. Yāpanaṃ gacchati imāyāti **yāgu**. Kiñcāpi tanukā hoti, tathāpīti yojanā. **Udakādīsūti** ādisaddena kiñjikakhīrādayo saṅgayhanti. Yāgusaṅgahameva gacchati, kasmā? **Udakādīnaṃ** pakkuthitattāti adhippāyo. **Tasmim vāti** sabhatte, pakkuthitaukakādike vā. **Aññasmim vāti** pakkuthitaukakādito aññasmim udakādike vā. **Yattha** yasmim udakādike pakkhipanti, taṃ pavāraṇaṃ janetīti yojanā.

Suddharasakoti macchamaṃsakhaṇḍanārūhi amisso suddho macchādirasako. **Rasakayāgūti** rasakabhūtā dravabhūtā yāgu. **Ghanayāgūti** kathinayāgu. **Etthāti** ghanayāguyāṃ. **Pupphiatthāyāti**

puppham phullam imassa khajjakassāti pupphī, pupphino attho payojanam pupphiattho, tadatthāya katanti sambandho. **Te taṇḍuleti** te seditatanḍule. Acuṇṇatā neva sattusankhyaṃ, apakkattā na bhattasankhyaṃ gacchanti. **Tehīti** seditatanḍulehi. Te taṇḍule pacanti, karontīti sambandho.

“Yavehī”ti bahuvacanena satta dhaññānipi gahitāni. Esa nayo sālivīhiyavehīti etthāpi. **Thuseti** dhaññatace. **Palāpetvāti** paṭikkamāpetvā. **Tanti** cuṇṇam gacchatīti sambandho. **Kharapākabhajjitānanti** kharo pāko kharapāko, kharapākena bhajjitā kharapākabhajjitā, tesam. Na pavārenti asattusaṅgahattāti adhippāyo. **Kuṇḍakampīti** kaṇampi. Pavāreti sattusaṅgahattāti adhippāyo. **Tehīti** lājehi. **Suddhakhajjakanti** piṭṭhehi amissitam suddham phalāphalādikhajjakam. Yāgum pivantassa dentīti yojanā. **Tānīti** dve macchamaṃsakaṇḍāni. Na pavāreti dvinnam macchamaṃsakaṇḍānam akhāditattāti adhippāyo. **Tatoti** dvemacchamaṃsakaṇḍato nīharitvā ekanti sambandho, tesu vā. **Soti** khādako bhikkhu. **Aññanti** dvīhi macchamaṃsakaṇḍehi aññam pavāraṇapahonakam bhojanam.

Avatthutāyāti pavāraṇāya avatthubhāvato. Tam vitthārento āha “yam hī”ti. **Hisaddo** vitthārajotako. **Yanti** maṃsam. **Idam panāti** idam maṃsam pana. Paṭikkhittamaṃsam kappiyabhāvato apaṭikkhipitabbaṭṭhāne ṭhitattā paṭikkhittampi maṃsabhāvam na jahāti. Nanu khāditamaṃsam pana akappiyabhāvato paṭikkhipitabbaṭṭhāne ṭhitattā khādiyamānampi maṃsabhāvam jahātīti āha “yam panā”tiādi. Kuladūsakammañca vejjakammañca uttarimanussadhammārocanañca sāditarūpiyañca **kula...pe... rūpiyāni**, tāni ādīni yesam kuhanādīnanti **kula...pe... rūpiyādayo**, tehi. **Sabbatthāti** sabbesu vāresu.

Evantiādi nigamananidassanam. **Tanti** bhojanam. **Yathāti** yenākārena. Yena ajjhohaṭam hoti, so paṭikkhipati pavāretīti yojanā. **Katthacīti** kismiñci pattādi. **Tasmim ce antareti** tasmim khaṇe ce. **Aññatrāti** aññasmiṃ ṭhāne. Patte vijjamaṇabhojanam anajjhoharitukāmo hoti yathā, evanti yojanā. **Hīti** saccam. **Sabbatthāti** sabbesu padesu. **Tatthāti** kurundiyam. **Ānisadassāti** āgamma nisīdati etenāti ānisado, tassa pacchimantatoti sambandho. **Pañhiantatoti** pasati ṭhitakāle vā gamanakāle vā bhūmim phusatīti pañhī, tassa antato. “Dāyakassā”tipadam “pasāritahattha”nti padena ca “aṅga”nti padena ca avayavīsambandho. **Hatthapāsoti** hatthassa pāso samīpo hatthapāso, hattho pasati phusati smim ṭhāneti vā **hatthapāso**, aḍḍhateyyahattho padeso. **Tasminti** hatthapāse.

Upanāmetīti samīpam nāmeti. **Anantaraniṣinnopīti** hatthapāsam avijahitvā anantare ṭhāne nisinnopi bhikkhu vadatīti yojanā. **Bhattapacchinti** bhattena pakkhittam pacchim. **Īsakanti** bhāvanapuṃsakam. Uddharitvā vā apanāmetvā vāti sambandhitabbaṃ. **Dūreti** navāsane. **Itoti** pattato. Gato dūtoti sambandho.

Parivesanāyāti parivesanattāya, bhattage vā. **Tatrāti** asmim parivesane. **Tanti** bhattapacchim. **Phuṭṭhamattāvāti** phusiyamattāva. Kaṭacchunā uddhaṭabhatte pana pavāraṇā hotīti yojanā. **Hīti** saccam, yasmā vā. **Tassāti** parivesakassa. **Abhihaṭe paṭikkhittattāti** abhihaṭassa bhattassa paṭikkhittabhāvato.

“Kāyena vācāya vā paṭikkhipantassa pavāraṇā hotī”ti saṅkhepena vuttamattham vitthārena dassento āha “tatthā”tiādi. **Tatthāti** tesu kāyavācāpaṭikkhepesu. **Macchikabījaninti** makkhikānam uttāsanim bījanim. Khakārassa hī chakāram katvā “macchikā”ti vuccati “sacchikatvā”tiādīsu viya (a. ni. 3.103). Ettha hī “sakkhikatvā”ti vattabbe khakārassa chakāro hoti.

Eko vadatīti sambandho. **Apanetvāti** pattato apanetvā. **Etthāti** vacane. **Kathanti** kenākārena hotīti yojanā. **Vadantassa nāmāti** ettha nāmasaddo garahattho “atthī”tipadena yojetabbo. **Atthi nāmāti** attho. **Itopīti** pattatopi. **Tatrāpīti** tasmim vacanepi.

Samāṃsakanti maṃsena saha pavattam. **Rasanti** dravam. **Tanti** vacanam. Paṭikkhipato hoti. Kasmā? Maccho ca raso ca macchena misso raso cāti atthassa sambhavato. **Idanti** vatthum. **Maṃsam**

visuṃ katvāti “maṃsassa rasaṃ maṃsarasa”nti maṃsapadatthassa padhānabhāvaṃ akatvā, rasapadatthasseva padhānabhāvaṃ katvāti attho.

Āpucchantanti “maṃsarasaṃ gaṇhathā”ti āpucchantaṃ. **Tanti** maṃsaṃ. **Karambakoti** missakādhivacanametam. Yañhi aññena aññena missetvā karonti, so “karambako”ti vuccati. Ayam panettha vacanattho – karoti samūhaṃ avayavinti **karo**, kariyati vā samūhena avayavināti **karo**, avayavo, taṃ vakati ādadātīti **karambako**, samūho. “Kadambako”tipi pāṭho, sopi yuttoyeva anumattā paṇḍitehi. Abhidhānepi evameva atthi. Attho pana aññathā cintetabbo. Imasmiṃ vā atthe rakārassa dakāro kātabbo. Maṃsena misso, lakkhito vā karambako **maṃsakarambako**. **Na pavāretīti** yesaṃ kesañci missakattā na pavāreti. **Pavāretīti** maṃsena missittā pavāreti.

Yo pana paṭikkhipati, so pavāritova hotīti yojanā. **Nimantaneti** nimantanaṭṭhāne. **Hīti** saccaṃ. **Tatthāti** kurundiyam. **Yenāti** yena bhattena. **Etthāti** “yāguṃ gaṇhathā”tiādivacane. **Adhippāyoti** aṭṭhakathācariyānaṃ adhippāyo. **Etthāti** “yāgumissakaṃ gaṇhathā”tiādivacane. **Duddasanti** dukkaraṃ dassanaṃ. **Idaṅcāti** “missakaṃ gaṇhathā”tivacanañca. **Na samānetabbanti** samaṃ na ānetabbaṃ, samānaṃ vā na kātabbaṃ. **Hīti** saccaṃ, yasmā vā. **Idaṃ panāti** missakaṃ pana. **Etthāti** missake. **Visuṃ katvāti** rasakhīrasappīni āveṇiṃ katvā. **Tanti** rasādiṃ.

Kaddīyati maddīyatīti **kaddamo**. Undati pasavati vaḍḍhatīti **udakaṃ**. Undati vā kledanaṃ karotīti **udakaṃ**, nilīne satte gupati rakkhatīti **gumbo**, guhati saṃvaraṭṭīti vā **gumbo**. **Anupariyāyantenāti** anukkamena parivattitvā āyantena. **Tanti** nāvaṃ vā setuṃ vā. **Majjhanhikanti** ahasa majjhaṃ majjhanhaṃ, ahasaddassa nhādeso, majjhanhaṃ eva majjhanhikaṃ. Potthakesu pana majjhantikanti pāṭho atthi, so apāṭhoyeva. Yo ṭhito pavāreti, tena ṭhiteneva bhuñjitabbanti yojanā. **Ānisadanti** pīṭhe phuṭṭhānisadamāsaṃ. **Acāletvāti** acāvetvā. Ayameva vā pāṭho. Upari ca passesu ca amocetvāti vuttaṃ hoti. Adinnādāne viya ṭhānācāvanaṃ na veditabbaṃ. **Samsaritunti** saṃsabbituṃ. **Nanti** bhikkhuṃ.

Atirekaṃ ricati gacchatīti **atirittam**, na atirittam **anatirittanti** atthaṃ dassento āha “na atiritta”nti. “Adhika”ntiiminā atirittasaddassa atisuññatthaṃ nivatteti. Adhi hutvā eti pavattatīti **adhikaṃ**. **Taṃ panāti** anatirittam pana hotīti sambandho. **Tatthāti** “akappiyakata”ntiādivacane. Vitthāro evaṃ veditabboti yojanā. **Tatthāti** atirittam kātabbesu vatthūsu. Yam phalaṃ vā yaṃ kandaṃmūlādi vā akatanti yojanā. **Akappiyabhojanaṃ vāti** kuladūsakakammādīhi nibbattaṃ akappiyabhojanaṃ vā atthīti sambandho. **Yoti** vinayadharo bhikkhu. Tena katanti yojanā. “Bhuttāvinā pavāritena āsanā vuṭṭhitena kata”ntivacanato bhuttāvinā apavāritena āsanā vuṭṭhitena kattabbanti siddhaṃ. Tasmā pāto addhānaṃ gacchantesu dvīsu eko pavārito, tassa itaro piṇḍāya caritvā laddhaṃ bhikkhaṃ attanā abhutvāpi “alametaṃ sabba”nti kātuṃ labhati eva. **Yanti** khādanīyabhojanīyam. “Tadubhayampi”tiiminā atirittañca atirittañca **atirittam**, na atirittam **anatirittanti** atthaṃ dasseti.

Tassevāti anatirittasseva. **Etthāti** anatiritte, “kappiyakata”nti ādīsu sattu vinayakammākāresu vā. **Anantareti** vinayadharassa anantare āsane. Pattato nīharitvāti sambandho. **Tatthevāti** bhuñjanaṭṭhāneyeva. **Tassāti** nisinnassa. **Tenāti** bhattaṃ ānentena bhikkhunā bhuñjitabbanti yojanā. “Nisinnena bhikkhunā”ti kārītakammaṃ ānetabbaṃ. Kasmā “hatthaṃ dhovivā”ti vuttanti pucchanto āha “kasmā”ti. **Hīti** kāraṇaṃ. Yasmā akappiyam hoti, tasmā hatthaṃ dhovivāti mayā vuttanti adhippāyo. **Tassāti** bhattaṃ ānentassa. **Yenāti** vinayadharena. Puna **yenāti** evameva. **Yañcāti** khādanīyabhojanīyañca. Yena vinayadharena paṭhamaṃ akataṃ, teneva kattabbaṃ. Yañca khādanīyabhojanīyam paṭhamaṃ akataṃ, taññeva kattabbanti vuttaṃ hoti. **Tatthāti** paṭhamabhājane. **Hīti** saccaṃ. Paṭhamabhājanaṃ suddhaṃ dhovivāti katampi niddosameva. **Tena bhikkhunāti** pavāritena bhikkhunā.

Kuṇḍepīti ukkhaliyampi. Sā hi kuḍati odanādiṃ dāhaṃ karotīti kuṇḍoti vuccati. **Tanti** atirittakataṃ khādanīyabhojanīyam. **Yena panāti** vinayadharena pana. **Bhikkhuṃ** nisīdāpentīti

sambandho. **Maṅgalanimantaneti** maṅgalatthāya nimantanatthāne. **Tatthāti** maṅgalanimantane. **Karontenāti** karontena vinayadharena.

Gilānena bhuñjitāvasesameva na kevalaṃ gilānātirittaṃ nāma, gilānaṃ pana uddissa ābhatam gilānātirittameva nāmāti dassento āha “na kevala”ntiādi. **Yaṃkiñci gilānanti** upasampannaṃ vā anupasampannaṃ vā yaṃkiñci gilānaṃ. Yaṃ dukkaṭaṃ vuttaṃ, taṃ asaṃsaṭṭhavasena vuttanti yojanā. **Anāhāratthāyāti** pipāsacchedanaābādhavūpasamattāya.

241. Sati paccayeti ettha paccayassa sarūpaṃ dassetuṃ “pipāsāya satī”ti ca “ābādhe satī”ti ca vuttaṃ. **Tena tenāti** sattāhakālikena ca yāvajjivikena ca. **Tassāti** ābādhassa. Idaṃ padaṃ “upasamanattha”nti ettha samudhātuyā sambandhe sambandho, yupaccayena sambandhe kammanti daṭṭhabbanti. Pañcamam.

6. Dutiyapavāraṇasikkhāpadaṃ

242. Chaṭṭhe na ācaritabboti **anācāroti** vutte paṇṇattivītikkamoti āha “paṇṇattivītikkama”nti. “Karoti”tiiminā “attānamācaratī”tiādīsu viya carasaddo karasaddatthoti dasseti. **Upanandhīti** ettha upasaddo upanāhattho, nahadhātu bandhanatthoti dassento āha “upanāha”ntiādi. Janito upanāho yenāti janitupanāho. Iminā “**upanandho**”ti padassa upanahatīti upanandhoti katthutthaṃ dasseti.

243. Abhihaṭṭhanti ettha tumpaccayo tvāpaccayatthoti āha “abhiharitvā”ti. Padabhājane pana vuttanti sambandho. Sādhāraṇameva atthanti yojanā. **Assāti** bhikkhussa. **Tihākārehīti** sāmam jānanena ca aññesamārocanena ca tassārocanena cāti tīhi kāraṇehi. Āsādīyate maṅkuṃ kariyate **āsādanam**, taṃ apekkho **āsādanāpekkhoti** dassento āha “āsādana”ntiādi.

Yassa atthāya abhihaṭṭanti sambandho. **Itarassāti** abhihāarakato aññassa bhuttassāti. Chaṭṭhaṃ.

7. Vikālabhojanasikkhāpadaṃ

247. Sattame **girimhīti** pabbatamhi. So hi himavamanādivasena jalaṃ, sārabhūtāni ca bhesajjādivatthūni girati niggiratīti girīti vuccati. **Aggasamajjoti** uttamasamajjo. Imehi padehi aggo samajjo aggasamajjo, girimhi pavatto aggasamajjo **giraggasamajjoti** atthaṃ dasseti. **Samajjoti** ca sabhā. Sā hi samāgamaṃ ajanti gacchanti janā etthāti samajjoti vuccati. “Girissa vā”tiādīnā girissa aggo koṭi **giraggo**, tasmim pavatto samajjo **giraggasamajjoti** attho dassito. **Soti** giraggasamajjo. Bhavissati kirāti yojanā. **Bhūmibhāgeti** avayaviādhāro, sannipatatīti sambandho. Naṭaṅca nāṭakaṅca **naṭanāṭakāni**. “Naccaṃ gītaṃ vāditaṅcā”ti idaṃ tayaṃ “nāṭaka”nti vuccati. **Tesanti** naṭanāṭakānaṃ. **Dassanattanti** dassanāya ca savanāya ca. Savanampi hi dassaneneva saṅgahitaṃ. **Apaññatte sikkhāpadeti** ūnavīsativassasikkhāpadassa tāva apaññattattā. **Teti** sattarasavaggiyā. **Tatthāti** giraggasamajjaṃ. **Athāti** tasmim kāle. **Nesanti** sattarasavaggiyānaṃ adamsūti sambandho. **Vilimpetvāti** vilepanehi vividhākārena limpetvā.

249. “Vikāle”ti sāmāññena vuttepi visesakālova gahetabboti āha “kālo”tiādi. **So cāti** bhojanakālo ca. Majjhanhiko hotīti yojanā. **Tenevāti** bhojanakālassa adhippetattā eva. **Assāti** “vikāle”tipadassa. “Vikālo nāma...pe... aruṇuggamaṇā”ti padabhājanena aruṇuggamanato yāva majjhanhikā kālo nāmāti attho nayena dassito hoti. **Tatoti** ṭhitamajjhanhikato. Sūriyassa atisīghattā vegena ṭhitamajjhanhikaṃ vīti vatteyyāti āha “kukkuccakena pana na kattabba”nti. **Kālatthambhoti** kālassa jānanatthāya thūṇo. **Kālantareti** kālassa abbhantare.

Avasesaṃ khādanīyaṃ nāmāti ettha vinicchayo evaṃ veditabboti yojanā. **Yanti** khādanīyaṃ atthīti sambandho. Vanamūlādipabhedam yampi khādanīyaṃ atthi, tampi āmisagatikaṃ hotīti yojanā.

Seyyathidanti pucchāvācakanipātasamudāyo. Idaṃ khādanīyaṃ seyyathā katamanti attho. **Idampīti** idaṃ dvādasavidhampi. Pisaddena na pūvādiyevāti dasseti.

Tatthāti dvādasasu khādanīyesu, ādhāre bhummaṃ. Mūlati patiṭṭhāti ettha, etenāti vā **mūlaṃ**. Khāditabbanti **khādanīyaṃ**. Mūlameva khādanīyaṃ **mūlakhādanīyaṃ**, tasmim̐ vinicchayo evaṃ veditabboti yojanā. Mūlakamūlādīni lokasaṅketo padesatoyeva veditabbāni. Taṃ tañhi nāmaṃ ajānantānaṃ atisammūlhaḥkāraṇattā saha pariyāyantarena vacanattamaṃ vakkhāma. Sūpassa hitaṃ **sūpeyyaṃ**, sūpeyyaṃ paṇṇaṃ etesanti **sūpeyyapaṇṇā**, tesam̐ mūlāni **sūpeyyapaṇṇamūlāni**. Āmīyati anto pavesīyatīti **āmisō**, ākāro antokaraṇattho, āmisassa gati viya gati etesanti **āmisagatikāni**. **Etthāti** mūlesu. **Jaraḍḍhanti** jarabhūtaṃ upaḍḍhaṃ. **Aññampīti** vajakalimūlato aññampī.

Yāni pana mūlāni vuttāni, tāni yāvajīvikānīti yojanā. Pāliyaṃ vuttānīti sambandho. **Khādanīyatthanti** khādanīyassa, khādanīye vā vijjamānaṃ, khādanīyena vā kātabbaṃ kiccaṃ, payojanaṃ vāti khādanīyattham̐. “Khādanīye” tiiminā “tattha vuttābhiddhammatthā” tiādīsu viya khādanīyatthapadassa uttarapadatthapadhānabhāvaṃ dasseti. Tattha khādanīyassa, khādanīye vā vijjamānaṃ, khādanīyena vā kātabbaṃ kiccaṃ nāma jighacchāharaṇameva. Yañhi pūvādikhādanīyaṃ khāditvā jighacchāharaṇaṃ hoti, tassa kiccaṃ kiccaṃ nāmāti vuttaṃ hoti. Taṃ kiccaṃ, payojanaṃ vā neva pharanti, neva nipphādentī. Eseva nayo “na bhojanīye bhojanīyattham̐ pharantī” tiethāpi.

Tesanti mūlānaṃ anto, lakkhaṇanti vā sambandho. Ekasmim̐ janapade khādanīyatthabhojanīyatthesu pharamānesu aññesupi janapadesu pharantiyevāti dassanattamaṃ “tesu tesu janapadesū” ti vicchāpadaṃ vuttaṃ. Kiñcāpi hi bahūsu janapadesu pathavīrasaāporasasampattivasena khādanīyatthabhojanīyattham̐ pharamānampi ekasmim̐ janapade pathavīrasaāporasavipattivasena apharamānaṃ bhavēyya, vikārasena pana tattha pavattattā taṃ janapadaṃ pamānaṃ na kātabbaṃ, gahetabbamevāti vuttaṃ hoti. **Pakatiāhāravasenāti** aññehi yāvakālika, sattāhakālikehi amissitaṃ attano pakatiyāva āhāraḥkiccarāṇavasena. “Manussāna” ntiiminā aññesaṃ tīracchānādīnaṃ khādanīyatthabhojanīyattham̐ pharamānampi na pamāṇanti dasseti. **Tanti** mūlaṃ. **Hīti** saccaṃ. **Nāmasaññāsūti** nāmasaṅkhātāsu saññāsu.

Yathā mūle lakkhaṇaṃ dassitaṃ, evaṃ kandādīsipi yaṃ lakkhaṇaṃ dassitanti yojanā. Na kevalaṃ pāliyaṃ āgatānaṃ haliddādīnaṃ mūlamyeva yāvajīvikaṃ hoti, atha kho tacādayopīti āha “yañceta” ntiādi. Yaṃ etaṃ atthavidhanti sambandho.

Evaṃ mūlakhādanīye vinicchayaṃ dassetvā idāni kandakhādanīye taṃ dassento āha “kandakhādanīye” tiādi. Tattha **kandakhādanīyeti** kaṃ sukhaṃ dadātīti kando, padumādikando, sukhasa adāyākā pana kandā ruḥhīvasena kandāti vuccanti, kando eva khādanīyaṃ kandakhādanīyaṃ, tasmim̐ vinicchayo evaṃ veditabboti yojanā. Eseva nayo uparipi. **Yanti** kandaṃ. Iminā taṃsaddānapekkho yaṃsaddopi atthīti nīpeti. **Tatthāti** kandakhādanīye. Taruṇo, sukhakhādanīyoti visesanapadāni yathāvacanaṃ uparipi yojetabbāni. Evamādayo pharaṇakakandā yāvakālikāti sambandho.

Adhototi visaraso udakena adhūnito. **Teti** kandā saṅgahitāti sambandho.

Mūle alati pavattatīti **muḷālo**, udakato vā uddhaṭamatte milati nimilatīti **muḷālaṃ**. Evamādi pharaṇakamuḷālaṃ yāvakālikanti yojanā. **Taṃ sabbampīti** sabbampi taṃ muḷālaṃ saṅgahitanti sambandho.

Masati vijjhatīti **matthako**. Evamādi matthako yāvakālikoti yojanā. **Jaraḍḍhabundoti** jarabhūtaadḍhasaṅkhāto pādo.

Khanīyati avadārīyatīti **khandho**, khāyatīti vā **khandho**. “Antopathavīgato” tipadaṃ

“sālakalyāṇikhandho”tipadeneva yojetabbaṃ, na aññehi. Evamādi khandho yāvakālikoti yojanā. **Avasesāti** tīhi daṇḍakādīhi avasesā.

Tacati saṃvarati paṭicchādetīti **taco**. **Sarasoti** ettha evakāro yojetabbo, saraso evāti attho. Tesam saṅgahoti sambandho. **Hīti** saccaṃ. **Etanti** kasāvabhesajjaṃ, “anujānāmi ...pe... bhojanīyattha”nti vacanaṃ vā. **Etthāti** kasāvabhesajje. **Etesampīti** matthakakhandhattacānampi.

Patatīti **pattaṃ**. **Etesanti** mūlakādīnaṃ. Evarūpāni pattāni ca ekaṃsena yāvakālikānīti yojanā. Yā loṇī ārohati, tassā loṇiyā pattaṃ yāvajīvikanti yojanā. **Dīpavāsīnoti** tambapaṇṇidīpavāsīno, jambudīpavāsīno vā. Yāni vā pharantīti vuttānīti sambandho. **Tesanti** nimbādīnaṃ. Idam padam pubbaparāpekkhakaṃ, tasmā dvinnaṃ majjhe vuttanti daṭṭhabbaṃ. Paṇṇānaṃ anto natthīti sambandho.

Pupphati vikasatīti **pupphaṃ**. Evamādi pupphaṃ yāvakālikanti yojanā. **Tassāti** pupphassa. **Assāti** evameva.

Phalatīti **phalaṃ**. **Yānīti** phalāni. Pharantīti sambandho. **Nesanti** phalānaṃ pariyantanti sambandho. Yāni vuttāni, tāni yāvajīvikānīti yojanā. **Tesampīti** phalānampi pariyantanti sambandho.

Asīyati khipīyati, chaḍḍīyatīti vā **aṭṭhi**. Evamādīni pharaṇakāni aṭṭhīni yāvakālikānīti yojanā. **Tesanti** aṭṭhīnaṃ.

Pisīyati cuṇṇaṃ karīyatīti **piṭṭhaṃ**. Evamādīni pharaṇakāni piṭṭhāni yāvakālikānīti yojanā. **Adhotakanti** udakena adhūnitaṃ. **Tesanti** piṭṭhānaṃ.

Nirantaraṃ asati sambajjhatīti **niyyāso**. **Sesāti** ucchuniyyāsato sesā. Pāliyaṃ vuttaniyyāsāti sambandho. **Tatthāti** niyyāsakhādanīye. Saṅgahitānaṃ niyyāsānaṃ pariyantanti yojanā. **Evantiādi** nigamaṃ.

Vuttamevāti heṭṭhā paṭhamapavāraṇasikkhāpade vuttamevāti. Sattamaṃ.

8. Sannidhikāraṇasikkhāpadaṃ

252. Aṭṭhame abbhantare jāto **abbhantaro**. **Mahātheroti** mahantehi thiraguṇehi yutto. Iminā “belatṭho”ti saññānāmassa saññīnāmiṃ dasseti. **Padhānaghareti** samathavipassanānaṃ padhanaṭṭhānagharasaṅkhāte ekasmim āvāse. **Sukkhakuranti** ettha sosanakurattā na sukkhakraṃ hoti, kevalaṃ pana asūpabyañjanattāti āha “asūpabyañjanaṃ odana”nti. Sosanakurampi vuttameva. Vakkhati hi “taṃ piṇḍapātaṃ udakena temevā”ti. “Odana”ntiiminā kurasaddassa odanapariyāyataṃ dasseti. Odanañhi karoti āyuvanṇādayoti “**kura**”nti vuccati. **Soti** belatṭhasīso. **Tañca khoti** tañca sukkhakraṃ āharatīti sambandho. **Paccayagiddhatāyāti** piṇḍapātapaccaye luddhatāya. Thero bhuñjatīti sambandho. Manussānaṃ ekāhārassa sattāhamattaṭṭhitattā “sattāha”nti vuttaṃ. **Tatoti** bhuñjanato paranti sambandho. **Cattāripīti** ettha pisaddena adhikānīpi sattāhāni gahetabbāni.

253. **Itīti** idam tayaṃ. “Sannidhi kāro assā”ti samāso visesanapanipātavasena gahetabbo. “Sannidhikiriyaṃ attho”ti iminā karīyatīti **kāro**ti kammaṭṭhaṃ dasseti. **Ekarattanti** antimaparicchavedasena vuttaṃ tadadhikānampi adhippetattā. **Assāti** “sannidhikāraṇa”nti padassa.

Sannidhikāraṇassa sattāhakālikassa nissaggiyapācittiyāpattiyā paccayattā sannidhikāraṇaṃ yāmakālikaṃ khādanīyabhojanīyaṃ asamānampi suddhapācittiyāpattiyā paccayo hotīti āha “yāmakālikaṃ vā”ti. **Paṭiggahaṇeti** paṭiggahaṇe ca gahaṇe ca. Ajjhoharītukāmatāya hi paṭiggahaṇe ca paṭiggahetvā gahaṇe cāti vuttaṃ hoti. Yaṃ pattaṃ aṅguliyaṃ ghaṃsantassa lekhā paññāyati, so patto

duddhoto hoti saceti yojanā uttaravākye yaṃsaddaṃ disvā pubbavākye taṃsaddassa gamanīyattā.
Gaṇṭhikapattassāti bandhanapattassa. **Soti** sneho. Paggharati sandissatīti sambandho. **Tādiseti**
 duddhote, gaṇṭhike vā. **Tatthāti** dhovitapatte āsiñcitvāti sambandho. **Hīti** saccaṃ. **Abbohārikāti** na
 voharitabbā, voharituṃ na yuttāti attho. **Yanti** khādanīyabhojanīyaṃ pariccajantīti sambandho. **Hīti**
 saccaṃ, yasmā vā. **Tatoti** apariccattakhādanīyabhojanīyato nīharitvāti sambandho.

Akappiyamaṃsesūti niddhāraṇasamudāyo. **Sati paccayeti** pipāsasankhāte paccaye sati.
Anatirittakatanti atirittena akataṃ sannidhikāraṇaṃ khādanīyabhojanīyanti yojanā. Ekameva
 pācittiyanti sambandho. **Vikappadvayeti** sāmisanirāmisasankhāte vikappadvaye. **Sabbavikappesūti**
 vikālasannidhiakappiyamaṃsayāmakālikapaccayasankhātesu sabbesu vikappesu.

255. Āmisasamṣaṭṭhanti āmisena samṣaṭṭhaṃ sattāhakālikam yāvajīvikam.

256. Catubbidhakālikassa sarūpañca vacanatthañca dassento āha “vikālabhojanasikkhāpade”tiādi.
 Tattha niddiṭṭhaṃ khādanīyabhojanīya’ntiiminā yāvakālikassa sarūpaṃ dasseti. “Yāva...pe...
 kālika”ntiiminā vacanatthaṃ dasseti. “Saddhiṃ...pe... pāna”ntiiminā yāmakālikassa sarūpaṃ dasseti.
 “Yāva...pe... kālika”ntiiminā vacanatthaṃ dasseti. “Sabbīādī pañcavidhaṃ bhesajja”ntiiminā
 sattāhakālikassa sarūpaṃ dasseti. “Sattāhaṃ...pe... kālika”ntiiminā vacanatthaṃ dasseti. “Ṭhapetvā...
 pe... sabbampī”tiiminā yāvajīvikassa sarūpaṃ dasseti. “Yāva...pe... jīvika”ntiiminā vacanatthaṃ
 dasseti. Sabbavacanattho lahukamattameva, garuko panevaṃ veditabbo – yāva yattako majjhanhiko kālo
yāvakālo, so assatthī, taṃ vā kālam bhuñjitabbanti **yāvakālikam**. Yāmo kālo **yāmakālo**, so assatthī,
 taṃ vā kālam paribhuñjitabbanti **yāmakālikam**. Sattāho kālo **sattāhakālo**, so assatthī, taṃ vā kālam
 nidahitvā paribhuñjitabbanti **sattāhakālikam**. Yāva yattako jīvo **yāvajīvo**, so assatthī, yāvajīvaṃ vā
 pariharitvā paribhuñjitabbanti **yāvajīvikanti**.

Tatthāti catubbidhesu kālikesu. **Satakkhattanti** anekavāraṃ. Yāva kālo nātikkamati, tāva
 bhuñjantassāti yojanā. Ahorattaṃ bhuñjantassāti sambandhoti. Aṭṭhamam.

9. Pañītabhojanasikkhāpadaṃ

257. Navame pakatṭhabhāvaṃ nītanti **pañītanti** vutte pañītasaddo uttamatthoti āha
 “uttamabhojanānī”ti. Sampanno nāma na madhuraguṇo, atha kho madhuraguṇayuttaṃ bhojanamevāti
 āha “sampattiyutta”nti. **Kassāti** karaṇatthe cetam sāmivacanaṃ, kenāti hi attho. “Surasā”ntiiminā
 sādīyati assādīyatīti **sādūti** vacanatthassa sarūpaṃ dasseti.

259. “Yo pana...pe... bhuñjeyyā”ti ettha vinicchayo evaṃ veditabboti yojanā. **Suddhānīti**
 odanena asaṃsaṭṭhāni. Odanasamṣaṭṭhāni sabbiādīnīti sambandho. **Etthāti** imasmiṃ sikkhāpade. **Hīti**
 saccaṃ. “Pañītasamṣaṭṭhānī”tiiminā pañītehi sabbiādīhi samṣaṭṭhāni bhojanāni **pañītabhojanānīti**
 atthaṃ dasseti. “Sattadhaññanibbattānī”ti iminā bhojanānaṃ sarūpaṃ dasseti.

“Sabbinā bhata”ntiādīnaṃ pañcannaṃ vikappānaṃ majjhe tīsupi vikappesu “bhata”nti
 yojetabbaṃ. Evaṃ vākyam katvā viññāpane āpattim dassetvā samāsaṃ katvā viññāpane taṃ dassento
 āha “sabbibhattaṃ dehī”tiādi.

Itoti gāvito laddhenāti sambandho. **Visaṅketanti** saṅketato ñāpitato vigataṃ virahitanti attho. **Hīti**
 saccaṃ. Iminā visaṅketassa guṇadosaṃ dasseti.

Kappiyasabbinā dehīti kappiyasabbinā samṣaṭṭhaṃ bhataṃ dehīti yojanā. Eseva nayo sesesupi.
Yena yenāti yena yena sabbiādīnā. **Tasmiṃ tassāti** etthāpi vicchāvasena attho daṭṭhabbo. Pāḷiyam
 āgatasabbi nāma gosabbi, ajikāsabbi, mahimsasabbi, yesaṃ maṃsaṃ kappati, tesam sabbi ca.
Navanītam nāma evameva. **Telaṃ** nāma tilatelaṃ, sāsapatelaṃ, madhukatelaṃ, eraṇḍatelaṃ,

vasātelañca. **Madhu** nāma makkhikāmadhu. **Phāṇitaṃ** nāma ucchumhā nibbattaṃ. **Maccho** nāma udakacaro. Pāḷianāgato maccho nāma natthi. Maṃsaṃ nāma yesaṃ maṃsaṃ kappati, tesāṃ maṃsaṃ. **Khīradadhīni** sabbisadisāneva. Vuttaṃ yathā evaṃ “navanītabhattaṃ dehi” tiādīsūpi sūpodanaviññattidukkaṭṭameva hotīti yojanā. **Hīti** saccaṃ. **So cāti** so cattho. **Tatthāti** tasmim atthe. **Kim** payojanaṃ. Nattheva payojananti adhippāyo.

Paṭiladdhaṃ bhojananti sambandho. **Ekarasanti** ekakiccaṃ. **Tatoti** navapaṇītabhojanato nīharitvāti sambandho.

Sabbānīti nava pācittiyāni sandhāya vuttaṃ.

261. Ubhayesampīti bhikkhubhikkhunīnampi. Sabbīti cettha yo naṃ paribhuñjati, tassa balāyuvaddhanatthaṃ sabbati gacchati pavattatīti **sabbi**, ghattaṃ. Tatiyakkhareneva sajjhāyitabbaṃ likhitabbañca. Kasmā? Tatiyakkharaṭṭhāneyeva sabba gatiyanti gatiatthassa sabbadhātussa dhātupāṭhesu āgatattāti. Navamaṃ.

10. Dantaponasikkhāpadaṃ

263. Dasame **dantakaṭṭhanti** dantaponam. Tañhi danto kasīyati vilekhīyati anenāti “dantakaṭṭha”nti vuccati. “Sabba”nti ādinā sabbameva paṃsukūlaṃ **sabbapaṃsukūlaṃ**, tamassatthīti “**sabbapaṃsukūlika**”ti atthaṃ dasseti. **Soti** bhikkhu paribhuñjati kirāti sambandho. **Susāneti** āḷahane. Tañhi chavānaṃ sayanaṭṭhānattā “susāna”nti vuccati niruttinayena. **Tatthāti** susāne. Puna **tatthāti** evameva. Ayyasarūpañca vosāṭitakasarūpañca dassetuṃ vuttaṃ “ayyavosāṭitakānīti etthā”ti. Tattha “ayyā...pe... pitāmahā”tiiminā ayyasarūpaṃ dasseti. “Vo...pe... bhojanīyānī”tiiminā vosāṭitakasarūpaṃ. Ayyasaṅkhātānaṃ pitipitāmahānaṃ atthāya, te vā uddissa chaḍḍitāni vosāṭitakasaṅkhātāni khādanīyabhojanīyāni **ayyavosāṭitakānīti** viggaho kātabbo. Manussā ṭhapenti kirāti sambandho. **Yanti** khādanīyabhojanīyaṃ. **Tesanti** nītakānaṃ. **Piṇḍaṃ piṇḍaṃ katvāti** saṅghāṭaṃ saṅghāṭaṃ katvā. **Aññanti** vuttakhādanīyabhojanīyato aññaṃ. **Ummārepīti** susānassa indakhīlepi. So hi uddhaṭo kilesamāro etthāti “**ummāro**”ti vuccati. Bodhisatto hi abhinikkhamanakāle puttaṃ cumbissāmīti ovarakassa indakhīle ṭhatvā passanto mātaraṃ puttassa nalāṭe hatthaṃ ṭhapetvā sayantiṃ disvā “sace me puttaṃ gaṇṇheyyaṃ, mātā tassa pabujjheyya, pabujjhamānāya antarāyo bhavēyyā”ti abhinikkhamanantarāyabhayena puttadāre pariccajitvā indakhīlato nivattitvā mahābhinnikkhamanaṃ nikkhami. Tasmā bodhisattassa ṭhatvā puttadāresu apekkhāsāṅkhātassa mārassa uddhaṭaṭṭhānattā so indakhīlo nipariyāyena “**ummāro**”ti vuccati, aññe pana rūḷhīvasena. **Thiroti** thaddho. **Ghanabaddhoti** ghanena baddho. Kathinena maṃsena ābaddhoti attho. Vaṭṭhati thūlo bhavātīti **vaṭṭho**, muddhajadutiyoṃ, so assatthīti **vaṭṭharoti** dassento āha “vaṭṭharoti thūlo”ti. “Sallakkhemā”tiiminā “maññe”ti ettha manadhātu sallakkhaṇattho, makārassekāroti dasseti. **Hīti** saccaṃ. **Tesanti** manussānaṃ.

264. Sammāti aviparītaṃ. **Asallakkhetvāti** āhārasaddassa khādanīyabhojanīyādīsū nirūḷhabhāvaṃ amaññitvā. Bhagavā pana ṭhapesīti sambandho. **Yathāuppanassāti** yenākārena uppanassa. Pitā puttasaṅkhāte dārake saññāpentoti viya bhagavā te bhikkhū saññāpentoti yojanā.

265. Etadevāti tiṇṇamākārānamaññataravasena adinnameva sandhāyāti sambandho. **Hīti** saccaṃ. Mātikāyaṃ “dinna”nti vuttaṭṭhānaṃ natthi, atha kasmā padabhājaneyeva vuttanti āha “dinnanti ida”ntiādi. “Dinna”nti idaṃ uddhaṭanti sambandho. **Assāti** “dinna”nti padassa. Niddese ca “kāyena... pe... dente”ti uddhaṭanti yojanā. **Evanti** imehi tīhākārehi dadamāneti sambandho. **Evanti** imehi dvīhākārehi. Ādīyamānanti sambandho. **Rathareṇumpīti** rathikavīthiyaṃ utṭhitapaṃsumpi. **Pubbeti** paṭhamapavāraṇasikkhāpade. Evaṃ paṭiggahitaṃ etaṃ āhāraṃ dinnaṃ nāma vuccatīti yojanā. “Etamevā”ti evassa sambhavato tassa phalaṃ dassetuṃ vuttaṃ “na ida”ntiādi. Nissaṭṭhaṃ na vuccatīti yojanā.

Tatthāti “kāyena”tiādivacane. **Hīti** saccaṃ. Natthu karīyati imāyāti **natthukaraṇī**, tāya. Nāsāpuṭena paṭiggaṇhātīti sambandho. **Akallakoti** gilāno. **Hīti** saccaṃ. Kāyena paṭibaddho **kāyapaṭibaddho** kaṭacchuādīti āha “kaṭacchuādīsū”tiādi. **Hīti** saccaṃ. **Pāṭiyamānanti** pāṭāpiyamānaṃ.

Etthāti imasmim sikkhāpade. “Pañcahaṅgehī”ti padassa vitthāraṃ dassento āha “thāmamajjhimassā”tiādi. **Tanti** dātabbavatthum.

Tatthāti “hatthapāso paññāyati”tivacane. Gacchantopi ṭhiteneva saṅgahito. **Bhūmaṭṭhassāti** bhūmiyaṃ ṭhitassa. **Ākāsaṭṭhassāti** ākāse ṭhitassa. “Hatthaṃ aṅga”nti padehi avayavisambandho kātabbo. **Vuttanayenevāti** “bhūmaṭṭhassa ca sīsenā”tiādinā vuttanayeneva. **Pakkhīti** sakuṇo. So hi pakkhayuttattā pakkhīti vuccati. **Hatthīti** kuñjaro. So hi soṇḍasaṅkhātaṭṭhayuttattā hatthīti vuccati. Addhena aṭṭhamam ratanamassāti **addhaṭṭhamaratano**, hatthī, tassa. **Tenāti** hatthinā.

Eko dāyako vadatīti sambandho. **Oṇamatīti** heṭṭhā namati. **Ettāvatāti** ekadesasampaṭicchanaṃ māttena. **Tatoti** sampaṭicchanaṃ. **Ugghāṭevāti** vivarivā. **Kājenāti** byābhaṅgiyā. Sā hi kacati bandhati vividhaṃ bhāraṃ asminti **kācoti** vuccati, cakārassa jakāre kate kājopi yuttoyeva. Tiṃsa hatthā ratanāni imassāti **tiṃsahattho**, veṇu. **Gulakumbhoti** phāṇitena pūrīto ghaṭo. **Paṭiggahitamevāti** kumbhesu hatthapāsato bahi ṭhitesupi abhihāraṃ kassa hatthapāse ṭhitattā paṭiggahitamevāti vuttaṃ hoti. **Ucchuyantadoṇitoti** ucchuṃ pīlanayantassa ambaṇato.

Bahū pattā ṭhapitā hontīti sambandho. **Yatthāti** yasmim ṭhāne. ṭhitassa bhikkhuno hatthapāseti yojanā. Ṭhatvā phusitvā “nisinnassa bhikkhuno”ti pāṭhasesena yojetabbam. Ṭhitena vā nisinnena vā nipannena vā dāyakena diyyatīti sambandho.

Pathaviyaṃ ṭhitā hontīti sambandho. **Yaṃ yanti** yaṃ yaṃ pattam. **Yattha katthacīti** yesu kesucīti sambandho. **Tanti** taṃ vacanam.

Tattha tasmim ṭhāne jāto **tatthajāto**, aluttasamāsoyaṃ, soyeva **tatthajātako**, tasmim. **Hīti** saccaṃ, yasmā vā. Tatthajātako na ruhati yathā, evaṃ na ruhatiyevāti yojanā. Thāmamajjhimena purisena suṭṭhu haritabbanti saṃhāriyaṃ, taṃyeva **saṃhārimaṃ** yakārassa makāraṃ katvā, na saṃhārimaṃ **asaṃhārimaṃ**, tasmim. **Tepīti** te asaṃhārimāpi. **Hīti** saccaṃ, yasmā vā. **Tatthajātakasaṅkhepūpagāti** tatthajātako samodhānetvā khepaṃ pakkhepaṃ upagatā. **Hīti** saccaṃ, yasmā vā. Idañhi vākyantarattā punappunam vuttanti daṭṭhabbam. **Tānīti** tintiṇīkādiṇāni. **Sandhāretunti** sammā dhāretum. Ṭhito dāyakoti sambandho.

Laddhassa laddhassa vatthussa sannidhiṭṭhānattā, pakkhittatṭhānattā vā thavīyati pasamsīyatīti **thavikā**, tato. **Puñchitvā paṭiggahetvāti** “puñchitvā vā paṭiggahetvā vā”ti aniyamavikappattho vāsaddo ajjhāharitabbo. Tesu tesu vatthūsu rañjati laggatīti **rajo**, taṃ. Vinaye paññattaṃ dukkaṭam **vinayadukkaṭam**. **Taṃ panāti** bhikkham pana. **Paṭiggahetvā dethāti** maṃ paṭiggahāpetvā mama dethāti adhippāyo.

Tato tatoti tasmā tasmā ṭhānā uṭṭhāpetvāti sambandho. **Tanti** bhikkham. **Tassāti** anupasampanna.

So vattabboti so diyyamāno bhikkhu dāyakena bhikkhunā vattabboti yojanā. **Imanti** sarajapattam. **Tenāti** diyyamānabhikkhunā. **Tathā kātabbanti** yathā dāyakena bhikkhunā vuttaṃ, tathā kātabbanti attho. **Uplavatīti** upari gacchati, plu gatiyanti hi dhātupāṭhesu (saddanītidhātumālāyaṃ 16 ṭakārantadhātu) vuttaṃ. Ettha uiti upasaggassa atthadassanattam “uparī”ti vuttaṃ, pakāralakārasamyogo daṭṭhabbo. Potthakesu pana “uppilavatī”ti likhanti, so apāṭho. **Kaṅjikanti** bilaṅgam. Tañhi kena jalena añjijam abhibyattaṃ assāti “kañjijā”nti vuccati, tameva kañjijam

yakārassa kakāraṃ katvā. Taṃ pavāhetvā, apanetvāti attho. **Yatthāti** yasmim̄ ṭhāne. Sukkhameva bhattaṃ bhajitabbaṭṭhena sevittabbaṭṭhena **sukkhabhattaṃ**, tasmim̄. **Puratoti** bhikkhussa purato, pubbe vā. **Phusitānīti** bindūni. Tāni hi sambādhaṭṭhānesupi phusantīti phusitānīti vuccanti.

Uḷūṅkoti kosiyasakuṇānāmo dīghadaṇḍako eko bhājanaviseso, tena. **Thevāti** phusitāni. Tāni hi sambādhaṭṭhānesupi phusitattā thavīyanti pasamsīyantīti “thevā”ti vuccanti. **Carukenāti** cariyati bhakkhīyatīti caru, habypāko, taṃ karoti anenāti carukaṃ, thālyādikaṃ khuddakabhājanam̄, tena ākiriyaṃāneti sambandho. Kāḷavaṇṇakāmehi mānīyatīti **masi**. Khādatīti **chāro** khakārassa chakāraṃ, dakārassa ca rakāraṃ katvā, khāraraso, so imissatthīti **chārikā**. **Uppatitvāti** uddham̄ gantvā. **Hīti** saccam̄, yasmā vā.

Phāletvāti chinditvā. Dentānam̄ anupasampannānanti sambandho. **Pāyāsassāti** pāyāsena. **Tathāpīti** tena mukhavaṭṭiyā gahaṇākārenapi.

Ābhogaṃ katvāti “paṭiggahessāmī”ti manasikāraṃ katvā. **Soti** niddam̄ okkanto bhikkhu. **Vaṭṭatiyevāti** ābhogassa katattā vaṭṭatiyeva. **Anādaranti** anādarena, karaṇatthe cetam̄ upayogavacanam̄, anādaram̄ hutvāti vā yojetabbaṃ. **Kecīti** abhayagirivāsino. Kāyena paṭibaddho **kāyapaṭibaddho**, tena paṭibaddho **kāyapaṭibaddhapaṭibaddho**, tena. **Vacanamattamevāti** “paṭibaddhapaṭibaddha”nti ekam̄ atirekam̄ paṭibaddhavacanamattameva nānam̄, atthato pana kāyapaṭibaddhamevāti adhippāyo. **Yampīti** yampi vatthu. **Tatrāti** tasmim̄ vaṭṭane. **Tanti** anujānam̄.

Neyyo adhippāyam̄ netvā ñāto attho imassāti **neyyattham̄**. **Etthāti** sutte, suttassa vā. **Yanti** vatthu patatīti sambandho. **Parigalītvāti** bhassitvā. **Suddhāyāti** nirajāya. **Sāmanti** sayam̄. **Puñchitvā vātiādīsu** tayo vāsaddā aniyamavikkappatthā. Puñchitādīsu hi ekasmim̄ kicce kate itarakiccam̄ kātabbam̄ natthīti adhippāyo. **Tenāti** tena bhikkhunā, “āharāpetumpī”tipade kāritakammaṃ. “Kasmā na vaṭṭatī”ti pucchā. **Hīti** vitthāro. Vadantena bhagavatāti sambandho. **Etthāti** suttavacanesu. “Pariccattam̄ taṃ bhikkhave dāyakehī”ti vacanenāti yojanā. **Adhippāyoti** nītattho adhippāyo, nippariyāyena itattho ñātatho adhippāyoti vuttam̄ hoti.

Evam̄ nītatthamadhippāyam̄ dassetvā neyyattha, madhippāyam̄ dassento āha “yasmā cā”ti ādi. **Tanti** paribhuñjanam̄ anuññātanti sambandho. **Dutiyadvasepīti** pisaddo sampiṇḍanatto, aparadvasepīti attho. **Adhippāyoti** neyyattho adhippāyo netvā iyyattho ñātatho adhippāyoti vuttam̄ hoti.

Bhuñjantānam̄ bhikkhūnanti sambandho. **Hīti** vitthāro. **Dantāti** dasanā. Te hi daṃsīyanti bhakkhīyanti etehīti “dantā”ti vuccanti. Sattham̄yeva **satthakam̄** khuddakattṭhena, tena paṭiggahitena satthakena. **Etanti** malam̄. **Tanti** lohagandhamattam̄. **Pariharantīti** paṭiggahetvā harantī. **Hīti** saccam̄, yasmā vā. Taṃ satthakam̄ paribhogatthāya yasmā na pariharanti, tasmā eseva nayoti attho. Uggahitapaccayā, sannidhipaccayā vā doso natthīti vuttam̄ hoti. **Tatthāti** tesu takkakhīresu. **Nīlikāti** nīlavaṇṇā snehā. **Āmakatakkādīsūti** apakkesu takkakhīresu.

Kilīṭṭhaudakanti samalam̄ udakam̄. **Tassāti** sāmaṇerassa. Pattagatam̄ odananti sambandho. **Assāti** sāmaṇerassa. **Uggahitakoti** avagahitako. “Uññāto”tiādīsu (saṃ. ni. 1.112) viya ukāro okāraviparīto hoti, apaṭiggahetvā gahitattā duggahitakoti vuttam̄ hoti.

Etenāti odanena. **Paṭiggahitameva hoti** hatthato amuttattāti adhippāyo.

Puna paṭiggahetabbam̄ sāpekkhe satīti adhippāyo. **Ettoti** ito pattato. Sāmaṇero pakkhipatīti sambandho. **Tatoti** pattato. **Kecīti** abhayagirivāsino. **Tanti** “puna paṭiggahetabba”nti vadantānam̄ kesañci ācariyānam̄ vacanam̄ veditabbanti sambandho. **Yanti** pūvabhattādi.

Attano vāti sāmaṇerassa vā. **Sāmaṇerāti** āmantanaṃ. **Tassāti** sāmaṇerassa. **Bhājaneti** yāgupacanakabhājane. **Yāgukuṭanti** yāgyūyā pūritamaṃ kuṭamaṃ. **Tanti** yāgukuṭamaṃ. “Bhikkhunā paṭiggaṇhāpetu”nti kāritakammaṃ upanetabbaṃ. Gīvaṃ ṭhapetvā āvajjetīti sambandho. **Āvajjetīti** pariṇāmeti.

Paṭiggahaṇūpagaṃ bhāranti thāmamajjhimena purisena saṃhārimamaṃ bhāraṃ. Balavatā sāmaṇerenāti sambandho. **Telaghaṭamaṃ vāti** telena pakkhittamaṃ ghaṭamaṃ vā. **Laggentīti** lambenti. Ayameva vā pāṭho.

Nāgassa danto viyāti **nāgadantako**, sadisatthe ko. Ankāyate lakkhīyate anenāti **anḅuso**, gajamatthakamhi vijjhanakaṇḅako. Anḅuso viyāti **anḅusako**, tasmīṃ anḅusake vā laggitā hontīti sambandho. **Gaṇhatoti** gaṇhantassa. Mañcassa heṭṭhā **heṭṭhāmañco**, tasmīṃ. **Tanti** telathālakaṃ.

Ārohanthehi ca orohantehi ca niccaṃ sevīyatīti **nisseṇī**, tassā majjhaṃ **nisseṇimajjhaṃ**, tasmīṃ. Kaṇṇe uṭṭhitaṃ **kaṇṇikaṃ**, kaṇṇamalaṃ, kaṇṇikaṃ viya kaṇṇikaṃ, yathā hi kaṇṇamalaṃ kaṇṇato uṭṭhahitvā sayamaṃ pavattati, evamaṃ telādito uṭṭhahitvā sayamaṃ pavattatīti vuttamaṃ hoti. **Ghanacuṇṇanti** kathinacuṇṇamaṃ. **Tamsamuṭṭhānameva nāmāti** tato telādito samuṭṭhānameva nāma hotīti attho. **Etanti** kaṇṇikādi. Idam padamaṃ pubbāparāpekkhamaṃ.

Yottenāti rajjunā. Añño detīti sambandho.

Pavisante ca nikkhamante ca varati āvarati imāyāti **vati**, taṃ. **Ucchūti** rasālo. So hi usati visaṃ dāhetīti ucchūti vuccati, taṃ. **Timbarusakanti** tindukaṃ. Tañhi temeti bhuñjantaṃ puggalaṃ addeti rasenāti **timbo**, rusati khudditaṃ nasetīti **rusako**, timbo ca so rusako cāti “timbarusako”ti vuccati, taṃ. **Vatidaṇḅakesūti** vatīyā atthāya nikkhaṇitesu daṇḅakesu. **Mayamaṃ panāti** saṅgahakārācariyabhūtā buddhaghosanaṃmakā mayamaṃ pana, attānaṃ sandhāya bahuvacana vasena vuttamaṃ. **Na puthulo pākāroti** aḅḅhateyyahatthapāsānatikkamaṃ sandhāya vuttamaṃ. **Hatthasatampīti** ratanasatampi.

Soti sāmaṇero. Bhikkhussa detīti yojanā. **Aparoti** sāmaṇero.

Phalaṃ imissatthīti **phalinī**, inapaccayo itthilingajotako ī, taṃ sākhandi yojanā. Phalinisākhandi samāsatoṇi pāṭho atthi. **Macchikavāraṇatthanti** madhuphāṇitādīhi makkhanaṭṭhāne nilīyantīti makkhikā, tāyeva **macchikā** khakārassa chakāraṃ katvā, tasmaṃ nivāraṇāya. **Mūlapaṭiggahamevāti** mūle paṭiggahaṇameva, paṭhamapaṭiggahamevāti vuttamaṃ hoti.

Bhikkhu gacchatīti sambandho. **Arittenāti** kenipātena. Tañhi arati nāvā gacchati anenāti **arittamaṃ**, tena. **Tanti** paṭiggahaṇārahaṃ bhaṇḅamaṃ. **Anupasampannenāti** kāritakammaṃ. **Tasmimpīti** cāṭikuṇḅakepi. **Tanti** anupasampannaṃ.

Pātheyyataṇḅuleti pathassa hite taṇḅule. **Tesanti** sāmaṇerānaṃ. **Itarehīti** bhikkhūhi gahitataṇḅulehi. Sabbehi bhikkhūhi bhuttanti sambandho. **Etthāti** bhikkhūhi gahitehi sāmaṇerassa taṇḅulehi yāgupacane na dissatīti sambandho. **Kāraṇanti** parivattetvā bhuttassa ca aparivattetvā bhuttassa ca kāraṇamaṃ.

Bhattamaṃ pacitukāmo sāmaṇeroti yojanā. Bhikkhunā āropetabbaṃ, aggi na kātabboti sambandho. **Puna paṭiggahaṇakiccaṃ natthi** mūle paṭiggahitattāti adhippāyo.

Assāti sāmaṇerassa. **Tatoti** aggijālanato.

Tatte udaketi udake tāpe. **Tatoti** taṇḅulapakkhīpanato.

Pidhānanti ukkhalipidhānaṃ. **Tassevāti** hatthakukkuccakassa bhikkhuno eva. **Dabbiṃ vāti** kaṭacchum vā. So hi darīyati viloḷīyati imāyāti dabbīti vuccati.

Tatrāti tasmim̐ ṭhāpane. **Tassevāti** lolabhikkhusseva. **Tatoti** pattato. Puna **tatoti** sākhādito. **Tatthāti** phalarukkhe.

Vitakkaṃ sodhetunti “mayhampi dassatī” ti vitakkaṃ sodhetum. **Tatoti** ambaphalādito.

Puna **tatoti** mātāpitūnamatthāya gahitatelādito. **Teti** mātāpitāro. **Tatoyevāti** tehiyeva taṇḍulehi sampādetvāti sambandho.

Etthāti tāpitaudake. Amuñcanteneva hatthenāti yojanā. Aṅganti vināsaṃ gacchantīti **aṅgārā**. Darīyanti phalīyantīti **dārūni**.

Vutto sāmaṇeroti yojanā.

Gavati paribhuñjantānaṃ vissatṭhaṃ saddaṃ karotīti **guḷo**, guḷati visato jīvitaṃ rakkhatīti vā **guḷo**, taṃ bhājento bhikkhūti sambandho. **Tassāti** lolasāmaṇerassa.

Dhūmassatthāya vaṭṭīyati vaṭṭitvā karīyatīti dhūmavaṭṭi, taṃ. Mukhīyati viparīyatīti **mukhaṃ**. Kaṃ vuccati sīsaṃ, taṃ tiṭṭhati etthāti **kaṇṭho**.

Bhattuggāroti uddhaṃ girati niggiratīti uggāro, bhattameva uggāro bhattuggāro, uggārabhattanti attho. **Dantantare**ti dantavivare.

Upakaṭṭhe kāleti āsanne majjhanhike kāle. **Kakkhāretvāti** sañcitvā. Tassa atthaṃ dassetum vuttaṃ “dve tayo kheḷapiṇḍe pātetvā” ti. Phaḷusaṅkhātaṃ siṅgaṃ visānaṃ asmiṃ atthīti **siṅgī**, soyeva kaṭukabhayehi viramitabbattā **siṅgīveroti** vuccati. Aṅkīyati rukkho navaṃ uggatoti lakkhīyati etehīti **aṅkurā**, samaṃ loṇena udakaṃ, samaṃ vā udakena loṇaṃ asminti **samuddo**, tassa udakaṃ avayaviavayavabhāvenāti **samuddodakaṃ**, tena apaṭiggahitenāti sambandho. Phāṇati guḷato thaddhabhāvaṃ gacchatīti **phāṇitaṃ**. Karena hatthena gahitabbāti **karakā**, vassopalaṃ, karena gaṇhitumarahāti attho. **Katakaṭṭhināti** katakaṇāmakassa ekassa rukkhavisesassa aṭṭhinā. **Tanti** udakaṃ. **Kapitthoti** ekassa ambulaphalassa rukkhavisesassa nāmaṃ.

Bahalanti āvilaṃ. **Sanditvāti** visanditvā. **Kakudhasobbhādayoti** kakudharukkhasamīpe ṭhitā sobbhādayo. **Rukkhatoti** kakudharukkhatō. **Parittanti** appakaṃ.

Pānīyaghaṭe pakkhittāni hontīti sambandho. **Tanti** vāsamattaṃ udakaṃ. **Tatthevāti** ṭhapitapupphavāsītapānīyeyeva. ṭhapitaṃ dantakaṭṭhanti sambandho. Ajānantassa bhikkhussāti yojanā. Anādare cetam̐ sāmivacanaṃ. **Hīti** saccaṃ, yasmā vā.

Kiṃ mahābhūtaṃ vaṭṭati, kiṃ na vaṭṭatīti yojanā. **Yaṃ panāti** mahābhūtaṃ pana. **Aṅgalagganti** aṅgesu laggam̐, mahābhūtaṃ sambandho. **Etthāti** sede. **Sujhāpitanti** aṅgārasadisam̐ katvā suṭṭhu jhāpitaṃ.

Cattārīti pathavī chārikā gūthaṃ muttanti cattārī. **Mahāvikaṭānīti** mahantāni sappadaṭṭhakkhaṇasaṅkhāte vikārakāle kattabbāni osadhāni. **Etthāti** “asati kappiyakārake” ti vacane. **Kālodissaṃ nāmāti** byādhodissa, puggalodissa, kālodissa, samayodissa, desodissa, vasodissa, bhesajjodissasaṅkhātesu sattasu odissesu kālodissaṃ nāmāti attho. Dasamaṃ.

Bhojanavaggo catuttho.

5. Acelakavaggo

1. Acelakasikkhāpada-atthayojanā

269. Acelakavaggassa paṭhame parivisati etthāti **parivesananti** dassento āha “parivesanattḥāna”nti. Paribbājakapabbajasaddā samānāti āha “paribbājakasamāpannoti pabbajjaṃ samāpanno”ti. Titthena samaṃ pūrātīti samatitthikaṃ, nadīādīsu udakaṃ, samatitthikaṃ viyāti **samatitthikaṃ**, pattabhājanesu yāgubhattaṃ. **Tesanti** mātāpītuṇaṃ dentassāti sambandho. “Dāpetī”ti ettha dādḥātuyā sampadānassa suvijānitattā taṃ adassetvā kāritakammameva dassento āha “anupasampannā”ti.

273. “Santike”tiiminā “**upanikkhipivā**”ti ettha upasaddassa samīpatthaṃ dasseti. **Tesanti** titthiyānaṃ. **Tatthāti** bhājane. **Itoti** pattato. **Idhāti** mayhaṃ bhājane. **Nanti** khādanīyabhojanīyaṃ. **Tassāti** titthiyassāti. Paṭhamaṃ.

2. Uyyojanasikkhāpadaṃ

274. Dutiye paṭikkamanaasanasālasaddānaṃ pariyāyattā vuttaṃ “asanasālayapī”ti. Bhattassa vissajjanaṃ **bhattavissaggoti** kate bhattakiccanti āha “**bhattakicca**”nti. Sambhūdhātussa papubbaapadhātvatthattā vuttaṃ “na pāpuṇī”ti.

276. **Vuttāvasesanti** vuttehi mātugāmena saddhiṃ hasitukāmatādīhi avasesaṃ. **Tasminti** uyyojitabhikkhumhi. **Atthatotī** vijahantavijahitabhikkhūnaṃ avinābhāvasaṅkhātaatthato. **Itarenāti** uyyojakabhikkhunā. **Tatthāti** “dassanūpacāraṃ vā savanūpacāraṃ vā”tivacane. **Etthāti** niddhāraṇasamudāyo, dassanūpacārasavanūpacāresūti attho. “Tathātiiminā dvādasahatthapamāṇaṃ atidīsati. **Tehīti** kuṭṭādīhi. **Tassāti** dassanūpacārātikkaṃ. “Vuttapakāraṇācāra”nti iminā “na añño koci paccayo”ti ettha aññasaddassa apādānaṃ dasseti, “kāraṇa”ntiiminā paccayasaddassatthaṃ.

277. **Kalisaddassa** pāpaparājayasāṅkhātesu dvīsu atthesu pāpasāṅkhāto kodhoti āha “kalīti kodho”ti. “Āṇa”ntiiminā sāsanasaddassatthaṃ dasseti. Vuttañhi “āṇa ca sāsanaṃ ñeyya”nti. Kodhavasena vadatīti sambandho. Dassetvā vadatīti yojanā. Imassa ṭhānaṃ nisajjaṃ ālokitaṃ vilokitaṃ passatha bhoti yojanā. **Imināpīti** amanāpavacanaṃ vacanenāpīti. Dutiyaṃ.

3. Sabhojanasikkhāpadaṃ

279. Tatiye “sayaniyaghare”ti vattabbe yakāralopaṃ katvā “sayanighare”ti vuttanti āha “**sayanighare**”ti. **Yatoti** ettha tosaddo paṭhamādīsu atthesu dissati. “Yatonidāna”ntiādīsu (su. ni. 275) paṭhamatthe. “Antarāye asesato”tiādīsu (dha. sa. aṭṭha. ganthārambhakathā 7) dutiyatthe. “Aniccato”tiādīsu (paṭṭhā. 1.1.409) tatiyatthe. “Mātito pitito”tiādīsu (dī. ni. 1.311) pañcamyatthe. “Yaṃ parato dānapaccayā”tiādīsu (jā. 2.22.585) chaṭṭhyatthe. “Purato pacchato”tiādīsu (pāci. 576) sattamyatthe. “Padamato”tiādīsu kāraṇatthe dissati. Idhāpi kāraṇattheyevāti āha “yasmā”ti. Yasmā kāraṇā ayyassa bhikkhā dinnā, tasmā gacchatha bhante tumheti attho. **Yanti** bhikkhaṃ. **Voti** tumhehi. **Adhippāyoti** purisassa ajjhāsayo. “Pariyuṭṭhito”ti sāmāññato vuttepi atthapakaraṇādīto rāgapariyuṭṭhitovādhippetoti āha “**rāgapariyuṭṭhito**”ti, rāgena paribhavitvā uṭṭhitoti attho.

280. **Sabhojananti** ettha sakāro sahasaddakāriyo ca akārukārānaṃ asarūpattā akārato ukārassa lopo ca tīsu padesu pacchimānaṃ dvinnaṃ padānaṃ tulyatthanissitasamāso ca pubbapadena saha bhedanissitabāhiratthasamāso ca hoti, iti imamatthaṃ dassento āha “saha ubhoḥi janehī”ti. Atha vā

bhuñjītabbanti **bhojanaṃ**, saṃ vijjati bhojanaṃ asmiṃ kuleti **sabhojananti** dassento āha “atha vā”tiādi. **Hīti** saccaṃ. **Tenevāti** teneva aññamaññaṃ bhuñjītabbattā. **Assāti** “sabhojane”tipadassa. **Ghareti** ettha pubbo sayanisaddo lopoti āha “sayanighare”ti. Iminā “datto”tiādīsu viya pubbapadalopasamāsaṃ dasseti. **Piṭṭhasaṅghāṭassāti** ettha piṭṭhasaṅghāṭo nāma na aññassa yassa kassaci, atha kho sayanigharagabbhassevāti āha “tassa sayanigharagabbhassā”ti. **Yathā vā tathā vāti** yena vā te na vā ākārena. **Katassāti** piṭṭhivamsaṃ āropetvā vā anāropetvā vā katassāti. Tatiyaṃ.

284. Catutthapañcomesu yathā ca sabhojanasikkhāpadaṃ paṭhamapārājikasamuṭṭhānaṃ, evameva tānipīti yojanāti. Catutthapañcamāni.

6. Cārittāsikkhāpadaṃ

294. Chaṭṭhe kasmā tehi “dethāvuso bhatta”nti vuttaṃ, nanu bhikkhūnaṃ evaṃ vuttaṃ na vaṭṭatīti āha “ettha taṃ kirā”tiādi. **Tasmāti** yasmā abhihaṭaṃ ahosi, tasmā.

295. Idaṃ pana vacanaṃ āhāti sambandho. **Pasādaññathattanti** pasādassa aññenākārena bhāvo. **Nanti** khādanīyaṃ. “Gahetvā āgamaṃsū”tiiminā “ussāriyitthā”ti ettha ukārassa uggahattatañca saradhātussa gatyatthatañca ajjataniñuṃvibhattiyā tthattañca dasseti, uggahetvā sārīṃsu āgamaṃsūti attho.

298. **Yatthāti** yasmīṃ ṭhāne. Ṭhitassa bhikkhuno cittaṃ uppannanti yojanā. **Tatoti** cittuppannato. **Yanti** bhikkhuṃ. **Pakativacanenāti** uccāsaddamakavā pavattena sabhāvavacanaena. **Antovihāreti** vacanassa atisambādhattā ayuttabhāvaṃ maññaṃāno āha “api ca antoupacārasīmāyā”ti.

302. Gāmassa antare ārāmo tiṭṭhatīti **antarārāmo** vihāro, taṃ gacchatīti dassento āha “antogāme”tiādīti. Chaṭṭhaṃ.

7. Mahānāmasikkhāpadaṃ

303. Sattame “bhagavato”tipadaṃ “cūlapituputto”tipade sambandho, “mahallakataro”tipade apādānaṃ. **Cūlapituputtoti** suddhodano, sakkodano, sukkodano, dhotodano, amitodanoti pañca janā bhātaro, amitā, pālītāti dve bhaginiyo. Tesu bhagavā ca nando ca jeṭṭhabhātubhūtassa suddhodanassa puttā, ānando kaniṭṭhabhātubhūtassa amitodanassa putto, mahānāmo ca anuruddho ca tatiyassa sukkodanassa puttā. Sakkodanadhotodanānaṃ puttā apākaṭā. Tissatthero amitāya nāma bhaginiyā putto, pālītāya puttadhītārā apākaṭā. Tasmā cūlapituno sukkodanassa putto cūlapituputtoti attho daṭṭhabbo. **Dvīsu phalesūti** heṭṭhimesu dvīsu phalesu. **Ussannasaddo** bahupariyāyoti āha “bahū”ti. **Vajatotī** goṭṭhato. Tañhi gāvo gocaraṭṭhānato paṭikkamitvā nivāsattāya vajanti gacchanti asminti vajoti vuccati.

306. **Tasmiṃ samayeti** tasmiṃ pavāraṇasamaye. “Ettakehī”tipadassa nāmavasena vā parimāṇavasena vā duvidhassa atthassa adhippetattā vuttaṃ “nāmavasena parimāṇavasena”ti. Tesu nāmaṃ sandhāya etaṃ nāmaṃ etesaṃ bhesajjānanti **ettakānīti** vacanattho kātabbo, parimāṇaṃ sandhāya etaṃ parimāṇaṃ etesanti **ettakānīti** vacanattho kātabbo. “Aññaṃ bhesajja”nti ettha aññasaddassa apādānaṃ nāmaṃ vā parimāṇaṃ vā bhaveyyāti āha “sabbinā pavārito”tiādi.

310. **Yeti** dāyakā, pavāritā hontīti sambandhoti. Sattamaṃ.

8. Uyyuttasenāsikkhāpadaṃ

311. Aṭṭhame “abhimukha”ntiiminā abhisaddassatthaṃ dasseti. “**Uyyāto**”tipadassa utṭhahitvā yātoti dassento āha “nagarato niggato”ti. “Katauyyoga”nti iminā utṭhahitvā yuñjati gacchatīti

uyyuttāti dasseti. Dhātūna, manekatthattā vuttam “gāmato nikkhanta”nti.

314. Dvādasa purisā imassa hatthinoti **dvādasapuriso**, āvudho hatthesu etesanti **āvudhahatthā**. Ninnanti ninnatthānaṃ, **passato** bhikkhunoti sambandhoti. Aṭṭhamaṃ.

9. Senāvāsasikkhāpadaṃ

319. Navame “tiṭṭhatu vā”tiādinā vasanākāraṃ dasseti. Vāsaddo “caṅkamatu vā”tiattham sampiṇḍeti. **Kiñci iriyāpathanti** catūsu iriyāpathesu kiñci iriyāpatham. Yathā ruddhamāne sañcāro chijjati, evaṃ ruddhā samvutā hotīti yojanā. “Ruddho”ti iminā **“palibuddho”**ti ettha paripubbassa budhidhātussa adhippāyattham dasseti. Navamaṃ.

10. Uyyodhikasikkhāpadaṃ

322. Dasame **yujjhantīti** saṃpaharanti. “Balassa aggaṃ etthā”tiiminā bhinnādhikaraṇabāhiratthasamāsaṃ dasseti. “Jānanti”tipadaṃ atthasampunṇatthāya pakkhittam. **Agganti** koṭṭhāsaṃ. Balaṃ gaṇīyati etthāti **balagganti** vacanatthopi yujjati. Tenāha “balagaṇanaṭṭhāna”nti. Idañhi vacanaṃ ambasecanagarusinanayena vuttam. Kathaṃ? “Balagaṇanaṭṭhāna”nti vadantena aṭṭhakathācariyena “balassa aggaṃ jānanti etthāti balagga”nti vacanatthassa piṇḍattho ca ñāpiyati, “balaṃ gaṇīyati etthāti **balagga**”nti vacanattho ca dassīyati. Viyūhīyate sampiṇḍīyate **byūho**, senāya byūho **senābyūhoti** attham dasseti “senāya viyūha”ntiādinā. Aṇati bheravasaddaṃ karotīti **aṇikaṃ**, muddhajaṇakāro, hatthīyeva aṇikaṃ **hatthāṇikaṃ**. Eseva nayo sesesupi. Yo hatthī pubbe vutto, tena hatthināti yojanāti. Dasamaṃ.

Acelakavaggo pañcamaṃ.

6. Surāpānavaggo

1. Surāpānasikkhāpada-atthayojanā

326. Surāpānavaggassa paṭhame bhaddā vati etthāti **bhaddavatikāti** ca, bhaddā vati bhaddavati, sā ettha atthīti **bhaddavatikāti** ca attham dassento āha “so”tiādi. **Soti** gāmo labhīti sambandho. Patham gacchantīti **pathāvinoti** kate addhikāyevāti āha “addhikā”ti. Addham gacchantīti **addhikā**. “Pathikā”tipi pāṭho, ayamevattho. **“Tejasā teja”**ntipadāni sambandhāpekkhāni ca honti, padānaṃ samānattā sambandho ca samānoti maññītuṃ sakkuṇeyyā ca honti, tasmā tesaṃ sambandhañca tassa asamānatañca dassetuṃ vuttam “attano tejasā nāgassa teja”nti. “Ānubhāvenā”tiiminā pana tejasaddassa attham dasseti. Kapotassa pādo **kapoto** upacārena, tassa eso **kāpoto**, vaṇṇo. Kāpoto viya vaṇṇo assāti **kāpotikāti** dassento āha “kapotapādasamavaṇṇarattobhāsā”ti. **Pasannasaddassa** pasādasaddhādayo nivattetuṃ “surāmaṇḍassetam adhivacana”nti vuttam. **Pañcābhiññassa satoti** pañcābhiññassa samānassa sāgatassāti yojanā.

328. “Madhukapupphādīnaṃ rasena kato”tiiminā pupphānaṃ rasena kato āsavo **pupphāsavoti** vacanattham dasseti. Esa nayo “phalāsavo”tiādisupi. Surāmerayānaṃ visesaṃ dassetuṃ vuttam “surā nāmā”tiādi. **Piṭṭhakiṇṇapakkhittāti** piṭṭhena ca kiṇṇena ca pakkhittā katā vāruṇīti sambandho. **Kiṇṇāti** ca surāya bījaṃ. Tañhi kiranti nānāsambhārāni missībhavanti etthāti kiṇṇāti vuccati. Tassāyeva maṇḍeti yojanā. Suranāmakena ekena vanacarakena katāti **surā**. Madam janetīti **merayaṃ**.

329. **Loṇasovīrakanti** evaṃnāmakaṃ pānaṃ. **Suttantipi** evameva. **Tasminti** sūpasampāke. Telam pana pacantīti sambandho. Natthi tikhiṇaṃ majjaṃ etthāti atikhiṇamajjaṃ, atikhiṇamajje tasmimīyeva teleti attho. **Yaṃ panāti** telam pana. Tikhiṇaṃ majjaṃ imassa telassāti **tikhiṇamajjaṃ**. **Yatthāti** tele.

Ariṭṭhoti evaṃnāmakam bhesajjam. **Tanti** ariṭṭham, “sandhāyā” tipade avuttakammaṃ. **Etanti** “amajjam ariṭṭha” ntivacanaṃ, “vutta” ntipade vuttakammanti. Paṭhamam.

2. Aṅgulipatodakasikkhāpadaṃ

330. Dutiye aṅgulīhi patujjanaṃ aṅgulipatodo, soyeva **aṅgulipatodakoti** dassento āha “aṅgulīhī” tiādi. **Uttantoti** avatapanto. Avatapantoti ca atthato kilamantoyevāti āha “kilamanto” ti. Kilamanto hutvāti yojanā. Assāsagahaṇena passāsopi gahettabboti āha “assāsapassāsasañcāro” ti. **Tampīti** bhikkhunimpīti. Dutiyaṃ.

3. Hasadhammasikkhāpadaṃ

335. Tatiye pakārena karīyati ṭhapīyatīti **pakataṃ** paññattanti dassento āha “yaṃ bhagavatā” tiādi. **Yanti** sikkhāpadaṃ.

336. Hasasaṅkhāto dhammo sabhāvo **hasadhammoti** vutte atthato kīḷikāyevāti āha “kīḷikā vuccatī” ti.

337. Goppakānanti caraṇagaṇṭhikānaṃ. Te hi pāde pādaṃ ṭhapanakāle aññamaññūpari ṭhapanato gopīyantīti goppā, te eva goppakāti vuccanti. Pādassa hi upari pādaṃ ṭhapanakāle ekassa upari eko na ṭhapetabbo. Tenāha bhagavā “pāde pādaṃ accādhāyā” ti (dī. ni. 2.196; ma. ni. 1.423; a. ni. 3.16). Oṭṭhajo dutiyo. **Orohantassa** bhikkhunoti sambandho.

338. Phiyārittādīhīti ādisaddena laṅkāradayo saṅgaṇhāti. Keci vadantīti sambandho. **Patanuppattanavāresūti** patanavāra uppattanavāresu. **Tatthāti** tassaṃ khittakathalāyaṃ. **Hīti** saccam, yasmā vā. Ṭhabetvā kīḷantassāti sambandho. **Likhituṃ vaṭṭati** kīḷādhippāyassa virahitattāti adhippāyo. Kīḷādhippāyena atthajotakam akkharam likhantassāpi āpattiyevāti vadanti. **Etthāti** imasmim sikkhāpadeti. Tatiyaṃ.

4. Anādariyasikkhāpadaṃ

342. Catutthe **dhammo** nāma tantiyevāti āha “tantī” ti. **Paveṇīti** tasseva vevacanaṃ. “Taṃ vā na sikkhitukāmo” ti ettha taṃsaddassa atthamāvikātuṃ vuttaṃ “yena paññattenā” ti. Vinaye apaññattaṃ sandhāya vuttaṃ “apaññattenā” ti āha “sutte vā abhidhamme vā āgatenā” ti.

344. Paveṇiyāti upāliādikāya ācariyaparamparaṅkhātāya tantiyā. Kurundiyaṃ vuttanti sambandho. Mahāpaccariyaṃ vuttanti sambandho. **Taṃ sabbanti** kurundivādamahāpaccarivādasāṅkhātaṃ sabbam taṃ vacanaṃ. **Paveṇiyā āgateti** paveṇiyā āgatasāṅkhāte mahāaṭṭhakathāvādeti. Catutthaṃ.

345. Pañcame **manussaviggaheti** manussaviggahapārājiketi. Pañcamaṃ.

6. Jotisikkhāpadaṃ

350. Chaṭṭhe janapadassa nāmattā bahuvacana vasena “bhaggesū” ti pāḷiyaṃ vuttaṃ. Susumārasaṅghāno pabbatasāṅkhāto giri etthāti **susumāragiri**, etassa vā māpitakāle susumāro girati saddaṃ niggirati etthāti **susumāragirīti** atthamanapekkhitvā vuttaṃ “nagarassa nāma” nti. **Taṃ panāti** vanaṃ pana. “Migāna” ntiādinā migānaṃ abhayo dīyati etthāti **migadāyoti** atthaṃ dasseti.

352. “Jotike” tipadassa jotissa aggissa karaṇam **jotikanti** dassetuṃ vuttaṃ “jotikaraṇe” ti.

354. “Samādahitukāmatāyā”tipadaṃ “araṇisaṅṭhāpanato”tipade hetu. **Jālāti** sikhā. Sā hi jalati dibbatīti jālāti vuccati.

Patilātaṃ ukkhipatīti ettha “patilāta”nti vattabbe takāralopaṃ katvā sandhivasena patilātanti vuttanti āha “alātaṃ patitaṃ ukkhipatī”ti. **Alātanti** ummukkaṃ. Tañhi ādittaṃ hutvā atiuṇhattā na lātabbaṃ na gaṇhitabbanti alātanti vuccati. **Avijjhātanti** jhāyanato ḍayhanato avigataṃ alātanti sambandho. Jhāyanaṃ ḍayhanaṃ jhātaṃ, vigataṃ jhātaṃ imassālātassāti **vijjhātaṃ**.

356. **Padīpādīnīti** padīpajotikādīni. **Tatthāti** tāsu duṭṭhavālamigaamanussasāṅkhātāsu āpadaṃsu nimittabhūtāsu. Nimittatthe cetamaṃ bhummavacananti. Chaṭṭhaṃ.

7. Nahānasikkhāpadaṃ

366. Sattame pāraṃ gacchanto na kevalaṃ saudakāya nadiyā eva nhāyitumaṃ vaṭṭati, sukkhāya nadiyāpi vaṭṭatīti dassento āha “sukkhāyā”tiādi. **Ukkiritvāti** viyūhitvā. Āvāṭāyeva khuddakaṭṭhena **āvāṭakā**, tesūti. Sattamaṃ.

8. Dubbaṇṇakaraṇasikkhāpadaṃ

368. Aṭṭhame alabhīti **labhoti** vacanatthe apaccayaṃ katvā ṇapaccayassa svatthabhāvaṃ dassetuṃ vuttaṃ “labhoyeva lābho”ti. Apaccayamakavā pakatiyā ṇapaccayopi yuttoyevāti daṭṭhabbaṃ. Saddantaropi atthantarābhāvā samāso hotīti āha “navacīvaralābhenāti vattabbe”ti. **Anunāsikalopanti** “nava”nti ettha niggahītassa vināsaṃ. Niggahītañhi nāsaṃ anugataṭṭā “**anunāsika**”nti vuccati, tassa adassana, makavāti attho. **Majjhe ṭhitapadadvayeti** “nava”nti ca “cīvaralābhenā”ti ca dvinnaṃ padānamantare “ṭhite panā”ti ca “bhikkhunā”ti ca padadvaye. Niddhāraṇe cetamaṃ bhummavacanaṃ. **Nipātoti** nipātamattaṃ. Alabhīti **labhoti** vacanatthassa abhidheyatthamaṃ dassetuṃ “bhikkhunā”ti vuttanti āha “bhikkhunā”tiādi. Padabhājane pana vuttanti sambandho. **Yanti** yaṃ cīvaraṃ. “Cīvara”nti ettha cīvarasarūpaṃ dassento āha “yaṃ nivāsetumaṃ vā”tiādi. **Cammakāranīlanti** cammakāraṇaṃ tīphale pakkhittassa ayagūthassa nīlaṃ. Mahāpaccariyaṃ vuttanti sambandho. Dubbaṇṇo karīyati anenāti **dubbaṇṇakaraṇaṃ**, kappabinduntī āha “kappabindumaṃ sandhāyā”ti. Ādiyantena bhikkhunā ādātābanti sambandho. **Koṇesūti** antesu. Vāsaddo aniyamavikappattho. **Akkhimaṇḍalamattaṃ vāti** akkhimaṇḍalassa pamāṇaṃ vā kappabindūtī sambandho. **Paṭṭe vāti** anuvātapatṭe vā. **Gaṇṭhiyaṃ vāti** gaṇṭhikapatṭe vā. **Pālikappoti** dve vā tisso vā tato adhikā vā binduāvalī katvā kato kappo. **Kaṇṇikappoti** kaṇṇikaṃ viya bindugocchakaṃ katvā kato kappo. Ādisaddena agghiyakappādayo saṅgaṇhāti. **Sabbatthāti** sabbāsu aṭṭhakathāsu. Ekopi bindu vaṭṭoyeva vaṭṭatīti āha “**ekamaṃ vaṭṭabindu**”nti.

371. **Aggaḷādīnīti** ādisaddena anuvātaparibhaṇḍe saṅgaṇhātīti. Aṭṭhamaṃ.

9. Vikappanasikkhāpadaṃ

374. Navame **tassāti** ettha tasaddassa visayo cīvarasāmikoyevāti āha “cīvarasāmikassā”ti. Dutiyassa tasaddassa visayo vinayadharoyevāti āha “yenā”tiādi. “Avissāsanto”tipadassa kiriyāvisesanabhāvaṃ dassetuṃ vuttaṃ “avissāsenā”ti. **Tenāti** vinayadharenāti. Navamaṃ.

10. Cīvarāpanidhānasikkhāpadaṃ

377. Dasame “apanetvā”tiiminā apaityūpasaggassa atthamaṃ dasseti. **Nidhentīti** nigūhitvā ṭhapenti. **Hasādhippāyoti** hasamaṃ, hasanattāyā vā adhippāyo. Parikkhāraṇassa sarūpaṃ dassetuṃ vuttaṃ “pattatthavikādi”nti. Pattassa pāliyamāgatattā pattassa thavikāti atthoyeva gahetabbo, na patto ca

thavikā cāti. “Samaṇena nāmā”tipadaṃ “bhavitu”ntipade bhāvakattāti. Dasamaṃ.

Surāpānavaggo chaṭṭho.

7. Sappāṇakavaggo

1. Sañciccaṇasikkhāpada-atthayojanā

382. Sappāṇakavaggassa paṭhame usum̐ asati khipati anenāti **issāsoti** kate dhanuyeva mukhyato issāso nāma, dhanuggahā- cariyō pana upacārena. Usum̐ asati khipatīti **issāsoti** kate dhanuggahācariyō issāso nāma, idha pana upacārattho vā kattuttho vā gahetabboti āha “dhanuggahācariyō hotī”ti. Pabbajitakāle issāsassa ayuttattā vuttam̐ “gihikāle”ti. **Voropitāti** ettha vi ava pubbassa ruhadhātussa adhippāyattham̐ dassetum̐ vuttam̐ “vīyojitā”ti.

Yasmā gacchatīti sambandho. **Etanti** “jīvitā voropitā”tivacanaṃ. Kasmā vohāramattameva hoti, nanu yato kutoci yasmiṃ kismiṃci vīyojite dve vatthūni viya visum̐ tiṭṭhanti pānato jīvite vīyojite pāṇajīvitāpīti āha “na hetthā”tiādi. **Hīti** saccaṃ. Etthāti “jīvitā voropitā”tivacane dassetunti sambandho. Kiñci jīvitam̐ nāmāti yojanā. Ayaṃ panettha atthasambandho – sīsālanakāre sīsato vīyojite sīsam̐ alaṅkāro visum̐ tiṭṭhati yathā, evam̐ jīvite pānato vīyojite jīvitam̐ pānato visum̐ na tiṭṭhati nāmāti. **Aññadatthūti** ekaṃsena. “Pāṇa”nti sāmāññato vuttopi manussapāṇassa pārājikaṭṭhāne gahitattā idha pārisesaññāyena tiracchānapāṇova gahetabboti āha “tiracchānagato yeva pāṇo”ti. **Tanti** pāṇam̐. Mahante pana pāṇeti sambandho.

385. Sodhento apanetīti yojanā. **Maṅguloti** manussarattapo eko kimiviseso. So hi rattapivanatthāya maṅgati ito cito ca imaṃ cimañca ṭhānaṃ gacchatīti “maṅgulo”ti vuccati. Padakkharānañhi aviparitattham̐, sotūnañca sajjhāyopadesalabhanattham̐ katthaci ṭhāne vacanattho vuttoti daṭṭhabbam̐. Tassa bījameva khuddakaṭṭhena **maṅgulabjakaṃ**, tasmīṃ. **Tanti** maṅgulabjakaṃ. Bhindanto hutvāti yojanāti. Paṭhamam̐.

2. Sappāṇakasikkhāpadaṃ

387. Dutiye saha pāṇehīti **sappāṇakaṃ** udakanti dassento āha “ye pāṇakā”tiādi. **Hīti** saccaṃ. Pattapūrampī udakanti sambandho. **Tādisenāti** sappāṇakena. Dhovatopi pācittiyanti yojanā. **Udakasonḍinti** silāmayam̐ udakasonḍim̐. **Pokkharāṇinti** silāmayam̐ pokkharāṇim̐. Uṭṭhāpayatopi pācittiyanti sambandho. **Tatoti** sonḍipokkharāṇihi. **Udakassāti** udakena, pūre ghaṭe āsiñcitvāti sambandho. **Tatthāti** udake. **Udaketī** udakasaṅṭhānakapadesa āsiñcitaudake. **Patissatīti** sonḍipokkharāṇihi gahitaudakaṃ patissatīti. Dutiyaṃ.

3. Ukkoṭanasikkhāpadaṃ

392. Tatiye “uccālentī”tiiminā ukkoṭentīti ettha upubbassa kuṭadhātussa uccālanattham̐ dasseti dhātūna, manekatthattā. Yaṃ yaṃ patiṭṭhitam̐ **yathāpatiṭṭhitam̐**, tassa bhāvo **yathāpatiṭṭhitabhāvo**, tena.

393. **Yo dhammoti** yo samathadhammo. **Dhammenāti** ettha enasaddena “yathādhamma”nti ettha aṃitīkāriyassa kāriṃ dasseti. Iminā “yathādhamma”nti padassa “nihatādhikaraṇa”nti ettha nihatasaddena sambandhitabbabhāvaṃ dasseti. “Satthārā”tipadaṃ “vuttam̐” itipade kattā. Natthi hataṃ hananam̐ imassāti **nihatanti** vutte atthato vūpasanamevāti āha “vūpasamita”nti.

395. Yaṃ vā tam̐ vā kammaṃ dhammakammaṃ nāma na hoti, atha kho

adhikaraṇavūpasamakammameva dhammakammaṃ nāmāti dassento āha ‘yena kammenā’ tiādi. **Ayampīti** ayampi bhikkhu. **Sesapadānipīti** ‘dhammakamme vematiko’ tiādīni sesapadānipi. **Etthāti** imasmim sikkhāpade. Vitthāro pana vuttoti sambandho. **Tatthevāti** parivāre eva. **Idhāti** imasmim sikkhāpade, vibhaṅge vāti. Tatiyaṃ.

4. Duṭṭhullasikkhāpadam

399. Catutthe **atthuddhāravasena dassitāni** duṭṭhullasaddatthabhāvena sadisattāti adhippāyo. ‘**Dhura**’ nti ettha lakkhaṇavantattā bhummatthe upayogavacananti āha ‘dhure’ ti. Dhure nikkhittamatte satīti yojanā.

Evam dhuraṃ nikkhipitvāti ‘aññassa nārocessāmī’ ti evaṃ dhuraṃ nikkhipitvā. **Aññassāti** vatthu, puggalato aññassa dutiyassa. **Sopīti** dutiyopi. **Aññassāti** tatiyassa. Yāva koṭi na chijjati, tāva āpajjatiyevāti yojanā. **Tassevāti** āpattim āpannapuggalassa. **Vatthupuggaloyevāti** āpattim āpannapuggaloyeva. **Ayanti** paṭhamabhikkhu. **Aññassāti** dutiyassa. **Soti** dutiyo āroceṭīti sambandho. **Yenāti** paṭhamabhikkhunā. **Assāti** dutiyassa. **Tassevāti** paṭhamabhikkhusseva. Vatthupuggalaṃ upanidhāya ‘tatiyena puggalena dutiyassā’ ti vuttam.

400. **Pañcāpattikkhandheti** thullaccayādike pañca āpattikkhandhe. **Ajjhācāro nāmāti** adhibhavivā vītikkamitvā ācaritabbattā ajjhācāro nāmāti. Catuttham.

5. Ūnavīsativassasikkhāpadam

402. Pañcame **aṅgulyoti** karasākhāyo. Tā hi aṅganti hatthato pañcadhā bhijjivā uggacchantīti aṅgulyoti vuccanti. Likhantassa upālissāti sambandho. **Tenāti** bahucintetabbakāraṇena. **Assāti** upālissa. **Uroti** hadayaṃ. Tañhi usati cittatāpo dahati etthāti uroti vuccati. **Rūpasuttanti** heraññikānaṃ rūpasuttam, yathā hatthācariyānaṃ hatthisuttanti. **Akkhīnīti** cakkhūni. Tāni hi akkhanti visayesu byāpībhavanti, rūpaṃ vā passati imehīti akkhīnīti vuccanti. Makasena sūcimukhānaṃ gahitattā ḍaṃsena piṅgalamakkhikāyova gahetabbāti āha ‘**ḍaṃsāti piṅgalamakkhikāyo**’ ti. Piṅgalamakkhikāyo hi ḍaṃsanatṭhena khādanatṭhena **ḍaṃsāti** vuccanti. Dukkaro khamo etāsanti **dukkhāti** dassento āha ‘dukkhamāna’ nti. Vedanānanti sambandho. Asātassa kāraṇaṃ dassetuṃ vuttam ‘amadhurāna’ nti. Iminā amadhurattā na sādītabbāti **asātāti** attham dasseti. Pāṇasaddajīvitāsaddānaṃ pariyāyabhāvaṃ dassetuṃ vuttam ‘jīvitaharāna’ nti. Pāṇaṃ haranti apanentīti **pāṇaharā**, tāsam vedanānanti sambandho.

404. Vijāyanakālato paṭṭhāya paripuṇṇavīsativasso na gahetabbo, gabbhagahaṇakālato pana paṭṭhāyāti dassento āha ‘paṭisandhiggahaṇato paṭṭhāyā’ ti. Gabbhe sayitakālana saddhim vīsatiṃ vassaṃ paripuṇṇamassāti **gabbhavīso** puggalo. **Hīti** saccaṃ. **Yathāhāti** yenākārena saṅkhyam gacchati, tenākārena bhagavā āhāti yojanā. Atha vā yathā kiṃ vacanaṃ bhagavā āhāti yojanā.

Gabbhavīso hutvā upasampannoti sambandho. **Amhīti** asmi. Nusaddo parivitakkatthe nipāto. **Yanti** yādisam paṭhamaṃ cittanti sambandho. Iminā paṭisandhicittam dasseti. ‘Paṭhamaṃ viññāna’ nti tasseva vevacanaṃ. **Tanti** paṭhamaṃ cittam paṭhamaṃ viññānaṃ. **Assāti** sattassa. **Sāva jāṭīti** sā eva paṭisandhi, gabbho nāma hotīti sambandho.

Tatthāti pāḷiyam, vinicchayo evaṃ veditabboti yojanā. **Yoti** puggalo. **Mahāpavāraṇāyāti** assayujapuṇṇamiyaṃ. Sā hi pūjītapavāraṇattā mahāpavāraṇāti vuccati. **Tatoti** pavāraṇāya jātakālato. **Tanti** mahāpavāraṇaṃ. **Pāṭipade cāti** ettha casaddo aniyamavikappattho, pavāraṇadivasapāṭipadadivasesu aññatarasmim divase upasampādetabboti attho. **Hāyanavaḍḍhananti** kucchimhi vasitamāsesu adhikesu hāyanañca ūnesu vaḍḍhunañca veditabbaṃ.

Porāṇakattherā pana upasampādentīti sambandho. **Ekūnavīsativassanti** anantare vuttaṃ ekūnavīsativassaṃ. **Nikkhamanīyoti** sāvaṇamāso. So hi antovīthito bāhiravīthiṃ nikkhamati sūriyo asminti “nikkhamanīyo”ti vuccati. **Pāṭipadadivaseti** pacchimikāya vassūpagamanadivase. **Taṃ** upasampādanaṃ. **Kasmāti** pucchā. Ettha ṭhatvā parihāro **vuccate** mayāti yojanā. **Vīsatiyā vassesūti** upasampannapuggalassa vīsatiyā vassesu. Tiṃsarattidivassa ekamāsattā “cattāro māsā parihāyantī”ti vuttaṃ. **Ukkaḍḍhantīti** ekassa adhikamāsassa nāsanatthāya vassaṃ upari kaḍḍhanti. **Tatoti** chamāsato apanetvāti sambandho. **Etthāti** “ekūnavīsativassa”ntiādivacane. **Pana**-saddo hisaddattho, saccanti attho. **Yoti** puggalo. **Tasmāti** yasmā gabbhamāsānampi gaṇanūpagattā gahetvā upasampādentī, tasmā cha māse vasitvāti sambandho. Aṭṭha māse vasitvā jātopi na jīvatīti **suttantaatṭhakathāsu** (dī. ni. aṭṭha. 2.24-25; ma. ni. aṭṭha. 3.205) vuttaṃ.

406. Dasavassaccayenāti upasampadato dasavassātikkamena. **Upasampādetīti** upajjhāyo vā kammavācācariyo vā hutvā upasampādeti. **Tanti** upajjhācariyabhūtaṃ anupasampannapuggalaṃ. Kammavācācariyo hutvā upasampādentō taṃ muñcitvā sace aññoopi kammavācācariyo atthi, sūpasampanno. Sova sace kammavācaṃ sāveti, nupasampanno. Nātvā pana puna anupasampādentē saggantarāyopi maggantarāyopi hotiyevāti daṭṭhabbanti. Pañcamāṃ.

6. Theyyasatthasikkhāpadaṃ

407. Chaṭṭhe “paṭiyāloka”nti ettha ālokasaddena sūriyo vutto upacārena. Sūriyo hi puratthimadisato uggantvā pacchimadisāṃ gato, tasmā sūriyasaṅkhātassa ālokassa paṭimukhaṃ “paṭiyāloka”nti vutte pacchimadisāyeva gahetabbāti āha “pacchimaṃ disanti attho”ti. **Kammikāti** kamme yuttā payuttā.

409. Rājānanti ettha rañño santakaṃ “rājā”ti vuccati upacārena, atha vā rañño eso “rājā”ti katvā rañño santakaṃ “rājā”ti vuccati. **Theyyanti** thenetvā “sakkacca”ntiādīsu (pāci. 606) viya niggaḥītāgamo hoti. Rājānaṃ, rañño santakaṃ vā theyyaṃ thenetvā gacchantīti attho. Iti imamattaṃ dassento āha “rājānaṃ vā thenetvā”tiādi.

411. Catūsu visaṅketesu dvīhi anāpatti, dvīhi āpattiyevāti. Chaṭṭhaṃ.

7. Saṃvidhānasikkhāpadaṃ

412. Sattame “padhūpento”ti ettha papubba dhūpadhātu paribhāsanatthe vattatīti āha “paribhāsanto”ti. Tvaṃ samaṇopi mātuḡāmena saddhiṃ gacchasi, tuyheveso doso, netassa purisassāti attānaṃyeva paribhāsantoti attho. “Nikkhāmesi”tiiminā “nippātesī”tiettha nipubba patadhātu gatyatthoti dassetīti. Sattamaṃ.

8. Ariṭṭhasikkhāpadaṃ

417. Aṭṭhame **gandheti** gijjhe. Te hi gidhanti kuṇapaṃ abhikaṅkhaṇtīti “gandhā”ti vuccanti. **Gaddheti** pāṭho, sopi yujjati yathā “yuganandho, yuganaddho”ti ca “paṭibandho paṭibaddho”ti ca. **Bādhayimsūti** haniṃsu. **Assāti** ariṭṭhassa.

Taddhitena vuttassa atthassa dassetumāha “te”tiādi. **Teti** antarāyikā. **Tatthāti** pañcavidhesu antarāyikesu. “Tathā”tipadena “kammantarāyikaṃ nāmā”ti padaṃ atidisati. **Taṃ panāti** bhikkhunidūsakakammaṃ pana. **Mokkhassevāti** magganibbānasseva. Maggo hi kilesehi mucatīti atthena **mokkho** nāma. Jhānampettha saṅgahitaṃ nīvaraṇehi vimuccanattā. Nibbānaṃ vimuccīti atthena **mokkho** nāma. Phalampettha saṅgahitaṃ vimuccitattā. **Niyatamicchādiṭṭhidhammāti** niyatabhāvaṃ pattā, niyatavasena vā pavattā micchādiṭṭhisāṅkhātā dhammā. Te pana natthikaahetuka akiriyaavasena

tividhā. Paṇḍakādigaḥaṇassa nidassanamattattā ‘paṭisandhidhammā’ tipadena ahetukadvihetukapaṭisandhidhammā gahetabbā sabbesampi vipākantarāyikabhāvato. Tepi mokkhasseva antarāyaṃ karontī, na saggassa. **Te panāti** ariyūpavādā pana. Tāvadeva upavādanantarāyikā nāmāti yojanā. **Tāpīti** sañcicca āpannā āpattiyopi. Pārājikāpattim sandhāya vuttam ‘bhikkhubhāvaṃ vā paṭijānāti’ ti. Saṅghādisesāpattim sandhāya vuttam ‘na vuṭṭhāti vā’ ti. Lahukāpattim sandhāya vuttam ‘na deseti vā’ ti.

Tatrāti pañcavidhesu antarāyikesu. **Ayaṃ bhikkhūti** ariṭṭho gandhabādhipubbo bhikkhu. **Sesantarāyiketi** ānāvītikkamantarāyikato sese catubbidhe antarāyike. **Ime āgārikāti** agāre vasanasīlā ime manussā. Bhikkhūpi passanti phusanti paribhuñjantīti sambandho. Kasmā na vaṭṭanti, vaṭṭantiyevāti adhippāyo. **Rasena rasam saṃsanditvāti** upādiṇṇakarāsena anupādiṇṇakarasaṃ, anupādiṇṇakarāsena vā upādiṇṇakarasaṃ samānetvā. Yoniso paccavekkhaṇassa abhāvato saṃvijjati chandarāgo etthāti **sacchandarāgo**, soyeva paribhogo **sacchandarāgaparibhogo**, taṃ. **Ekam katvāti** samānaṃ katvā. Ghaṭento viya pāpakaṃ diṭṭhigataṃ uppādetvāti yojanā. **Kimsaddo** garahattho, kasmā bhagavatā paṭhamapārājikaṃ paññattaṃ, na paññāpetabbanti attho. Mahāsamuddaṃ bandhanto yathā akattabbaṃ karoti, tathā paṭhamapārājikaṃ paññāpeto bhagavā apaññattaṃ paññāpetīti adhippāyo. **Etthāti** paṭhamapārājike. **Āsanti** bhabbāsaṃ. **Āṇacakketi** āṇāsankhāte cakke.

Aṭṭhiyeva **aṭṭhikam** kucchitatthena, kucchitatthe hi ko. Aṭṭhikameva khalo nīcaṭṭhena lāmakatṭhenaṭi **aṭṭhikaṅkhalo** niggahītāgamam katvā. Tena upamā sadisāti **aṭṭhikaṅkhalūpamā**. ‘Aṭṭhī’ ti ca ‘kaṅkhala’ nti ca padaṃ gahetvā vaṇṇenti ācariyā (sārattha. ṭī. pācittiya 3.417; vi. vi. ṭī. pācittiya 2.417; ma. ni. aṭṭha. 2.42; ma. ni. ṭī. 3.42). **Āṅgārakāsūpamāti** āṅgārāsisadisā, āṅgārehi vā paripuṇṇā āvāṭasadisā. **Asisūnūpamāti** ettha **asīti** khaggo. So hi asate khipate anenāti ‘asī’ ti vuccati. **Sūnāti** adhikoṭṭanaṃ. Tañhi sunati sañcuṇṇabhāvaṃ gacchati etthāti ‘sūnā’ ti vuccati. Asinā sūnāti **asisūnā**, tāya upamā sadisāti **asisūnūpamā**. **Sattisūlūpamāti** sattiya ca sūlena ca sadisā. **Etthāti** imissaṃ aṭṭhakathāyaṃ. **Majjhimaṭṭhakathāyaṃ** alagaddūpamasutte (ma. ni. aṭṭha. 1.234 ādayo) gahetabbo. Evaṃsaddakhosaddānamantare viyasaddassa byādesabhāvaṃ dassetuṃ vuttam ‘evaṃ viya kho’ ti. Aṭṭhamam.

9. Ukkhittasambhogasikkhāpadaṃ

424. Navame anudhammassa sarūpaṃ dassetuṃ vuttam ‘anulomavattaṃ disvā katā osāraṇā’ ti. Iminā anulomavattaṃ disvā kato osāraṇāsankhāto dhammo **anudhammoti** dasseti. **Osāraṇāti** pavesanā. **Tenevāti** ukkhittakassa akaṭānudhammā eva. **Assāti** ‘akaṭānudhammenā’ ti padassa.

Dadato vā gaṇhato vāti vāsaddo aniyamavikappatthoti. Navamaṃ.

10. Kaṇṭakasikkhāpadaṃ

428. Dasame ariṭṭhassa uppannaṃ viya etassāpi uppannanti yojanā. **Ummajjantassāti** manasikarontassa. Saṃvāsassa nāsanā **saṃvāsānāsanā**. Liṅgassa nāsanā **liṅganāsanā**. Daṇḍakamma nāsanā **daṇḍakammaṇāsanā**. **Tatthāti** tividhāsu nāsanāsu. **Dūsako...pe... nāsethāti** ettha ayaṃ nāsanā liṅganāsanā nāmāti yojanā. **Ayanti** daṇḍakammaṇāsanā. **Idhāti** imasmiṃ sikkhāpade, ‘nāsetū’ ti pade vā. **Tatthāti** purimavacanāpekkhaṃ, ‘evaṅca pana bhikkhave’ ti ādivacaneti attho. **Pireti** āmantanapadaṃ parasaddena samānatthanti āha ‘parā’ ti. ‘Amhākaṃ anajjhātikabhūta’ iti vā ‘amhākaṃ paccanīkabhūta’ iti vā attho daṭṭhabbo. ‘Amāmaka’ itipadena ‘para’ itipadassa adhippāyatthaṃ dasseti. Amhe namamāyaka, amhehi vā namamāyitabba iti attho. ‘Amhāmaka’ itipi hakārayutto pāṭho. Amhehi āmakaiti attho. **Yatthāti** yasmiṃ ṭhāne. **Teti** upayogathe sāmivacanaṃ, tanti attho. Tava rūpasadde vāti sambandho. **Na passāmāti** na passāma, na suṇāma.

429. **Tenāti** sāmaṇerena. ‘Kārāpeyyā’ ti pade kāritakammanti. Dasamaṃ.

Sappāṇakavaggo sattamo.

8. Sahadhammikavaggo

1. Sahadhammikasikkhāpada-atthayojanā

434. Sahadhammikavaggaṃ paṭhame yaṃti yaṃ paññattaṃ. “Sikkhamānenā”ti ettha mānapaccayassa anāgatatthabhāvaṃ dassetuṃ vuttaṃ “sikkhitukāmenā”ti. “Sikkhamānenā”tipadaṃ “bhikkhunā”tipade eva na kevalaṃ kārakavisesanaṃ hoti, atha kho “aññātabba”ntiādipadesupi kiriyāvisesanaṃ hotīti dassento āha “hutvā”ti. **Padatthatoti** padato ca atthato ca, padānaṃ atthato vāti. Paṭhamaṃ.

2. Vilekhanasikkhāpadaṃ

438. Dutiye vinaye paṭisaṃyuttā kathā **vinayakathā**ti dassento āha “vinayakathā nāmā”tiādi. **Tanti** vinayakathaṃ. Padabhājanena vaṇṇanā vinayassa vaṇṇo nāmāti yojanā. **Tanti** vinayassa vaṇṇaṃ. Pariyāpuṇaṃ **pariyatti**, vinayassa pariyatti **vinayapariyatti**, vinayapariyattisaṅkhātaṃ mūlamassa vaṇṇassāti **vinayapariyattimūlako**, taṃ. Vinayadharo labhatīti sambandho. **Hīti** vitthāro. Te sabbe bhagavā bhāsati sambandho. **Hīti** saccaṃ.

Assāti vinayadharassa. **Idhāti** imasmiṃ sāsane. **Alajjitāti**tiādīsu karaṇatthe paccattavacanaṃ. Alajjitāyāti hi attho. Tena vuttaṃ “kathaṃ alajjitāyā”tiādi. **Cāti** saccaṃ. “Sañciccā”ti padaṃ tīsu vākyesu yojettabbaṃ. Sañcicca āpattiṃ āpajjati, sañcicca āpattiṃ parigūhati, sañcicca agatigamaṇaṇa gacchatīti attho. **Mandoti** bālo. **Momūhoti** atisammūlho. **Virādhetīti** virajjhāpeti. **Kukkucce uppanneti** “kappati nu kho, no”ti vinayakukkucce uppanne. **Ayaṃ panāti** ayaṃ puggalo pana vītikkamatiyevāti sambandho. Acchamaṃsena sūkaramaṃsassa vaṇṇasaṅghānena sadisattā, dīpimaṃsena ca migamaṃsassa sadisattā vuttaṃ “acchamaṃsaṃ sūkaramaṃsa”ntiādi.

Āpattiṃca satisammosāyāti ettha casaddo avuttavākyasampiṇḍanatto, kattaḃbaṇca na hi karotīti attho. **Evantiādi** nigamaṇaṃ.

Evaṃ avinayadharassa dosaṃ dassetvā vinayadharassa guṇaṃ dassento āha “vinayadharo panā”tiādi. **Soti** vinayadharo. **Hīti** vitthāro. **Parūpavādanti** paresaṃ upavādaṃ. **Suddhanteti** suddhassa koṭṭhāse. **Tatoti** patiṭṭhānato paranti sambandho. **Assāti** vinayadharassa. **Evantiādi** nigamaṇaṃ. **Assāti** vinayadharassa. **Kukkucapakatānanti** kukkucena abhibhūtānaṃ. **Soti** vinayadharo. **Tehīti** kukkucapakatehi. Saṅghamaṃjhe kathentassa avinayadharassāti yojanā. **Tanti** bhayaṃ sārājjaṃ.

Paṭipakkhaṃ, paṭiviruddhaṃ vā atthayanti icchantīti **paccatthikā**, ṇyasaddo bahulaṃ kattābhidhāyako, attano paccatthikā **attapaccatthikā**. **Tatthāti** duvidhesu paccatthikesu. **Imeti** mettiyabhummajakavaḍḍhalicchavino. Aññepi ye vā pana bhikkhūti sambandho. Ariṭṭhabhikkhu ca kaṇṭakasāmaṇero ca vesālikavajjiputtakā ca **ariṭṭha...pe... vajjiputtakā**. Te ca sāsanaṃpaccatthikā nāmāti sambandho. Parūpahāro ca aññāṇo ca kaṅkhāparavitarāṇo ca **parū...pe... vitarāṇā**. Te ādayo yesaṃ vādānanti **parū...pe... vitarāṇādayo**. Te eva vādā etesanti **parū...pe... vitarāṇādivādā**. Te ca sāsanaṃpaccatthikā nāmāti sambandho. Abuddhasāsanaṃ buddhasāsanaṃti vatvā katapaggahā mahāsaṅghikādayo ca sāsanaṃpaccatthikā nāmāti yojanā. **Kaṅkhāparavitarāṇādīti** ettha ādisaddena kathāvattupakaraṇe āgatā vādā saṅgayhanti. **Mahāsaṅghikādayoti** ettha ādisaddena dīpavaṃse āgatā gaṇā saṅgayhanti. Ādimhi “viparītadassanā”ti padaṃ sabbapadehi yojettabbaṃ. “Sahadhammenā”ti padassatthaṃ dassetuṃ vuttaṃ “saha kāraṇenā”ti. **Yathāti** yenākārena niggayhamāneti sambandho.

Tatthāti tividhesu saddhammesu. Mahāvattāni santi, ayaṃ sabboti yojanā. Cattāri phalāni cāti

liṅgavipallāsena yojetabbaṃ. Ettha cakārena abhiññāpaṭṭisambhidā saṅgahitā tāsampi adhigamasāsanabhāvato.

Tatthāti tividhesu saddhammesu. **Keci therāti** dhammakathikā keci therā. “Yo kho”ti kaṅṭhajadutiyaakkharena paṭṭitabbo. Potthakesu pana “yo vo”ti vakārena pāṭho atthi, so ayutto. Kasmā? “So vo”ti parato vuttattā, ekasmiṃ vākye dvinnāṃ samānasutisaddānaṃ ayuttattā ca. **Keci therāti** paṃsukūlikā keci therā āhaṃsūti sambandho. **Itare pana therāti** dhammakathikatherehi ca paṃsukūlikatherehi ca aññe therā. **Teti** pañca bhikkhū karissantīti sambandho. Jambudīpassa paccante tiṭṭhatīti **paccantimo**, tasmīṃ. Jambudīpassa majjhe vemajjhe tiṭṭhatīti **majjhimo**. Atha vā majjhānaṃ suddhānaṃ buddhādānaṃ nivāso **majjhimo**, tasmīṃ. Vīsati vaggā imassāti **vīsativaggo**, soyeva gaṇo **vīsativaggagaṇo**, taṃ. **Evantiādi** nigamaṇaṃ.

Tassādheyyoti tassāyatto, tassa santakoti vuttaṃ hoti. Pavāraṇā ādheyyā, saṅghakammaṃ ādheyyaṃ, pabbajjā ādheyyā, upasampadā ādheyyāti yojanā.

Yepi ime nava uposathāti sambandho. Yāpi ca imā nava pavāraṇāyoti yojanā. **Tassāti** vinayadharassa. **Tāsanti** navapavāraṇānaṃ.

Yānipi imāni cattāri saṅghakammānīti yojetabbaṃ. Ettha ca tāni vinayadharāyattānevāti pāṭhaseso ahjāharitabbo.

Yāpi ca ayaṃ pabbajjā ca upasampadā ca kātabbāti yojanā. **Hīti** saccaṃ. **Aññoti** vinayadharato paro. **So evāti** vinayadharo eva. “Upajjha”nti dhātukammaṃ, “sāmaṇerenā”ti kārītakammaṃ upanetabbaṃ. **Ettha cāti** uposathādīsu ca. Nissayadānañca sāmaṇerūpaṭṭhānañca viṣuṃ katvā dvādasānisamse labhatīti sakkā vattaṃ.

Viṣuṃ viṣuṃ katvāti “pañcāti ca...pe... ekādasā”ti ca koṭṭhāsaṃ koṭṭhāsaṃ katvā, satta koṭṭhāse katvā bhāsātīti adhippāyo. **Thometīti** sammukhā thometi. **Pasaṃsatīti** parammukhā pasaṃsati. “Uggahetabba”ntipadassatthaṃ dassetuṃ vuttaṃ “pariyāpuṇitabba”nti. Addhani dīghe sādhuṭi **addhaniyaṃ** addhakkhamaṃ addhayogyanti attho sādhuatthe niyapaccayo (moggallāne 4.33.73).

Therā ca navā ca majjhimā ca bahū te bhikkhū pariyāpuṇantīti yojanā.

439. “Uddissamāne”ti padassa kammarūpattaṃ dassetuṃ vuttaṃ “uddisiyamāne”ti. **So panāti** pātimokkho pana. Yasmā uddissamāno nāma hoti, tasmāti yojanā. **Uddisante vāti** uddisiyamāne vā. **Uddisāpente vāti** uddisāpiyamāne vā. Antasaddo hi mānasaddakāriyo. **Yoti** bhikkhu. **Nanti** taṃ pātimokkhaṃ. Casaddo khuddānukhuddakapadassa dvannavākyam dasseti, pubbapade kakāralopo daṭṭhabbo. **Tesanti** khuddānukhuddakānaṃ. **Hīti** saccaṃ. **Etānīti** khuddānukhuddakāni. **Yeti** bhikkhū. “Yāva uppajjatiyeva, tāva saṃvattanti iti vuttaṃ hotīti yojanā imassa nayassa pāṭhasesehi yojetabbattā. Garukabhāvaṃ sallakkhento lahukabhāvaṃ dassento āha “atha vā”tiādi. **Ativiyāti** ati i eva. Ikāro hi sandhivasena adassanaṃ gato. Vīyasaddo evakāratthavācako “varamhākaṃ bhusāmivā”ti ettha (jā. 1.3.108) ivasaddo viya, atī hutvā evāti attho daṭṭhabbo. “**Upasampannassā**”ti ettha samīpe sāmivacananti (rupasiddhiyaṃ 316 sutte) āha “upasampannassa santike”ti. **Tassāti** upasampannassa. **Tasminti** vinaye. **Vivaṇṇetīti** na kevalaṃ tasseva vivaṇṇamattameva, atha kho nindatiyevāti āha “nindatī”ti. **Garahatīti** tasseva vevacanaṃ. Atha vā **nindatīti** upasampannassa sammukhā nindati. **Garahatīti** parammukhā garahatīti. Dutiyaṃ.

3. Mohanasikkhāpadaṃ

444. Tatiye anusaddo paṭipāṭīatthaṃ antokatvā vicchatthavācakoti āha “anupaṭipāṭiyā addhamāse

addhamāse”ti. **Soti** pātimokkho. Uposathe uposathe uddisitabbanti **anuposathikaṃ**. Etthāpi hi anusaddo vicchatthavācako. **Soti** pātimokkho. Uddisiyamāno nāma hotīti yojanā. “Tasmiṃ anācāre”ti padena “tatthā”ti padassatthaṃ dasseti. “Yaṃ āpatti”nti padena yaṃsaddassa visayaṃ dasseti. **Yathādhammoti** ettha dhammasaddena dhammo ca vinayo ca adhippetoti āha “dhammo ca vinayo cā”ti. **Yathāti** yenākārena. **Sādhusaddo** sundarattho, **kasaddo** padapūraṇoti āha “suṭṭhū”ti. **Aṭṭhinti** ca “katvā”ti ca dve padāni daṭṭhabbāni. “Aṭṭhikatvā”ti vā ekaṃ padaṃ. Tattha pubbanaye attho yassatthīti **aṭṭhi** tthakārassa tthakāraṃ katvā, taṃ aṭṭhiṃ. **Katvāti** tvāpaccayantauttarapadena samāso na hoti. **Aṭṭhikabhāvanti** ettha ikasaddena “aṭṭhi”ti ettha ipaccayaṃ dasseti. “Bhāva”ntipadena bhāvapaccayena vinā bhāvattassa ñāpetabbataṃ dasseti. Attho panevaṃ daṭṭhabbo – aṭṭhibhāvaṃ katvāti. Pacchimanaye attho yassatthīti **aṭṭhiko** purimanayeneva tthakārassa tthakāraṃ katvā. Atthayitabbo icchitabboti vā **aṭṭhiko**, aṭṭhikaiti nāmasaddato tvāpaccayo kātabbo. “Aṭṭhikatvā”ti idaṃ padaṃ kiriyāvisesanaṃ. Kiriyāvisesane vattamāne karadhātu vā bhūdhātu vā yojetabbāti dassabhūṃ vuttam “katvā hutvā”ti. Taṃ sabbaṃ dassento āha “aṭṭhikatvāti aṭṭhikabhāvaṃ katvā, aṭṭhiko hutvā”ti. Tatiyaṃ.

4. Pahārasikkhāpadaṃ

449. Catutthe kasmā chabbaggiyā sattarasavaggiyānaṃ pahāraṃ denti, nanu akāraṇena pahāraṃ dentīti āha “āvuso”tiādi. Iminā yathā vadanti, tathā akatattā pahāraṃ dentīti dasseti.

451. **Sacepūti** ettha pisaddena sace amarati, kā nāma kathā, pācittiyamevāti dasseti. **Pahārenāti** pahārahetunā. **Yathāti** yenākārena. **Ayanti** bhikkhu. **Na virocātīti** na sobhati.

452. “Anupasampannassā”ti ettha akārassa aññatthaṃ dassetuṃ vuttam “gahaṭṭhassa vā”tiādi. **Pabbajitassa vāti** paribbājakassa vā sāmaṇerassa vā.

453. “Kenacī”ti padassa atthaṃ dassetuṃ vuttam “manussena vā”tiādi. **Tatoti** viheṭhanato, iminā mokkhasa apādānaṃ dasseti, “attano”ti iminā sambandhaṃ dasseti. “Patthayamāno”ti iminā “adhippāyo”ti padassatthaṃ dasseti. **Muggarena vāti** catuhatthadaṇḍassa addhena daṇḍena vā. **Soti** corādikoti. Catutthaṃ.

5. Talasattikasikkhāpadaṃ

454. Pañcame **talanti** hatthatalaṃ. Tañhi talati yaṃkiñci gahitavatthu patitṭhāti etthāti “tala”nti vuccati. **Sattīti** kunto. So hi sakati vijjhituṃ samatthetīti “sattī”ti vuccati. Talameva sattisadisattā **talasattikaṃ**, sadisatthe ko, taṃ talasattikaṃ upacārena gahetvā “kāyampī”ti vuttam. Kāyato aññaṃ vatthumpi talasattikasañkhātena kāyena gahetvā uggirattā vuttam “kāyapaṭibaddhampī”ti. “**Pahārasamuccitā**”ti ettha saṃpubbo ca upubbo ca cisaddo paguṇanasañkhāte paricite vattatīti āha “pahāraparicitā”ti. Pahārena saṃ punappunaṃ uccitā paricitāti attho. Imamevatthaṃ sandhāya vuttam “pubbepi...pe... attho”ti. Aññaṃpi sajjhāyananayaṃ dassetuṃ vuttam “pahārasa ubbigā”ti. **Tassāti** tassa pāṭhassa. **Pahārassāti** pahārato. Nissakkatthe cetaṃ sāmivacanaṃ. “Bhītā”ti iminā “ubbigā”ti ettha upubba vijadhātussatthaṃ dasseti.

457-8. **Viraddhoti** paṇṇako hutvā. **Pubbeti** purimasikkhāpade. **Vuttesu vatthūsūti** “coraṃ vā paccatthikaṃ vā”tiādinā vuttasu vatthūsūti. Pañcamaṃ.

6. Amūlakasikkhāpadaṃ

459. Chaṭṭhe **teti** chabbaggiyā. Codenti kirāti sambandho. **Ākiṇṇadosattāti** tesam ākulaādīnavattā. **Evanti** codiyamāne. **Attaparittāṇanti** attano parisamantato tāṇaṃ rakkhanaṃ karontā codentīti yojanāti.

Chatṭhaṃ.

7. Sañcicasikkhāpadaṃ

464. Sattame upapubbadahadhātussa sakammikattā kāritantogadhabhāvaṃ dassetuṃ vuttaṃ “uppādentī”ti. “**Anupasampannassā**”ti ettha akārassa sadisatthaṃ dassetuṃ vuttaṃ “sāmaṇerassā”ti. Sāmaṇeropi hi upasampannena sadiso hoti sañṭhānena ca purisabhāvena ca. Sāmaṇerassa kukkucçaṃ upadahaṭṭi sambandho. Nisinnaṃ maññe, nipannaṃ maññe, bhuttaṃ maññe, pītaṃ maññe, kataṃ maññeti yojanā. **Nisinnanti** nisīditaṃ. **Nipannanti** nipajjīnti. Sattamaṃ.

8. Upassutisikkhāpadaṃ

471. Aṭṭhame “adhikaraṇajātāna”nti ettha adhikaraṇassa pakaraṇato vivādādhikaraṇabhāvañca visesanaparapadabhāvañca dassento āha “uppannavivādādhikaraṇāna”nti. Tattha uppannasaddena jātasaddasatthaṃ dasseti. Vivādasaddena adhikaraṇassa sarūpaṃ dasseti. Suyyatīti **suti** vacanaṃ, sutiyaṃ samīpaṃ **upassuti** ṭhānanti atthaṃ dassetuṃ vuttaṃ “sutisamīpa”nti. “Samīpa”nti iminā upasaddasatthaṃ dasseti. “Yatthā”tiādīnā “upassuti”ti ettha upasaddassa padhānattā tassa sarūpaṃ dasseti. **Yatthāti** yasmiṃ ṭhāne. **Mantentanti** ettha upayogavacanassa bhummatthe adhippetattā vuttaṃ “mantayamāne”ti.

473. “**Vūpasamissāmī**”ti ettha idhātuyā gatyatthaṃ dassetuṃ vuttaṃ “vūpasamaṃ gamissāmī”ti. **Akārakabhāvanti** niddosabhāvaṃ. Sotukāmatāya gamanavasena siyā kiriyanti yojanā. Paratopi eseva nayoti. Aṭṭhamaṃ.

9. Kammaṭṭibāhanasikkhāpadaṃ

474. Navame **mayanti** chabbaggiyanāmakā amhe. **Katattāti** kammānaṃ katattā. **Dhammoti** bhūto sabhāvo. **Etesūti** catūsu saṅghakammesūti. Navamaṃ.

10. Chandaṃ adatvāgamanasikkhāpadaṃ

481. Dasame codeti parassa dosaṃ āropetīti **codako**. Tena ca codakena codetabbo dosaṃ āropetabboti **codito**, soyeva **coditako**, tena ca. “**Anuvijjakoti** ca vinayadharo. So hi codakacuditakānaṃ mataṃ anuminetvā vidati jānātīti anuvijjako. **Ettāvatāpīti** ettakenapi pamāṇenāti. Dasamaṃ.

11. Dubbalasikkhāpadaṃ

484. Ekādasame “alajjītā”tiādīsu (pari. 295) viya yakāralopena niddesoti āha “yathāmittatāyā”ti. “Yo yo”ti iminā yathāsaddassa vicchatthaṃ dasseti. Yathāvuddhantiādīsu (cūlava. 311 ādayo) viya yo yo mitto “**yathāmitta**”nti vacanattho kātabbo. **Sabbapadesūti** “yathāsandiṭṭhatā”tiādīsu sabbesu padesūti. Ekādasamaṃ.

12. Pariṇāmanasikkhāpadaṃ

489. Dvādasame **yanti** padatthavinicchayatthasaṅkhātāṃ yaṃ vacanaṃ. **Tatthāti** tiṃsakakaṇḍe. **Idhāti** dvenavutikaṇḍe, sikkhāpade vā. **Puggalassāti** parapuggalassāti. Dvādasamaṃ.

Sahadhammikavaggo aṭṭhamaṃ.

9. Ratanavaggo

1. Antepurasikkhāpada-atthayojanā

494. Rājavaggassa paṭhame **parittakoti** guṇena khuddako. Pāsādavarasaddassa uparisaddena sambandhitabbabhāvaṃ dassetuṃ vuttaṃ “pāsādavarassa upari gato”ti. Iminā pāsādavarassa upari **uparipāsādavarāṃ**, taṃ gato upagatoti **uparipāsādavaragatoti** vacanatthaṃ dasseti. **Ayyānanti** bhikkhūnaṃ. “Kāraṇā”ti iminā “vāhasā”ti padassatthaṃ dasseti. **Tehīti** ayyehi.

497. **Antaranti** khaṇaṃ, okāsaṃ vā vivaraṃ vā. **Ghātetunti** hanituṃ. Icchatīti iminā patthadhātuyā yācanatthaṃ dasseti. “Rājantepuraṃ hatthisammadda”ntiādīsu vacanattho evaṃ veditabboti yojanā. **Hatthisammaddanti** hatthisambādhaṭṭhānaṃ. Assehi sammaddo etthāti **assasammaddo**. Rathehi sammaddo etthāti **rathasammaddoti** vacanatthaṃ atidīsanto āha “eseva nayo”ti. “Sammatta”nti paṭhamakkharena pāṭhassa sambādhasa avācakattā vuttaṃ “taṃ na gahetabba”nti. **Tatthāti** pāṭhe. “Hatthīnaṃ sammadda”nti iminā uttarapadassa sammaddanaṃ **sammaddanti** bhāvatthaṃ dasseti, purimapadena chaṭṭhisamāsaṇca. Purimapāṭhe pana uttarapadassa adhikaraṇatthaṇca pubbapadena tatiyāsamāsaṇca dasseti. Bāhiratthasamāsoṭīpi vuccati. Pacchimapāṭhe “hatthisammadda”ntiādīpadassa liṅgavipallāsaṇca “atthī”ti pāṭhasesena yojetabbataṇca dassetuṃ vuttaṃ “hatthisammaddo atthī”ti. **Rajitabbānīti** rajanīyāni, rajituṃ arahānīti attho. Iminā sambandhakāle purimapāṭhe rañño antepureti vibhattivipallāso kātābboti. Pacchimapāṭhe pana mukhyatova yujjati. Tena vuttaṃ “tasmiṃ antepure”ti.

498. **Avasittassāti** khattiyābhisekena abhisittassa. **Itoti** sayanigharato. Iminā pañcamībāhirasamāsaṃ dasseti. Rañño ratijananatṭhena **ratanāṃ** vuccati mahesī. **Mahesīti** ca sābhisekā devī. Nipubba gamudhātussa nipubbakamudhātuyā pariyāyabhāvaṃ dassetuṃ vuttaṃ “niggatanti nikkhanta”nti. Paṭhamāṃ.

2. Ratanasikkhāpadaṃ

502. Dutiye **pamussitvāti** sativippavāsenā pamussitvā. **Puṇṇapattanti** tuṭṭhidāyaṃ. Tañhi manorathapūṇṇena pattabbabhāgattā “puṇṇapatta”nti vuccati. Tassa sarūpaṃ dassetuṃ vuttaṃ “satato pañca kahāpaṇā”ti. Idha pana kahāpaṇānaṃ pañcasatattā pañcavīsakahāpaṇā adhippetā. **Ābharaṇasaddassa** alaṅkārasaddena pariyāyabhāvaṃ dassetuṃ vuttaṃ “alaṅkāra”nti. “Mahālatāṃ nāmā”ti iminā na yo vā so vā alaṅkāro, atha kho viśesālaṅkāroti dasseti. Mahantāni mālākammalatākammāni etthāti **mahālatā**. Latāgahaṇena hi mālāpi gahitā. Navahi koṭīhi agghaṃ imassāti **navakoṭiagghanakāṃ**, navakoṭīsaṅkhātāṃ agghaṃ arahatīti vā **navakoṭiagghanakāṃ**.

504. Ante samīpe vasanasīlattā paricāriko “**antevāsī**”ti vuccatīti āha “paricāriko”ti.

506. **Dve leḍḍupātāti** thāmamajjhimassa purisassa dve leḍḍupātā. Saṅgha...pe... navakammānaṃ atthāya uggaṇhantassa vā uggaṇhāpentassa vā dukkaṭanti yojanā. **Avasesanti** jātarūparajatato avasesaṃ. **Mātukaṇṇapiḷandhanatālapaṇṇampīti** mātuyā kaṇṇe piḷandhitatālapaṇṇampi, paṭīsamentassāti sambandho.

“Kappiyabhaṇḍaṃ hotī”ti iminā akappiyabhaṇḍaṃ na vaṭṭatīti dasseti. **Idanti** bhaṇḍaṃ. **Palibodho nāmāti** attano palibodho nāma. **Chandenapīti** vaḍḍhakīdānaṃ chandahetunāpi. **Bhayenapīti** rājavallabhānaṃ bhayahetunāpi. **Balakkārenāti** karaṇaṃ kāro, balena kāro balakkāro, tena, balakkāro hutvā pātetvāti attho.

Tatthāti mahārāme. **Yatthāti** yasmiṃ ṭhāne, saṅkā uppajjatīti sambandho. **Mahājanasaṅcaraṇatṭhānesūti** bahūnaṃ janānaṃ saṅcaraṇasaṅkhātesu ṭhānesu. Nagahetabbassa

hetuṃ dassetuṃ vuttaṃ “palibodho na hotī”ti. Yasmā palibodho na hoti, tasmā na gahetabbanti adhippāyo. **Ekoti** eko bhikkhu passatīti sambandho. **Okkammāti** okkamitvā.

Rūpasaddo bhaṇḍapariyāyoti āha “bhaṇḍa”nti. Bhaṇḍaṃ rūpaṃ nāmāti yojanā. **Bhaṇḍikanti** bhaṇḍena niyuttaṃ puṭakaṃ. **Gaṇetvāti** gaṇanaṃ katvā. **Nimittantīti** ettha itisaddo nāmapariyāyo. Lañchanādi nimittaṃ nāmāti hi yojanā. Lañchanādīti ādisaddena nīlapilotikādayo saṅgaṇhāti. **Lākhāyāti** jatunā.

Patirūpā nāma idha lajjikukkuccakāti āha “lajjino kukkuccakā”ti. **Thāvaranti** jaṅgamā aññaṃ thāvaraṃ. **Addhunoti** kālassa. **Samādapetvāti** aññe samādapetvā. Uddissa ariyā tiṭṭhanti, eṣā ariyāna yācana”ti (jā. 1.7.59) vuttanayena yācitvāti attho.

507. Ratanasammatanti manussānaṃ upabhogaparibhoganti. Dutiyaṃ.

3. Vikālagāmappavisanasikkhāpadaṃ

508. Tatiye “tiracchānabhūtaṃ katha”nti iminā “**tiracchānakatha**”nti padassa tulyanissitasamāsaṃ dasseti. **Rājapaṭisaṃyuttanti** rājūhi paṭisaṃyuttaṃ.

512. Sambahulā bhikkhūti sambandho. **Tasmiṃ gāmeti** tasmiṃ paṭhamapavisanaḡāme. **Taṃ kammanti** taṃ icchitakammaṃ. **Antarāti** gāmavihārānamantare. Bhummatthe cetam nissakkavacanaṃ.

Kulaghare vāti nātikulaupaṭṭhākakulaghare vā. **Telabhikkhāya vāti** telayācanatthāya vā. **Passeti** attano passe samīpeti vuttaṃ hoti. **Tenāti** gāmamajjhamaggena. **Anokkammāti** anokkamitvā, apakkamitvāti atthoti. Tatiyaṃ.

4. Sūcigharasikkhāpadaṃ

517. Catutthe kakārassa padapūraṇabhāvaṃ dassetuṃ vuttaṃ “**bhedanameva bhedanaka**”nti. Assatthiatthe apaccayoti āha “taṃ assa atthī”ti. **Assāti** pācittiyassa. Paṭhamaṃ sūcigharaṃ bhinditvā pacchā pācittiyaṃ desetabbanti attho. **Araṇidhanuketi** araṇiyā dhanuke. **Vedhaketī** kāyabandhanavedhaketī. Catutthaṃ.

5. Mañcasikkhāpadaṃ

522. Pañcame chedanameva chedanakaṃ, tamassatthīti **chedanakanti** atthaṃ sandhāya vuttaṃ “vuttanayamevā”ti.

Nikhaṇitvāti pamāṇātirekaṃ nikhaṇitvā. **Uttānaṃ vā katvāti** heṭṭhupari parivattanaṃ vā katvā. **Ṭhapetvāti** lambaṇavasena ṭhapetvāti. Pañcamaṃ.

6. Tūlonaddhasikkhāpadaṃ

526. Chaṭṭhe **etthāti** mañcapīṭhe. Avanahitabbanti **onaddhaṃ**, tūlena onaddhaṃ **tūlonaddhanti** atthopi yujjati. **Tūlaṃ pakkhipitvāti** mañcapīṭhe cimilikaṃ pattharivā tassupari tūlaṃ pakkhipitvāti atthoti. Chaṭṭhaṃ.

7. Nisīdanasikkhāpadaṃ

531. Sattame **katthāti** kismiṃ khandhake, kismiṃ vatthusmiṃ vā. **Hīti** saccaṃ. **Tatthāti**

cīvarakkhandhake, paṇītabhojanavatthusmiṃ vā. “Yathā nāmā”ti iminā “seyyathāpī”ti padassa atthaṃ dasseti, “purāṇo cammakāro”ti iminā “purāṇāsikoṭṭho”ti padassa. Cammakāro hi asinā cammaṃ kuṭāti chindatīti “**asikoṭṭho**”ti vuccati. Vatthuppannakālamupanidhāya vuttaṃ “purāṇo”ti. Tamevūpamaṃ pākaṭaṃ karonto āha “**yathā hī**”ti. **Hī**ti tappākaṭīkaraṇaṃ, taṃ pākaṭaṃ karissāmīti hi attho. Cammakāro kaḍḍhatīti sambandho. **Vitthatanti** visālaṃ. **Sopīti** udāyīpi. Taṃ nisīdanaṃ kaḍḍhatīti yojanā. **Tenāti** kaḍḍhanahetunā. **Tanti** udāyiṃ. **Santhatasadisanti** santhatena sadisaṃ. **Ekasmim anteti** ekasmim koṭṭhāse, phāletvāti sambandhoti. Sattamaṃ.

8. Kaṇḍupaṭicchādisikkhāpadaṃ

537. Aṭṭhame “**katthā**”tiādīni vuttanayāneva.

539. “Yassā”ti padassa visayaṃ dassetuṃ vuttaṃ “bhikkhuno”ti. “Nābhiyā heṭṭhā”ti iminā nābhiyā adho **adhonābhīti** vacanatthaṃ dasseti, “jāṇumaṇḍalānaṃ uparī”ti iminā jāṇumaṇḍalānaṃ ubbha **ubbhajāṇumaṇḍalanti**. Ubbhasaddo hi uparipariyāyo sattamyantanipāto. Kaṇḍukhajjusaddānaṃ vevacanattā vuttaṃ “**kaṇḍūti khajjū**”ti. Kaṇḍatī bhedaṇaṃ karotīti **kaṇḍu**. Khajjati byadhaṇaṃ karotīti **khajju**. Kesuci potthakesu “kacchū”ti pāṭho atthi, so ayutto.

Lohitaṃ tuṇḍaṃ etissāti **lohitatuṇḍikā**. Piḷayati vibādhayatīti **piḷakā**. Ā bhuso asuciṃ savati paggharāpetīti **assāvoti** vacanatthaṃ dassento āha “asucipaggharaṇa”nti. Arisaṅca bhagandarā ca madhumeho ca. Ādisaddena dunnāmakādayo saṅgaṇhāti. Tattha ari viya īsati abhibhavatīti **arisaṃ**. Bhagaṃ vuccati vaccamaggaṃ, taṃ darati phāletīti **bhagandarā**, gūthasamīpe jāto vaṇaviseso. Madhu viya muttādiṃ mihati secatīti **madhumeho**, so ābādhō muttameho sukkameho rattamehoti anekavidho. **Thullasaddo** mahantapariyāyoti āha “mahā”ti. Aṭṭhamaṃ.

9. Vassikasāṭīkasikkhāpadaṃ

542. Navame vasse vassakāle adhiṭṭhātabbāti **vassikā**, vassikā ca sā sāṭīkā ceti **vassikasāṭīkāti**. Navamaṃ.

10. Nandattherasikkhāpadaṃ

547. Dasame “catūhi aṅgulehī”ti iminā caturo aṅgulā **caturaṅgulāti** asamāhāradiguṃ dasseti. **Ūnakappamāṇoti** bhagavato lāmakapamaṇo. Iminā **omakasaddassa** lāmakatthaṃ dassetīti daṭṭhabbanti. Dasamaṃ.

Ratanavaggo navamo.

Iti samantapāsādikāya vinayasaṃvaṇṇanāya

Khuddakavaṇṇanāya yojanā samattā.

6. Pāṭidesanīyakaṇḍaṃ

1. Paṭhamapāṭidesanīyasikkhāpada-atthayojanā

Khuddakānaṃ anantarā pāṭidesanīyā ye dhammā saṅgītikārehi ṭhapitā, idāni tesam dhammānaṃ ayaṃ vaṇṇanā bhavatīti yojanā.

552. Paṭhamapāṭidesanīye tāva attho evaṃ veditabboti yojanā. **Paṭiāgamanakāleti** piṇḍāya

caraṇaṭṭhānato pakkamitvā, paṭinivattitvā vā āgamanakāle. **Sabbevāti** ettha niggahītalopavasena sandhi hotīti āha “sabbamevā”ti. “Kampamānā”ti iminā papubbavidhadhātuyā kampanattham dasseti. **Apehīti** ettha apapubbaidhātu gatyatthoti āha “apagacchā”ti.

553. Paṭidesetabbākāram dasseti anenāti **paṭidesetabbākāradassanam**. Dvinnaṃ saddānaṃ pariyāyabhāvaṃ dassetuṃ vuttaṃ “rathikāti racchā”ti. Rathassa hitā **rathikā**. Nyapaccaye kate “**racchā**”ti (moggallāne 4.72 sutte) vuccati. Racchantarena anibbidhā racchā **byūho** nāmāti āha “anibbijhitvā”tiādi. Byūheti sampiṇḍeti jane aññattha gantumapadānavasenāti **byūho**. Siṅghātakam nāma maggasandhīti āha “maggasamodhānaṭṭhāna”nti. Siṅghati maggasamodhānaṃ karoti etthāti **siṅghātakam**. **Etesūti** rathikādīsu. **Eseva nayoti** dukkaṭapaṭidesanīye atidisati. **Hīti** saccam. “Vacanato”ti padaṃ “veditabbo”ti pade ñāpakahetu. Dadamānāya bhikkhuniyā vasenāti yojanā. **Etthāti** sikkhāpade. **Tasmāti** yasmā apamānaṃ, tasmā.

Idanti vacanaṃ vuttanti sambandho. Sambhinne ekarase kālikattayeti yojanā.

556. “Dāpeti”ti hetutthakiriyāya kārītakattukārītakammāni dassetuṃ vuttaṃ “aññatikāya aññena kenaci”ti. **Aññenāti** attanā aññena. “Tāya eva vā bhikkhuniyā aññena vā kenaci”ti padāni “paṭiggahāpetvā”tipade kārītakammānīti. Paṭhamam.

2. Dutiyapāṭidesanīyasikkhāpadaṃ

558. Dutīye **purimasikkhāpadena āpatti** antaragharattāti adhippāyo. **Iminā sikkhāpadena āpatti bhaveyya** vosāsamānattāti adhippāyo. Dentiyā pana neva iminā, na purimena āpatti aññassa bhattattāti adhippāyoti. Dutiyam.

3. Tatiyapāṭidesanīyasikkhāpadaṃ

562. Tatiye “**ubhato**”ti ettha karaṇatthe totī āha “dvīhī”ti. “Ubhatopasanna”nti byāsopi samāsopi yuttoyeva, samāse topaccayassa alopo hoti. “Ubhato”tipadassa sarūpaṃ dassetuṃ vuttaṃ “upāsakenapi upāsikāyapī”ti. Kasmā ubhato pasannaṃ hotīti āha “tasmiṃ kirā”tiādi. Yasmā tasmiṃ kule...pe... sotāpannāyeva hontī kira, tasmā “ubhatopasanna”nti vuttaṃ hoti. “Sacepī”ti ettha **pisaddena** asītikotiḍhanato adhikampī sampiṇḍeti. Hāyanassa kāraṇam dasseti “**yasmā**”tiādinā.

569. “Gharato nīharitvā”ti ettha “**nīharitvā**”ti padassa kammaṃ dassetuṃ vuttaṃ “āsanasālam vā vihāram vā”ti. “Ānetvā”tiiminā nīpubbaharadhātuyā attham dasseti. **Dvāreti** attano gehadvāreti. Tatiyam.

4. Catutthapāṭidesanīyasikkhāpadaṃ

570. Catutthe **avaruddhasaddo** pariruddhasaddassa pariyāyoti āha “**pariruddhā** hontī”ti. Āraññakassa senāsanassa parisamantato ruddhā āvutā hontīti attho.

573. “Pañcanna”nti niddhāraṇe sāmivacanabhāvañca “yaṃkiñcī”ti niddhāraṇīyena sambandhitabbabhāvañca dassetuṃ vuttaṃ “pañcasu sahadhammikesu yaṃ kiñcī”ti. “Pesetvā khādanīyam bhojanīyam āharissāmī”tiiminā paṭisaṃviditākāradassanam. “Ārāma”nti sāmāññato vuttepi āraññakasenāsanassa ārāmo eva adhippetoti āha “āraññakasenāsanārāmañcā”ti. **Tassāti** āraññakasenāsanārāmassa. “**Kasmā**”ti pucchāya “paṭimocanattha”nti visajjanāya sametuṃ sampadānatthe nissakkavacanaṃ kātabbam. Kimatthanti hi attho. **Paṭimocanatthanti** tadatthe paccattavacanaṃ. Paṭimocanasankhātāya atthāyāti hi attho. Atthasaddo ca payojanavācako. Payojanāyāti hi attho. Atha vā “paṭimocanattha”nti visajjanāyam. “Kasmā”ti pucchāya sametuṃ nissakkatthe

paccattavacanam katabbam. Paṭimocanasāṅkhātā atthāti hi attho. Atthasaddo ca kāraṇavācako. Kāraṇāti hi attho. Evañhi pucchāvisajjanānam pubbāparasamasāṅkhāto vicayo hāro paripuṇṇo hotīti daṭṭhabbam. **Amhākanti** khādanīyabhojanīyapaṭiharantānam amhākam. **Amheti** corasāṅkhāte amhe.

“**Tassā**”ti padassattham dassetuṃ vuttam “etissā yāguyā”ti. **Aññānipīti** paṭisaṃviditakulato aññānipi kulāni. **Tenāti** paṭisaṃviditakulena. Kurundivāde yāguyā paṭisaṃviditam katvā yāgum aggahetvā pūvādīni āharanti, vaṭṭatīti adhippāyo.

575. Ekassāti bhikkhussa. **Tassāti** paṭisaṃviditabhikkhussa, catunnam vā pañcannam vā bhikkhūnam atthāyāti yojanā. **Aññesampīti** catupañcabhikkhuto aññesampi. **Adhikamevāti** paribhuttato atirekameva. **Yam panāti** khādanīyabhojanīyam pana, yampi khādanīyabhojanīyam vanato āharitvā dentīti yojanā. “**Tatthajātaka**”nti ettha tasaddassa visayam dassetuṃ vuttam “ārāme”ti. Aññena dinnanti sambandho. **Nanti** mūlakhādanīyādīm. **Paṭisaṃviditanti** paṭikacceva suṭṭhu jānāpitanti atthoti. Catuttham.

Iti samantapāsādikāya vinayasamvaṇṇanāya

Pāṭidesanīyavaṇṇanāya

Yojanā samattā.

7. Sekhiyakaṇḍam

1. Parimaṇḍalavagga-atthayojanā

Sikkhitasikkhena tīsu sikkhāsu catūhi maggehi sikkhitasikkhena **tādinā** atthahi lokadhammehi akampiyatthēna tādinā, iṭṭhānīṭṭhesu vā avikāraṭṭhēna tādinā bhagavatā **yāni** sikkhāpadāni “sekhiyāni”ti bhāsītāni, **dāni tesampi** sikkhāpadānam ayampi vaṇṇanākkamo bhavatīti yojanā.

576. Tatthāti sekhiyasikkhāpadesu, attho evam veditabboti yojanā. “Samantato”tiiminā parityūpasagassattham dasseti. “Nābhimaṇḍalam jānumaṇḍala”nti ettha uddhamsaddo ca adhosaddo ca ajjhāharitabboti āha “uddha”ntiādi. **Atthaṅgulamattanti** bhāvanapuṃsakam, nivāsetabbanti sambandho. **Tatoti** atthaṅgulamattato. Yathā paṭicchannam hoti, evam nivāsentassāti yojanā. **Tatridam pamāṇanti** tassa nivāsanassa idam pamāṇam. **Tādisassāti** dīghato mutṭhipañcakassa tiriyaṃ aḍḍhateyyahattassa nivāsanassa. Jānumaṇḍalam paṭicchādanattham vaṭṭatīti yojanā. **Tatthāti** cīvaresu. **Na tiṭṭhatīti** viralattā na tiṭṭhati. **Tiṭṭhatīti** ghanattā tiṭṭhati.

Nivāsentassa cātiettha casaddo avadhāraṇattho, nivāsentassevāti attho. Kevalam evam nivāsentasseva dukkaṭam na hoti, atha kho tathā nivāsentassāpi dukkaṭamevāti yojanā. Ye pana nivāsanadosāti sambandho. **Aññeti** purato ca pacchato ca olambetvā nivāsanato aññe. **Te sabbeti** sabbe te nivāsanadosā. **Etthāti** imasmim vibhaṅge. **Tatthevāti** khandhakeveva.

Asañicca nivāsentassa anāpattīti sambandho. Eseva nayo “asatiyā”ti etthāpi. **Ajānantassāti** ettha ajānanam duvidham nivāsanavattassa ajānanam, ārūḷhorūḷhabhāvassa ajānananti. Tattha ārūḷhorūḷhabhāvassa ajānanam sandhāya vuttam “ajānantassā”ti dassento āha “ajānantassāti etthā”tiādi. **Hīti** saccam. **Tassāti** nivāsanavattassa. **Assāti** bhikkhuno. **Tam panāti** āpattito amokkhanam pana. **Tasmāti** yasmā yujjati, tasmā. **Yoti** bhikkhu. Kurundiyaṃ vuttanti sambandho. Sikkhā jaṅghā imassāti **sukkhajaṅgho**. Mahantam piṇḍikamaṃsam imassāti **mahāpiṇḍikamaṃso**. **Tassāti** bhikkhussa.

Vaṇoti aru. Tañhi vaṇati gattavicunṇanam karotīti vaṇoti vuccati. **Vālamigā vā corā vāti** ettha vāsaddo avuttasampiṇḍanatto, tena aññāpi udakacikkhallādayo āpadā saṅgayhanti.

577. Idhāti imasmim vibhaṅge, sikkhāpade vā. **Ubho kaṇṇeti** purato ca pacchato ca niggate dve kaṇṇe. **Avisesenāti** “antaraghare”ti ca “ārāme”ti ca visesaṃ akatvā sāmāññaena. **Vihārepīti** saṅhasannipātabuddhupaṭṭhānatherupaṭṭhānādikālaṃ sandhāya vuttaṃ.

578. Kāyekaḍḍe kāyasaddo vattatīti āha “jāṇumpi urampī”ti. “Na sīsasaṃ pārutenā”tiiminā “suppaṭicchannena”tipadassa atibyāpitadosaṃ paṭikkhipati. **Gaṇṭhikanti** pāso. So hi gantheti bandhatīti vā, gantheti bandhati etthāti vā katvā ganthikoti vuccati. Nthakārassa vāṇṭhakāre kate **gaṇṭhiko**, taṃ gaṇṭhikaṃ paṭimuñcitvā. **Ubho kaṇṇeti** cīvarassa dve koṇe. **Galavāṭakatoti** ettha **galoti** kaṇṭho. So hi khajjabhojjaleyyapeyyasankhātamaṃ catubbidhamaṃ asanaṃ galati panna hutvā kucchiyaṃ patati itoti galoti vuccati. Āvāṇṭoyeva khuddakaṭṭhena **āvāṭako**, khuddakatthe ko. Gale ṭhito āvāṭako galavāṭako. Akārato hi ākārassa lopo “papa”ntiādīsu (jā. 1.1.2) viya. Ettha hi paāpanti padacchedo, akārato ākārassa ca lopo. Pavaddhamaṃ āpamaṃ papamaṃ, mahantaṃ udakanti attho. Sīsasaṃ vivarivāti sambandho.

579. Vāsasaṃ upagatoti vā vāsena upagatoti vā atthamaṃ paṭikkhipanto āha “**vāsattāya upagatassā**”ti.

580. Hatthapāde akīlanto susaṃvuto nāmāti dassento āha “hatthamaṃ vā pādamaṃ vā akīlāpento”ti.

582. Okkhittacakkhūti ettha osaddo heṭṭhāpariyāyoti āha “heṭṭhā khittacakkhū”ti. “Hutvā”tiiminā kiriyāvīsesanabhāvaṃ dasseti. **Yugayuttakoti** yuge yuttako. Damiyitthāti **danto**. Ābhūso jānāti kāraṇākkāraṇanti **ājāneyyo**. **Ettakanti** catuhatthapamaṇamaṃ. Yo gacchati, assa bhikkhuno dukkaṭā āpatti hotīti yojanā. “Parissayaabhāva”nti ca “parissayābhāva”nti ca dve pāṭhā yujjantiyeva.

584. Itthambhūtalakkhaṇeti imaṃ pakāraṃ itthamaṃ cīvarukkhīpanamaṃ, bhavati gacchatīti bhūto, bhikkhu. Lakkhīyati anenāti lakkhaṇamaṃ, cīvaraṃ. Itthamaṃ bhūto itthambhūto, tassa lakkhaṇamaṃ itthambhūtalakkhaṇamaṃ, tasmim. Karaṇavacanaṃ daṭṭhabbanti yojanā. Itthambhūtalakkhaṇamaṃ nāma kiriyāvīsesanassa sabhāvoti āha “ekato vā...pe... hutvāti attho”ti. **Antoindakhīlatoti** gāmassa antoindakhīlatoti. Paṭhamaṃ vago.

2. Ujjagghikavagga-atthayojanā

586. Uccāsaddamaṃ katvā jagghanaṃ hasanaṃ **ujjaggho**, soyeva **ujjagghikā**, tāya. Iti imamatthamaṃ dassento āha “mahāhasitaṃ hasanto”ti. **Etthāti** “ujjagghikāya”tipade.

588. Kittāvatāti kittakena pamāṇena, evaṃ nisinnesu theresūti sambandho, niddhāraṇe cetamaṃ bhummavacanaṃ. **Vavatthapetīti** idañcīdañca kathetīti vavatthapeti. **Ettāvatāti** ettakena pamāṇena.

590. Niccalaṃ katvā kāyassa ujuṭṭhapanamaṃ kāyapaggaho nāmāti āha “niccalaṃ katvā”tiādi. Eseva nayo bāhupaggahasāpaggahesupīti. Dutīyo vago.

3. Khambhakatavagga-atthayojanā

596. Khambho kato yenāti **khambhakato**. **Khambhoti** ca paṭibaddho. Kattha paṭibaddhoti āha “kaṭiyaṃ hatthamaṃ ṭhapetvā”ti. Sasīsasaṃ avagaṇṭhayati pariveṭhatīti **ogunṭhitoti** āha “sasīsasaṃ pāruto”ti.

600. Uddhamaṃ ekā koṭi imissā gamanāyāti **ukkuṭikāti** dassento āha “ukkuṭikā vuccatī”tiādi. **Etthāti** “ukkuṭikāya”tipade.

601. Hatthapallatthīkadussapallatthīkesu dvīsu dussapallatthike āyogapallatthīkāpi saṅghaṃ gacchatīti āha “āyogapallatthīkāpi dussapallatthīkā evā”ti.

602. Satiyā upaṭṭhānaṃ sakkaccanti āha “satiṃupaṭṭhapetvā”ti.

603. Piṇḍapātaṃ dentepīti piṇḍapātaṃ patte pakkhipantepi. Patte saññā pattasaññā, sā assatthīti **pattasaññī**. “Katvā” tiiminā kiriyāvisesanabhāvaṃ dasseti.

604. Samasūpakaṃ piṇḍapātanti ettha sūpapiṇḍapātānaṃ samaupaḍḍhabhāvaṃ āsaṅkā bhaveyyāti āha “samasūpako nāmā”tiādi. **Yatthāti** piṇḍapāte. Bhattassa catutthabhāgapamāṇo sūpo hoti, so piṇḍapāto samasūpako nāmāti yojanā. Oloṇī ca sākāsūpeyyaṅca maccharaso ca maṃsaraso cāti dvando. Tattha **oloṇīti** ekā byañjanavikati. **Sākāsūpeyyanti** sūpassa hitaṃ **sūpeyyaṃ**, sākameva sūpeyyaṃ sākāsūpeyyaṃ. Iminā sabbāpi sākāsūpeyyabyañjanavikati gahitā. **Maccharasamaṃsarasādīnīti** ettha ādisaddena avasesā sabbāpi byañjanavikati saṅgahitā. Taṃ sabbam rasanāṃ raso **rasarasoti** katvā “rasaraso”ti vuccati.

605. Samapuṇṇaṃ samabharitanti vevacanameva. Thūpaṃ kato **thūpīkatoti** atthaṃ dassento āha “thūpīkato nāmā”tiādi.

Tatthāti “thūpīkata”ntiādivacane. **Tesanti** abhayattheratipiṭakacūlanāgattherānaṃ. Iti pucchimsu, tesaṅca therānaṃ vādaṃ ārocesunti yojanā. **Theroti** cūlasumanatthero. **Etassāti** tipīṭakacūlanāgattherassa. **Sattakkhattunti** satta vāre. **Kutoti** kassācariyassa santikā. **Tasmāti** yasmā yāvakālikena paricchinnō, tasmā. Āmisajātikaṃ yāgubhattaṃ vā phalāphalaṃ vāti yojanā. **Taṅca khoti** taṅca samatitthikaṃ. **Itarena panāti** nādhiṭṭhānupagena pattena pana. Yaṃ pūvaucchukhaṇḍaphalāphalādī heṭṭhā orohati, taṃ pūvaucchukhaṇḍaphalāphalādīti yojanā. **Pūvavaṭṭamsakoti** ettha **vaṭṭamsakoti** uttamaṃso. So hi uddhaṃ tasīyate alaṅkarīyateti vaṭṭamsoti vuccati ukārassa vakāraṃ, takārassa ca ṭakāraṃ katvā, soyeva vaṭṭamsako, muddhani pilandhito eko alaṅkāraviseso. Pūvameva vaṭṭamsadisattā pūvavaṭṭamsako, taṃ. Pupphavaṭṭamsako ca takkolakaṭukaphalādīvaṭṭamsako cāti dvando, te.

Idhāti imasmiṃ sikkhāpade. Nanu sabbathūpīkatesu paṭiggahaṇassa akappiyattā paribhuñjanampi na vaṭṭatīti āha “sabbattha panā”tiādi. Tattha **sabbatthāti** sabbesu thūpīkatesūti. Tatiyo vaggo.

4. Sakkaccavagga-atthayojanā

608. Tattha tatthāti tasmim tasmim ṭhāne. **Odhinti** avadhim mariyādaṃ.

610. Thūpakatoti thūpameva thūpakaṃ, tato thūpakatoti dassento āha “matthakato”ti.

611. Māghātasamayādīsūti “pāṇe mā ghātethā”ti rājāno bherim carāpenti etthāti māghāto, soyeva samayo māghātasamayo. Ādisaddena aññaṃ paṭicchannakāraṇaṃ gahetabbaṃ.

615. Tesanti mayūraṇḍakukkuṭaṇḍānanti. Catuttho vaggo.

5. Kabaḷavagga-atthayojanā

617. “Mukhadvāra”nti kammaṃsa “anāhaṭe”ti ca “vivarissāmī”ti ca dvīsu kiriyāsu sambandhabhāvaṃ dassetuṃ vuttaṃ “anāharite mukhadvāra”nti.

618. Sakalaṃ hatthanti pañcaṅgulim sandhāya vuttaṃ.

619. **Sakabaḷenā**ti ettha kabaḷasaddena vacanassa aparipuṇṇakāraṇaṃ sabbampi gahetabbaṃ.

620. **Piṇḍukkhepakanti**ādisu vicchatthe kapaccayoti āha “piṇḍaṃ ukkhipitvā ukkhipitvā”ti. Tvāsaddena kiriyāvīsesanabhāvaṃ dasseti.

624. “Avakiritvā”ti iminā **sitthāvākārakanti** ettha avapubbo kiradhātuyeva, na karadhātūti dasseti.

626. “**Capucapū**”ti evaṃ **saddanti** “capucapū”ti evaṃ anukaraṇaravanti. Pañcama vaggo.

6. Surusuruvagga-atthayojanā

627. “**Surusurū**”ti evaṃ **saddanti** “surusurū”ti evaṃ anukaraṇaravaṃ. Davanaṃ kīḷananti iminā vacanathena parihāso **davo** nāmāti āha “davoti parihāsavacana”nti. **Tanti** so davo. Liṅgavipallāso hesa. **Na kātabbaṃ** na kātabboti sambandho. **Silakabuddhoti** silāya kato, silena niyutto vā buddho. **Apaṭibuddhoti** apaṭividdho buddho, parihāsavacanametam. **Godhammoti** gunnaṃ dhammo. **Ajadhammoti** ajānaṃ dhammo. **Migasaṅghoti** migānaṃ saṅgho. **Pasusaṅghoti** pasūnaṃ saṅgho.

628. “Bhuñjantenā”ti padaṃ “nillehitu”nti pade bhāvakattā.

631. **Evaṃnāmaketi** “kokanuda”nti evaṃ nāmaṃ assa pāsādassāti **evaṃnāmako**, pāsādo, tasmim. “Padumasaṅṭhāno”ti iminā pāsādassa sadisūpacārena “kokanudo”ti nāmalabhanam dasseti. **Tenāti** padumasaṅṭhānattā. **Assāti** pāsādassa. **Puggalikampīti** parapuggalasantakam gahetabbaṃ “attano santakampī”ti attapuggalasantakassa visum gayhamānattā. **Saṅkhampīti** pānīyasaṅkhampi. **Sarāvampīti** pānīyasarāvampi. **Thālakampīti** pānīyathālakampi.

632. “Uddharitvā”ti sāmāññato vuttavacanassa kammāpādānāni dassetuṃ vuttaṃ “sitthāni udakato”ti. **Bhinditvāti** cuṇṇavicuṇṇāni katvā. **Bahīti** antaragharato bahi.

634. **Setacchattanti** ettha **setasaddo** paṇḍarapariyāyoti āha “paṇḍaracchatta”nti. **Vatthapaliguṇṭhitanti** vatthehi samantato veṭhitam. Setam chattaṃ **setacchattam**. Kiḷañjehi kataṃ chattaṃ **kiḷañjacchattam**. Paṇṇehi kataṃ chattaṃ **paṇṇacchattam**. Maṇḍalena baddham **maṇḍalabaddham**. Salākāhi baddham **salākabaddham**. **Tānīti** tīṇi chattaṇi. **Hīti** saccam. Yampi ekapaṇṇacchattanti yojanā. **Etesūti** tīsu chattesu. **Assāti** yassa kassaci gahaṭṭhassa vā pabbajitassa vā. **Sotī** yo koci gahaṭṭho vā pabbajito vā. **Chattapādukāya vāti** chattadaṇḍanikkhepanāya pādukāya vā. **Etthāti** imasmim sikkhāpade.

635. **Majjhimassāti** pamāṇamajjhimassa. “Catuhattappamāṇo”tiiminā catuhattathato unātireko daṇḍo na daṇḍo nāmāti dasseti. Daṇḍo pāṇimhi assāti vacanatham atidisanto āha “vuttanayenevā”ti.

636. “**Satthapāṇimhī**”ti ettha asi eva adhippetoti āha “asi”nti. **Asinti** khaggaṃ.

637. “Āvudham nāma cāpo kodaṇḍo”ti pāliyaṃ vuttavacanam upalakkhaṇamevāti dassento āha “āvudhapāṇissāti etthā”tiādi. Sabbāpi dhanuvikati āvudhanti veditabbāti yojanā. Yathā asim sannahitvā ṭhito satthapāṇīti saṅkhyam na gacchati, evam dhanum kaṇṭhe paṭimukko āvudhapāṇīti āha “sace panā”tiādi, iminā āvudho pāṇinā gahitoyeva āvudhapāṇi nāmāti dasseti. Chatṭho vaggo.

7. Pādukavagga-atthayojanā

638. **Aṅgulantaranti** pādaṅgulavivaraṃ. **Pādukanti** upāhanaviseso. So hi pajjate imāyāti pādukāti

vuccati, sā bahupaṭalā cammamayā vā hoti kaṭṭhamayā vā. **Paṭimuñcivāti** pādukaṃ paṭimuñcivā.

640. Dvīhi janehi gahitoti sambandho. **Vaṃsenāti** veṇunā, yāne nisinnoti sambandho.

Visaṅkharitvāti vipattiṃ karitvā. **Dvepīti** dhammakathikadhammapaṭiggāhakasaṅkhātā ubhopi janā. **Vaṭṭatīti** desetum vaṭṭati.

641. Sayanagatassāti sayanaṃ gatassa, sayane nipannassāti attho. Nipannassa desetum na vaṭṭatīti sambandho.

642. Tīsu pallatthikāsu yāya kāyaci pallatthikāya nisinnassa dhammaṃ desetum na vaṭṭatīti dassento āha “pallatthikāyā”tiādi.

643. Yathā veṭhiyamāne kesanto na dissati, evaṃ veṭhitasāsassāti yojanā.

647. Chapakasaddassa ca caṇḍālasaddassa ca vevacanattā vuttaṃ “caṇḍālassā”ti. Caṇḍālo hi saṃ sunakhaṃ pacatīti **chapakoti** vuccati sakārassa chakāraṃ katvā. Chapakassa esā **chapakī**, caṇḍālabhariyā. **Yatrāti** ettha trapaccayo paccatte hotīti āha “yo hi nāmā”ti. Yo rājā ucce āsane nisīditvā mantam pariyaṇissati nāma, ayaṃ rājā yāva ativiya adhammikoti vuttaṃ hoti. “**Sabbamida**”nti ayaṃ saddo līngavipallāsoti āha “sabbo aya”nti. “Loko”ti iminā idhasaddassa visayaṃ dasseti. Carimasaddo antimapariyāyo. **Antimoti** ca lāmako. **Lāmakoti** ca nāma idha vipattīti āha “saṅkara”nti. **Saṅkaranti** vipattiṃ. “Nimmariyādo”ti iminā “saṅkaraṃ gato”ti padānaṃ adhippāyatthaṃ dasseti. Carimaṃ gataṃ **carimagataṃ**, sabbo ayaṃ loko carimagatoti attho. Idha ca jātake (jā. 1.4.33) ca kesuci potthakesu “camarikata”nti pāṭho atthi, so ayuttoyeva. **Tatthevāti** ambarukkhamūleyeva. **Tesanti** rājabrāhmaṇānaṃ.

Tatthāti tissaṃ gāthāyaṃ. **Pāliyāti** attano ācārapakāsakaganthasaṅkhātāya pāliyā. **Na passareti** ettha resaddo antissa kāriyoti āha “na passantī”ti. **Yo cāyanti** yo ca ayaṃ. **Ayaṃsaddo** padālaṅkāramatto, brāhmaṇoti attho. **Adhiyatīti** ajjhāyati, sikkhatīti attho.

Tatoti bodhisattena vuttagāthāto paranti sambandho. **Tassāti** gāthāya. **Bhoti** bodhisattaṃ āmanteti. “Bhutto”ti padassa kammavācakabhāvamāvikātum vuttaṃ “mayā”ti. **Assāti** odanassa. Iminā suci parisuddhaṃ maṃsaṃ **sucimaṃsaṃ**, tena upasecanamassāti **sucimaṃsūpasecanoti** bāhiratthasamāsaṃ dasseti. **Dhammeti** ācāradhamme. **Baddho hutvāti** thaddho hutvā, ayameva vā pāṭho. **Vaṇṇasaddassa** saṅghānādike aññe atthe paṭikkhipitum vuttaṃ “pasattho”ti. **Thomitoti** tasseva vevacanaṃ.

Athāti anantare. **Nanti** brāhmaṇaṃ. **Tassāti** gāthādvayassa. **Brāhmaṇāti** purohitaṃ ālapati. **Sampatīti** sandīṭṭhike. “Yā vutti vinipātena, adhammacaraṇena vā”ti padānaṃ sambandhaṃ desetum vuttaṃ “nippajjati”ti.

Mahābrahmeti ettha brahmasaddo brāhmaṇavācakoti āha “mahābrāhmaṇā”ti. **Aññepīti** rājabrāhmaṇehi aparepi. “Pacantī”ti vutte avinābhāvato “bhuñjanti”ti atthopi gahetabboti āha “pacanti ceva bhuñjanti cā”ti. “Na kevala”ntiādinā **aññepīti** ettha pisaddassa sampiṇḍanattaṃ dasseti, tvam ācarissasīti sambandho. Puna **tvanti** taṃ, upayogathe cetam paccattavacanaṃ, “mā bhidā”tiiminā sambandhitabbaṃ. “Pāsāṇo”tiiminā **asma**saddo pāsāṇapariyāyoti dasseti. **Tenāti** bhindanahetunā.

648. Attano kaṅkhāṭhānassa pucchanaṃ sandhāya vuttaṃ “na kathetabba”nti.

649. Samadhurenāti samaṃ dhurena, samaṃ mukhenāti attho.

652. Yaṃ mūlaṃ vā yā sākā vā gacchatīti yojanā. **Khandheti** rukkhassa khandhe. **Nikkhamatīti**

uccārapassāvo nikkhamati. **Tiṇaṇḍupakanti** tiṇena katam, tiṇamayam vā aṇḍupakam. **Etthāti** uccārapassāvakheḷesu.

653. Adhippetaudakam dassetuṃ vuttam “paribhogaudakamevā”ti. Sattamo vaggo.

Etthāti sekhiyesu. **Sūpabyañjanapaṭicchādaneti** sūpabyañjane odanena paṭicchādeti. Samattā sekhiyā.

8. Sattādhikaraṇasamatha-atthayojanā

655. Saṅkhyam paricchijjatīti **saṅkhyāparicchedo**. **Tesanti** catubbidhānamadhikaraṇānam. **Tassāti** tesam khandhakaparivārānam. **Tatthevāti** tesu eva khandhakaparivāresu. **Sabbatthāti** sabbesu sikkhāpadesūti.

Iti samantapāsādikāya vinayasamvaṇṇanāya

Bhikkhuvibhaṅgavaṇṇanāya yojanā samattā.

Jādilañchitanāmena nekānam vācito mayā.

Sādhum mahāvibhaṅgassa, samatto yojanāyoti.

Bhikkhunīvibhaṅgo

1. Pārājikakaṇḍaatthayojanā

Evam bhikkhuvibhaṅgassa, katvāna yojanāyamaṃ;
Bhikkhunīnam vibhaṅgassa, karissam yojanāyamaṃ.

Yoti vibhaṅgo. **Vibhaṅgassāti** vibhaṅgo assa. **Assāti** hoti. **Tassāti** bhikkhunīnam vibhaṅgassa. **Yatoti** yasmā. Ayam panettha yojanā – bhikkhūnam vibhaṅgassa anantaram bhikkhunīnam yo vibhaṅgo saṅgahito assa, tassa bhikkhunīnam vibhaṅgassa samvaṇṇanākkamo patto yato, tato tassa bhikkhunīnam vibhaṅgassa apubbapadavaṇṇanam kātuṃ tāva pārājike ayam samvaṇṇanā hotīti. Apubbānam padānam vaṇṇanā **apubbapadavaṇṇanā**, tam.

1. Paṭhamapārājikasikkhāpadam

656. “Tena...pe... sālho”ti ettha “etthā”ti pāṭhaseso yojetabbo. Dabbaguṇakiriyājātināmasaṅkhātesu pañcasu saddesu sālhasaddassa nāmasaddabhāvaṃ dassetuṃ vuttam “sālhoti tassa nāma”nti. **Migāramātuyāti** visākhāya. Sā hi migāraseṭṭhinā mātuṭṭhāne ṭhapitattā migāramātā nāma. Navakammaṃ adhiṭṭhātīti **navakammikanti** dassento āha “navakammādhīṭṭhāyika”nti. “Paṇḍiccena samannāgatā”tiiminā paṇḍā vuccati paññā, sā sañjātā imissāti **paṇḍitāti** vacanattham dasseti. **Veyyattikenāti** visesena añjati pākaṭam gacchatīti **viyatto**, puggalo, tassa idam veyyattikam, ñānam, tena. “Paṇḍā”ti vuttapaññāya “medhā”ti vuttapaññāya visesabhāvaṃ dassetuṃ vuttam “pālīgahaṇe”tiādi. “Medhā”ti hi vuttapaññā “paṇḍā”ti vuttapaññāya viseso hoti satisahāyattā. **Tatrupāyāyāti** aluttasamāso “tatramajjhataṭṭā”tiādīsu (dha. sa. aṭṭha. yevāpanakavaṇṇanā) viya. “Kammesū”ti iminā tasaddassa visayam dasseti. **Kattabbakammupaparikkhāyāti** kattabbakammesu vicāraṇāya. Casaddena “katākata”nti padassa dvandavākyam dasseti. **Parivesanaṭṭhāneti** paribhuñjitum visanti pavisanti etthāti parivesanam, tameva ṭhānam parivesanaṭṭhānam, tasmim. **Nikūṭeti** ettha kūṭasaṅkhātasikharavirahite okāseti dassento āha

“koṇasadisam katvā dassite gambhīre”ti. Vityūpasaggo vikāravācako, sarasaddo saddavācakoti āha “vippakārasaddo”ti. Carati anenāti **caranam** pādo, tasmim uṭṭhito gilāno etissāti **caranagilānāti** dassento āha “pādarogena samannāgatā”ti.

657. “Tintā”ti iminā **avassutasaddo** idha kilinnatthe eva vattati, na aññattheti dasseti. **Assāti** “avassutā”tipadassa. Padabhājane vuttanti sambandho. **Tatthāti** padabhājane. Vattham raṅgajātena rattam viya, tathā kāyasamsaggarāgena suṭṭhu rattāti yojanā. “Apekkhāya samannāgatā”ti iminā apekkhā etissamatthīti **apekkhavatīti** attham dasseti. Paṭibaddham cittaṃ imissanti **paṭibaddhacittāti** dassento āha “paṭibandhitvā ṭhapitacittā viyā”ti. **Dutiyapadavibhaṅgepi** “avassuto”ti dutiyapadabhājanepi. Puggalasaddassa sattaśamaññāvācakattā purisasaddena viseseti. **Adhoubbhaiti** nipātānam chaṭṭhiyā samasitabbabhāvaṃ dassetuṃ vuttam “akkhakānam adho”tiādi. Nanu yathā idha “akkhakānam adho”ti vuttam, evam padabhājanepi vattabham, kasmā na vuttanti āha “padabhājane”tiādi. **Padapaṭipāṭiyāti** “adho”ti ca “akkhaka”nti ca padānam anukkamena. **Etthāti** adhakkhakaubbhajāṇumaṅdalesu. **Sādhāraṇapārājikehīti** bhikkhubhikkhunīnam sādhāraṇehi pārājikehi. **Nāmamattanti** nāmameva.

659. **Evanti** imāya pāḷiyā vibhajitvāti sambandho. **Tatthāti** “ubhatoavassute”tiādivacane. “Ubhatoavassute”ti pāṭho mūlapāṭhoyeva, nāññoti dassentena visesamakavā “ubhatoavassuteti ubhato avassute”ti vuttam. **Ubhatoti** ettha ubhasarūpañca tosaddassa chaṭṭhyatthe pavattiñca dassetuṃ vuttam “bhikkhuniyā ceva purisassa cā”ti. Tattha bhikkhunīpurisasaddehi ubhasarūpaṃ dasseti. “Yā”ti ca “sa”iti ca dvīhi saddehi topaccayassa chaṭṭhyattham, ubhinnaṃ avassutabhāve satīti attho. Bhāvapaccayena vinā bhāvatho ñātabboti āha “avassutabhāve”ti. **Yathāparicchinnenāti** “adhakkhakaṃ, ubbhajāṇumaṅdala”nti yena yena paricchinnena. **Attanoti** bhikkhuniyā. **Tassa vāti** purisassa vā. **Idhāpi** kāyapaṭibaddhena kāyāmasanepi.

Tatrāti tesu bhikkhubhikkhunīsu. **Na kāretabbo** “kāyasamsaggaṃ sādiyeyyā”ti avuttattāti adhippāyo. **Acopayamānāpi** acālayamānāpi, **pisaddo** sambhāvanattho, tena copayamānā pagevāti dasseti. **Evam pana satīti** citteneva adhvāsāyamānāya sati pana. **Kiriyasamuṭṭhānatāti** imassa sikkhāpadassa kiriyasamuṭṭhānabhāvo. **Tabbahulanayenāti** “vanacarako (ma. ni. aṭṭha. 2.201; 3.133), saṅgāmāvacaro”tiādisu (ma. ni. 2.108) viya tassam kiriyāyaṃ bahulato samuṭṭhānanayena. **Sāti** kiriyasamuṭṭhānatā.

660. **Etthāti** ubbhakkhakaadhojāṇumaṅdalesu.

662. “**Ekato avassute**”ti etthāpi topaccayo chaṭṭhyatthe hoti. Sāmaññavacanassāpi visese avatṭhānato, visesatthinā ca visesassa anupayojitabbato āha “bhikkhuniyā evā”ti. **Tatrāti** “ekato avassute”tiādivacane. “**Tathevā**”tiiminā kāyasamsaggarāgena avassutoti attham atidisati. **Catūsūti** methunarāga kāyasamsaggarāgagehasitapema suddhacittasaṅkhātesu catūsu. **Yatthāti** yasmim ṭhāne.

663. Ayam puriso iti vā itthī iti vā ajānantiyā vāti yojanāti. Paṭhamam.

2. Dutiyapārājikasikkhāpadam

664. Dutīye **kacci no sāti** ettha nosaddo nusaddatthoti āha “kacci nu sā”ti. **Parivāravipattīti** pariyanassa vināsanam. “**Akittī**”ti ettha sammukhā nindam gahetvā “**ayaso**”tiiminā parammukhā nindā gahetabbāti dassetuṃ vuttam “parammukhagarahā vā”ti.

666. “Yā pārājikam āpannā”tiiminā “sā vā”ti ettha tasaddassa visayam dasseti. **Catunnanti** niddhāraṇatthe cetam sāmivacanam, catūsūti attho. **Pacchāti** sabbapārājikānam pacchā. **Imasmim okāseti** paṭhamatatiyapārājikānamantare ṭhāne. **Ṭhapitanti** saṅgītikārehi nikkhittam. **Etthāti** imasmim sikkhāpade. **Tatrāti** duṭṭhullasikkhāpadeti. Dutiyam.

3. Tatiyapārājikasikkhāpadam

669. Tatiye **assāti** “dhammena vinayenā”ti padassa. Padabhājanam vuttanti sambandho. Ñattisampadā ceva anusāvanasampadā ca satthusāsanaṃ nāmāti dassento āha “ñatti...pe... sampadāya cā”ti. **Satthusāsanaṃ**ti ca satthu āṇāya. **Kammanti** ukkhepanīyakammaṃ. **Tatthāti** saṅghe. “Vacanaṃ nādiyati”tiādīsu viya **saṅghaṃ vā nādiyati**ti ettha nādiyanaṃ nāma nānuvattanamevāti āha “nānuvattati”ti. **Tatthāti** saṅghādīsu. **Ayaṃ tāva saṃvāsoti** saha bhikkhū vasanti etthāti **saṃvāsoti** atthena ayaṃ ekakammādi saṃvāso nāma. “Saha ayanabhāvenā”tiiminā saha ayanti pavattantīti **sahāyāti** vacanattham dasseti. **Teti** bhikkhū. **Yehi cāti** bhikkhūhi ca. **Tassāti** ukkhittakassa. **Tenāti** ukkhittakena. **Attanoti** ukkhittakassāti. Tatiyaṃ.

4. Catutthapārājikasikkhāpadam

675. Catutthe methunarāgena avassutā nādhippetā, kāyasamsaggarāgena avassutāvādhippetāti āha “kāyasamsaggarāgena avassutā”ti. “Purisapuggalassā”tipadam na hatthasaddena sambandhitabbaṃ, gahaṇasaddeneva sambandhitabbanti dassento āha “yaṃ purisapuggalenā”tiādi. **Tanti** gahaṇaṃ, “hatthaggaṇa”nti vuttavacanam upalakkhaṇamattamevāti āha “aññampi”tiādi. Tattha “**aññampi**”ti hatthaggaṇato itarampi. **Apārājikakkhetteti** ubbhakkhake adhojāṇumaṇḍale. **Assāti** “hatthaggaṇa”ntipadassa. **Etthāti** “asaddhammassa paṭisevanatthāyā”tipade. **Kāyasamsaggoti** kāyasamsaggo eva. Tena vuttam “na methunadhammo”ti. **Hīti** saccaṃ, yasmā vā. **Etthāti** kāyasamsaggagahaṇe. **Sādhakanti** ṇāpakam.

Tissitthiyoti bhummatthe cetam upayogavacanam. Tīsu itthīsūti hi attho, tisso itthiyo upagantvāti vā yojetabbo. Eseva nayo paratopi. Yaṃ methunaṃ atthi, tam na seveti yojanā. **Na seveti** ca na sevati. Tikārassa hi ekāro. **Tayo puriseti** tīsu purisesu, te vā upagantvā. **Tayo ca anariyapaṇḍaketi** tīsu anariyasaṅkhātesu ubhatobyañjanakesu ca paṇḍakesu ca, te vā upagantvāti yojanā. **Na cācare methunaṃ byañjanasminti** attano nimittasmim methunaṃ na ca ācarati. Idaṃ anulomapārājikam sandhāya vuttam. **Chejjaṃ siyā methunadhammapaccayāti** methunadhammakāraṇā chejjaṃ siyā, pārājikam bhaveyyāti attho. **Kusalehīti** pañhāvisajjane chekehi, chekakāmehi vā. Ayaṃ pañho aṭṭhavatthukam sandhāya vutto.

Pañhāvisajjanatthāya cintentānam sedamocanakāraṇattā “**sedamocanagāthā**”ti vuttā. **Virujjhatīti** “na methunadhammo”ti vacanena “chejjaṃ siyā methunadhammapaccayā”ti vacanam virujjhati, na sametīti attho. Iti ce vadeyya, na virujjhati. Kasmā? Methunadhammassa pubbhāgattāti yojanā. Iminā methunadhammassa pubbhāgabhūto kāyasamsaggova upacārena tattha methunadhammasaddena vutto, na dvayaṃdvayasamāpattīti dīpeti. **Hisaddo** vitthārajotako. Parivāreyeva vuttānti sambandho. **Vaṇṇāvaṇṇoti** sukkavisatṭhi. **Dhanamanuppādānanti** sañcarittham. “**Iminā pariyaṇenā**”ti iminā lesena samīpūpacārenāti attho. **Etenupāyenāti** “hatthaggaṇaṃ sādiyeyyā”tipade vuttaupāyena. **Sabbapadesūti** sabbesu “saṅghāṭikaṇṇaggahaṇaṃ sādiyeyyā”tiādīsu padesu. **Api cāti** ekaṃsena, visesaṃ vakkhāmīti adhippāyo. “Evaṃnāmakam ṭhāna”nti iminā “itthamnāmam imassa ṭhānassā”ti vacanattham dīpeti.

676. **Ekantarikāya vāti** ettha vāsaddena dvantarikādīnipi saṅgayhanti. **Yena tenāti** yena vā tena vā. Dviticatuppañcachavatthūni peyyālavasena vā vāsaddena vā gahetabbāni. **Api cāti** kiñca bhīyyo, vattabbavisesaṃ vakkhāmīti adhippāyo. **Etthāti** “āpattiyo desetvā”ti vacane. **Hīti** saccaṃ. **Vuttanti** parivāre vuttam. **Tatrāti** purimavacanāpekkham. Desitā āpatti gaṇanūpikāti yojanā. **Ekaṃ** vatthum āpannā **yā** bhikkhunīti yojanā. **Dhuranikkhepaṃ katvāti** “imañca vatthum, aññampi ca vatthum nāpajjissāmī”ti dhuranikkhepaṃ katvā. Yā pana saussāhāva desetīti yojanāti. Catuttham.

Sādhāraṇāti bhikkhunīhi sādhāraṇā. **Etthāti** “uddiṭṭhā kho ayyāyo”tiādivacane.

Iti samantapāsādikāya vinayasamvaṇṇanāya

Bhikkhunivibhaṅge pārājikakaṇḍavaṇṇanāya yojanā samattā.

2. Saṅghādisesakaṇḍam

1. Paṭhamasaṅghādisesasikkhāpada-atthayojanā

Pārājikānantarassāti pārājikānaṃ anantare ṭhapitassa, saṅgītassa vā, saṅghādisesakaṇḍassāti sambandho. **Ayaṃ** īdisā **anuttānathavaṇṇanā** anuttānānaṃ padānaṃ atthassa vaṇṇanā **dāni** imasmimkāle bhavissatīti yojanā.

678. Paṭhame udakaṃ vasitaṃ acchādanaṃ anena katanti **udositoti** vacanatthena bhaṇḍasālā udositaṃ nāmāti dassento āha “udositanti bhaṇḍasālā”ti. Ettha hi **udasaddo** udakapariyāyo. Saṃyogo na ydttoyeva. **Bhaṇḍasālā**ti yānādīnaṃ bhaṇḍānaṃ ṭhapanasālā. **Accāvadathāti** ettha atīyūpasaggo atikkamanattho, atīyūpasaggo dhātvatthānuvattakoti āha “atikkamitvā vadathā”ti.

679. Ussayavasena vadaṇaṃ **ussayavādo**, soyeva **ussayavādikāti** dassento āha “ussayavādikā”tiādi. “Mānussayavasena kodhussayavasenā”ti iminā ussayabhedam dasseti. **Sāti** ussayavādikā. **Atthatotī** sarūpato. **Etthāti** padabhājane. Aḍḍanaṃ abhiyuñjanaṃ **aḍḍoti** katvā dvinnaṃ janānaṃ aḍḍo vohārikānaṃ vinicchayakāraṇaṃ hoti, tasmā vuttaṃ “aḍḍoti vohārikavinicchayo vuccatī”ti, muddhajatatīyakkharoyeva. **Yanti** aḍḍam. **Yatthāti** yasmim kismimci ṭhāne. Dvinnaṃ aḍḍakāraṇānaṃ vohāraṃ jānantīti **vohārikā**, akkhadassā, tesam. **Dvīsu janesūti** aḍḍakāraṇesu janesu dvīsu. **Yo kocīti** aḍḍakāraṇako vā añño vā yo koci.

Etthāti “ekassa ārocetī”tiādivacane. **Yattha katthacīti** yaṃkiñci ṭhānaṃ āgatepīti sambandho. **Athāti** pacchā. **Sāti** bhikkhunī. **Soti** upāsako.

“Kappiyakāraṇenā”tipadam “kathāpetī”tipade kāritakammaṃ. **Tatthāti** kappiyakāraṇaitaresu. Vohārikehi kateti sambandho. **Gatigatanti** cirakālapattam. **Sutapubbanti** pubbe sutam. **Athāti** sutapubbattā eva. **Teti** vohārikā, dentīti sambandho.

Paṭhamanti samanubhāsanato pubbam. **Āpattīti** āpajjanaṃ. **Etassāti** saṅghādisesassa. **Ayaṃ hīti** ayaṃ eva, vakkhamāno evāti attho. **Etthāti** padabhājane. **Saha vatthujjhācārāti** vatthujjhācārena saha, vākyameva, na samāso. **Vatthujjhācārāti** karaṇatthe nissakkavacanaṃ daṭṭhabbam. Tena vuttaṃ “saha vatthujjhācārenā”ti. **Bhikkhuninti** āpattimāpannaṃ bhikkhuniṃ. **Saṅghatotī** bhikkhunisaṅghamhā. Anīyasaddo hetukattābhīdhāyakoti āha “nissāretīti nissāraṇīyo”ti. Bhikkhunisaṅghato nissarati, nissāriyati vā anenāti **nissāraṇīyoti** karaṇatthopi yuttoyeva. **Tatthāti** padabhājane. **Yanti** saṅghādisesaṃ. **Soti** saṅghādiseso. Padabhājanassa attho kāraṇopacārena daṭṭhabbo. **Hīti** saccam. **Kenacīti** puggalena, na nissāriyatīti sambandho. Tena dhammena karaṇabhūtena, hetubhūtena vā. **Soti** dhammo.

Aḍḍakāraṇakamanussehi vuccamānāti yojanā. **Sayanti** sāmam. **Tatotī** gamanato, paranti sambandho. Bhikkhuniyā vā kataṃ ārocetūti yojanā.

Dhammikanti dhammena sabhāvena yuttam. **Yathāti** yenākārena. **Tanti** ākāraṃ. **Tatthāti** “anodissa ācikkhatī”ti vacane.

Dhuttādayoti ādisaddena corādayo saṅgaṇhāti. **Sāti** ācikkhanā. **Tanti** ācikkhanaṃ. **Tesanti** gāmadāraḍḍānaṃ. **Daṇḍanti** dhanadaṇḍam. **Gīvā hotīti** iṇam hoti. Adhippāye satipīti yojanā. **Tassāti**

anācāraṃ carantassa.

Kevalaṃ hīti kevalameva. **Tanti rakkhaṃ. Kāraketi** anācārassa kārake. **Tesa+?Nti** kārakānaṃ.

Tesanti harantānaṃ. “Anatthakāmatāyā”ti iminā bhayādinā vutte natthi dosoti dasseti. **Hīti** laddhadosajotako. **Attano vacanakaraṃ...pe... vattuṃ vaṭṭatīti** attano vacanaṃ ādiyissatīti vutte vacanaṃ anādiyitvā daṇḍe gahitepi natthi doso daṇḍagahaṇassa paṭikkhittattā. **Dāsadāsivāpiādīnanti** ādisaddena khettādayo saṅgayhanti.

Vuttanayenevāti atītaṃ ārabba ācikkhane vuttanayena eva. “Āyatim akaraṇatthāyā”ti iminā anāgataṃ ārabba odissa ācikkhānaṃ dasseti. “Kena evaṃ kata”nti pucchāya atīte katapubbaṃ pucchati. **Sāpīti** pisaddo vuttasampiṇḍanatto. **Hīti** saccaṃ, yasmā vā.

Vohārikā daṇḍentīti sambandho. **Daṇḍentīti** vadhadaṇḍena ca dhanadaṇḍena ca āṇaṃ karonti.

Yo cāyanti yo ca ayaṃ. Bhikkhunīnaṃ yo ayaṃ nayo vutto, eseva nayo bhikkhūnampi nayoti yojanā. “Eseva nayo”ti vuttavacanameva vitthārento āha “bhikkhunopi hī”tiādi. “Tathā”tiiminā “odissā”tipadaṃ atidisati. **Te cāti** te ca vohārikā. **Hīti** saccaṃ, yasmā vāti. Paṭhamāṃ.

2. Dutiyaśaṅghādisesaikkhāpadaṃ

682. Dutiye varitabbaṃ icchitabbanti **varam**, tameva bhaṇḍanti **varabhaṇḍanti** dassento āha “mahagghabhaṇḍa”nti. “Muttā”tiādinā tassa sarūpaṃ dasseti.

683. Āpubbo lokasaddo abhimukhaṃ lokanatto hoti, upubbo uddhaṃ lokanatto, opubbo adho lokanatto, vipubbo ito cito ca vītharaṇalokanatto, apapubbo āpucchanaṭṭho. Idha pana apapubbattā āpucchanaṭṭhoti āha “anāpucchitvā”ti. Mallagaṇa bhaṭṭiputta gaṇādikantiādisu **mallagaṇo** nāma nārāyanabhattiko gaṇo. **Bhaṭṭiputtagaṇo** nāma kumārabhattiko gaṇo. Ādisaddena aññampi gāmanigame anusāsituṃ samatthaṃ gaṇaṃ saṅgaṇhāti. Atha vā **mallagaṇoti** mallarājūnaṃ gaṇo. Te hi gaṇaṃ katvā kusiṇārāyaṃ rajjaṃ anusāsanti, te sandhāya vuttaṃ “mallagaṇo”ti. **Bhaṭṭiputtagaṇoti** licchavigaṇo pariyaṇantarena vutto. Licchavirājūnañhi pubbarājāno bhaṭṭināmakassa jaṭilassa puttā honti, tesam vaṃse pavattā etarahi licchavirājānopi bhaṭṭiputtāti vuccanti. Jaṭilo pana bārāṇasirañño putte nadisotena vuyhamāne nadito uddharitvā attano assame puttaṃ katvā bharaṇattā posanattā **bhaṭṭīti** vuccati, tassa puttattā licchavigaṇo **bhaṭṭiputtoti** vuccati. Tepi gaṇaṃ katvā vesāliyaṃ rajjaṃ anusāsanti, taṃ sandhāya vuttaṃ “bhaṭṭiputtagaṇo”ti. **Dhammagāṇo** nāma sāsanadhammabhattiko gaṇo. **Gandhikaseṇīti** gandhakārānaṃ samajātikānaṃ sippikānaṃ gaṇo. **Dussikaseṇīti** dussakārānaṃ samajātikānaṃ pesakārānaṃ gaṇo. Ādisaddena tacchakaseṇirajakaseṇiādayo saṅgayhanti. **Yattha yatthāti** yasmim yasmim thāne. **Hīti** saccaṃ. **Te evāti** gaṇādayo eva. Puna **teti** gaṇādayo. **Idanti** “gaṇaṃ vā”tiādivacanaṃ. **Etthāti** rājādīsu. Saṅghāpucchanaṃ padhānakāraṇanti āha “bhikkhunisaṅgho āpucchitabovā”ti. **Kappagatikanti** kappam gacchatīti kappagatā, sā eva kappagatikā, taṃ.

Kenaci karaṇīyena khaṇḍasīmaṃ agantvā kenaci karaṇīyena bhikkhunīsu pakkantāsūti yojanā. **Nissitakaparisāyāti** antevāsikaparisāya. **Vuṭṭhāpentiyāti** upasampādentiyāti. Dutiyaṃ.

3. Tatiyaśaṅghādisesaikkhāpadaṃ

692. Tatiye dutiyena pādena atikkantamatteti sambandho. Parikkhepārahaṭṭhānaṃ nāma gharūpacārato paṭhamaleḍḍupāto. Saṅkhepato vuttamatthaṃ vitthārato dassento āha “**api cetthā**”tiādi. **Etthāti** imasmim sikkhāpade. **Upacāre vāti** aparikkhittassa gāmassa parikkhepārahaṭṭhāne vā. **Tatoti** gāmantarato, khaṇḍapākārena vā vatichiddena vā pavisitunti sambandho.

Sambaddhā vati etesanti **sambaddhavatikā**, dve gāmā. **Vihāranti** bhikkhunivihāraṃ. **Tato pana gāmatoti** tato itaragāmato pana, nikkhantāya bhikkhuniyā ṭhātabbanti sambandho. **Ussāraṇā vāti** manussānaṃ ussāraṇā vā.

Janāti gāmaḥojakā janā. **Ekam gāmanti** yaṃkiñci icchitaṃ ekam gāmaṃ. **Tatoti** gāmato. “Kasmā”ti imāya pucchāya “vihārato ekam gāmaṃ gantuṃ vaṭṭati”ti vacanassa kāraṇaṃ pucchati. “Vihārassa catugāmasādhāraṇattā”tiiminā visajjanena taṃ puccham visajjeti.

Yatthāti yassaṃ nadiyaṃ. Uttarantiyā ekadvaṅgulamattampi antaravāsako temiyati, sā nadī nāmāti yojanā. Yathā nivasiyamānāya timaṅḍalapaṭicchādanam hoti, evaṃ nivatthāyāti yojanā. Bhikkhuniyā uttarantiyā antaravāsakoti sambandho. **Yattha katthacīti** yasmim kismiṃci ṭhāne. “Setunā gacchati, anāpattī”tiiminā padasā uttarantiyā eva āpattīti dasseti. **Uttaraṇakāleti** nadito uttaraṇakāle. **Ākāsagamananti** iddhiyā gamanaṃ. Ādisaddena hatthipiṭṭhiādayo saṅgaṇhāti. **Akkamantiyāti** atikkamantiyā. **Etthāti** dvīsu tīsu bhikkhunīsu. **Orimatīramevāti** apāratīrameva. **Tameva tīranti** orimatīrameva. **Paccuttaratīti** paṭinivattitvā uttarati.

Kurumānā bhikkhunī karotīti yojanā. **Assāti** bhikkhuniyā ajānantiyā eva cāti sambandho, anādare cetam sāmivacanaṃ. **Atha panāti** athasaddo yadipariyāyo, kiriyāpadena yojetabbo. Atha acchati, atha na otaratīti attho. **Acchatīti** vasati. **Hīti** saccam. **Idhāti** “ekā vā rattiṃ vippavaseyyā”tipade.

Evaṃ vuttalakkaṇamevāti evaṃ abhidhammapariyāyena vuttalakkaṇameva. **Taṃ panetanti** taṃ pana araṇṇam. **Tenevāti** āpannahetunā eva. **Aṭṭhakathāyanti** mahāaṭṭhakathāyaṃ. Bhikkhunīsu pavisaṅgāyanti sambandho, niddhāraṇatthe cetam bhummavacanaṃ. **Etthāti** dassanūpacārasavanūpacāresu. Yattha okāse ṭhitam dutiyikā passati, so okāso **dassanūpacāro nāmāti** yojanā. **Sānipākārantarikāpīti** sānipākārena byavahikāpī. Yattha okāse ṭhitā...pe... saddam suṇāti, so okāso **savanūpacāro** nāmāti yojanā. **Maggamūlhasaddenāti** magge mūlhanam saddena. **Dhammassavanārocanasaddenāti** dhammassavanatthāya ārocananam saddena. Maggamūlhasaddena saddāyantiyā saddam suṇāti viya ca dhammassavanārocanasaddena saddāyantiyā saddam suṇāti viya ca “ayye”ti saddāyantiyā saddam suṇātīti yojanā. **Saddāyantiyāti** saddam karontiyā. Nāmadhātu hesā. **Evarūpeti** “maggamūlhasaddena viyā”tiādinā vutte evarūpe.

Titthāyatanam saṅkantā vāti titthīnam vasaṭṭhānam saṅkantā vā. Iminā “**pakkhasaṅkantā**”ti ettha pakkhasaddassa paṭipakkhavācakattā tena sāsanaṇapaṭipakkhā titthiyā eva gahetabbāti dasseti. **Titthiyā** hi sāsanaṇa paṭipakkhā hontīti. Tatiyaṃ.

4. Catutthasaṅghādisesasikkhāpadaṃ

694. Catutthe pādassa ṭhapanakam pītham **pādapītham**. Pādassa ṭhapanakā kathalikā **pādakathalikāti** dassento āha “pādapītham nāmā”tiādi. **Anaṇṇāyāti** ettha yakāro tvāpaccayassa kāriyoti āha “ajānitvā”ti. **Netthāravatteti** ukkhepanīyakammato nittharaṇakāraṇe vatte. “Vattamāna”ntiiminā “vattanti”nti ettha antapaccayaṃ nayena dassetīti. Catuttham.

5. Pañcamasaṅghādisesasikkhāpadaṃ

701. Pañcame “**ekato avassute**”ti ettha heṭṭhā vuttanayena “ekato”ti sāmāññato vuttepi bhikkhuniyā eva gahetabbabhāvañca topaccayassa chaṭṭhutthe pavattabhāvañca avassubhapade bhāvatthañca dassetuṃ vuttam “bhikkhuniyā avassutabhāvo daṭṭhabbo”ti. **Etanti** “bhikkhuniyā avassutabhāvo”ti vacanaṃ. **Tanti** avacanaṃ. **Pāliyāti** imāya sikkhāpadapāliyāti. Pañcamam.

6. Chaṭṭhasaṅghādisesasikkhāpadaṃ

705. Chaṭṭhe **yato tvanti** ettha kāraṇatthe topaccayoti āha “**yasmā**”ti. **Kassā** **hontīti** uyyojikāuyyojitāsu kassā bhikkhuniyā **hontīti** yojanā. **Na detīti** uyyojikā uyyojitāya na deti. **Na paṭiggaṇhātīti** uyyojitā uyyojikāya hatthato na paṭiggaṇhātī. **Paṭiggaho tena na vijjatīti** teneva kāraṇena uyyojikāya hatthato uyyojitāya paṭiggaho na vijjati. **Āpajjati garukaṃ, na lahukanti** evaṃ santepi uyyojikā garukameva saṅghādisesāpattim āpajjati, na lahukaṃ. **Tañcāti taṃ āpajjanañca.** **Paribhogapaccayāti** uyyojikāya paribhogasaṅkhātā kāraṇāti ayaṃ gāthāyattho.

Itarissā panāti uyyojitāya pana bhikkhuniyā. **Paṭhamasikkhāpadeti** pañcamasikkhāpade. Pañcamasikkhāpadañhi iminā sikkhāpadena yugaḷabhāvena sadisattā imaṃ upādāya paṭhamanti vuttanti. Chaṭṭhaṃ.

7. Sattamasāṅghādisesasikkhāpadaṃ

709. Sattame **yāvattiyakapadatthoti** “yāvattiyaka”nti uccāritassa padassa attho veditabboti sambandhoti. Sattamaṃ.

8. Aṭṭhamasāṅghādisesasikkhāpadaṃ

715. Aṭṭhame **kismiṃcideva adhikaraṇeti** niddhāraṇīyassa niddhāraṇasamudāyena avinābhāvato āha “catunna”nti. Kasmā pana niddhāraṇasamudāyaniddhāraṇīyabhāvena vuttaṃ, nanu padabhājane cattāripi adhikaraṇāni vuttānīti āha “padabhājane panā”tiādīti. Aṭṭhamaṃ.

9. Navamasāṅghādisesasikkhāpadaṃ

723. Navame **samsaṭṭhasaddo** missapariyāyoti āha “missībhūtā”ti. “Ananulomenā”tiiminā “**ananulomikenā**”ti ettha ikasaddo svatthoti dasseti. Kottānañca pacanañca gandhapisanañca mālāganthanañca. Ādisaddena aññepi ananulomike kāyike saṅgaṇhātī. Sāsanāharaṇaṇca paṭisāsanaharaṇaṇca sañcarittaṇca. Ādisaddena aññepi ananulomike vācasike saṅgaṇhātī. **Etāsanti** bhikkhunīnaṃ. **Silokoti** yasoti. Navamaṃ.

10. Dasamasāṅghādisesasikkhāpadaṃ

727. Dasame **evācārāti** ettha niggahitalopavasena sandhīti āha “evaṃācārā”ti. “Yādiso”tiādīnā evaṃsaddassa nidassanādīsu (abhidhānappadīpikāyaṃ 1186 gāthāyaṃ) ekādasasu atthesu upamatthaṃ dasseti. **Sabbatthāti** “evaṃsaddā evaṃsilokā”ti sabbesu padesu. **Uññāyāti** ettha okāraviparīto ukāroti āha “avaññāyā”ti. “Nīcaṃ katvā jānanāyā”ti iminā avasaddo nīcattho, ñādhātu avabodhanatthoti dasseti. “Paribhavaññāyā”ti vattabbe uttarapadalopavasena “**paribhavenā**”ti vuttanti āha “paribhavivā jānanenā”ti. **Akkhantiyāti** ettha sahanakhantiyevādhīppetā, neva anulomakhanti, na diṭṭhīniijhānakkhantīti dassento āha “asahanatāyā”ti. **Vebhassiyāti** ettha visesena bhāseti obhāsetīti vibhāso ānubhāvo, vibhāso imassa saṅghassa atthīti vibhasso saṅgho, bahvatthe ca atisayatthe ca sapaccayo hoti. Kasmā? Mantupaccayatthattā “lomaso”tiādīsu (jā. 1.14.57) viya, bahuānubhāvo atisayaānubhāvo saṅghoti vuttaṃ hoti, saṃyogaparattā ākārasa rasso. Vibhassassa bhāvo vebhassiyaṃ, bahuānubhāvo atisayaānubhāvoyeva. Iti imamattaṃ dassento āha “balavabhassabhāvenā”ti. Tattha balavaiti padena mantuatthe pavattassa sappaccayassa bahvatthañca atisayatthañca dasseti, bhāvaiti padena ṇiyapaccayassa bhāvattaṃ, enaiti padena nissakkavacanassa karaṇatthe pavattabhāvaṃ dasseti. Tamevatthamāvīkaronto āha “attano balavappakāsanenā”ti. Tattha **attanoti** attasaṅkhātassa saṅghassa. **Balavappakāsanenāti** bahuānubhāvappakāsanena, atisayaānubhāvappakāsanena vā. Balavappakāsanam nāma atthato paresaṃ samutrāsanamevāti āha “samutrāsanevāti attho”ti. **Dubbalabhāvenāti** ettha bhāvaitipadena ṇiyapaccayassa bhāvattaṃ, enaitipadena nissakkavacanassa karaṇattaṃ dasseti diṭṭhabbaṃ. **Sabbatthāti** “uññāyā”tiādīsu sabbesu padesu. Casaddo luttaniddiṭṭhoti āha “evaṃ samuccayattho daṭṭhabbo”ti. **Viviccathāti** ettha vītyūpasaggo vināsaddattho, vicadhātu sattatthoti āha

“vinā hothā”ti. Dasamaṃ.

Anantarā pakkhipitvāti sambandho. Mahāvibhaṅgato āharitāni imāni tīṇi sikkhāpadānīti yojanā. Nava paṭhamāpattikā veditabbāti sambandho. Sabbepi dhammāti yojanā. **Etthāti** “uddiṭṭhā kho”tiādipāṭhe. **Taṃ panāti** pakkhamānattaṃ panāti.

Iti samantapāsādikāya vinayasamvannaṇāya

Bhikkhunivibhaṅge

Sattarasakavaṇṇanāya yojanā samattā.

3. Nissaggiyakaṇḍaṃ

1. Paṭhamanissaggiyapācittiyasikkhāpada-atthayojanā

Tiṃsa nissaggiyā ye dhammā bhikkhunīnaṃ bhagavatā pakāsītā, tesam dhammānaṃ **dāni** imasmim kāle ayaṃ samvannaṇākkamo bhavatīti yojanā.

733. Paṭhame **āmattikāpaṇanti** ettha āmattasaddo bhājanapariyāyoti āha “bhājanānī”ti. Bhājanāni hi amanti paribhuñjitabbabhāvaṃ gacchantīti “**amattānī**”ti vuccanti. Amattāni vikkiṇantīti “**āmattikā**”ti vacanatthaṃ dassento āha “**tānī**”tiādi. **Tesanti** āmattikānaṃ. **Taṃ vāti** āmattikāpaṇaṃ vā.

734. “Sannidhi”nti iminā samnipubbo cisaddo ucinanatthoti dasseti. **Hisaddo** visesajotako. **Tatthāti** mahāvibhaṅge. **Idhāti** bhikkhunivibhaṅge.

Idampīti idaṃ sikkhāpadaṃ. Pisaddo mahāvibhaṅgasikkhāpadaṃ apekkhatīti. Paṭhamam.

2. Dutyanissaggiyapācittiyasikkhāpadaṃ

738. Dutie ahatacoḷānampi sedamalādikilinne virūpattā “jiṇṇacoḷā”ti vuttaṃ. “Api ayyāhi”tiiminā “apa ayyāhi”tipadavibhāgaṃ nivatteti.

740. Sabbampi etaṃ cīvaranti yojanā. **Evaṃ paṭiladdhanti** evaṃ nissajjitvā laddhaṃ. **Yathādāneyevāti** yathā dāyakehi dinnam, tasmim dāneyeva upanetabbaṃ, akālacīvareyeva pakkhipitabbanti atthoti. Dutiyam.

3. Tatiyanissaggiyapācittiyasikkhāpadaṃ

743. Tatiye **handasaddo** vavassaggatthe nipātoti āha “handāti gaṇhā”ti. Bahūni nissaggiyānīti sambandho. **Samharitvāti** visuṃ visuṃ saṅgharitvāti. Tatiyam.

4. Catutthanissaggiyapācittiyasikkhāpadaṃ

748. Catutthe kiṇāti anenāti **kayanti** vacanatthena mūlaṃ kayam nāmāti āha “mūlenā”ti. **Sāti** thullanandā, āha kirāti sambandho. Nādhātuyā avabodhanatthato aññampi **ñādhātuyā** yācanatthaṃ dassento āha “yācitvā vā”ti.

752. Yanti sabbitelādi. **Taññevāti** sabbitelādimeva. **Yamakanti** sabbiṃ saha telena yugaḷam katvā.

Vejjenāti bhisakkena. So hi āyubbedasañkhātaṃ vijjaṃ jānātīti **vejjo**ti ca rogañca tassa nidānañca bhesajjañca vidati jānātīti **vejjo**ti ca vuccati. **Tatoti** vejjena vuttakāraṇā. **Kahāpaṇassā**ti kahāpaṇena, ābhatanti sambandhoti. Catutthaṃ.

5. Pañcamanissaggiyapācittiyasikkhāpadaṃ

753. Pañcame **sā**ti sikkhamānā. **Ayanti** sikkhamānā. **Addhā**ti ekamsena. “**Cetāpetvā**”ti ettha citisaddo jānanatthoti āha “jānāpetvā”ti. Pañcamaṃ.

6. Chaṭṭhanissaggiyapācittiyasikkhāpadaṃ

758. Chaṭṭhe chandaṃ uppādetvā gahitaṃ **chandakanti** vacanatthaṃ dassento āha “chandaka”ntiādi. **Dhammakiccanti** puññakaraṇīyaṃ. **Dhammasaddo** hettha puññavācako. **Yanti** vatthum. **Paresanti** attanā aññesaṃ. “**Eta**”nti “chandaka”nti etaṃ nāmaṃ. “Aññassatthāya dinnenā”tiiminā aññassa attho **aññadattho**, dakāro padasandhikaro, tadatthāya dinno **aññadatthikoti** vacanatthaṃ dasseti. “Aññaṃ uddisitvā dinnenā”tiiminā aññaṃ uddisitvā dinnaṃ **aññuddisikanti** vacanatthaṃ dasseti. “Saṅghassa pariccattēnā”ti iminā saṅghassa pariccatto **saṅghikoti** vacanatthaṃ dasseti.

762. **Yadatthāyā**ti yesaṃ cīvarādīnaṃ atthāya. Yasaddena samāsabhāvato pubbe niggahitāgamo hoti. **Tanti** cīvarādikaṃ. **Tumhehī**ti dāyake sandhāya vuttaṃ. **Upaddavesū**ti dubbhikkhādiupasaggesu. **Yaṃ vā taṃ vā**ti cīvaraṃ vā aññe vā piṇḍapātādiketi yaṃ vā taṃ vāti. Chaṭṭhaṃ.

7. Sattamanissaggiyapācittiyasikkhāpadaṃ

764. Sattame **saññācikenā**ti ettha saṃsaddassa sayamatthe pavattibhāvaṃ dassetuṃ vuttaṃ “sayāṃ yācitakenā”ti. **Etadevā**ti “saññācikenā”ti padameva. **Etthā**ti imasmiṃ sikkhāpadeti. Sattamaṃ.

8. Aṭṭhamanissaggiyapācittiyasikkhāpadaṃ

769. Aṭṭhame **gaṇassā**ti bhikkhuniṅgaṇassa. Iminā “**mahājanikenā**”ti ettha bhikkhuniṅgaṇova mahājanoti adhippetoti dīpetīti. Aṭṭhamaṃ.

9. Navamanissaggiyapācittiyasikkhāpadaṃ

774. Navame **itoti** imasmā aṭṭhamasikkhāpadato. **Adhikataranti** atirekataranti. Navamaṃ.

10. Dasamanissaggiyapācittiyasikkhāpadaṃ

778. Dasame “vinassatī”tiiminā “**undriyatī**”ti ettha udidhātuyā nassanatthaṃ dasseti dhātūnamanekatthattā. **Paripatatī**ti parigalitvā patati. Iminā nassanākāraṃ dasseti. **Ettakamevā**ti etaṃ parimāṇaṃ dvipadamevāti. Dasamaṃ.

11. Ekādasamanissaggiyapācittiyasikkhāpadaṃ

784. Ekādasame **garupāvuraṇaṃ** nāma sītakāle pāvuraṇavatthanti dassento āha “sītakāle pāvuraṇa”nti. Sītakāle hi manussā thūlapāvuraṇaṃ pārupanti. “Catukkaṃsaparama”nti ettha **kamsasaddo** bhūñjanapatte ca suvaṇṇādilohavisese ca catukahāpaṇe cāti tīsu atthesu dissati, idha pana catukahāpaṇe vattatīti dassento āha “kaṃso nāma catukahāpaṇiko hotī”ti. Catukkaṃsasāñkhātaṃ

paramaṃ imassāti **catukkaṃsaparamaṃ**, soḷasakahāpaṇagghanakaṃ pāvuraṇanti atthoti. Ekādasamaṃ.

12. Dvādasamanissaggiyapācittiyasikkhāpadaṃ

789. Dvādasame **lahupāvuraṇaṃ** nāma uṇhakāle pāvuraṇavattanti dassento āha “uṇhakāle pāvuraṇa”nti. Uṇhakāle hi manussā sukhumaṃpāvuraṇaṃ pārupantīti. Dvādasamaṃ.

Nissaggiyānaṃ tiṃsabhāvaṃ dassento āha “mahāvibhaṅge”tiādi. Cīvaravaggato apanetvāti sambandho. **Aññadatthikānīti** aññadatthikapadena vuttāni sikkhāpadāni. **Itīti** evaṃ. **Ekatopaññattānīti** ekasseva paññattāni, **ubhatopaññattānīti** ubhayesaṃ paññattāni. **Etthāti** “uddiṭṭhā kho”tiādivacaneti.

Iti samantapāsādikāya vinayasaṃvaṇṇanāya

Bhikkhunivibhaṅge

Tiṃsakavaṇṇanāya yojanā samattā.

4. Pācittiyakaṇḍaṃ

1. Lasuṇavaggo

1. Paṭhamasikkhāpada-atthayojanā

Tiṃsakānantaraṃ tiṃsakānaṃ anantare kāle **chasaṭṭhisatasāṅgahā** chauttarasaṭṭhiadhikasatehi sikkhāpadehi saṅgahitā ye dhammā saṅgītikārehi saṅgītā, **dāni** imasmiṃ kāle tesampi dhammānaṃ ayaṃ vaṇṇanā hotīti yojanā.

793. Tatthāti tesu chasaṭṭhisatasāṅgahesu sikkhāpadesu, paṭhamasikkhāpadeti sambandho. “Dve tayo”ti ettha vāsaddo luttaniddiṭṭhoti āha “dve vā tayo vā”ti. **Phoṭalake**ti kande, miṅge vā. **Etanti** “gaṇḍike”ti etaṃ nāmaṃ. “Pamāṇa”ntiiminā **mattasaddo** pamāṇatthova, na appattho, nāpi avadhāraṇatthoti dasseti. **Lasuṇanti** setavaṇṇamūlaṃ mahākandaṃ. Mahākando hi byañjanasampākādīsu āmagandhānaṃ abhibhavanattā lasīyati kantīyatīti **lasuṇanti** vuccati.

Suvaṇṇahaṃsayoninti suvaṇṇamayena pattena yuttaṃ haṃsayoniṃ. **Jātissaroti** jātiṃ bhavaṃ sarati jānātīti jātissaro. **Athāti** jātissarassa nipphannattā. Nipphannattho hi athasaddo. **Pubbasinehenāti** pubbe manussabhava bhāvitena sinehena. **Tāsanti** pajāpatiyā ca tissannaṃ dhītarānañca. **Taṃ panāti** pattaṃ pana.

795. Magadhesūti magadharatṭhe ṭhitesu janapadesu. **Hīti** saccam, yasmā vā. **Idhāti** “lasuṇaṃ khādeyyā”tipade. **Tampīti** māgadhakampi. **Gaṇḍikalasuṇamevāti** gaṇḍo phoṭo etassatthīti gaṇḍikaṃ. Gaṇḍasaddo hi phoṭapariyāyo, bahutthe ikapaccayo. Bahugaṇḍikalasuṇanti hi vuttaṃ hoti. Gaṇḍasaddo hi phoṭe ca kapole cāti dvīsu atthesu vattati, idha pana phoṭe vattatīti daṭṭhabbaṃ. Potthakesu pana oṭṭhajena catutthakkharena pāṭho atthi, so vīmaṃsitvā gaḥetabbo. Bahūsu hi pubbapothakesu kaṇṭhajo tatiyakkharo ca oṭṭhajo catutthakkharo cāti dve akkharā aññamaññaṃ parivattitvā tiṭṭhanti. **Na ekadvitimiñjakanti** ekamiñjo palaṇḍuko na hoti, dvimiñjo bhañjanako na hoti, timiñjo haritako na hotīti attho. Kurundiyaṃ pana vuttanti sambandho. **Saṅkhāditvāti** dantehi cuṇṇavicuṇṇaṃ katvā.

797. Palaṇḍukoti sukandako eko lasuṇaviseso. **Bhañjanakādīni** lokasaṅketopadesato daṭṭhabbāni. **Hīti** saccam. **Tassāti** cāpalasuṇassa. **Sabhāvenevāti** sūpasampākādiṃ vinā attano sabhāvato eva. **Tanti**

māgadhakaṃ, pakkhipitunti sambandho. **Hīti** saccam. **Yattha katthacīti** yesu kesucīti. Paṭhamam.

2. Dutiyasikkhāpadam

799. Dutīye saṃdassanaṃ bādhati nisedheti asmiṃ ṭhāneti **sambādhanti** vacanatthena paṭicchannokāso sambādho nāmāti dassento āha “paṭicchannokāse”ti. **Ubho upakacchakāti** dve bāhumulā. Te hi upari yaṃkiñci vatthum kacati bandhati etthāti **upakacchakāti** vuccanti. **Muttakaraṇanti** passāvamaggo. So hi muttam karoti anenāti muttakaraṇanti vuccati. Lomo kattiyati chindiyati imāyāti **kattari**, tāya vā, suṭṭhu dalham lomam ḍamsatīti **saṇḍāso**, soyeva **saṇḍāsako**, tena vā, khurati lomam chindatīti **khuro**, tena vā saṃharāpentiyāti sambandho. **Saṃharāpentiyāti** apantiyāti. Dutiyam.

3. Tatiyasikkhāpadam

803. Tatiye **muttakaraṇatalaghātaneti** muttakaraṇassa talaṃ hananaṃ paharaṇam muttakaraṇatalaghātaṇam, tasmim muttakaraṇatalaghātane nimittabhūte. **Tāva mahantanti** ativiya mahantaṃ. **Kesarenāpīti** kiñjakkenāpi. So hi ke jale sarati pavattatīti kesaroti vuccati.

805. Gaṇḍam vāti pīlakam vā. **Vaṇam vāti** arum vāti. Tatiyam.

4. Catutthasikkhāpadam

806. Catutthe rañño orodhā **rājorodhā**, purāṇe rājorodhā **purāṇarājorodhāti** vacanattham dassento āha “purāṇe”tiādi. “Gihibhāve”ti iminā purāṇeti ettha ṇapaccayassa sarūpaṃ dasseti. **Cirāciranti** nipātaṇṇirūpakam. Tena vuttam “cirena cirenā”ti. “Sakkothā”ti iminā katham tumhe rāgacittam paṭihanitvā attānaṃ **dhāretha** dhāretum sakkothāti attham dasseti. **Anārocitepīti** bhūtato anārocitepi.

807. Jatunāti lākhāya. **Paṭṭhadaṇḍaketi** paṭubhāvena ṭhāti pavattatīti **paṭṭho**, soyeva daṇḍo **paṭṭhadaṇḍo**, tassa pavesanaṃ paṭṭhadaṇḍakam, tasmim nimittabhūte. **Etanti** “jatumaṭṭhake”ti etaṃ vacananti. Catuttham.

5. Pañcamasikkhāpadam

810. Pañcame “**atigambhīra**”ntipadam kiriyāvīsesananti āha “atianto pavesetvā”ti. “Udakena dhovanaṃ kurumānā”ti iminā “**udakasuddhika**”ntipadassa udakena suddhiyā karaṇanti attham dasseti.

812. Dvaṅgulapabbaparamanti ettha dve aṅgulāni ca dve pabbāni ca dvaṅgulapabbaṃ, uttarapade pubbapadalopo. Dvaṅgulapabbaṃ paramam pamāṇam etassa udakasuddhikassāti dvaṅgulapabbaparamam. Vitthārato dvaṅgulaparamam, gambhīrato dvipabbaparamanti vuttam hoti. Tenāha “vitthārato”tiādi. Aṅgulam pavesentiyāti sambandho. **Hīti** saccam. “Catunnam vā”ti idaṃ ukkaṭṭhavasena vuttam, tiṇṇampi pabbaṃ na vaṭṭati, catunnam pana pagevāti atthoti. Pañcamam.

6. Chaṭṭhasikkhāpadam

815. Chaṭṭhe bhattassa vissajjanaṃ **bhattavissaggoti** vutte bhattakiccanti dassento āha “bhattakicca”nti. Pāṇiyasaddena pāṇiyathālakaṃ gahetabbaṃ, vidhūpanasaddena bījanī gahetabbā, **upasaddo** samīpatthoti sabbam dassento āha “ekena hatthenā”tiādi. “**Accāvadatī**”tipadassa atikkamitvā vadanākāram dasseti “pubbepī”tiādinā.

817. “Suddhauḍakamaṃ vā hotū”tiādinā “pānīyena”ti vacanaṃ upalakkhaṇaṃ nāmāti dasseti. **Dadhimatthūti** dadhimaṇḍamaṃ dadhino sāro, dadhimhi pasannodakanti vuttaṃ hoti. **Rasoti** maccharaso maṃsaraso. “Antamaso cīvarakaṇṇopi”ti iminā “vidhūpanena”ti vacanaṃ nidassanaṃ nāmāti dasseti.

819. Detīti sayamaṃ deti. **Dāpetīti** aññena dāpeti. **Ubhayampīti** pānīyavidhūpanadvayampīti. Chaṭṭhaṃ.

7. Sattamasikkhāpadaṃ

822. Sattame “payogaḍukkaṭaṃ nāmā”ti iminā heṭṭhā vuttasu aṭṭhasu ḍukkaṭesu pubbaṃpayogaḍukkaṭaṃ dasseti. Na kevalaṃ pubbaṃpayogaḍukkaṭaṃ ettakameva, atha kho aññampi bahu hotīti dassento āha “tasmā”tiādi. **Saṅghaṭṭanesupīti** viloḷanesupi. **Dantehi saṅkhādatīti** dantehi cuṇṇavicuṇṇaṃ karoti. **Etthāti** imasmiṃ sikkhāpade, aññāya bhikkhuniyā kārapetvāti sambandho. “Aññāyā”tipadaṃ “viññāpetvā”ti pade kāritakammaṃ. **Mātarampīti** ettha pisaddo aññaṃ viññāpetvā bhujjantiyā pagevāti dasseti. **Tāya vāti** viññāpitabhikkhuniyā vā. **Tanti** āmakadhaññaṃ. **Tanti** mahāpaccariyaṃ vuttavacanaṃ. **Pubbāparaviruddhanti** pubbāparato viruddhaṃ. “Aññāya...pe... ḍukkaṭamevā”ti pubbavacane ḍukkaṭameva vuttaṃ, puna “aññāya...pe... ḍukkaṭa”nti ca pacchimavacane pācittiyañca ḍukkaṭañca vuttaṃ, tasmā pubbāparaviruddhanti vuttaṃ hoti. **Hīti** saccamaṃ, yasmā vā.

823. Labbhamānaṃ āmakadhaññanti sambandho. **Aññaṃ vā yaṃkiñcīti** muggamāsādīhi vā lābukumbhaṇḍādīhi vā aññaṃ yaṃkiñci tilādiṃ vāti. Sattamaṃ.

8. Aṭṭhamasikkhāpadaṃ

824. Aṭṭhame **nibbiṭṭharājabhaṭoti** ettha uttarapadassa chaṭṭhīsamaśaṅca pubbaṃpadena bāhiratthasamaśaṅca dassento āha “nibbiṭṭho”tiādi. Tatha “rañño bhaṭi”ti iminā rañño bhaṭo **rājabhaṭoti** chaṭṭhīsamaśaṃ dasseti, “etenā”ti iminā bāhiratthasamaśaṃ. **Nibbiṭṭhoti** nivīṭṭho patiṭṭhāpitoti attho. **Keṇīti** rañño dātabbassa āyassetamadhivacanaṃ. **Etenāti** brāhmaṇena. **Tatoti** ṭhānantarato. Bhaṭasaṅkhātāya keṇiyā pathattā kāraṇattā ṭhānantaraṃ **bhaṭapathanti** āha “taṃyeva ṭhānantara”nti.

826. Cattāripi vatthūnīti uccārādīni. **Pāṭekkanti** paṭivisuṃ ekekameva. **Uccāraṃ vāti**ādīsū vāsaddena dantakaṭṭhādayopi gahetabbāti āha “dantakaṭṭha...pe... pācittiyamevā”ti. **Sabbatthāti** sabbesu uccārādīsūti. Aṭṭhamaṃ.

9. Navamasikkhāpadaṃ

830. Navame **ropimaharitaṭṭhāneti** ropimaṭṭhāne ca haritaṭṭhāne ca. Ropiyati asminti ropiyaṃ, taṃyeva **ropimaṃ** yakārassa makāraṃ katvā. **Etānīti** uccārādīni. **Sabbesanti** bhikkhubhikkhūnaṃ. **Yattha panāti** yasmiṃ khetteti. Navamaṃ.

10. Dasamasikkhāpadaṃ

835. Dasame **sonḍā vāti** surāsonḍā vā. **Moroti** mayūro. **Suvoti** suko. **Makkaṭoti** vānaro. Ādisaddena sappādayo saṅgaṇhāti, makkaṭādayopi naccantūti sambandho. **Asaṃyatabhikkhūnanti** vācasikakamme asaṃyatānaṃ bhikkhūnaṃ, dhammabhāṇakagītaṃ vā hotūti yojanā. Tantiyā guṇena baddhā **tantibaddhā**. “Bhi”ntisaṅkhāto rāsaddo etissāti **bheri**. Kuṭena katā bheri **kuṭabheri**, tāya vāditaṃ **kuṭabherivāditaṃ**, taṃ vā. **Udakabherīti** udakena pakkhittā bheri, tāya vāditaṃ hotūti sambandho.

836. Tesam̐yevāti yesam̐ naccam̐ passati, tesam̐yeva. Yadi pana naccagītavādite visum̐ visum̐ passati suṇāti, pāṭekkā āpattiyoti dassento āha “sace panā”tiādi. **Aññatoti** aññato desato, passatīti sambandho. “Oloketvā”ti pade apekkhite upayogatthe topaccayo hoti. Aññam̐ oloketvāti hi attho. Aññato vādente passatīti yojanā. Bhikkhunī na labhatīti sambandho. Aññe vattumpīti sambandho. **Upahāranti** pūjam̐. **Upaṭṭhānanti** pāricariyam̐. **Sabbatthāti** sabbesu sayam̐ naccādīsu.

837. Antarārāme vāti ārāmassa antare vā. **Bahiārāme vāti** ārāmassa bahi vā. **Aññena vāti** salākabhattādīhi aññena vā. **Tādisenāti** yādiso corādiupaddavo, tādisenāti. Dasamam̐.

Lasuṇavaggo paṭhamo.

2. Andhakāravaggo

1. Paṭhamasikkhāpada-atthayojanā

839. Andhakāravaggassa paṭhame **appadīpeti** upalakkhaṇavasena vuttatā aññepi ālokā gahetabbāti dassento āha “padīpacandasūriyaaggīsū”tiādi. **Assāti** “appadīpe”tipadassa.

841. Narahoassādāpekkhā hutvā ca rassādato aññavihitāva hutvā cāti yojanā. Iminā “santiṭṭhati vā sallapati vā”ti pade kiriyāvisesanabhāvam̐ dasseti. **Dānena vā** nimittabhūtena, **pūjāya vā** nimittabhūtāya mantetīti yojanāti. Paṭhamam̐.

2. Dutiyasikkhāpadaṃ

842. Dutiye idameva padaṃ nānanti sambandhoti. Dutiyaṃ.

3. Tatiyasikkhāpadaṃ

846. Tatiye “idamevā”ti padaṃ anuvattetabbam̐. **Tādisamevāti** paṭhamasadisamevāti atthoti. Tatiyaṃ.

4. Catutthasikkhāpadaṃ

850. Catutthe kaṇṇassa samīpaṃ **nikaṇṇam̐**, tameva **nikaṇṇikanti** vutte kaṇṇamūlanti āha “kaṇṇamūlam̐ vuccatī”ti. “Kaṇṇamūle”ti iminā “nikaṇṇika”nti ettha bhummattthe upayogavacananti dasseti. **Āharaṇatthāyāti** āharāpanatthāyāti. Catuttham̐.

5. Pañcamasikkhāpadaṃ

854. Pañcame **tesanti** gharasāmikānam̐. **Gharampīti** na kevalam̐ āsanameva, gharampi sodhemāti attho. **Tatoti** parivitakkanato, paranti sambandho.

858. Corā vā utṭhitā hontīti yojanāti. Pañcamam̐.

6. Chaṭṭhasikkhāpadaṃ

860. Chaṭṭhe **abhiniṣideyyāti** ettha abhisaddo upasaggamattovāti dassento āha “nisideyyā”ti. Eseva nayo **abhinipajjeyyāti** etthāpi. Dve āpattiyoti sambandhoti. Chaṭṭham̐.

7. Sattamasikkhāpadaṃ

864. Sattame **sabbanti** sakalaṃ vattabbavacananti. Sattamaṃ.

8. Aṭṭhamasikkhāpadaṃ

869. Aṭṭhame anuttānavacanamaṃ natthīti. Aṭṭhamaṃ.

9. Navamasikkhāpadaṃ

875. Navame **abhisapeyyā**ti ettha sapaḍhātussa akkosanattaṃ antokatvā karadhātuyā atthaṃ dassento āha “sapaḍhaṃ kareyyā”ti. **Niraye nibbattāmhī**ti ahaṃ niraye nibbattā amhīti yojanā. **Niraye nibbattatū**ti eṣā bhikkhunī niraye nibbattatūti yojanā. **Īdisā hotū**ti mama sadisā hotūti attho. **Kāṇā**ti ekakkhikāṇā, dvakkhikāṇā vā. **Kuṇṭi**ti hatthapādādivaṅkā.

878. **Edisā**ti virūpādijātikā. **Viramassū**ti viramāhi. **Addhā**ti dhuvanti. Navamaṃ.

10. Dasamasikkhāpadaṃ

879. Dasame anuttānaṭṭhānaṃ natthīti. Dasamaṃ.

Andhakāravaggo dutiyo.

3. Naggavaggo

1. Paṭṭhamasikkhāpada-atthayojanā

883. Naggavaggassa paṭṭhame **brahmacariyena ciṅṅenā**ti ciṅṅena brahmacariyena kiṃ nu kho nāmāti attho. “Brahmacariyassa caraṇenā”ti iminā ciṅṅasaddassa caraṇaṃ **ciṅṅanti** vacanattaṃ dasseti. “Na aññaṃ cīvara”nti iminā evattaṃ dasseti, aññaṭṭhāpohanaṃ vāti. Paṭṭhamaṃ.

2. Dutiyasikkhāpadaṃ

887. Dutie anuttānaṭṭhānaṃ natthīti. Dutiyamaṃ.

3. Tatiyasikkhāpadaṃ

893. Tatie **anantarāyikinī**ti ettha natthi antarāyo etissāti anantarāyā, sā eva anantarāyikinīti vacanattaṃ dassento āha “anantarāyā”ti. Tatiyamaṃ.

4. Catutthasikkhāpadaṃ

898. Catutthe **pañcāhanti** samāhāradigu, ṇikapaccayo svattho. **Saṅghāticāroti**ettha kenatṭhena saṅghāṭi nāma, cārasaddo kimatthoti āha “paribhogavasena vā”tiādi. Tattha **saṅghaṭitaṭṭhenā**ti saṃharitaṭṭhena. Iminā “kenatṭhena saṅghāṭi nāmā”ti pucchaṃ visajjeti. “Parivattana”nti iminā “cārasaddo kimattho”ti codanaṃ pariharati. **Pañcasū**ti ticīvaraṃ udakasāṭikā saṃkaccikāti pañcasūti. Catutthaṃ.

5. Pañcamasikkhāpadaṃ

903. Pañcame “cīvarasaṅkamanīya”ntiettha saṅkametabbaṃ paṭidātābanti **saṅkamanīyanti** kamudhātussa paṭidānattaṃ anīyasaddassa kammaṭṭhaṅca, ‘cīvaraṅca taṃ saṅkamanīyaṅce’ti

cīvarasaṅkamanīyanti visesanaparapadabhāvaṅca dassento āha “saṅkametabbaṃ cīvara”nti. Tattha “saṅkametabbaṃ cīvara”nti iminā kammattaṅca visesanaparapadabhāvaṅca dasseti. “Paṭidātabbacīvara”nti iminā kamudhātuyā atthaṃ dasseti adhippāyavasenāti. Pañcamaṃ.

6. Chaṭṭhasikkhāpadaṃ

909. Chaṭṭhe “aññaṃ parikkhāra”ntiettha parikkhārassa sarūpaṃ dassento āha “yaṃkiñcī”tiādi. Yaṃkiñci aññataranti sambandho. **Kittakamaḡḡhanakanti** kiṃ pamāṇena agghena arahaṃ cīvaraṃ. **Dātukāmatthāti** tumhe dātukāmā bhavathāti attho. **Katipāhenāti** katipayāni ahāni katipāhaṃ, yakāralopo. **Katipayasaddo**hi dvitivācako rūlḡhīsaddo, tena katipāhena. **Samagghanti** appagghaṃ. **Sam**saddo hi appatthavācakoti. Chaṭṭhaṃ.

7. Sattamasikkhāpadaṃ

911. Sattame “vipakkamiṃsū”ti ettha vividhaṃ ṭhānaṃ pakkamiṃsūti dassento āha “tattha tattha agamaṃsū”ti. Amhākampi āgamananti sambandho.

915. **Katipāhena uppajjissatīti** katipāhena cīvaraṃ uppajjissati. **Tatoti** tasmīṃ cīvaruppajjanakāletī. Sattamaṃ.

8. Aṭṭhamasikkhāpadaṃ

916. Aṭṭhame ye nāṭakaṃ nāṭenti, te **naṭā** nāmāti yojanā. Iminā naṭakaṃ nāṭentīti **naṭāti** vacanatthaṃ dasseti. Ye naccanti, te nāṭakā nāmāti yojanā. Iminā sayam naṭantīti **nāṭakāti** vacanatthaṃ dīpeti. **Vaṃsavarattādīsūti** ettha **vaṃso** nāma veṇu. **Varattā** nāma naddhikā. Ādisaddena rajjuādayo saṅgaṇhāti. Ye laṅghanakammaṃ karonti, te **laṅghakā** nāmāti yojanā. **Māyākārāti** ettha māyā nāma mayanāmakena asurena sure calayitum katattā mayassa esāti māyā, taṃ karotīti māyākāro, mayanāmako asuroyeva. Aññe pana rūlḡhīvasena “māyākārā”ti vuccanti. Sokena jhāyanaṃ ḡayhanaṃ **sokajjhāyaṃ**, surānaṃ sokajjhāyaṃ karotīti **sokajjhāyiko**, mayanāmako asuroyeva. Aññe pana rūlḡhīvasena “sokajjhāyikā”ti vuccanti. Iti imamatthaṃ dassetuṃ vuttaṃ “sokajjhāyikā nāma māyākārā”ti. **Kumbhathuṅikā nāmāti** ettha vissaṭṭhattā thavīyatīti **thuṅo**, saddo. Kumbhassa thuṅo **kumbhathuṅo**. Tena kīḡantīti **kumbhathuṅikā**, iti imamatthaṃ dasseti “ghaṭakena kīḡanakā”ti iminā. **Bimbisakanti** caturassaambaṇatāḡanaṃ, taṃ vādentīti **bimbisakavādakāti**. Aṭṭhamaṃ.

9. Navamasikkhāpadaṃ

921. Navame **tesanti** ye “na mayaṃ ayye sakkomā”ti vadanti, tesam. **Dassatīti** acchādessatīti. Navamaṃ.

10. Dasamasikkhāpadaṃ

927. Dasame **yassāti** kathinassa. **Ubbhāramūlakoti** uddhāramūlako. **Saddhāparipālanatthanti** kathinuddhāraṃ yācantassa saddhāya paripālanatthanti. Dasamaṃ.

Naggavaggo tatiyo.

4. Tuvaṭṭavaggo

1. Paṭhamasikkhāpada-atthayojanā

933. Tuvattavaggassa paṭhame “tuvatta nipajjāya”nti dhātupāṭhesu (saddanītidhātumālāyaṃ 18 ṭakārantadhātu) vuttattā “tuvatteyyunti nipajjeyyu”nti vuttanti. Paṭhamam.

2. Dutiyasikkhāpadaṃ

937. Dutīye **ekattaraṇapāvuraṇa**ntiettha uttarapadānaṃ dvandabhāvaṃ, pubbapadena ca bāhiratthasamāsabhāvaṃ dassetuṃ vuttaṃ “eka”ntiādi. Tattha ceva, casaddehi dvandabhāvaṃ dīpeti, “etāsa”ntiiminā bāhiratthasamāsabhāvaṃ. **Etanti** “ekattaraṇapāvuraṇā”ti etaṃ nāmanti. Dutīyaṃ.

3. Tatiyasikkhāpadaṃ

941. Tatiye **uḷārakulā**ti jātisetṭhakulā, issariyabhogādīhi vā vipulakulā. **Guṇehī**ti sīlādiguṇehi. “Uḷārāti sambhāvītā”ti iminā itilopatulyādhikaraṇasamāsaṃ dasseti.

“Abhibhūtā”ti iminā “**apakatā**”ti ettha karadhātu sabbadhātvatthavācīpi idha apapubbattā visesato abhibhavanatthe vattatīti dasseti. **Etāsanti** bhikkhunīnaṃ. “Saññāpayamānā”ti iminā saññāpanaṃ **saññattī**ti vacanatthaṃ dasseti. **Hetūdāharaṇādīhī**ti ettha ādisaddena upamādayo saṅgaṇhāti. “Vividhehi nayehi ṇāpanā”ti iminā vividhehi ṇāpanaṃ **viññattī**ti vacanatthaṃ dasseti.

943. Caṅkamane padavāraṇanāya āpattiyā na kāretabboti āha “nivattanagaṇanāyā”ti. **Padādigaṇanāyā**ti padaanupadādigaṇanāyāti. Tatiyaṃ.

4. Catutthasikkhāpadaṃ

949. Catutthe anuttānaṭṭhānaṃ natthīti. Catutthaṃ.

5. Pañcamasikkhāpadaṃ

952. Pañcame āṇattā bhikkhunīti yojanā. Idañca paccāsannavasena vuttaṃ yaṃkiñcīpi āṇāpetuṃ sakkuṇeyyattāti. Pañcamaṃ.

6-9. Chaṭṭhādisikkhāpadaṃ

955. Chaṭṭha-sattama-aṭṭhama-navamesu anuttānavacanaṃ natthīti. Chaṭṭha sattama aṭṭhama navamāni.

10. Dasamasikkhāpadaṃ

973. Dasame **ahundarikā**ti tasmiṃ kāle, dese vā sambādhassa nāmametanti āha “ahundarikāti sambādhā”ti.

975. Yathā “uttarichappañcavācāhī”ti (pāci. 62-65) ettha pañcasaddo na koci attho, vācāsiliṭṭhatthaṃ lokavohāravasena vutto, na evamidha, idha pana attho atthi, pañca yojanāni gacchantiyāpi anāpattiyevāti āha “pavāretvā...pe... anāpattī”ti. **Paccāgacchatī**ti paṭinivattetvā āgacchatīti. Dasamaṃ.

Tuvattavaggo catuttho.

5. Cittāgāravaggo

1. Paṭhamasikkhāpada-atthayojanā

978. Cittāgāravaggassa paṭhame rañño kīlanatṭhānaṃ agāraṃ **rājāgāranti** vacanatthaṃ dassento āha “rañño kīlanaghara”nti. Cittaṃ agāraṃ **cittāgāraṃ**. **Ārāmanti** nagarato nātidūraārāmoti āha “upavana”nti. **Uyyānanti** sampannapupphaphalatāya uddhaṃ ulloketvā manussā yanti gacchanti etthāti uyyānaṃ. **Pokkharanti** pokkharāṃ padumaṃ netīti pokkharāṇi. **Pañcapīti** rājāgārādīni pañcapi. **Sabbatthāti** dassanatthāya gamane ca gantvā passane cāti sabbesu.

981. “Ajjhārāme”tiādīnā ārāme ṭhitāya ārāmato bahi kate rājāgārādike passantiyāpi anāpattīti dasseti. **Tānīti** rājāgārādīnīti. Paṭhamāṃ.

2. Dutiyasikkhāpadaṃ

982. Dutīye anuttānatṭhānaṃ natthīti. Dutiyāṃ.

3. Tatiyasikkhāpadaṃ

988. Tatiye **yattakanti** yattakaṃ suttanti sambandho. **Añchitanti** kaḍḍhitāṃ. **Tasminti** tattake sutteti sambandho. **Takkamhīti** ettha **takkoti** eko ayomayo suttakantanassa upakaraṇaviseso. So hi takīyati suttāṃ bandhīyati ettha, etenāti vā takkoti vuccati, tasmim. **Kantanatoti** kantīyate kappāsādibhāvassa chindīyate kantaṃ, tato.

989. **Dasikasuttādinti** ettha **dasāti** vatthassāvayavo. So hi diyyati avakhaṇḍīyatīti dasāti vuccati, tassaṃ dasāyaṃ pavattaṃ **dasikaṃ**, tameva suttāṃ **dasikasuttāṃ**. Ādisaddena vakkhamānaṃ dukkantisuttādīṃ saṅgaṇhātīti. Tatiyāṃ.

4. Catutthasikkhāpadaṃ

992. Catutthe **ādiṃ katvāti** dhovanādīni ādiṃ katvā. **Khādanīyādīsūti** pūvakhādanīyādīsu. **Rūpaṅānāyāti** pūvādīnaṃ saṅṭhānagaṅānāya.

993. **Yāgupānetta** yāgusaṅkhāte pāne. **Tesanti** manussānaṃ. **Veyyāvaccakaraṭṭhāne ṭhapetvāti** mātāpitaro attano veyyāvaccakaraṭṭhāne ṭhapetvāti. Catutthāṃ.

5. Pañcamasikkhāpadaṃ

996. Pañcame **vinicchinantīti** adhikaraṇaṃ vinicchinantī bhikkhunīti yojanāti. Pañcamāṃ.

6. Chaṭṭhasikkhāpadaṃ

999. Chaṭṭhe anuttānavacanaṃ natthīti.

7. Sattamasikkhāpadaṃ

1007. Sattame “puna pariyāye”ti ettha **pariyāyasaddo** vāravevacanoti āha “puna vāre”ti. **Mahagghacīvaranti** mahagghaṃ āvasathacīvaranti. Sattamāṃ.

8. Aṭṭhamasikkhāpadaṃ

1008. Aṭṭhame **anissajjitvāti** ettha brahmadeyyena na anissajjanaṃ, atha kho tāvakālikamevāti

dassento āha ‘‘rakkhanatthāyā’’tiādi.

1012. Paṭijaggikanti rakkhaṇakaṃ. **Vacībhedanti** ‘‘paṭijaggāhī’’ti vacībhedaṃ. **Raṭṭheti** vijite. Tañhi raṭṭhanti gāmanigamādayo tiṭṭhanti etthāti **raṭṭhanti** vuccatīti. Aṭṭhamaṃ.

9. Navamasikkhāpadaṃ

1015. Navame sippasaddo paccekaṃ yojetabbo ‘‘hatthisippaṇca assasippaṇca rathasippaṇca dhanusippaṇca tharusippaṇcā’’ti. Tattha **tharusippanti** asikīlanasippaṃ. Mantasaddopi paccekaṃ yojetabbo ‘‘āthabbaṇamanto ca khīlanamanto ca vasīkaraṇamanto ca sosāpanamanto cā’’ti. Tattha **āthabbaṇamantoti** āthabbaṇavedena vihito parūpaghātakaro manto. **Khīlanamantoti** sārādārūkhīlaṃ mantena jappitvā pathaviyaṃ nikhaṇitvā dhāraṇamanto. **Vasīkaraṇamantoti** mantena jappitvā parassa ummattabhāvamāpannakaraṇo manto. **Sosāpanamantoti** parassa maṃsalohitādisosāpanamanto. **Agadapayogoti** bhusavisassa payojanaṃ. Ādisaddena aññepi parūpaghātakaraṇe sippe saṅgaṇhāti. **Yakkhaparittanti** yakkhehi samantato tāṇaṃ. **Nāgamaṇḍalanti** sappānaṃ pavesananivāraṇatthaṃ maṇḍalabandhamanto. Ādisaddena visapaṭihananamantādayo saṅgaṇhātīti. Navamaṃ.

10. Dasamasikkhāpadaṃ

1018. Dasame anuttānavacanaṃ natthīti. Dasamaṃ.

Cittāgāravaggo pañcamaṃ.

6. Ārāmaṃ

1. Paṭhamasikkhāpada-atthayojanā

1025. Ārāmaṃvaggassa paṭhame **upacāraṇti** aparikkhittassa ārāmassa parikkhēpārahattānaṃ upacāraṃ.

1027. ‘‘Sīsānulokikā’’ti sāmāññato vuttepi bhikkhunīnameva sīsanti āha ‘‘bhikkhunīna’’nti. **Yatthāti** yasmim̐ ṭhāneti. Paṭhamaṃ.

2. Dutiyasikkhāpadaṃ

1028. Dutīye **abbhantaroti** abbhantare pariyaṇṇo, jāto vā. ‘‘Saṅkāmesī’’ti iminā **samharīti** ettha haradhātuyā saṅkamanatthaṃ dasseti. **Nhāpitāti** kappakā. Te hi nahāpentī socāpentīti nhāpitāti vuccanti. **Tanti** kāsāvanivāsananti. Dutīyaṃ.

3-4. Tatiya-catutthasikkhāpadaṃ

1036. Tatiyacatutthesu anuttānaṭṭhānaṃ natthīti. Tatiyacatutthāni.

5. Pañcamasikkhāpadaṃ

1043. Pañcame ‘‘kule maccharo’’ti ettha maccharanaṃ **maccharoti** vacanattho kātabbo. ‘‘Taṃ kulaṃ assaddhaṃ appasanna’’nti kulassa avaṇṇaṃ bhāsātīti yojanā. ‘‘Bhikkhuniyo dussīlā pāpadhammā’’ti bhikkhunīnaṃ avaṇṇaṃ bhāsātīti yojanā.

1045. ‘‘Santāmyeva ādīnava’’nti sambandhiyā sambandhaṃ dassetuṃ vuttaṃ ‘‘kulassa vā

bhikkhunīnaṃ vā”ti iminā dvīsu aññatameva na sambandho hoti, atha kho dvayampīti dassetīti. Pañcamam.

6. Chaṭṭhasikkhāpadaṃ

1048. Chaṭṭhe **ovādāyā**ti ettha na yo vā so vā ovādo hoti, atha kho garudhammoyevāti āha “garudhammatthāyā”ti. Saha vasati ettha, etenāti vā **saṃvāsoti** vacanatthena uposathapavāraṇā saṃvāso nāmāti āha “uposathapavāraṇāpucchanatthāyā”ti. “Pucchanatthāyā”ti iminā “**saṃvāsāyā**”ti ettha uttarapadalopabhāvaṃ dasseti. **Etthā**ti bhikkhunivibhaṅge, sikkhāpade vā pāliyaṃ vāti. Chaṭṭham.

7-9. Sattama-aṭṭhama-navamasikkhāpadaṃ

1053. Sattamaṭṭhamanavamesu anuttānavacanam natthi. Kevalam pana “imissāpī”ti padaṃ viseso, imissāpī pāliyaṃ atthoti. Sattamaṭṭhamanavamāni.

10. Dasamasikkhāpadaṃ

1062. Dasame dve kāyā uparimakāyo heṭṭhimakāyoti. Tattha kaṭṭho uddham uparimakāyo, heṭṭhā heṭṭhimakāyo. Tattha “pasāke”ti idaṃ heṭṭhimakāyassa nāmanti āha “adhokāye”ti. **Hī**ti saccam. **Tatoti** adhokāyato. Iminā pañcamībhāratthasamāsaṃ dasseti. Rukkhasa sākā pabhijjivā gatā viya ubho ūrū pabhijjivā gatāti yojanā.

1065. Phālehīti ettha **itisaddo** ādyattho. Tena “dhovā”tiādīni cattāri padāni saṅgaṇhāti. **Āṇattidukkaṭṭhānī**ti heṭṭhā vuttasu aṭṭhasu dukkaṭṭhesu vinayadukkaṭṭameva. **Sesesū**ti bhindanato sesesu phālanādīsūti. Dasamam.

Ārāmaṃvaggo chaṭṭho.

7. Gabbhinivaggo

1. Paṭhamasikkhāpada-atthayojanā

1069. Gabbhinivaggassa paṭhame kucchim pavitṭho satto etissā atthīti **kucchipavitṭhasattā**. “Kucchi”ntipi pātho. Iminā **gabbhinī**ti ettha gabbhasaddo kucchiṭṭhasattavācakoti dasseti. Gabbhasaddo (abhidhānappadīpikāyaṃ 944 gāthāyaṃ) hi kucchiṭṭhasatte ca kucchimhi ca ovarake ca vattatīti. Paṭhamam.

2. Dutiyasikkhāpadaṃ

1073. Dutīye thaññaṃ pivatīti **pāyanto**, dārako, so etissā atthīti **pāyantī**ti dassento āha “thaññaṃ pāyamāni”nti. Dutiyam.

3. Tatiyasikkhāpadaṃ

1077. Tatiye **nittharissatī**ti vaṭṭadukkhato nittharissati.

1079. Pāṇātipātā veramaṇinti ettha pāṇātipātā viramati imāyāti **veramaṇī**ti atthena sikkhāpadaṃ veramaṇi nāmāti āha “pāṇātipātā veramaṇisikkhāpada”nti. Yaṃ taṃ sikkhāpadanti sambandho. **Sabbatthā**ti “adinnādānā veramaṇi”ntiādīsu sabbesu vākyesu. Pabbajitāya sāmaṇeriyāti sambandho. **Etāsū**ti chasu sikkhāsūti. Tatiyam.

4. Catutthasikkhāpadam

1084. Catutthe “vuṭṭhānasammuti”ti padam “hoti”ti pade kattā, “dātabbāyevā”ti pade kammanti. Catuttham.

5-9. Pañcamādisikkhāpadam

1095. Pañcamādīsu navamapariyosānesu sikkhāpadesu anuttānaṭṭhānam natthīti. Pañcamachaṭṭhasattamaṭṭhamanavamāni.

10. Dasamasikkhāpadam

1116. Dasame vūpakāseyyāti ettha kāsadhātuyā gatyattham dassento āha “gaccheyyā”ti. Dasamam.

Gabbhinivaggo sattamo.

8. Kumāribhūtavaggo

1-2-3. Paṭhama-dutiya-tatīyasikkhāpada-atthayojanā

1119. Kumāribhūtavagassa paṭhamadutiyaatīyesu yā pana tā mahāsikkhamānāti sambandho. **Sabbapaṭhamā dve mahāsikkhamānāti** gabbhinivagge sabbāsam sikkhamānānam paṭhamam vuttā dve mahāsikkhamānā. **Tā panāti** mahāsikkhamānā pana. **Sikkhamānāicceva vattabbāti** sammutikammesu sāmāññato vattabbā. “Gihigatā”ti vā “kumāribhūtā”ti vā na vattabbā, vadanti ce, sammutikammam kuppātīti adhippāyo. **Gihigatāyāti** ettha gihigatā nāma purisantaragatā vuccati. Sā hi yasmā purisasaṅkhātena gihinā gamiyittha, ajjhācāravasena, gihiṃ vā gamittha, tasmā gihigatāti vuccati. Ayaṃ sikkhamānāti sambandho. **Kumāribhūtā** nāma sāmānerā vuccati. Sā hi yasmā agihigatattā kumārī hutvā bhūtā, kumāribhāvaṃ vā bhūtā gatā, tasmā kumāribhūtāti vuccati. **Tissopīti** gihigatā kumāribhūtā mahāsikkhamānāti tissopi. **Sikkhamānāti** sikkhamānāti sikkhamānāti. Paṭhama dutiya tatiyāni.

4. Catutthasikkhāpadam

1136. Catutthe anuttānavacanam natthīti. Catuttham.

5. Pañcamasikkhāpadam

Pañcame ettha sikkhāpade “saṅghena paricchinditabbā”ti yaṃ vacanam vuttam, tassāti yojanāti. Pañcamam.

6-7-8. Chaṭṭha-sattama-aṭṭhamasikkhāpadam

Chaṭṭhasattamaṭṭhamesu anuttānaṭṭhānam natthīti. Chaṭṭhasattamaṭṭhamāni.

9. Navamasikkhāpadam

1158. Navame **antoti** abbhantare. Iminā ātyūpasaggassattham dasseti. “Soka”ntiādinā anto vāseti pavesetīti **āvāsā**. Sokaṃ āvāsā **sokāvāsāti** vacanattham dasseti. Gharam gharasāmikā āvisanti viya, evaṃ ayampi sokaṃ āvisatīti yojanā. **Itīti** evaṃ. **Yanti** sokaṃ. **Svāssāti** so assā. **Soti** soko. **Assāti** sikkhamānāya. **Āvāsoti** āvāsokāso. “Edisā aya”nti iminā “ajānantī”ti ettha ajānanākāram dassetīti.

Navamaṃ.

10. Dasamasikkhāpadaṃ

1162. Dasame **anāpucchā**ti ettha tvāpaccayo lopoti āha “anāpucchitvā”ti. **Dvikkhattunti** dve vāre. **Sakinti** ekavāraṃ.

1163. Apubbaṃ samuṭṭhānasīsaṃ imassāti **apubbasaṃuṭṭhānasīsaṃ**. **Dvīsupi** **ṭhānesū**ti vācāto ca kāyavācāto cāti dvīsū **ṭhānesupī**. **Ananujānāpetvā**ti mātāpitūhi ca sāmikena ca na anujānāpetvāti. Dasamaṃ.

11. Ekādasamasikkhāpadaṃ

1167. Ekādasame **tatthā**ti “pārivāsiyachandadānenā”ti vacane. **Aññatrā**ti aññaṃ ṭhānaṃ.

Ekam ajjhesantīti ekam bhikkhuṃ dhammakathanatthāya niyyojenti. **Aññaṃ panā**ti uposathikato aññaṃ pana.

Tatrāti tesu bhikkhūsu. Subhāsubhaṃ nakkhattaṃ paṭhatīti **nakkhattapāṭhako**. **Dāruṇanti** kakkhaḷaṃ. **Teti** bhikkhū. **Tassā**ti nakkhattapāṭhakassa bhikkhussa. “Nakkhattaṃ paṭimānentaṃ, attho bālaṃ upaccagā”tijātakapāli (jā. 1.1.49). Ayaṃ panettha yojanā – nakkhattaṃ paṭimānentaṃ bālaṃ attho hitaṃ upaccagā upasamīpe atikkamitvā agāti. Ekādasamaṃ.

12. Dvādasamasikkhāpadaṃ

1170. Dvādasame **nappahotī**ti bhikkhuniyo nivāsāpetuṃ na sakkotīti. Dvādasamaṃ.

13. Terasamasikkhāpadaṃ

1175. Terasame **ekam vassanti** ettha vassasaddo saṃvaccharapariyāyo, upayogavacanañca bhummattaṃ hotīti āha “ekasmiṃ saṃvacchare”ti. Terasamaṃ.

Kumāribhūtavaggo aṭṭhamo.

9. Chattupāhanavaggo

1. Paṭhamasikkhāpada-atthayojanā

1181. Chattavaggassa paṭhame **kaddamādī**ti cikkhallādīni. Ādisaddena udakādīni saṅgaṇhāti. **Gacchādī**ti khuddapādapādīni. Ādisaddena aññānipi chattaṃ dhāretuṃ asakkuṇeyyāni sambādhaṭṭhānāni saṅgaṇhātīti. Paṭhamaṃ.

2. Dutiyasikkhāpadaṃ

1184. Dutīye **yānenā**ti yanti icchitaṭṭhānaṃ sukkena gacchanti anenāti **yānanti**. Dutīyaṃ.

3. Tatiyasikkhāpadaṃ

1191. Tatiye “vipakiriyaṃsū”ti kiriyāpadassa kattunā avinābhāvato kattāraṃ dassetuṃ vuttaṃ “maṇayo”ti. **Maṇayoti** ca ratanānīti. Tatiyaṃ.

4. Catutthasikkhāpadaṃ

1194. Catutthe **sīsūpagādīsūti** ādisaddena gīvūpagādayo saṅgaṇhāti. **Yaṃ** yanti alaṅkāraṇti. Catutthaṃ.

5. Pañcamasikkhāpadaṃ

1199. Pañcame **gandhena cāti** gandheti attano vatthuṃ sūceti pakāsetīti gandho. **Vaṇṇakena cāti** vilepanena ca. Tañhi vaṇṇayati chavisobhaṃ pakāsetīti vaṇṇakanti vuccati. Casaddena samāhāradvandavākyam dīpetīti. Pañcamaṃ.

6. Chaṭṭhasikkhāpadaṃ

1202. Chaṭṭhe anuttānavacanaṃ natthīti. Chaṭṭhaṃ.

7. Sattamasikkhāpadaṃ

1208. Sattame **ummaddaneti** uppīlītvā maddane. **Samāhanepīti** punappunaṃ bāhanepīti. Sattamaṃ.

8-10. Aṭṭhamādisikkhāpadaṃ

1210. Aṭṭhamādīsūti tīsu anuttānavacanaṃ natthīti. Aṭṭhamanavamadasamāni.

11. Ekādasamasikkhāpadaṃ

1214. Ekādasame **abhimukhamevāti** abhimukhe eva. Mukhassa hi abhi **abhimukhanti** vacanattho kātabbo, sattamiyā aṅkāro. Iminā **puratoti** ettha topaccayo bhummatthe hotīti dasseti. **Upacāraṇti** dvādasahatthūpacāraṇti. Ekādasamaṃ.

12. Dvādasamasikkhāpadaṃ

1219. Dvādasame “anokāsakata”ntipadassa ayuttasamāsabhāvañca visesanaparapadabāhiraśamāsabhāvañca dassetuṃ vuttaṃ “akataokāsa”nti. Okāso na kato yenāti **anokāsakato**, bhikkhu, taṃ. “Aniyamēvā”ti iminā “anodissā”ti padassa tvāpaccayantabhāvaṃ dassetīti. Dvādasamaṃ.

13. Terasamasikkhāpadaṃ

1226. Terasame **upacārepīti** aparikkhittassa gāmassa parikkhepārahaṭṭhānasāṅkhāte upacārepi.

1227. “Acchinnacīvarikāyā”ti sāmāññato vuttepi visesoyevādhippetoti āha “saṅkaccikacīvarevā”ti. Samantato purisānaṃ dassanaṃ kantīyati chindīyati etthāti **saṅkacci**, adhakkhakaubbhanābhiṭṭhānaṃ, saṅkacce nivasitabbanti **saṅkaccikaṃ**, tameva cīvaranti **saṅkaccikacīvaranti**. Terasamaṃ.

Chattupāhanavaggo navamo.

Sabbāneva sikkhāpadānīti sambandho. **Tatoti** tehi aṭṭhāsītisatasikkhāpadehi, apanetvāti sambandho.

Tatrāti tesu khuddakesu. **Etthāti** dasasu sikkhāpadesūti.

Bhikkhunivibhaṅge khuddakavaṇṇanāya

Yojanā samattā.

5. Pāṭidesanīyasikkhāpada-atthayojanā

Khuddakānaṃ anantarā pāṭidesanīyā nāma aṭṭha ye dhammā saṅkhepeneva saṅgahaṃ āruḷhā saṅgītikārehi, tesam aṭṭhannaṃ pāṭidesanīyanāmakānaṃ dhammānaṃ saṅkhepeneva esā vaṇṇanā pavattateti yojanā.

1228. Yāni sabbitelādīnīti sambandho. **Hīti** vitthāro. **Etthāti** aṭṭhasu pāṭidesanīyesu. **Pāḷivinimuttakesūti** pāḷito vinimuttakesu. **Sabbesūti** akhilesu sabbitelādīsūti.

Bhikkhunivibhaṅge pāṭidesanīyavaṇṇanāya yojanā samattā.

Panāti pakkhantarajotako. Ye dhammā uddiṭṭhāti sambandho. **Tesanti** pāṭidesanīyānaṃ. Puna **tesanti** sekhiyaadhikaraṇasamathadhammānaṃ.

Tanti atthavinicchayaṃ, vidū **vadantīti** sambandho. Yakāro padasandhikaro. Ayaṃ panettha yojanā – tesam pāṭidesanīyānaṃ anantarā ye ca sekhiyā pañcasattati ye ca dhammā, casaddo luttaniddiṭṭho, **adhikaraṇavhayā** adhikaraṇasamathanāmakā satta ye ca dhammā bhagavatā uddiṭṭhā, tesam sekhiyaadhikaraṇasamathadhammānaṃ yo atthavinicchayo vibhaṅge mayā vutto, tādīsameva taṃ atthavinicchayaṃ bhikkhunīnaṃ vibhaṅgepi vidū vadanti yasmā, tasmā tesam dhammānaṃ sekhiyaadhikaraṇasamathadhammānaṃ yā atthavaṇṇanā tattha mahāvibhaṅge viṣuṃ mayā na vuttā. Imā atthavaṇṇanā **idhāpi** bhikkhunīnaṃ vibhaṅgepi, pisaddo luttaniddiṭṭho, mayā na vuttāyevāti. Nakāro dvīsu kiriyāsu yojetabbo.

“Sabbāsavapaṃ maggaṃ, puññakammena ciminā;
Uppādetvā sasantāne, sattā passantu nibbuti” nti.

Ayaṃ gāthā etarahi potthakesu natthi, ṭīkāsu pana atthi. Tasmā evamettha yojanā veditabbā – **iminā puññakammena ca** vibhaṅgavaṇṇanāya katena iminā puññakammena ca aññena puññakammena ca. Casaddo hi avuttasampiṇḍanattho. **Sattā** sabbe sattā **sabbāsavapaṃ** sabbesaṃ āsavānaṃ vighātaṃ **maggaṃ** arahattamaggaṃ **sasantāne** attano niyakajjhatte **uppādetvā** janetvā **nibbutiṃ** khandhaparinnibbānaṃ ñāṇālocanena passantūti.

Iti samantapāsādikāya vinayasaṃvaṇṇanāya

Bhikkhunivibhaṅgavaṇṇanāya

Yojanā samattā.

Jādilañchitanāmena, nekānaṃ vācīto mayā;
Bhikkhunīnaṃ vibhaṅgassa, samatto yojanāyoti.

Namo tassa bhagavato arahato sammāsambuddhassa

Mahāvaggayojanā

1. Mahākhandhakam

1. Bodhikathā

Evūbhatovibhaṅgassa, katvāna yojanānayaṃ;
Mahāvaggakhandhakassa, karissaṃ yojanānayaṃ.

Ubhinnanti ubhayesaṃ. **Pātimokkhānanti** pātimokkhavibhaṅgānaṃ. Pātimokkhagahaṇena hettha tesāṃ vibhaṅgopi gahito abhedena vā uttarapadalopavasena vā. **Khandhakanti** paññattisamūhaṃ. Khandhasaddo hettha paññattivācako. Vinayapaññattiyo vuccanti ‘‘khandho’’ti. Tesāṃ samūho **khandhako**. Athavā **khandhoti** rāsi. Khandhasaddo hi rāsathavācako. Vinayapaññattirāsi vuccati ‘‘khandho’’ti. Kakāro pakāsakavācako. Khandhānaṃ vinayapaññattirāsīnaṃ ko pakāsakoti **khandhako**, taṃ khandhakam. Ayaṃ panettha yojanā – ubhinnaṃ pātimokkhānaṃ saṅgītisamanantaraṃ **khandhakovidā** khandhakesu kusalā mahātherā yaṃ khandhakam saṅgāyimsu, tassa khandhakassa dāni saṃvaṇṇanākkamo yasmā sampatto, tasmā tassa khandhakassa ayaṃ anuttānatthavaṇṇanā hotīti.

Ye atthāti sambandho. Hisaddo padālaṅkāro. **Yesanti** padānaṃ. **Teti** te atthe. **Bhaveti** bhaveyya, bhavituṃ sakkuṇeyyāti attho. **Tesanti** atthānaṃ. **Kinti** kiṃ payojanaṃ. **Teti** atthe, ñātunti sambandho. Athavā **teti** atthā, avaṇṇitāti sambandho. **Tesaṃyevāti** atthānameva. Ayaṃ panettha yojanā – padabhājanīye yesaṃ padānaṃ ye atthā bhagavatā pakāsītā, tesāṃ padānanti pāṭhaseso, te atthe puna vadeyyāma ce, kadā pariyoṣānaṃ saṃvaṇṇanāya pariniṭṭhānaṃ bhava, na bhaveyyāti adhippāyo. Ye ceva atthā uttānā, tesāṃ saṃvaṇṇanāya kiṃ payojanaṃ, na payojananti adhippāyo. **Adhippāyānusandhīhi** ca adhippāyena ca anusandhinā ca byañjanena ca ye pana atthā anuttānā, te atthe, atthā vā avaṇṇitā yasmā ñātumuṃ na sakkā, tasmā tesaṃyeva atthānaṃ ayaṃ saṃvaṇṇanānayo hotīti. Itisaddo parisamāpanattho.

1. ‘‘Tena...pe... verañjāya’’ntiādīsu (pārā. 1) karaṇavacane visesakāraṇamatthi viya, ‘‘**tena...pe... paṭhamābhisambuddho**’’ti ettha kiñcāpi natthīti yojanā. Asadisopamāyaṃ. **Kiñcāpisaddo** garahattahajotako, **pana**-saddo sambhāvanattahajotako. ‘‘Karaṇavacanenevā’’ti ettha evakārena upayogavacanaṃ vā bhummavacanaṃ vā nivāreti. **Abhilāpoti** abhimukhaṃ atthaṃ lapatīti abhilāpo, saddo. **Āditoti** verañjakaṇḍato. **Etanti** ‘‘tena samayena buddho bhagavā uruvelāya’’ntiādivacanaṃ. ‘‘Aññesupī’’ti vatvā tamevatthaṃ dassetuṃ vuttaṃ ‘‘ito paresū’’ti.

Yadi visesakāraṇaṃ natthi, kiṃ panetassa vacane payojananti codento āha ‘‘kiṃ panetassā’’tiādi. **Etassāti** ‘‘tena samayena buddho bhagavā uruvelāya’’ntiādivacanassa. Nidānadassanaṃ payojanaṃ nāmāti yojanā. Tamevatthaṃ vibhāvetumāha ‘‘**yā hī**’’tiādi. Yā pabbajjā ceva yā upasampadā ca bhagavato anuññātāti yojanā. Yāni ca anuññātānti sambandho. **Tānti** pabbajjādīni. **Abhisambodhinti** arahattamaggañānapadaṭṭhānaṃ sabbaññutaññānaṃca sabbaññutaññānapadaṭṭhānaṃ arahattamaggañānaṃca. **Bodhimahāmaṇḍeti** mahantānaṃ maggañānasabbaññutaññānaṃ pasannaṭṭhāne bodhirukkhamūleti attho. **Evantiādi** nigamaṃ.

Tatthāti yaṃ ‘‘tena samayena uruvelāya’’ntiādivacanaṃ vuttaṃ, tattha. **Uruvelāyanti** ettha urusaddo mahantapariyāyoti āha ‘‘mahāvelāya’’nti. ‘‘Vālikarāsīmhi’’ti iminā velāsaddassa rāsatham dasseti, kālasīmādayo nivatteti. Yadi pana ‘‘urū’’ti vālikāya nāmaṃ, ‘‘velā’’ti mariyādāya, evañhi sati nanu uruyā velāti attho daṭṭhabboti āha ‘‘velātikamanahetu āhaṭā uru uruvelā’’ti. Iminā velāya atikkamo **velā** uttarapadalopavasena, velāya āhaṭā uru **uruvelā** padavipariyāyavasenāti dasseti. **Etthāti** ‘‘uruvelāya’’ntipade. Tamevatthaṃ vibhāvento āha ‘‘atīte kirā’’tiādi. Anuppanne buddhe pabbajitvāti sambandho. **Tāpasapabbajanti** isipabbajjaṃ, na samaṇapabbajjaṃ. **Katikavattanti** karaṇaṃ kataṃ, katena pavattaṃ katikaṃ, tameva vattaṃ katikavattaṃ. Akamaṃsu kirāti sambandho. **Yoti** yo koci. **Aññoti** attanā aparo. So ākiratūti sambandho. **Pattapuṭenāti** paṇṇena katena puṭena. **Tatoti** katikavattakaraṇato. **Tatthāti** tasmim padese. **Tatoti** mahāvālikarāsījananato, paranti sambandho. Nanti taṃ padesaṃ. **Tanti**

mahāvālikarāsiṃ.

“Bodhirukkhamūle”ti ettha assattharukkhasa upacāravasena bodhīti nāmalabhanam dassento āha “bodhi vuccati catūsu maggesu ñāṇa”ntiādi. Iminā cattāri saccāni bujjhatīti **bodhī**ti vacanatthena catūsu maggesu ñāṇam bodhi nāmāti dasseti. **Etthā**ti bodhimhi, bodhiyam vā. Samīpatthe cetam bhummavacanam. **Rukkhopī**ti pisaddena na maggañāṇamevāti dasseti. **Mū**leti āsanne. **Paṭhamābhisambuddhoti** anunāsikalopavasena sandhīti āha “paṭhamam abhisambuddho”ti. “Hutvā”ti iminā “paṭhama”ntipadassa bhāvanapumsakam dasseti. **Sabbapaṭhamamevāti** sabbesam janānam paṭhamameva abhisambuddho hutvāti sambandho. Eko eva pallaṅko **ekapallaṅkoti** avadhāraṇasamāsam dassento āha “ekeneva pallaṅkenā”ti. “Sakiṃ...pe... ābhujitenā”ti iminā avadhāraṇaphalam dasseti. **Pallaṅkoti** ca ūrubaddhāsanam. **Vimuttisukham paṭisaṃvedī**ti ettha tadanāgādīsu (paṭi. ma. aṭṭha. 1.1.104) pañcasu vimuttīsu paṭippassaddhisankhātā phalasangāpatti evādhīpetāti āha “phalasangāpattisukha”nti. **Phalasangāpattī**ti arahattaphalasangāpatti. Sā hi viruddhehi upakkilesehi muccitaṭṭhena **vimuttī**ti vuccati, tāya sampayuttam sukham **vimuttisukham**, catutthajjhānikam arahattaphalasangāpattisukham. Athavā tāya jātam sukham vimuttisukham, sakalakilesadukkhūpasamasukham. “Paṭisaṃvedayamāno”tiiminā “paṭisaṃvedī”ti ettha ṇīpaccayassa kattuttham dasseti. Punappunam suṭṭhu vadati anubhavatīti **paṭisaṃvedī**. Paṭisaṃvedī hutvā nisīdīti sambandho.

Paccayākāranti avijjāpaccayānam uppādākāram. Kasmā paccayākāro paṭiccasamuppādo nāmāti āha “paccayākāro hī”tiādi. **Hī**ti saccam, yasmā vā. “Aññamañña”ntiiminā “paṭicca”tipadassa kammam dasseti, “sahite”tiiminā saṃsaddasattham. “Dhamme”tiiminā tassa sarūpam. **Etthā**ti imissam vinayaṭṭhakathāyam. **Tatthā**ti “anulomapaṭiloma”ntipade, anulomapaṭilomesu vā. Sveva paccayākāro vuccatīti yojanā. “Attanā kattabbakiccakaraṇato”tiiminā anulomasaddassa sabhāvattham dasseti. **Svevāti** paccayākāro eva. **Tam kiccanti** attanā kattabbam tam kiccam. **Tassa akaraṇatoti** attanā kattabbakiccassa akaraṇato. Iminā paṭilomasaddassa sabhāvattham dasseti. **Purimanayenevāti** “avijjāpaccayā saṅkhārā”tiādinā purimanayeneva. **Vāti** athavā. **Pavattiyāti** saṃsārapavattiyā. **Anulomoti** anukūlo, anurūpo vā. **Itaroti** “avijjāyatvevā”tiādinā vutto paccayākāro. **Tassāti** pavattiyā. **Paṭilomoti** paṭiviruddho, **etthā**ti “anulomapaṭiloma”ntipade. **Attho daṭṭhabboti** ettha attho evāti sambhavato tassa phalam vā “saddantarathāpohanena saddo attham vadati”ti vacanato (udā. aṭṭha. 1; dī. ni. 1.1; ma. ni. 1.1. mulapariyāyasuttavaṇṇanā; saṃ. ni. 1.1. oghatarayasuttavaṇṇanā; a. ni. 1.1. rupādivaggavaṇṇanā) saddantarathāpohanam vā dassento āha “ādito panā”tiādi. **Yāvasaddo** avadhivacano. Yāva antam pāpetvāti sambandho. **Itoti** imehi vuttehi dvīhi atthehi. “**Manasākāsī**”ti ettha ikāralopavasena sandhīti āha “manasi akāsī”ti. **Tatthā**ti “manasākāsī”tipade. **Yathāti** yenākārena. **Idanti** imam ākāram. **Tatthā**ti “avijjāpaccayā saṅkhārā”tiādipāṭhe avayavattho evam veditabboti yojanā. Samāsamajjhe tasaddena pubbapadasseva līngavacanāni gahetabbānti āha “avijjā ca sā paccayo cā”ti. Vākye pana tasaddena parapadasseva līngavacanāni gahetabbāni. “Avijjāpaccayā”tipadam “sambhavanti”tipadena sambandhitabbanti āha “tasmā avijjāpaccayā saṅkhārā sambhavanti”ti. **Sabbapadesūti** “saṅkhārāpaccayā viññāṇa”ntiādisu sabbesu padesu.

Yathā panāti yenākārena pana. **Idanti** imam ākāram. **Tatthā**ti “avijjāya...pe... nirodho”tiādivākye. **Avijjāyatvevāti** ettha “bhaddiyotvevā”tiādisu viya “bhaddiyo iti evā”ti padacchedo kattabbo, na evam “avijjāya iti evā”ti, atha kho “avijjāya tu evā”ti kātabboti āha “avijjāya tu evā”ti. “Pa atimokkham atipamokkha”ntiādisu (kaṅkhā. aṭṭha. nidānavāṇṇanā) viya upasaggabyattayena vuttam, evamidha nipātabyattayena vuttanti daṭṭhabbam. Tattha evasaddena sattajīvādayo nivatteti. Tusaddo pakkhantarathajotako. Anulomapakkhato paṭilomasankhātam pakkhantaram manasākāsīti attho. Asesavirāganīrodhasaddo ayuttasamāso, uttarapadena ca tatiyāsamāso āha “virāgasankhātēna maggena asesanirodhā”ti. Tattha asesasaddam virāgasaddena sambandhamakatvā nirodhasaddena sambandham katvā atthassa gahaṇam **ayuttasamāso** nāma. “Maggenā”tiiminā virāgasaddasattham dasseti. Maggo hi virajjanaṭṭhena **virāgoti** vuccati. **Saṅkhāranīrodhoti** ettha maggena nirodhattā anuppādanīrodho hotīti āha “saṅkhāranam

anuppādanirodho hotī”ti. **Anuppādanirodhoti** ca anuppādena nirodho samucchadavasena niruddhattā. **Evanti** yathā avijjāyatveva asesavirāganirodhā saṅkhāranirodho, evaṃ tathāti attho. **Tatthāti** “evametassā”tiādivacane. Kevalasaddo sakalapariyāyoti āha “sakalassā”ti, anavasesassāti attho. Athavā sattajīvādīhi amissitattā amissatthoti āha “suddhassa vā”ti. “Sattavirahitassā”ti iminā suddhabhāvaṃ dasseti. **Dukkhakkhandhassāti** ettha khandhasaddo rāsattavācakoti āha “dukkharāsissā”ti.

Etamatthaṃ viditvāti ettha etasaddassa visayaṃ dassetuṃ vuttaṃ “yvāya”ntiādi. Tattha “avijjādivasena...pe... nirodho hotī”ti yvāyaṃ attho vuttoti yojanā. Samudayo ca hotīti sambandho. **Viditavelāyanti** pākaṭavelāyaṃ pasiddhakāleti attho. **Imaṃ udānanti** ettha imasaddo vuccamānāpekkho. Tasmīṃ atthe vidite satīti yojanā. **Pajānanatāyāti** pakārena jānanabhāvassa. **Somanassayuttañāṇasamuṭṭhānanti** somanassena ekuppādādivasena yuttana ñāṇena samuṭṭhānaṃ, yuttaṃ vā ñāṇasaṅkhātaṃ samuṭṭhānaṃ udānanti sambandho. Tattha **udānanti** kenaṭṭhena udānaṃ? Udānaṭṭhena, modanaṭṭhena, kīlanaṭṭhena cāti attho. Kimidaṃ udānaṃ nāma? Pītivegasamuṭṭhāpito udāhāro. Yathā (udā. aṭṭha. ganthārambhakathā) hi yaṃ telādiminitabbavatthu mānaṃ gahetuṃ na sakkoti visanditvā gacchati, taṃ “avaseko”ti vuccati. Yaṅca jalaṃ taḷakaṃ gahetuṃ na sakkoti, ajjhottharivā gacchati, taṃ “ogho”ti vuccati. Evamevaṃ yaṃ pītivegasamuṭṭhāpitaṃ vitakkavipphāraṃ hadayaṃ sandhāretuṃ na sakkoti, so adhiko hutvā anto asaṅghahitvā vacīdvārena nikkhamanto paṭiggāhakanirapekkho udāhāraviseso “udāna”nti vuccati. “Attamanavācaṃ nicchāresī”ti iminā udadhātussa udāhāratthaṃ dasseti.

Tassāti udānassa attho evaṃ veditabboti yojanā. **Yadāti** ettha dāpaccayassa atthavākyaṃ dassento āha “yasmīṃ kāle”ti. **Haveti** “byatta”nti imasmīṃ atthe nipāto. Byattaṃ pākaṭanti hi attho. **Pātubhavanti** ettha pātunipātassa atthassa “have”ti nipātena vuttattā bhūdhātusseva atthaṃ dassento āha “uppajjanti”ti. **Anuloma paṭiloma paccayākāra paṭivedhasādhakāti** anulomato ca paṭilomato ca paccayākārassa paṭivijjhanassa sādhakā. **Bodhipakkhiyadhammāti** bodhiyā maggañāṇassa pakkhe bhavā sattatīṃsa dhammā. Athavā pātunipātena saha “bhavanti”tipadassa atthaṃ dassento āha “pakāsanti”ti. Imasmīṃ naye havesaddo ekaṃsatthavācako. **Have** ekaṃsenāti hi attho. **Abhisamayavasenāti** maggañāṇavasena. Maggañāṇaṅhi yasmā abhimukhaṃ cattāri saccāni samecca ayati jānāti, tasmā **abhisamayoti** vuccati.

“Kilesasantāpanaṭṭhenā”ti iminā ābhuso kilese tāpetīti **ātāpoti** vacanattaṃ dasseti. Na vīriyasāmaññaṃ hoti, atha kho sammappadhānavīriyamevāti āha “sammappadhānavīriyavato”ti. Iminā **ātāpīti** ettha ipaccayassa vantuatthaṃ dasseti. **Ārammaṇūpanijjhānalakkhaṇena cāti** kasiṇādiārammaṇaṃ upagantvā nijjhānasabhāvena aṭṭhasamāpattisaṅkhātena jhānena ca. **Lakkhaṇūpanijjhānalakkhaṇena cāti** aniccādilakkhaṇaṃ upagantvā nijjhānasabhāvena vipassanāmaggaṃ phalasaṅkhātena jhānena ca. “Bāhitapāpassā”ti iminā bāhito aṇo pāpo anenāti **brāhmaṇoti** vacanattaṃ dasseti. Aṇasaddo hi pāpāriyāyo. “Khīṇāsavassā”ti iminā tassa sarūpaṃ dasseti. **Athassāti** atha assa, tasmīṃ kāle brāhmaṇassāti attho. Yā etā kaṅkhā vuttāti sambandho. “Ko nu kho...pe... avocā”tiādinā (saṃ. ni. 2.12) nayena ca tathā “katamaṃ nu kho...pe... avocā”tiādinā (saṃ. ni. 2.35) nayena ca paccayākāre vuttāti yojanā. **No kallo pañhoti** ayutto pañho, duppañho esoti attho. **Tathāti** evaṃ, tato aññathā vā. Yā ca soḷasa kaṅkhā (ma. ni. 1.18; saṃ. ni. 2.20) āgatāti sambandho. Apaṭividdhattā kaṅkhāti yojanā. **Soḷasa kaṅkhāti** atītavisaṃyā pañca, anāgatavisaṃyā pañca, paccuppannavisaṃyā cāti soḷasavidhā kaṅkhā. **Vapayanti** vi apayanti, ikāralopenāyaṃ sandhi. Vityūpasaggo dhātvatthānuvattako, apayanti – saddo apagamanatthoti āha “apagacchantī”ti. “Nirujjhanti”tiiminā apagamanatthameva pariyaṃtarena dīpeti. “Kasmā”ti iminā “yato pajānāti sahetudhamma”nti vākyassa pubbavākyakāraṇabhāvaṃ dasseti. **Sahetudhammanti** ettha saha avijjādi hetunāti sahetu, saṅkhārādiko paccayuppannadhammo. Sahetu ca so dhammo cāti sahetudhammoti vacanattaṃ dassento āha “avijjādikenā”tiādi. “Paṭivijjhati”ti iminā pajānā tīti ettha ñādhātuyā avabodhanattaṃ dasseti, māraṇatosanādike atthe nivatteti. **Itīti** tasmā, vapayanti yojanā.

2. **Paccayakkhayassāti** paccayānaṃ khayatṭhānassa asaṅkhatassāti yojanā. **Tatrāti** dutiyaudāne. Khīyanti paccayā etthāti **khayaṃ**, nibbānanti āha “paccayānaṃ khayasaṅkhātaṃ nibbāna”nti. “Aññāsī”ti iminā **avedīti** ettha vidadhātuyā ñāṇatthaṃ dasseti, anubhavanalābhādike nivatteti. Tasmā vapayanṭīti sambandho. **Vuttappakārāti** paṭhamaudāne vuttasadisā. **Dhammāti** bodhipakkhiyadhammā, catuariyasaccadhammā vā.

3. Imaṃ udānaṃ udānesīti sambandho. Yena maggena viditoti yojanā. **Tatrāti** tatiyaudāne. So brāhmaṇo tiṭṭhatīti sambandho. Tehi uppannehi bodhipakkhiyadhammehi vā yassa ariyamaggassa catusaccadhammā pātubhūtā, tena ariyamaggena vā vidhūpayanti yojanā. **Vuttappakāranti** suttanipāte vuttappakāraṃ. **Mārasenanti** kāmādikāṃ dasavidhaṃ mārasenaṃ. “Vidhamento”tiiminā **vidhūpayanti** ettha dhūpadhātuyā vidhamanattaṃ dasseti, limpanatthādayo nivatteti. “Viddhaṃ sento”tiiminā **vidhamentoti** ettha dhamudhātuyā dhamśanattaṃ dasseti, saddatthādayo nivatteti. “**Sūriyova** obhāsaya”ntipadassa “sūriyo ivā”ti atthaṃ dassento āha “yathā”tiādi. **Sūriyoti** ādicco. So hi yasmā paṭhamakappikānaṃ sūraṃ janeti, tasmā sūriyoti vuccati. **Abbhuggatoti** abhimukhaṃ uddhaṃ ākāsaṃ gato, abbhaṃ vā ākāsaṃ uggato. **Abbhasaddo** hi ākāsapariyāyo. Ākāso hi yasmā ābhuso bhāti dippati, tasmā “**abbha**”nti vuccati. Ayaṃ panettha opammasaṃsandanaṃ – yathā sūriyo obhāsayaṃti tiṭṭhati, evaṃ brāhmaṇo saccāni paṭivijjhanto. Yathā sūriyo andhakāraṃ vidhamento tiṭṭhati, evaṃ brāhmaṇo mārasenampi vidhūpayantoti.

Etthāti etesu tīsu udānesu. Paṭhamaṃ udānaṃ uppannanti sambandho. Imissā khandhakapāḷiyā udānapāḷiṃ saṃsandanto āha “udāne panā”tiādi. Udāne pana vuttanti sambandho. **Tanti** udāne vuttavacanaṃ, vuttanti sambandho. **Accayenāti** atikkamena, tamevatthaṃ vibhāvento āha “tadā hī”tiādi. **Tadāti** “sve āsanā vuṭṭhahissāmī”ti rattiṃ uppāditamanasikārakāle. Bhagavā manasākāsīti sambandho. Purimā dve udānaḡāthā ānubhāvādīpikā hontīti yojanā. **Tassāti** paccayākārapajānanapaccayakkhayādhigamassa. **Ekekamevāti** anulomapaṭilomesu ekekameva. **Paṭhamayāmañcāti** accantasam̐yoge upayogavacanaṃ, nirantaraṃ paṭhamayāmakālanti attho. **Idha panāti** imasmiṃ khandhake pana. Tamevatthaṃ vitthārento āha “bhagavā hī”tiādi. Tattha bhagavā udānesīti sambandho. **Visākhapuṇṇamāyāti** visākhāya yuttāya puṇṇamāya. “Aruṇo uggamissatī”ti vattabbasamayeti sambandho. **Sabbaññutanti** sabbaññubhāvaṃ, anāvaraṇaññānanti attho. **Tatoti** aruṇuggamanato. **Taṃ divasanti** bhummatthe upayogavacanaṃ, tasmim̐ divaseti hi attho. Accantasam̐yoge vā, taṃ divasaṃ kālanti hi attho. **Evaṃ manasi katvāti** yathā taṃ divasaṃ anulomapaṭilomaṃ manasākāsi, evaṃ manasi katvāti attho. **Itīti** evaṃ. “Bodhirukkhamūle...pe... nisīdi”ti evaṃ vuttaṃ taṃ sattāhanti yojanā. **Tatthevāti** bodhirukkhamūleyeva.

2. Ajapālakathā

4. **Na bhagavāti** ettha nakāro “upasaṅkamī”ti padena yojetabbo, na upasaṅkhamīti hi attho. **Tamhā samādhimhāti** tato arahattaphalasaṃpattisamādhito. Anantameva anupasaṅkamaṃ upamāya āvikaronto āha “yathā panā”tiādi. Icevaṃ vuttaṃ na hotīti yojanā. **Idanti** idaṃ atthajātaṃ. **Etthāti** “bhutvā sayatī”ti vākye. **Evanti** upameyyajotako. **Idhāpīti** imissaṃ “atha kho bhagavā”tiādīpāḷiyampi. **Idanti** ayamatto dīpito hotīti yojanā. **Etthāti** “atha kho bhagavā”tiādīpāṭhe.

Aparānipīti pallaṅkasattāhato aññānīpi. **Tatrāti** “aparānipī”tiādivacane. Bhagavati nisinne satīti yojanā. **Kirasaddo** vitthārajotako. **Kim nu khoti** parivātakkanatthe nipāto. **Ekaccānanti** appesakkhānaṃ ekaccānaṃ. **Tāsanti** devatānaṃ. **Balādhigamaṭṭhānanti** balena tejasā adhigamaṭṭhānaṃ. **Animisehīti** ummisehi. **Sattāhanti** kammatthe cetāṃ upayogavacanaṃ, accantasam̐yoge vā. Evañhi sati “kāla”nti kammaṃ vedītabbaṃ. **Taṃ ṭhānanti** animisehi akkhīhi olokiyamānaṭṭhānaṃ. **Athāti** animisasattāhassa anantare. **Ratanacaṅkameti** ratanamaye caṅkame. **Taṃ ṭhānanti** caṅkamaṭṭhānaṃ. **Tatoti** caṅkamasattāhato. **Ratanagharanti** ratanamayaṃ gehaṃ. **Tatthāti** ratanaghare abhidhammapīṭakaṃ vicinantoti sambandho. **Etthāti** ratanaghare, abhidhammapīṭake vā, niddhāraṇe cetāṃ bhummavacanaṃ. **Taṃ ṭhānanti** abhidhammapīṭakavicinanaṭṭhānaṃ.

Evantiādi pubbavacanassa nigamavasena pacchimavacanassa anusandhinidassanaṃ. **Tenāti** ajapālānaṃ nisīdanakāraṇena. **Assāti** nigrodhassa. “Ajapālanigrodhotveva nāma”nti iminā upacāravasena nāmalabhanāṃ dasseti. Ajapā brāhmaṇā lanti nivāsaṃ gaṇhanti etthāti **ajapālo**, uṇhakāle vā antopaviṭṭhe aje attano chāyāya pāletīti **ajapālo**, ajapālo ca so nigrodho ceti **ajapālanigrodhoti** vacanatthānīpi pakaraṇantaresu (udā. aṭṭha. 4) dassitāni. **Tatrāpīti** ajapālanigrodhepi. **Bodhitoti** bodhirukkhato. **Etthāti** ajapālanigrodhe. Bhagavati nisinneti yojanā. **Tatthāti** “atha kho aññataro”tiādivacane. **Soti** brāhmaṇo. **Diṭṭhamaṅgaliko nāmāti** diṭṭhasutamutasankhātesu tīsu maṅgalikesu diṭṭhamaṅgaliko nāma kirāti attho. “Mānavasena...pe... vuccatī”ti iminā “humhu”nti karotīti **humhuṅko**, humhuṅko jāti sabhāvo imassāti **humhuṅkajātikoti** vacanatthāṃ dasseti.

Tenāti brāhmaṇena. **Sikhāpattanti** aggappattāṃ. **Tassāti** udānassa. **Yoti** puggalo, paṭijānātīti sambandho. “Na diṭṭhamaṅgalikatāyā”ti iminā avadhāraṇaphalaṃ dasseti. “Bāhitapāpadhammattā”ti iminā bāhito pāpo dhammo anenāti **bāhitapāpadhammoti** vacanatthāṃ dasseti. “Humhuṅkārapahānenā”ti iminā natthi humhuṅkāro imassāti **nihumhuṅkoti** vacanatthāṃ dasseti. **Rāgādikasāvābhāvenāti** iminā natthi rāgādikasāvo imassāti **nikkasāvoti** vacanatthāṃ dasseti. “Bhāvanānuyogayuttacittatāyā”ti iminā yataṃ anuyuttaṃ attāṃ cittaṃ imassāti **yattoti** vacanatthāṃ dasseti. Ettha hi yatasaddo vīriyavācako, yatadhātuyā nipphanno, attasaddo cittaṃ pariyaṃ. Yatasaddassa yamudhātuyā ca nipphannabhāvaṃ dassetuṃ vuttaṃ “sīlasaṃvarena vā”tiādi. “Saññatacittatāyā”ti iminā yamati saṃyamātīti **yataṃ**, yataṃ attāṃ cittaṃ imassāti **yattoti** vacanatthāṃ dasseti. Saccāni vidanti jānantīti **vedānīti** vacanatthēna maggañāṇāni vedāni nāmāti dassento āha “catumaggañāṇasankhātehi vedehī”ti. “Catumaggañāṇasankhātāna”nti vibhattipariṇāmaṃ katvā “vedāna”ntipadena yojetabbo. **Antanti** nibbānaṃ. Tañhi yasmā saṅkhārānaṃ avasāne jātaṃ, tasmā antanti vuccati. Puna **antanti** arahattaphalaṃ. Tañhi yasmā maggassa pariyaṃ pavattaṃ, tasmā antanti vuccati. “Maggabrahmacariyassa vusitattā”ti iminā vusitaṃ maggasankhātāṃ brahmacariyaṃ anenāti **vusitabrahmacariyoti** vacanatthāṃ dasseti. **Dhammena brahmavādaṃ vadeyyāti** vuttavacanassa atthāṃ dassento āha “brāhmaṇo ahanti etaṃ vādaṃ dhammena vadeyyā”ti. **Dhammenāti** bhūtena sabhāvena. **Loketi** ettha satta lokovādhippetoti āha “sakale lokasannivāse”ti.

3. Mucalindakathā

5. Akālameghoti ettha vappādikālassa abhāvā na akālo hoti, atha kho vassakāle asampattattā akāloti āha “asampatte vassakāle”ti. “Uppannamegho”ti iminā akāle uppanno megho **akālameghoti** vacanatthāṃ dasseti. **Gimhānaṃ pacchime māseti** jeṭṭhamūlamāse. **Tasminti** meghe. **Sītavātaduddinīti** ettha sītena vātena dūsitaṃ dinaṃ imissā vaṭṭalikāyāti sītavātaduddinīti vacanatthāṃ dassento āha “sā ca panā”tiādi. Sā ca pana sattāhavaṭṭalikā sītavātaduddinīti nāma ahoṣīti sambandho. “Samīpe pokkharāṇiyā nibbatto”ti iminā mucalindassa samīpe nibbatto **mucalindoti** vacanatthāṃ dasseti. **Mucalindoti** ca niculo. So nīpoti ca piyakoti ca vuccati. Nāgassa bhogo ekopi sattābhujattā “bhogehī”ti bahuvacanavasena vuttaṃ. **Tasminti** nāgarāje ṭhite satīti yojanā. **Tassāti** nāgarājassa. **Tasmāti** yasmā bhaṇḍāgāragabbhapamāṇaṃ ahosi, tasmā. Ṭhānassa kāraṇaṃ paridīpeti anenāti **ṭhānakāraṇaparidīpanaṃ** “mā bhagavantaṃ sīta”ntiādivacanaṃ. **Soti** nāgarājā. **Hīti** saccaṃ. Pāliyaṃ “bādhayitthā”ti kiriyāpadaṃ ajjhāharitabbanti āha “mā sītaṃ bhagavantaṃ bādhayitthā”ti. **Tatthāti** “mā bhagavantaṃ sīta”ntiādivacane. Sattāhavaṭṭalikāya satīti sambandho. **Tampīti** uṇhampi. **Nanti** bhagavantaṃ. **Tassāti** nāgarājassa. **Ubbiddhanti** uddhaṃ chiddaṃ. Viddhachiddasaddā hi pariyaṃ. Ākāsaṃ meghapaṭalapaṭicchannaṃ āsannaṃ viya hoti, meghapaṭalavīgame dūraṃ viya upaṭṭhāti, tasmā vuttaṃ “meghavīgame dūrībhūta”nti. **Vigatavalāhakanti** ettha vigatasaddo apagatatthavācako, valāhakasaddo meghapariyaṃyoti āha “apagatamegha”nti. Indanīlamanī viya dibbatīti **devoti** vacanatthēna ākāso devo nāmāti āha “devanti ākāsa”nti. **Attano rūpanti** attano nāgasañṭhānaṃ. Iminā **sakavaṇṇanti** ettha sakasaddo attavācako, vaṇṇasaddo saṅṭhānavevacanoti dasseti.

Sukho vivekoti ettha tadanā vikkhambhana samuccheda paṭippassaddhinissaraṇavivekasankhātesu pañcasu vivekesu nibbānasankhāto nissaraṇaviveko ca

kāyacittaupadhivivekasāṅkhātesu tīsu vivekesu nibbānasaṅkhāto upadhiviveko ca gahetabboti āha “nibbānasaṅkhāto upadhiviveko”ti. “Catumaggañānasantosenā”ti iminā **tuṭṭhassāti** ettha piṇḍapātasantosādike nivatteti. **Sutadhammassāti** ettha sutasaddo vissutapariyāyoti āha “pakāsitadhammassā”ti, pākaṭasaccadhammassāti attho. **Passatoti** ettha maṃsacakkhussa karaṇabhāvena āsaṅkā bhaveyyāti āha “ñānacakkhunā”ti. “Akuppanabhāvo”ti iminā **abyāpajjanti** ettha byāpādasaddassa dosavācakabhāvo ca ṇyapaccayassa bhāvattho ca dassito. **Etenāti** “abyāpajja”ntipadena. **Mettāpubbabhāgoti** abyāpajjassa pubbabhāge mettāya uppannabhāvo. **Pāṇabhūtesu saṃyamoti** ettha pāṇabhūtasaddā vevacanabhāvena sattesu eva vattantīti āha “sattesu cā”ti. **Karuṇāpubbabhāgoti** saṃyamassa pubbabhāge karuṇāya uppannabhāvo. **Yāti** yā virāgatā. Anāgāmiṃmagassa kāmarāgassa anavasesapahānattā vuttaṃ “etena anāgāmiṃmaggo kathito”ti. Yāthāvamānassa arahattamaggena niruddhattā vuttaṃ “asmi...pe... kathita”nti. **Itoti** arahattato.

4. Rājāyatanakathā

6. **Pācīnakoṇeti** puratthimaasse, pubbadakkhiṇadisābhāgeti attho. **Rājāyatanarukkanti** khīrikārukkhaṃ. **Tena kho pana samayenāti** ettha tasaddassa visayaṃ pucchitvā dassento āha “katarena samayenā”ti. Nisinnassa bhagavatoti yojanā. Devarājasaddassa aññe pajāpatiādayo devarājāno nivattetuṃ “sakko”ti vuttaṃ. **Tanti** harītakaṃ. Paribhuttamattasseva bhagavatoti sambandho. Nisinne bhagavati.

“Tena kho pana samayenā”ti iminā yena samayena bhagavā rājāyatanamūle nisīdi, tena kho pana samayenāti atthaṃ dasseti. **Ukkalajanapadatoti** ukkalanāmakā janapadamhā. Yasmiṃ dese bhagavā viharati, taṃ desanti yojanā. **Etthāti** “taṃ desaṃ addhānamaggappaṭipannā”tipade. **Tesanti** vāṇijānaṃ. Nātisālohitasaddānaṃ aññamaññavevacanattā “ñāti”ti vutte sālohitasaddassa attho siddhoti dassetuṃ vuttaṃ “ñātibhūtapubbā devatā”ti. **Sāti** devatā. **Nesanti** vāṇijānaṃ. **Tatoti** apavattanakāraṇā. **Teti** vāṇijā. **Idanti** apavattanaṃ. **Balinti** upahāraṃ. **Tesanti** vāṇijānaṃ. “Sabbimadhuphāṇitādīhi yojetvā”ti padaṃ pubbāparāpekkhaṃ, tasmā majjhe vuttaṃ. **Patimānethāti** ettha māna pūjāyaṃ pemaṇeti dhātupāthesu (saddanītidhātumālāyaṃ 18 nakārantadhātu) vuttattā pūjanapemaṇaṃ nāma atthato upaṭṭhahananti āha “upaṭṭhahathā”ti. **Taṃ voti** ettha taṃsaddo patimānavisayo, vosaddo tīsu vosaddesu tumhasaddassa kāriyo vosaddo, so ca catutthiyatthoti āha “taṃ patimānaṃ tumhāka”nti. **Vokāro** hi tividho tumhasaddassa kāriyo, yovacanassa kāriyo, padapūraṇoti. Tattha tumhasaddassa kāriyo pañcavidho paccattaupayogakaraṇasampadānasāmi vacanavaseṇāti. Tattha tumhasaddakāriyo sampadānavacano idhāhippeto. Tenāha “tumhāka”nti. “Ya”ntisaddassa visayo paṭiggahaṇatthoti āha “yaṃ paṭiggahaṇa”nti. **Assāti** bhaveyya. Yo patto ahoṣīti yojanā. **Assāti** bhagavato. **Soti** patto. Sujātāya āgacchantiyā evāti sambandho. Anādare cetāṃ sāmivacanaṃ. **Tenāti** antaradhāyhetunā. **Assāti** bhagavato. **Hatthesūti** karaṇatthe cetāṃ bhummavacanaṃ. Hatthehīti hi attho. **Kimhīti** kena.

Itoti āsaḥhīmāsajūṇhapakkhapañcamito. **Ettakaṃ kālanti** etaṃ pamāṇaṃ ekūnapaññāsadivasakālaṃ. **Jighacchāti** ghasitumicchā. **Pipāsāti** pātumicchā. **Assāti** bhagavato. Cetasā-cetosaddānaṃ sambandhāpekkhattā tesāṃ sambandhaṃ dassetuṃ vuttaṃ “attano”ti ca “bhagavato”ti ca. Imehi sambandhisaddānamasadisattā sambandhopi asadisoti dasseti. **Attanoti** catunnaṃ mahārājānaṃ. Samāsoyeva avayavīpadhāno hoti, vākyāṃ pana avayavapadhānoyevāti dassento āha “catūhi disāhi”ti. Pāḷiyaṃ “āgantvā”ti pāṭhaseso yojetabbo. “Silāmāye”ti iminā silāmāyameva **selāmāyanti** atthaṃ dasseti. **Idanti** “selāmāye patte”ti vacanaṃ. **Yeti** muggavaṇṇasilāmāye patte. **Tatoti** indanīlamanīmayapattaupanāmanato, paranti sambandho. **Tesanti** catunnaṃ mahārājānaṃ. Cattāropi adhiṭṭhahīti sambandho. **Yathāti** yenākārena, adhiṭṭhiyamāneti yojanā. **Ekasadisoti** ekamaṣena sadiso. Adhiṭṭhite patteti sambandho. **Patteti** ca karaṇatthe bhummavacanaṃ. Pattena paṭiggahesīti hi attho. **Paccaggheti** ettha ekāro smiṃvacanassa kāriyoti āha “paccagghasmi”nti. Paṭi agghanti padavibhāgaṃ katvā paṭisaddo pāṭekkattho, “aggha”nti sāmāññato vuttepi mahagghatthoti dassento āha “pāṭekkaṃ mahagghasmi”nti. Iminā cattāro ekato hutvā na mahagghā honti, pāṭekkaṃ pana mahagghā hontīti dasseti. Atha vā saupasaggo **paccagghasaddo** abhinavapariyāyoti āha “abhinave”ti. **Abhinavoti**

ca aciratanavattussa nāmaṃ. Aciratanavattu aciratanattā abbhūṇhaṃ viya hoti, tasmā vuttaṃ “**abbhūṇhe**”ti. “Taṅkhaṇe nibbattasmi”nti iminā tamevatthaṃ vibhāveti. **Dvevācīkā**tipadassa samāsavasena ca taddhitavasena ca nipphannabhāvaṃ dassento āha “dve vācā”tiādi. **Pattā**ti ettha eko itisaddo luttaniddiṭṭho. Iti tasmā dvevācīkāti atthoti yojanā. **Teti** vāṇijā. **Athā**ti tasmim kāle. **Teti** kese. **Tesanti** vāṇijānaṃ. **Pariharathā**ti attano abhivādanapaccuṭṭhānaṭṭhānanti paṭiggahetvā, paricchinditvā vā harathāti attho. **Teti** vāṇijā. **Amatenevā**ti amatena iva, abhisittā ivāti yojanā.

5. Brahmāyācanakathā

7. Bhagavā upasaṅkamīti sambandho. **Tasminti** ajapālanigrodhe. **Āciṇṇasamāciṇṇoti** ācarito sammācarito, na ekassa buddhassa āciṇṇo, atha kho sabbabuddhānaṃ āciṇṇasamāciṇṇo, atīciṇṇo niccāciṇṇoti attho. Saṅkhepena vuttamatthaṃ vitthārento āha “jānanti hī”tiādi. **Dhammadesananti** bhagavato dhammadesanaṃ, dhammadesanattāya vā bhagavantaṃ, bhagavantaṃ vā dhammadesanaṃ. **Tatoti** yācanakāraṇā. **Hīti** saccaṃ, yasmā vā. Lokasannivāso brahmagaruko yasmā, iti tasmā uppādessantīti yojanā. **Itī**tiādi nigamaṇaṃ.

Tatthāti parivittakānākarapāthe. “Pañcakāmaguṇesu allīya”ntīti iminā allīyanti abhiramitabbaṭṭhena lagganti etthāti **ālayā** pañca kāmāguṇāti vacanattaṃ dasseti. **Allīyantī**ti lagganti. “Pañca kāmāguṇe allīyanti”tipi pāṭho, evaṃ sati allīyanti abhiramitabbaṭṭhena seviyantīti **ālayā** pañca kāmāguṇāti vacanatto kātabbo. **Allīyantī**ti sevanti. **Teti** pañca kāmāguṇā. “**Yadida**”ntipadassa yaṃ idanti padavibhāgaṃ katvā “ya”nti ca “ida”nti ca sabbanāmapadanti āsaṅkā bhaveyyāti āha “yadidanti nipāto”ti. Iminā tīsu līngesu dvīsu ca vacanesu vināsaṃ, vikāraṃ vā visadisaṃ vā naayanattā nagamanattā abyayaṃ nāmāti dasseti, attho pana sabbanāmatthoyevāti daṭṭhabbaṃ. **Tassā**ti “yadida”ntinipātassa, atthoti sambandho. **Ṭhānanti** “ṭhānaṃ”itipadaṃ. **Paṭiccasamuppā**danti “paṭiccasamuppādo”itipadaṃ. Atthopi yuttoevāti daṭṭhabbaṃ. **Imesanti** saṅkhārādīnaṃ paccayuppanānaṃ. **Paccayā**ti avijjādīkaraṇā. “Idappaccayā evā”ti iminā **idappaccayatā**ti ettha tāpaccayassa svatthaṃ dīpeti “devatā”tiādisu (khu. pā. aṭṭha. evamiccādīpāṭhavaṇṇanā) viya.

So mamassa kilamathoti ettha taṃsaddassa visayaṃ dassento āha “yā ajānantānaṃ desanā nāmā”ti, iminā “deseyyaṃ, na ājāneyyu”nti dvīnameva kiriyāpadānaṃ tasaddassa visayabhāvaṃ dasseti, na ekassa kiriyāpadassa. **Soti** desanāsaṅkhāto kāyavacīpayogo, iminā vākyavisaye tasaddo uttarapadasseva līngavacanāni gaṇhātīti dasseti, samāsamajjhe pana tasaddo pubbapadasseva līngavacanāni gaṇhāti. Tena vuttaṃ “avijjā ca sā paccayo cā”ti (udā. aṭṭha. paṭhamabodhisuttavaṇṇanā) ca “abhidhammo ca so piṭakañcā”ti ca (pārā. aṭṭha. 1.paṭhamamahāsaṅgītikathā; dha. sa. aṭṭha. nidānakathā) ādi. **Kilamathoti** kāyakilamanahetu. Kilamati anenāti kilamatho. **Assā**ti bhaveyya. **Sā**ti kāyavacīpayogasaṅkhātā desanā. **Vihesā**ti kāyavihiṃsāhetu. Vihimsati imāyāti vihesā. Cittena pana buddhānaṃ kilamatho vā vihesā vā natthi arahattamaggena samucchinnattā. “Paṭibhaṃsū”ti ettha paṭīti kammappavacanīyayogattā “bhagavanta”nti ettha sāmīyathe upayogavacananti āha “bhagavato”ti. “**Anu acchariyā**”ti iminā “na acchariyā”ti padavibhāgaṃ nivatteti, punappunaṃ acchariyāti attho. **Paṭibhaṃsū**ti ettha paṭīsaddo paṭibhānattho, bhādhātu khāyanatthoti āha “paṭibhānaṃsaṅkhātassa ñāṇassa gocarā ahesu”nti. “Gocarā ahesu”nti iminā khāyanaṃ nāma atthato gocarabhāvena bhavananti dasseti.

Meti mama, mayā vā, adhigataṃ dhammaṃ pakāsītanti sambandho. Ariyamaggasotassa paṭī **paṭīsotanti** vutte nibbānamevāti āha “paṭīsotaṃ vuccati nibbāna”nti. **Nibbānagāminti** ariyamaggaṃ. Ariyamaggo hi yasmā nibbānaṃ gamayati, tasmā nibbānagāmīti vuccati. **Tamokhandhenā**ti ettha tamāsaddo avijjāpariyāyo, khandhasaddo rāsathoti āha “avijjārāsīnā”ti. “Ajjhotthaṭā”ti iminā **āvūṭā**ti ettha vudhātu āvaraṇatthoti dasseti. **Appossukkatāyā**ti ettha apatyūpasaggo abhāvattā, tāpaccayo bhāvattāti āha “nirussukkabhāvenā”ti.

8. Loketi sattaloke. **Mahābrahmeti** mahābrahmāno. **Apparajakkhajātīkā**ti ettha appaṃ rajam

akkhimhi etesanti apparajakkhā, apparajakkhā jāti sabhāvo etesanti **apparajakkhajātikāti** vacanattham dassento āha “paññāmaye”tiādi. “Paññāmaye”ti iminā maṃsamayeti attham nivatteti. **Etesanti** sattānaṃ. **Dhammassāti** tupaccayayoge chaṭṭhikammaṃ. Āpubbo ñādhātu paṭivijjhanatthoti āha “paṭivijjhitāro”ti.

Samvijjati malaṃ etesanti **samalā**, pūraṇakassapādikā cha satthāro, tehi. “Rāgādīhī”ti iminā malasarūpaṃ dasseti. **Avāpuretanti** ettha avapubbo ca āpubbo ca puradhātu vivaraṇatthoti āha “vivara eta”nti. Vakārassa pakāraṃ katvā “apāpureta”ntipi pāṭho. Amatasaddassa salilādayo nivattetuṃ vuttaṃ “nibbānassā”ti. Ime sattā suṇantūti sambandho. **Vimalenāti** ettha visaddo abhāvattthoti āha “abhāvato”ti. Iminā natthi malaṃ etassāti **vimaloti** vacanattham dasseti. “Sammāsambuddhenā”ti iminā aññapadatthasarūpaṃ dasseti. Anukkamena maggena bujjhitabbanti **anubuddhanti** vutte catusaccadhammo gahetabboti āha “catusaccadhamma”nti.

“Selamaye”ti iminā silāya nibbatto **seloti** vacanattham dasseti. “Sabbaññutaññāṇenā”ti iminā samantacakkhusarūpaṃ dasseti. Bhagavā tvampīti yojanā. Dhammasaddo paññāpariyāyoti āha “dhammamayaṃ paññāmayā”nti. Apeto soko imassāti **apetasoko**, bhagavā. Sokaṃ avataratīti **sokāvatiṇṇā**, janatā. Sokāvatiṇṇāṇca jātijarābhībhūtañcāti casaddo yojetabbo. Iminā casaddo luttaniddiṭṭhoti dasseti.

“Bhagavā”tipadaṃ “vīro”tiādisu yojetabbam. “Vīriyavantatāyā”ti iminā vīraṃ yassatthīti **vīroti** vacanattham dasseti. Saddasatthesu ālapanapadesu viggaho na kātabboti idaṃ ālapanāvatttham sandhāya vuttaṃ, idha pana tesamatthadassanatthāya viggaho vuttoti daṭṭhabbam. “Devaputta...pe... vijitattā”ti iminā vijito mārehi saṃgāmo anenāti **vijitasañgāmoti** vacanattham dasseti. Ettha ca khandhamāro maccumārena saṅgahito dvinnaṃ mārānaṃ ekato vijitattā. “Sattavāho”ti paṭhamakkharena ca “satthavāho”ti dutiyakkharena ca yutto. Tattha satthavāho viyāti “**satthavāho**”ti upacārena vutte dutiyakkharena yutto, satte vahahīti **sattavāhoti** mukhyato vutte paṭhamakkharena yutto. Idha pana paṭhamakkharena yuttoti āha “satte vahatīti sattavāho”ti. Natthi iṇaṃ imassāti **aṇaṇo** bhagavā.

9. Buddhacakkhunāti ettha cakkhu duvidham maṃsacakkhuñāṇacakkhuvāsena. Tatthāpi maṃsacakkhu duvidham pasādacakkhusasambhāracakkhuvāsena. Tattha pasādarūpaṃ pasādacakkhu nāma, bhamukaṭṭhiparicchinnō maṃsapinḍo sasambhāracakkhu nāma. Ñāṇacakkhu pana pañcavidham (paṭi. ma. aṭṭha. 1.1.3) dibbadhammapaññābuddhasamantacakkhuvāsena. Tattha dibbacakkhuabhiññāñāṇaṃ dibbacakkhu nāma, heṭṭhimamaggattayaṃ dhammacakkhu nāma, arahattamaggañāṇaṃ paññācakkhu nāma, indriyaparopariyattañāṇaṇca āsayānusayañāṇaṇca buddhacakkhu nāma, sabbaññutaññāṇaṃ samantacakkhu nāma. Idha pana “buddhacakkhunā”ti vuttattā yathāvuttadveññāṇiye vāti āha “indriya...pe... ñāṇena cā”ti. **Hīti** saccam. **Yesanti** sattānaṃ. **Saddhādīnīti** ādisaddena vīriyasatisamādhipaññāñāṇāni saṅgaṇhāti. **Tikkhānīti** tikhiṇāni. **Mudūnīti** sukhumatarāni. **Ākārāti** kāraṇā. Imāni tīṇi dukāni bāhiratthasamāsavasena vuttāni. Sukhena viññāpetabbāti **suviññāpayā**, tathā **duviññāpayāti** vacanattham dassento āha “ye kathitakāraṇa”ntiādi. Paraloko ca vajjaṇca **paralokavajjāni**, tāni bhayato passantīti **paralokavajjabhayadassāvīnōti** vacanattham dassento āha “ye”tiādi. Imāni dve dukāni kitavasena vuttāni, idha pacchimaduke “na appekacce paralokavajjabhayadassāvīno”ti dutiyapadaṃ na vuttaṃ, paṭisambhidāmaggapāliyaṃ (paṭi. ma. 1.111) pana yugaḷavasena vuttaṃ. Uppalāni ettha santīti **uppalinīti** vacanatthena gaccho vā latā vā pokkharāṇī vā vanaṃ vā “uppalinī”ti vuccati, idha pana “vana”nti āha “uppalavane”ti. Nimuggāneva hutvāti sambandho. **Posayantīti** vaḍḍhanti, iminā antonimuggāneva hutvāti posayantīti **antonimuggaposīnīti** vacanattham dasseti. “Udakena sama”nti iminā udakena samaṃ **samodakam**, samodakam hutvāti ṭhitānīti attham dasseti. “Atikkamitvā”ti iminā **accuggammātipadassa** atiuggantvāti attham dasseti.

Paṭicchannena āropitāti **pārutā**, na pārutā **apārutā**. Apārutā nāma atthato vivaraṇāti āha “vivaṭā”ti soti ariyamaggo. **Hīti** saccam. **Pacchimapadadvayeti** gāthāya uttamapadadvaye. **Ayamevatthoti** ayaṃ

vakkhamāno evaṃ attho daṭṭhabboti yojanā. **Hīti** vitthāro. **Na bhāsinti** ettha uttamapurisattā “āha”nti vuttam. “Devamanujesu”ti vattabbe ekasesavasena “**manujesū**”ti vuttanti āha “devamanussesū”ti.

6. Pañcavaggiyakathā

10. Ṭhānuppattiyāti kāraṇena uppattiyā. Nikkilesa jāti sabhāvo imassāti **nikkilesajātiko**. “Ñāṇa”nti avisesena vuttepi atthato anāvaraṇañānamevāti āha “sabbaññutaññāṇa”nti. **Itoti** “dhammaṃ desessāmī”ti parivittakkadivasato, heṭṭhāti sambandho. Devatā pana ālārassa kālaṅkaraṇameva jānāti, na ākiñcaññāyatane nibbattabhāvaṃ. Bhagavā pana sabbam jānāti, tena vuttam “ākiñcaññāyatane nibbatto”ti. “Parihīnattā”ti iminā **mahājāniyoti** ettha hādhatuyā attham dasseti. **Assāti** ālārassa. Mahatī jāniassāti “mahājāniko”ti vattabbe kakārassa yakāraṃ katvā “**mahājāniyo**”ti vuttam. **Akkhaṇeti** brahmacariyavāsāya anokāse, ākiñcaññāyatane attho. **Hiyyoti** anantarātītāhe. **Sopīti** udako rāmaputtopi. Pisaddo ālārāpekkho. Tattha ālāro kālāmo yāvaākiñcaññāyatanañhānalābhī hoti, tasmā ākiñcaññāyatane nibbatto. Udako rāmaputto yāvanevasaññānāsaññāyatanañhānalābhī hoti, tasmā nevasaññānāsaññāyatane nibbatoti daṭṭhabbam. “**Bahukārā**”ti ca “bahūpakārā”ti ca pāṭhassa dvidhā yuttabhāvaṃ dassetuṃ vuttam “bahukārāti bahūpakārā”ti. Pesitattabhāvaṃ manti yojanā. Iminā **pahitattanti** ettha attasaddo kāyavācakoti dasseti.

11. Antarāsaddena yuttattā “gayam, bodhi”nti ettha sāmīyatthe upayogavacananti āha “gayāya ca bodhimaṇḍassa cā”ti.

Gāthāya catūsu sabbasaddesu dutiyo **sabbasaddo** anavasesattho, sesā sāvasesatthāti dassento āha “sabbam tebhūmakadhamma”ntiādi. Vacanattho suviññeyyova. Arahattaphalassāpi taṇhākkhayattā vuttam “taṇhākkhaye nibbāne”ti. **Sayam**saddo attapariyāyo, **abhiññāyasaddo** tu tvāpaccayantoti āha “attanāva jānitvā”ti. “Sabbam catubhūmakadhamma”nti iminā ñādhatuyā kammaṃ dasseti. “Ayaṃ me ācariyo”ti uddisanākāradassanaṃ.

“Lokuttaradhamme”ti iminā lokiyadhamme pana ācariyo (mi. pa. 4.5.11) atthāti dasseti. **Paṭipuggaloti** ettha **paṭisaddo** paṭibhāgatthoti āha “paṭibhāgapuggalo”ti. Sadisapuggalo nāma natthīti attho. **Sītībhūtoti** sīti hutvā bhūto, sītībhāvaṃ vā patto.

Kāsīnanti bahuvacanavasena vuttattā janapadānaṃ nāmaṃ. Janapadasamūhassa raṭṭhanāmattā vuttam “kāsiratthe”ti. “Nagara”nti iminā **purasaddo** nagarapariyāyoti dasseti. **Paṭilābhāyāti** paṭilābhāpanatthāya. “Bheri”nti iminā **dundubhisaddo** bherivācakoti dasseti. Bheri hi “duṃdu”ntisaddena ubhi pūraṇametthāti **dundubhīti** vuccati. Dakārarakārānaṃ saṃyogaṃ katvā dundrubhītipi pāṭho atthi, so apāṭhoyeva. “Paharissāmī”ti ettha pahārasaddena **āhaññinti** ettha āpubbhanadhātuyā attham dasseti, ssāmīsaddena ajjataniimvibhattiyā anāgatakāle pavattabhāvaṃ, itisaddena gamanākāravācakassa itisaddassa lopabhāvaṃ dasseti.

Anantajinoti anantasāṅkhātassa sabbaññutaññāṇassa padaṭṭhānabhūtena arahattamaggañāṇena sabbakilesārīnaṃ jitavā, etena phalūpacārena anantajinabhāvaṃ dasseti. **Huveyya pāvusoti** ettha “huveyya api āvuso”ti padavibhāgaṃ katvā hudhātu sattatthavācako, apisaddo evaṃnāmavācakoti dassento āha āvuso “evaṃ nāma bhaveyyā”ti. Vakārassa pakāraṃ katvā “**hupeyyā**”ti pāṭhopi yujjatiyeva.

12. “Atthāya paṭipanno”ti iminā bāhullassa atthāya paṭipanno **bāhullikoti** vacanattham dasseti. **Padhānatoti** dukkaracariyāya padahanato. “Bhaṭṭho”ti iminā **vibbhantoti** ettha vipubbabhamudhātuyā anavaṭṭhānattho nāma atthato bhaṭṭhoti dasseti. **Sotanti** ettha sotasaddassa sotaviññāṇādivācakattā “sotindriya”nti vuttam. **Iriyāyāti** ettha iriyanaṃ caraṇam iriyāti vacanattham dassento āha “dukkaracariyāyā”ti. **Abhijānātha notī** ettha **nosaddo** nusaddatthoti āha “abhijānātha nū”ti. **Vākyanti**

vācakaṃ. **Saññāpetuntipadassa** saññāpanākāraṃ dassetuṃ vuttaṃ “ahaṃ buddho”ti.

13. Itoti “cakkhukaraṇī”tiādito. **Padatthatoti** padato ca atthato ca, padānaṃ atthato vā. **Itoti** yathāvuttato. **Hīti** saccaṃ. **Suttantakathanti** suttantavasena vuttavacanaṃ.

18. Devatākoṭṭhīti brahmasaṅkhātāhi devatākoṭṭhi. Patiṭṭhitassa tassa āyasmato sambandho. Sāva ehibhikkhuupasampadāti yojanā.

19. Dutiyadivase dhammacakkhuṃ udapādīti sambandho. “Dutiyadivase”tiādi pāṭipadadivasaṃ upanidhāya vuttaṃ. **Pakkhassāti** āsaḥhīmāsakālapakkhassa. Sabbeva te bhikkhūti yojanā. **Anattasuttenāti** anattalakkhaṇasuttanta (mahāva. 20; saṃ. ni. 3.59).

Pañcamiyā pakkhassāti pakkhassa pañcamiyā. **Lokasminti** sattaloke. “**Manussaarahantoti** iminā devaarahanto bahūti dasseti.

7. Pabbajjākathā

31. Porāṇānuporāṇānanti purāṇe ca anupurāṇe ca bhavānaṃ. **Ekasaṭṭhīti** eko ca saṭṭhi ca, ekena vā adhikā saṭṭhi ekasaṭṭhi.

Tatrāti tesu ekasaṭṭhimanussaarahantesu. **Pubbayogoti** pubbe kato upāyo, pubbūpanissayoti attho. **Vaggabandhenāti** samūhaṃ katvā bandhena. **Teti** pañcapaññāsa janā. **Jhāpessāmāti** dayhissāma. **Nīharimsūti** gāmato nīharimsu. **Tesūti** pañcapaññāsa janesu. Pañca jane ṭhapetvāti sambandho. **Sesāti** pañcahi janehi avasesā. **Soti** yaso dārako. **Tepīti** cattāropi janā. **Tatthāti** sarīre. **Te sabbepīti** yasassa mātāpītibharyāhi saddhiṃ sabbepi te sahāyakā. **Tenāti** pubbayogena.

Āmantesīti kathesi.

32. Dibbesu visayesu bhavā **dibbā** lobhapāsāti dassento āha “dibbā nāmā”tiādi. **Lobhapāsāti** lobhasaṅkhātā bandhanā. **Asavanatāti** ettha karaṇatthe paccattavacananti āha “asavanatāyā”ti. **Parihāyantīti** ettha kena parihāyantīti āha “visesādhigamato”ti. **Visesādhigamatoti** maggaphalasaṅkhātassa visesassa adhigamato.

33. Antaṃ lāmakāṃ karotīti **antakoti** vacanattaṃ dassento āha “lāmakā”ti. “Hīnasattā”ti iminā antakassa sarūpaṃ dasseti. Āmantanapadametaṃ. **Tanti** rāgapāsaṃ. **Hīti** saccaṃ. **Soti** māro pāpimā. Antalikkhe carantānaṃ pañcābhiññānampi bandhanattā antalikkhe carati pavattatīti **antalikkhacaroti** vacanathena rāgapāso “antalikkhacaro”ti mārena pāpimatā vutto.

34. Nānājanapadatoti ekissāpi disāya nānājanapadato. “Anujānāmi...pe... pabbājethā”tiādimhi vinicchayo evaṃ veditabboti yojanā. Pabbājentena bhikkhunā pabbājetabboti sambandho. Ye paṭikkhittā puggalāti yojanā. **Paratoti** parasmiṃ. “Na bhikkhave...pe... pabbājetabbo”ti pāḷiṃ (mahāva. 89) ādim katvāti yojanā. **Teti** paṭikkhittapuggale. **Sopi cāti** sopi ca puggalo. Anuññatoyeva pabbājetabboti sambandho. **Tassa cāti** puggalassa ca, atha vā tesaṃcā mātāpītūnaṃ. Vacanavipallāso hesa. Anujānanalakkhaṇaṃ vaṇṇayissāmāti sambandho.

Evanti iminā vuttanayena. Casaddo vākyasampiṇḍanatto. Sace acchinnakeso hoti ca, sace ekasīmāya aññepi bhikkhū atthi cāti attho. **Aññepīti** attanā aparepi. **Bhaṇḍūti** muṇḍo, soyeva kammaṃ **bhaṇḍukammaṃ**. **Tassāti** bhaṇḍukamma. **Okāsoti** pabbajjāya khaṇo. “Okāsaṃ na labhati”ti vatvā tassa kāraṇaṃ dassetuṃ vuttaṃ “sace”tiādi.

Avuttopīti ettha pisaddo vutto pana kā nāma kathāti dasseti. **Upajjhāyaṃ uddissa pabbājetīti** ettha pabbajjā catubbidhā tāpasapabbajjā paribbājakapabbajjā sāmaṇerapabbajjā upasampadapabbajjāti. Tattha kesamassuharaṇaṃ **tāpasapabbajjā** nāma vakkalādīgahaṇato paṭhamameva vajitabbattā. **Isipabbajjātipi** tassāyeva nāmaṃ. Kesamassuharaṇameva **paribbājakapabbajjā** nāma kāsāyādīgahaṇato paṭhamameva vajitabbattā. Kesamassuharaṇaṃ kāsāyacchādanaṃ **sāmaṇerapabbajjā** nāma saraṇagahaṇato paṭhamameva vajitabbattā. **Upasampadapabbajjā** tividhā ehibhikkhuupasampadapabbajjā saraṇagahaṇūpasampadapabbajjā ñatticatutthavācīkūpasampadapabbajjāti. Tattha **ehibhikkhūpasampadapabbajjāyaṃ** kesamassuharaṇādi sabbam ekatova sampajjati “ehi bhikkhū”ti bhagavato vacanena abhinipphannattā. **Saraṇagahaṇūpasampadapabbajjā** sāmaṇerapabbajjasadisāyeva. Kesamassuharaṇaṃ kāsāyacchādanaṃ saraṇagahaṇaṃ **ñatticatutthavācīkūpasampadapabbajjā** nāma kammavācāgahaṇato paṭhamameva vajitabbattā. Tattha sāmaṇerapabbajjā sandhāya vuttam “upajjhāyaṃ uddissa pabbājetī”ti. **Upajjhāyaṃ uddissāti** upajjhāyassa veyyāvaccakaraṭṭhānaniyamaṃ katvā. Pabbajjākamme attano issariyamakatvāti attho. Daharena bhikkhunā kesacchedanaṃ kāsāyacchādanaṃ saraṇadānanti tīṇi kiccāni kātābbāniyeva. Keci “saraṇāni pana sayam dātābbāni”ti pāṭham idhānetvā daharena bhikkhunā saraṇāni na dātābbāni vadanti, tam na gahetabbaṃ daharassa bhikkhuttā, bhikkhūnaṃ pabbājetuṃ labhanattā ca. Upajjhāyo ce kesacchedanaṃ kāsāyacchādanaṃ akatvā pabbajjattham saraṇāniyeva deti, na ruhati pabbajjā pabbajjāya akatābbattā. Kammavācam sāvetaṃ upasampādeti, ruhati upasampadā apattacīvarānaṃ upasampadasiddhito, kammavipattiyā abhāvato ca. **Khaṇḍasīmanti** upacārasīmattāṃ baddhasīmaṃ. **Pabbājetvāti** kesacchedanaṃ sandhāya vuttam “kāsāyāni acchādetvā”ti kāsāyacchādanaṃ visuṃ vuttattā. Sāmaṇerassa saraṇadānaṃ aruhattā “saraṇāni pana sayam dātābbāni”ti vuttam. Purisaṃ pabbājetunti sambandho. **Hīti** saccam. **Āṇattiyāti** bhikkhūnaṃ āṇattiyā. **Yena kenacīti** gahaṭṭhapabbajjitesu yena kenaci.

“Bhabbarūpo”ti vatvā tassa attham dassetuṃ vuttam “sahetuko”ti. **Sahetukoti** maggaphalānaṃ upanissayehi saha pavatto. **Yasassīti** parivārayasena ca kittiyasena ca samannāgato. **Okāsam katvāpīti** okāsam katvā eva. **Sayamevāti** na añño āṇāpetabbo. **Ettoyevāti** dassanaṭṭhānatoyeva. **Assāti** pabbajjāpekkhassa. **Khajju vāti** kaṇḍuvanaṃ vā. “Kacchu vā”tipi pāṭho, pāmaṃ vāti attho. **Pīlakā vāti** phoṭā vā. **Ettakenāti** etapamaṇena ghaṃsitvā nhāpanamattena. **Anivattidhammāti** gihibhāvaṃ anivattanasabhāvā. **Kataññūti** katassūpakārassa jānanasīlā. **Katavedinoti** kataññūpakārassa vedam pākāṭam karonto.

Aniyyānikakathāti yāvadattham supitvā yāvadattham bhuñjītvā cittakeḷim karonto anukkaṇṭhito viharāhītiādikā kathā. Nakathetabbaṃ dassetvā kathetabbaṃ dassento āha “athakhvassā”ti. **Assāti** pabbajjāpekkhassa. Ācikkhanākāraṃ dassento āha “ācikkhantena cā”tiādi. **Vaṇṇa...pe...vasenāti** vaṇṇo ca saṅghānaṃ gandho ca āsāyo ca okāso ca, tesam vasena, ācikkhitabbanti sambandho. **Hīti** phalajotako, ācikkhanassa phalaṃ vakkhānti attho. **Soti** pabbajjāpekkho. **Pubbeti** pubbhāve, pabbajanato pubbe vā. Kaṇṭakavedhāpekkho paripakkagaṇḍo viya ñāṇam pavattatīti yojanā. **Assāti** pabbajjāpekkhassa. **Indāsānīti** sakkassa vajirāvudho. So hi indena asīyati khipīyatīti indāsānīti vuccati. Indāsāni pabbate cuṇṇayamānā viya sabbe kilese cuṇṇayamānaṃyevāti yojanā. **Khurageyevāti** khurassa koṭiyameva. Khurakammapariyosāneyevāti attho. **Hīti** saccam. **Tasmāti** yasmā pattā, tasmā. **Assāti** pabbajjāpekkhassa.

Gihigandhanti gehe ṭhitassa janassa gandham. **Athāpīti** yadipi acchādetīti sambandho. **Assāti** pabbajjāpekkhassa. **Ācariyo vāti** saraṇadānācariyo vā kammavācācariyo vā ovādācariyo vā. **Tamyeva vāti** pabbajjāpekkhameva vā. **Tena bhikkhunāvāti** ācariyupajjhāyabhikkhunā eva.

Anāṇattiyāti ācariyupajjhāyehi anāṇattiyā. Iminā ācariyupajjhāyehi anāṇattena yena kenaci nivāsānādīni na kātābbāni dasseti. **Bhikkhunāti** ācariyupajjhāyabhikkhunā. **Tassevāti** pabbajjāpekkhasseva. **Upajjhāyamūlaketi** upajjhāyamūlake nivāsānapārūpane. **Ayanti** vinicchayo.

Tatthāti pabbajjūpasampadaṭṭhāne. **Tesanti** bhikkhūnaṃ. **Athā**ti vandāpanato pacchā, vandāpanassa anantarā vā. “Evaṃ vadehī”ti pālinayanidassanamukhena “yamahaṃ vadāmi, taṃ vadehī”ti aṭṭhakathānayaṃ nidasseti. **Athā**ti tadanantaraṃ. **Assā**ti pabbajjāpekkhassa, dātabbānīti sambandho. **Ekapadampī**ti tīsu vākyapadesu ekaṃ vākyapadampi, navasu vā vibhatyantapadesu ekapadampi. **Ekakkharampī**ti catuvīsatakkhāsesu ekakkharampī.

Ekato suddhiyāti ekasseva kammavācācariyassa ṭhānakaraṇasampattiyā sujjanena. **Ubhato suddhiyāvā**ti ubhayesaṃ saraṇadānācariyasāmaṇeraṇaṃ sujjanena eva. **Ṭhānakaraṇasampadanti** urādiṭṭhānānaṃ saṃvutādikaraṇānaṃ sampadaṃ. **Vattunti** ṭhānakaraṇasampadaṃ vattuṃ. Na **sakkotī**ti vattuṃ na sakkotīti yojanā.

Imānīti saraṇāni. Casaddo upanyāso, panasaddo padālaṅkāro. **Ekasambandhānī**ti ekato sambandhāni. Anunāsikantaṃ katvā dānakāle “buddhaṃ”iti “saraṇaṃ”iti padānaṃ “saraṇaṃ”iti “gacchāmi”iti padānaṃ antarā vicchedamakavā ekasambandhameva katvā dātabbānīti vuttaṃ hoti. Kasmā tiṇṇaṃ padānamantarā byavadhānassa kassaci akkharassa abhāvato. **Vicchinditvā**ti vicchedaṃ katvā. Makāraṇaṃ katvā dānakāle tiṇṇaṃ padānamantarā ekasambandhamakatvā vicchinditvā eva katvā dātabbānīti vuttaṃ hoti. Kasmā? Tiṇṇaṃ padānamantarā byavadhānassa nissarassa makāraṇassa atthibhāvato. Andhakaṭṭhakathāyaṃ vuttanti sambandho. **Tanti** vacanaṃ, “natthī”tipade kattā, “na vutta”ntipade kammaṃ. **Tathā**ti “ahaṃ bhante buddharakkhito”tiādinā ākārena, avadantassa saraṇaṃ na kuppāti, bukāradakārādīnaṃ byañjanānaṃ ṭhānakaraṇasampadaṃ hāpentasseva saraṇaṃ kuppāti adhippāyo.

“Tikkhattu”nti iminā sakim vā dvikkhattuṃ vā na vaṭṭatīti dīpeti. Tikkhattuto adhikaṃ pana sahasakkhattuṃ vaṭṭatiyeva. **Tatthā**ti tāsū pabbajjūpasampadāsū. **Paratoti** parasmim. **Sāti** upasampadā. Pabbajjā pana anuññātā evāti sambandho. **Paratopī**ti pisaddo pubbāpekkho. **Sāti** pabbajjā. **Ettāvātī**ti ettakena kesacchedanakāsāyachchādanasaraṇadānena. **Hīti** phalajotako.

Esāti eso sāmaṇeroti attho. “Gatimā”ti vatvā tassatthaṃ dassento āha “paṇḍitajātiko”ti. **Athā**ti evaṃ sati. **Assāti** sāmaṇerassa. **Tasmiṃyeva ṭhāneti** sāmaṇerabhūmiyaṃ ṭhitaṭṭhāneyeva. Yathā bhagavatā uddiṭṭhāni, tathā uddisitabbānīti yojanā. **Etanti** “anujānāmi...pe... jātarūpa rajatapaṭiggahaṇā veramaṇī”ti vacanaṃ.

Tanti andhakaṭṭhakathāyaṃ vuttavacanaṃ. **Yathāpāliyāvā**ti evasaddo sanniṭṭhānattho, tena yathāpāliyāva uddisitabbāni. Yathāpāliṃ visajjetvā aññathā eva uddisitabbānīti vādaṃ nivāreti. Yathāpāliṃ visajjetvā aññathā “pāṇātipātā veramaṇiṃ sikkhāpadaṃ samādiyāmi”ti uddisantopi niddosoyeva. **Hīti** saccaṃ, yasmā vā. **Tānī**ti sikkhāpadāni. **Yāvā**ti yattakaṃ kālaṃ na jānāti, na kusalo hotīti sambandho. **Santikāvacaroyevā**ti ācariyupajjhāyānaṃ samīpe avacārova. **Assāti** sāmaṇerassa. **Kappiyākappiyanti** dasasikkhāpadavinimuttaṃ kappiyaṃ parāmāsādiṅca akappiyaṃ aparāmāsādiṅca. **Tenāpī**ti sāmaṇerenāpi. **Nāsanaṅgānī**ti liṅganāsanaṅgāni. **Sādhukaṃ sikkhitabbanti** sādhukaṃ asikkhantassa liṅganāsanaṅca daṇḍakammaṇāsanaṅca hotīti adhippāyo.

10. Dutiyamārakathā

35. Mayhantipadassa “anuppattā sacchikatā”tipadesu chaṭṭhīkattubhāvaṃ dassento āha “mayā khoti attho”ti. “Atha vā”tiādinā “mayha”ntipadassa “yoniso manasikārā, yoniso sammappadhānā”tipadesu sambandhabhāvaṃ dasseti. “Yoniso manasikārā, yoniso sammappadhānā”ti ettha kāraṇatthe nissakkavacananti āha “tena hetunā”ti. “Punā”tiādinā “mayha”ntipadaṃ “yoniso manasikārā, yoniso sammappadhānā”tipadesu sāmyatthe sāmibhāvena yojetvā puna “anuppattā, sacchikatā”ti padesu kattutthe sāmibhāvena vibhattivipallāso kātabboti dasseti.

11. Bhaddavaggiyakathā

36. Bhaddaṃ rūpañca cittañca etesamatthīti **bhaddakā**. Vaggabandhanaṃ **vaggo** uttarapadalopena, vaggena carantīti **vaggiyā**. Bhaddakā ca te vaggiyā cāti **bhaddavaggiyā** kakāralopenāti atthaṃ dassento āha “bhaddavaggiyā”tiādi. “Vokāro nipātamatto”ti iminā tumhasaddassa ca yovacanassa ca kāriyabhāvaṃ nivatteti. **Hīti** saccaṃ. **Teti** bhaddavaggiyā. **Idanti** pañcasīlarakkhanaṃ. **Pubbakammanti** pubbe upacitaṃ kusalakammaṃ.

12. Uruvelapāṭihāriyakathā

38. **Pariyādiyeyyanti** ettha dādhātussa parīti ca āti ca upasaggavasena abhibhavanatthoti āha “abhibhaveyya”nti.

39. **Pacchā pakkhittāti** saṅgīto paraṃ potthakārūlḥehi ṭhapitāti attho.

44. “Evaṃ vadanto viya oṇato”ti iminā “āharahatto”tipadassa taddhitabhāvaṃ dasseti. Vitthiṇṇamukhattā mandaṃ hīnaṃ atimukhametāsanti vacanatthena aggikapālā **mandāmukhiyoti** vuccantīti āha “aggibhājanāni vuccantī”ti.

51. Yasmā yo nāgadamanakālo ciraṃ patati pavattati, tasmā so **cirapatikoti** vuccati, tasmā cirapatikā paṭṭhāya abhippasannāti yojanā. Iti imamatthaṃ dassento āha “cirakālato paṭṭhāyā”ti.

52. **Sabbatthāti** sabbesu “jaṭāmissa”ntiādi padesu. **Khārikājanti** ettha kamaṇḍaluādikā tāpasaparikkhārā khārīti vuccanti, khārisaṅkhātena bhārena pūrito kājo khārikājoti atthaṃ ekadesena dassento āha “khāribhāro”ti.

13. Bimbisārasamāgamakathā

55. **Laṭṭhisaddo** taruṇarukkavācako “ambalaṭṭhikāya”ntiādisu (dī. ni. 1.2), idhāpi taruṇatālarukkho laṭṭhi nāmāti dassento āha “tāluyyāne”ti. **Vaṭarukkheti** nigrodharukkhe. Ettha “vaṭa”iti iminā vaṭarukkho bahumūlattā suṭṭhuṃ patiṭṭhātīti atthena **suppatiṭṭho** nāmāti dasseti. “Rukkhe”iti iminā **cetiya**saddo cetiyarukkhe vattatīti dasseti, devālayaṅca thūpañca nivatteti. **Tassāti** vaṭarukkhasa. **Etanti** “suppatiṭṭhe cetiye”ti etaṃ nāmaṃ. Lokavohāravasena dasasahassasaṅkhāte saṅkhyāvisese nīharitvā yujjītabbanti **niyutanti** vacanatthena dasasahassaṃ niyutaṃ nāmāti dassento āha “ekaniyutaṃ dasasahassāni”ti. “**Nahuta**”ntipi pāṭho, so ayutto nahutasaṅkhātena saṅkhyāvisesena missībhāvena paṇṇagattā. **Tesanti** dvādasaniyutānaṃ brāhmaṇagahapatikānaṃ.

“Kisaraṭṭatā”ti iminā kiso ko attā etesanti **kisakāti** vacanatthaṃ dasseti. Kakāro hettha attavācako. “Ovādako”ti iminā **ovadānoti** ettha yupaccayo kattutthoti dasseti. Gāthābandhattā akārassa dīgho. “Atha vā”tiādinā kisako hutvā aññe ovadāno **kisakovadānoti** vacanatthaṃ dasseti. **Idanti** idaṃ atthajātaṃ, ayamatto vā. Tvaṃ pahāsīti sambandho. **Tanti** tuvaṃ. **Iti** vuttaṃ hotīti yojanā.

Kāmitthiyoti ekāralopavasena sandhīti āha “kāme itthiyo cā”ti. **Upacīsūti** ettha kāmakhandaḥkilesaabhisaṅkhārasaṅkhātesu catūsu upadhīsu khandhupadhi adhippetoti āha “khandhupadhīsū”ti.

Kocarahīti ettha **kosaddo** “ko te balaṃ mahārājā”tiādisu (jā. 2.22.1880) viya kvasaddatthoti āha “kvacarahī”ti. Nipātoyevesa.

Padasaddassa caraṇapadādayo nivattetuṃ vuttaṃ “nibbānapada”nti. “Santasabhāvatāyā”tiādinā santo sabhāvo imassa padassāti **santaṃ**. Natthi upadhayo etthāti **anupadhikaṃ**. Natthi kiñcanametthāti **akiñcanaṃ**. Tīsu bhavesu na sañjatīti **asattaṃ**. Aññathā na bhavatīti **anaññathābhāvi**. Aññena kenaci

na netabbanti **anaññaneyyanti** vacanattham dasseti. **Tenāti** “santa”ntiādipadena. **Meti** mama, manoti sambandho. **Ettha** devamanussaloke me mano rato nāmāti kiṃ vakkhāmi. **Iti** imamattham dasseti yojanā.

56. Tañcāti sāvaka bhāvañca.

57. Assāsakāti ettha āpubbo sāsadhātu āpubba sisadhātunā sadiso, “me”ti chaṭṭhīyogattā ṇvupaccayo ca bhāvatthoti āha “āsisanā”ti. “Patthanā”ti iminā āpubbasisadhātuyā attham dasseti. **Assāti** bimbisārarañño. **Tatthāti** ratanattaye. **Nicchayagamanamevāti** “saraṇa”itinicchayena jānanameva gato. **Attasanniyyātana**nti attano attānaṃ ratanattaye sanniyyātanaṃ. Iminā attasanniyyātana, paṇipāta, tapparāyana, sissabhāvūpagamanasañkhātesu catūsu saraṇagamanesu (dī. ni. aṭṭha. 1.250; ma. ni. aṭṭha. 1.56; khu. pā. aṭṭha. 1.saraṇagamanagamakavibhāvanā) attasanniyyātanasaraṇagamanam dīpeti. **Ayanti** bimbisāro rājā. **Tanti** niyatasaraṇatam. **Paṇipātagamanañcāti** ettha **paṇīti** karo. Yathā hi pādapadasaddā dīgharassavasena hutvā caraṇam vadanti, evaṃ paṇipāṇisaddā karaṇam vadanti. Tasmā vuttam “paṇīti karo”ti. Patanam **pāto**, paṇino pāto **paṇipāto**. Atthato añjalipaṇamananti vuttam hoti. Tassa gamanañca gacchantoti attho. Iminā paṇipātasaraṇagamanam dīpeti. Casaddo “pākaṭa”nti etthāpi yojetabbo. Pākaṭañca karontoti hi attho.

58. Siṅgīnikkhasavaṇṇoti ettha siṅgīsāñkhāto nikkho siṅgīnikkho, tena samāno vaṇṇo etassāti siṅgīnikkhasavaṇṇoti vacanattham dassento āha “siṅgīsuvāṇṇanikkhena samānavaṇṇo”ti. Tattha “suvāṇṇa”itipadena nikkhasaddassa suvaṇṇattham dasseti, pañcasuvaṇṇādayo atthe nivatteti. “Samāna”itipadena savaṇṇoti ettha sakāro samānasaddasseva kāriyoti dasseti. **Sabbesūti** akhilesu cakkhādiindriyesu. **Dantoti** damito. Indriyasamvaroti vuttam hoti. Tamevattham pākaṭam karonto āha “bhagavato hī”tiādi.

59. Oṇīto pattato pāṇi yenāti **oṇītapattapāṇīti** vacanattham dassento āha “pattato cā”tiādi. “Apanītapāṇi”nti iminā oṇītasaddo apanītattho, pāṇisaddena ca sambandhitabboti dasseti. “Sallakkhetvā”ti iminā “bhagavanta”nti imaṃ kammaṃ “sallakkhetvā”ti pāṭhasesena yojetabbanti dasseti. **Ekamantanti** ettha antasaddo samīpadesattho, koṭidesattho vā hoti, upayogavacanañca bhummattathe hotīti dassento āha “ekasmiṃ padese”ti. Atthikapayoge karaṇassa sambhavato āha “buddhābhivādanagamanena vā dhammassavanagamanena vā”ti. **Appākiṇṇanti** ettha appasaddo paṭisedhatthoti āha “anākiṇṇa”nti. “Abbokiṇṇa”ntipi pāṭho. **Appanigghosanti** ettha “appasadda”ntipadena vacanasaddassa gahitattā iminā pārisesanayena nagaranigghosasaddoyeva gahetabboti āha “nagaranigghosasaddena appanigghosa”nti. Tisu pāṭhesu paṭhamena pāṭhena janassa vāto **janavāto**, tena virahitam **vijanavātanti** vikappam dasseti. Dutiyena janassa vādo **janavādo**, tena virahitam **vijanavādanti** vikappam dasseti. Tatiyena janassa pāto sañcaraṇam **janapāto**, tena virahitam **vijanapātanti** vikappam dasseti. Rahassam karīyati etthāti **rāhasseyyakam**. Manussānam rāhasseyyakam **manussarāhasseyyakanti** vacanattham dasseti “manussāna”ntiādinā.

14. Sāriputtamoggallāna pabbajjā kathā

60. “Teti sāriputtamoggallānā. Agamaṃsu kirāti yojanā. **Tatrāti** giraggasamajje. **Athāti** parivittakānantaram. **Tassāti** sañcayassa. **Pāranti** paratīram. **Etthāti** tumhākam vāde. **Idanti** ayam vādo ettakoyevāti attho. **Yoti** yo koci. Tvañca ahañca **amhe**, tesu. Nāmatumhasāñkhātesu hi tisu saddesu ekasesena kattabbesu pacchimasseva ekaseso kātabbo. **Tenāti** katikakaraṇahetunā.

Saṃkhepena vuttam vitthārena dassento āha “idaṃ hī”tiādi. **Atthikehīti** amatena atthikehi. **Upaññātam** magganti amatassa maggo upagantvā ñāto. Ñāto ceva upagato cāti saha upasaggena padaṃ parivattitvā attham kathento upasagattho ca dhātuttho ca visumyeva hotīti ñāpeti. Atthikehi amhehi upaññātam nibbānam maggam magganto anubandheyanti vā dassento āha “atha vā”tiādi. Maggaphalapaccavekkhaṇañāṇehi upagantvā ñātabbanti **upaññātam** nibbānam. **Maggadhāthuyā**

anvesanattham dassento āha ‘pariyesanto’ ti.

Sāriputtopi pañham pucchīti sambandho. **Kamaṇḍalutoti** kuṇḍikato. Attano ca paresaṅca akathanena antare vivaraṃ paṭisandhatīti **paṭisandhāro**, taṃ. **Etthāti** ‘na tyāham sakkomī’ tipade. Adhippāyo evaṃ veditabboti yojanā. **Ettakanti** ettakam pañham. **Imassāti** paribbājakassa. **Avisayabhāvanti** attano avisayabhāvaṃ.

Hetum paṭicca bhavantīti **hetuppabhavāti** vacanatthena pañcakkhandhā hetuppabhavā nāmāti dassento āha ‘hetuppabhavā nāma pañcakkhandhā’ ti. **Tenāti** ‘ye dhammā hetuppabhavā’ ti padena. **Assāti** sāriputtaparibbājakassa. ‘Tesaṃ hetu nāma samudayasacca’ nti iminā hinoti etasmā phalanti **hetūti** vacanatthena samudayasaccaṃ hetu nāmāti dasseti. **Tañcāti** samudayasaccaṅca. **Tesanti** ettha tasaddassa viṣayaṃ dassetuṃ vuttam ‘ubhinnampi saccāna’ nti. Apavattivāsena nirujjhati etthāti **nirodho**. **Tañcāti** nirodhaṅca. **Tenāti** ‘tesaṅca yo nirodho’ tipadena. **Assāti** sāriputtaparibbājakassa. **Etthāti** imissaṃ gāthāyaṃ, catūsu saccesu vā. **Nayatoti** nānantarikanayato, avinābhāvanayato vā, nettidesanāhāranayato vā. Tamevattham pākaṭam karonto āha ‘nirodhe hī’ tiādi. Ekadesasarūpekasesanayena vā maggasaccaṃ gahetabbanti dassento āha ‘atha vā’ tiādi. Nirodho ca nirodhūpāyo ca **nirodhoti** ekadesasarūpekaseso kātabbo. **Tesañcāti** ettha avuttasampiṇḍanatthena casaddena maggasaccaṃ gahetabbanti vadanti. Ayaṃ nayo aṭṭhakathāyaṃ na vutto. **Tamevatthanti** catusaccasaṅkhātam tamevattham. **Paṭipādentoti** nigamento.

‘Sacepī’ ti iminā **yadīti** padassattham vaṇṇeti. ‘Ettakamevā’ ti iminā **tāvadevāti** padassattham vaṇṇeti. ‘Ito uttari natthī’ ti iminā evakārassa phalaṃ dasseti. **Itoti** sotāpattiphalato. **‘Idam...pe... pattabba’** nti iminā ‘ettakamevā’ ti padassa atthasarūpaṃ dasseti. ‘Eso eva dhammo’ ti iminā ‘eseva dhammo’ tipadassa attham vaṇṇeti. **Paccabyatthāti** patiavapubbo idhātu paṭividdhatthoti āha ‘paṭividdhatthā’ ti. **Tumhehīti** assajittheraṃ sandhāyāha. Iminā ‘paccabyatthā’ ti ettha hiyyattanīparassapadamajjhimapurisabahuvacanatthavibhattiṃ dipeti. **Kappanahutehīti** kappānaṃ nahutehi, koṭipakoṭisatasahassānaṃ satehi nahutehīti attho. **Abbatānti** abhiatātam. Amhehi aditthameva hutvā atikkamāpitanti attho.

62. Ārammaṇabhūtassa nibbānassa gambhīrattā ārammaṇikabhūtam nānampi gambhīramevādhippetanti āha ‘gambhīrassa ca nānassā’ ti. Yathā hi saṅhavatthassa sibbanatthāya saṅhasūci adhippetāti. Upadhīnaṃ sammā khayatthena nibbānaṃ **upadhisaṅkhayaṃ** nāmāti āha ‘upadhisaṅkhayeti nibbāne’ ti. **Tadārammaṇāyāti** taṃnibbānārammaṇāya. **Vimuttīyāti** phalavimuttīyā. **Sāvakaṇārammānāyati** aggasāvakaṇārammānāyati. **Tesūti** sāriputtamoggallānesu. Aḍḍhamāsenā arahatte patiṭṭhitoti sambandho.

Atīteti kappasatasahassādhike asaṅkhyeyyamattake. **Tassāti** buddhassa santike aggasāvakaṇābhāvaṃ patthesīti yojanā. **Assameti** munīnaṃ ṭhāne. Tañhi ā kodham, ā bhūso vā rāgādayo samenti etthāti **assamoti** vuccati, tasmim. Patthayitvā ca pesesīti sambandho. **Tatthāti** nīluppalamaṇḍape. **Tesūti** tāpasasetthīsu.

63. **Yesanti** kulānaṃ. ‘Vidhavabhāvāyā’ ti iminā vidhavāya bhāvo **vedhabyanti** vacanattham dasseti. **Vidhavāti** ca patisuññā. Sā hi dhavena vigatāti ‘vidhavā’ ti ca, vigato dhavo imissāti ‘vidhavā’ ti ca vuccati. **Ubhayanāpīti** puttapabbajjapatipabbajjasāṅkhātena duvidhenapi.

Sañcayānīti ettha nissayūpacārena nissaye nissitūpacāro hotīti āha ‘sañcayassa antevāsikānī’ ti. Atha vā ṇapaccayo tassedamatthe hotīti āha ‘sañcayassa antevāsikānī’ ti. **‘Magadhāna’** nti bahuvacanasena vuttattā janapadassa nāmanti āha ‘magadhānaṃ janapadassā’ ti. **Giribbajanti** ettha vajo viyāti **vajo**, giri. Vajasadiso giri etthāti giribbajam padaheṭṭhupariyavasena, nagaram. ‘Mahāvīriyavanto’ ti iminā mahanto vīro etesaṃ tathāgatānanti **mahāvīrāti** vacanattham dasseti. **Dhammena nayamānānaṃ kā usūyā vijānatanti** ettha kaccāyananayena (kaccāyane 277 sutte)

usūyapayoge sampadānaṃ hotīti āsaṅkā bhaveyyāti āha “bhummatthe sāmivacanaṃ, upayogatthe vā”ti. **Vijānantānanti** vijānantesu tathāgatesu, vijānante vā.

15. Upajjhāyavattakathā

64. Anupajjhāyakāti ettha vajjāvajjaṃ upagantvā jhāyatīti **upajjhāyo**, so natthi etesanti **anupajjhāyakāti** atthaṃ dassento āha “vajjāvajja”ntiādi. “Piṇḍāya caraṇakapatta”nti iminā piṇḍāya uddissa, uttḥahitvā vā tiṭṭhati anenāti **uttiṭṭho**, soyeva patto **uttiṭṭhapattoti** atthaṃ dasseti. “Uttiṭṭhe na pamajjeyyā”tiādīsu (dha. pa. 168) pana piṇḍāya caraṇaṃ “uttiṭṭha”nti vuccati. Tasmā tattha piṇḍāya uddissa, uttḥahitvā vā tiṭṭhanaṃ **uttiṭṭhanti** vacanattho kātabbo. “Piṇḍāya caraṇapatta”nti idam vacanaṃ “tasmiṅhi manussā ucchiṭṭhasaññino”tipadaṃ laṅghitvā “tasmā uttiṭṭhapattanti vutta”ntipadena yojetabbaṃ, tasmā piṇḍāya caraṇakapattattā uttiṭṭhapattanti vuttanti vuttaṃ hoti. Tasmim manussā kiṃsaññinoti āha “tasmiṅhi manussā ucchiṭṭhasaññino”ti. Tasmim eva uttiṭṭhapatte pabbajitānaṃ paribhogabhāvena manussehi avasajjitabbattā, avachaḍḍetabbattā vā manussā ucchiṭṭhasaññino hontīti yojanā. Pabbajitānaṃ piṇḍāya caraṇakapattattā uttiṭṭhapattanti vuttaṃ, manussānaṃ pana avasajjitapattattā ucchiṭṭhapattanti vuttanti adhippāyo. Uttiṭṭha pattantipadaṃ vākyameva, na samāsotipi dassento āha “atha vā”tiādi. “Uttḥahitvā”ti iminā uttiṭṭhāti ettha tvālopoti dasseti. “Gahetu”nti iminā pāṭhasesaṃ dasseti. **Gehasitapemavasena**ti gehe nissitapemavasena, mettāpubbaṅgamapemavasenaati attho. Sagāravā hutvā sappatissā hutvā viharantāti atthaṃ dassento āha “upaṭṭhapetvā”ti. “Sabhāgajīvikā”ti iminā **sabhāgavuttikāti** ettha vuttisaddo jīvikatthoyeva, na vivaraṇādyatthoti dasseti. Upajjhāyabhāvaṃ sampaṭicchati etehīti **upajjhāyabhāvasampaṭicchanaṇi**, tāniyeva vevacanāni **upajjhāyabhāvasampaṭicchanaevevacanāni**. **Tikkhattunti** ukkaṭṭhavasena vuttaṃ, sakimpi vaṭṭatiyeva. Padassa vasena viññāpetīti sambandho. **Hīti** saccaṃ. **Etthāti** upajjhāyagahaṇaṭṭhāne. Yadidaṃ vācāya vā sāvanaṃ, yadidaṃ kāyena vā atthaviññāpanaṃ atthi, idameva sāvanaatthaviññāpanameva upajjhāyagahaṇanti yojanā. **Sādhūti sampaṭicchanaṇi** upajjhāyena pañcasu padesu yasmiṃ kismiṃci vutte saddhivihārikassa “sādhū”ti sampaṭicchanaṃ. **Tanti** kesañci vacanaṃ. **Hīti** saccaṃ, yasmā vā. **Etthāti** upajjhāyagahaṇe. “Na sampaṭicchanaṃ aṅga”nti iminā āyācanadānāniyeva aṅgāni nāmāti dasseti. Saddhivihārikenāpi nātunti sambandho. **Iminā padenāti** “sādhū”ti iminā padena.

Tatrāyaṃ sammāvattanāti ettha tasaddassa visayaṃ dassetuṃ vuttaṃ “yaṃ vuttaṃ sammā vattitabba”nti. Iminā kiriyāvisayabhāvameva dīpeti, na dabbavisayabhāvaṃ. **Ayanti** vuccamānā. **Assāti** saddhivihārikassa. **Dhotapādapariharanāṭṭhāyāti** dhotassa pādassa paṃsumakkhanādīnaṃ pariharanāṭṭhāya. **Tāti** upāhanāyo. **Kālassevāti** paccūsakālatoyeva, nissakkatthe cetam sāmivacanaṃ. **Tatoti** tehi tīhi dantakaṭṭhesu, vibhattaapādānametaṃ. Tesu vā tīsu dantakaṭṭhesu. **Yanti** yaṃ dantakaṭṭhaṃ. **Athāti** tasmim gahaṇe.

Tatoti sītunhodakehi, sītunhodakesu vā. **Vaḷaṅjetīti** paribhuñjati. **Udakanti** mukhadhovanodakaṃ. “Vaccakuṭṭito”ti iminā passāvakuṭṭipi gahetabbā. **Evanti** sammajjiyamāne. **Asuññanti** janasaddato atucchaṃ. **Āsananti** therassa āsanaṃ. **Tasminti** āsane. Nisinnassa therassa vattaṃ kātabbanti sambandho. Uklāpo asmiṃ dese atthīti **uklāpoti** atthaṃ dassento āha “kenaci kacavarena saṃkiṇṇo”ti. Ettha ca saṅkāro ucchiṭṭho kalāpo samūho **uklāpoti** vacanatthena uklāpoti vuccati. Kacīyati bandhīyati asmiṃ deseti **kaco**, so varīyati icchīyati anenāti **kacavaroti** vacanatthena kacavaroti vuccati. **Hatthenapīti** ettha pisaddo pilotikenapītiādīm saṅgaṇhāti.

Ekato katvāti ekato samānapaṭalaṃ katvā. Kasmā saṅghāṭīti āha “sabbam hī”tiādi. “Saṅghāṭitattā”ti iminā saṃharitabbāti **saṅghāṭīti** vacanatthaṃ dasseti. Nivattitvā oloketam upajjhāyaṃ saṃpāpuṇāṭīti yojanā. Ekena vā padavītiḥārenāti sambandho. Pattoyeva uṇhabhārikesu pariyāpannoti **pattapariyāpanno**, patte pariyāpanno yāguādiko **pattapariyāpannotipi** yujjatiyeva. **Bhikkhācāreti** bhikkhācāraṭṭhāne. Yāguyā vā laddhāyāti sambandho. **Tassāti** upajjhāyassa. **So pattoti** uṇhādīsu pariyāpanno so patto. **Aññatra vāti** ārāmādīsu vā. **Tassāti** upajjhāyassa. Vacane anīṭṭhiteti

sambandho. **Ito paṭṭhāyāti** “na upajjhāyassa bhaṇamānassā”ti ettha vuttanakārato paṭṭhāya. Iminā heṭṭhā vuttesu “nātidūre gantabba”ntiādīsu nakārapāṭisiddhesu āpatti natthīti dasseti. **Yattha katthacīti** “na ca uṇhe cīvaraṃ nidahitabba”ntiādīsu yesu kesuci. **Ayanti** dukkaṭāpatti. **Hīti** saccaṃ. **Āpattisāmantāti** ettha āpattiyā sāmantā āpattisāmantāti atthaṃ dassento āha “āpattiyā āsanna”nti. “Āsanna”nti iminā **sāmantāsaddassa** āsannavevacanatañca upayogathe nissakkavacanatañca dasseti. Īdisaṃ vacanaṃ bhante vattuṃ vaṭṭati nāmāti yojanā.

Gāmato paṭhamataranti gāmato upajjhāyassa paṭhamataraṃ. **Tenevāti** upajjhāyeneva. Nivattantena saddhivihārikenāti sambandho. “Tinta”nti vatvā tamevatthaṃ dassetuṃ vuttaṃ “sedaggahita”nti. Iminā sedena sīdatīti **sinnanti** atthaṃ dasseti. “Atirekaṃ katvā”ti iminā **ussāretvāti** padassa adhippāyatthaṃ dasseti, uddhaṃ uddhaṃ sāretvāti vuttaṃ hoti. Pacchimavākyassa pubbavākyakāraṇabhāvaṃ dassetuṃ vuttaṃ “kiṃ kāraṇā”ti. Majjhe bhaṅgassa dosaṃ āvikaronto āha “samaṃ katvā”tiādi. **Tatoti** samaṃ katvā saṃharaṇato, niccaṃ bhijjamānanti sambandho. Majjhe bhaṅgato vā, dubbalanti sambandho. **Etanti** “caturaṅgulaṃ kaṇṇaṃ ussāretvā”ti etaṃ vacanaṃ. **Yathāti** yenākārena saṃhariyamāneti sambandho. Cīvarabhogassa oro anto **obhogoti** atthaṃ dassento āha “kāyabandhana”ntiādi.

Yoti upajjhāyo. “Gāmeyevā”ti vatvā tamevatthaṃ dassetuṃ vuttaṃ “antaraghare vā paṭikkamane vā”ti. **Paṭikkamane vāti** bhojanasālāyaṃ vā. **Tassāti** upajjhāyassa. Laddhā bhikkhā yenāti **laddhabhikkho**, tassa vā. Piṇḍapāto hotīti yojanā. **Tassāti** upajjhāyassa. Piṇḍapāto na hotīti sambandho. **Attanā laddhopīti** pisaddo upajjhāyena laddhopīti atthaṃ sampiṇḍeti. **Āhariyatūti** ettha tuvibhatti pucchāyaṃ hoti, āhariyatu kintī attho. **Kāloti** bhojanakālo. Bhuñjithāti **bhutto**, tasmim satīti sambandho. **Upakaṭṭhoti** majjhanhikassa āsanno.

Anantarahitāyāti ettha antaradhāyatīti **antarahito**, taṭṭikacammakhaṇḍādi, natthi antarahito etasmim pattabhūmīnamantareti **anantarahitoti** atthaṃ dassento āha “anattathāyā”ti. Kālavaṇṇakatā vā sudhābaddhā vā nirajamattikā hotīti yojanā. **Tanti** pattaṃ. **Dhotavālikāyapīti** suddhavālikāyapi. **Tatthāti** paṃsurajasakkharādīsu. Puna **tatthāti** paṇṇādhārakesu. Idaṃ vacanaṃ vuttanti sambandho. **Abhimukhenāti** attano abhimukhena. **Sañikanti** sinnaṃ. **Ante panāti** cīvarassa koṭiyaṃ pana. Nikkhipantassa saddhivihārikassa cīvarassa bhogoti yojanā.

Cuṇṇaṃ sannetabbanti ettha cuṇṇasamodhānena netabbanti atthaṃ dassento āha “piṇḍi kātābbā”ti. “Ekasmim niddhūme ṭhāne”ti iminā **ekamantanti** ettha ekasmim ante ṭhāneti atthaṃ dasseti. **Jantāghareti** aggisālāyaṃ. Sā hi jalati dibbati aggi etthāti **jantā**, janeti sarīrasedametthāti vā **jantā**, sā eva gharaṃ jantāgharanti vuccati, tasmim. Paripūjāvasena karīyatīti **parikammanti** atthena aṅgārādānādikaṃ parikammaṃ nāmāti dassento āha “parikammaṃ nāmā”tiādi.

“Na kenaci gelaññenā”tiādinā ussahanassa kāraṇaṃ dasseti. **Hīti** saccaṃ. Agilānena saṭṭhivassena saddhivihārikenāpi kātābbanti yojanā. **Anādarenāti** vattakaraṇassa anādarena. **Nakārapāṭisamyuttesūti** paṭisedhavācakena nakārena paṭisamyuttesu. **Padesūti** “na upajjhāyassa bhaṇamānassa antarantarā kathā opātetabbā”tiādīsu vākyesu. **Bhūmiyanti** upalakkhaṇavasena vuttaṃ bhittiyampi apaṭiḅhaṃsitābbattā. “Piṭhasaṅghāṭāñcā”ti iminā **kavāṭapīlanti** ettha piṭhasaddena piṭhasaṅghāṭaṃ vuccati uttarapadalopavasena vā ekadesavohāravasena vāti dasseti. “Acchupantenā”ti iminā appaṭiḅhaṃsantenāti ettha ghaṃsadhātuyā atthaṃ dasseti. Sammā tāyati attānañca parañca anenāti **santānaṃ**, tameva **santānakanti** atthena kīṭakulāvakamakkaṭakasuttādi santānakaṃ nāmāti dassento āha “santānaka”ntiādi. **Ullokatoti** vitānato. Tañhi uddhaṃ lucīyate bandhīyateti ullokanti vuccati, cakārassa kakāramakatvā “ulloca”ntipi vuccati. Tosaddena ākārassa smāvacanassa kāriyabhāvaṃ dasseti. **Apaharitābbanti** apanetabbāṃ. “**Avaharitabba**”ntipi pāṭho, heṭṭhā haritabbaṃ pātetābbanti attho.

Ālokasandhibhāgāti ettha bhāgasaddassa dvandato parattā pubbapadesupi paccēkaṃ yojetābboti

āha “ālokasandhibhāgā ca kaṇṇabhāgā cā”ti. Tassa atthaṃ dassento āha “antarabāhirā”tiādi. “Vātapānakavāṭakānī”ti iminā ālokasandhisaddassa vātapānakavāṭakapariyāyabhāvaṃ dasseti. “Koṇā”ti iminā kaṇṇasaddassa koṇavevacanabhāvaṃ dasseti.

“Yathā paṭhama”ntiādinā paṭhamapaññattameva paññapetabbam, na aññathāti dasseti. Idaṃ patirūpaṃ paṭhamapaññattaṃ sandhāya vuttaṃ. Paṭhamapaññatte apatirūpe aññathāpi paññapetabbam. **Etadatthamevā**ti yathāpaññattaṃ paññapetabbassa atthāya eva. Sace paññattaṃ ahosi, evaṃ satīti yojanā. **Idanti** bhittim mocetvā paññāpanaṃ. Kaṭesu kiḷaṅjesu sārattā uttamattā **kaṭasārakoti** vuccati. **Nivattetvā**ti saṃharitvā. **Puratthimā**ti ettha yakāralopena niddesoti āha “puratthimāyā”ti.

Vūpakāsetabboti ettha kasadhātu gatyatthoti āha “aññattha netabbo”ti. Upajjhāyaṃ gahetvā aññattha gantabboti attho. **Aññatthāti** aññaṃ ṭhānaṃ. **Vivecetabbanti** ettha diṭṭhigatato upajjhāyaṃ vivecetabbanti dassento āha “vissajjāpetabba”nti. “Añño vattabbo”ti vatvā tassa ākāraṃ dasseti “thera”ntiādinā. So so bhikkhu yācitabboti sambandho. **Aññena dāpetabboti** attanā aññena bhikkhunā upajjhāyassa parivāso dāpetabboti attho. **Kinti nu khoti** kena eva upāyena dadeyya nukhoti attho. Itisaddo hi avadhāraṇattho. Aṭṭhakathāyapi imameva nayaṃ dasseti “kena nu kho upāyena”ti iminā. **Sabbatthāti** sabbesu “kinti nu kho paṭikasseyyā”tiādivākyesu. Sattasu kammesu tividdhassa ukkhepanīyakammaṃ garukattā vuttaṃ “ukkhepanīyaṃ akatvā”ti. Tamevatthaṃ vitthārento āha “tena hī”tiādi.

Tena saddhivihārikena yācitabbāti sambandho. **Sace karontiyevāti** bhikkhū sace kammaṃ karontiyeva. Puna **sace karontiyevāti** bhikkhū sace ukkhepanīyakammaṃ karontiyeva. **Athāti** tasmiṃ kamme kate. **Itīti** evaṃ yācanena. Nanti taṃ upajjhāyaṃ.

Samparivattakanti ettha “piṇḍukkhepaka”ntiādisu (pāci. 620) viya samparivattakantipadaṃ kiriyāvisesanaṃ, kapaccayo ca vicchatthoti āha “samparivattetvā samparivattetvā”ti. **Yadīti** yāva. Yadisaddo hi yāvapariyāyo, tena vuttaṃ “na tāva pakkamitabba”nti. Yāva appamattakampi rajanaṃ galati, na tāva pakkamitabbanti yojanā. **Visabhāgapuggalenāti** visabhāgena puggalena karaṇabhūtena. **Na upajjhāyaṃ anāpucchā gāmo pavisitabboti** ettha na aññeneva karaṇīyena pavisitabbo. Piṇḍāya pana pavisitabboti āsaṅkā bhavēyyāti āha “piṇḍāya vā”tiādi. “Anāpucchitvā”ti iminā **anāpucchāti** ettha ākāro tvāpaccayassa kāriyoti dasseti. **Bhikkhācāranti** bhikkhāya caraṇaṭṭhānaṃ, upajjhāyena gantabbanti yojanā. **Pariveṇanti** upajjhāyassa pariveṇaṃ. **Passatīti** upajjhāyaṃ passati.

Dassanattāya vāti asubhadassanattāya vā. Imināpi vāsattāya eva na gantabbanti āsaṅkaṃ nivatteti. **Kammanti** pakkamanassa kāraṇaṃ kammaṃ. Ananujānaṃ sandhāya vuttaṃ “yāvattāya”nti. **Tanti** upajjhāyaṃ. **Assāti** saddhivihārikassa. “**Na sampajjati**”ti iminā sace sampajjati, na pakkamitabbāti dasseti. **Kevalanti** vinā uddesādisampajjanehi. Evarūpe upajjhāye nivārentepīti yojanā. “Gelaññato”ti iminā vuṭṭhānasaddassa avadhāpekkhataṃ dasseti. **Assāti** upajjhāyassa. **Aññoti** attanā añño. **Tassāti** aññaṃ bhikkhussa.

16. Saddhivihārikavattakathā

67. Sammāvattanāyaṃ vinicchayo evaṃ veditabboti yojanā. **Uddesādīhīti** ādisaddena paripucchādayo saṅgaṇhāti. Saṅghasaddassa saṅkhepagahaṇesupi vuttito “anuggaho”ti vuttaṃ. Atha vā sammukhā **saṅgaho** ca parammukhā **anuggaho** ca kātabbo. Āmisena vā saṅgaho, dhammena vā anuggaho. Diṭṭhadhammikattāya vā saṅgaho, samparāyikatthāya vā anuggaho. Lokiyattāya vā saṅgaho, lokuttaratthāya vā anuggaho kātabbo. **Tatthāti** yaṃ vuttaṃ “uddesena paripucchāya ovādena anusāsanīyā”ti. Tattha uddisanaṃ **uddesoti** vacanatthena pālīvācanā uddeso nāmāti dassento āha “uddesoti pālīvācanā”ti. “Pālīyā atthavaṇṇanā”ti iminā punappunaṃ, samantato vā pālīyā atthassa pucchanaṃ **paripucchāti** atthaṃ dasseti. **Vatthusmīti** cārittavārittavatthusmiṃ. **Idanti** cārittaṃ. Puna **idanti** vārittaṃ. “Vacana”nti iminā ovadanaṃ **ovādoti** vacanatthaṃ dasseti. Otiṇṇe vatthusmiṃ “idaṃ

karohi, idaṃ mā karitthā”ti vacanaṃ **anusāsanī** nāmāti yojanā. “Punappunaṃ vacana”nti iminā **anusāsanī**ti ettha anusaddassa naupacchinnatthaṃ dasseti. “Sace upajjhāyassa patto hotī”ti sāmāññato vuttepi na pakatipatto hoti, atha kho atirittapatto hotīti āha “atirekapatto”ti. **Sabbatthāti** sabbesu “sace upajjhāyassa cīvaraṃ hotī”tiādīsu padesu. **Aññopī**ti pattacīvarehi aññopī. **Samaṇaparikkhāroti** chattupāhanādi samaṇaparikkhāro. **Idhāti** saddhivihārikavatte. **Nayenāti** ñāyena.

Uppajjamānaupāyapariyesananti uppajjamānassa, uppajjamānatthāya vā upāyassa pariyesanaṃ. **Itoti** “kinti nu kho saddhivihārikassa parikkhāro uppajjiyethā”ti pālito. **Cīvaraṃ rajantenāti** ettha rajantena upajjhāyenāti attho na daṭṭhabbo, saddhivihārikenāti attho evāti dassento āha “upajjhāyato upāyaṃ sutvā rajantenā”ti. **Upajjhāyato upāyanti** upajjhāyato laddhaṃ upāyaṃ.

Nasammāvattanādikathā

68. Upajjhāyavattanti upajjhāyamhi vattitabbaṃ vattaṃ. **Soti** saddhivihāriko. **Dukkaṭaṃ āpajjatī**ti assa, so vā dukkaṭaṃ āpajjatīti yojanā. **Paṇāmetabboti** ettha papubba namudhātu atthapakaraṇādivasena idha apasādanatthoti āha “apasādetabbo”ti. **Adhimattanti** adhikappamāṇaṃ. **Gehasitapemanti** mettāsinehaṃ. **Vuttapaṭipakkhanayenāti** kaṇhapakkhe vuttana paṭipakkhena nayena. **Alaṃ paṇāmetunti** ettha alaṃsaddassa arahatthapaṭikkhittesu dvīsu atthesu arahatthoti āha “yutto paṇāmetu”nti.

Sātisāro hotīti ettha pakatibhāvaṃ atikkamitvā saraṇaṃ pavattanaṃ **atisāro**, doso. Saṃvijjati so etassāti **sātisāro**ti dassento āha “sadoso hotī”ti. Tassatthaṃ dassetuṃ vuttaṃ “āpattim āpajjati”ti. **Āpattinti** dukkaṭāpattim. **Tanti** vattaṃ.

Tesanti saddhivihārikānaṃ. **Vattanti** bahukānaṃ saddhivihārikānaṃ vattaṃ. **Sādiyaṇaṃ vā... pe... bālo hotī**ti ettha bālassa kāraṇaṃ dassetuṃ vuttaṃ “sādiyaṇaṃ vā asādiyaṇaṃ vā na jānāti”ti. Sādiyaṇassa vā asādiyaṇassa vā ajānanattā bālo hotīti vuttaṃ hoti. Ajānanassa kāraṇaṃ dassetuṃ vuttaṃ “bālo hoti”ti. Bālattā sādiyaṇaṃ vā asādiyaṇaṃ vā na jānātīti vuttaṃ hoti. **Tesūti** bahukesu saddhivihārikesu. **Tassāti** vattasampannabhikkhussa. **Tesanti** itaresaṃ saddhivihārikānaṃ.

Rādhabrāhmaṇavatthukathā

69. Kiñcāpi āyasmā sārīputto jānātīti yojanā. Iminā “kiṃ nu kho ajānanto pucchī”ti āsaṅkaṃ nivāreti. Bhagavā anuññātukāmo hotīti sambandho. **Panasaddo** garahattho, tathā jānantopīti attho. **Lahukanti** hetuantogadhavisesanaṃ. Lahukattā paṭikkhipitvāti vuttaṃ hoti. **Assāti** bhagavato, ajjhāsayaṃti sambandho. “Ajjhāsayaṃ viditvā”tivacanassa yuttim dassento āha “buddhānaṃ hī”tiādi. **Hīti** saccam. **Ayañcāti** sārīputtatthero ca. **Aggoti** koṭiukkamaṃso. **Setṭhoti** pavaro uttamo.

“Byattena bhikkhunā paṭibalenā”ti ettha byattapaṭibalānaṃ visesaṃ dassetuṃ vuttaṃ “byatto nāmā”tiādi. Tattha yassa sātthakathaṃ vinayapaṭakavācuggataṃ pavattati, ayaṃ **byatto** nāmāti yojanā. **Tasminti** vinayapaṭakam vācuggatabhikkhumhi. **Yassāti** bhikkhuno. **Suggahitanti** sātthakathāya suṭṭhu gahitaṃ. **Ayampīti** pisaddo purimabhikkhuṃ apekkhati. **Imasmim attheti** imasmim vatthumhi, imasmim visayeti attho. Byatirekānvayavasena **paṭibalaṃ** dassento āha “yo panā”tiādi. Yo pana na sakkotīti sambandho. Kasmāti āha “kāsasosasemhādīnā vā”tiādi. Tattha kāso ca soso ca semho ca, te ādayo yassa gelaññassāti **kāsasosasemhādi**, ādisaddena eḷamūgādayo saṅgaṇhāti. Oṭṭho ca danto ca jivhā ca, tā ādayo yesaṃ tāluādīnanti **oṭṭhadantajivhādayo**, tesam. **Padabyañjanehīti** padaakkharehi. **Byañjanasaddo** hettha akkharavācako. **Hāpetīti** galattā hāpeti. **Aññathā vā vattabbanti** aññena sithilādīnā ākārena vā vattabbaṃ. **Aññathā vadatīti** aññena dhanitādiākārena vadati. **Tabbiparītoti** tassa apaṭibalassa viparīto bhikkhūti sambandho. **Tatoti** jānāpetabbato. **Yanti** yaṃ ākāraṃ dhātukammametam, **saṅghoti** kāritakammametam. Idha kāritakammaṃ kito vadati.

71. Upasampannasamanantarāti ettha upasampannassa samanantarāti atthaṃ nivārento āha

“upasampanno hutvāva samanantarā”ti. Evasaddena cirakālaṃ nivatteti. **Ullumpatūti** ettha upubbalupadhātuyā upasaggavasena vā atthāṭṭisayavasena vā dhātūnamanekatthattā idha upubbadharadhātuyā atthe vattatīti dassento āha “**uddharatū**”ti. Uṭṭhāpetvā, ukkhipitvā vā dharatūti attho. Tamevatthaṃ dassento āha “akusalā”tiādi. Tattha “akusalā vuṭṭhāpetvā”ti iminā sahāvadhinā utyūpasaggassa atthaṃ dasseti. “Kusale patiṭṭhāpetū”ti iminā sahādhārena dharadhātussa atthaṃ dasseti. Utyūpasaggassa ukkhipanattaṃ dassento āha “sāmaṇerabhāvā vā uddharitvā”ti. “Paṭiccā”ti iminā **upādāyāti** ettha samīpe ādiyitvāti saddatthamagahetvā saṅketatthavasena pākaṭattā tassa saṅketatthaṃ dasseti, adhippāyatthaṃ dasseti attho.

73. Adhiṭṭhitāti ettha adhi niccavasena ṭhāti pavattatīti adhiṭṭhitāti vacanattaṃ dassento āha “niccappavattini”ti. Kasmā cattāro paccayā nissayāti vuttatīti āha “yasmā”tiādi. “Cattāro”tiādinā cattāro paccaye nissāya attabhāvo seti pavattatīti **nissāyāti** avuttakammattaṃ dasseti.

18. Ācariyavattakathā

75. Kintāyanti ettha ekāralopavasena sandhi hotīti āha “kiṃte aya”nti. “Ovaditabboti”iminā **ovadiyoti** ettha ṇyapaccayassa kammattaṃ dasseti. “**Tadatthāyā**”ti iminā “yadidaṃ gaṇabandhika”nti uttaravākye yaṃsaddaṃ disvā pubbavākye taṃsaddaṃ ṇāpeti, tassa bāhullassa atthāyāti attho.

76. Soti pasūro paribbājako. **Tenāti** udāyittherena. **Sahadhammiki** saha dhammena kāraṇena. Byatto tāva pubbe vuttalakkhaṇo hotu, paṭibalo pana kathaṃ ṇātabboti āha “yo panā”tiādi. Yo pana sakkotīti sambandho. **Cāti** saccaṃ. **Etanti** paṭibalattaṃ, “pañcahi...pe...vinetu”ntivacanaṃ vā.

77. Titthiyapakksaṅkantesūti titthiyasaṅkhātāṃ sāsanaṃ paṭipakkaṃ saṅkamantesu. **Ācārasamācārasikkhāpanakanti** ativiya caritabbaṃ ābhisamācārikasīlaṃ sikkhāpanakaṃ. Iminā ācāraṃ sikkhāpetīti **ācariyoti** vacanattaṃ dasseti. **Nāmamattamevāti** “ācariyo”ti vā “antevāsiko”ti vā nāmamattameva. **Nānanti** upajjhāyato vā saddhivihārikato vā nānaṃ.

20. Paṇāmanākhamaṇāpanākathā

80. Yaṃ lakkhaṇaṃ vuttanti sambandho. Nissayantevāsikena kātabbanti yojanā. **Pabbajjāupasampadādhammantevāsikehīti** pabbajjantevāsikena ca upasampadantevāsikena ca dhammantevāsikena ca. **Etesanti** pabbajjāupasampadādhammantevāsikānaṃ. **Etesūti** etesu tīsu antevāsikesu. **Ācariyassāti** pabbajjantevāsiko pabbajjācariyassa, upasampadantevāsiko upasampadācariyassāti attho. **Samīpeti** nissayācariyassa ca dhammācariyassa ca āsanne. **Tasmāti** yasmā antevāsikena ācariyamhi sammā vattitabbaṃ, tasmā. **Ācariyenāpīti** nissayapabbajjā upasampadā dhammācariyenāpī. Ovādācariyo tesu saṅgahaṃ gacchati. **Tesūti** catūsu antevāsikesu.

22. Nissayapaṭippassaddhikathā

Āṇattivinicchayo

83. “Nissayapaṭippassaddhīsū”ti samūhādhāro. “Upajjhāyo pakkanto vātiādīsū”ti avayavādhāro. “Vippavasitukāmo”ti iminā nirālayabhāvaṃ dasseti. **Evaṃ gateti** evaṃ upajjhāye gateti yojanā. **Aññadāpīti** aññasmimpi kāle. Upajjhāyena pavāsitaṅkāletī attho. **Ekasambhogaparibhogoti** attanā vā upajjhāyena vā eko paccayasambhogo ca dhammaparibhogo ca. **Ekadivasampīti** pisaddo garahattho, dvihādikaṃ pana pagevāti attho. **Parihāro natthīti** āpattiparihāro natthi, āpattiyā pariharaṇaṃ apanayanaṃ natthīti adhippāyo. **Lajjī pesaloti** lajjī hutvā piyasīlo bhikkhūti sambandho. **Tadahevāti** tasmim upajjhāyassa pakkantaahani eva. **Tathāti** yathā “upajjhāyo lahuṃ āgamissatī”ti pucchati, tathā

“aham lahum āgamissāmī”ti vuttanti attho. **Sace vadatīti** sace ācariyo vadatīti yojanā. **Assāti** bhikkhussa. **Sabhāgatanti** lajjipesalabhāvaṃ.

Yāva āgamanāti upajjhāyassa yāva āgamanā. **Nanti** upajjhāyaṃ. “Vāsentiyeṅvā”tipade kāritakammaṃ. **Tatthāti** upajjhāyassa gataṭṭhāne. **Tenāti** upajjhāyena. **Pavattīti** pavattanaṃ. Nadīpūrena vā upaddutoti sambandho. Nadīpūrattā udakosakkaṇaṃ āgāmeti, corādīnaṃ upaddutattā sahāye pariyesati. **Soti** upajjhāyo.

“Nissayapaṇāmanā”ti iminā āṇāpanaṃ **āṇattīti** vacanattānena nissayapaṇāmanā āṇattīti vuccatīti dasseti. **Nissayapaṇāmanāti** nissayassa upajjhācariyassa paṇāmanā. Tasmā paṇāmito hotīti sambandho. “Āpucchītiādīnā”ti ettha ādisaddena “mā maṃ susānagamaṇaṃ āpucchī”tiādāyo saṅgaṇhāti. **Tenāti** saddhivihārikena. **Khamāpetabboti** titikkhāpetabbo.

Tāvāti mahātherehi, mahātherānaṃ vā paṭhamaṃ. **Aññatthāti** upajjhāyassa vihārato aññaṃ vihāraṃ. **Appēvāti** api eva nāma khameyyāti yojanā. **Tatrevāti** aññattheva. **Dubbhikkhādidosenāti** ettha ādisaddena ñātiviyogādidosa gaṇetabbo. **Taṃyevāti** attanā vasitaṃ tameva ṭhānaṃ. **Aññassāti** upajjhāyato aññassa bhikkhussāti sambandho. Iminā upajjhāyena pariccattattā upajjhāyasamodhāne nissayapaṭippassaddhi natthīti dīpeti.

Samodhānavinicchayo

Āpucchitvāti =00 antevāsikaṃ āpucchitvā. **Tatrāpīti** ācariyantevāsikesupi. **Kadāti** kasmim kāle. **Sāyanhe vā rattimvāti** ajja sāyanhe vā rattim vā. **Taṃkhaṇeyevāti** tasmim sampaṭicchanaṃkhaṇeyeva.

So cāti antevāsiko ca. **Tatoti** gāmato. **Sugatoti** suṭṭhu gato, nissayo paṭippassambhatīti adhippāyo. **Athāpīti** puna ca paraṃ. Āpucchitvā pakkamanaṃ vinicchayaṃ dassetvā āpucchitvā pakkamanaṃ taṃ dassento āha “ācariyaṃ anāpucchā”tiādī. **Upacārasīmātikkaṃmeti** upacārasīmāya atikkame sati, atikkamanaṃhetu vāti yojanā. Ettha ca **upacārasīmā** nāma parikkhattassa vihārassa parikkhepoyeva, aparikkhattassa parikkhepārahaṭṭhānaṃ.

Sāyanhe vā rattibhāge vāti ajja sāyanhe vā rattibhāge vā. **Sveti** suve.

Bahisīmanti upacārasīmato bahi. **Tatoti** bahisīmato. **Dvinnam leḍḍupātānanti** antevāsikato dvinnam leḍḍupātānaṃ. **Atikkamitvāti** upacārasīmato bahi antevāsikasaddhivihārikānaṃ vasanaṭṭhānato atikkamitvā.

Muccitukāmoti antevāsikamhā muccitukāmo eva. **Paṇāmetīti** kāyavācāhi paṇāmeti. **Sālayoti** ācariye sāpekkho. “Nirālayo”ti vatvā tassa atthaṃ dassetuṃ vuttaṃ “na dāni”tiādī. **Evampīti** dhure nikkhittepi. Ubhinnaṃ dhuraṇikkhepe sati, dhuraṇikkhepāhetu vā paṭippassambhatīti yojanā. Paṇāmitena paṭipajjitabbanti sambandho.

Vuttamevatthaṃ vitthārento āha “sace hī”tiādī. **Ācariyanti** nissayācariyaṃ. Cetiyaṃ vā vandantaṃ upajjhāyanti sambandho, maggapaṭipannaṃ vā upajjhāyanti yojanā. **Dūrattāti** dūrabhāvato. **Upāripāsādeti** pāsādassa upari. **Tanti** upajjhāyaṃ. Nisinnaṃ upajjhāyanti sambandho.

Savanaṃ savasena samodhāne vinicchayo evaṃ vedittabboti yojanā. Upajjhāyassa saddanti sambandho.

23. Upasampādetabbapañcakakathā

84. Idāni =01 yaṃ lakkhaṇaṃ vuttanti sambandho. **Saṅkhepatoti** āngāni anuddharitvā samāsato.

Tatthāti yaṃ “pañcahi bhikkhave aṅgehi samannāgatena bhikkhunā” tiādimāha, tattha. **Aguṇaṅgehi** guṇavirahitehi aṅgehi. **Soti** bhikkhu. **Na upasampādetabbanti** ettha kammavācācariyena hutvā na upasampādetabbanti āsaṅkā bhaveyyāti āha “upajjhāyena hutvā na upasampādetabba”nti. **Etthāti** etesu pañcakesu. **Ādisūti** ettha pubbo nidassanatto itisaddo lopo hoti. Itiādisūti hi attho. **Ayuttavasenāti** ananurūpavasena. **Yoti** bhikkhu. **Hīti** saccaṃ, yasmā vā. Pare ca samādapetunti sambandho. **Tatthāti** sīlakkhandhādike. **Pariharatīti** parisam parissayato harati apaneti. **Tassāti** bhikkhuno. “Sīlādīhi” tipadaṃ “parihāyatiyevā” tipade apādānaṃ, “na vaḍḍhatī” tipade karaṇaṃ. **Tasmātiādi** laddhaguṇaṃ. **Tenāti** bhikkhunā. Kasmā āpattiaṅgavasena na vuttanti āha “na hī” tiādi. **Hīti** yasmā. **Tassevāti** khīṇāsavasessa. **Na vadeyyāti** khīṇāsavaṇaṃ anabhiratiyā anuppannattā na vadeyya. Yadi na khīṇāsavasessa upajjhāyācariyabhāvo anuññāto, atha kasmā khīṇāsavapañcako vuttoti āha “yasmā panā” tiādi. Yasmā na parihāyatīti sambandho.

Antaggāhikāyāti sassatucchedaśaṅkhātāṃ antaṃ lāmakāṃ gaṇhāti, gaṇhāpetūti vā antaggāhikā, tāya. **Diṭṭhiyāti** micchādiṭṭhiyā. **Yattakaṃ sutanti** bhikkhunovādakasikkhāpade (pāci. aṭṭha. 145-147) vuttaṃ yattakaṃ sutam. **Tenāti** sutena 𑀅. Yaṃ āpattādi tena jānitabbanti yojanā.

Āpattiṃ na jānātīti ettha āpattiṃ āpannoti na jānātīti atthaṃ dassento āha “idaṃ nāmā” tiādi. Tattha “āpanno” ti iminā “āpatti” ntipadaṃ “āpanno” tipāṭṭhasena yojetabbanti dasseti.

Ābhisamācārikāyāti ettha ubhatovibhaṅgapariyāpannasīlato abhivisesena sammā caritabbanti **ābhisamācāraṃ**, khandhakapariyāpannaṃ vattapaṭipattisīlaṃ, taṃ ārabha paññattā **ābhisamācārikā**, khandhakapariyāpannā sikkhā, tāya. **Ādibrahmacāriyakāyāti** ettha maggasaṅkhātassa brahmacariyassa ādi mariyādo ādibrahmacariyo, tasmim pavattā ādibrahmacariyakā =02, ubhatovibhaṅgapariyāpannā sikkhā, tāya. **Sekkhapaṇṇattiyanti** sikkhitabbaṭṭhena sikkhā, sā eva bhagavatā paññattattā sekkhapaṇṇatti. Atha vā sikkhanaṃ sikkhā, tāya sikkhanatthāya bhagavatā paññapīyatīti sekkhapaṇṇatti ubhatovibhaṅgapariyāpannasikkhāyeva, tassaṃ. **Abhidhammeti** ettha suttantapālīto abhi atireko, abhivisiṭṭho vā dhammo abhidhammoti vutte nāmarūpaparicchedakaṃ abhidhammapīṭakanti āha “nāmarūpaparicchede” ti. **Abhivinayeti** ettha abhibhavitvā kāyavācaṃ vinetīti abhivinayo, abhibhavitvā kāyavācaṃ vineti ettha, etenāti vā abhivinayoti vutte vinayapīṭakanti āha “sakale vinayapīṭake” ti. **Sabbatthāti** sabbesu padesu, sabbesaṃ vā padānaṃ. Attho daṭṭhabboti yojanā. “Kāraṇenā” ti ettha kāraṇasaddena “**dhammato**” ti ettha dhammasaddassa sabhāvatthādayo nivāretvā kāraṇatthataṃ dīpeti, enasaddena topaccayassa visesanatthaṃ. **Itīti** evaṃ yathāvuttanayenāti attho. **Catuttheti** catutthapañcace. Catutthapañcakato tīṇi padāni, pañcamapañcakato dve padāni gahetvā pañcakaṃ katvā vuttaṃ “cattāro pañcakā” ti. Aṭṭhasu pañcakesūti sambandho.

Iti soḷasapañcakavinicchaye yojanā samattā.

24. Upasampādetabbachakkakathā

85. Tanti ūnadasavassapadaṃ. **Sabbatthāti** sabbesu chakkesu. **Tatthāti** chakkesu. “Pātimokkhāni vitthārenā” ti vuttattā vibhaṅgavasena gahetabbānīti āha “ubhatovibhaṅgavasena vuttānī” ti. Mātikāvibhaṅgavasena suṭṭhu vibhajitabbānīti **suviḥattāni**, vācuggatavasena sundarā pavatti etesanti **suppavattīni**, suttato anubyañjanato suṭṭhu vinicchitabbānīti **suvinicchitabbānīti** atthaṃ dassento āha “mātikāvibhaṅgavasena” tiādi.

25. Aññatitthiyapubbavatthukathā

86. Yo panāti yo pana aññatitthiyapubbo. **Aññopīti** pasūrato aparopi. **Idhāti** imasmiṃ sāsane. **Tasminti** aññatitthiyapubbe. **Tatthāti** “yo so bhikkhave aññopī” tiādivacane. **Ayanti** parivāso. **Naggaparibbājakassevāti** vatvā tassa bhedaṃ dassetuṃ vuttaṃ “ājīvākassa vā acelākassa vā” ti. Tattha **ājivako** upari ekameva vatthaṃ upakacchake pavesetvā paridahati, heṭṭhā naggo. **Acelako** pana sabbena

sabbaṃ naggoyeva. **Sopīti** =03 naggaparibbājakopi. **Vālakambalādīnanti** vālena kataṃ kambalaṃ, ādisaddena kesakambalādayo saṅgaṇhāti. **Assāti** paribbājakassa. **Aññassāti** naggaparibbājakato aparassa. **Paṇḍaraṅgādikassāti** paṇḍaraṃ setavatthaṃ aṅge sarīre etassatthīti **paṇḍaraṅgo**, ādisaddena nīlaṅgādayo saṅgaṇhāti.

Evanti iminā kesamassuoropanādinā. Pabbājentehi bhikkhūhīti sambandho. **Tasminti** aññatitthiyapubbe, nisinnevēvāti yojanā. Anādare cetāṃ bhummavacanaṃ. **Tassāti** aññatitthiyapubbassa. **Nayimeti** na ime, bhikkhūti sambandho. **Tanti** aññatitthiyapubbaṃ.

87. “Evaṃ kho...pe... anārādhako”ti ayaṃ kathā mātikāti yojanā. **Assāti** aññatitthiyapubbassa. **Tassevāti** tassāyeva mātikāya. **Tatthāti** vibhaṅge. **Atikālenāti** ettha bhattakiccaṃ katvā vattakaraṇavelāyeva atikālo nāmāti dassento āha “vattakaraṇavelāyamevā”ti. Iminā bhummatthe karaṇavacanaṃtipi dasseti. **Tatthevāti** kulagharesuyeva. **Aññadatthūti** ekaṃsena, “karonto”ti iminā pāṭhasesaṃ dasseti. Evampi karonto aññatitthiyapubboti yojanā. “Sampādako”ti iminā **anārādhakoti** ettha ārādhassaddassa sādhanatthaṃ dasseti, tosanatthādayo nivatteti.

Ajjhācāratthikā visanti pavisanti etthāti **vesiyā**, sobhaṇarūpasāṅkhātāṃ vesāṃ dhāretīti vā **vesiyā**. Tena vuttaṃ “sulabhajjhācārā”tiādi. Āmisoyeva kiṅjakkho appamattakaṭṭhenāti **āmisakiṅjakkho**, visesanaparapado. Atha vā āmiso ca tato añño kiṅjakkho ca **āmisakiṅjakkhaṃ**, tassa sampadānaṃ **āmisakiṅjakkhasampadānaṃ**. **Kiṅjakkhasaddo** kesarasseva mukhyato vācako, appamattakassa pana rūlhiṃvasena. **Vidhavāti** ettha dhavasaddo patinoyeva vācako, na rukkhavisesassāti dassento āha “matapatikā vā”tiādi. Imehi padehi matavasena vā pavutthavasena vā vīgato dhavo etāsaṃ, dhavena vā vīgatāti **vidhavāti** vacanatthaṃ dasseti. **Tāti** vidhavā. Yobbanapattattā vā yobbanātittattā vā thullā mahantā kumārīkāti **thullakumārīkāti** dassento āha “yobbanapattā”tiādi. **Paṇḍakāti** ettha āsittapaṇḍakādīsū pañcasu paṇḍakesu napuṃsakapaṇḍakovādhippetoti āha “napuṃsakā”ti. **Samānapabbajjāti** bhikkhūhi samānapabbajjā. **Tatoti** vissāsato.

Tatthāti vesiyādīsū. **Tāsanti** vesiyānaṃ. **Soti** aññatitthiyapubbo. **Sabbatthāti** sabbesu =04 vidhavādīsū. Gantabbataṃ dassento āha “sace paṇā”tiādi. **Tathāti** yathā gantabbattaṃ vuttaṃ, tathā.

Uccāvacānīti ettha uddhaṃ cayati vaḍḍhatīti **uccaṃ**, cayato avagato viyogoti **avacaṃ**. Uccañca avacañca **uccāvacānīti** vacanatthena mahantakhuddakatthoti āha “mahantakhuddakānī”ti. “Kammānī”ti iminā “karaṇīyānī”tipadassa sarūpaṃ dasseti. Taṃdassanena ca kattabbānīti **karaṇīyānīti** vacanattho kātabbo. **Tatthāti** mahantakhuddakesu kammesu. **Tattha na dakkhoti** ettha tasaddassa visayaṃ dassetuṃ vuttaṃ “tesu tesu navakammesū”ti. “Uṭṭhānavīriyasampanno”ti iminā natthi alaso kosajjaṃ etassāti **anālasoti** vacanatthaṃ dasseti. **Tatrāti** ettha trapaccayo sattamyatthe vicchājotakoti āha “tesu tesū”ti. “Ṭhānuppattikāya vīmaṃsāyā”ti vuttavacanassatthaṃ dassento āha “idameva”ntiādi. “Tasmīyeva khaṇe uppannapaññāyā”ti iminā “ṭhānuppattikāyā”ti ettha **ṭhānasaddo** taṅkhaṇatthoti dasseti. **Alaṃ kātuntī** ettha **alaṃsaddo** bhūsanavāraṇapariyattasāṅkhātesu tīsū atthesu pariyaṭṭatthoti āha “kātuṃ samattho”ti.

Tibbacchandoti tikhiṇachando. “Balavacchando”ti iminā adhippāyatthaṃ dasseti. **Lokiyasamādhībhāvanāyāti** lokiyāya aṭṭhasamāpattisāṅkhātāya samādhībhāvanāya.

Idhāgatoti imasmīṃ sāsane āgato. **Titthāyatanaśāmikassāti** taranti uplavanti sattā ummujjanimujjaṃ karonti etthāti **titthāṃ**, dvāsaṭṭhi diṭṭhiyo. Tameva āyatanaṃ diṭṭhigatikānanti **titthāyatanaṃ**. Atha vā titthametesaṃatthīti **titthino**, tesamāyatanaṃ titthāyatanaṃ, tassa śāmikō titthāyatanaśāmikō, tassa. **Tassa diṭṭhiyāti** ettha **diṭṭhisaddo** laddhipariyāyoti āha “tassa santakāya laddhiyā”ti. Kasmā sā laddhi “khantī”ti ca “rucī”ti ca “ādāyo”ti ca vuccatīti āha “idānī”tiādi. Sāyeva laddhi khamatī ceva ruccatī ca gahitā cāti yojanā. **Tassa titthakarassāti** katvatthe śāmivacanaṃ. **Tassāti** titthāyatanaśāmikassa. **Bhaññamānāyāti** bhaṇiyamānāya. **Anabhiraddhoti** ettha anabhirādhito

aparitositacittoti atthaṃ dassento āha “aparipuṇṇasaṅkappo, no paggahitacitto”ti. **Yadidanti** yaṃ idaṃ “anattamanatta”nti vā “attamanatta”nti vā sambandho. Iminā “ida”ntipadassa aniyamaṃ dasseti. **Imeti** bhikkhū. Yañca anattamanattanti yojanā. **Tassevāti** aññatitthiyapubbassa eva anattamanattanti sambandho. **Idanti** dve attamanattāni, dve anattamanattānīti catubbidhaṃ idaṃ dhammajātaṃ. **Saṅghāṇi**yaṃti saṅghaṭṭitabbaṃ, sannicayaṃ kātabbanti attho. “Anārādhake”tiādina **anārādhaniyasminti** =05 ettha na ārādheti vattaṃ anena kammenāti **anārādhaniya**nti vacanatthaṃ dasseti. **Idanti** catubbidhaṃ. **Liṅganti** kāraṇaṃ. **Lakkhaṇanti** cihanaṃ. **Itoti** aṭṭhaṅgato nīhaṇenāti sambandho. **Vuttavipallāsenāti** kaṇhapakkhe vuttaviparītena.

Sukkapakkhe aṭṭhaṅgāni samodhānetvā dassento āha “nātikālena gāmapavesanaṃ nātidivā paṭikkamana”ntiādi. Kaṇhapakkhepi iminā nayena aṭṭhaṅgāni samodhānetabbāni. “Paritosako”ti iminā **ārādhakasaddassa** tosanatthaṃ dasseti. Heṭṭhā pana “sampādako”ti vuttattā sādhanatthaṃ dassetiṭi daṭṭhabbaṃ.

Upasampadamālakepīti upasampādaṭṭhāne ekakūṭayutte anekakoṇe patissayavisesepi. So hi ekakūṭaṃ katvā anekehi koṇehi malīyati vibhūsiyātīti **māloti** vuccati. “Cattāro māse parivasitabba”ntivacanaṃ asadisūpamāya pākaṭaṃ karonto “yathā panā”tiādimāha. **Hīti** saccaṃ. **Assāti** aññatitthiyapubbassa. Parivasanto aññatitthiyapubbotti sambandho. **Antarāti** catumāsassa abbhantare. **Kuppanasabhāvoti** nassanasabhāvo. **Pariggaṇhātīti** paricchindivā gaṇhāti. **Nāmarūpaṃ vavatthapetīti** “idaṃ nāmaṃ, idaṃ rūpa”nti vavatthapeti. **Lakkhaṇanti** namanaruppanalakkhaṇaṃ, aniccādilakkhaṇaṃ vā. **Sotāpattimaggassa** diṭṭhivicikicchāpahānaṃ sandhāya vuttaṃ “samūhatāni... pe... salla”nti. **Abbulhanti** āvahiyitthāti abbulhaṃ, uddhaṃ vahiyitthāti attho. Ātyūpasaggo hi uddhaṅgamattho. **Taṃdivasamevāti** tasmim̐ sotāpattimaggassa paṭilabhanadivaseyeva. Bhummatthe cetam̐ upayogavacanaṃ. **Tadahevāti** tasmim̐ sotāpanabhavanaahani eva.

Tassāti aññatitthiyapubbassa. Pāliyaṃ pattassa anāgatattā vuttaṃ “pattampi tathevā”ti. Yathā upajjhāyamūlakaṃ cīvaraṃ pariyesitabbaṃ, pattampi tathevāti attho. **Idanti** pattacīvaraṃ. **Imassāti** aññatitthiyapubbassa. **Aññeti** upajjhāyato apare. **Tehipīti** aññehipi. **Vilomāti** paṭilomā. **Āyattanti** adhīnaṃ. **Āyattajīvikattāti** aññatitthiyapubbassa upajjhāyena āyattajīvikattā. **Tassāti** upajjhāyassa. **Vacanakaroti** vacanaṃ karo. Vākyepi samāsepi vacanasaddassa “tassā”ti padameva apekkhattā “vacanakaro”ti samāso hoti. Eseva nayo “upajjhāyena āyattajīvakattā”ti etthāpi. **Tenāti** vacanakarahetunā.

Aggiparicaraṇakāti =06 aggipūjakā. Iminā aggiṃ paricaranṭīti **aggikāti** vacanatthaṃ dasseti. **Tāpasāti** jaṭādhara. Te hi yasmā jaṭā ca tapo ca etesamatthi, tasmā “jaṭilā”ti ca “tāpasā”ti ca vuccanti. **Eteti** jaṭilakā. “Kiriyaṃ na paṭibāhanti”ti vuttavacanassa atthaṃ dassento āha “atthi kammaṃ, atthi kammavipāko”ti. **Etadeva pabbajjanti** etaṃ eva tāpasapabbajjaṃ. **Etesanti** jaṭilānaṃ. **Sāsanti** buddhassa sāsane. **Tesanti** nātīnaṃ, imaṃ parihāranti sambandho. **Teti** nātayo. **Hīti** saccaṃ, yasmā vā. **Ñātiṣeṭṭhassāti** nātīyeva seṭṭho, nātīnaṃ vāti nātiṣeṭṭho, tassa, buddhassāti sambandho.

26. Pañcābādhavattukathā

88. Magadhesūti ettha bahuvacanapadena vuttattā janapadassa nāmanti āha “magadhanāmake janapade”ti. **Amanussānañcāti** manussehi aññasattānañca. Ussannasaddo ca ussadasaddo ca vuḍḍhippattapariyāyoti āha “ussannā vuḍḍhippattā”ti. “Phātipattā”ti iminā tamevatthaṃ dasseti. **Tehīti** kuṭṭhādīhi pañcāhi ābādhehi.

Tatthāti kuṭṭhādīsu pañcasu ābādhesu. Ābādhikaṃ ābhuso bādhati pīletīti **ābādho**, aṅgapaccaṅgaṃ kuṭṭhāti chindatīti **kuṭṭhaṃ**. “Rattakuṭṭhaṃ vā”tiādīsu vāsaddena setakuṭṭhādīnipi saṅgaṇhāti. **Kīṭibha daddu khajju ādippabhedampīti** kīṭibho ca daddu ca khajju ca kīṭibhadaddukhajjuyo, tā ādayo yesaṃ kuṭṭhānanti kīṭibhadaddukhajjuādayo, tesam̐ pabhedo kīṭibhadaddu khajjuādippabhedo, tampi. Tattha

kīṭibhoti kīṭa ibhoti padavibhāgo kātabbo. Tattha **kīṭoti** kimi. Iminā kīṭakulāvakaṃ “kīṭo”ti gahetabbam, kīṭo viyāti **kīṭo**, kuṭṭhaviseso. **Ibhoti** gajo. Iminā gajassa sabalaṃ “ibho”ti gahetabbam. Ibho viyāti **ibho**, kuṭṭhaviseso. Kīṭoyeva ibho **kīṭibho**, kuṭṭhābādhaviseso, yaṃ loke “**kuṭṭābādha viseso**”iti voharanti. **Daddūti** kacchu. Sā hi sarīraṃ daṃsati vidāṃsati, hiṃsatīti vā **dadduti** vuccati. Ekassa dakārassa rakāraṃ katvā “daddu”tipi pāṭho. Yaṃ loke “**pve?**”Iti voharanti. **Khajjūti** kaṇḍuvanaṃ. Tañhi sarīraṃ khajjati byathati khadati, hiṃsatīti vā khajjūti vuccati. Yaṃ loke “**khajja**”iti voharanti. “Kacchū”tipi pāṭho, so apāṭho daddusaddena tassa gahitattā. **Tanti** kuṭṭham. **Pakatipaṭicchannaṭṭhāneti** pakatiyā paṭicchannaṭṭhāne, yathānivatthapārutaṭṭhāneti attho. Iminā visesato paṭicchannaṃ nivatteti. Avaḍḍhanakapakkhe ṭhitam sace hotīti yojanā. **Pakativannaṇeti** =07 pakaticaviyaṃ. Yathā avaṇā chavi hoti, tathāti attho. Iḍaṃ vaṇavatthum sandhāya na vuttam.

Medagaṇḍoti medo asmiṃ atthīti **medo**, gaṇḍati phoṭo bhavatīti **gaṇḍo**, medoyeva gaṇḍo medagaṇḍo. Yaṃ loke “medagaṇḍoiti voharanti. **Kolaṭṭhīti** kolaṃ vuccati badaraphalaṃ, tassa aṭṭhi kolaṭṭhi. Avaḍḍhanakapakkhe ṭhite satīti yojanā. **Sañchavinti** saṃvijjamānachaviṃ, sañjātachaviṃ vā. **Unṇigaṇḍāti** uddham namantīti unṇiyo, tāyeva gaṇḍā unṇigaṇḍā. Ye loke “unṇigaṇḍā” iti voharanti. **Tattha tatthāti** tasmim tasmim sarīrapadese. **Khīrapīlakāti** khīraṃ ettha atthīti khīrā, tā eva pīlakā khīrapīlakā. Yā loke “khīrapīlakā” iti ca iti ca voharanti. **Tāsūti** pīlakāsu. Khīrapīlakā nāma gaṇḍā hontīti sambandho. **Kharapīlakāti** kharasabhāvā pīlakā. Kharasabhāvattā tena sattā maraṇampi gacchanti, maraṇamattampi dukkham. Yā loke iti “khīrapīlakā” voharanti. Padumakaṇṇikā nāma gaṇḍā hontīti sambandho. Padumassa kaṇṇikā viya **padumakaṇṇikā**. Yā loke “**padumakaṇṇikā**”iti voharanti. Sāsapabījakā nāma gaṇḍāti sambandho. Sāsapassa bījaṃ pamāṇametāsanti **sāsapabījakā**. Yā loke “sāsapabījakā” iti voharanti. **Tā sabbāti** sabbā tā pīlakā, gaṇḍajātiyo vā. **Tāsūti** pīlakāsu, gaṇḍajātīsu vā.

Padumapuṇḍarīkapattavaṇṇanti padumaṃ nāma rattam, **puṇḍarīkaṃ** nāma setam, tesam pupphapattassa vaṇṇam viya vaṇṇametassāti padumapuṇḍarīkapattavaṇṇam, saṅkhakuṭṭham. Yaṃ loke “padumapuṇḍarīkapattavaṇṇam, saṅkhakuṭṭham” iti voharanti. **Yenāti** kuṭṭhena. Gunnaṃ sarīraṃ sabalaṃ viya manussānaṃ sarīraṃ sabalaṃ hotīti yojanā. **Tasminti** kilāse. **Sosabyādhīti** khayarogo. So hi yasmā maṃsalohitādīni sosāpeti, tasmā **sosoti** vuccati. Yaṃ loke “sāmsa” iti ca “sosabyādhī” iti ca voharanti. **Tasminti** sosabyādhimhi. **Apamāroti** apasmāro. So hi sārato apagattā “apamāro”ti vuccati sakārassa makāraṃ katvā. Yaṃ loke “apamāra” iti ca “**arū?**”Iti ca voharanti. **Tatthāti** dvīsu ummādesu. Ādhāre cetam bhummavacanaṃ. Duttikiccho hotīti sambandho.

27. Rājabhaṭavatthukathā

90. Uccinathāti ettha cidhātuyā vaḍḍhanattham dassento āha “vaḍḍhethā”ti. **Sotāpannattāti** bimbisārarañño =08 sotāpannabhāvato. **Ghāthethāti** jīvitā voropetha. **Hanathāti** paharatha. **Tatoti** upajjhāyato. Ācariyo setṭhoti sambandho. **Tatoti** ācariyato. **Idanti** vacanaṃ, āgatanti sambandho. Āhaṃsu vohārikā mahāmatā musāvādenāti yojanā. **Amaccoti** sabbarājakicesu amā saha raññā bhavatīti amacco. **Amāsaddo** sahatthe nipāto. “Amā”ti nipātato bhavathe accapaccayo (moggallāne 4.23 sutte). **Mahāmattoti** mahanto mattā issariyā etassāti mahāmatto. **Mattāsaddo** hettha issariyavācako. **Sevakoti** rājānaṃ sevati bhajatīti sevako. **Bhattavetanabhaṭoti** bhattavetanānamatthāya bhaṭo. **Tassāti** rājabhaṭassa. **Puttanattabhātukādayoti**ādisaddena bhāgineyyādayo saṅgaṇhāti. **Yo panāti** rājabhaṭo pana. **Niyyātetīti** appeti. **Tam ṭhānanti** tam rājabhaṭatṭhānaṃ. **Yena vāti** kammakārena vā. **Yaṃkammakāraṇāti** yassa kamma kāraṇā. **Yo vāti** rājabhaṭo vā. **Pabbajassūti** pabbājehi.

28. Coravatthukathā

91. Diṭṭhapubboti aṅgulimālo pubbe diṭṭho. **Ayanti** coro. **Soti** aṅgulimālo. Aññesaṃ santikā vacanaṃ suṇantīti yojanā. **Teti** manussā. **Ubbijjantipīti** kāyena ubbijjantipi. **Uttasantipīti** cittena uttasantipi. Aṅgulimālo bhikkhūhi na pabbājito, nanu bhagavatā pana sayam pabbājito, atha kasmā “na

bhikkhave’’ti vuttanti āha ‘‘bhagavā sayam dhammassāmī’’ti. **Dhammassāmī**ti ca dhammassa issaro, dhammena vā devamanussānaṃ issaro, adhipatīti attho. Bhikkhūnaṃ akaraṇatthāya bhikkhūnaṃ sikkhāpadanti yojanā. **Tatthāti** ‘‘na bhikkhave’’tiādivacane. ‘‘Dhajaṃ bandhitvā’’tiādinā dhajassa bandhanaṃ dhajabandho, dhajabandho viyāti **dhajabandho**, dhajabandho hutvā caratīti **dhajabandhoti** vacanattham dasseti. **Tasmāti** yasmā dhajabandho, tasmā. **Yoti** coro. **Panthaduhanam vāti** panthe duhanaṃ vā. **Paññāyati cāti** ettha casaddo vākyasampiḍanatto. Na kevalañhi vicaratiyeva, atha kho paññāyati cāti attho. **Idanti** corakammaṃ. **Rajjanti** rājabhāvaṃ. **Soti** rājaputto. **Hīti** saccam, yasmā vā. **Tasminti** rājaputte. **Pubbeti** pubbakāle. **Tanti** coram. **Evanti** iminākarena, jānanti ceti yojanā. **Adissamānāti** attānaṃ apaññāyamānā. Idaṃ sandhicchedādicore sandhāya vuttaṃ, na ambalabuḍādicore. **Pacchāpīti** theyyakaraṇato pacchāpi. **Tepīti** corepi.

92. Bhayenāti bhayato. **Ete panāti** bhikkhū pana. **Laddhābhayattāti** rājato laddho abhayo imehīti laddhābhayā, tesam bhāvo laddhābhayattaṃ, tasmā. **Kārabhedakoti** ettha **kārasaddo** rukkhavisese =09 ca sakkāre ca bandhanālaye ca pavattati, idha pana bandhanālayeti dassento āha ‘‘kāraṃ vuccati bandhanāgāra’’nti. Bandhanāgārañhi karonti taṃ pavesite jane himsanti etthāti ‘‘kāra’’ti vuccati. **Idhāti** ‘‘kārabhedako’’tipade. Dīpabandhanaṃ vā hotūti yojanā. Imehi padehi na kevalaṃ bandhanāgāraṃyeva kāra nāma hoti, atha kho andubandhanādīnipi kāraṃyeva nāmāti dasseti. **Yoti** coro. **Etesūti** bandhanesu. **Muñcivā vāti** rajjubandhanaṃ nibbeṭhetvā vā. Imehi padehi na kevalaṃ kāraṃ bhindanato eva kārabhedako nāma hoti, atha kho chindanamuñcānavivaraṇehipi kārabhedakoyeva nāmāti dasseti. **Dīpantaranti** bandhanadīpato antaram aññaṃ dīpanti attho. Cakkavāḷabandhanaṃ bhinditvā cakkavāḷantaram gato aṭṭhakathāyaṃ na vutto. **Soti** nacorako. **Gāmanigamapaṭṭanādīnīti** ettha **paṭṭananti** nāvāpaṭṭanaṃ, sakaṭapaṭṭanañca. **Keṇiyāti** rañño dātabbaṃyena. **Tanti** keṇiṃ. **Nidhānanti** nikkhaṇitvā ṭhapitaṃ dhanam. **Upasamharitvāti** rājādīnaṃ santikaṃ haritvā. **Tanti** kasikammādīhi sampādetvā jīvantam. **Tatthevāti** bandhāpitaṭṭhāneyeva.

93. Yatthāti yasmim ṭhāne. Yo koci palātoti sambandho. Nanti yaṃ kiñci janaṃ, likhāpetīti yojanā. **Paṇṇe vāti** kuse vā. **Assāti** janassa. **Daṇḍanti** dhanadaṇḍam. **Likhitakoti** likhitabboti likhito, soyeva likhitako.

94. Yo pana kasāhi haññatīti sambandho. Iminā aññehi kasāhi haññatīti **kasāhatoti** vacanattham dasseti. ‘‘Ayameva te daṇḍo hotū’’ti iminā kataṃ daṇḍakammaṃ imassāti **katadaṇḍakammoti** vacanattham dasseti. **Allavaṇoti** tintavaṇo. **Ghātetvāti** hanitvā paharitvāti attho. **Gaṇḍigaṇḍiyoti** phoṭaphoṭā. **Sannisinnāsūti** gaṇḍisu pakatisarīrena samaṃ nisinnāsu.

95. Katadaṇḍakammabhāvo tāva purimanayeneva veditabbo hotu, kathaṃ pana lakkhaṇāhatabhāvo veditabboti āha ‘‘yassa panā’’tiādi. Tattha **tattenāti** tāpena. **Lakkhaṇanti** saññānaṃ. **Soti** jano. **Bhujissoti** bhujō etassatthīti bhujisso (ma. ni. ṭī. 2.426). Parehi apālito ca anajjhoharāpito ca hutvā sayameva attānaṃ pālanena ca bhojanaṃ ajjhoharaṇena ca samannāgatoti vuttaṃ hoti. **Assāti** lakkhaṇāhatassa. **Vaṇāti** arūni. Tāni hi yasmā vaṇanti gattāni vicuṇṇāni karonti, tasmā vaṇāti vuccanti. **Rūlhāti** taruṇamaṃsena ruhā. Timaṇḍalavatthassa lakkhaṇāhatassa janassāti sambandho.

33. Ināyikavatthukathā

96. Ināyiko nāmāti ettha **iṇanti** uddhāro. So hi yasmā eti vuddhiṃ gacchati, tasmā iṇanti vuccati. Taṃ gaṇhāti, dhāretīti vā ināyiko. **Yaṃ vāti** janaṃ vā āṭhapetvāti sambandho. **Āṭhapetvāti** ca pesanatthāya dhanasāmikassa santike ṭhapetvāti attho. **Ākāro** hi pesanatthavācako. **Sopīti** pisaddo purimajane apekkhati. ‘‘Dhāreti’’ti iminā āyikapaccayo dhāraṇatthe hotūti dasseti. **Aññeti** mātāpitūhi aññe. **Hīti** saccam, yasmā vā. **Teti** aññe nātakā, taṃ āṭhapetuṃ yasmā na issarā, tasmā na ināyikoti yojanā. **Itaranti** naiṇāyikato aññaṃ. **Assāti** janassa. **Nanti** taṃ janaṃ. **Tesūti** nātisālohitādīsu. **Tathārūpassāti** attano nātisālohitassāti attho. Ārocetabbākāraṃ dassento āha ‘‘sahetuko’’tiādi. Tattha **sahetukoti** bhabbo. **Soti** upaṭṭhāko. **Paṭipajjati** paṭidadāti. **Etanti** kappiyabhaṇḍam. **Ajānitvāti**

ināyikabhāvamajānitvā. **Passantenāti** ināyikaṃ passantena. “Apassantassa gīvā na hotī”ti iminā passitvā adassentassa gīvā hotīti dasseti.

Pucchiyamānopīti “kiṃ tvam ināyikosī”ti pucchiyamānopi. **Tanti** ināyikaṃ. **Tatthāti** aññasmiṃ dese. **Tanti** ināsāmikaṃ. **Soti** ināsāmiko. **Ayanti** ināyiko. **Ayanti** vacanā. **Tatthāti** ināyikassa pabbājane. **Sāmicīti** anudhammatā.

Nanti ināyikaṃ. **Soti** ināsāmiko. **Assāti** therassa. Gīvā na hotīti sambandho. **Acchatūti** āsatu upavesatūti attho. **Soti** ināyiko. **Īdisoti** sahetuko vattasampannoti attho. **Atiārādhakoti** vattācārena therassa atitosako.

34. Dāsavatthukathā

97. Dāsāti ceṭakā. Te hi sāmikehi dukkhe vā duṭṭhakamme vā asīyanti khipīyantīti dāsāti vuccanti. **Tatthāti** catūsu dāsesu. “Gharadāsiyā putto”ti iminā antogehe gharadāsiyā kucchimhi jāto **antojātoti** vacanatthaṃ dasseti. Dhanam datvā kīto **dhanakkītoti** vacanatthaṃ dassento āha “dhanakkīto nāmā”tiādi. Dhanena kīto dhanakkītoti vacanatthopi yuttoyeva. **Dāsacārittanti** desakālavasena dāsānaṃ cārittam. **Tattha tatthāti** tasmim tasmim dese, kāle vā.

Karamarānīto nāmāti ettha **karamaroti** vandi. So hi sattūnaṃ karena hatthena maritabbatā karamaroti vuccati. Karamarabhāvena ānīto karamarānīto. Tiroraṭṭhā āharantīti sambandho. **Upalāpetvā vāti** palobhetvā vā. **Tatoti** kasmāci gāmato. Manussā eva **mānussakāni**. Itthipurisānaṃ sādharmaṇabhāvena sāmāññabhāvato napuṃsakalingavasena vuttaṃ. Pisaddena na kevalam dhanāniyeva āharanti, atha kho mānussakānipīti sampiṇḍeti. **Tatthāti** mānussakesu. Evarūpo karamarānīto dāso na pabbājetabboti yojanā. **Sabbasādharmaṇenāti** bandhanāgarasodhanakāle sabbesaṃ sādharmaṇena.

Dāsabyanti dāsassa bhāvo dāsabyaṃ, taṃ. Tena vuttaṃ “dāsabhāva”nti. “Sayamevā”ti iminā **sāmaṃsaddo** sayamatthe nipātoti dasseti. **Bhujissitthiyoti** rañño bhujissitthiyo. **Vaṇṇadāsīhīti** nagarasobhinihi. Tā hi vaṇṇasampannadāsibhāvato vaṇṇadāsīti vuccanti. **Tāsanti** bhujissitthīnaṃ. **Paṇṇanti** dāsipaṇṇam. **Bhaṭṭiputtakagaṇādīnanti** ādisaddena mallaputtagaṇādayo saṅgaṇhāti. Iminā bahusāmikadāsaṃ dasseti. **Tehīti** bhaṭṭiputtakagaṇādīhi. **Adinnā na pabbājetabbāti** bahūsu sāmikesu ekenapi adinnā na pabbājetabbā. **Tepīti** āramikadāsepi. Imasmim āramikadāsapabbājane aṭṭhakathāvādaṃ dassento āha “mahāpaccariya”ntiādi. “Takka”nti padaṃ “āsittaka”iti pade kammaṃ. “Sīse”ti padaṃ “āsittaka”iti pade ādhāro. Kesuci janapadesu desacārittavasena sīse takkassa āsiṅcanaṃ dāsānaṃ bhujissakaraṇanti adhippāyo. “Āramikaṃ demā”ti vacanaṃ dāsānaṃ bhujissavacananti vuttaṃ hoti. **Yena kenaci vohārenāti** “āramikaṃ demā”ti vā “āramikadāsaṃ demā”ti vā “kappiyakāraṃ demā”ti vā yena kenaci vohārena. Dvīsu aṭṭhakathāvādesu kurundivādassa pacchā vuttatā soyeva pamāṇanti daṭṭhabbaṃ. **Duggatamanussāti** dukkhaṃ gatamanussā. **Eteti** duggatamanusse. **Taṃ pabbājetuṃ na vaṭṭatīti** mātāpitūnaṃ dāsabhāvaṃ upagatakāle jātaṃ puttaṃ sandhāya vuttaṃ. Atha pana mātāpitāro dāsabhāvaṃ upagatā, na putto, taṃ pabbājetuṃ vaṭṭati. “Bhikkhussā”tipadaṃ “ñātakā vā upaṭṭhākā vā”tipadesu sāmīsambandho, “denti”ti pade sampadānaṃ. **Assāti** bhikkhussa. **Imanti** dāsaṃ. **Abhiramissatīti** bhikkhubhāve abhiramissatī. **Vibhamissatīti** vinivattetvā gihibhāvaṃ bhamissatī. Iti vatvā dentīti sambandho. **Nissāmikadāsoti** pariggāhakasāmikavirahito dāso. Nissāmikassa dāsassa rājā sāmī, tasmā rañña apariggahite attanāva attānaṃ bhujissaṃ kātuṃ vaṭṭati. Pariggahite rājānaṃ kārāpetuṃ vaṭṭati. **Ajānantoti** attano dāsabhāvamajānanto.

Anurādhapurāti anurādhanagarato nikkhamitvāti sambandho. **Soti** putto. **Idhāti** rohaṇe. Mātaram pucchitvāti sambandho. **Āgammāti** āgantvā. **Aticchathāti** atikkamitvā icchatha, idha kiñci deyyadhammaṃ natthi, idam atikkamitvā aññattha ṭhātumicchathāti vuttaṃ hoti. **Teti** gharasāmikā. Catūhi paccayehi paṭijaggantā vasāpesunti yojanā.

35. Kammārabhaṇḍuvatthuādikathā

98. Tulādhāramuṇḍakoti mānabhaṇḍadhāro muṇḍako. Iminā **kammārabhaṇḍūti** ettha kammārasaddo tulādhārapariyāyo, bhaṇḍusaddo muṇḍakapariyāyoti dasseti. Tulādhāro hi alaṅkāravikatikaraṇatthāya kammaṃ arati jānātīti **kammāro**ti vuccati. Muṇḍako bhaṇḍīyati “muṇḍo”ti paribhāsīyatīti **bhaṇḍūti** vuccati. “Suvaṇṇakāraputto”ti iminā tassa sarūpaṃ dasseti. **Apaloketunti** ettha apapubbo lokasaddo āpucchanatthoti āha “āpucchitu”nti. “Bhaṇḍukammatthāyā”ti iminā **bhaṇḍukammāyāti** ettha tadatthe catutthīti dasseti. **Tatrāti** “saṅghaṃ apaloketu”ntiādivacane. **Sīmāpariyāpanneti** vihārasīmāya vā upacārasīmāya vā pariyāpanne. **Tatthāti** bhikkhūnaṃ sannipātattānaṃ. **Ettha cāti** āpucchane ca. **Vattum vaṭṭatiyevāti** pañcasu vākyesu yaṃkiñci vākyam kathetuṃ vaṭṭatiyeva. Pisaddena “imassa muṇḍakammaṃ āpucchāmi”ti vākyampi saṅghāti.

Tesanti vīsatiādīnaṃ bhikkhūnaṃ. “Daharabhikkhū vā sāmaṇere vā”ti idaṃ āsannavasena vuttaṃ. Gihimpi pesetvā āpucchāpetuṃ vaṭṭati. Kasmā? “Pabbajjāpekkhaṃ vinā vā”ti vuttatā.

Pabbājentassa anāpattiyeva, supabbajitoti āha “pabbājentassāpi anāpattī”ti.

Āpucchitaṃ pagevāti yojanā. **Khaṇḍasīmāyanti** vihārasīmāya vā upacārasīmāya vā abbhantare ṭhitāyaṃ khaṇḍasīmāyaṃ. **Yo panāti** pabbajjāpekkho pana. **Vibbhantako vāti** navavibbhantako vā. Pabbajitānaṃ dvaṅgulakeso vaṭṭatīti āha “dvaṅgulakeso vā”ti. Dvīhi aṅgulīhi atiritto keso imassāti **dvaṅgulātirittakeso**. Ekasikhāmattadharopi hotīti yojanā.

100. Mārabyādhināti māraṇābādho. So hi sattānaṃ māraṇatthēna, vividhassa ca dukkhassa ādahaṭṭhena māraṇābādhitī vuccati. Iminā **ahivātakarogenāti** ettha ahivīsadisena vātena pavatto rogo ahivātakarogoti vuccatīti dasseti. Tamatthaṃ vitthārento āha “yatra hī”tiādi. Tattha **yatrāti** yasmiṃ kule. So rogo tasmīṃ kule dvīpade catuppade paṭhamam gaṇhāti, pacchā gehasāmike gaṇhātīti **dhammapadaatthakathāyaṃ** (dha. pa. aṭṭha. 1.sāmāvātīvatthu) vuttaṃ. **Tathāti** yathā añño bhittim vā chadanaṃ vā bhinditvā palāyitvā tirogāmādigato vā hutvā muccati, tathā. Ettha ca kule pitāputtā muccisūti attho.

Kākuḍḍepakanti ettha kāke uḍḍāpetīti kākuḍḍepako, kāke vā uḍḍāpetvā bhattam bhuñjitum sakkotīti kākuḍḍepakoti vacanattham dassento āha “yo vāmahatthenā”tiādi. Tattha **uḍḍāpetvāti** uddham ākāsaṃ gamanāpetvā. **Tanti** kākuḍḍepakaṃ.

102. Ittarasaddo appamattakavācako anipphannaṇāpātipadikoti āha “appamattako”ti. “Katipāhamevā”ti iminā tassa attham dasseti.

40. Nissayamuccanakakathā

103. Ogaṇenāti ettha otyūpasaggo lāmakatthavācako āha “parihīnagaṇenā”ti. Attano vuḍḍhatarasseva bhikkhussa santike nissayo gahetabboti āha “sacāyaṃ vuḍḍhatara”ntiādi. Tattha **ayanti** abyatto bhikkhu. **Upasampadāyāti** upasampādetvā. **Āyasmato**ti āyasmantaṃ, upayogatthe cetam sāmivacanaṃ. Āyasmato vā ovādanti yojanā. **Sabbatthāti** sabbesu. **Āpucchanesūti** disāpakkamanādiatthāya āpucchanesu. **Etthāti** imasmim nissayavasaṇatthāne. **Tanti** tattakam sutam. **Tassāti** sutassa.

41. Rāhulavatthukathā

105. Kapilavatthūti ettha **kapiloti** kaḷāravaṇṇo isi vuccati, so vasati etthāti kapilavatthu, assamo. Tasmim ṭhāne māpitattā nagarampi kapilavatthūti (dī. ni. aṭṭha. 1.267; su. ni. aṭṭha. 2.362) vuccati.

Ayanti vakkhamānakathā. **Suddhodanamahārājāti** ettha **suddhodanoti** tassa rañño nāmaṃ. Atha vā suddhaṃ odanaṃ imassāti suddhodano, soyeva mahārājā suddhodanamahārājā. Viharati kirāti sambandho. **Soti** suddhodanamahārājā. **Rājagahanti** rājagahanagaraṃ. **Sādhūti** āyācanatthe nipāto. Āyācāmīti hi attho. **Meti** mama, puttanti sambandho, anādare vā sāmivacanaṃ. **Soti** amacco. **Sādhūti** sampañchanatthe nipāto. Evanti hi attho. **Athāti** tasmim nisīdanakāle. **Assāti** purisasahassaparivārassa amaccassa. **Tatoti** yācanakāraṇā. **Nanti** purisasahassaparivāraṃ amaccaṃ. **Tatthevāti** rājagaheyeva. **Tepīti** aṭṭha dūtāpi. **Teti** nava dūtā.

Athāti tato pacchā. **Ekadivasajātakanti** ekasmim divase jātakaṃ. **Soti** kāludāyīamacco. **Pabbajitvāpīti** pisaddena “apabbajitvāpī”ti atthaṃ sampiṇḍeti. **Tathevāti** yathā nava dūtā saparivārā arahattaṃ pāpuṇṇesu, tatthevāti attho. **Soti** kāludāyī. **Sambhatesūti** sambharitesu gahetvā niṭṭhāpitesūti attho. **Vissatṭhakammesūti** vissatṭhā kammantā etesanti vissatṭhakammantā, tesu. **Supupphitesūti** sundarapupphasañjātesu. **Paṭipajjanakkhameti** paṭipajjanatthāya khame yogye. Gamanavaṇṇaṃ saṃvaṇṇesīti sambandho. **Saṭṭhimattāhīti** (bu. vaṃ. aṭṭha. nidānakathā 2) saṭṭhipamāṇāhi. **Etanti** etaṃ saṃvaṇṇassa kāraṇaṃ kinti pucchi. Cārikaṃ pakkamituṃ kāloti yojanā. **Tena hīti** uyyojanatthe nipāto. Bhagavā pakkāmīti sambandho. **Parivutoti** parisamantato vuto āvuto nivuto hutvāti sambandho. **Aturītacārikanti** ajavanacārikaṃ.

Evanti iminā nayena. Bhagavati pakkante ca satīti yojanā. **Nikkhantadivasatoti** phagguṇapūṇṇamiyā pāṭipadadivasato. **Uttamabhojanarasassāti** uttamabhojanarasena. **Dassathāti** dadeyyātha. **Tenevāti** saddhāya uppādanakāraṇeneva. **Nanti** kāludāyim. Bhagavā ṭhapesīti sambandho. **Etadagganti** eso aggo. **Yadidanti** yo ayaṃ. **Etadaggeti** etadaggaṭṭhāne.

Sākiyāpi kho paṇiṇṇesūti sambandho. **Ñātiṣeṭṭhanti** ñātīnaṃ seṭṭhaṃ, ñātiyeva vā seṭṭhaṃ, bhagavantanti yojanā. **Nigrodhasakkassāti** nigrodhanāmakassa sakkassa. **Tatthāti** nigrodhasakkassa ārāme. **Paccuggamananti** paṭimukhaṃ uṭṭhahitvā gamanaṃ. **Tatoti** paṇiṇato, paranti sambandho. Rājakumāre ca rājakumārikāyo ca paṇiṇṇesūti yojanā. **Tesanti** rājakumārārājakumārikānaṃ. **Tatrāti** nigrodhārāme. Māno jāti sabhāvo etesanti **mānajātikā**, mānena, māno vā thaddho etesanti **mānathaddhā**. **Teti** sākiyā, āhaṃsūti sambandho.

Tesūti sākiyesu. **Neti** ñātayo. **Vuṭṭhāyāti** catutthajjhānato vuṭṭhahitvā. **Tesanti** ñātīnaṃ. **Kaṇḍambarukkhamūleti** kaṇḍanāmakena uyyānapālena ropimassa ambarukkhasa āsanne. **Rājāti** suddhodanamahārājā. **Voti** tumhākaṃ, pādeti sambandho. **Ayanti** vandanā. **Jambucchāyāyāti** jamburukkhasa chāyāya. Iti āhāti yojanā.

Sikhāppattoti aggappatto, koṭṭipattoti attho. **Tatoti** nisīdanato, paranti sambandho. **Pokkharavassanti** padumavane vuṭṭhavassasadisam. **Tambavaṇṇanti** lohitaṇṇaṃ. **Tanti** apatanaṃ bhagavā kathesīti sambandho.

Dutiya divaseti kapilavatthum pattadivasato dutiye divase. **Indakhīleti** nagarassa ummāre. **Kathanti** kenākārena carimṣu nu khoti yojanā. Agamaṃsu kiṃ carimṣu kinti yojanā. **Sapadānacāranti** gharapaṭipāṭikhaṇḍanavirahitena saha pavattaṃ cāraṃ. **Tatoti** āvajjanato, paranti sambandho. **Ayameva vaṃsoti** pubbabuddhānaṃ ayameva vaṃso. **Ayaṃ pavenīti** tasseva vevacanaṃ. **Anusikkhantāti** anu paṭibhāgaṃ sikkhantā. **Nivīṭṭhagehatoti** nivāsantatthāya visitagehato. **Ayyoti** adhipo sāmīti attho. **Siddhatthakumāroti** sabbalokassa siddho attho asmim atthīti **siddhattho**, soyeva kumāro siddhatthakumāro. **Sihapañjaranti** vātapānaṃ. Tañhi sīharūpaṃ dassetvā katapañjarattā sihapañjaranti vuccati. **Dassanabyāvaṭoti** dassane, dassantatthāya vā byāvaṭo. Rāhulamātāpi devī ārocesīti sambandho. **Kapālahatthoti** kapālo hatthesu assa bhagavatoti kapālahattho, hutvāti sambandho. **Nānāvīrāgasamujjalāyāti** nānāṭṭhānesu virāgāya samujjalāya. Virocamānaṃ bhagavantanti sambandho.

Uṇhīsatoti siroveṭṭhanato. Tañhi uparisīse nahati bandhati, nahīyati bandhīyatīti vā **uṇhīsoti**

vuccati. **Narasīhagāthāhi nāmāti** narasīhagāthānāmākāhi. Tā hi yasmā naroyeva sabbasattānaṃ sīho seṭṭho, narānaṃ, naresu vā sīho seṭṭhoti **narasīho**, tassa pakāsakā gāthā honti, tasmā narasīhagāthāti vuccanti. **Rañño**ti sassurarañño, mātularañño vā. **Samviggahadayoti** calanacitto. **Sanṭhāpayamānoti** suṭṭhu ṭhāpayamāno. **Turitaturitanti** turitato turitaṃ, atisīghanti attho. **Kim bhanteti** kim karaanā bhante. **Ahuvatthāti** hiyyattanīmajjhimapurisasānkhātāya tthavibhattiyā hūdhātussa ūkārassa uvādeso hoti, tasmā tumhe evaṃsaññino ahuvatthāti yojanā. **Vamsacārittametanti** etaṃ piṇḍāya caraṇaṃ vaṃsato pavenito cārittaṃ. **Tattha cāti** mahāsammatakhattiyavaṃse ca. **Ayanti** mahāsammatakhattiyavaṃso. **Antaravīthiyanti** vīthiyā majjhe. Ṭhitova āhāti sambandho.

Uttiṭṭhetti uddissa, uṭṭhahitvā vā piṇḍāya tiṭṭhane. **Dhammaṃ sucaritanti** suṭṭhu caritabbaṃ bhikkhācariyasānkhātāṃ dhammaṃ. **Careti** careyya. **Dhammacārīti** bhikkhācariyasānkhātāṃ dhammaṃ caraṇasīlo samaṇo. **Sukhaṃ setīti** upalakkhaṇavasena vuttaṃ. Sesairiyāpathāpi lakkhaṇahārasena gahetabbā samānakiccattā. Asmiñca loke paramhi ca loketi yojanā.

Na taṃ duccharitaṃ careti vesiyādigocarasaṅkhātāṃ duṭṭhu caritabbaṃ taṃ dhammaṃ na careyya.

Ettha ca paṭhamagāthaṃ antaravīthiyaṃ kathetvā rājānaṃ sotāpattiphale patiṭṭhāpesi, dutiyagāthaṃ pitunivesane kathetvā mahāpajāpatiṃ sotāpattiphale, rājānaṃ sakadāgāmiphale patiṭṭhāpesīti daṭṭhabbaṃ. **Dhammapālaajātakam sutvāti** puna aparasmim divase (jā. aṭṭha. 4.98 ādayo; dha. pa. aṭṭha. 1.nandattheravatthu) dhammapālaajātakam (jā. aṭṭha. 4.mahādhammapālaajātakavaṇṇanā) sutvā. **Maraṇasamayeti** maraṇāsannakāle, maraṇasamayasaṃpe vā, samīpatthe cetam bhummavacanāṃ.

Sotāpattiphalaṃ sacchikatvā parivisīti sambandho. **Sabbaṃ itthāgāranti** sabbo orodho. So hi itthīnaṃ agāranti **itthāgāranti** vuccati. Iminā vacanathena agārameva mukhyato labbhati, rājithiyo pana upacārenāti daṭṭhabbaṃ. **Sā panāti** rāhulamātā pana. **Parijanenāti** parivārena. **Nanti** ayyaputtaṃ. “Rājāna”ntipadaṃ “gāhāpetvā”tipade kārītakammaṃ, “patta”ntipadaṃ tattheva dhātukammaṃ. **Rājadhītāyāti** suppubuddharañño dhītāya. **Sāti** rājadhītā. **Goppakesūti** caraṇagaṇṭhīsu bhagavantaṃ gahetvāti yojanā. Atha vā bhagavato goppake gahetvāti yojanā. Evañhi sati upayogathe bhummavacananti daṭṭhabbaṃ.

Rājā kathesīti sambandho. **Anacchariyanti** na acchariyaṃ, accharaṃ paharitaṃ na yogyanti attho. Rājadhītā yaṃ attānaṃ rakkhi, idaṃ anacchariyanti yojanā.

Taṃdivasamevāti tasmim dutiyadivaseyeva. **Kesavisajjananti** rājacūlāmaṇibandhanatthaṃ kumārakāle bandhitasikhāveṇisaṅkhātassa kesassa visajjanaṃ, mocananti attho. **Paṭṭabandhoti** asuko nāma rājāti nalāte suvaṇṇamayassa paṭṭassa bandhanaṃ. **Ghamaṅgalanti** abhinavagharāṃ pavesanaṃmaṅgalaṃ. **Āvāhamaṅgalanti** āvāhe pavattaṃ maṅgalaṃ. **Chattamaṅgalanti** rājachattussāpanakāle pavattaṃ maṅgalaṃ. **Maṅgalaṃ vatvāti** maṅgalasaṃyuttaṃ dhammakathaṃ kathetvā. **Janapadakalyāṇīti** janapadamhi kalyāṇasamannāgatā. **Tuvaṭṭam khoti** khippameva. **Sopīti** nandarājakumārōpi. **Itīti**ādi nigamanaṃ. **Dutiyadivaseti** kapilavatthupattadivasato dutiye divase. Dhammapadaaṭṭhakathāyaṃ (dha. pa. aṭṭha. 1.nandattheravatthu; theragā. aṭṭha. 1.nandattheragāthāvaṇṇanā) pana “tatiyadivase nandaṃ pabbājesī”ti vuttaṃ.

Sattame divaseti kapilavatthupattadivasatoyeva sattame divase. Etaṃ samaṇaṃ passāti yojanā. **Brahmarūpavaṇṇanti** brahmuno rūpasānkhāto vaṇṇo viya vaṇṇo imassāti brahmarūpavaṇṇo, taṃ. **Ayanti** ayaṃ samaṇo. **Tyassāti** te assa. **Teti** nidhayo. **Assāti** samaṇassa. **Nanti** samaṇaṃ. **Yācāti** yācāhi. Ayaṃ dvikammikadhātu. **Hīti** saccaṃ, yasmā vā. Putto pitusantakassa sāmiko, iti tasmā me dehīti yojanā. Anurūpaṃ vacananti sambandho. Bhagavantaṃ anubandhīti bhagavato piṭṭhito piṭṭhito anubandhi.

Na visahatīti na samattheti. Ayaṃ kumāro pitusantakaṃ yaṃ dhanāṃ icchati, tanti yojanā.

Vaṭṭānugatanti vaṭṭadukkhaṃ anugataṃ. **Savighāta**kanti vighātakehi pañcahi verehi sahitaṃ. **Assā**ti kumārassa. **Nanti** kumāraṃ. **Ayanti** kumāro. **Dāyajjanti** dāyasankhātaṃ mātāpitūnaṃ dhanam ādadātīti **dāyādo**, putto, tassa idanti **dāyajjaṃ**, mātāpitūnaṃ dhanam.

“Kathāhaṃ bhante rāhulakumāraṃ pabbājemī”ti kasmā āha, nanu āyasmā sārīputto bārāṇasiyaṃ tīhi saraṇagamaṇehi anuññātaṃ pabbajjaṃ na jānātīti āha “idānī”tiādi. Yā sā pabbajjā ca upasampadā ca anuññātāti yojanā. **Tatoti** pabbajjāupasampadato. Upasampadaṃ paṭikkhipitvāti sambandho. **Vimatī**ti vividhā icchā. **Imaṅca panatthanti** imameva vimatisankhātamattaṃ. Dhammasenāpati āhāti sambandho. Bhagavato taṃ ajjhāsayanti yojanā.

“Atha kho...pe... pabbājesī”ti ettha kiṃ kumārassa kesacchedanādīni sabbakiccāni āyasmā sārīputtoyeva karotīti āha “mahāmoggallānatthero”tiādi. **Ovādācariyoti** nivāsanaṃ pārupanādīsū sekhiyavattesu, ābhisamācārikesu ca ovādako ācariyo. Atha kasmā “āyasmā sārīputto rāhulakumāraṃ pabbājesī”ti vuttanti āha “yasmā panā”tiādi. **Tatthāti** tassaṃ pabbajjāupasampadāyaṃ. **Na ācariyoti** pabbajjācariyo ca ovādācariyo ca na issaro.

Uppannasaṃvegena hadayenāti ettha itthambhūtalakkhaṇe karaṇavacanaṃ. Uppannasaṃvego hadayo hutvāti hi yojanā. **Sabbanti** sabbam vacanaṃ.

Tatthāti purimavacanāpekkhaṃ. **Avisesenāti** “dhana”nti vā “añña”nti vā “sāvajja”nti vā “anavajja”nti vā visesamakatvā sāmāññaena. **Na ca buddhānanti** ettha casaddena na kevalaṃ apaṭirūpameva, atha kho buddhānaṅca na āciṇṇanti atthaṃ dasseti. **Yanti** yaṃ varam. **Tathā nandeti** ettha tathāsaddassa upameyyatthajotakabhāvaṃ dassento āha “yatheva kirā”tiādi. Yatheva bodhisattaṃ byākarīṃsu, evaṃ nandampi rāhulampi byākarīṃsu kirātī yojanā. Pāḷiyaṃ pana yathā bhagavati me bhante pabbajite anappakaṃ dukkhaṃ ahosi, tathā nande pabbajite anappakaṃ dukkhaṃ ahosi, tathā rāhule pabbajite adhimattaṃ dukkhaṃ ahosīti yojanā. **Nemittakāti** subhāsubhanimittaṃ kathentīti nemittakā. **Puttassāti** jeṭṭhaputtassa siddhatthakumārassa. **Pabbajjāyāti** pabbajjāhetu pabbajjākāraṇā, pabbajjānimittaṃ vā. **Tatoti** bhagavato pabbajjato. **Tampīti** nandampi. **Itīti** īdisaṃ. Bhagavato pabbajjāya mahantaṃ icchāvighātasadisanti attho. **Tampīti** rāhulampi. **Tenāti** pabbajjāhetunā. **Assāti** rañño. Uppajjīti sambandho. **Itoti** sokuppattito varayācanaṃ vā.

Soti rājā. **Yatra hi nāmāti** yo nāma. Ahampi nāma yo yādiso buddhamāmakō dhammamāmakō saṅghamāmakō samāno, so tādiso ahampi na sakkomīti yojanā. **Aññeti** mayā apare. **Dukkhan**ti ñātiviyogadukkhaṃ. **Niyyānikakāraṇanti** manussānaṃ garaupaṇvādaakkosato niyyānikaṃ kāraṇaṃ.

Tatthāti “anānuññāto”tiādivacane. Janetīti **jananī**, mātā. Janetīti **janako**, pitā. Iminā posāvanikamātāpitāro nivatteti. Mātā vā matā hotīti yojanā. **So eva vāti** putto eva vā. **Anuññātomhīti vadatīti** saccena vā alikena vā “anuññātomhī”ti vadati. Mātā vā sayam pabbajitāti yojanā. **Pitassāti** pitā assa. **Assāti** puttassa. **Vippavutthoti** mātuyā kenaci kāraṇena pavāso.

Cūlamātādīnantiādisaddena mahāmātādīni saṅgaṇhāti. **Posanakāti** vaḍḍhanakā. **Tesupīti** posanakamātāpitāresupī.

Yaṃ pana puttaṃ nānujānantīti sambandho. **Jīvassevāti** tassa jīvassa eva, pabbājentassa vā bhikkhussa, na desantaragamanādīnamatthāyāti attho. **Tesanti** mātāpitūnaṃ.

Mahākantāroti kena udakena taritabboti **kantāro**, nirudakakantārova mukhyato labbhati, vāḷakantāro corakantāro amanussakantāro dubbhikkhakantāro marukantāroti ime pañca kantārā rūḷhīvasena. Mahanto kantāro **mahākantāro**.

Yāvataketi ettha yāvasaddo pamāṇatthoti āha ‘yattake’^{ti}.

42. Sikkhāpadaṇḍakammavatthukathā

106. Nāsanavatthūti liṅganāsanāya adhiṭṭhānaṃ, kāraṇanti vuttaṃ hoti. Pacchimānaṃ pañcannanti yojanā. **Daṇḍakammavatthūti** daṇḍakammaṃ kāraṇaṃ.

107. Appatissāti ettha bhikkhūnaṃ vacanassa paṭimukhaṃ ādarena asavanaṃ bhikkhū jeṭṭhakaṭṭhāne na ṭhapenti nāmāti dassento āha ‘bhikkhū jeṭṭhakaṭṭhāne’^{ti}ādi. ‘Samānajīvikā’^{ti} iminā **asabhāgavuttikāti** ettha **sabhāgasaddo** samānasaddapariyāyo, **vuttisaddo** jīvikapariyāyoti dasseti. **Parisakkaṭṭi** ettha sakka gatiyantidhātupāṭhesu (saddanītidhātumālāyaṃ 16 ḷakārantadhātu) vuttattā pariṇibbho sakkasaddo gatyatthoti āha ‘parakkamatī’^{ti}. **Kintīti** kimeva. **Itisaddo** hettha evasaddattho, kena eva upāyenāti hi attho. **Akkosati cevāti** jātiādihi akkosati ceva. **Bhedetīti** bhedaṭṭeti. **Āvaraṇaṃ kātunti** ettha āvaraṇasaddo nivāraṇasaddavevacanoti āha ‘nivāraṇaṃ kātu’^{nti}. **Yatthāti** yasmim pariveṇe, senāsane vā. **Vassaggenāti** vassagaṇanāya. (**Tassāti** pariveṇasenāsanassa. **Upacāreti** āsanne). **Mukhadvārikanti** mukhasaṅkhātena dvārena ajjhoharitaṭṭhaṃ. ‘Vadatoṭī’^{ti} iminā vacīpayogena dukkaṭṭapattim dasseti, ‘nikkhipatoṭī’^{ti} iminā kāyapayogena. **Anācārassāti** daṇḍakamme anācārassa. **Ettake nāma daṇḍakammeti** ettake nāma udakāharāpanādisaṅkhāte daṇḍakamme. **Idanti** yāgubhattādim. **Lacchasīti** labhissasi. ‘Ettake nāma daṇḍakamme’^{ti} vuttavacanassa yuttim dassento āha ‘bhagavatā hī’^{ti}ādi. **Daṇḍakammanti** daṇḍenti damenti etenāti **daṇḍo**, soyeva kattabbattā kammanti daṇḍakammaṃ āvaraṇādi. **Aparādhānurūpanti** vītikammaṃ aparādhassa anurūpaṃ. **Tampīti** udakadāruvālikādiāharāpaṇampi. **Taṅca khoti** taṅca kāraṇaṃ. **Oramissatīti** kāyena oramissati. **Viramissatīti** vācāya viramissati. **Uṇhapāsāṇe vāti** ādiṣu vāsaddena aññānīpi attatāpanaparitāpanādīni kammāni saṅgaṇhāti.

43. Anāpucchāvaraṇavatthuādīkathā

108. Upajjhāyaṃ anāpucchāti ettha upajjhāyaṃ anāpucchitvā. Sabbathā kiṃ na kātabbanti āha ‘tumahāka’^{nti}ādi. **Daṇḍakammamassāti** daṇḍakammaṃ assa. **Assāti** sāmānerassa. Saddhim upajjhāyena viharantīti **saddhivihārikā**. Nissayācariyādīnaṃ ante samīpe vasantīti **antevāsikā**, upasampannāyeva.

Apalāletīti ettha laḷa upasevāyanti dhātupāṭhesu vuttattā (saddanītidhātumālāyaṃ 18 ḷakārantadhātu) there laḷato upasevato apagametīti attho daṭṭhabbo. Idha pana adhippāyattaṃ dassento āha ‘tumahāka’^{nti}ādi. **Apalāletabbāti** aññāṃ laḷato upasevato apagametabbā. Parisabhūte sāmānerūpasampanneti yojanā. **Ādinavanti** dussīlaṃ nissāya vasanassa dosaṃ. Nhāyituṃ āgatenā tayā gūthamakkaṇaṃ kataṃ viya dussīlaṃ nissāya viharantena dussīlaṃ katanti yojanā. ‘Dussīla’^{nti} padaṃ purimāpacchimāpadāpekkhaṃ, tasmā dvinnaṃ padānaṃ majjhe vuttaṃ. Tattha purimāpadāpekkhakāle vuttakammaṃ, pacchimāpadāpekkhakāle avuttakammaṃ. **Soti** sāmānerūpasampanno. **Upajjhāyaṃ vāti** sāmāneraṃ sandhāya vuttaṃ. **Nissayaṃ vāti** upasampannaṃ sandhāya vuttaṃ.

Tīsu nāsanāsūti samvāsaliṅgandaṇḍakammaṃ nāsanāsānkhātāsu tīsu nāsanāsu. **Yoti** sāmānero. **Nānāpattiyoti** pārājīkathullaccaya pācittiyāpattiyoti. **Hīti** saccam, yasmā vā. **Kunthakipillikampīti** ettha pānakhādakehi sattehi kuthiyati hiṃsiyatīti kuntho, kuṃ pathaviṃ vā dhāretīti **kundho**.

Kimiyeva pillikaṃ potakaṃ **kipillikaṃ** mikārassa lopaṃ katvā. Pillikasaddo hi potakapariyāyo. Kimīnaṃ, kimīsu vā pillikaṃ **kipillikaṃ**. **Nāsetabbatamyevāti** liṅgena nāsetabbabhāvameva. **Tāvadevāti** tasmim māraṇabhindanakkhaṇeyeva. **Assāti** sāmānerassa. **Senāsanaggāho ca paṭippassambhatīti** vassacchedo hotīti adhippāyo. **Ākiṇṇadosovāti** liṅganāsanadosena ca daṇḍakammaṃ nāsanadosena ca ākuladosova. **Virajjhivāti** virādhavā. Yathānivattapārutasseva

sāmaṇerassāti sambandho. **Tasmāti** saraṇagamanaupasampadakkammavācānaṃ sadisattā. Bhikkhunā samādinnaṃ viya imināpi samādinneva hontīti yojanā. **Evanti** evamijjhane, samādinne vā. **Daḥhikaraṇatthanti** sikkhāpadānaṃ daḥhikaraṇatthaṃ. **Paṭiṭṭhāpanatthanti** sāmaṇerassa paṭiṭṭhāpanatthaṃ. **Lacchatīti** labhissati. Saṅghena dātabboti sambandho. **Apaloketvāti** saṅghaṃ āpucchivā. Iminā chinnavassakaṃ dasseti.

Adinnādāne tiṇasalākamattenāpi vatthunā asamaṇo hotīti yojanā. **Vippaṭṭipattiyāti** vikārena paṭipajjanato. **Bhaṇiteti** bhaṇane. **Jānitvāti** jānitvā eva. Evakāro hettha ajjhāharitabbo, tena vuttaṃ “na ajānitvā”ti. Yāni pañca sikkhāpadānīti yojanā. **Assāti** sāmaṇerassa. **Ṭhapanatthāyāti** sikkhāpadānaṃ ṭhapanatthāya. **Ayanti** pārājiko. **Visesoti** bhikkhūnaṃ pācittiyato viseso.

Paṭipakkhavasenati “anaraḥaṃ asammāsambuddho”tiādina ca “dvākkhāto”tiādina ca “duppaṭṭippanno”tiādina ca paṭiviruddhavasena garahanto sāmaṇero nivāretabboti sambandho. **Kaṇḍakanāsanāyāti** kaṇḍakanāmakassa sāmaṇerassa daṇḍakammaṇāsanāya. **Taṃ laddhanti** avaṇṇabhāsanadiṭṭhiṃ. **Accayanti** atikkamaṃ, dosaṃ vā. **Desāpetabboti** “accayo maṃ bhante accagamā”tiādina desāpetabbā. **Taṃ yuttanti** “liṅganāsanāya nāsetabbo”ti taṃ vacanaṃ patirūpaṃ. **Hīti** saccamaṃ, yasmā vā. **Idhāti** khandhake, “sāmaṇeraṃ nāsetu”ntivacane vā.

“Eseva nayo”ti vuttavacanaṃ pākaṭaṃ karonto āha “sassatucchēdānañhī”tiādi. Aññataradiṭṭhiko sāmaṇeroti yojanā. **Etthāti** dasasu nāsanaṅgesu. **“Kāma”**ntipadena punaruttinirattakadosāropanena garahaṃ dasseti. **“Panā”**ntipadena tesamaṃ dosānaṃ pahānena sambhāvanaṃ dasseti. Abrahmacāriṃ sāmaṇeranti sambandho. **Upasampādetuṃ vaṭṭatīti** upasampādanaṃ vaṭṭati. Bhikkhunidūsako sāmaṇeroti sambandho. **Pabbajjampīti** ettha pisaddassa garahatthabhāvaṃ dassetuṃ vuttaṃ “pageva upasampada”nti. **Etamatthanti** etādisamatthaṃ.

47. Paṇḍakavatthukathā

109. Daharataruṇasaddānaṃ vevacanattā vuttaṃ **“dahare...pe... taruṇe”**ti. **Moḷigallasaddo** thūlasarīravācako anipphanapāṭipadikoti āha “moḷigalleti thūlasarīre”ti. **Hatthibhaṇḍeti** ettha hatthisaṅkhātaṃ bhaṇḍaṃ etesanti hatthibhaṇḍāti vutte hatthigopakāti āha “hatthigopake”ti. Abhidhāne (abhidhānapadīpikāyaṃ 367 gāthāyaṃ) pana “hatthimeṇḍo”ti pāṭho atthi.

Paṇḍakoti paḍati vikalabhāvaṃ gacchatīti paṇḍako. Saṃkhepena vuttamatthaṃ vitthārena dassento āha **“tatthā”**tiādi. Tattha **yassāti** paṇḍakassa. **Asucināti** sambhavena. **Āsittassāti** āsiñcitabbassa. Iminā asucinā mukhe āsiñcitabboti **āsittoti** vacanatthaṃ dasseti. **Ayanti** paṇḍako. **Ajjhācāranti** methunajjhācāraṃ. “Usūyāya uppannāyā”tiiminā usūyatīti **usūyoti** vacanatthaṃ dasseti. **Upakkamenāti** vāyāmena. **Bijānīti** aṇḍāni. Iminā upakkamena etasmā bijāni apanītānīti **opakkamikoti** vacanatthaṃ dasseti. Pakkhe pavatto paṇḍako **pakkhapaṇḍako**, pakkhe pariḷāhavūpasamo paṇḍako **pakkhapaṇḍakoti** vacanatthaṃ dassento āha “ekacco panā”tiādi. Tattha pubbavacanatthe **pakkheti** kālapakkheti attho daṭṭhabbo. Pacchimavacanatthe **pakkheti** juṇhapakkheti attho daṭṭhabbo. “Akusalavipākānubhāvenā”ti padaṃ “paṇḍako hotī”tipadeyeva sambandhitabbaṃ. **Assāti** paṇḍakassa. **Napuṃsakapaṇḍakoti** puriso viya sātisayaṃ paccāmitte na puṃsaketi abhimaddanaṃ kātuṃ na sakkotīti **napuṃsako**. Na pumā na itthīti **napuṃsakoti** katvā napumanaitthisaddassa niruttinayena napuṃsakakaraṇampi vadanti. Napuṃsakoyeva paṇḍako napuṃsakapaṇḍako. **Tesūti** pañcasu paṇḍakesu. **Tesupīti** opakkamikādīsū tīsūpi. “Yasmiṃ pakkhe”ti iminā pakkhe pakkhe paṇḍakabhāvaṃ nivatteti. **Assāti** paṇḍakassa. **Etthāti** pañcasu paṇḍakesu. **Sopīti** paṇḍakopi. **Itoti** paṇḍakavārato. **“Eseva nayo”**ti iminā liṅganāsanameva atidisati.

48. Theyyasamaṃvāsakavatthukathā

110. Pārijaññapattassāti parihāyatīti parijāni, issariyabhogādi, tassa bhāvo pārijaññaṃ,

issariyabhogādikkhayo, taṃ pattoti pārijaññapatto, tassa. “**Pārijuññapattassā**”tipi ukārena saha pāṭho atthi. **Khīṇakolaññoti** ettha kule jātā kolaññā, ṇyapaccayo, nakārāgamo. Khīṇā kolaññā assāti khīṇakolaññoti vacanattamaṃ dassento āha “mātipakkhapitipakkhato”tiādi. Tattha **mātipakkhapitipakkhatoti** mātuyā pakkho mātipakkho, pituno pakkho pitipakkho, mātipakkho ca pitipakkho ca mātipakkhapitipakkhā. **Phāṭim kātunti** ettha phā-dhātu vaḍḍhanatthoti āha “vaḍḍhetu”nti. “Pucchiyamāno”ti iminā **anuyuññijyamānoti** ettha anutyūpasaggavasena yujasaddo pucchanatthoti dasseti.

Theyyasaṃvāsakoti thenamaṃ theyyaṃ nakārassa yakāraṃ katvā, theyyāya saṃvāsako imassāti theyyasaṃvāsako. Ettha ca na kevalaṃ vassagaṇanādikoyeva saṃvāso nāma hoti, atha kho theyyāya līṅgagahaṇampi saṃvāsoyeva nāma. Tasmā tassa tividhabhāvaṃ dassento āha “tayo”tiādi. Tattha līṅgaṃ thenetīti **līṅgathenako**, eseva nayo itaresupi. Tamattamaṃ vitthārento āha “tatthā”tiādi. Tattha **yoti** theyyasaṃvāsako. **Līṅgamattassevāti** ettha mattasaddena saṃvāsādayo nivatteti.

Videsanti attano desato viyogaṃ desaṃ. Visaddo hettha viyogatthavācako. Atha vā vi dūraṃ desaṃ. Visaddo hettha dūratthavācako. **Musāti** abhūtatthe dutiyantanipāto, abhūtaṃ vacananti attho. **Paṭibāhatīti** aññe nivāreti. **Saṃvāsathenako nāmāti** ettha ko saṃvāso nāma, nanu ekakammādikoti āha “bhikkhuvassagaṇanādiko”tiādi. **Bhikkhuvassagaṇanādikoti** ādisaddena yathāvuḍḍhaṃ vandanaśādiyaṃ āsanapaṭibāhanaṃ uposathapavāraṇādīsū sandissananti imāni saṅgaṇhāti. “Kiriyaḥhedo”ti iminā saṃ ekato vasiyati anenāti **saṃvāsoti** vacanattamaṃ kiriyabhedo saṃvāso nāmāti dasseti. **Imasmiṃ attheti** imasmiṃ vatthumhi, imasmiṃ ṭhāneti attho. Iminā pārājikādiṭṭhāne pana ekakammādikoti saṃvāso nāmāti dasseti.

“Līṅgassa ceva saṃvāsassa cā”ti iminā **ubhayathenakoti** ettha ubhayasarūpaṃ dasseti.

Etthāti theyyasaṃvāsakaṭṭhāne. **Rāja...pe... bhayehi vāti** ettha bhayasaddo paccekamaṃ yojetabbo. Rājabhayena ca dubbhikkhabhayena ca kantārabhayena ca rogabhayena ca veribhayena cāti hi attho. **Cīvaragahaṇatthanti** cīvarāharaṇatthamaṃ, ayameva vā pāṭho. **Vāsaddo** hetvatthamaṃ vā sampadānatthamaṃ vā sampiṇḍeti. Ayaṃ gāthā vibhattiyā uppaṭipāṭitā bhaggarītisaṅkhātā alaṅkāradosā na muttā. **Līṅganti** samaṇalīṅgaṃ. **Idhāti** imasmiṃ sāsane.

Nādhivāsetīti na sampaṭicchati. **Yāvāti** yattakaṃ kālaṃ, ayaṃ panettha yojanā – idha yo rāja... pe... bhayena vā cīvaragahaṇatthamaṃ vā līṅgaṃ ādiyati, so suddhamānaso hutvā yāva saṃvāsaṃ nādhivāseti, tāva eso “theyyasaṃvāsako nāmā”ti na vuccatīti.

Tatrāti tāsu gāthāsu. **Idhāti** imasmiṃ sāsane. **Evanti** līṅge gahiyamāne. **Tasminti** jane. **Anosaritvāvāti** anokkamitvāva. **Līṅgaṃ apantvāti** sayamaṃ gahitaṃ samaṇalīṅgaṃ vināsetvā. **Pabbajitālayanti** pabbajitachāyaṃ. **Pubbeti** saṃvāsathenake.

Sabbapāsaṇḍiyabhattānīti sabbāni pāsaṇḍamaṃ uddissa dinnāni bhattāni.

Satte vahaṭīti **sattavāho**. Viramitabbanti **veraṃ**, taṃ pavatteti **veriko**. Kāyena pariḥaritabbānīti **kāyapariḥariyāni**. Tanti tuvaṃ. **Hīṇāyāvattabhāvanti** hīṇāya giḥibhāvāya āvattabhāvaṃ.

Uppabbajitvāti pabbajaviyogaṃ katvā. **Tamatthanti** uppabbajitasaṅkhātamatthamaṃ. **Assāti** mahāsāmaṇerassa.

Mahanto vāti ettha vāsaddo garahattho. Pageva daharoti dasseti. Abyatto hotīti yojanā. **Soti** sāmaṇero.

Vacchagorakkhādīnī ettha **vacchoti** taruṇagoṇo. So hi mātusantike vasatīti **vaccho**. Mātuyā viyogakāle vā vassatīti vacchoti vuccati. Iminā dammagavajjaraggavāpi sāmāññato gahitā. **Go** vuccati khettabhūmi. Vaccho ca go ca **vacchagavā**, tesam rakkhanam vacchagorakkho, so ādi yesam kasikammādīnanti vacchagorakkhādīni. “Sūpasampanno”ti iminā gahaṭṭhampi sace upasampādeti, sūpasampannoti dasseti. **Anupasampannakāleyevā**ti sāmaṇerakāleyeva. **Vinayavinicchayeti** vinaye vuttassa theyyasamvāsakassa vinicchaye. **Theyyasamvāsako hoti** līngassa apanītattā.

Theyyasamvāsako na hoti salīnge ṭhitattā. **Ayampi theyyasamvāsako na hoti** kāsāye saussāhattā. **Theyyasamvāsako hoti** kāsāye dhurassa nikkhattattā.

Theyyasamvāsako na hoti salīnge ṭhitattā. **Neva theyyasamvāsako hoti** kāsāye saussāhattā. **Methunasevanādīhī**tiādisaddena pāṇātipātādayo saṅgaṇhāti. **Theyyasamvāsako hoti** kāsāye dhurassa nikkhattattā. **Ovaṭṭikanti** adhovattena karaṇam. **Rakkhati tāvāti** tāva rakkhati vīmaṃsanena nivāsītattā. **Līnganti** samaṇalīngam. **Theyyasamvāsako hoti** gihilīngassa sampaṭicchitattā.

Vīmaṃsati vā sampaṭicchati vā rakkhatiyeva odātavattassa antokāsāyabhāvato. “Bhikkhuniyāpi eseva nayo”ti vuttamevattham vibhāvento āha “sāpī”tiādi.

Vuḍḍhapabbajito sāmaṇeroti sambandho. **Pāḷiyampīti** pantiyampi. Seno maṃsapesiṃ gahetvā gacchati viya bhattapiṇḍe pattam upanāmetvā gahetvā gacchati. **Theyyasamvāsako na hoti** vassānam agaṇanattā.

48. Titthiyapakkantakakathā

110. Pakkamātīti **pakkanto**, “paviṭṭho”ti iminā kamudhātuyā padavikkhepattham dasseti, icchākantiatthe nivatteti. **Soti** titthiyapakkantako. **Tatrāti** titthiyapakkantake. Upasampanno bhikkhu gacchātīti sambandho. **Tesanti** titthiyānam. “Titthiyo bhavissāmī”ti pubbeva laddhigahitattā vuttam “līnge ādinnamatte”ti. **Kusacīrādīnī** ettha **kuso** vuccati salākā. **Cīroti** panti, āvalīti attho. Kuse rajjunā āvunitvā kato cīro **kusacīro**, so ādi yesam tānīti kusacīrādīni. Ādisaddena phalakacīrādayo saṅgaṇhāti. Kusatiṇehi kato cīro **kusacīrotipi** vadanti. **Naggoti** acelako. **Ājīvakoti** acelakavatamādāya jīvātīti ājīvako. **Tesanti** ājīvakānam. Ovadito hutvāti sambandho.

Kinti kiṃ vataṃ. **Luñcāpetīti** apanayāpeti. **Morapiñchādīnī** ettha **piñchaṃ** vuccati pakkho. So hi piñchati ākāse gacchati anenāti piñchanti vuccati. Pichi gatiyanti dhātupāṭho. Morassa piñchaṃ morapiñchaṃ, taṃ ādi yesam tānīti morapiñchādīni. Ādisaddena ulūkapiñchādayo saṅgaṇhāti. **Yāva na sampaṭicchati**ti yāva laddhiṃ na sampaṭicchati. **Nanti** vīmaṃsamānam bhikkhum. **Laddhīti** titthiyaladdhi. **Rakkhatīti** titthiyapakkantakato rakkhati. Laddhiyā abhāvena titthiyapakkantako na hotīti adhippāyo. **Acchiddacīvaroti** ettha ākāro kodhattho, aḍḍattho vā hoti, chiddasaddo dūsanattho hoti. Tasmā ākodhena aḍḍena vā chiddo dūsitoti **acchiddoti** attho daṭṭhabbo. “Acchinno”tipi pāṭho. Acchiddam cīvarametassāti acchiddacīvaro. **Titthāyatanti** titthīnam nivāsaṭṭhānam, titthiyānam upassayanti attho.

49. Tiracchānagatavattu

111. Devasampattisadisam issariyasampattiṃ anubhavantopi so nāgo kasmā nāgayoniyā aṭṭiyatīti āha “**kiñcāpī**”tiādi.

Tattha kiñcāpi anubhotīti sambandho. **Kiñcāpisaddo** hettha sambhāvanājotako, panasaddo garahatthajotako. **Kusalavipākenāti** ahetukakusalavipākena. **Tassāti** nāgassa. **Sajātīyāti** samānajātīyā nāgiyā. **Udakaṣaṇḍarimāṇḍūkabhakkhanti** uduke saṇcaraṇasīlam maṇḍūkasaṇkhātam bhakkham

pātubhavatīti yojanā. **Soti** nāgo. **Aṭṭiyatīti** aramaṇaṃ pīliyati. **Harāyatīti** ettha haredhātu lajjanathoti āha “lajjati”ti. Ekāranto dhātu bhūvādigaṇiko (saddanītidhātumālāyaṃ 16 rakārantadhātu). **Jigucchatīti** ettha gupadhātuyā kammaṃ dassento āha “attabhāva”nti. “Tassa bhikkhuno”tipadassa “nikkhante”tipadena yojitabbatā bhummatthe sāmivacananti āha “tasmim bhikkhusmi”nti. Atha vā **tassa bhikkhunoti** sāmīyogattā “nikkhante”ti ettha bhāvatthe mānapaccayoti āha “nikkhamane”ti. Iminā nikkhanteti ettha na antapaccayo, mānapaccayasessa antabhāvaṃ katvā vuttoti dasseti. **Vissatṭhoti** sativissajjito. **Tasminti** bhikkhumhi. **Kapimiddhavasenevāti** kapino middhavasena eva. Atha vā kapimiddhavasena niddāyanto iva niddāyantoti yojanā. **Paṭinipajjīti** puna nipajji. **Vissaramakāsīti** ettha visaddo virūpatthajotako, sarasaddo saddavācakoti dassento āha “virūpaṃ mahāsaddamakāsī”ti.

“Akārassa lopaṃ katvā”ti iminā **tumhe khotthāti** ettha “tumhe kho atthā”ti padavibhāgaṃ katvā okārato parassa akārassa lopaṃ dasseti. “Akārassālopa”ntipi pāṭho. Evañhi sati akārassa alopaṃ katvāti attho daṭṭhabbo. Iminā “tumhe kho atthā”ti padacchedaṃ katvā akāre pare okārassa vakāraṃ katvā tumhe khvatthā”ti pāṭho dassito. Kasmā imasmim dhammavinaye avirūḷhidhammāti āha “jhāna...pe... abhābattā”ti. “Bhavathā”ti iminā **atthāti** ettha asadhātu sattatthavācako thavibhattīti dasseti. **Sajātiyāti** ettha samānā jāti etissāti sajāti vutte nāgī evāti āha “nāgiyā evā”ti. **Manussitthiādīti** ettha ādisaddena tiracchānagatitthipetithīdevitthiyo saṅgaṇhāti. “Dveme bhikkhave paccayā”ti desanā sāvasesadesanāti dassento āha “ettha cā”ti. **Etthāti** tiracchānagatavatthumhi. **Abhiṇhanti** abhikkhaṇaṃ punappunanti attho.

Tiracchānagatoti ettha kiṃ apāyapariyāpanno duggatīhetukapaṭisandhikovādhīppetoti āha “nāgo vā hotū”tiādi.

50. Mātughātakādivatthukathā

112. Nikkhantinti ettha “imassa pāpakammassā”ti chaṭṭhīyogattā bhāvatthe tipaccayoti āha “nikkhamana”nti. **Apavāhananti** apāyapaṭisandhivahanato apagamanaṃ. **Yenāti** manussabhūtena yena jīvitā voropitāti sambandho. **Manussitthibhūtāti** manussitthī hutvā bhūtā, manussitthībhāvaṃ vā bhūtā pattā. Iminā tiracchānagatitthiādayo nivatteti. “Janikā”ti iminā posāvanikamātādayo nivatteti. **Sayampīti** ettha pisaddo na kevalaṃ mātāyeva, atha kho puttenāpīti dasseti. **Satāti** santena. Manussajātikeneva satā manussajātiko eva hutvā voropitāti yojanā. Anantare bhava phalaṃ nibbatteti **ānantariyaṃ**, mātughātakakammaṃ, tena jātisāmaññaṃpi ajanikaṃ ghātento ca janikampi jātibhedaṃ ghātento ca na anantariko hoti, tassa pabbajjā ca upasampadā ca na vāritāti dassento āha “yena panā”tiādi. Tattha poseti vaddhetīti posāpaniyā, sā eva **posāvanikā** pakārassa vakāraṃ, yakārassa ca kakāraṃ katvā, posāvanikā ca sā mātā ceti **posāvanikamātā**. **Assāti** puttassa. Idaṃ padaṃ pubbāparāpekkhaṃ. Tattha pubbapade bhāvasambandho, pacchimapade sāmīyambandho. Sabbathā esseva nayo hotīti āha “sacepi”tiādi. **Vesiyāti** upalakkhaṇavasena vuttaṃ. Yāya kāyaci itthiyā puttassāpi gahetabbatā. “Ayaṃ me pitā”ti ajānanaeva hi pamāṇaṃ. **Anenāti** iminā puttana. “Pitughātakotveva saṅkhyāṃ gacchatī”ti iminā mātughātakepi “ayaṃ me mātā”ti ajānitvā ghātentopi mātughātakotveva saṅkhyāṃ gacchatīti dasseti.

114. Saṅkhepena vuttamatthaṃ vitthārena dassento āha “manussajātiyaṃ hī”tiādi. **Apabbajitanti** gihibhūtaṃ. **Pabbajjā cassāti** ettha casaddena upasampadāpi vāritāti dasseti. **Assāti** arahantaghātakassa. **Avasesanti** arahantato avasesaṃ. **Assāti** ariyaghātakassa. **Ānantariyo na hoti** tiracchānagatattā panassa pabbajjā vāritāti attho netabbo. **Etthāti** mātughātakādikammesu. **Vadhāyāti** tadatthe catutthīti āha “vadhathāyā”ti. “Māretu”nti iminā “vadhathāyā”ti ettha hanadhātu himsanatthoti dasseti. “Nīyanti”ti iminā **onīyantīti** ettha otyūpasaggo dhāvattānūvattakoti dasseti. Yaṃ pana vacanaṃ vuttanti sambandho. Tassa vacanassa atthoti yojanā. “**Sacā ca iti ayaṃ nipāto vutto**”ti iminā bhayapīlitattā ca niruttīsu akusalattā ca davābhaṇanena ravābhaṇanena ayaṃ nipāto corehi vuttoti dasseti. “**Sace ca icceva vā pāṭho**”ti iminā tehi tathā vuttepi saṅgītikāle vā potthakārūḷhakāle vā

yathābhūtaṃ saṅgītattā, potthakārūḷhattā ca yathābhūto pāṭho atthīti dasseti. **Tatthā**ti tesu padesu. Niddhāraṇe bhuttaṃ. **Tassā**ti “sacajja maya”nti pāṭhassa. “Sace ajja maya”nti iminā ekāralopasandhiṃ dasseti. “Sacejja maya”nti akāralopasandhināpi pāṭho atthi.

115. Pakatattanti pakatiyā sīlasaṅkhāto attā sabhāvo etissāti pakatattā, taṃ. Kāyasamsaggena bhikkhunīnaṃ pārājikattā vuttaṃ “sīlavināsaṃ pāpeti”ti. Anicchamaṇaṃyeva bhikkhuninti sambandho.

Ichchamānanti odātavatthavasanaṃ icchamaṇaṃ. Yasmā abhikkhunī hoti, tasmā bhikkhunīdūsako na hotīti yojanā. Sīlavipannaṃ bhikkhuninti sambandho.

Yo devadatto saṅghaṃ bhindati viya, bhindatīti yojanā. **Uddhamanti** dhammato virahitaṃ. **Ubbinayanti** vinayato virahitaṃ. **Catunnaṃ kammānanti** apalokaṇādīnaṃ catunnaṃ kammānaṃ.

Yo devadatto lohitaṃ uppādeti viya, uppādetīti yojanā. **Duṭṭhacittenti** ettha na yaṃkiñci duṭṭhacittaṃ duṭṭhacittaṃ nāma, atha kho vadhakacittanti āha “vadhakacittenti”ti. **Sarīreti** sarīrabbhantare. Tathāgatassa hi abhejjakāyattā parūpakkamaṇaṃ cammacchedaṃ katvā lohitassa uppādanaṃ nāma natthi. Yo pana jīvako phāsuṃ karoti viya, phāsuṃ karotīti yojanā. **Lohitañcāti** pūtilohitañca.

54. Ubhatobyañjanakavatthukathā

116. Ubhatobyañjanakoti ettha bāhiratthasamāsaṃ dassento āha “itthinimittuppādanakammato cā”tiādi. Tattha “itthi...pe... kammato cā”ti iminā ubhayasarūpaṃ dasseti. Ubhato kammato pavattanti pāṭhaseso yojetabbo. **Byañjananti** nimittaṃ. **Assāti** janassa. **Karotipi kāretipīti** ettha karadhātuyā suddhakammakāritakammāni dassento āha “purisanimittenti”tiādi. Tattha “vītikkaṃ”nti iminā suddhakammaṃ dasseti, “para”nti iminā kāritakammaṃ dasseti. **Samādapetvāti** uyyojetvā. Tassa duvidhabhāvaṃ dassento āha “duvidho”tiādi. Tattha itthibhāvena lakkhito ubhatobyañjanako **itthiubhatobyañjanako**. Esa nayo itarattāpi.

Tatthāti duvidhesu ubhatobyañjanakesu. **Itthinimittanti** itthiyā aṅgajātaṃ. Eseva nayo “purisanimitta”nti etthāpi. **Pākaṭaṃ paṭicchannanti** sabhāvato pākaṭaṃ paṭicchannaṃ. Puna **paṭicchannaṃ pākaṭanti** rāgavasena paṭicchannaṃ pākaṭaṃ. **Paraṃ gaṇhāpetīti** parameva gaṇhāpetīti attho. **Idanti** kāraṇaṃ. **Etesanti** dvinnaṃ ubhatobyañjanakānaṃ. **Kurundiyaṃ pana vuttaṃ**, kiṃ vuttanti yojanā. **Tatthā**ti ubhatobyañjanake. **Vicāraṇakkamoti** vīmaṃsanānukkamo. “Tattha vicāraṇakkamo”tipi pāṭho. Vicāraṇakkamo dhammasaṅghaṭṭhakathāya veditabbo, idha pana kiṃ veditabbanti āha “idamidha veditabba”nti. Tattha **idanti** napabbajjūpasampadakāraṇaṃ. **Idhāti** imissaṃ vinayaṭṭhakathāyaṃ.

55. Anupajjhāyakādivatthukathā

117. Tena kho pana samayenāti ettha tasaddassa aniyamaniddesabhāvaṃ dassento āha “yena samayenā”ti. **Sikkhāpadaṃ apaññattaṃ hotīti** “na bhikkhave anupajjhāyako upasampādetabbo”ti sikkhāpadaṃ apaññattaṃ hoti. “Upajjhāyavirahita”nti iminā **anupajjhāyakanti** ettha akārassa virahattaṃ dasseti. Upajjhāyavirahitaṃ upasampadāpekkhanti sambandho. “Eva”ntiādinā dosaṃ dasseti. **Upajjhaṃ agāhāpetvāti** “upajjhāyo me bhante hohī”ti (mahāva. 65; mahāva. aṭṭha. 64) upajjhaṃ agāhāpetvā. Upasampādentassa kārakasaṅghassāti yojanā. **Kammaṃ panāti** upasampadakammaṃ pana. “Eseva nayo”ti iminā upasampādentassa āpatti, kammaṃ pana na kuppattīti vacanaṃ atidisati.

56. Apattakādivatthukathā

118. Yo piṇḍo hatthesu labbhatīti yojanā. **Tadatthāyāti** tassa piṇḍassa atthāya. **Seyyathāpi titthiyāti** ettha seyyathāpisaddo upamattho, titthiyasaddo ājīvakanāmake titthiye hotīti dassento āha “yathāpi ājīvakanāmakā titthiyā”ti. Tasmā ājīvakaśākhāte titthiye upamaṃ katvā ujjhāyantīti āha “sūpabyañjanehī”tiādi. **Hīti** saccaṃ, yasmā vā. **Teti** ājīvaka. **Kammaṃ pana na kuppātīti** pattacīvaressu asantesupi kammavācāya “paripuṇṇassa pattacīvara”nti parikittitā kammaṃ na kuppātīti adhippāyo.

Yācitenāti ettha yācito hutvā gahito **yācītakoti** dassento āha “yācītvā gahitena”ti. “Īdisena hī”tiādinā dosaṃ dasseti. **Tasmāti** yasmā āpatti hoti, tasmā. **Tassāti** upasampadāpekkhassa. Nirapekkhehi ācariyupajjhāyādīhīti yojanā. **Nissajjītvāti** brahmadeyyena nissajjītvā. Anadhīttānupagānaṃ pattacīvarānaṃ apattacīvaratā vuttaṃ “adhīttānupagaṃ pattacīvara”nti. **Paṇḍupalāsanti** samaṇuddesabhāvāpekkhaṃ. So hi rūl’hivasena paṇḍupalāsoti vuccati. Atha vā yathā paṇḍupalāso na harito, nāpi sukkho hoti, evaṃ sopi pabbajāpekkho na gihī hoti, nāpi sāmaṇero, tasmā samaṇuddesabhāvāpekkho “paṇḍupalāso”ti vuccati.

Vasantassa paṇḍupalāsassāti sambandho. **Anāmaṭṭhapiṇḍapātanti** bhikkhūhi anāmasitabbagaṃ piṇḍapātaṃ. **Sāmaṇerabhāgasamakoti** sāmaṇerehi laddhena bhāgena samaṃ pavatto. **Assāti** paṇḍupalāsassa. Sāmaṇerassa sabbaṃ paṭijjaganakammaṃ kātuṃ vaṭṭati viya, assa kātuṃ vaṭṭatīti yojanā.

57. Hatthacchinnādivatthukathā

119. Hatthacchinnādivatthūsu hatthā chinnā yassāti **hatthacchinnoti**ādivacanatthaṃ dassento āha “yassā”tiādi. **Maṇibandheti** pakoṭṭhante. So hi yasmā ettha maṇisaṅkhātaṃ alaṅkāravikaṭiṃ bandhati, tasmā maṇibandhoti vuccati. **Kappareti** kaponiyaṃ. Sā hi paresaṃ piṭṭhīsu kapati hiṃsati anenāti “kapparo”ti vuccati. Yassa hatthā chinnā honti, ayaṃ hatthacchinno nāmāti yojanā. Eseva nayo sesesupi. Eko vā pādoti yojanā. Heṭṭhā “eko vā dve vā hatthā”ti etthāpi eseve nayo. **Catūsu hatthapādesu dve vāti** eko hattho, eko pādoti dve vā. **Kaṇṇāti** saddaggahā. Te hi kaṇṇāti savati etehīti kaṇṇāti vuccanti. **Kaṇṇābaddheti** kaṇṇacchiddassa ābaddhe. **Sanḅhāṭetunti** sanḅhaṭanaṃ kātuṃ, ābandhanaṃ kātuntī attho. **Ajapadaketi** ajapadasaṅṭhāne ṭhāne. **Nāsāti** ghānāni. Tāni hi nāsati abyattasaddaṃ karoti etāhīti nāsāti vuccanti. **Nāsikāti** nāsāyeva. **Sanḅhāpetunti** suṭṭhu ṭhāpetuṃ, pakatiyā ṭhāpetuntī attho. **Nakhasesanti** nakhoṃyeva seso chinnaṅgulitoti nakhaseso, taṃ. Agge pure uṭṭhahatīti **aṅguṭṭho**. “Vuttanayenevā”ti iminā “nakhasesaṃ adassetvā”ti vacanaṃ atidisati. **Kaṇḍaranāmakāti** mahāsiraṇāmakā. Te hi kaṃ sarīraṃ dhārentīti **kaṇḍarāti** vuccanti dhakārassa ḍakāraṃ katvā. **Yesūti** kaṇḍaresu, niddhāraṇe bhummaṃ.

Yassa vaggulipakkhakā viya aṅguliyo sambandho honti, ayaṃ **phaṇahatthako** nāmāti yojanā. **Etanti** phaṇahatthakaṃ. Chaṅgulādayopi phaṇahatthakeyeva saṅgahetabbāti āha “yassapi cha aṅguliyo”tiādi. Yassapi cha aṅguliyo honti, ayampi phaṇahatthako nāma upacārena.

Khujjoti ettha khujjo sarīro yassatthīti khujjoti vacanatthaṃ dassento āha “khujjasarīro”ti. Kasmā khujjoti āha “urassa vā”tiādi. Yassa pana vaṅkaṃ, ayampi khujjo nāmāti yojanā. **Vaṅkanti** ca kuṭīlaṃ. **Hīti** saccaṃ, yasmā vā. **Brahmujugattoti** ujum gattaṃ ujugattaṃ, brahmuno ujugattaṃ viya ujugattaṃ imassa mahāpurisassāti brahmujugatto, mahāpuriso.

Saṃkhepena vuttamatthaṃ vitthārena dassento āha “**jaṅghavāmanassa hī**”tiādi. **Yesanti** ubhinnaṃ kāyānaṃ. **Bhūtānanti** amanussānaṃ pisācakapetaṇaṃ. Attabhāvo hoti viyāti yojanā. **Parivaṭumoti** parisamantato vaṭṭulasarīro.

Galagaṇḍīti ettha gale gaṇḍo yassatthīti galagaṇḍīti vacanatthaṃ dassento āha “yassā”tiādi. **Etanti** “galagaṇḍī”ti etaṃ vacanaṃ. **Tatthāti** galagaṇḍipabbājane. **Yanti** vacanaṃ.

Sipadīti ettha sithilaṃ padaṃ imassāti sipadīti vutte bhārapādoyeva gahetabboti āha “bhārapādo vuccatī”ti. Bhāraṃ pādaṃ yassāti **bhārapādo**. Ete dve thūlapādarogīsu vattantīti daṭṭhabbaṃ. **Sañjātapīlakoti** sañjātapahoṭo. **Upanāhanti** bhusaṃ bandhanaṃ. **Udakaāvāṭeti** udakena punṇāyaṃ kāsuyaṃ. **Udakavālikāyāti** udakatintena marunā. Yathā sirā paññāyanti, evaṃ milāpetunti yojanā. **Īdisanti** sirāpaññāyanajaṅghatelanālikasabhāvaṃ. **Tathāti** yathā pabbajjākāle karoti, tathā katvāti attho.

Pāparogīti ettha pāparogassa sarūpaṃ dassento āha “arisa”itiādi. Tattha ariso ca bhagandaro ca pittañca semho ca kāsō ca soso cāti dvando, te ādayo yesaṃ teti arisa...pe... sosādayo. Ādisaddena hetṭhā vutte ābādhe saṅgaṇhāti. Tattha pittasemhasaddehi taṃsamuṭṭhāno rogo gahetabbo. “Niccāturo”ti iminā pāparogīti ettha mantutthe pavattassa ipaccayassa niccayogattamaṃ dasseti.

Parisadūsanoti ettha itisaddo nāmapariyāyo, parisadūsano nāmāti hi attho. Yo attano virūpatāya parisamaṃ dūseti, ayaṃ parisadūsano nāmāti yojanā. Chasarīradosaṃ ādiṃ katvā parisadūsanabhāvaṃ vitthārento āha “atidīgho vā”tiādi. **Atidīgho vāti** ettha na kevalaṃ paresaṃ dvaṅgulādimattadīgho, atha kho diguṇādidīghovādhippetoti āha “aññesa”ntiādi. **Nābhipadesoti** attano nābhipadeso. Yathā hi atidīghe paravacanena atidīghassa sarūpaṃ veditabbaṃ, tathā atirassādīsipi atirassasarūpanti daṭṭhabbaṃ. **Mahodaroti** mahāudaro. **Kappasīso vāti** hatthisīso viya yugasīso vā. **Kappasaddo** hettha yugattavācako. **Kaṇṇikakeso vāti** kaṇṇikasadisehi kesehi samannāgato. “Jātipalitehi”ti iminā jarāvātena pahataṃ palitaṃ nivatteti. **Pakatitambakesoti** ettha pakatisaddena kenaci payogena tambakesaṃ nivatteti. **Āvaṭṭasīsoti** punappunaṃ vaṭṭatīti āvaṭṭo, kesāvaṭṭo, so etassa sīse atthīti āvaṭṭasīso. **Uddhagehīti** uddhaṃ koṭīhi. **Jālabaddhena viyāti** jālena baddhena iva.

Sambaddhabhamuko vāti aññamaññasambaddhabhamuko vā. **Makkaṭabhamukoti** makkaṭassa bhamu viya bhamu etassāti makkaṭabhamuko. **Vāsikoṇenāti** tacchanīkoṭiyā. **Visamacakkaloti** ettha cakkākārena lāti pavattati, cakkākāraṃ vā lāti gaṇhātīti **cakkalo**. **Kekaroti** valiro. So hi kucchitaṃ karotīti kekaroti vuccati. **Kakkaṭassevāti** kakkaṭassa iva. **Mūsikakaṇṇoti** ākhukaṇṇo. **Jaṭukakaṇṇoti** vaggulikaṇṇo. **Aviddhakaṇṇoti** acchiddakaṇṇo. **Hīti** saccamaṃ, yasmā vā. **Soti** aviddhakaṇṇo. Kaṇṇe bhagandaro etassāti **kaṇṇabhagandaro**, soyeva kaṇṇabhagandariko. Gaṇḍo kaṇṇe etassāti **gaṇḍakaṇṇo**. **Paggharitaṭṭapubbenāti** paggharitaṭṭapūyena. Ṭaṅkito kaṇṇo yassāti **ṭaṅkitakaṇṇo**. **Gobhattanālikāyāti** gunnaṃ bhattapānatthamaṃ katāya nālikāya. Biḷarakkhi viya atipiṅgalaṃ akkhi etassāti **atipiṅgalakkhi**. Madhuvannaṃ viya piṅgalaṃ akkhi etassāti **madhupiṅgalakkhi**. **Nippakhumakkhīti** ettha **pakhumaṃ** vuccati akkhamhi jātaṃ lomaṃ. Tañhi akkhino pakkhadvaye jātattā pakhumanti vuccati. Natthi pakhumaṃ akkhamhi etassāti nippakhumakkhi. Assupaggharaṇaṃ akkhamhā etassāti **assupaggharaṇakkhi**. Pupphaṃ sañjātaṃ yassa akkhinoti **pupphitaṃ**. Pupphitaṃ akkhi yassāti **pupphitakkhi**. **Akkipākenāti** akkhino dalapariyantesu paccanakena rogena.

Cipiṭānāsikoti anunnatānāsiko. **Sukatunḍasadisāyāti** suvānaṃ mukhena sadisāya.

Paṭaṅgamaṇḍūkashevāti paṭaṅganāmakassa maṇḍūkassa mukhanimittamaṃ iva mukhanimittamaṃyevāti yojanā. **Ukkhalimukhavatṭisadisehīti** ukkhaliyā mukhavatṭinā sadisehi. **Bhericammasadisehīti** bheriyā mukhe nahitacammaena sadisehi. **Ēlamukhoti** ēlāya niccapaggharitaṃ mukhametassati ēlamukho. **Uppakkamukhoti** uppakkaṃ kuthikaṃ mukhametassati uppakkamukho. **Saṅkhatunḍakoti** saṅkhasa tunḍena sadiso oṭṭho etassāti saṅkhatunḍako.

Aṭṭhakadantasadisehīti aṭṭhakanāmakassa naṅgalassa dantehi sadisehi. Dante pidahitunti sambandho. **Dantantareti** dantavivare, dantamajjhe vā. **Kalandakadanto viyāti** kāḷakānaṃ danto viya.

Mahāhanukoti mahanto hanu etassāti mahāhanuko. **Cipiṭahanukoti** anunnatahanuko. **Nimmassudāṭhikoti** natthi massu ca dāṭhi ca etassāti nimmassudāṭhiko. **Bhaṭṭhaamsakūṭoti** bhaṭṭho patito aṃsakūṭo imassāti bhaṭṭhaamsakūṭo. **Godhāgattoti** godhāya gattaṃ viya gattaṃ imassāti godhāgatto. **Sabbampetanti** sabbampi etaṃ “kacchugatto”tiādivacanamaṃ. **Etthāti**

“kacchugatto” tiādivacane. Vinicchayo veditabboti yojanā.

Bhaṭṭhakaṭikoti bhaṭṭhā pannā kaṭi etassāti bhaṭṭhakaṭiko. Accuggatehi ānisadamamsehīti sambandho. **Vātaṇḍikoti** vātena pūrito aṇḍakoso etassāti vātaṇḍiko. **Saṅghaṭṭanajāṇukoti** anto natattā aññamaññam saṅghaṭṭanam jāṇu etassāti saṅghaṭṭanajāṇuko. **Vikaṭoti** tiriyaḡamanapādo. Upaḍḍhapiṇḍikassa atthaṃ saha bhedenā dassento āha “so duvidho” tiādi. Tattha duvidho so upaḍḍhapiṇḍiko samannāgatoti yojanā. Atha vā so upaḍḍhapiṇḍiko heṭṭhā oruḷhāhi mahantīhi jaṅghapiṇḍikāhi samannāgato vā upari āruḷhāhi mahantīhi jaṅghapiṇḍikāhi samannāgato vāti duvidhoti yojanā. **Piṭṭhikapādoti** piṭṭhiyaṃ uṭṭhito pādo etassāti piṭṭhikapādo. **Gaṇḍikaṅguli vāti** gaṇḍena uṭṭhito aṅguli etassāti gaṇḍikaṅguli. **Sabbopesāti** esa sabbopi jano. Parisaṃ dūsetīti **parisadūsono**.

Pubbādīhīti ādisaddena cakkhupasādassa antarāyakarāni aññānīpi vatthūni gahetabbāni. Dvīhi vā akkhīhi, ekena vā akkhināti yojanā. **Ubhayampīti** dvinnam aṭṭhakathācariyānam ubhayampi vacanam. Pāḷiyam “andham pabbājenti” ti avatvā “kāṇam pabbājenti” ti vuttattā “pariyāyēnā” ti vuttam. Mahāaṭṭhakathāyañhi “jaccandho” ti iminā dveakkhikāṇam sandhāya vuttam. **Kuṇīti** kuṇanam saṃkocanam kuṇam, tametassatthīti kuṇī. **Khañjoti** khañjati gativekallabhāvena pavattatīti khañjo. **Kuṇḍapādakoti** ettha **kuṇḍoti** khañjasseva nāmam. Khañjo hi kuḍati gamanam paṭihanatīti kuṇḍoti vuccati. Kasmā kuṇḍapādako? Kasmā piṭṭhipādamaḡjhena caṅkamanotīti āha “maḡjhe saṃkuṭitapādattā” ti. Iminā hi kuṇḍapādassa ca piṭṭhipādamaḡjhena caṅkamanassa ca hetuṃ dasseti. Eseva nayo anantaravākyepi. **Sabbopesāti** esa sabbopi jano.

Pakkhahatoti ettha eko pakkho hato vināso etassāti pakkhahatoti atthaṃ dassento āha “eko hattho vā” tiādi. “Pakkhapāto” tipī pāṭho, so apāṭhoyeva. **Pakkhasaddo** hi koṭṭhāsavācako, na paṅgulapariyāyo, **pīṭhasabbī vuccatīti** pīṭhena sabbati gacchati sīlenāti pīṭhasabbī vuccati. “Jiṇṇabhāvena dubbalo” ti iminā jīraṇam jarā, tāya dubbalo **jarādubbalo**ti vacanatthaṃ dasseti. **Balavā hotīti** āgantukarogānamabhāvena balavā hoti, “vacībhedo nappavattatī” ti iminā mukhamattameva gacchati pavattati, na vacībhedo ettha janeti **mūgoti** dasseti. Yassa vacībhedo na pavattati, ayaṃ mūgo nāmāti yojanā. **Mammananti** khalitavacanam. Yo ekameva akkharam catupaṅcakkhattuṃ vadati, tassetamadhivacanam.

Badhīroti sutihīno. So hi hananam sotapasādassa nāsanam vadho, taṃ irati gacchatīti badhīroti vuccati. Yo sabbena sabbam na suṇāti, ayaṃ badhīro nāmāti yojanā. Iminā naṭṭhapasādatam dasseti. **Ubhayadosavasenāti** upalakkhaṇavasena vuttam andhamūgabadhirapabbājane tidosavasenapi vuttattā. **Teti** hatthacchinnādayo dvattiṃsajane. Osāraṇam apatto puggalo atthi, taṃ puggalam saṅgho osāreti ceti yojanā. **Osāretīti** saṅghe paveseti.

58. Alajjīnissayavatthukathā

120. “Alajjīnam ovāda” nti pāṭhasesena yojite sāmīyatthe sāmīvacanampi yujjateva. Taṃ nayaṃ adassetvā “upayogathe sāmīvacana” nti vuttam. “Bhikkhūhi sabbhāgata” nti iminā bhikkhūhi samāno sīlādiguṇasaṅkhāto bhāgo imassāti **bhikkhusabhāgo**, tassa bhāvo **bhikkhusabhāgatanti** vacanatthaṃ dasseti. “Lajjibhāva” nti iminā bhāvapaccayassa sarūpaṃ dasseti. **Navatṭhānanti** abhinavatṭhānam. Gatena bhikkhunāti sambandho.

Theroti nissayadāyako thero. **Gahetukāmoti** nissayaṃ gahetukāmo. **Ācāranti** nissayapaṭipannassa ācāram. **Tadahevāti** tasmīṃ gatahani eva. Ābhogassa katattā, aruṇuggamanassa ca ajānanattā vuttam “anāpattī” ti. Aruṇuggamanam ajānantopi ābhogassa akatattā vuttam “aruṇuggamane dukkaṭa” nti. “Dve tīṇi divasānī” ti padena catu paṅca cha divasānīpi gahetabbāni lakkhaṇahāranayena anissitena vasitabbabhāvena samānaphalattā. Tenāha “sattāham vasissāmī” ti. **Laddhaparīhāroti** laddho parīhāro āpattiapanayanam yenāti laddhaparīhāro.

59. Gamikādinissayavatthukathā

121. “Karaṇīyanissayo”ti iminā nissayagahaṇaṃ **nissayo** uttarapadalopavasena, so karaṇīyo imassāti **nissayakaraṇīyoti** visesanaparanipātabhāvaṃ dasseti. **Nissayaṃ alabhamānenāti** ettha kiṃ nissayassa alabhanāṃ nāmāti āha “attanā”tiādi. **Vutthapubbanti** vasitapubbaṃ. **Ekarattaṃ vasantenāpīti** pisaddo dvirattādi ke kā nāma kathāti dasseti. Vissamanto vā satthaṃ pariyesanto vā hutvāti yojanā. **Nāvāya gacchantassāti** nāvāya addhānamaggaṃ paṭipannassa.

Yāciyamānenāti ettha bahukattupasaṅgattā vuttaṃ “tena gilānenā”ti. “Mānenā”ti iminā yācitusasakkuṇeyyatādīni nivatteti.

Phāsu hotīti ettha āvāsasappāyādivasena phāsu hotīti āsaṅkā bhaveyyāti āha “samathavipassanānaṃ paṭilābhavasena”ti. **Hīti** saccaṃ. **Imaṃ parihāranti** imaṃ phāsuvihāraparihāraṃ. Thāmagatāya vipassanāyāti yojanā. Samatho vā taruṇo hotīti yojanā. **Etassevāti** taruṇasamathavipassanikasēva bhikkhuno. **Tassa nissāyāti** ettha tassa ovādaṃ nissāyāti yojanā. Atha vā upayogathe sāmivacanaṃ. Taṃ nissayadāyakaṃ nissāyāti hi attho. Yattako kālo āsaḥhipuṇṇamā atthi, tattakaṃ kālanti yojanā. “Āsaḥhipuṇṇamā”ti ettha “yāvā”ti nipātapayogattā abhividhiavajhatthe nissakkavacanaṃ daṭṭhabbaṃ. **Yatthāti** yasmiṃ ṭhāne.

122. Pāliyaṃ **gottenapīti** ettha **pisaddena** na kevalaṃ nāmeneva, atha kho gottenapi sāvētunti dasseti. Tasmā “āyasmato pippalissā”ti nāmaṃ sāvētvetīpi “āyasmato mahākassapassā”ti gottam sāvētvetīpi anusāvetabbaṃ. Tena vuttaṃ “mahākassapassā”tiādi. Iminā “konāmo te upajjhāyo? Upajjhāyo me bhante āyasmā mahākassapo nāma”tiādisu gottampi nāmeneva saṅgahitanti siddhaṃ hoti.

123. **Ekānusāvaneti** padassa samānādhikaraṇabāhiratthasamāsabhāvaṃ nivattento āha “ekato anusāvane”ti. Tattha **ekatoti** ekakkhaṇe, ekapahārena vā. Vakkhati hi “ekakkhaṇe”ti ca “ekapahārenevā”ti ca. Iminā ekato anusāvanametesanti **ekānusāvanāti** asamānādhikaraṇabāhiratthasamāsaṃ dasseti. **Ekenāti** ekena anusāvanācariyena. **Ekassāti** ekassa upasampadāpekkhassa. “Ekakkhaṇe”ti iminā “ekato”ti padassa atthaṃ dasseti. “Upasampādetu”nti dvinnāṃ upasampadāpekkhānaṃ upasampādetuṃ.

Purimanayenevāti “ekena ekassa, aññena itarassā”tiādinā pubbe vuttanayeneva. **Ekato anusāvane kātunti** “ekena ekassa, aññena aññassa, itarena itarassā”ti evaṃ tīhi ācariyehi tiṇṇaṃ upasampadāpekkhānaṃ ekakkhaṇe anusāvane kātuṃ. **Taṅca khoti** ettha tasaddassa “anusāvane kātu”nti padasseva atthavisayatāṃ dassetuṃ vuttaṃ “anusāvanakiriya”nti. **Dve vā tayo vāti** ettha vāsaddo aniyamavikkappattho. Sace ekenācariyena dve anusāveti, “ayaṃ buddharakkhito ca ayaṃ dhammarakkhito cā”ti anusāvetabbā. Sace tayo anusāveti, “ayaṃ buddharakkhito ca ayaṃ dhammarakkhito ca ayaṃ saṅgharakkhito cā”ti anusāvetabbā. Yathā ekenācariyena dve vā tayo vā ekato anusāvetabbā, evaṃ dvīhi vā tīhi vā ācariyehi eko anusāvetabbotipi vadanti. Ekena upajjhāyena karaṇabhūtena, eko upajjhāyo hutvāti vā attho. “Ekapahārenevā”ti iminā “**ekato**”ti padassa atthaṃ dasseti. **Dve tisso kammavācāti** dvīhi ācariyehi dve, tīhi ācariyehi tisso kammavācā. Ekena upajjhāyena anusāvane eko vā dve vā tayo vā ācariyā vaṭṭanti, nānupajjhāyena anusāvane pana nānācariyā eva vaṭṭantīti dassento āha “sace panā”tiādi. **Tissattheroti** kammavācācariyabhūto tissatthero. **Sumanattherassāti** upajjhāyabhūtassa sumanattherassa. **Idanti** nānupajjhāyena ekassācariyassānusāvanaṃ. **Esa paṭikkhepoti** “na tveva nānupajjhāyenā”ti eso paṭikkhepo.

63. Upasampadāvidhikathā

126. **Taṃ upajjhanti** taṃ upajjhāyaṃ. “Upajjhā”ti ca “upajjhāyo”ti ca hi atthato ekaṃ, byañjanaṃ nānaṃ yathā “sabhā sabhāya”nti. Ettha upajjhāsaddo rājādigaṇo (rupasiddhi 599 sutte;

saddanīti 1140 sutte), upajjhāyasaddo purisādigaṇo. Sabhāsaddo itthilingo, sabhāyasaddo pulliṅgo vā napuṃsakalingo vā. “**Vitthāyanti**”ti saddo nāmadhātūti āha “vitthaddhagattā honti”ti. Vitthasaddo hi dabbavācakkattā nāmasaddo, vikārena thaddho gatto etesanti **vitthā**, ddhakārassa lopam katvā, tato āyapaccayo hoti. **Yanti** yaṃ antarāyajātaṃ. **Tava sarireti** tuyhaṃ kāye. “Nibbatta”nti iminā “jāta”nti ettha janadhātuyā jananattham dasseti, “vijjamāna”nti iminā janīdhātuyā pātubhāvattam dasseti. **Santanti** saṃvijjamānaṃ. **Itiādi** kathetabbanti yojanā.

64. Cattāronissayādikathā

128. Upasampannasamanantaramevāti upasampanno hutvā samanantameva, na kālantareti attho. **Ekaporisāti** ettha porisasaddo upari vitthate bhujapamāṇe ca posapamāṇe ca vattati. Purisassa pamāṇā **porisā**, pamāṇatthe ṇapaccayo. **Chāyāti** ātapābhāvo. **Metabbāti** pametabbā. “Vassāno”tiādi “**utupamāṇam ācikkhitabba**”nti ettha ācikkhaṇākāradassanaṃ. Utuno pamāṇanti attham nivārento āha “ettha cā”tiādi. Arati punappunaṃ gacchatūti **utu**, pamiyati saṃvaccharo paricchijjīyati anenāti **pamāṇam**. Yattakehi divasehi aparipuṇṇoti sambandho. **Yassāti** divasabhāgassa. Yo utu aparipuṇṇo, tassa utunoti pāṭhaseso yojetabbo. “Utupamāṇam ācikkhitabbaṃ, divasabhāgo ācikkhitabbo”ti padānaṃ aparampi atthavikappaṃ dassento āha “**atha vā**”tiādi. Tattha **ayaṃ nāma utūti** ayaṃ utu vassāno nāmāti vā hemanto nāmāti vā gimho nāmāti vā. **Pubbanhoti** ahasa pubbo pubbanho. Tattha pacchimanayova pāsamsataro. Kasmā? Purimanaye utuparipuṇṇe divasabhāgācikkhaṇassa abhāvā, pacchimanaye pana paripuṇṇam vā aparipuṇṇam vā utupamāṇam ācikkhitabbaṃ. Upasampannadivasabhāgova “pubbanho”ti vā “sāyāno”ti vā ācikkhitabbo. **Samgītīti** ettha saṃ ekato katvā gāyitabbā kathetabbāti samgītīti vacanattham dassento āha “idameva sabbam ekato katvā”tiādi. Tattha **kinti** kiṃ utuṃ. **Idaṃ nāmāti** idaṃ nāma utuṃ. **Vadeyyāsīti** āgantukānaṃ vuḍḍhanavakabhāvādiñāpanattham katheyyāsi.

129. Dutiyaṃ saṃvāyaṃ bhikkhuṃ vā sāmaṇeraṃ vā purisaṃ vā. **Akaraṇīyānīti** upasampannehi akattabbāni. **Paṇḍupalāsoti** ettha **paṇḍūti** setapītamisso vaṇṇo, **palāsasaddo** paṇṇavācako, na haritavācako, nāpi kiṃsukadumavācako dassento āha “paṇḍuvaṇṇo paṇṇo”ti. **Paṇḍupalāsoti** samāsopi byāsopi yuttoyeva. Samāsakāle paṇḍu yassatthīti paṇḍu, soyeva palāso paṇḍupalāsoti kātabbo. Pupphaphalādiṃ bandhatīti **bandhananti** vacanatthena bandhanasaddo vaṇṭapariyāyoti āha “vaṇṭato”ti. **Puthusilāti** (ma. ni. aṭṭha. 3.60) ettha puthusaddo mahantapariyāyoti āha “mahāsīlā”ti.

130. Tassāti ukkhepanīyakammārahassa bhikkhuno. **Sāmaggīti** saṅghasāmaggī. **Tenāti** ukkhepanīyakammārahena bhikkhunā. **Sambhogeti** āmisena ca dhammena ca sambhogahetu. Ettha saḥaseyyāpi saṅgahitā āpattibhāvato. **Anāpattīti** anukkhittakabhāvato pācittiyāpattiyā anāpatti, alajjilakkhaṇābhāvato dukkaṭṭhena anāpattīti daṭṭhabbaṃ.

Iti samantapāsādikāya vinayasaṃvaṇṇanāya

Dvāsattatiadhikavatthusatapaṭimaṇḍitassa mahākhandhakassa

Atthavaṇṇanāya yojanā samattā.

2. Uposathakkhandhakam

68. Sannipātānujānanādikathā

132. Uposathakkhandhake taranti otaranti etthāti **tittham**, udakatittham, tittham viyāti **tittham**, laddhīti āha “tittham vuccati laddhī”ti. Laddhi hi bahūnaṃ laddhikānaṃ otaraṇaṭṭhānattā tittham nāma. **Aññanti** sāsanikaladdhito aññaṃ. **Etesanti** paribbājakānaṃ. **Itoti** imasmā sāsanikaladdhito. **Yanti** yaṃ

dhammajātaṃ. **Tesanti** aññatitthiyānaṃ paribbājakānaṃ. **Te labhantīti** ettha tasaddo manussavisayoti āha “te manussā”ti. **Mūgasūkarāti** ettha thūlasarīrassa sūkarassa saddamattassāpi abhāvato mūgasūkaro nāmāti āha “thūlasarīrasūkarā”ti.

135. Assāti bhikkhuno. **Soti** sampajānamusāvādo. **Kinti** kiṃ āpatti. **Dukkaṭanti** padassa dukkaṭaṃ kammani āsaṅkā bhaveyyāti āha “dukkaṭāpatti”ti. Sā ca kho dukkaṭāpatti musāvādalakkhaṇena na hotīti yojanā. Kena hotīti āha “bhagavato pana vacanenā”ti. **Vacanenāti** ca “sampajānamusāvāde kiṃ hoti? Dukkaṭaṃ hoti”ti (mahāva. 135) vacanena. **Akiriyaṣamuṭṭhānāti** āvi kattabbāya āpattiyā akaraṇena akiriyaṣamuṭṭhānā.

Manujenāti manussena. **Vācāti** vācāya. Yakārassa hi lopo. **Giranti** saddaṃ. **Pareti** aññe puggale. **Vācasikanti** vācāto samuṭṭhitāṃ. Ayaṃ panettha yojanā – bhikkhu kenaci āsanne ṭhitena manujena vācāya anālapanto hoti, pare dūre ṭhite puggale sandhāya giraṃ mahāsaddaṃ no ca bhaṇeyya, evampi vācasikameva āpajjeyyāti.

Antarāyikoti ettha karotyatthe ṇikapaccayoti āha “antarāyakaro”ti. “Kimatthāyā”ti iminā **kissāti** ettha tadatthe catutthīti dasseti, hetvatthopi yujjateva. **Sabbatthāti** sabbesu “dutiyaṣa jhānassa adhigamāyā”tiādīsu. **Itīti**ādī nigamaṇaṃ. **Uddesato cāti** “suṇātu me bhante saṅgho”tiādiuddesato ca. **Niddesato cāti** “pātimokkhanti ādimeta”ntiādiniddesato ca.

136. Devasikanti ettha ṇikapaccayo vicchatthe hotīti āha “divase divase”ti. **Tatiye ca sattame ca pakkheti** ekassa utuno aṭṭhasu pakkhesu tatiye ca sattame ca pakkhe. “Vacanato”ti padaṃ “vaṭṭatī”ti pade ñāpakahetu. **Tathārūpe paccayeti** tathārūpe vikaticārittasaṅkhāte paccaye. **Anuvattitabbanti** anumatiṃ vattitabbaṃ. **Vacanatopīti** pisaddo pubbe ñāpakahetuṃ sampiṇḍeti. **Etanti** “yasmim tasmim cātuddase vā pannarase vā uddisitum vaṭṭatī”ti vacanaṃ.

71. Sīmānujānanakathā

138. Nimittā kittetabbāti nimittāni kittetabbāni. Nikārassa hi ākāro. **Nimittaṃ katoti** eso pabbato nimittaṃ katoti yojanā. Eseva nayo paratopi. “Eseva nayo”ti iminā “puratthimāya disāya kiṃ nimittaṃ? Pāsāṇo bhante, eso pāsāṇo nimitta”nti atthaṃ atidisati. Eseva nayo sesesupi. Kevalaṃ pana vanaudakesu “etaṃ vanaṃ, etaṃ udaka”nti vattabbaṃ. Nadiyaṃ “esā nadī”ti vattabbā. **Ettha panāti** etiṣsaṃ uttarāyaṃ anudisāyaṃ pana. **Hīti** phalajotako. **Tatthāti** “nimittā kittetabbā”ti vacane. **Sīmamaṇḍalanti** sīmabimbaṃ. **Sambandhantenāti** purimanimittena pacchimanimittaṃ sambandhantena. Iminā ekantarikādivasena nimittakittanaṃ na vaṭṭati nimittenapi nimittānaṃ sambandhābhāvato dasseti. Purimanimittena pacchimanimittassa sambandhe sati ajja ekaṃ nimittaṃ kittetvā sve ekaṃ nimittaṃ kittetvāti evaṃ kālantarepi nimittaṃ kittetvā sammanitum vaṭṭatīti vadanti.

Pabbatoti ettha pabbaṃ vuccati phaḷu, taṃ etasmim atthīti **pabbato**. Vālikarāsissa suddhapamsupabbatapasaṅgattā vuttaṃ “vālikarāsi pana na vaṭṭatī”ti. **Itaropīti** vālikarāsito aññopi tividho pabbato. **Hatthippamāṇatoti** aḍḍhaṭṭhamaratanahatthippamāṇato. **Catūsu disāsūti** vihārassa catūsu disāsu. **Catūhi vā tīhi vāti** ettha vāsaddena tato adhikānīpi gahetabbāni. Ekena vā nimittenāti yojanā. **Itoti** pabbatanimittato. **Tasmāti** yasmā ekena nimittena na vaṭṭati, tasmā. **Tanti** pabbataṃ. **Tasmāti** ekasseva nimittassa kittitattā. Yo pabbato atthi, taṃ pabbatanti yojanā. **Antoti** pabbatassa anto.

Tatiyabhāgaṃ vāti ettha vāsaddena paṭhamabhāgopi ekadesopi gahetabbo. **Tassāti** tattakassa padessa. Tatiyabhāgādito aparaṃ sabbapabbataṃ antokatvā sammatam dassento āha “sace”tiādi.

Pāsāṇanimitte evaṃ vinicchayo veditabboti yojanā. Pasati ghanabhāvena bandhatīti **pāsāṇo**. Ayaguḷopi pāsāṇasaṅkhameva gacchati tena tassa sadisattā. **Ayaguḷopīti** ettha pisaddena tambakaṃsavatṭalohasuvaṇṇarajatādayopi saṅgaṇhāti. **Yo kocīti** silāpavāḷamaṇiādīsu yo koci.

Dvattimsapalagūlapinḍaparimāṇatā saṅghānato gahetabbā, na tulitvā gaṇanavasena. Khuddakataro pāsāṇoti yojanā. Yo piṭṭhipāsāṇo vā yo uṭṭhitapāsāṇo vāti yojanā kātābbā – uttaravākye tasaddassa aniyamaniddesavacanattā “**pāsāṇasaṅkhamyevā**”ti ettha evakārena “na pabbatasāṅkha”nti atthaṃ dasseti. **Mahato piṭṭhipāsāṇassāti** āyāmaṅgārubbedhato mahantassa piṭṭhipāsāṇassa sakkassa paṇḍukambalapiṭṭhipāsāṇassa viya. **Tanti piṭṭhipāsāṇaṃ. Na vaṭṭatīti** kittetuṃ na vaṭṭati. **Hīti** laddhadosaṅgato. **Tanti piṭṭhipāsāṇaṃ. Sīmāyāti** sīmato. **Vihāropīti** na kevalaṃ nimittameva, vihāropi. Piṭṭhipāsāṇo na kittetabboti sambandho. **Kittetvāti** ettha “piṭṭhipāsāṇa”nti yojetabbāṃ.

Vananimitte evaṃ vinicchayo veditabboti yojanā. Vaniyati mayūrakokilādīhi sattehi sambhajiyaṭīti **vanam**, vananti sambhajanti etthāti vā **vanam**. Taco eva sāro etesanti **tacasāro**, tālanāḷikerādayo. Ādisaddena veṇuādayo saṅgaṇhāti. Anto sāro etesanti **antosārā**, sākāsālādayo. Ādisaddena khadirādayo saṅgaṇhāti. **Antosāramissakānanti** antosārehi rukkhehi missakānaṃ. **Rukkhaṇam vananti** ettha avayavaavayavibhāvena sambandho veditabbo. Iminā **tiṇavanam rukkhanam** vananti ettha “tiṇānaṃ vana”nti vā “rukkhānaṃ vana”nti vā atthaṃ dasseti. Tiṇameva vanam, rukkheva vananti atthopi yujjateva. Cattāro vā pañca vā rukkhatī **catupañcarukkha**, te mattaṃ pamāṇametthāti **catupañcarukkhamattaṃ** vanam, **tatoti** catupañcarukkhamattato. **Ekadesanti** vanassa ekadesaṃ. **Vanamajjheti** vanassa vemajjhe, vanassūparīti attho. Rukkhanātesu eva hi vihāraṃ karonti. **Ekadesanti** vanassa ekadesaṃ. **Tatthāti** vane. “Ṭhitavana”nti padaṃ “kittetvā”ti pade avuttakammaṃ, “na kittetabba”nti pade vuttakammaṃ.

Rukkhanimitte evaṃ vinicchayo veditabboti yojanā. Rukkhiyati phalādikāmehi saṃvāriyati rakkhiyaṭīti **rukkho**, mahiyaṃ ruhatīti vā **rukkho**. **Jīvamānakoti** lokavohāravasena mūlāṅkurādiharitasāṅkhātājīvamānako. **Pariṇāhatoti** visālabhāvato. **Sūcidaṇḍakapamāṇoti** sūciyā lekhanīyā daṇḍabhūtaṅgūpamāṇo. So veḷu kaniṭṭhaṅgulipamāṇoti daṇḍhabbo. **Tatoti** aṭṭhaṅgulubbedhasūcidaṇḍakapamāṇapariṇāharukkhatō. **Vaṃsanalākasarāvādīsūti** vaṃso ca naḷako ca sarāvo ca vaṃsanalākasarāvā, te ādayo yesaṃ kapālādīnanti vaṃsanalākasarāvādayo, tesu. **Tatoti** vaṃsādīto. **Taṃkhaṇampīti** tasmīṃ nimittakhaṇepi. **Akāraṇanti** apamāṇaṃ. **Etanti** navamūlasākhāniggamaṇaṃ. **Vattum vaṭṭatīti** sāmāññānāmenapi visesaṇāmenapi vattum vaṭṭati. Iminā pabbatādīsūpi “pabbato”ti sāmāññānāmenapi “vaṅkapabbato vepullapabbato”ti visesaṇāmenapi vattum vaṭṭatīti dasseti.

Magganimitte evaṃ vinicchayo veditabboti yojanā. Maggiyati pathikehi, maggamūḷhehi vā anvesiyaṭīti **maggo**. Yo yādiso jaṅghamaggo vā sakaṭamaggo vā vinivijjhivā dve tīṇi gāmantarāṇi gacchati, so tādiso jaṅghamaggo vā sakaṭamaggo vā vaṭṭatīti yojanā. **Ukkamitvāti** pakkamitvā. Yo jaṅghamaggo otarati, so na vaṭṭatīti yojanā. **Avalaṅjāti** aparibhogā. Gamaṇaṃ janetīti **jaṅgho**. Jaṅgūgopphakānaṃ majjhapeso. Saha atthena paṇiyadhanenāti **sattho**, jaṅghena vicaranto sattho **jaṅghasattho**. Sakati samattheti bhāraṃ vahitunti **sakaṭo**, tena vicaranto sattho **sakaṭasattho**. Jaṅghasattho ca sakaṭasattho ca jaṅghasakaṭasatthā, tehi. **Hīti** saccam, yasmā vā. **Etanti** nimittaṃ.

Koṇanti viharakoṇaṃ. Gataṃ pana magganti yojanā. **Parabhāgeti** vihāraṃ parikkhipivā gacchantehi catūhi maggehi parabhāge. **Dasasu nāmesūti** satipaṭṭhānaṭṭhakathādīsū āgatesu “maggo pantho patho pajjo”tiādīsū, abhidhānādīsū (dī. ni. aṭṭha. 2.373; ma. ni. aṭṭha. 1.106) ca āgatesu “maggo pantho patho addhā”tiādīsū dasasu magganāmesu. **Yena kenaci nāmenāti** iminā pabbatādīsūpi “pabbato giri selo addi nago acalo siluccayo sikharī bhūddharo”tiādīsū anekesu nāmesu yena kenaci nāmena kittetuṃ vaṭṭatīti dasseti.

Vammikanimitte evaṃ vinicchayo veditabboti yojanā. Upacikāhi vamiyati, sarabūgharagolikādayo satte vamatīti vā **vammiko**. **Taṃdivasajātoti** tasmīṃ nimittakittitadivase jāto. **Tatoti** aṭṭhaṅgulubbedhagovīsāṇapamāṇavammikato.

Nadīnimitte evaṃ vinicchayo veditabboti yojanā. Nadati sandatīti nadī, nadanto eti gacchatīti vā

nadī. **Yassāti** nadiyā, sotanti sambandho. “Anvaddhamāsa”ntiādinā ekapakkhe tikkhattuṃ ekamāse chakkhattuṃ vassantabhāvaṃ dīpeti. Vigatamate satīti sambandho. “Īdise”ti iminā “anvaddhamāsa”ntiādiatthaṃ atidisati. **Timaṇḍalanti** heṭṭhā jāṇumaṇḍalaṃ, upari nābhimaṇḍalanti timaṇḍalaṃ. **Yattha katthacīti** titthe vā atitthe vā. Udakena temiyatīti yojanā, tintiyatīti attho. Na kevalaṃ nimittēva ayaṃ nadī hoti, atha kho nadīpāragamanādikepīti āha “bhikkhuniyā”tiādi. Idaṃ “nadīpāragamanepī”ti padeneva sambandhitabbaṃ.

Yā panāti nadī pana, gatāti yojanā. **Tanti** nadiṃ. **Vatinti** pāliṃ. **Rukkhapādeti** rukkhassa mūle. Udakañca āvaraṇaṃ ajjhottharivā pavattatiyevāti yojanā. **Yathāti** yenākārena. Apavattamānā hotīti sambandho.

Dubbuṭṭhikāleti gimhasadise dubbuṭṭhikāle. “Nirudakabhāvenā”ti iminā “āvaraṇabhāvenā”ti visesanaṃ nivatteti. **Sāti** udakamātikā. Sampādentī hutvā niccaṃ pavattatīti yojanā. **Nimittaṃ kātuṃ na vaṭṭatīti** manussehi nīhaṭattā, sayañca agamanattā na vaṭṭati. **Yā panāti** udakamātikā pana. **Mūleti** paṭhamakāle. Kālantarena nadī hotīti sambandho. **Tanti** udakamātikam.

Udakanimitte evaṃ vinicchayo veditabboti yojanā. Udati pasavatīti **udakaṃ**. Bhūmigatameva udakanti sambandho. **Tañcāti** bhūmigataudakañca. Āvāṭa...pe... samuddādīsu ṭhitam apavattanakaudakanti yojanā. **Ukkhepimanti** ukkhipitvā gahitaṃ. **Tanti** vacanaṃ. **Sūkarakhatāyapīti** sūkarehi khatāya vāpiyāpi. **Taṃkhaṇaṇṇevāti** tasmim nimitte kittanakkhaṇeyeva. Āvāṭoyeva khuddakaṭṭhena **āvāṭakaṃ**. **Tanti** nimittasaññākaraṇaṃ. **Kātuñcāti** sayam kātuñca. **Kārāpetuñcāti** parehi kārāpetuñca. Kasmā lābhasīmāyaṃ na vaṭṭati? Lābhasīmā hi aññesaṃ piḷanaṃ karotīti. Iti imamatthaṃ nayato dassento āha “samānasaṃvāsakasīmā”tiādi. **Etthāti** samānasaṃvāsakasīmāyaṃ.

Aṭṭhadisaṃ sandhāya aṭṭha nimittāni vuttānīti daṭṭhabbaṃ. **Sāti** sīmā. Ekena vā nimittenāti yojanā. Tiṇṇaṃ nimittānaṃ kittane nimittānaṃ ṭhitadisaṃ sallakkhetvā “puratthimāya disāyā”tiādinā kittetabbaṃ. Nimittānaṃ satakittane sīmāya aṭṭhadisaṃ sallakkhetvā ekissāyapi disāya bahunimittāni kittetabbāni. **Siṅghāṭakasaṅṭhānāti** tiṇṇaṃ maggānaṃ samāgamaṭṭhāne siṅghāṭakasaṅṭhānā, tikoṇā nāma hotīti adhippāyo. **Caturassāti** samacaturassā. **Siṅghāṭakasaṅṭhānāti** catunnaṃ maggānaṃ samodhānaṭṭhāne siṅghāṭakasaṅṭhānā. Aḍḍhacandamudiṅgādisaṅṭhānā pana nimittānaṃ ṭhitasāṅṭhānena hotīti daṭṭhabbā. **Tanti** sīmaṃ. Bandhitukāmehi nissañcārasamaye bandhitabbāti sambandho. **Baddhasīmavihārānanti** baddhā sīmā etesūti **baddhasīmā**, te eva vihārāti baddhasīmavihārā, tesam. **Disācārikabhikkhūnanti** disāsu cārikabhikkhūnaṃ. **Tatthāti** tasmim ekagāmakhette, bhikkhūnaṃ pesetabbanti sambandho. **Ekajjhanti** ekato. **Aññānipīti** sīmabandhagāmakhettato aññānipi. **Mahāpadumatthero** pana āhāti yojanā. **Tatoti** tehi nānāgāmakhettehi. **Āgantabbanti** sāmīcidassanavasena vuttaṃ. Tenāha “āgamanampi anāgamanampi vaṭṭatī”ti. Ekasīmabhāvato vuttaṃ “antonimittagatehi āgantabba”nti.

Evaṃ sannipatitesu santesu sīmā bandhitabbāti sambandho. **Pariyantaṃ katvāti** heṭṭhimapariyantaṃ katvā.

Pabbajjūpasampadādīnanti ettha bhaṇḍukammāpucchanaṃ (mahāva. aṭṭha. 98; vi. saṅga. aṭṭha. 144) sandhāya pabbajjāgahaṇaṃ vuttaṃ. **Khaṇḍasīmāti** vihārapaccantaṃ khaṇḍitaṃ viya chinditaṃ viya pavattā sīmā khaṇḍasīmā. **Tanti** khaṇḍasīmaṃ. **Vattaṃ jānitabbanti** ettha vattaṃ vitthārento āha “sace hī”tiādi. **Sīmanti** khaṇḍasīmaṃ. **Yathāti** yenākārena bandhiyamāneti sambandho. Tassā pamānaṃ dassento āha “sā”tiādi. **Sāti** khaṇḍasīmā. Abbhānakamme saddhiṃ kammārahena vīsati bhikkhū sandhāya vuttaṃ “ekavīsati bhikkhū”ti. **Tatoti** ekavīsatibhikkhuto. **Gaṇhantīpīti** ettha pisaddo sahasato oraṃ pana pagevāti dasseti. Sahassato adhikaṃ gaṇhantīpi vihārapaccante khaṇḍite khaṇḍasīmāyeva nāma. **Tanti** khaṇḍasīmaṃ.

Tatrāti khaṇḍasīmamahāsīmāsu ādhāre bhummaṃ. **Athāti** anantaraṃ. **Evanti** imāya

avippavāsakammavācāya sammaniyamāne. **Hīti** phalajotako. **Sīmanti** samānasaṃvāsakasīmaṃ. **Na sakkhissanti** paṭhamam avippavāsaṃ asamūhanitvā sīmaṃ samūhanitum na sakkhissanti. **Sīmantarikapāsāṇāti** dvinnam sīmānam antare vemajjhe ṭhapitā pāsāṇā. **Caturaṅgulapamāṇāpīti** pisaddo ekaṅgulipamāṇāpī vaṭṭatīti dasseti.

Samantāti khaṇḍasīmāya samantā. **Anupariyāyantehīti** anukkamena khaṇḍasīmapariyāyantehi bhikkhūhīti sambandho. **Tatoti** tehi sīmantarikapāsāṇehi, dvinnam sīmānam nimittāni paṭhamam kittetvā pacchā tāsū yaṃ icchanti, taṃ bandhitabbabhāvaṃ dassento āha “sace panā”tiādi. Yathicchitam bandhitum vaṭṭantopi porāṇāciṇṇam dassetum vuttam “evaṃ santepī”tiādi. **Ubhinnampīti** dvīsu sīmāsu ṭhitānam ubhinnampi kammanti sambandho. **Hīti** saccam, yasmā vā.

Casaddo vākyārambhajotako. Esā sīmā nāmāti yojanā. **Tatthāti** piṭṭhipāsāṇādīsu pañcasu ṭhānesu. **Nimittapāsāṇā yathāṭhāne na tiṭṭhanti** piṭṭhipāsāṇassupari nimittapāsāṇam ṭhapitamattam sandhāya vuttam. Piṭṭhipāsāṇam pana vijjhivā nimittapāsāṇam tattha nikhaṇitvā yathā ṭhānā na cāventi, tathā ṭhapenti. Evaṃ sante yathāṭhāne tiṭṭhantiyevāti daṭṭhabbam. **Na sīmāti** sīmāya pathavisandhāraṃ udakaṃ pariyantaṃkatvā gatattā sīmā na jhāyati.

Kuṭigehepīti ettha kuṭīti ca gehanti ca agārasseva nāmaṃ. Agārañhi sītādidukkhassa kuṭanaṭṭhena chindanaṭṭhena ca nānādabbasambhārasa gahaṇaṭṭhena ca kuṭigehanti vuccati. Kuṭi eva geham kuṭigeham, tasmimpi. **Bhittim akittetvāti** idam iṭṭhakadārumayaṃ bhittim sandhāya vuttam. Sace silāmayā bhitti nimittūpagā bhavye, bhittipi kittetabbā. **Anto karitvāti** kuṭigehassa bhittiyā vā anto katvā. **Pamukheti** kuṭigehassa ālīnde. **Nibbodakapātanaṭṭhāneti** niggalitvā udakassa pātanaṭṭhāne. Evaṃ sammatāya sīmāyāti yojanā.

“Kuṭṭam akittetvā”ti idam purimanayeneva veditabbam. **Antoti** leṇassa, kuṭṭassa vā anto. **Okāseti** ekavīsatiyā bhikkhūnam okāse. **Evanti** iminākārena sammaniyamāne. **Antoti** bhittiyā anto.

Heṭṭhā na otarātīti heṭṭhā ākāsatattā na otarati. Nanu thambhe anusāritvā otaraṇo bhavye, kasmā na otarātīti? Thambhānamupari ekavīsatiyā bhikkhūnam okāsābhāvatoti daṭṭhabbam. Heṭṭhā otaraṇākāraṃ dassento āha “sace panā”tiādi. **Tulānanti** thambhānamupari tiriyavasena ṭhitānam rukkhasesānam. **Uṭṭahitvāti** bhūmito uṭṭahitvā. **Tulārukkehīti** tulāsaṅkhātehi rukkhehi. “Ekasambandho”ti iminā na kevalam tulārukkeheva ekasambandho, catūsu disāsu catunnam bhittīnam aññamaññampi sambandhoti dasseti. **Heṭṭhāpi otarātīti** bhittīnamupari ekavīsatiyā bhikkhūnam okāsapahonakattā vuttam. **Sace thambhamatthake...pe... hotīti** iminā bahūhi thambhehi katapāsādassa ekekasmim thambhamatthake ekavīsatiyā bhikkhūnam okāse sati heṭṭhā otarātīti dasseti. **Niyyūhakādīsūti** nāgadantakādīsū. Ādisaddena bhittikhilādayo saṅgaṇhāti. **Bhitti cāti** iṭṭhakadārumayā bhitti ca. Sace silāmayā bhitti ca thambhā ca honti, kittetabbā. **Bhittilaggeti** bhittīsu lagge, bhittīnam vā laggaṭṭhāne. **Heṭṭhāpāsādassāti** heṭṭhāpāsāde “ṭhita”iti pade sambandho. Heṭṭhāpāsādassa vā thambhānanti yojanā. Heṭṭhā sammatāya sīmāya upari ārohanākāraṃ dassento āha “sace panā”tiādi. **Nibbodakapātanaṭṭhāneti** chadanakoṭiyam.

Tatthāti tasmim tale. Piṭṭhipāsāṇe sīmaṃ bandhanti viya bandhantīti yojanā. **Teneva paricchedenāti** teneva talaparicchedenā. **Tālamūlapabbatepīti** ettha tālamūlam nāma heṭṭhā mahantaṃ hutvā anupubbena tanukaṃ hoti, tena sadise pabbatepi. **Vitānasaṅṭhānoti** ullocassa saṅṭhāno. Catūsu disāsu niggatasākkharukkhasaṅṭhāno vā khujjarukkhasaṅṭhāno vā hoti. Yathā pabbato vitānasaṅṭhāno hoti, evaṃ **mudiṅgasaṅṭhāno** vā hoti paṇavasāṅṭhāno vāti yojanā. Tattha mudiṅgo majjhe thūlo hoti, mūle ca ante ca tanuko. Paṇavo majjhe tanuko hoti, mūle ca agge ca thūlo. Tesam saṅṭhāno mudiṅgasaṅṭhāno vā paṇavasāṅṭhāno vā. **Heṭṭhā vāti** mudiṅgasaṅṭhānassa pabbatassa heṭṭhā vā. **Majjhe vāti** paṇavasāṅṭhānassa majjhe vā. **Dve kūṭānīti** dve sikharāni. **Kūṭantaranti** kūṭānam majjham. **Cinitvā vāti** iṭṭhakilāhi cinitvā vā. **Pūretvā vāti** paṃsuvālikāhi pūretvā vā.

Sappaphaṇasadisoti sappassa phaṇena sadiso, khujjo pabbatoti attho. **Ākāsapabbhāranti** bhittiyā aparikkhittam ākāsasaṅkhātam pabbhāram. **Sīmappamāṇoti** saddhim antosusirena sīmappamāṇo. **Aggakoṭinti** aggasaṅkhātam koṭim. Sace pana pabbatassa heṭṭhā antoleṇam hotīti sambandho. **Uparimassāti** antoleṇassa upari ṭhitassa. **Pāratoti** bāhirato. **Assāti** pabbatassa bahīti sambandho. **Oratoti** antato. Leṇam hotīti sambandho. Kittakam mahantanti āha “sīmāparicchedamatikkamitvā ṭhita”nti. Kittakam khuddakanti āha “sabbapacchimasīmāparimāṇa”nti. **Tanti** khuddakam leṇam. **Atikhuddakanti** sabbapacchimasīmāparimāṇābhāvato atikhuddakam. **Tatoti** uparisīmato. **Bahīti** sīmato bahi. “**Yadi sīmappamāṇam, sīmā hotiyevā**”ti iminā yadi na sīmappamāṇam, na sīmā hotiyevāti dasseti.

Tanti khaṇḍasīmam. **Pūretvāti** iṭṭhakamattikādīhi pūretvā. **Aṭṭam bandhitvāti** aṭṭalakaṃ bandhitvā. **Umaṅganadīti** ettha ukāro okāraviparīto, tasmā pathaviyam otaritvā pavisitvā maṅgati gacchatīti **umaṅgāti** attho daṭṭhabbo. Umaṅgāca sā nadī ceti **umaṅganadī**. **Tatthāti** umaṅganadiyam. **Heṭṭhāpathavitale ṭhitoti** sīmāya heṭṭhāpathavitale iddhiyā ṭhito.

Sīmāmālaketi khaṇḍasīmāya mālake. **Vaṭarukkhoti** nigrodharukkho. **Tatoti** vaṭarukkhatto. **Niggatapārohoti** pavaddhamva hutvā rukkho ārohati anenāti **pāroho**, eko mūlaviseso. Niggato pāroho niggatapāroho. **Mahāsīmam sodhetvāti** ettha sodhanam nāma mahāsīmagaṭānam bhikkhūnam hatthapāsānayanam, sīmato vā bahikaraṇam. **Bahiddhāti** dvīhi sīmāhi bahiddhā. “Bahitṭhā”tipi pāṭho. Bahi ṭhitā kātabbāti attho. **Anāhaccāti** mahāsīmāya pathavītaṃ vā tatthajātarukkhadīni vā na āhanitvā. **Evanti** yathā khaṇḍasīmāya, evam tathāti attho. **Sīmāmālaketi** khaṇḍasīmāmālake.

Sīmāmālaketi dvinnaṃ sīmānam aṅgaṇe. **Sīmāmālakassāti** kammassa kataṭṭhānassa sīmāmālakassa. **Vehāsaṭṭhitasākhāyāti** kammassa akataṭṭhāne sīmāmālake uṭṭhitāya vehāse ṭhitāya sākhāya. **Tassāti** bhikkhuno pādā vā nivāsanapārūpanam vāti sambandho. **Purimanayepīti** “sīmāmālake vaṭarukkho hotī”tiādīnaṃ vutte purimanayepi. **Tatrāti** purimanaye. **Ukkhipāpetvā kātum na vaṭṭatīti** dvīhi sīmāhi uṭṭhitarukkhasa sākhā vā tato niggatapāroho vā dvīsu sīmāsu pathavītaṃ vā tattha jātarukkhadīni vā āhacca ṭhitattā ukkhipāpetvā kātum na vaṭṭati. **Ānetabboti** ettha dvikammikāya nīdhātuyā apadhānakammasseva vuttattā “bhikkhū”ti padhānakammaṃ ajjhāharitabbaṃ. **Abhuggacchatīti** abbaṃ ākāsam ugacchati. **Tatrāti** pabbate. Kasmā ānetabboti āha “bajjhamānāyeva hī”tiādī. Tattha **bajjhamānāyevāti** kammavācāya bajjhamānāyeva. Iminā abaddhasīmā pamāṇarahitam desam otaratīti dasseti. **Yaṃkiñcīti** yaṃkiñci pabbatādi. **Yattha katthacīti** yasmim kasmimci ṭhāne. **Ekasambandhenāti** baddhasīmāya ekasambandhena. **Itīti** tasmā ānetabboti yojanā.

140. Tīṇi yojanāni **tiyojanam**. “Pamāṇa”nti iminā **paramasaddassa** atirekauttamatthe nivatteti. **Etissāti** sīmāya. Sammanantena bhikkhunāti sambandho. Koṇato minitam koṇanti yojanā. **Hīti** saccam, yasmā vā. **Āpattiñcīti** dukkaṭāpattiñca.

Pārayatīti ajjhottharati. “Kitakābhidheyyalingā”ti (kaccāyanasāre 45 gāthāyam) vacanato abhidheyyabhūtam sīmam sandhāya itthilingavasena **pārāti** vuttam. **Nadiyāti** upayogathe sāmivacanam. Nadinti hi attho. Nadiṃ ajjhottharamānam sīmanti sambandho. **Etthāti** nadipārasīmāyam. **Yatthassāti** ettha yattha assāti padavibhāgam dassento āha “yattha nadiyā”tiādī. “Nadiyā”ti iminā yaṃsaddassa visayam dasseti. **Dhuvanāvāti** ettha dhuvasaddo niccattṭhoti āha “niccasaṅcaraṇanāvā”ti. Iminā dhuvana niccena saṅcaraṇanāvā **dhuvanāvāti** vacanattam dasseti. **Assāti** hoti, bhavēya vā. Nāvāya pamāṇam dassento āha “yā”tiādī. Tattha **yāti** nāvā. **Pājanapurisenāti** ettha pājanam nāma eko nāvāya gamanūpakaraṇaviseso. So hi pajati nāvā gacchati anenāti **pājananti** vuccati. Jakārassa cakāram katvā **pācanantipi** yujjateva. Tassa gāhakena purisena saddhinti attho. Sā nāvā nīṭāti sambandho. **Uddham vā adho vāti** nadiyā paṭisotam vā heṭṭhāsotam vā. **Thenehi vāti** corehi vā. Kiñcāpi haṭā, pana tathāpi avassam labbhaneyyā, dhuvanāvāya hotīti yojanā. **Vātena vāti** mālutena vā “chinna”iti sambandho. **Vicīhīti** taraṅgehi. Taraṅgo hi vicittākārena cinoti vaḍḍhatīti vicīti vuccati. Kiñcāpi

nadīmajjhaṃ nītā, pana tathāpi avassaṃ āharitabbā, dhuvanāvāva hotīti yojanā. **Ogateti** otarivā gate. **Thalaṃ ussāritāti** thalaṃ ukkhipivā sārītā pāpitā nāvāpīti sambandho. **Visaṅkhatapadarāti** saṅkhatavirahitaphalakā vā. **Dhuvanāvāva hotīti** nimittakittanakāle niccasaṅcaraṇanāvattā dhuvanāvāva hotīti adhippāyo. **Tatrāti** “dhuvanāvā”tivacane. **Nimittaṃ vā sīmā vā kammavācāya gacchatīti** ettha kiñcāpi na nimittaṃ kammavācāya gacchati, sīmāya pana avinābhāvato vuttaṃ “kammavācāya gacchati”ti. **Tasmāti** yasmāva nāvāya āgacchantāpi bhagavatā anuññātā, tasmā.

Yatthāti nadipārasīmasammananaṭṭhāne. **Rukkhasaṅghātamayoti** rukkhasamūhena kato. **Padarabaddhoti** phalakehi baddho. **Saṅcaraṇayoggoti** saṅcaraṇakkhāmo. Pāliyaṃ “assā”ti ṭhāne aṭṭhakathāyaṃ “atthī”ti vuttattā “assā”tipadassa hotīti atthoyeva daṭṭhabbo. **Taṃkhaṇaṇṇevāti** tasmim̐ nimittakittakhaṇeyeva. Rukkhaṃ chinditvā katoti sambandho. **Ekapadikasetūti** ekena padena gamanayoggo ekapadiko, soyeva setūti ekapadikasetu. Akappiyasetuṃ dassento āha “sace panā”tiādi. **Tenāti** setunā. Saṅcarituṃ na sakkā hotīti yojanā.

Yatthāti yasmim̐ nadipārasīmasammananaṭṭhāne. **Abhimukhatittheyevāti** sīmāya abhimukhatitthe eva. Dhuvanāvā vā dhuvasetu vā abhimukhatitthato īsakaṃ uddhaṃ ārohanatopi adho orohantopi kappatīti dassento āha “sace”tiādi. **Īsakanti** ekausabha dviusabhādivasena manaṃ appamattaṃ. **Uddhaṃ vāti** abhimukhatitthato upari vā. **Adho vāti** tato heṭṭhā vā. **Gāvutamattabbhantareti** gāvutapamaṇassa ṭhānassa abbhantare.

Sahanimittakittanavidhinā sammanitabbavidhiṃ dassento āha “imañca panā”tiādi. Dvīsu tīresu ṭhātumasakkuṇeyyattā vuttaṃ “ekasim̐ tīre ṭhatvā”ti. **Tatoti** nimittato. **Attānanti** nimittakittanaṃ vinayadharaṃ sandhāya vuttaṃ. **Parikkhipantenāti** pariyāyanta. **Tassāti** tattakassa paricchedassa. **Sammukhaṭṭhāneti** adhosote naditīre ṭhitassa nimittassa sammukhaṭṭhāne. **Tatoti** nimittato. **Tassāti** tattakassa paricchedassa. Sammukhā naditīre nimittaṃ atthīti sambandho. **Saṅghaṭṭetabbanti** sambandhitabbaṃ. **Athāti** nimittakittanato pacchā. “Sabbanimittānaṃ anto ṭhite bhikkhū hatthapāsagate katvā”ti idaṃ sabbaṃ ekaṃ gāmakhettaṃ byāpetvā sammanitabhāvaṃ sandhāya vuttaṃ. Sace sakalaṃ gāmakhettaṃ abyāpetvā ekadesse sammanitaṃ hoti, nimittato bahi ṭhite bhikkhūpi hatthapāsagate katvā sammanitabbā. **Kammanti** sīmasammutikammaṃ. “Ṭhapetvā nadi”ntivacanassa kāraṇaṃ dassento āha “nadī pana baddhasīmasaṅkhaṃ na gacchati”ti.

Dīpako hotīti ettha **dīpoti** antaradīpo. So hi yasmā jalamaṃjhe dīppati, yasmā ca dvidhā āpo ettha sandati, tasmā dīpoti vuccati, soyeva khuddakaṭṭhena **dīpako**. Kakāro hi khuddakattavācako. **Tanti** dīpakaṃ. **Attanāti** vinayadharena. **Orimante ca pārimante cāti** adhosote naditīre ṭhitassa nimittassa sammukhe orimante ca pārimante ca. Paratīre nimittaṃ kittetvāti sambandho. Kissa sammukhaṭṭhāne nimittanti āha “nadiyā orimatīre nimittassa sammukhaṭṭhāne”ti. **Tatoti** nimittato. Sammukhā nimittaṃ atthīti sambandho. **Pārimante ca orimante cāti** paratīre uparisote ṭhitassa nimittassa sammukhe pārimante ca orimante ca. **Paṭhamakittitanimittenāti** orimatīre uparisote paṭhamaṃ kittitena nimittena. Ekā sīmā imassāti **ekasīmo**, dīpako. “Tīradvayañcā”ti padamapekkhitvā “ekasīma”nti sambandhitabbaṃ. Vaccamanapekkhitvā “ekasīmā”tipi niccaithilīngavasena pāṭho atthi.

Uddhaṃ vā adho vāti ettha vāsaddo aniyamavikappattho. **Athāti** tasmim̐ adhikatare satīti yojanā. **Vihārasīmaparicchedanimittassa ujukamevāti** sace dīpako adho adhikataro hoti, orimatīre adhosote ṭhitassa vihārasīmaparicchedanimittassa ujukameva. **Sikharanti** siṅgaṃ. Tañhi sikhaṃ matthakaṃ rāti gaṇhātīti sikharanti vuccati. **Tatoti** dīpakassa pārimantanimitto. Paratīranimittāni kittetvāti sambandho. Ayaṃ dīpakassa vihārasīmaparicchedato adho adhikatare vinicchayo. Uddhaṃ adhikatarepi iminānusārena veditabboti so na dassito. **Pabbatasaṅṭhānāti** pabbatena samaṃ ṭhānaṃ etissāti pabbatasaṅṭhānā.

Uddhampi adhopīti pisaddo samuccayattho. **Ubhopi sikharānāti** uddhaṃ sikharaṃ, adho sikharanti ubhopi sikharāni. **Mudiṅgasaṅṭhānāti** mūle ca agge ca tanukassa maṃjhe thūlassa mudiṅgassa

saṅṭhānā.

Sabbapaṭhamena nayanāti uddhaṃ adhikanayassa, adho adhikanayassa, uddhaṃadhoadhikanayassa cāti sabbesaṃ nayānaṃ paṭhamena vihārasīmadīpakānaṃ samena nayena. **Paṇavasanaṅṭhānāti** mūle ca agge ca thūlassa majjhetanukassa paṇavassa saṅṭhānā.

72. Uposathāgārādīkathā

141. Anupariveṇiyanti ettha anusaddassa vicchatthaṃ, pariveṇasaddassa ca līṅgavipallāsabhāvaṃ dassetuṃ vuttaṃ “tasmiṃ tasmiṃ pariveṇe”ti. Pariveṇasaddo hi napuṃsakalīṅgo, idha pana līṅgavipallāsaṃ katvā itthilīṅgavasena vuttaṃ. “Saṅketam akatvā”ti iminā **asaṅketenāti** padassa kiriyāvīsesanattaṃ dīpeti. “Kammavācāyā”ti iminā **samūhanitvāti** padassa karaṇaṃ dasseti.

142. Yatoti ettha topaccayassa kāraṇatthe pavattabhāvaṃ dassento āha “yasmā”ti. “Hatthapāse”ti iminā hatthapāsato bahi nisinne akatovassa uposatho hotīti dasseti. **Assāti** bhikkhuno. **Vatthuvasenāti** aṭṭhuppattivāsena. Uposathassa pamukhassa abbhokāse vā mālakādīsū vāti sambandho. **Nimittupagā vā animittupagā vāti** heṭṭhā aṭṭhasu nimittesu vuttā nimittupagā vā animittupagā vā pabbatādayo vā aññe vā kittetabbā.

Paṭhamataraṃ na āgacchati, dukkaṇanti uposathe ghosiyamāne paṭhamataraṃ na āgacchati, dukkaṇaṃ. Vihārasa majjhe hotīti yojanā. **Etthāti** porāṇake āvāse. **Tatthāti** porāṇake āvāse. **Asambādhoti** saṅghassa nisajjaṭṭhānapahonako. **Tatthāti** pacchā utṭhite āvāse.

Sabbesaṃ nisajjaṭṭhānanti yojanā. **Tatthāti** therassa vihāre. **Soti** therassa vihāro. **Etthāti** tumhākaṃ vihāre. Sabbesaṃ okāso natthīti sambandho. **Tatthāti** taṃ asukaṃ nāma āvāsaṃ. “Vaṭṭatī”ti vattabbanti yojanā. **Tassāti** therassa.

74. Avippavāsasīmānujānanakathā

143. Andhakavindaṃ nāmāti tassa gāmassa nāmaṃ. **Tanti** andhakavindaṃ. **Theroti** mahākassapatthero. **Tatoti** andhakavindato. Iminā “andhakavindā”ti ettha nissakkatthe nissakkavacananti dasseti. **Uposathanti** tadatthe upayogavacanaṃ. Uposathatthāyāti hi attho. Andhakavindā rājagahaṃ āgamanassa kāraṇaṃ dassento āha “rājagahaṃ hī”tiādi. Tattha **hīti** yasmā. Andhakavindā vihāraṃ anto katvā “aṭṭhārasa mahāvihārā”ti vuttaṃ. **Nesanti** aṭṭhārasannaṃ mahāvihārānaṃ. **Saṅghassa sāmaggidānatthanti** ettha saṅghassa sāmaggidānaṃ attano uposathakiccaṃ siddhaṃ. Tasmā pāliyaṃ “uposathaṃ āgacchanta”ti vuttaṃ. “Sippiniyaṃ nāmā”ti iminā **nadiṃ tarantoti** ettha nadiyā nāmaṃ dasseti. **Manam vūḷhoti** ettha **mananti** nipāto īsakatthoti dassento āha “īsaka”nti. “Appamatta”nti iminā “īsaka”ntipadassa atthaṃ dasseti. “Vūḷhabhāvo”ti iminā bhāvapaccayena vinā bhāvatto nītabboti dasseti. **Caṇḍenāti** kharena. **Tatthāti** nadiyaṃ. **Amanasikarontoti** “caṇḍasota”nti ābhogaṃ akaronto. **Na pana vūḷhoti** na pana mahāvūḷho. **Udakabbhāhatānīti** udakena abhiāhatāni. **Assāti** therassa. **Allānīti** tintāni.

144. Purimakammavācāti “sammatā sā sīmā saṅghena ticīvarena avippavāsā”ti pure vuttā kammavācā. **Ayamevāti** “ṭhapetvā gāmañca gāmūpacārañcā”tipadaṃ pakkipitvā anupaññattā ayameva kammavācā. **Ayanti** pacchimakkammavācā. **Hi** yasmā bhikkhunisaṅgho antogāme vasati, tasmā purimāyeva vaṭṭatīti yojanā. **Yadi evanti** yadi bhikkhunisaṅghassa ayaṃ pacchimakkammavācā vaṭṭanaṃ siyā bhaveyya, evaṃ satīti yojanā. **Soti** bhikkhunisaṅgho. **Etāya kammavācāyāti** pacchimakkammavācāya. **Na labheyyāti** antogāme vasanattā ticīvaraparīhāraṃ na labheyya. Kiṃ na labhatīyevāti āha “atthi cassa parīhāro”ti. **Assāti** bhikkhunisaṅghassa. **Dvepi sīmāyoti** samānasaṃvāsakasīmā ca avippavāsasīmā cāti dvepi sīmāyo. **Tatthāti** bhikkhubhikkhunīsu. **Tassāti**

bhikkhūnaṃ sīmāya. **Eseva nayoti** bhikkhūnānaṃ sīmaṃ ajjhottharivāpi antopavisitvāpi bhikkhūnaṃ sīmāya sammāne eseva nayo. **Eteti** bhikkhubhikkhuniyo. Sāmaññattā hi pullīṅgena vuttaṃ. **Ettha cāti** ‘‘ṭhapetvā gāmañca gāmūpacārañca’’tipade ca. Saṅgaho veditabbo, kasmā? Gāmena nigamanagarānaṃ ekalakkhaṇattā.

Parikkhepokāsoti parikkhepārahokāso. **Tesūti** gāmagāmūpacāresu. **Parihāranti** cīvaravippavāsāpattiapanayanaṃ. ‘‘Iti’’tiādi nigamaṃ. **Etthāti** samānasaṃvāsakaavippavāsasīmāsu. **Attano dhammatāyāti** attano sabhāvena. **Yatthāti** yasmaṃ ṭhāne. **Hīti** saccaṃ, yasmā vā. **Tassāti** avippavāsasīmāya. **Visunti** samānasaṃvāsakasīmāto pātekkamaṃ. **Tatthāti** dvīsu sīmāsu. **Avippavāsāyāti** avippavāsasīmāya. **Tanti** gāmaṃ. **Sāti** avippavāsasīmā. **Sammatāya sīmāyāti** avippavāsasīmāya sammatāya satiyāti sambandho. Sammatato pacchāti vā yojanā. **Nivisatīti** nivāsattāya visati pavisati. **Sopīti** gāropi. **Sīmasaṅkhyāmyevāti** avippavāsasīmavohārameva. Adhiṭṭhitatecīvarikā bhikkhū pariḥāraṃ labhantīti adhippāyo. Yathā pacchā nivīṭṭho gāmo sīmasaṅkhyāmyeva gacchati, evanti yojanā. ‘‘Pavisissāmā’’ti gehāni katāni, ‘‘pavisissāmā’’ti ālayopi atthīti yojanā. **Ālayopīti** apekkhōpi. **Apaviṭṭhāti** gehāni apaviṭṭhā. **Gehameva chaḍḍetvāti** gehaṃ chaḍḍetvā eva. Iminā gehe chaḍḍite sabbaṃ chaḍḍitamevāti dasseti. Paviṭṭhaṃ vā agataṃ vā ekampi kulaṃ atthi saceti yojanā. Ettha ca ‘‘ekampi kulaṃ paviṭṭhaṃ vā’’ti idaṃ navagāmaṃ sandhāya vuttaṃ. ‘‘Ekampi kulaṃ agataṃ vā’’ti idaṃ porāṇakagāmaṃ sandhāyāti daṭṭhabbaṃ.

Tatrāti ‘‘vattaṃ jānitabba’’ntivacane. **Avippavāsasīmāyanti** mahāsīmāya. Sā eva hi yasmā avippavāsakammavācāya bahulapayojanā hoti, tasmā avippavāsasīmāti vuccati. **Itarāyāti** avippavāsasīmāya. **Tatthāti** tāsu dvīsu sīmāsu. **Nirāsaṅkatthānesu ṭhatvāti** cetiyaṅgaṇādīnaṃ khaṇḍasīmāya anokāsattā vuttaṃ. Khaṇḍasīmañhi sammanantā cetiyaṅgaṇādīṭṭhānaṃ pahāya aññasmiṃ vivittokāse vihārapaccantaṃ khaṇḍitvā sammananti. **Samūhanitunti** avippavāsasīmāṃ samūhanitum. **Paṭibandhitum na sakkhissantevāti** avippavāsāmyeva jānitvā khaṇḍasīmāya aññātattā paṭibandhitum na sakkhissanteva. **Sīmasambhedanti** khaṇḍasīmaavippavāsasīmānaṃ sambhedam. **Sāsanantaradhānena vāti** satthu āṇāya antaradhānena vā. **Sādhukaṃ panāti** nikkāṅkhaṃ pana.

76. Gāmasīmādikathā

147. Uposathakammaṃ visum gahitattā sesakammavasena samānasaṃvāsakatā gahetabbā gobalibaddanayena vā pārisesanayena vā. **Tanti** samānasaṃvāsakūposathabhāvaṃ. ‘‘Aparicchinnāyā’’ti iminā **aṭṭhapitāyāti** ettha ṭhapadhātuyā adhippāyatthaṃ dasseti. **Gāmaṃ vā nigamaṃ vāti** ettha nagaraṃ kena saṅgahitanti āha ‘‘gāmaggaṇena cetthā’’tiādi. Tattha **etthāti** ‘‘gāmaṃ vā nigamaṃ vā’’ti pāṭhe, gāmaggaṇenāti sambandho. Atha vā **etthāti** gāmanigamanagaresu, nagarampīti sambandho. Gāmādīnaṃ paricchedaṃ vitthārena dassento āha ‘‘tatthā’’tiādi. Tattha **tatthāti** gāmanigamanagaresu. **Gāmabhojakāti** gāmaṃ bhūjantīti gāmabhojakā. **Balinti** karaṃ. So hi taṃ nissāya gāmabhojakā balanti jīvanti anenāti balīti vuccati. Yampi ekaṃ padesaṃ paricchinditvā detīti yojanā. **Gāmakhetteti** rañño āṇā khipiyati etthāti **khettam**, gāmoyeva khettam gāmakhettam, tasmīṃ. **Ayampīti** ayaṃ padesopi. **Sopīti** padesopi. Visumgāmo nāmāti yojanā. Sopi visumgāmo gāmasīmā hotiyevāti yojanā. Visum paricchinditvā dinno gāmo **visumgāmo**. **Tasmāti** yasmā visum gāmo hoti, tasmā. **Sā cāti** visumgāmasīmā ca. **Itarāti** visumgāmasīmāto aññā pakatigāmanaganigamasīmā cāti yojanā.

Evanti ‘‘asammatāya bhikkhave’’tiādinā pāṭhena. **Tanti** sīmaparicchedaṃ. **Aparicchinneti** rājūhi aparicchinne. ‘‘Aṭavipadeso’’ti iminā natthi gāmo etthāti **agāmakoti** vacanattassa sarūpaṃ dasseti. **Vijjhāṭavisadiseti** vigataṃ aggino jhāyanametthāti vijjhā, corādayo manusse ābhuso ṭavanti pīlayanti etthāti **āṭavi**. Vijjhā ca sā āṭavi ceti **vijjhāṭavi**, tāya sadise vijjhāṭavisadise. Ettha purimanaye gāmādīhi āsanno vā hotu, anāsanno vā tehi aparicchinnō aṭavipadeso gahetabbo. Pacchimanaye dūro manussānaṃ anāgamanapatho āṭavipadeso gahetabboti ayametesam viseso. **Assāti** bhikkhuno. **Samantāti** samantato. **Ayam sīmāti** ayaṃ sattabbhantarasīmā. **Tatthāti** sattasu abbhantaresu. Samantā ṭhitassa vā nisinnassa

vā abbhantare antokoṭṭhāse jātaṃ abbhantaraṃ aṭṭhavīsahatthapamāṇaṃ.

Yā kāci nadī asīmāva hotīti sambandho. **Nadīsīmalakkhaṇapattāti** nadīsīmalakkhaṇaṃ pattā. Iminā sīmalakkhaṇaṃ apattā nadī bandhiyamānā sīmāva hotīti dasseti. Sāvadhāraṇena “attano sabhāvenevā”ti iminā bhikkhūnaṃ bandhanabhāvenāti atthaṃ nivatteti. **Etthāti** nadiyaṃ. **Etthāti** jātassarasamuddesu. **Yena kenacīti** antamaso tiracchānagatenapi yena kenaci. Khaṇitvā akato **sayamjātoti** sambandho. Iduṃ hetuantogadhavisesanaṃ. Khaṇitvā akatattāti hi attho. **Sayamjātoti** sayameva jātoti evakāro yojetabbo. Tena vuttaṃ “yena kenaci khaṇitvā akato”ti. **Sobbhoti** saṃ ubhoti padavibhāgo kātabbo. Tattha saṃsaddo samantatthavācako, ubhasaddo pūraṇatthavācako. Tasmā samantato āgatena udakena ubhati pūrati etthāti **sobbhoti** vacanattho kātabbo. Tena vuttaṃ “samantato āgatena udakena pūrato tiṭṭhatī”ti.

Tatthāti nadīsamuddajātassaresu, ādhāre bhummaṃ. **Yaṃsaddo** ṭhānavisayoti āha “yaṃ ṭhāna”nti. **Majjhimassāti** thāmamajjhimassa. Vakkhati hi “thāmamajjhimenā”ti. “Samantato”ti iminā **samantāti** ettha nissakkatthe nissakkavacananti dasseti. “Udakukkhepenā”ti iminā **udakukkhepāti** ettha karaṇatthe nissakkavacananti dasseti. Udukaṃ ukkhipitvā khipiyati etthāti **udakukkhepo**. “Paricchinna”nti iminā pāṭhasesaṃ dasseti. **Akkhadhuttāti** ettha **akkhoti** pāsako. So hi akati kuṭilaṃ gacchati anenāti akkhoti vuccati, dhavanti mariyādamatikamma kīḷādīpasutaṃ gacchantīti **dhuttā**, akkhesu dhuttā akkhadhuttā. **Dāruḡaṇanti** sārādārumayaṃ ḡaṇaṃ. “Vāluḡaṃ vā”ti iminā “udakukkhepā”ti ettha upalakkhaṇaṃ dasseti. **Yatthāti** yasmim padese. **Ayanti** padeso. **Tassāti** udakukkhepassa.

Etthāti nadīsamuddajātassaresu. **Mukhadvāranti** samuddādīnaṃ mukhasaṅkhātaṃ dvāraṃ. **Sabbatthāti** sabbāya nadiyaṃ. Theravādaṃ dassento āha “yaṃ panā”tiādi. “Yojanaṃ...pe... vaṭṭatī”ti yaṃ pana vacanaṃ mahāsumattherena vuttanti yojanā. **Tatrāpīti** yojananadiyaṃ. Paṭikkhittākāraṃ vitthārento āha “bhagavatā hī”tiādi. **Nadiyā pamāṇanti** nadiyā gambhīrapamāṇameva, na āyānavitthārapamāṇanti attho. “Na yojanaṃ vā addhayaḡanaṃ vā”ti vacanampi idameva sandhāya vuttanti daṭṭhabbaṃ. Kiñcāpi āyānavitthārapamāṇaṃ na vuttaṃ, pabhavato pana yāva mukhadvārā āyānavitthāravasena kammaṃ kātuṃ pahonakanadiyeva gahetabbāti daṭṭhabbā. Yā nadīti sambandho. **Imassa suttassāti** “timaṇḡala”ntiādikassa imassa suttassa. **Pabhavatoti** samudāgamato. **Etthāti** nadiyaṃ. Sabbehi bhikkhūhi ṭhapetabboti sambandho. **Tatoti** ekaudakukkhepato.

Kittakā paripuṇṇā hotīti āha “samatitthikā”ti. Titthena samaṃ paripūrātīti **samatitthikā**. **Udakasāṭikaṃ nivāsetvāpīti** pisaddo “anivāsetvāpī”ti dasseti. Udakasāṭikaṃ anivāsentopi vatthena avinābhāvato aññaṃ nivāsetvāti attho gahetabbo. Nāvāya ṭhatvā kariyamāne kiṃ gacchantiyāpi nāvāya kātuṃ vaṭṭatīti āha “gacchantiyā panā”tiādi. “Kasmā”tiādinā kāraṇaṃ dasseti. **Hīti** yasmā. **Tanti** udakukkhepamattaṃ. Evaṃ sati...pe... anusāvanā hoti, tasmā gacchantiyā nāvāya kātuṃ na vaṭṭatīti yojanā. “Tasmā”tiādinā laddhaguṇaṃ dasseti. Na kevalaṃ nāvāyamevāti dassento āha “antonadiya”ntiādi.

Rukkhasāti antonadiyaṃ jātassa rukkhassa. Sākhā vā patiṭṭhitāti sambandho. **Sīmaṃ vā sodhetvāti** vihārasīmagāmasīmāsu ṭhitānaṃ hatthapāsānayanabahikaraṇavasena sīmaṃ vā sodhetvā. Jātarukkhassa pavitṭhasākhāya vā pārohe vāti sambandho. **Assāti** bahinaditīre jātarukkhassa. **Tatthāti** khāṇuke.

Tassāti pāsānadīpakassa. **Pubbe vuttappakāreti** pubbe nadīnimittatṭhāne “anvaddhamāsa”ntiādinā (mahāva. aṭṭha. 138) vuttappakāre. **Soti** pāsānadīpako. Puna **soti** pāsānadīpakoyeva. **Hīti** saccaṃ, yasmā vā.

Āvaraṇanti pālīṃ. **Tanti** āvaraṇaṃ. Āvaraṇena vā koṭṭhakabandhena vā hetubhūtena, pacchijjatīti sambandho. Koci āvaraṇappadeso ajjhotthariyatīti sambandho. **Tatthāti** āvaraṇappadeso. **Hīti** saccaṃ,

yasmā vā. “Heṭṭhāpālī baddhā”ti idaṃ nadiṃ vināsetvā taḷākakaraṇākāradassanaṃ. **Etthāti** nadiyaṃ, taḷāke vā. **Chadditamodakanti** taḷākarakkhanatthaṃ ekena vārimaggena chadditaṃ udakaṃ. **Deve avassanteti** dubbuṭṭhikālattā vassantakālepi deve avassante. **Sāti** nadito nīhaṃamātikā. **Kālantarenāti** aññena kālena. **Uppatitvāti** gāmanigamānaṃ upari patitvā. **Pavattatīti** pubbe vuttapakāre vassakāle cattāro māse abbhocchinnā sandati. **Vihārasīmanti** vihārasambandhaṃ baddhasīmaṃ.

Samuddepīti pisaddo nadimapekkhati. **Tatthāti** padese. **Otaritvāti** heṭṭhā taritvā. “Osaritvā”tipi pāṭho, ayamevattho. **Sanṭhahantīti** udakena samaṃ tiṭṭhanti. **Soti** padeso. **Udakantatoti** udakakoṭito. **Tatthāti** samudde. **Bādhatīti** pīlayati. **Tesūti** nāvāaṭṭakesu. **Tanti** piṭṭhipāsānaṃ. **Ūmiyoti** vīciyo. Tā hi paraṃparāvasena uggantvā saviññāṇakāviññāṇake miyanti hiṃsanti, anto pakkhipantīti vā ūmiyoti vuccanti. **Tatthāti** piṭṭhipāsāṇe. **Hīti** saccaṃ, yasmā vā. Udakeneva piṭṭhipāsāṇo ottharīyatīti yojanā. **Soti** dīpakapabbato. “Dūre”ti vatvā tassa pamāṇaṃ dassento āha “macchavadhānaṃ anāgamanapathe”ti. **Macchavadhānanti** kevaṭṭānaṃ. Te hi yasmā macche hananti, tasmā macchavadhāti vuccanti. “Macchabandhāna”ntipi pāṭho. Macche bandhantīti **macchabandhāti** vacanatto kātabbo. **Anāgamanapatheti** yattha gantvā tadaheva paccāgantvā na āgamanapathike dese. Natthi āgamanapatho etthāti **anāgamanapatho**, deso. Tasmim “āgamanapathe”tipi pāṭho, so ayutto. Kasmā? Agamanapathassa nādhippetattā. Gantvā hi puna anāgamanapathoyevādhippeto. **Tesanti** macchavadhānaṃ. **Gamanapariyantassāti** gamanakoṭiyā. **Oratoti** orabhāge ṭhito dīpako vā pabbato vāti yojetabbo. **Tatthāti** orabhāge ṭhitesu dīpakapabbatesu. **Ottharitvāti** pakatiudakena ottharitvā. **Tatthāti** ottharitvā ṭhite samudde.

Karontehipi kātabbanti sambandho. **Yatthāti** yasmim sare. **Ayanti** ayaṃ saro, na jātassaro hoti. Ayaṃ saro gāmakhettsaṅkhyameva gacchatīti yojanā. **Tatthāti** sare. **Yattha panāti** yasmim sare pana. **Tassāti** jātassarassa. **Tatthāti** padese. Sace gambhīraṃ udakaṃ hotīti yojanā. **Tatthāti** aṭṭake. **Etthāti** jātassare, ṭhitesu piṭṭhipāsānadīpakesūti yojanā. **Pahonakajātassaroti** saṅghakammaṃ kātuṃ pahonako jātassaro. “Sukkhati”ti vatvā tadeva samatthetuṃ vuttaṃ “nirudako”ti. **Tatthāti** jātassare. Sace nirudakamattena gāmakhettaṃ gacchati. Kadā gacchatīti āha “sace panethā”tiādi. Tattha **etthāti** jātassare. **Pokkharāṇīdīnīti** ettha ādisaddena udakamātikādayo saṅgaṇhāti. Yadā khaṇanti, tadāti pāṭhaseso yojetabbo. “Taṃ ṭhāna”nti vuttepi na khaṇanaṭṭhānameva gahetabbaṃ, “etthā”ti sāmāññato vuttattā sabboyeva jātassaro gahetabbo. Na kevalaṃ ajātassaramattaṃ hoti, atha kho gāmakhetanti āha “gāmasīmāsāṅkhyameva gacchatī”ti.

Nanti jātassaraṃ. **Pūretvāti** mattikādīhi pūretvā. **Pāḷinti** āvaraṇaṃ. **Sabbameva nanti** sakalameva taṃ jātassaraṃ. **Loṇīpīti** pisaddena na kevalaṃ sobbhoyeva jātassarasāṅkhyāṃ gacchati, atha kho loṇīpīti dasseti. **Udakaṭṭhānokāseti** udakassa ṭhāne okāse.

148. Sīmāya sīmaṃ sambhindantīti ettha “sīmāya sīma”nti padānaṃ sambandhāpekkhattā tesāṃ sambandhaṃ dassetuṃ vuttaṃ “attano paresa”nti. “Baddhasīma”nti iminā “sīma”nti sāmāññato vuttepi visesato baddhasīmāyeva gahetabbāti dasseti. Tamevatthaṃ vitthārento āha “sace hī”tiādi. **Saṃsaṭṭhaviṭapāti** aññamaññaṃ āsannattā saṃsaṭṭho viṭapo etesanti saṃsaṭṭhaviṭapā. “Saṃsaṭṭhaviṭapā”ti idaṃ upalakkhaṇamattaṃ, mūlānipi saṃsaṭṭhāniyevāti daṭṭhabbaṃ. **Tesūti** dvīsū rukkhesu. **Vihārasīmā cāti** porāṇakavihārasīmā ca. **Anto katvāti** sīmāya anto katvā. Atha pacchāti ettha “pacchā”ti iminā athasaddasatthaṃ dasseti. Evaṃ ke akāṃsūti āha “evaṃ chabbaggiyā akāṃsū”ti. **Tenāti** karaṇena.

Ajjhottharaṇākāraṃ dassento āha “paresa”ntiādi. **Tassāti** baddhasīmāya. **Padesanti** bhikkhūhi kammaṃ kātuṃ pahonakaṃ ekadesaṃ. Antamaso ekassapi bhikkhuno ṭhatvā adhiṭṭhānuposathaṃ kātuṃ pahonakaṃ padesaṃ. Kammaṃ kātuṃ appahonakapadesaṃ anto karitvā bandhantā **sīmāya sīmaṃ sambhindanti** nāma. **Sīmāya upacāroti** pacchā bandhitabbāya sīmāya upacāro. “**Vaḍḍhanto sīmāsāṅkaraṃ karoti**”ti iminā sace avaḍḍhanako pāsāṇo hoti, dvinnampi sīmānaṃ nimittaṃ kātuṃ

vaṭṭatīti dasseti.

77. Uposathabhedādikathā

149. Pannarasikassa pubbakiccassa pāḷiyam āgatattā cātuddasikasessa pubbakiccaṃ dassento āha “ajjuposatho cātuddaso”ti.

“Adhammena vagga”ntiādīsu vinicchayo evaṃ veditabboti yojanā. **Adhammena vagganti** ettha **adhammaṃ** nāma ekasmiṃ vihāre catunnaṃ bhikkhūnaṃ suttuddesauposathamakatvā pārisuddhiuposathakaraṇaṇca tiṇṇaṃ pārisuddhiuposathamakatvā suttuddesakaraṇaṇca. **Vaggaṃ** nāma sabbeva asannipatitvā ekassa chandapārisuddhiharaṇaṃ. Chandapārisuddhi nāma saṅghamajjhamyeva āgacchati, na gaṇamajjham, na puggalassa santikaṃ. **Adhammena samagganti** ettha **adhammaṃ** vuttanayameva. **Samaggaṃ** nāma sabbesaṃ sannipatanaṃ. **Dhammena vagganti** ettha **dhammaṃ** nāma catunnaṃ suttuddesauposathakaraṇaṇca tiṇṇaṃ pārisuddhiuposathakaraṇaṇca. **Vaggaṃ** vuttanayameva.

78. Pātimokkhuddesakathā

150. **Imaṃ nidānanti** pātimokkhassa imaṃ nidānaṃ. **Sutā kho panāti** ettha suyiythāti **sutā**, suyissantīti vā **sutā**, pārājikuddesādayo. Sutā ca sutā ca **sutāti** sarūpekaseso kātabbo. **Avasesanti** nidānuddesādito avasesaṃ pārājikuddesādi. **Sutenāti** sutasaddena. “Atthe asambhavato sadde vuttavidhānaṃ hoti”ti hi paribhāsato “sutenā”ti ettha saddova gahetabbo. **Tena nayanāti** tena nidānuddesanayena.

Aṭavimanussabhayanti aṭaviyaṃ nivasantassa manussassa bhayaṃ, vanacarakabhayanti attho. **Rājantarāyotiādīsu** evaṃ viseso veditabboti yojanā. **Davadāhoti** dāyaṃ dahatīti davadāho ākārassa rassaṃ, yakārassa ca vakāraṃ katvā. **Nanti** bhikkhuṃ. Ekaṃ vā bhikkhūnti yojanā. **Paṭhamo vā uddesoti** nidānuddeso. **Etthāti** pañcasu uddesesu. **Yasminti** uddese. **Sopīti** uddesopi. **Suteneva sāvetabboti** sutapadeneva saṅghassa sāvetabboti evasaddo “na vitthārenā”ti dasseti.

Anajjhīṭṭhāti ettha upasaggavasena isudhātussa icchākantito aññamatthaṃ dassento āha “anāṇattā, ayācitā vā”ti. Ettha “anāṇattā”ti idaṃ therena anāṇattabhāvaṃ sandhāya vuttaṃ. “Ayācitā”ti idaṃ sammutiladdhena navakena ayācitabhāvaṃ sandhāya vuttanti daṭṭhabbaṃ. **Etthāti** “anajjhīṭṭhā dhammaṃ bhāsanti”ti vacane. **Dhammajjesaketi** dhammakathanatthāya ajjhesatīti dhammajjesako, tasmim. Āpucchitvā vā tena saṅghattherena yācīto hutvā vāti yojanā. **Vārapaṭipāṭiyāti** vārānukkamena. **Dehīti vāti** ettha iti-vā-saddo “bhaṇa” itipadena ca “kathehi” itipadena ca yojetabbo. “Bhaṇa” iti vā “kathehi”iti vā “dehi”iti vā vattabbāti yojanā. **Tihipi vidhīhīti** osāraṇakathanasarabhaññaṃsaṅkhātehi tīhi sajjanehi. Ettha ca suttassa osāriyate uccāriyate **osāraṇaṃ**, atthassa kathiyate **kathanaṃ**, suttassa ca tadatthassa ca sarena bhaṇiyate **sarabhaññaṃ**. **Osārehīti** suttam uccārehi. **Kathehīti** attham kathehi. **Sarabhaññaṃ** suttassa ca tadatthassa ca sarena bhaṇanaṃ. **Nanti** saddhivihārikaṃ. **Sajjhāyaṃ adhiṭṭhahitvāti** “sajjhāyaṃ karomī”ti adhiṭṭhahitvā. **Etthāti** ajjhesanaṭṭhāne.

Nissitaketi saddhivihārikādayo. **Soti** saṅghatthero, “vattabbo”tipade kammaṃ, “vadatī”tiādīsu padesu kattā. **Āraddhanti** saṅghena āraddhaṃ. **Ṭhapetvāti** dhammasavanaṃ ṭhapetvā. **Osāretvāti** paṭhamaṃ suttam osāretvā. **Puna kathentenāti** pacchā attham kathentena. **Aṭṭhapetvāyeva vāti** suttassa ca atthassa ca antarā aṭṭhatvā eva vā. **Kathetabbanti** atthajātaṃ kathetabbaṃ. **Kathentassa...pe... nayoti** paṭhamaṃ attham kathetvā puna suttaṇca atthaṇca sarena bhaṇantassa puna āgatepi eseva nayoti attho.

Upanisinnakathāyapīti samīpe nisinnena kathāyapi. **Tenāti** saṅghattherena. **Vattum vaṭṭatīti**

visesetvā vattuṃ vaṭṭati. **Tenāti** manussehi jānanabhikkhunā. Saṅghatthero bhaṇati, tuṅhī vā hotīti sambandho. “Pucchantī”ti vutteti yojanā. **Anumodanādīsupīti**ādisaddena dhammakathādayo saṅgaṇhāti. Saṅghatthero anujānātīti sambandho. **Sabbatthāti** sabbesu vihāraantaragharesu.

Sajjhāyanti sayamaṃ issarena ayanamaṃ uccāraṇamaṃ, kenaci anajjhīṭṭho sayamaṃ adhiissarena ayanamaṃ uccāraṇanti attho. **Theroti** saddhivihāro thero. **Vissamissāmīti** khedavirahitaṃ gamissāmi. **Āpucchitabbanti** paṭhamatherampi puna āgatattherampi āpucchitabbaṃ. Ekena saṅghattherena anuññātenāti sambandho. **Aññasmīnti** anuññātattherato aññasmiṃ thereti sambandho. **Tanti** puna āgataṃ theramaṃ. **Attānaṃ sammanitabbanti** ettha paccatte upayogavacananti āha “attā sammanitabbo”ti. Kiṃ sammatena pariamaṃ anoloketvā pucchitabboti āha “pucchantena panā”tiādi.

153. Meti mayhaṃ. **Itoti** puggalato, uppannoti sambandho. **Puramhākanti** padassa pure amhākanti padacchedamaṃ katvā puresaddo paṭhamatthoti āha “paṭhamaṃ amhāka”nti. **Paṭikaccevasaddo** pagevapariyāyo, “paṭhamataramevā”ti iminā tassa atthamaṃ dasseti. **Bhūtamevāti** vijjamānameva, tathameva vā.

82. Adhammakammaṭṭikkosānādīkathā

154. Adhammakammanti abhūtakammaṃ. **Paṭikkositunti** ettha kusadhātu apanayanatthoti āha “vāretu”nti. **Diṭṭhinti** laddhiṃ. **Tesanti** catunnaṃ pañcannaṃ. **Yathāti** yenākārena bhaṇiyamāneti yojanā. **Na suṇantīti** aññe bhikkhū na suṇanti. **Therādhīnanti** therena adhīnaṃ ābandhanti attho. **Therāyattanti** therena āyattaṃ, therassa santakanti attho. **Etthāti** pātimokkhuddese.

83. Pātimokkhuddesakaajjhesanādīkathā

155. Navavidhañcāti divasavasena tividhaṃ, kārakavasena tividhaṃ, kattabbākāravasena tividhañcāti navakoṭṭhāsañca, navapakārañca vā. **Catubbidhanti** “adhammena vagga”ntiādikamaṃ catubbidhaṃ. **Duvidhanti** bhikkhubhikkhunīvasena duvidhaṃ. **Navavidhanti** bhikkhupātimokkhe pañcavidhaṃ, bhikkhunipātimokkhe catubbidhanti navavidhaṃ. **Etthāti** “yo tattha bhikkhu byatto paṭibalo”ti pāṭhe. **Suvisadāti** suṭṭhu byattā, suddhā vā. **Ettakampīti** pisaddo garahāyamaṃ, adhike kā nāma kathāti dasseti.

Sāmanta āvāsāti ettha upayogatthe nissakkavacananti āha “sāmantaṃ āvāsa”nti. **Yo sakkotīti** bahūsu navesu yo sakkoti.

84. Pakkhagaṇanādiuggahaṇānujānanakathā

156. Katiṇaṃ pūraṇīti katiṇaṃ tithīnaṃ pūraṇī. **Ko divasoti** kittako divaso. **Ayyāyattanti** ayyehi bhikkhūhi āyattaṃ ābaddhaṃ. **Samharitvāti** puna salākaṃ samharitvā. Ayaṃ pāṭho kesuci aṭṭhakathāpotthakesu natthi. **Kālavatoti** ettha vantupaccayo svatthoti āha “kālassevā”ti. Evasaddo pana sambhavato yujjiyati. **Pagevāti** pātova.

158. Sāyampīti sāyanhepi. Pisaddena aññampi saraṇakālaṃ sampiṇḍeti.

159. Āṇāpetunti ettha anāṇāpetabbabhikkhū apanetvā āṇāpetabbabhikkhū dassetuṃ vuttaṃ “kiñci kamma”ntiādi. Sadākārameva kiñci kammaṃ karontoti yojanā. **Dhammakathikādīsūti**ādisaddena gaṇavācakādayo saṅgaṇhāti. **Vārenāti** pariyāyena. **Sammuñcaninti** yaṭṭhisammuñcaniṃ vā muṭṭhisammuñcaniṃ vā. Samaṃ, suṭṭhu vā muñcati sodheti imāyāti **sammuñcanī**, tālujo paṭhamo. **Tampīti** sākhābhaṅgampi.

160. Vuttanayenevāti sammajjane vuttanayeneva. **Puna āharitabbānīti** saṅghikāvāsaṃ āsanāni puna āharitabbāni. **Taṭṭikāyopīti** veṇuādīmayā taṭṭikāyopi.

161. Kapallikā vāti kapālesu pariyāpannā padīpakapālā vā. **Tanti** telādiṃ. **Pariyesitabbānīti** anavajjapariyesanena pariyesitabbāni.

86. Disaṃgamikādivatthukathā

163. Saṃgahetabbotiādīnaṃ catunnaṃ kiriyāpadānaṃ viśesaṃ dassento āha “saṃgahetabbo”tiādi. Saṃgahasaddassa saṅkhepagahaṇesupi vattanato idha “anuggahatthe”ti dassetuṃ pāliyaṃ vuttaṃ “anuggahetabbo”ti. Tena vuttaṃ “tathākaraṇavasena”ti. **Upalāpetabboti** saṅghena bahussuto bhikkhu bhikkhūhi upagantvā lāpetabbo kathāpetabbo. **Upaṭṭhāpetabboti** saṅghena bahussuto bhikkhu bhikkhūhi upa accanena pūjanena ṭhāpetabbo. “Sabbesaṃ dukkaṭa”nti vatvā tadeva samatthetuṃ vuttaṃ “idha neva therā, na daharā muccantī”ti. **Tenāti** bahussutena bhikkhunā. **Evampi satīti** evaṃ asādiyanepi sati. **Sāyaṃ pātanti** sāyañca pāto ca sāyaṃpātaṃ. **Upaṭṭhānanti** upaṭṭhānaṭṭhānaṃ, upaṭṭhānatthāya vā. **Tenāti** bahussutena bhikkhunā. **Tesanti** mahātherānaṃ. **Assāti** bahussutassa bhikkhuno. **Saddhimcarāti** attanā saddhiṃ carantīti saddhimcarā. **Athāpīti** yadipi. Eko vā vattasampanno vadatīti yojanā. Eso ca ahañcāti **mayam**. Nāmatumhaamhasaddesu hi ekasesena kattabbesu parova gahetabbo. Viharantūti vadantīti yojanā.

So āvāso gantabboti ettha kimatthāya gantabbo, kiṃ anudivasam gantabboti āha “uposathakaraṇatthāya anvaddhamāsaṃ gantabbo”ti. **So ca khoti** āvāso. **Utuvasseyevāti** hemantagimheyeva. Utuvasseyeva gantabboti atthassa nītabbabhāvaṃ dassento āha “vassāne panā”tiādi. **Yanti** kammaṃ. **Tatthāti** “vassaṃ vasantī”tiādivacane. **Soti** pātimokkhuḍdesako bhikkhu. **Aññasminti** aparasmim pātimokkhuḍdesake. **Māsadvayanti** sāvaṇamāsapuṇṇamito yāva assayujapuṇṇamī, tāva māsadvayaṃ vasitabbaṃ. Idaṃ purimavassaṃ upagantvā pacchimikāya pakkamanādiṃ sandhāya vuttaṃ. Sace pacchikāya upagantvā anantameva pakkamanādiṃ karoti, māsattayampi vasitabbaṃ.

87. Pārisuddhidānakathā

164. Yena kenaci aṅgapaccaṅgena viññāpetīti paṭivacanaṃ nicchāretumasakkonto yena kenaci aṅgapaccaṅgena viññāpeti. **Ubhayathāti** ubhayehi kāyavācāsaṅkhātehi ākārehi. Kāyavācāhi viññāpetīti sambandho. **Sabbeti** akhilā gilānā. **Hatthapāseti** saṅghassa hatthapāsamhi. **Sace dūre hontīti** sace bahū gilānā aññamaññaṃ dūre honti. **Taṃ divasanti** tasmim saṅghaappahonakadivase.

Tattheva pakkamatīti ettha nissakkatthe thapaccayoti āha “tatovā”ti, pārisuddhihāraṭṭhānato evāti attho. “Gacchatī”ti iminā kamudhātuyā padavikkhepatthaṃ dasseti, “katthacī”ti iminā tassa kammaṃ. **Sāmaṇero paṭijānātīti**ādīsū paṭijānanākāratthassa itisaddassa lopabhāvaṃ dassento āha “sāmaṇero aha”nti evaṃ paṭijānātī”tiādi. **Bhūtamāyevāti** vijjamānaṃyeva. **Sabbatthāti** sabbesu “sikkhaṃ paccakkhātako paṭijānātī”tiādīsū.

Sabbantimena paricchēdena catunnaṃ bhikkhūnanti sambandho. **Sabbatthāti** sabbesu “saṅghappatto vibbhamatī”tiādīsū. **Etthāti** pārisuddhiharaṇe. **Bahūnampīti** ettha pisaddena ekena ekassāpi, bahūhi ekassāpi, bahūhi bahūnampi āhaṭṭa pārisuddhi āhaṭṭava hotīti dasseti. **Soti** pārisuddhihārako bhikkhu. **Yesanti** bhikkhūnaṃ. **Tassevāti** pārisuddhihārakasēva. **Itarā panāti** itaresaṃ pārisuddhi pana. **Biḷālasaṅkhalikāti** ettha **biḷāloti** ākhubhujo. So hi biḷāsaṃyā ākhuṃ gaṇhituṃ alati samatthetīti biḷāloti vuccati. **Saṅkhalikāti** etaṃ sattānaṃ bandhanūpakaraṇavisesassa nāmaṃ. Biḷālassa saṅkhalikā tena sambandhasambandhibhāvena sambandhattāti biḷālasaṅkhalikā. Idaṃ upalakkhaṇamattaṃ yesaṃ kesañci saṅkhalikāya gahetabbattā. Tāya sadisā biḷālasaṅkhalikā pārisuddhīti attho. Idaṃ panettha opammaṃsandanaṃ – yathā saṅkhalikāya paṭhamam valayaṃ dutiyaṃyeva

valayaṃ pāpuṇāti, na tatiyaṃ, evameva paṭhamaṃ dinnā pārisuddhi dutiyameva pāpuṇāti, na tatiyanti.

Āgantvāti saṅghassa hatthapāsaṃ āgantvā. Pāliyaṃ **sutto na ārocetī**tiādīsu hetvatthe paccattavacanaṃ. Suttana nārocetīti hi attho. **Pārisuddhihārakassa anāpattīti** ettha āpattīti anvayatthaṃ atthāpattito dassento āha “sace...pe... āpajjati”ti. **Assāti** bhikkhussa. **Ubhinnampīti** pārisuddhidāyakassa, taṃhārakassa cāti ubhinnampi.

88. Chandadānakathā

165. Chandadānepi vinicchayo veditabboti yojanā. **Uposatho kato hotīti** pārisuddhidāyakassa ca saṅghassa ca uposatho kato hoti. **Aññanti** uposathakammato aññaṃ. Yaṃ pana kammanti sambandho. **Kammampīti** uposathakammato aññaṃ kammampi. Ettha ca tadahuposathe attano ca saṅghassa ca sace uposathakammaṃ hoti, pārisuddhiyeva dātabbā. Atha aññaṃ kammaṃ hoti, chandoyeva dātabbo. Yadi uposathakammaṃca aññakammaṃca hoti, pārisuddhi ca chando ca dātabbo. Taṃ sandhāya vuttaṃ “tadahuposathe pārisuddhiṃ dentena chandampi dātu”nti. **Sīmāya vāti** baddhasīmāya vā. **Acchitunti** upavesituṃ. “Āsa upavesane”ti hi dhātupāṭhesu (saddanīdhātumālāyaṃ 16 sakārantadhātu) vuttaṃ. **Sāmaggī vāti** kāyasāmaggī vā.

167. **Saratipi uposathaṃ, napi saratīti** ettha pisaddassa aniyamavikappatthaṃ dassetuṃ vuttaṃ “ekadā sarati, ekadā na saratī”ti. “Ekanta”nti iminā **neva saratīti** ettha evasaddassa sanniṭṭhānatthaṃ dasseti. **Kammaṃ na kopetīti** sammuttiladdhopi aladdhopi ummattako kammaṃ na kopeti.

91. Saṅghuposathādikathā

168. “Sammajjitvā”ti padamapekkhitvā **so desoti** ettha “upayogatthe paccattavacana”nti vuttaṃ. **Etanti** “so deso sammajjitabbo”tiādivacanaṃ. **Tenāti** tena hetunā. Aṭṭhakathācariyā “sammajjanī... pe... vuccati” iti āhūti yojanā.

Sammajjanīti sammajjanakaraṇaṃ. **Padīpoti** padīpujjalanaṃ. **Udakanti** udakaṭṭhapanam. **Āsanenāti** āsanapaññāpanena. “Itī”ti ajjhāharitabbaṃ. **Uposathassāti** navavidhassa uposathassa pubbakaraṇanti sambandho. **Etānīti** cattāri kammāni. **Vuccatīti** kathiyati. Idaṃ “etānī”ti kammaṃ ca “pubbakaraṇa”nti ākārasa ca abhedattā āsannaṃ ākāramapekkhitvā ekavacanavasena vuttaṃ. “Akkhātānī”ti idaṃ pana “imāni cattārī”ti kammamapekkhitvā bahuvacanavasena vuttanti dattṭhabbaṃ.

Chandapārisuddhiutukkhānanti chandakkhānaṃca pārisuddhikkhānaṃca utukkhānaṃca. **Bhikkhugaṇanāti** bhikkhū gaṇetvā akkhānaṃ. **Ovādoti** bhikkhunīhi yācitassa ovādassa akkhānaṃ. **Etānīti** etāni pañca. **Pubbakaraṇato pacchāti** pubbakaraṇassa karaṇato pacchā. Ettha ca “pubbakaraṇato pacchā kattabbānī”ti idaṃ kattabbākārasseva visesaṃ, na atthassa. Ayaṃ pana viśeso – saṅghasannipātato pubbhāge kattabbattā **pubbakaraṇaṃ** nāma, uposathakaraṇato pubbhāge kattabbattā **pubbakiccaṃ** nāmāti.

Uposathoti uposathadivaso. **Yāvaticā ca bhikkhūti** yattakā bhikkhū. **Kammapattāti** uposathakammassa pattā yuttā anurūpā. Tāvaticā bhikkhū hatthapāsaṃ avijahitvā ekasīmāyaṃ ṭhitā ca hontīti yojanā. **Sabhāgāpattiyoti** vatthusabhāgā āpattiyō. **Vajjanīyāti** vajjetabbā. **Puggalāti** gahaṭṭhādipuggalā. **Tasminti** tasmim uposathasīmamāḷake. Etāni cattārīti pāṭhaseso.

Āgatehi tehi bhikkhūhīti yojanā. **Pannarasopīti** pisaddena na kevalaṃ pāliyaṃ āgatanayeneva adhiṭṭhātuṃ vaṭṭati, atha kho “ajja me uposatho pannaraso”tipīti dasseti.

92. Āpattiṭṭikammavidhikathā

169. Bhagavatā...pe... kātabboti idaṃ veditabbanti sambandho. “Yassa siyā āpattītiādivacaneneva cā”tiādihetuttayena “na sāpattikena uposatho kātabbo”ti yathārutam apaññattampi atthato siddhamevāti dasseti. Hetuttayam “veditabba”nti padena yojetabbam. **Thullaccayādīsūti** ādisaddena pācittiyapāṭidesanīyadukkaṭadubbhāsītāpattiyo saṅgaṇhāti. “**Tam paṭidesemi**”ti idaṃ suvuttameva hotīti sambandho. **Tanti** āpattim. **Tumhamūleti** tumham santike. Niggahitalopañhi vākyameva, na samāso. “Tumha” iti ca “tuyha” iti ca navakattherānam vattabbākāradassanamattameva, na icchitathavipattidassanam. **Vuttampīti** pisaddena na kevalam pālīnayeneva suvuttam, iminā nayanapi suvuttanti dasseti. “Passasī”ti idaṃca vattabbanti sambandho. Vattabbākāram pana suviññeyyam. “Āma passāmi”ti idaṃ pana suvuttameva hotīti sambandho. **Vuttampīti** pisaddo pālīnayam sampiṇḍeti. **Āyatim samvareyyāsīti** ettha pana vattabboti sambandho. Garūsu bahuvacanassa kattabbattā vuttam “samvareyyāthā”ti. Evaṃ vuttana āpattidesakenāti sambandho.

Tatrāti “yadā nibbematiko”ti pāṭhe. Sūriye meghacchanne satīti yojanā. Tena bhikkhunā vattabbanti sambandho, **vatthum kittetvāti** bhojanasaṅkhātam vatthum kittetvā. **Tāti** āpattiyo.

Sabhāgā āpattīti ettha dvīsu vatthusabhāgāpattisabhāgāsu vatthusabhāgāva adhippetāti dassento āha “yam dvepi janā”tiādi. Yam āpattinti sambandho. Samāno bhāgo etāsanti **sabhāgā**. **Desetum vaṭṭatīti** āpattisabhāgāpi vatthuvīsabhāgattā desetum vaṭṭati. **Sudesitāvāti** āpattito bhikkhu vuṭṭhātiyevāti adhippāyo. Aññam dukkaṭanti sambandho. **Panasaddo** garahatthajotako sudesitāya garahākārena pavattattā. Kiñcāpi sudesitāva, pana tathāpīti yojanā. **Tanti** dukkaṭam. **Nānāvattukanti** desanāpaṭiggahaṇavasena nānāvattukam.

170. Sabhāgoyeva vattabbo, na visabhāgo. **Hīti** saccam, yasmā vā. **Tassāti** visabhāgassa. **Itoti** saṅghasannipātato.

95. Anāpattiṭṭipannarasakādīkathā

172. **Te na jāniṃsūti** ettha jānanākāradassanattham “sīmam okkantāti vā okkamantīti vā”ti vuttam. **Okkantāti vāti** pavisittha iti vā. **Tesanti** catunnam vā atirekānam vā bhikkhūnam. **Vaggā samaggasaññinoti** ettha kasmā vaggā, kasmā samaggasaññinoti āha “tesa”ntiādi. Tattha **tesanti** aññesam bhikkhūnam. **Sīmam okkantattāti** sīmam pavisitattā, vaggā hutvāti sambandho. Samaggo iti saññā samaggasaññā, sā etesamatthīti **samaggasaññino**.

175. **Kukkucapakatāti** padassa “icchāpakato”ti padena samānabhāvam dassetum vuttam “yathā”tiādi. **Pubbabhāgeti** uposathakammato pubbhāge. **Sanniṭṭhānam katvāpīti** kappatevāti sanniṭṭhānam katvāpi. “Abhibhūtā”ti iminā **pakatāti** ettha papubbakaradhātuyā upasaggavasena abhibhavanattham dasseti.

176. Yathā heṭṭhā vaggāvaggasaññīpannarakādīsū dukkaṭam vuttam, evamakavā kasmā “thullaccaya”nti āha “akusalabalavatāyā”ti.

100. Sīmokkantikaṭṭikapeyyālakathā

177. Āvāsikenaāgantukaṭṭikapeyyāle sabbam veditabbanti sambandho. Veditabbākāram saha upamāya dassento āha “yathā”tiādi. Āgantukenaāvāsikaṭṭikapeyyāle pana ānetabbanti sambandho. **Purimaṭṭikapeyyāleti** āvāsikenaāgantukaṭṭikapeyyāle. Āgantukenaāgantukaṭṭikapeyyāle pana yojetabboti sambandho. Ettha ca **peyyālantī** sadisanayassa ca tamjānanāññāssa ca pātabbam rakkhanam **peyyam**, peyyam, peyye vā, peyyāya vā alati samatthetīti peyyālantī vacanattho kātabbo.

178. Āvāsikānaṃ cātuddaso hutvā kasmā āgantukānaṃ pannarasoti āha “yesa”ntiādi. Tattha yesanti āgantukānaṃ. **Tiroraṭṭhatoti** āvāsikānaṃ raṭṭhassa aññaraṭṭhato. **Tirojanapadatoti** ekaraṭṭhepi aññajanapadato. **Cātuddasikaṃ akamsūti** saññānānattavasena cātuddasikaṃ akamsu. **Anuvattitabbanti** anumatiṃ vattitabbaṃ. **Na paṭikkositabbanti** “na cātuddaso”ti vatvā na vāritabbaṃ. **Na akāmāti** ettha kamudhātu icchattho, karaṇatthe ca nissakkavacananti āha “na anicchāya dātabbā”ti.

101. Liṅgādidassanakathā

179. “Āvāsikānaṃ ākāra”nti iminā **āvāsikākāra**nti padassa chaṭṭhīsamāsaṃ dasseti. **Sabbatthāti** sabbesu “āvāsikalinga”ntiādīsu. **Yenāti** supaññattamañcapīṭhādīnā, gaṇhatīti sambandho. **Tesanti** āvāsikānaṃ. **Ācārasaṅghānanti** ācārasaṅghitīm. So supaññattamañcapīṭhādiko **ākāro** nāmāti yojanā. **Yanti** supaññattamañcapīṭhādīm, gamayatīti sambandho. **Tattha tatthāti** tasmīm tasmīm ṭhāne. Līne āvāsiketi sambandho. Taṃ supaññattamañcapīṭhādi **liṅgaṃ** nāmāti yojanā. “Adissamāne”ti iminā līneti padassa atthaṃ dasseti. “Jānāpetī”ti iminā **gamayatīti** padassa ṇāṇatthaṃ dasseti. **Yanti** supaññattamañcapīṭhādīm. **Teti** āvāsikā. Taṃ supaññattamañcapīṭhādi **nimittaṃ** nāmāti yojanā. **Yenāti** supaññattamañcapīṭhādīnā. **Teti** āvāsikā uddisiyanti, so supaññattamañcapīṭhādiko **uddeso** nāmāti yojanā. Imehi padehi ākiriyaṃ pakāsiyaṃ etenāti **ākāro**, līne gamayati bodhetīti **liṅgaṃ**. Nimiyaṃ paricchijja ṇāyanti etenāti **nimittaṃ**, uddisiyaṃ apadisiyaṃ etenāti **uddesoti** vacanatthaṃ dasseti. **Sabbametanti** “āvāsikākāra”ntiādi etaṃ sabbaṃ. **Yathāyoganti** pāḷiyaṃ yogānurūpaṃ. **Tatthāti** āgantukākārādīsu. “Amhākaṃ ida”nti na ṇātābanti aññātaṃ, tadeva **aññātaṃ**, nisīdanādi. “Amhākaṃ ida”nti ajānaṃ nāma attano asantakattā, aññesameva santakattā hotīti āha “aññesaṃ santaka”nti. **Udakanissekanti** siñcanavirahitaṃ udakaṃ. **Bahuvacanassāti** “dhotāna”nti ettha chaṭṭhībahuvacanassa. **Ekavacananti** “dhotassā”ti ekavacanāṃ. Pacchimapaṭṭhe malaṃ dhunāti anenāti **dhotam**, dhotañca taṃ udakañceti **dhotaudakaṃ**, tameva nissekam dhotaudakanissekam.

180. **Samānaṃvāsakadiṭṭhanti** padassa itilopasamāsaṃ dassento āha “samānaṃvāsakā eteti diṭṭhi”nti. **Eteti** āvāsikā bhikkhū. “Laddhi”nti iminā **na pucchantīti** padassa kammaṃ dasseti. **Nānāsaṃvāsakabhāvanti** tesam laddhinānāsaṃvāsakabhāvaṃ. “Madditu”nti iminā **nābhivitarantīti** ettha abhisaddasatthaṃ dasseti. “Abhibhavitu”nti iminā ca tadevatthaṃ dasseti. **Nānāsaṃvāsakabhāvassa** maddanaṃ nāma laddhinissajjāpananti āha “taṃ diṭṭhiṃ na nissajjāpentī”ti.

103. Nagantabbagantabbavārakathā

181. **Sabhikkhukāti** padassa saṃvijjanti bhikkhū etasmimāvāseti sabhikkhukoti vacanatthaṃ dassento āha “yasmīm āvāse”tiādi. **Yanti** āvāsaṃ. **Tadahevāti** tadahuposathe eva. Iminā sace sakkoti, tadaheva gantuṃ, so gantabboti dasseti. “Akatvā”ti iminā katvā pana gantabboti dasseti. “**Aññātrā**”ti nipāto “vinā”ti nipātassa pariyāyoti āha “vinā”ti. Attacatuṭṭhena vā attapañcamena vā saṅghena gantuṃ vaṭṭatīti yojanā. Ettha ca “**attacatuṭṭhena vā**”ti idaṃ uposathakammaṃ sandhāya vuttaṃ. “Attapañcamena vā”ti idaṃ pavāraṇākammaṃ sandhāya vuttanti daṭṭhabbaṃ. **Vihāreti** vihārasīmāya mahāsīmāyanti attho. Idañhi vihārasīmānaṃ abhedena vuttaṃ. **Sīmāpīti** khaṇḍasīmāpi. **Na gantabbāti** saṅghassa garukattā na gantabbā. **Etthāti** khaṇḍasīmādīsu. **Tassāti** bhikkhussa. **Gantuṃ vaṭṭatīti** gaṇuposathaṭṭhānato gantuṃ vaṭṭati, saṅghuposathaṭṭhānato pana na vaṭṭatiyevāti daṭṭhabbaṃ. **Vissaṭṭhauposathā** āvāsāpi aññaṃ gantuṃ vaṭṭatīti yojanā. **Āraññakenāpīti** araññe ekakena nivāsenapi. **Tatthāti** aññavihāre. **Uposathanti** saṅghuposathañca gaṇuposathañca.

182. **Yanti** āvāsaṃ. **Tatthāti** taṃ āvāsaṃ. Gantuṃ sakkomi iti jāneyyāti yojanā. **Tatthāti** tasmīm āvāse. Iminā neva katoti sambandho. Neva kato bhavissati iti jāneyyāti yojanā.

105. Vajjanīyapuggalasandassanakathā

183. **Hatthapāsūpagamanamevāti** uposathasaṅghādīnaṃ hatthapāsassa upagamanameva. Idaṃ

pārivāsiyapārisuddhidānaṃ nāma na vaṭṭatīti yojanā. **Tassāti** pārivāsiyapārisuddhidānassa. **Anuposatheti** ettha akārassa aññatthaṃ dassento āha “aññasmim divase”ti. Tattha **aññasminti** dvīhi uposathehi aññasmim. Yā saṅghasāmaggī kariyati, tathārūpinti yojanā. **Kosambakabhikkhūnanti** kosambiyāṃ nivāsīnaṃ bhikkhūnaṃ. Sāmaggī viya yā sāmaggīti yojanā. “Ṭhapetvā”ti iminā **aññatrāti** nipātassa atthaṃ dasseti. **Ye panāti** bhikkhū pana samaggā hontīti sambandho. **Uposatheyevāti** uposathadivaseyeva.

Iti uposathakkhandhakavaṇṇanāya yojanā samattā.

3. Vassūpanāyikakkhandhakaṃ

107. Vassūpanāyikānujānanakathā

184. Vassūpanāyikakkhandhake “ananuññāto”ti iminā **apaññattoti** ettha ñādhātuyā anujānanatthaṃ dasseti, “asaṃvihito”ti iminā ñādhātuyā ṭhapanatthaṃ. **Tedhāti** te idha. **Idhasaddo** sāsanañca lokañca desañca padapūrañca upādāya vattati, idha pana padapūraṇeti dassento āha “idhasaddo nipātamatto”ti. Saṃhananaṃ **saṅghāto**, vināsoti attho. Iti imamatthaṃ dasseti “vināsa”nti iminā. **Sakuntakasaddo** sakuṇapariyāyoti āha “sakuṇā”ti. **Sakuṇāti** ca vihaṅgamā. Te hi ākāse gantuṃ sakkontīti sakuṇāti vuccanti. **Samkasāyissantīti** ettha “saṃ kase acchane”ti dhātupāthesu (saddanītidhātumālāyaṃ 16 sakārantadhātu) vuttattā saṃpubbo kasedhātu acchanatthoti āha “vasissantī”ti. Ekārantoyaṃ dhātu. **Nibaddhavāsanti** niccavāsaṃ. **Vassānanāmaketi** vassānautunāmake. Vassānassa catumāsattā “temāse”ti vuttaṃ. **Vassūpanāyikāti** ettha nīdhātu gamanatthoti āha “vassūpagamanāni”ti. **Aparajjūti** puṇṇamito aparāṃ ahanti aparajju, ahatthe jjuṇṇapaccayo, atthato pāṭipadadivaso. Ayaṃ aparajjusaddo paṭhamantanipāto. **Assāti** āsaḷhīpuṇṇamiyā. Asamānādhikaraṇavisayo bāhiratthasamāsoyaṃ, atikkantāya satiyāti yojanā. **Aparasmim divaseti** pāṭipadadivase. **Assāti** sāvaṇamāsapuṇṇamiyā. **Tasmāti** yasmā ca aparajjugatā, yasmā ca māsagatā, tasmā. “Anantare pāṭipadadivase”ti iminā pāḷiyāṃ aparajjugatāya āsaḷhiyā anantare pāṭipadadivase purimikā upagantabbāti atthaṃ dasseti. **Āsaḷhiyāti** āsaḷhīpuṇṇamiyā. Pacchimanayepi māsagatāya āsaḷhiyā anantare pāṭipadadivase pacchimikā upagantabbāti attho daṭṭhabbo. **Āsaḷhiyāti** āsaḷhīpuṇṇamiyā samīpe pavattattā āsaḷhisaṅkhātāya sāvaṇapuṇṇamiyāti attho. Pāṭipadadivaseyeva vassaṃ upagantabbanti sambandho. **Sakim vāti**ādīsū vāsaddo aniyamavikappattho. **Nicchāretvāti** niccāretvā, uccāretvāti attho. Aphuṭṭhakkharasaññogeḥi paro kvaci phuṭṭhattamāpajjati “nikkhamati”tiādīsū viya. Tasmā parassa cakārassa chakāraṃ katvā “nicchāretvā”ti vuttaṃ.

108. Vassānecārikāpaṭikkhepādikathā

185. **Āpatti veditabbāti** anapekkhagamanena upacārātikame sāpekkhagamanena aññattha aruṇuṭṭhāpane āpatti veditabbā. **Vihāragāṇanāya āpattiyo veditabbāti** ettha vassūpanāyikadivase vassaṃ anupagantukāmatācittena vihāraṃ atikkameyya, vihāragāṇanāya āpattiyo veditabbā. Tamevatthaṃ vitthārento āha “sace hī”tiādi. **Taṃ divasanti** tasmim vassūpagamanadivase. **Sataṃ āpattiyoti** ettha **satanti** saṅkhyāpadhānattā ekavacananti saddasatthesu vuttaṃ. **Ekā eva āpattīti** attano vihārassa atikkamaneyeva ekā eva āpatti. Kenaci antarāyena anupagatenāti sambandho.

Vassanāmo imassatthīti **vassoti** vacanatthaṃ dassento āha “vassanāmaka”nti. “Paṭhamam māsā”nti iminā aññapadassa sarūpaṃ dasseti. **Paṭhamam māsanti** catūsū vassamāsesu paṭhamam māsam. **Ukkaḍḍhitukāmoti** uparī kaḍḍhitukāmo. **Āsaḷhīmāsameva**, na sāvaṇamāsanti attho. **Juṇhasaddo** candapabhāyutto māsoti āha “māse”ti. Candapabhāyutto māsoti āha “māse”ti. Candapabhāyutto hi māso jotati dippatīti **juṇhoti** vuccati. Tasmā “māse”ti sāmāññato vuttepi puṇṇamiyutto māsova gahetabbo. **Kāci parihāni nāmāti** kiñci sīlādīnaṃ hāyanaṃ nāma. **Aññasmimpīti** vassūpagamanato aññasmimpi. **Dhammiketī** dhammena yutte.

109. Sattāhakarāṇīyānujānanakathā

187. Sattāhakarāṇīyesu evaṃ vinicchayo veditabboti yojanā. “Sattāhakarāṇīyenā”ti padassa sattamīsamāsaṅca anīyasaddassa kammattaṅca dassento āha “sattāhabbhantare yaṃ kattabba”nti. Tattha “sattāhabbhantare”ti iminā sattamīsamāsaṃ dasseti, “kattabba”nti iminā kammattaṃ. “Sattāhabbhantare”ti iminā sattāhassa abbhantaraṃ **sattāhanti** uttarapadalopaṃ dasseti. **Pahite gantunti** ettha pahitesaddassa kattukammāni dassetuṃ vuttaṃ “bhikkhuādīhi dūte”ti. Tattha “bhikkhuādīhi”ti iminā kattāraṃ dasseti, “dūte”ti iminā kammaṃ. **Sattāhanti** ettha uttarapadalopaṅca bhummattaṃ upayogavacanaṅca dassento āha “antosattāheyevā”ti. **Tatthevāti** tasmīṃ pahitaṭṭhāneyeva. “Na uṭṭhāpetabbo”ti iminā “sattāheyevā”ti ettha evasaddassa phalaṃ dasseti.

189. Raso etasmīṃ atthīti **rasavatīti** vutte bhattagehaṃ gahetabbanti āha “bhattagehaṃ vuccatī”ti. **Bhattagehanti** bhattapacanaṅgehaṃ. **Purāyaṃ suttantoti** ettha purā ayanti padacchedaṃ katvā purāsaddo yāvapariyāyoti āha “yāva ayaṃ suttanto”ti. Na **palujjatīti** ettha lujadhātu vināsatthoti āha “na vinassatī”ti. **Parisaṅkhatanti** parisaṅkharitabbaṃ. **Sabbatthāti** sabbesu pahitesu. **Imināva kappiyavacanenāti** iminā eva kappiyena tivākyasaṅkhātena vacanena. **Etesanti** etesaṃ tiṇṇaṃ vākyānaṃ. **Vevacanenāti** “yaññaṅca yaḍituṃ, suttaṅca uggaṇhituṃ, samaṇe ca dassitu”nti pariyāyena. **Sattasūti** upāsaka upāsika bhikkhubhikkhunī sikkhamāna sāmaṇera sāmaṇerī saṅkhātāsu sattasu.

110. Pañcannaṃ appahitepi anujānanakathā

193. **Pageva pahiteti** iminā “apahitepi gantabba”nti ettha pisaddassa sambhāvanatthaṃ dasseti. Pañcannaṃ sahadhammikānaṃ santikaṃ gantabbabhāvassa kāraṇaṃ vibhajitvā dassento āha “bhikkhu gilāno hotī”tiādi. **Dasahīti** “saṅho kammaṃ kattukāmo hoti, kataṃ vā saṅghena kammaṃ hotī”ti idaṃ aṅgaṃ ekaṃ katvā dasahi. **Navahīti** parivāsārahaṃ apanetvā navahi. **Catūhīti** gilānaanabhiraṭṭhigatauppannasaṅkhātehi catūhi. Iti imehi chahīti yojanā. **Sāmaṇerassapi chahīti** ettha channaṃ sarūpaṃ vitthāretvā dassento āha “ādito”tiādi. Taṃ suviññeyyameva. **Sāmaṇeriyā** santikaṃ pañcahi gantabbanti yojanā. **Paratoti** parasmā, parasmīṃ vā. Andhakaṭṭhakathāyaṃ vuttanti sambandho. Ye nātākā vā ye aññātākā vā atthi, tesampīti yojanā. **Tanti** vacanaṃ.

112. Pahiteyeva anujānanakathā

199. **Bhikkhugatikoti** bhikkhu eva gati patiṭṭhā etassāti bhikkhugatikoti vutte bhikkhunissitako purisoti āha “bhikkhūhi saddhiṃ vasanakapuriso”ti. **Palujjatīti** vinassati. **Bhaṇḍaṃ chedāpitanti** ettha bhaṇḍasaddo parikkhārattho eva, na mūladhanatthoti āha “dabbasambhārabhaṇḍa”nti. **Chedāpitanti** curādigāṇikadhātuṃ “chindāpita”nti rudhādigāṇikadhātuyā vaṇṇeti. **Dajjāhanti** ekāralopasandhīti āha “dajje aha”nti. “Dajjeha”ntipi pāṭho. Evañhi sati akāralopasandhi. **Dajjeti** dadeyyaṃ, dadāmi vā. **Saṅghakarāṇīyenāti** saṅghassa kātabbena kiccena. Tamatthaṃ dassento āha “yaṃkiñcī”tiādi. Tattha yaṃkiñcī kātabbanti yojanā. **Cetiyachattavedikādīsūti** cetiyassa chatte ca vedikāya ca. Ādisaddena sudhālimpādayo saṅgaṇhāti. **Tassāti** saṅghakarāṇīyassa. Nipphādanatthaṃ gantabbanti sambandho.

Etthāti vassūpanāyikakkhandhake. “Animantitenā”ti padaṃ “gantū”nti pade bhāvakattā. **Gantunti** gamituṃ, gamanaṃ vā “na vaṭṭatī”ti pade kattā. **Paṭhamamevāti** dhammassavanato paṭhamameva. Sannipatitabbaṃ iti katikā katā hotīti yojanā. **Bhaṇḍakanti** cīvarādibhaṇḍakaṃ. **Gantuṃ na vaṭṭatīti** sayameva gantuṃ na vaṭṭatīti attho daṭṭhabbo. Tena vuttaṃ “sace panā”tiādi. **Tatthāti** taṃ vihāraṃ. “Vaṭṭatī”ti iminā vassacchedo ca āpatti ca na hotīti dasseti. **Atthāyapīti** pisaddena “bhaṇḍakaṃ dhovissāmī”ti atthaṃ apekkhati. **Nanti** antevāsikaṃ. **Vaṭṭatīti** ācariyassa āṇāya sattāhe anatikkante vaṭṭati, vassacchedo ca āpatti ca na hoti. Sattāhe atikkante vassacchedova hoti, na āpattīti adhippāyo.

113. Antarāye anāpattivassacchedakathā

201. Avidūreti āsanne. **Tatthā**ti gāme. **Sattāhavārenā**ti sattāhe ekavārena. **Aruṇo uṭṭhāpetabboti** vihāre aruṇo uṭṭhāpetabbo. **Tatrevā**ti gāmeveva. **Mayanti** bhikkhū sandhāya vuttaṃ. Puna **mayanti** manusse sandhāya vuttaṃ. **Tesaṃyevā**ti vassacchedabhikkhūnaṃ eva. **Tanti** salākabhattādiṃ. **Vassaggenā**ti vassagaṇanāya.

Vassāvāsikanti vassāvāsānaṃ dātabbaṃ cīvaram. **Tatthā**ti tasmim vihare. Yesaṃ pāpitaṃ sambandho. **Vihāreti** vuṭṭhitagāma vihāre. Upanikkhattakaṃ bhaṇḍanti sambandho. **Idhā**ti bhikkhuno nivāsaṭṭhāne. Yaṃ cīvarādivebhaṅgiyabhaṇḍaṃ atthi, tanti yojanā. **Tatthevā**ti vuṭṭhitagāma vihāre eva. **Itoti** khetta vatthuādito. Kappiyakārakānaṃ hattheti sambandho. **Tatruppādepī**ti tassa vihārassa dinnakhetta vatthuādito uppāde paccayepi. “Tattheva gantvā apaloketvā bhājetabba”nti vacanassa yuttim dassento āha “saṅghikañhi”tiādi. **Antovihāre vā**ti antosīmāya vā. **Ubhayatthā**ti antosīmabahasīma saṅkhātesu dvīsu ṭhānesu ṭhitaṃ vebhaṅgiyabhaṇḍanti sambandho.

114. Saṅghabhede anāpattivassacchedakathā

202. **Bhinnoti** ettha tapaccayassa atītatthe ayuttabhāvaṃ dassento āha “bhinne saṅghe karaṇīyaṃ natthi”ti. **Yo panā**ti saṅgho pana. Idaṃ “bhijjissati”tipade kattā, “āsankito”tipade kammaṃ. “Bhijjissati”ti iminā **bhinnoti** ettha tapaccayassa anāgatathe pavattabhāvaṃ dasseti. **Bhikkhunīhi saṅgho bhinnoti** ettha kiṃ bhikkhunīhi saṅgho bhinnoti daṭṭhabboti āha “na bhikkhunīhi saṅgho bhinnoti daṭṭhabbo”ti. **Etanti** bhikkhunīhi abhinnabhāvaṃ. **Etā panā**ti bhikkhuniyo pana. **Tanti** saṅghaṃ. **Etanti** “sambahulāhi bhikkhunīhi saṅgho bhinno”ti vacanaṃ.

115. Vajādīsu vassūpagamanakathā

203. “Gopālakānaṃ nivāsaṭṭhāna”nti iminā gopālakā gāvo viya vaje nivasantīti dasseti.

Upakaṭṭhasaddo āsannapariyāyoti āha “āsannāyā”ti. **Tatthā**ti kuṭikāyaṃ. **Idhā**ti imissaṃ kuṭikāyaṃ. Avihārattā “idhā”ti sāmāññavasena vuttaṃ. **Tikkhattunti** idaṃ ukkaṭṭhavasena vuttaṃ. Heṭṭhā hi “sakiṃ vā dvikkhattuṃ vā tikkhattuṃ vā”ti (mahāva. aṭṭha. 184) vuttattā sakimpi vaṭṭatīti daṭṭhabbaṃ. **Tampī**ti sālāsankhepena ṭhitasakaṭṭampi. “Ālayo”ti iminā “idha vassaṃ upemī”ti vacībhedo na kātabboti dasseti. **Ālayoti** ca satthe “idha vassaṃ vasissāmī”ti cittassa allīyaṃ. **Maggapaṭipanneveva sattheti** anādare bhummavacanaṃ. **Tatthevā**ti sattheyeva. Sattho atikkamatīti sambandho. **Tatthā**ti patthitaṭṭhāne. **Vippakiratī**ti visuṃ visuṃ gacchati. Sace agāmake ṭhāne vippakirati, purimaṃ gāmaṃ sannivattitabbaṃ. Na aññagāmaṃ gantabbaṃ. **Tatoti** gāmato.

Upagantabbanti “idha vassaṃ upemī”ti tikkhattuṃ vatvā upagantabbaṃ. **Tatthevā**ti samuddeveva. **Kūlanti** tīraṃ. Tañhi kulati udakaṃ āvaratīti **kūlanti** vuccati. **Ayañcā**ti nāvāyaṃ vassūpagamanabhikkhu. **Anuṭīramevā**ti anukkamena, anusārena vā tīrameva. **Aññatthā**ti paṭhamaladdhagāmato aññasmim ṭhāne. **Tatthevā**ti paṭhamaladdhagāmeveva.

Itītiādi nigamanaṃ. **Pavāretuñca labhatī**ti ettha casaddo vākyasampiṇḍanattho. **Purimesu ca panā**ti ettha casaddo byatirekattho, panasaddo visesatthajotako. **Anāpatti hotī**ti anāpattimattameva hoti.

116. Vassaṃ anupagantabbaṭṭhānakathā

204. **Rukkhasusīreyevā**ti rukkhasa vivare eva. Vivarañhi su saṃ irati gacchatīti **susīroti** vuccati. **Padaracchadananti** phalakehi chāditaṃ. **Pavisanadvāranti** pavisananikkhamanadvāraṃ. Pavisanañca nikkhamanañca **pavisananti** virūpekasesena kātabbaṃ. **Khāṇumatthaketi** khāṇuno upari. **Viṭabhī**ti

viṭaṃ aññaṃaññavedhanaṃ apati gacchatīti viṭapo, pakāssa bhakāraṃ, itthilingajotakaīpaccayañca katvā viṭabhīti vuccati. **Tatthāti** aṭṭake. **Yassāti** bhikkhuno, natthīti sambandho. **Pañcannaṃ chadanānanti** tiṇapaṇṇaiṭṭhakāsīlāsudhāsankhātānaṃ (cūḷava. 303) pañcannaṃ chadanānaṃ. Idañca yebhuyyavasena vuttaṃ padaracchadanādīnampi gahitattā. **Dvārabandhananti** dvārena bandhitabbaṃ. **Chavakuṭikāti** chavānaṃ sayanaṭṭhāne susāne katā kuṭikā chavakuṭikāti vuccati. **Ṭaṅkitamañcādīti**ādisaddena ṭaṅkitapīṭhaṃ saṅgaṇhāti. **Tatthāti** chavakuṭiyaṃ. **Aññaṃ kuṭikanti** chavakuṭito aññaṃ kuṭikaṃ. **Āvaraṇanti** bhittim. **Dvāranti** pavisananikkhamaṇadvāraṃ. **Chattakuṭikā nāmesāti** esā chattaṇa katā kuṭikā nāma. Mahantena kapallena kuṭikaṃ katvāti sambandho.

117. Adhammikakatikākathā

205. Aññāpīti “antarāvassaṃ na pabbājetabba”nti katikāya aññāpī. Katikā hotīti sambandho. **Tassāti** adhammikakatikāya. **Vuttanti** catutthapārājikavaṇṇanāyaṃ (pārā. aṭṭha. 2.226) vuttaṃ.

118. Paṭissavadukkaṭāpattikathā

207. Paṭissave āpatti dukkaṭassāti ettha kiṃ vassāvāsapaṭissuteyeva dukkaṭāpatti hotīti āha “na kevala”ntiādi. **Etassevāti** vassāvāsasseva. **Evamādināpīti** pisaddo “paṭissave”ti ettha yojetabbo. “Paṭissavepī”ti hi attho. **Tassa tassāti** kammaṃ. **Taṅca khoti** taṅca dukkaṭaṃ viṣaṃvādanapaccayā hotīti yojanā. **Paṭhamampīti** pisaddo “pacchāpī”ti padaṃ sampiṇḍeti. Paṭhamampi hi pācittiyaṃ, pacchāpī dukkaṭanti attho.

So tadaheva akaraṇīyotiādisu evaṃ vinicchayo veditabboti yojanā. **Purimikā ca na paññāyatīti** ettha pure bhavā purimā, sā eva purimikā, pāṭipadatīhī. Nānāsīmāya dvīsu āvāsesu vassaṃ upagacchantassa dutiye “vasissāmī”ti paṭhamāvāsassa upacārato nikkhantamatte paṭhamasenāsanaggāhassa passambhanaṃ sandhāya vuttaṃ “purimikā ca na paññāyatī”ti. **Aruṇaṃ anuṭṭhāpetvāti** vassaṃ upagamanavihāre aruṇaṃ anuṭṭhāpetvā. **Tadahevāti** tasmim vassūpagamanaahani eva, pakkantassāpīti sambandho. **Pisaddassa** garahatthaṃ dassento āha “ko pana vādo”tiādi. **Ālayoti** cittassa allīyanaṃ. **Asatiyāti** satipamuṭṭhena. **Vassaṃ na upeti**ti “imasim vihāre imaṃ temāsaṃ vassaṃ upemī”ti (mahāva. aṭṭha. 184) vacībhedaṃ katvā vassaṃ na upeti.

Sattāhanti sattāhena, anāgatāyāti sambandho. **Navamīti**ti pubbakattikamāsassa juṅhapakkhanavamīti, pacchimakkattikamāsassa juṅhapakkhanavamīti vā. **Mā vā āgacchatu, anāpattīti** vassaṃvutthattā mā vā āgacchatu, anāpattīti attho.

Iti vassūpanāyikakkhandhakavaṇṇanāya yojanā samattā.

4. Pavāraṇākkhandhakaṃ

120. Aphāsukavīhārakathā

209. Pavāraṇākkhandhake **allāpoti** ettha ātyūpasaggassa ādikammaṭṭhaṃ, lapadhātuyā ca kathanatthaṃ dassento āha “paṭhamavacana”nti. Ādīto, ādīmhi vā lapaṇaṃ kathanāṃ, lapati anenāti vā **allāpo** saṃyoge pare rasso. Saṃ puna lapaṇaṃ, lapati vā anenāti **sallāpo**. **Hatthavīlaṅghakenāti** ettha vipubbo laghidhātu ukkhipanattoti āha “hatthukkhepakenā”ti. **Pasusaṃvāsanti** ettha **pasūti** sabbacatuppadā. Te hi aññaṃaññaṃ pasanti bādhanti, manussādīhi vā pasīyanti bādhīyantīti pasavoti vuccanti. **Pasūnaṃ viya saṃvāsanti** pasūnaṃ saṃvāso viya saṃvāsoti **pasusaṃvāso**, taṃ pasusaṃvāsaṃ. Tamatthaṃ vitthārento āha “pasavopi hī”tiādi. **Tathāti** yathā na karonti, tathāti attho. **Etepi**ti bhikkhavopi. **Tasmāti** yasmā akaṃsu, tasmā. **Nesanti** bhikkhūnaṃ. **Sabbatthāti** sabbesu

eḷakasaṃvāsasapattasaṃvāsesu. **Mūgabbatanti** mūgassa vataṃ viya vatanti mūgabbataṃ, suññavacanavatanti attho. **Titthiyasamādānanti** titthiyehi samādātappaṃ. **Vatasamādānanti** samādātappaṃ vataṃ. **Aññamaññānulomatāti** ettha tāsaddassa bhāvatthaṃ dassento āha “anulomabhāvo”ti. Iminā “devatā”tiādīsu (saṃ. ni. aṭṭha. 1.1.1; khu. pā. aṭṭha. 5.evamiccādīpāṭhavaṇṇanā; su. ni. aṭṭha. 2.aṅgalasuttavaṇṇanā) viya tāpaccayassa svatthaṃ “janatā”tiādīsu (pe. va. aṭṭha. 460) viya samūhatthañca nivatteti. “Aññamaññaṃ vattu”nti vacanassa yuttim dassento āha “vadantu ma”ntiādi. Vadantaṃ bhikkhuṃ vattunti yojanā. “Āpattīhi vuṭṭhānabhāvo”ti iminā **āpattivuṭṭhānatāti** padassa pañcamīsamaññaṃ tāpaccayassa bhāvatthañca dasseti. “Vinaya”ntiādinā purato katvā karaṇaṃ **purekkhāro**, tassa bhāvo **purekkhāratā**, vinayaṃ purekkhāratā **vinayapurekkhāratāti** vacanattaṃ dasseti. Ettha purasaddassa ekāratam saddasatthesu (moggallānabyākaraṇe 5.134 sutte) vadanti. Tassa yuttim dassento āha “vadantuma”ntiādi (moggallānabyākaraṇe 5.134 sutte).

210. Sabbasaṅgāhikāti “saṅgho pavāreyyā”ti sāmāññato vuttatā sabbesaṃ tevācīkādinam saṅgāhikā. **Ñattīti** ñāpeti saṅghaṃ etāya vacanāyāti ñatti. Sabbasaṅgāhikabhāvaṃ vitthārento āha “evañhi vutte”tiādi. **Tevācīkanti** tisso vācā etassāti tevācīkaṃ, tīhi vācāhi kattabbanti vā tevācīkaṃ. Eseva nayo sesesupi. **Samānavassikanti** samānaṃ vassaṃ etesanti samānavassā, tehi kattabbanti samānavassikaṃ. **Aññanti** dvevācīkaekavācīkaṃ.

211. Acchantīti ettha āsadhātuyā upavesanattaṃ dassento āha “nisinnāva hontī”ti. “Na utṭhahantī”ti iminā evaphalaṃ dasseti. **Tadamantarāti** ettha “tadantarā”ti vattabbe vācāsiliṭṭhavasena makārāgamaṃ katvā vuttanti āha “tadantarā”ti. Tassa attano pavāritakālassa antarā. “**Yāva pavārentī**”ti padassa niyamattaṃ dassetuṃ vuttaṃ “tāvatakaṃ kāla”nti. **Yāvāti** nipātassa payogattā “tadamantarā”ti ettha abhividhiavadhyatthe pañcamīvibhatti hotīti daṭṭhabbaṃ.

121. Pavāraṇābhedaḥkathā

212. Cātuddasikāyāti bhaṇḍanakāraḥkehi upaddutattā paccukkaḍḍhitāya pubbakattikamāsassa kāḷapakkhacātuddasikāya. “Ajja pavāraṇā pannarasī”ti pubbakiccaṃ kātabbanti yojanā.

Pavāraṇākammesūti niddhāraṇe bhummaṃ, “adhammena vaggam pavāraṇākamma”ntiādīsu sambandhitappaṃ. **Adhammena vagganti** ettha **adhammaṃ** nāma saṅgho hutvāpi saṅghapavāraṇamakattvā gaṇapavāraṇāya karaṇaṃ, gaṇo hutvāpi gaṇapavāraṇamakattvā saṅghapavāraṇāya karaṇaṃ. Vaggam nāma ekasīmāyaṃ vasantānampi sabbesaṃ ekato asannipatanaṃ.

Adhammena samagganti ettha adhammaṃ vuttanayameva. **Samaggam** nāma sabbesaṃ ekato sannipatanaṃ.

Dhammena vagganti ettha **dhammaṃ** nāma saṅgho hutvā saṅghapavāraṇāya karaṇaṃ, gaṇo hutvā gaṇapavāraṇāya karaṇaṃ. **Vaggam** vuttanayameva. **Dhammena samaggam** suviññeyyameva. **Itisaddo** parisamāpanattho.

213. Evaṃ dinnāyāti evaṃ pāliyaṃ vuttanayeneva dinnāya. **Pavāretabbanti** vassaṃvutthapavāraṇāya pavāretappaṃ. **Tissoti** tissanāmako. Diṭṭhena vā vadatūti sambandho. **Tanti** tissanāmakaṃ bhikkhuṃ. Saṅgho anukampaṃ upādāya vadatūti yojanā. **Vuḍḍhataroti** pavāraṇādāyako taṃhārakato vuḍḍhataro. **Hīti** laddhagaṇo. **Tenāti** pavāraṇāhāraḥkena. **Tassāti** pavāraṇādāyakassa.

Idhāpi cāti imasmiṃ pavāraṇākkhandhakepi ca. Apisaddo uposathakkhandhakaṃ apekkhati. **Avasesakammattāyāti** pavāraṇākammato avasesānaṃ kammānamattāya hotīti sambandho. Pavāraṇāya āhaṭāya satiyāti yojanā. **Tassa cāti** pavāraṇādāyakassa ca. **Sabbesanti** pavāraṇādāyakassa ca saṅghassa cāti sabbesaṃ. **Aññaṃ pana kammanti** pavāraṇākammato aññaṃ kammaṃ pana. **Tena**

pana bhikkhunāti pavāraṇādāyakena bhikkhunā pana. Ettha ca tadahupavāraṇāya attano ca saṅghassa ca sace pavāraṇākammameva hoti, pavāraṇāyeva dātabbā. Atha aññameva kammaṃ hoti, chandoyeva dātabbo. Yadi pavāraṇākammaṃca aññakammaṃca hoti, pavāraṇā ca chando ca dātabbo. Taṃ sandhāya vuttaṃ “tadahu pavāraṇāya pavāraṇaṃ dentena chandampi dātu”nti (mahāva. 213). **Tenā**ti dānāhetunā.

218. Ajja me pavāraṇāti ettha pāḷinayato aññaṃ aṭṭhakathānayaṃ dassento āha “sace”tiādi.

219. Vuttanayamevāti uposathakkhandhake (mahāva. aṭṭha. 169) vuttanayameva.

222. Puna pavāretabbanti ettha na kevalaṃ pavāraṇāyeva puna kātabbā, pubbakiccādīnipi puna kātabbānti dassento āha “puna pubbakicca”ntiādi.

228. Eseva nayoti “ajja pavāraṇā pannarasi”ti pubbakiccaṃ atidisati. **Assā**ti vacanassa. **Ñattinti** “suṇātu me bhante saṅgho ajja pavāraṇā”ti ñattim. **Pacchimehī**ti pacchimavassaṃ upagatehi bhikkhūhi. **Uposathaggeti** uposathassa gaṇhanaṭṭhāne gehe. **Dve ñattiyoti** pavāraṇāñatti ca uposathañatti cāti dve ñattiyō. **Idañcāti** idaṃ vakkhamānaṃ pana. **Etthāti** purimikapacchimikabhikkhūnaṃ saṃsaggaṭṭhāne. **Purimikāya upagatehī**ti vibhattaapādānaṃ anumeyyavisayaapādānaṃ, thokatarāti sambandho, sahādiyogo vā, samasamāti sambandho. **Samasamāti** samena, samato vā samā samasamā, atirekasamāti attho. Kiñci ūnaṃ vā adhikaṃ vā natthīti adhippāyo. **Itī**ti idaṃ lakkhaṇaṃ.

Soti pacchimiko bhikkhu. **Itarenāti** pacchimikena. **Tesanti** purimikānaṃ. **Ekenāti** purimikena. **Ekassāti** pacchimikassa. Puna **ekenāti** pacchimikena. “Ekassā”ti anuvattetabbo, purimikassāti attho. Purimavassūpagatehi adhikatarāti sambandho. **Thokatarehī**ti pacchimavassūpagatehi thokatarehi purimavassūpagatehīti yojanā.

Kattikāyāti pacchimakattikāya. **Cātumāsiniyā pavāraṇāyāti** catunnaṃ māsānaṃ pūraṇiyā pavāraṇāya. **Pavāraṇāñattim ṭhapetvāti** samasamā hutvāpi pavāraṇādivasattā pavāraṇāñattim ṭhapetvā. **Tehī**ti pacchimikehi. **Itarehī**ti purimikehi. **Tesanti** pacchimikānaṃ. **Thokatarā vāti** ekādinā thokatarā vā. **Tesanti** purimikānaṃ. **Tehī**ti pacchimikehi.

233. Saṅghasāmaggiyāti ettha kīdisī saṅghasāmaggī veditabbāti āha “kosambakasāmaggīsadisāva veditabbā”ti. **Etthāti** sāmaggīpavāraṇāyaṃ. **Appamattaketi** pattacīvarādiṃ paṭicca uppanne appamattake vivāde. **Pavāraṇāyamevāti** pavāraṇādivaseyeva. Kasmim divase sāmaggīpavāraṇā kātabbāti āha “sāmaggīpavāraṇa”ntiādi. **Paṭhamapavāraṇanti** pubbakattikapuṇṇamim. **Yāva kattikacātumāsini puṇṇamāti** ayaṃ avadhi anabhivīdhiavadhi nāma. Kasmā? Kattikacātumāsini puṇṇamim ṭhapetvā antoyeva gahetabbatā. **Etthantareti** etasmim dvinnam puṇṇaminamantare aṭṭhavīsati pamāṇe divase kātabbā. **Tatoti** etthantarasaṅkhātā aṭṭhavīsadivasato.

140. Dvēcīkāḍipavāraṇākathā

234. Ñattim ṭhapentenāpīti pisaddo na kevalaṃ pavārentena eva dvevācikaṃ pavāretabbaṃ, atha kho ñattim ṭhapentenāpi dvevācikañattiyeva ṭhapetabbāti dasseti. **Ettha cāti** “samānavassikaṃ pavāretu”nti pāṭhe ca. **Samānavassikāti** gaṇanavasena samānaṃ vassaṃ etesanti samānavassikā, samāne vasse upasampādenti vā samānavassikā. **Ekatotī** ekasmim khaṇe, ekapahārena vā.

141. Pavāraṇāṭṭhapanakathā

236. Sabbaṃ saṅgaṇhātīti sabbasaṅgāhikaṃ. Puggalassa ṭhapanam **puggalikaṃ. Tatthāti** dvīsu

pavāraṇāṭṭhapanesu. Sabbasaṅgāhike ṭhapitā hotīti sambandho. Yāva rekāro atthi, tāvāti yojanā. Bhāsiyitthāti **bhāsītā**. Lapiyitthāti **lapitā**. Na pariyoṣiyitthāti **apariyoṣītā**. **Etthantareti** etasmiṃ sukārarekārānaṃ antare. **Ekapadeṭṭi** **pisaddo** ekakkhareṭṭi atthaṃ sampiṇḍeti. **Ṭhapitāti** “suṇātu me bhante saṅgho, itthannāmo puggalo sāpattiko, tassa pavāraṇaṃ ṭhapemī”ti ṇattiyā ṭhapitā. **Yyakāreti** “pavāreyyā”ti ettha yyakāre. **Tatoti** yyakāro. Puggalikaṭṭhapanē pana aṭṭhapitā hotīti sambandho. **Samkāratoti** “saṅghaṃ bhante”ti ettha samkāro. **Sabbapacchimoti** tīsu vāresu tatiyavāre sabbesaṃ akkharānaṃ pacchimo ṭikāro atthīti yojanā. **Etthantareti** etasmiṃ samkāraṭṭikārānaṃ antare. **Tasmāti** yasmā pariyoṣitā hoti, tasmā. “Eseva nayo”ti vuttavacanaṃ vitthārento āha “etāsūpi hī”tiādī. Tattha **etāsūṭṭi** dvevācikaekavācikasamānavassikāsūpi. Pisaddo tevācikaṃapekkhati. **Ṭhapanakhetanti** ṭhapanassa bhūmi. **Itisaddo** parisamāpanattho.

237. Anuyūñjyamānoti ettha anuyūñjasaddo pucchanatthoti āha “pucchiyamāno”ti. **Paratoti** parasmimyeva khandhaketī (mahāva. 237) attho. **Alaṃ bhikkhu mā bhaṇḍanantiādīnīti** ettha ādisaddena “mā kalahaṃ, mā vivāda”ntivacanāni saṅgaṇhāti, vacanāni vatvā omadditvāti yojanā. **Vacanomaddanāti** vacaneneva omaddanā. **Hīti** saccam. **Idhāti** imasmiṃ pavāraṇāṭṭhapanatthāne. **Anuddhaṃsitam paṭijānātīti** ettha paṭijānanākāraṃ dassento āha “amūlakena pārājikena anuddhaṃsito ayaṃ mayā”ti. “Liṅganāsānyā”ti iminā daṇḍakammaṇāsanaṃvāsanaṃvāsānāni nivatteti.

238. Etanti “asukā āpattī”ti vacanaṃ. **Kalahassa mukhanti** kalahassa upāyo.

143. Vatthuṭṭhapanādīkathā

239. Corā agamaṃsu kirāti sambandho. Pokkharaṇito nīharitvāti sambandho. **Soti** bhikkhu, evamāhāti sambandho. **Vutthenāti** vasantena, yena kenaci katanti sambandho. **Taṃ puggalanti** vatthukataṃ taṃ puggalaṃ. **Etthāti** “vatthum ṭhapetvā saṅgho pavāreyyā”ti pāṭhe. Iminā vatthunā apadisāhīti sambandho. **Nanti** puggalaṃ. **Anuvijjivāti** anuyūñjitvā, pucchitvāti attho.

Eko bhikkhu pūjesi, pivīti sambandho. **Tassāti** bhikkhussa. **Tadanurūpoti** tesam pūjanapivanānaṃ anurūpo. **Soti** codako bhikkhu. **Taṃ gandhanti** taṃ sarīragandhaṃ. Yaṃ puggalanti yojanā. **Ṭhapesīti** pavāraṇāya ṭhapesi. **Ayamassāti** ayaṃ doso assa puggalassa.

Idāneva nanti ettha “na”nti padaṃ “puggala”nti padena yojetabbaṃ. Naṃ puggalanti hi attho. **Ubhayanti** vatthuṅca puggalañcāti ubhayaṃ. **Kallaṃ vacanāyāti** yuttaṃ kathetum. Kasmā kallaṃ vacanāyāti yojanā. Pavāraṇato pubbe, pacchā cāti sambandho. Iti tasmā kallaṃ vacanāyāti yojanā. **Idaṅhi ubhayanti** vatthupuggalasaṅkhātāṃ idameva ubhayaṃ. Pavāraṇāya pubbeti yojanā. **Ukkoṭṭentassāti** cālentassa.

144. Bhaṇḍanakāraṅkavattukathā

240. Catutthapañcamāti chasu pakkhesu poṭṭhapādamāsassa juṅhapakkhakālapakkhasaṅkhātā catutthapañcamā. **Tatiyoti** sāvaṇamāsassa kālapakkho tatiyo. **Tatiyacatutthapañcamā vāti** ettha **tatiyoti** sāvaṇamāsassa kālapakkho. **Catutthoti** poṭṭhapādamāsassa juṅhapakkho. **Pañcamoti** tasseva kālapakkho. “Tatiya...pe... pañcamā vā”ti padāni “dve vā tayo vā”ti padehi yathākkamaṃ yojetabbāni. **Catutthe vā kateti** catutthapakke vā pannarasibhāvena kate. **Dve cātuddasikāti** tatiyapakke ca cātuddasiyā saddhiṃ dve cātuddasikā. **Imeti** bhaṇḍanakāraṅkā. **Teti** bhaṇḍanakāraṅkā.

Asaṃvihitāti ettha akāraṃsa virahatthaṃ dassento āha “saṃvidahanavirahitā”ti. Tattha **saṃvidahanavirahitāti** saṃvidahanarakkhavirahitā. **Āgamanajānanatthāyāti** bhaṇḍanakāraṅkānaṃ āgamanassa jānanatthāya. **Kilantatthāti** tumhe kilantā bhavatha. “Sammoḥam katvā”ti iminā **vikkhitvāti** padassa vikkhepaṃ katvāti atthaṃ dasseti. **No ce labhethāti** ettha kimatthāya na labhethāti

āha “bahisīmaṃ gantu”nti. “Bhaṇḍanakāraḱānaṃ...pe... hontī”ti iminā alabhanassa kāraṇaṃ dasseti. **Yanti** āgamaṃ juṇhaṃ. **Komudiyā cātumāsiniyāti** pacchimakattikapuṇṇamāyaṃ. Sā hi kumudānamatthitāya komudī, catunnaṃ vassikānaṃ māsānaṃ pūraṇattā cātumāsiniṭi vuccati. Tadā hi kumudāni supupphitāni honti, tasmā kumudānaṃ samūhā, kumudāni eva vā **komudā**, te ettha atthīti **komudīti** vuccati, kumudavatīti vuttaṃ hoti. **Avassaṃ pavāretabbanti** dhuvaṃ pavāretabbaṃ. **Hīti** saccaṃ, yasmā vā. **Tanti** komudiṃ cātumāsiniṃ.

145. Pavāraṇāsaṅgahakathā

241. Aññataro phāsuvihāroti ettha phāsuvihāro nāma koti āha “taruṇasamatho vā taruṇavipassanā vā”ti. Iminā taruṇasamathavipassanā phāsuṃ viharati anenāti **phāsuvihāroti** dasseti. **Paribāhirā bhavissāmāti** ettha kasmā imamahā phāsuvihārā paribāhirā bhavissantīti āha “anibaddharattiṭṭhānadivāṭṭhānādibhāvenā”tiādi. Tattha **anibaddharattiṭṭhānadivāṭṭhānādibhāvenāti** anibaddhadivāṭṭhānādibhāvena hetubhūtena, asakkontāti sambandho. Ādisaddena anibaddhacaṅkamādayo saṅgaṇhāti. “Chandadānaṃ paṭikkhipatī”ti iminā “sabbeheva ekajjhaṃ sannipatitabba”nti vākyassa aññatthāpohanaṃ dasseti. **Hīti** saccaṃ, yasmā vā. Imesu tīsu chandadānaṃ na vaṭṭati, tasmā paṭikkhipatīti yojanā. Ayaṃ pavāraṇāsaṅgaho nāma na dātāboti yojanā. Taruṇasamathavipassanālābhī ekapuggalo vā hotūti yojanā. “Ekassapi dātābboye vā”ti iminā ayaṃ pavāraṇāsaṅgaho ekassa dinnopi sabbesaṃ dinno hotūti dasseti. Pavāraṇāsaṅgahe dinne satīti yojanā. **Āgantukāti** satṭhivassāpi āgantukā. **Tesanti** dinnapavāraṇāsaṅgahānaṃ. **Antarāpīti** komudiyā cātumāsiniyā antarāpi.

Iti pavāraṇākkhandhakavaṇṇanāya yojanā samattā.

5. Cammakkhandaṃ

147. Soṇakoḷivisavattukathā

242. Cammakkhandhake issariyādhipaccanti ettha issarassa bhāvo **issariyaṃ**, adhipatino bhāvo **ādhipaccaṃ**, issariyañca ādhipaccañca, tehi samannāgataṃ issariyādhipaccanti atthaṃ dassento āha “issarabhāvena ca adhipatibhāvena ca samannāgata”nti. “Rājabhāva”nti iminā **rajjanti** ettha rañño bhāvo rajjanti vacanatthaṃ dasseti. “Raññā kattābakkicca”nti iminā rañño idaṃ **rajjanti** vacanatthaṃ dasseti. “Koḷivīsoti gotta”nti idaṃ aṭṭhakathāvādasena vuttaṃ, apadāne pana tassa jātakkaṇe pitarā koṭivīsadhanassa dinnattā “koḷivīso nāmā”ti vuttaṃ. Vuttañhi tattha

“Jātaputtassa me sutvā, pitu chando ayaṃ ahu;
Dadāmaṃ kumārassa, vīsakoṭi anūnakā”ti.

Iminā pālīnayaena “koṭivīso”ti vattabbe “cakkavāḷa”ntiādisu viya ṭakārassa ḷakāraṃ katvā **koḷivīsoti** vuttanti daṭṭhabbaṃ. **Añjanavaṇṇānti** añjanassa vaṇṇo viya vaṇṇo etesanti añjanavaṇṇāni. Lomāni jātāni hontīti sambandho. **Soti** soṇo. Ṭhapesi kirāti sambandho. **Tehīti** asītisahassapurisehi. **Paṇṇasālanti** paṇṇena chāditaṃ, tena ca parikkhittaṃ sālaṃ. **Uṇṇapāvāraṇanti** uṇṇamayam uttarāsaṅgaṃ. **Pādapuñchanikanti** pādamaṃ puñchati sodheti anenāti pādapuñchaniyaṃ, tadeva pādapuñchanikaṃ. **Sabbevāti** soṇena saha asītisahassapurisā eva. **Tassa cāti** soṇassa ca. **Pubbayogoti** pubbūpāyo.

Asītīgāmikasahassānti ettha gāmesu vasantīti gāmikā, tesam asītisahassāni asītīgāmikasahassānti atthaṃ dassento āha “tesū”tiādi. Tattha “kulaputtāna”nti iminā vasantiyatthe pavattassa ṇikapaccayassa sarūpaṃ dasseti. “Asītisahassāni”ti iminā saddantaropi asītisahassasaddānaṃ samāsabhāvaṃ dasseti. **Kenacidevāti** ettha “kenaci ivā”ti padavibhāgaṃ katvā dakāro padasandhimatto, ivasaddo upamatthoti āha “kenaci karaṇiyena viyā”ti. Atha vā “na panā”tiādinā evaphalassa dassittā “kenaci evā”ti

padacchedaṃ katvā evatthopi yujjatevāti daṭṭhabbaṃ. **Assāti** bimbisārarañño. **Tassāti** soṇassa. Dassanāya aññatra kiñci karaṇīyaṃ na atthīti yojanā. **Rājāti** bimbisāro rājā, sannipātāpesīti sambandho. **Diṭṭhadhammike attheti** ettha diṭṭhadhammasaddo idhalokattho, ikasaddo hitatthe pavattoti āha “idhalokahite”ti. “Amhāka”nti iminā “**so no bhagavā**”ti ettha nosaddo amhasaddakāriyoti dasseti. Amhākaṃ so bhagavāti yojanā. **Samparāyiketi** paralokahite.

“Jānāpemi”ti iminā “**paṭivedemi**”ti ettha vidadhātuyā nānattamaṃ dasseti. **Paṭikāya nimujjivāti** ettha paṭikāsaddo aḍḍhendupāsānavācakoti āha “aḍḍhacandapāsāne”ti. So hi paṭati aḍḍhabhāvaṃ gacchatīti **paṭikāti** vuccati. Paṭikāsaddo yaṃ attharaṇavisesepi vattati. **Yassa dānīti** ettha yasaddassa visayaṃ dassento āha “tesaṃ hitakaraṇīyatthassa”ti. Iminā ayaṃ yaṃsaddo na taṃsaddāpekkhoti dasseti. Atha vā **yassāti** yo assa. Assa tesaṃ hitakaraṇīyatthassa yo kālo atthi, taṃ kālaṃ bhagavā jānātīti yojanā. **Tesanti** asītigāmikasahassānaṃ. **Pacchāyāyanti** ettha pakāro paccantatthavācakoti āha “vihārapaccante chāyāya”nti. **Sammanāharantīti** saṃ punappunaṃ manasāgataṃ abhimukhaṃ harantīti atthamaṃ dassento āha “punappunaṃ manasikarontī”ti. “Pasādavasena”ti iminā “kodhavasena”tiādīni paṭikkhipati. “Puna visiṭṭhatara”nti iminā **bhiyyoso mattāyāti** nipātassa atthamaṃ dasseti.

Soṇassa pabbajjākathā

243. “Makkhito”ti iminā phurati vipphāraṇi byāpetīti **phuṭoti** vutte phuradhātuyā vipphāraṇaṃ nāma makkhitatthoti dasseti. **Yatthāti** yasmiṃ thāne. Iminā gāvo āhananti etthāti **gavāghātananti** atthamaṃ dassabhi. **Tantissareti** tantiyā guṇassa sare. **Vādanakusaloti** vādane kusalo. **Kharamucchitāti** kharena mucchitā. “Sarasampannā”ti iminā saro etissamatthīti **saravati**, vīṇāti dasseti. **Kammaññāti** ettha kammaṃsaddato khamatthe ñāpaccayoti āha “kammakkhamā”ti. **Mandamucchanāti** mandena mucchanā. **Same guṇeti** ettha **samo** nāma majjhimo, **guṇo** nāma mukhyato vīṇāya jiyā, upacārato saroti āha “majjhime sare”ti. **Vīriyasamathanti** ettha vīriyañca samatho cāti atthamaṃ paṭikkhipanto āha “vīriyasampayuttaṃ samatha”nti. Iminā vīriyena sampayuttaṃ samathaṃ **vīriyasamathanti** dasseti. “Vīriyaṃ samathena yojehi”ti iminā vīriyena samathaṃ yojehīti atthopi dassitoti daṭṭhabbaṃ. **Indriyānañca samatanti** ettha saddhādīni pañcindriyāneva gahetabbāni, na aññānīti dassento āha “saddhādīnaṃ indriyāna”nti. “Samabhāva”nti iminā tāpaccayo bhāvatthe hotīti dasseti. **Tatthāti** “indriyānaṃ samata”ntipāṭhe, saddhādīsu indriyesu vā. **Tattha ca nimittaṃ gaṇhāhīti** ettha bhāvenabhāvalakkhaṇe thapaccayo hotīti āha “tasmiṃ samathe sati”ti. Ādāse sati mukhabimbena kattubhūtena uppajjitabbaṃ iva, tasmiṃ samathe sati yena nimittena kattubhūtena uppajjitabanti yojanā. Samathassa nimittaṃ **samathanimittaṃ**, indriyānaṃ samabhāvo. Eseva nayo sesesupi. Samathanimittādīni cattāri ekasesena vā sāmāññaniddesena vā “nimitta”nti vuccati.

244. **Aññaṃ byākareyyanti** ettha aññaṃ byākaraṇto attānaṃ “arahā aha”nti jānāpetīti āha “arahā aha”nti jānāpeyya”nti. **Cha thānānīti** ettha thānasaddo kāraṇatthoti āha “cha kāraṇāni”ti. “Paṭivijjhivā”tiādīnā **adhimuttoti** padassa adhippāyatthamaṃ dasseti. Saddattho pana adhimuccatīti **adhimuttoti** daṭṭhabbo. Arahattaṃ vuccatīti sambandho. **Hīti** vitthāro. **Asammohotīti** ettha ākāratthavācako **itisaddo** pubbapadesupi yojetvā “nekkhamaṃ iti vuccatī”tiādīnā yojanā kātabbā.

“Paṭivedharahita”nti iminā **kevalaṃ saddhāmattakanti** ettha mattasaddassa nivattetabbatthamaṃ dasseti. **Paṭivedhapaññāyāti** maggapaññāya. “Asammissa”nti iminā kevalasaddassa asammissatthamaṃ dasseti. **Paṭicayanti** ettha paṭisaddo anupacchinnattho, cidhātu vaḍḍhanatthoti āha “punappunaṃ karaṇena vaḍḍhi”nti, maggapaṭivedhena vītarāgattāyevāti sambandho. **Tanninnamānasoyevāti** tasmiṃ phalasaṃpattivihāre ninnamānaso eva.

Lābhasakkārasilokanti ettha labhanaṃ **lābho**, suṭṭhu karaṇaṃ **sakkāro**, silokanaṃ vaṇṇabhaṇanaṃ **siloko**, lābho ca sakkāro ca siloko ca lābhasakkārasilokanti atthamaṃ dassento āha “catupaccayaḷābhañcā”tiādī. **Tesaṃyevāti** catunnaṃ paccayānameva. “Sīlañca vatañcā”ti iminā

sīlabbatantipadassa dvandavākyam dasseti.

Bhusasaddassa kaliṅgarattham paṭikkhipanto āha “balavanto”ti “khīṇāsavassā”ti iminā **nevassāti** ettha tasaddassa visayam dasseti. “Gahetvā”ti iminā **pariyādiyantīti** ettha paripubbaāpubbadādhātuyā gahaṇattham dasseti. **Hīti** saccam. Kilesā karontīti sambandho. **Tesanti** kilesānam. **Āneñjappattanti** ettha iñjanam kampanam iñjam, na iñjam aneñjam, tameva āneñjam, tam pattanti āneñjappattanti attham dassento āha “acalanappatta”nti. **Vayañcāti** casaddo avuttasampiṇḍanathoti āha “vayampi uppādampī”ti.

Upādānakkhayassāti ettha upādānakkhayam adhimuttassāti dassento āha “upayogatthe sāmivacana”nti. “Uppādañca vayañcā”ti iminā **āyatanuppādanti** ettha uppādasaddena vayopi avinābhāvato gahettabboti dasseti. **Sammāti** nipāto ñāyatthoti āha “hetunā nayenā”ti. **Santacittassāti** ettha santasaddassa khedādīsupi pavattattā idha nibbutatthe vattatīti āha “nibbutacittassā”ti. **Anunayapaṭighehīti** anu punappunam ārammaṇe cittam netīti **anunayo**, rāgo, ārammaṇe paṭihaññatīti **paṭigho**, doso, anunayo ca paṭigho ca anunayapaṭighā, tehi. Itthe anunayo, anitthe paṭigho hotīti sambandho daṭṭhabbo.

148. Diguṇādiupāhanapaṭikkhepakathā

245. Aññam byākarontīti ettha aññasaddo sabbanāmasuddhanāmavasena duvidho. Tesu idha suddhanāmaṃ, tam pana bāle ca dārake ca arahatte ca pavattati, idha pana arahatteti dassento āha “arahattam byākarontī”ti. **Yenāti** sabhāvena. **Arahāti ñāyatīti** arahāiti attho ñāyati. **Soti** sabhāvo. **Suttavaṇṇanātoyevāti** ānguttaraṭṭhakathāto eva. **Na upanītoti** na upari nīto. **Ekacce moghapurisāti** ekaccesaddo aññepariyāyo, moghasaddo tucchavevacanoti āha “aññe pana tucchapurisā”ti. “Hasamānā viyā”ti iminā **hasamānakam maññeti** ettha maññesaddo viyatthoti dasseti. **Asantamevāti** avijjamānaṃyeva. **Ekapalāsikanti** ettha palāsasaddo paṇṇavācako. Paṭalam nāma paṇṇam viya hoti, tasmā “ekapaṭala”nti vuttam. **Asītisakaṭavāheti** ettha asīti padaṃ sakaṭapadena sambandham katvā asītisakaṭehi vahitabbeti attho daṭṭhabbo. “Dve sakaṭabhārā eko vāho”ti iminā vāhanam cattālīsabhāvaṃ dasseti. **Sattahatthikañca anīkanti** ettha anīkassa sarūpaṃ dassento āha “cha hatthiniyo cā”tiādi. Sattanam hatthīnam samūho **sattahatthikam**. Sattaanīkattā ekūnapaññāsahatthino honti. Tesu satta hatthino, dvācattālīsa hatthiniyo honti. **Dviguṇāti** ettha guṇasaddo paṭalatthoti āha “dvipaṭalā”ti. **Guṇaṅguṇūpāhanāti** ettha dviguṇatiguṇānam visum gahitattā pārisesato guṇaṅguṇabhāvaṃ dassento āha “catupaṭalato paṭṭhāya vuccatī”ti. **Guṇaṅguṇūpāhanāti** paṭalapaṭalā upāhanā, bahupaṭalā upāhanāti attho. Ukārena saha yojetvā gākāro sajjhāyitabbo ca likhitabbo ca. Idāni potthakesu pana ukāro na dissati.

149. Sabbanīlikādipaṭikkhepakathā

246. Sabbāva nīlikāti sabbāva upāhanāyo nīlikā, sabbatthānesu nīlametāsanti **sabbanīlikāti**pi kātabbo. **Tattha cāti** tesu nīlikādīsu ca. Ummārapupphassa vaṇṇo viya vaṇṇo etissāti **ummārapupphavaṇṇā**. Evaṃ sesesupi. **Addāriṭṭhakavaṇṇāti** ettha **addoti** allo. **Ariṭṭhoti** pheṇilarukkho vā kāko vā, tasmā addo allo ariṭṭho pheṇilarukkho, kāko vāti addāriṭṭho, tadeva addāriṭṭhako, addāriṭṭhakassa vaṇṇo viya vaṇṇo etissāti addāriṭṭhakavaṇṇā. **Etāsūti** sabbanīlikādīsu. **Puñchitvāti** parimajjitvā. **Appamattakenāpīti** pisaddo sambhāvane. Sabbanīlādike bhinne kā nāma kathāti attho.

“Yāsam vaddhāyeva nīlā”ti iminā nīlakā vaddhikā etāsanti **nīlakavaddhikāti** chaṭṭhībāhiratthasamāsam dasseti. **Vaddhikāti** ca naddhi. Sā hi upāhanatalato vaddhayatīti vaddhikāti ca upāhanatalam bandhati imāyāti vaddhikāti ca vuccati. **Sabbatthāti** sabbesu pītakavaddhikādīsu. **Etāyopīti** nīlakavaddhikādīkā upāhanāyopi. **Taleti** upāhanāya tale. “Khallakam bandhitvā”ti iminā khallakena bandhitabbāti **khallakabaddhāti** vacanattham dasseti. **Yonakaupāhanāti** yonakajātīnam

manussānaṃ upāhanā. **Paliguṇṭhetvāti** parisamantato veṭhetvā. “Upari...pe... jaṅgha”nti iminā puṭābaddhato visesaṃ dasseti. **Tūlapicunāti** tūlasaṅkhātena picunā. “Tittirapattasadisā”ti iminā tittirassa pattama viya **tittirapattikāti** vacanattama dasseti. **Tittiroti** ca eko sakuṇaviseso. **Kaṇṇikaṭṭhāneti** dvinnama vaddhikānaṃ ekato samāgamaṭṭhāne. “Meṇḍa...pe... katā”ti iminā meṇḍassa visāṇena sadisā vaddhikā etāsanti **meṇḍavisāṇavaddhikāti** vacanattama dasseti. **Tathevāti** yathā meṇḍaajasiṅgasaṅghāne vaddhe yojetvā katā, tathevāti attho. “Vicchikā...pe... katā”ti iminā vicchikāya aḷo **vicchikālo**, so viya vaddhikā etāsanti **vicchikālikāti** vacanattama dasseti. Aḷasaddo “aḷacchinno”tiādīsu (mahāva. 119) aṅguṭṭhavācako, idha pana naṅguṭṭhavācako, tasmā vuttaṃ “naṅguṭṭhasaṅghāne”ti. **Talesūti** upāhanāya talesu. “Mora...pe... sabbikā”ti iminā morapiṇchehi parisamantato, parikkhipivā vā sabbitā **morapiṇchaparissabbitāti** vacanattama dasseti. **Citrā upāhanāyoti** ettha citrasaddo vicitrattthoti āha “vicitrā”ti. **Etāsūti** khallakabaddhādīsu. **Vaḷaṅjetabbāti** paribhuṅḡjitabbā. Vaḷaji paribhogeti dhātupāṭho (saddanītidhātumālāyaṃ 15 jakārantadhātu). Tālujo tatiyo. **Tesu panāti** khallakādīsu pana. **Sati** santesūti yojanā. Sīhacammaena parikkhipitabbāti **sīhacammaparikkhatāti** vacanattama dassento āha “pariyantesū”tiādī. **Pakkhibiḷāloti** tuliyo. So hi pakkhayuttattā ca biḷālamukhasadisamukhattā ca pakkhibiḷāloti vuccati. Iminā **luvakacammaparikkhatāti** ettha luvakasaddo pakkhibiḷālapariyāyoti dasseti. “Ulūkacammaparikkhatā”tipi pāṭho. **Etāsupīti** sīhacammaparikkhatādīsūpi. Yā kāci upāhanāyoti sambandho.

247. **Omukkanti** ettha avatyūpasaggassa viyogatthama dassento āha “paṭimuṅcivā apanīta”nti. Purāṇama guṇaṅguṇupāhananti attho.

151. Ajjhārāme upāhanapaṭikkhepakathā

248. “Yena sippenā”tiādīnā abhi adhikaṃ jīvanti anenāti **abhijīvanama**, kiṃtaṃ? Sippanti atthama dasseti. **Tassāti** sippassa. **Idhāti** imasmim sāsane. Yaṃsaddo vacanavipallāsoti āha “ye tumhe”ti. **Hīti** saccama. **Yaṃnipātoti** yaṃiti nipāto yadisaddassa atthe pavattatīti yojanā. **Ācariyā evāti** evasaddena ācariyamattabhāvaṃ paṭikkhipati. **Hīti** saccama. **Soti** avassiko. **Tanti** chabbassaṃ. **Nissāya vacchatīti** avassikkassa catuvassakāle chabbassassa dasavassikkattā taṃ nissāya vasati. Upajjhāyamattama dassento āha “upajjhāyassā”tiādī. **Mahantatarāti** attano vuḍḍhatarā. Upajjhāyassa mattama pamāṇametesanti **upajjhāyamattā**.

249. Pādato nikkhantena khīlasadisena maṃsena pavatto ābādho **pādakhilābādhoti** vacanattama dassento āha “pādato”tiādī. Pādato nikkhantanti sambandho.

251. **Tiṇapādukāti**tiādīsu tiṇena katā pādukā tiṇapādukāti vacanattādiṃ dassento āha “yena kenaci tiṇenā”tiādī. Taṃ suviññeyyameva. “Bhūmiyaṃ suppatitṭhitāti”ādinā na saṅkamitabbāti **asaṅkamanīyāti** atthama dasseti.

252. **Aṅgajātenevāti** attano aṅgajātena eva. **Aṅgajātanti** gāvīnaṃ aṅgajātaṃ. **Ogāhetvāti** ettha otyūpasaggo daḷhatthoti āha “daḷhaṃ gahetvā”ti.

153. Yānādipaṭikkhepakathā

253. **Itthiyuttanāti** ettha rūḷivasena dhenupi itthī nāmāti āha “dhenuyuttanā”ti. **Purisantarenāti** ettha puriso eva antaro añño etthāti **purisantarama** yānaṃ. Purisantarō nāma atthato sārathīti āha “purisasārathinā”ti, yānenāti yojanā. **Gaṅgāmahiyāyāti** ettha gaṅgā ca mahī ca gaṅgāmahī, tattha kīḷikā gaṅgāmahiyāti atthama dassento āha “gaṅgāmahīkīḷikāyā”ti. Tattha hi itthipurisā yānehi udakakīḷama kīḷanti. **Purisyuttama hatthavaṭṭakanti** ettha “anujānāmi bhikkhave purisyuttaṅca hatthavaṭṭakaṅcā”ti dassento āha “etthā”tiādī. Tattha **purisyuttanti** purisena yujjitabbanti purisyuttama yānaṃ. **Hatthavaṭṭakanti** hatthena vaṭṭetabbanti hatthavaṭṭakama yānaṃ. **Yānugghātenāti**

yānassa ullaṅghitvā gamanena. Hanadhātu hi gatyattho. Tamattham dassento āha “yānam abhiruhantassā”tiādi. “Tappaccayā”ti iminā yānuggahātenāti ettha hetvatthe karaṇavacananti dasseti. **Pīṭhakasivikanti** pīṭhena saha kataṃ sivikaṃ. **Paṭapoṭalikanti** paṭamayam poṭalikaṃ.

154. Uccāsayanamahāsayanapaṭikkhepakathā

254. Uccam āsayanam **uccāsayanam**. Mahantam āsayanam **mahāsayanam**. Āsandiādīsu evam vinicchayo veditabboti yojanā. **Pamāṇātikkantāsananti** dīghāsanam. Tañhi āgamma sadati nisīdatīti ettha, āyatham vā suṭṭhum dadātīti **āsandīti** vuccati. **Vālarūpānīti** sīhabyagghādivālarūpāni. Pādesu vālarūpāni paricchinditvā ankīyati lakkhīyatīti **pallaṅko**. **Gonakoti** gavati dīghalomēhi uggacchati etthāti gonako. **Kojavoti** kuyam bhūmiyam javati gacchati kojavo. **Tassāti** gonakassa. Lomāni caturaṅgulādhikāni honti kirāti yojanā. **Vānacitrauṇṇāmayattharaṇoti** vānena sibbanena sañjātam citrarūpametthāti vānacitram, uṇṇāya nibbatto **uṇṇāmayo**, soyeva attharaṇo uṇṇāmayattharaṇo, vānacitraṅca tam uṇṇāmayattharaṇo ceti vānacitrauṇṇāmayattharaṇo. **Setattharaṇoti** setatthikehi sevīyatīti soto, soyeva attharaṇo setattharaṇo. Iminā atthena paṭati setabhāvam gacchati **paṭikāti** kātabbam. Paṭikāsaddoyam aḍḍhendupāsāṇepi pavattati. **Ghanapupphakoti** ghanam kathinam pupphametthāti ghanapupphako. Iminā ghanapupphasaṅkhātam paṭalamettha atthāti **paṭalikāti** dasseti. **Soti** attharaṇo. **Āmalakapaṭoti** āmalakapuppham dassetvā kato paṭo. **Tūlikāti** tūlam pūretvā katā tūlikā. **Vikatikāti** sīhabyagghādirūpehi (dī. ni. aṭṭha. 1.15) vicittākārena karīyatīti vikatikā. **Dīghanikāyatthakathāyam** “uddalomīti ubhatodasam uṇṇāmayattharaṇam. **Ekantalomīti** ekatodasam uṇṇāmayattharaṇa”nti vuttam. Idha pana “uddalomīti ekato uggatalomam uṇṇāmayattharaṇam, **ekantalomīti** ubhato uggatalomam uṇṇāmayattharaṇa”nti vuttam. Tasmā dve aṭṭhakathāyo aññamaññaṃ visadisā honti. Ettha dīghanikāyatthakathāyena vacanattham karissāmi. Utṭhitam dvīhi pakkhehi, dvīsu vā dasāsāṅkhātam lomametthāti **uddalomī**. Niggahitāgamam katvā “undalomī”tipi pāṭho, ayamevattho. Ekasmim ante dasāsāṅkhātam lomametthāti **ekantalomīti**. **Koseyyakaṭṭissamayanti** ettha **koseyyanti** kosiyaṣuttam. **Kaṭṭissanti** kaṭṭissanāmakam vākam. Iminā koseyyaṅca kaṭṭissaṅca **kaṭṭissānīti** virūpekasesam katvā kaṭṭissehi pakatam attharaṇam kaṭṭissanti attham dasseti. **Suddhakoseyyanti** ratanaaparisiḍḍitam suddhakoseyyam. Iminā suddhakaṭṭissampi vaṭṭatīti dasseti.

Soḷasa nāṭakitthiyo ṭhatvā naccam karonti etthāti **kuttakanti** attham dassento āha “soḷasanna”ntiādi. **Ajinacammehīti** ajinamigacammehi, kataiti sambandho. **Paveṇīti** dupaṭṭatipattādīhi paramparavasena katattā “paveṇī”ti vuccati. Ajinacammāni hi sukhumatarāni, tasmā dupaṭṭatipattādīni katvā paveṇivasena katāni. Tasmā vuttam “ajinapaveṇī”ti. “Kadalimigacammam nāmā”ti iminā tassa cammam kadalimigaiti gahetabbam uttarapadalopavasena vā upacārena vāti dasseti. **Pavarasaddo** uttamatthoti āha “uttamapaccattharaṇa”nti. **Tanti** kadalimigapavarapaccattharaṇam. **Sauttaracchadanti** ettha sakāro sahasaddakāriyoti dassento āha “saha uttaracchadenā”ti. “Upaṇī”ti iminā uttarasaddassa seṭṭhādayo nivatteti. “Saddhi”nti iminā sahasaddassa tulyattham nivatteti. “Seta...pe... na vaṭṭatī”ti iminā rattavitānam heṭṭhā kappiyapaccattharaṇe satipi na vaṭṭatīti dasseti. Kasmā? Rattavitānassa akappiyattā. **Ubhatolohitakūpadhānanti** ettha ubhasarūpam dassetum vuttam “sīsūpadhānaṅca pādūpadhānaṅcā”ti. Sīso upagantvā tiṭṭhati etthāti **upadhānam**, upa bhusam vā sukham dhāretīti **upadhānam**, bibbohanam. Sace pamāṇayuttam, tam upadhānam vaṭṭatīti yojanā.

155. Sabbacammaṭikkhepādikathā

255. **Dīpipotakoti** dīpipoto viyāti dīpipotako vaccho. **Bhittidaṇḍakādīsūti** bhittisambandhesu daṇḍakādīsū. Ādisaddena bhittithambhādayo saṅgaṇhāti.

256. Yo na sakkoti anupāhano gāmam pavisitum, so gilāno nāmāti yojanā.

157. Soṇakuṭikaṇṇavatthukathā

257. Etenāti “kuraraghare”ti pāthēna. **Assāti** mahākaccānassa. **Papātanāmaketi** yasmā mahātaṭo ettha atthi, tasmā papātanāmako hoti. **Etenāti** “papātake pabbate”ti pāthēna. **Assāti** mahākaccānassa. Koṭiagghanakam piḷandhanam kaṇṇe etassatthīti **kuṭikaṇṇoti** vacanattham dassento āha “koṭiagghanakam panā”tiādi. Piḷandhati anenāti **piḷandhanam**, alaṅkāro. Dantaṭo catutthakkharo. “Pasādanaka”nti iminā pasādam janētīti **pāsādikoti** vacanattham dasseti. **Pasādanīyanti** pasāditabbam, pasādītuṃ arahanti attho. **Atthavacananti** attho vuccati anenāti atthavacanam. Pāḷiyam idāni potthakesu “pasādanīya”nti pātho natthi. “Pāsādika”ntipadassa pubbe “dassanīya”nti pāthoyeva atthi. **Uttamadamathasamathantiettha** damathasaddassa nāṇatthañca indriyasamvaratthañca samathasaddassa samādhātthañca cittūpasamatthañca dassento āha “uttamam damathañcā”tiādi. Casaddena dvandavākyam dasseti. **Visūkāyikavipphanditānanti** visūkāya paṭipakkhāya pavattānam dīṭṭhicittasāṅkhātānam vividhacalanānam. “Vīriyindriya”nti iminā **yatindriyanti** ettha **yatasaddo** vīriyavācakoti dasseti. **Nāganti** ettha natthi āgu pāpametassāti nāgoti vacanattham dassento āha “āguvirahita”nti kiṃ divasato paṭṭhāyāti āha “mama pabbajjādivasato paṭṭhāyā”ti. Kaṇhā mattikā uttari etthāti **kaṇhuttarāti** attham dassento āha “kaṇhamattikuttarā”ti. “Upārī”ti iminā uttarasaddassa attham dasseti. “Gunnam khurehī”ti iminā gunnam khurakaṇṭakasadisattā **gokaṇṭakā** nāmāti dasseti. Te gokaṇṭake rakkhitunti sambandho. Evaṃ kharā bhūmi hotīti yojanā. **Etehīti** eragūādīhi catūhi tiṇehi. **Tanti** eragūtiṇam. **Tenāti** moragūtiṇena. Jantussa vaṇṇoti sambandho. **Senāsanam paññapesīti** ettha kiṃ nāma senāsanam paññapesīti āha “bhisim vā kaṭasārakam vā paññapesī”ti. Paññapetvā ca pana soṇassa ārocesi. Kiṃ ārocesi āha “āvuso”tiādi. Sathā vasitukāmoti sambandho.

258. “Tassa soṇassā”ti iminā **paṭibhātu tanti** ettha “ta”ntipadam sāmyatthe upayogavacananti dasseti. **Tanti** tava. **Aṭṭhakavaggikānīti** aṭṭhapamāṇo, aṭṭhasamūho vā vaggio etesanti aṭṭhakavaggikāni. Kāmasuttādīni (su. nī. 772 ādayo) soḷasa suttāni. **Yoti** puggalo, samannāgatoti sambandho. **Ariyopīti** pisaddo na kevalam sucisamannāgatoyeva pāpe na ramati, atha kho ariyopīti dasseti. “Paṭibhātu ta”nti pāthato yāva “sucīti vutta”nti pāthā kesuciyeva aṭṭhakathāpotthakesu atthi. **Ayam khvassāti** ettha **assasaddo** ākhyātoti āha “bhavyeyā”ti. **Paridassesīti** pañca varāni paricchinditvā dassesi. Yam vacanam me upajjhāyo jānāpeti, tassa vacanassa ayam kālo bhavyeyāti yojanā.

259. Vinayadharapañcamenāti ettha upajjhāyapañcamenāti attham paṭikkhipanto āha “anussāvanācariyapañcamenā”ti. **Upāhanakosakoti** upāhanāya pakkhipanokāso kosako. Eḷakammaajacammesu akappiyam nāma natthi. Migacamme pana kiñci vaṭṭati, na kiñci vaṭṭati. Tam vibhajitvā dassento āha “migacamme”tiādi. **Etesamīyevāti** eṇimigādīnam channameva. **Aññesam panāti** chahi migehi avasesānam pana. Tesam cammam na vaṭṭatīti sambandho.

Gāthāyam makkaṭo ca kāḷasīho ca sarabho ca kadalimigo ca keci ye vāḷamigā atthi, te cāti yojanā. **Tesanti** makkaṭādīnam.

Tatthāti gāthāya, makkaṭādīsū vā. “Sīhabyagghaachataracchā”ti iminā vāḷamigānam sarūpaṃ dasseti. Ettakāyeva vāḷamigāti āha “na kevala”ntiādi. **Etesamīyevāti** sīhabyagghaachataracchānameva. Na cammam na vaṭṭatīti sambandho. **Yesanti** channam eṇimigādīnam. **Teti** cha eṇimigādike. **Hi** saccam sabbesam etesam vāḷamigānam cammam na vaṭṭatīti yojanā. **Āharitvā vā na dinnanti** āharitvā vā hatthe vā pādāmūle vā ṭhapetvā na dinnam. “Gaṇanam na upeti”ti iminā gaṇanam upagacchatīti **gaṇanūpaganti** attham dasseti. **Adhiṭṭhitañcāti** adhiṭṭhitam pana. **Yadāti** yasmim kāle. **Tatoti** kālato.

Iti cammakhandhakavaṇṇanāya yojanā samattā.

6. Bhesajjakkhandhakam

160. Pañcabhesajjādīkathā

260. Bhesajjakkhandhake saradakāle uppanno **sāradīkoti** attham dassento āha “saradakāle

uppannā”ti. “Pittābādhenā”ti iminā ābādhassa sarūpaṃ dasseti. Pittābādhassa kāraṇaṃ vitthārento āha “tasmim̐ hī”tiādi. **Tenāti** hetunā. **Tesanti** bhikkhūnaṃ. **Koṭṭhabbhantaragatanti** koṭṭhassa abbhantaraṃ gatam̐. Antassa anto pavisaṇaṃ hotīti adhippāyo. **Āhāratthanti** āhārassa kiccaṃ, āhārena vā kattabbaṃ kiccaṃ.

261. Nacchādenti tāni bhesajjāni bhojanāni nacchādenti. Kasmā? Bhojanānaṃ ajjānaṭṭā. Iti imamatthaṃ dassento āha “na jīraṇṭī”ti. Nacchādattā na vātarogaṃ paṭippassambhetuṃ sakkonti. Ettha ca “na jīraṇṭī”ti iminā nacchādanassa kāraṇaṃ dasseti. “Na vāta...pe... sakkontī”ti iminā tasseva phalaṃ dassetiṭi daṭṭhabbaṃ. “Siniddhānī”ti iminā sinihantīti **senehikānīti** atthaṃ dasseti. **Bhattacchannakenāti** ettha bhattassa acchannakaṃ nāma bhattassa arocikaṃ bhattassa ruciyaṃ anuppādakanti āha “bhattārocakenā”ti.

262. Acchavasantiādīsu vinicchayo veditabboti yojanā. Pāḷiyaṃ “paṭiggahitaṃ nippakkaṃ saṃsaṭṭha”nti padānaṃ kiriyāvisesanaṃ katvā “paribhuñjitu”nti padena sambandhitabbabhāvaṃ dassetuṃ vuttaṃ “kāle paṭiggahitanti ādīsū”tiādi. **Telaparibhogena paribhuñjitunti** ettha kittakaṃ kālaṃ telaparibhogena paribhuñjitabbanti āha “sattāhakāla”nti.

161. Mūlādibhesajjakathā

263. Mūlabhesajjādivinicchayopīti pisaddo acchavasantiādīsu vinicchayaṃ apekkhati. **Idhāti** bhesajjakhandhake. **Yaṃ yanti** vinicchayaṃ. **Pisanasilāti** pisati etthāti **pisanā**, sāyeva silāti pisanasilā. Iminā acalaṃ hutvā nisīdatīti **nisadoti** atthaṃ dasseti. **Pisanapotakoti** pisati anenāti pisano, soyeva potakoti pisanapotako, iminā nisadato potakoti **nisadapotakoti** atthaṃ dasseti. **Hiṅgujātiyoti** hiṅgukulāni.

Sāmuddanti ettha samudde santiṭṭhatīti sāmuddanti vacanatthaṃ dassento āha “samuddatīre”tiādi. “Tīre”ti iminā samuddeti ettha sattaṃvibhattiyā samīpatthe pavattabhāvaṃ dasseti. **Pakatiḷoṇanti** sabhāvaloṇaṃ, na dabbasambhārehi saddhiṃ pacitanti attho. “Pabbate uṭṭhahatī”ti iminā sindhunāmake pabbate uṭṭhahatīti **sindhavanti** atthaṃ dasseti. Ubbito bhūmito īrati uggacchatīti **ubbiranti** vacanatthaṃ dassento āha “bhūmito aṅkuraṃ uṭṭhahatī”ti. Iminā aṭṭhakathānayaena oṭṭhajo tatiyakkharoyeva yujjati, potthakesu pana catutthakkharoyeva dissati. “Ubbhida”ntipi pāṭho. **Bilanti** koṭṭhāso. Tasmā dabbasambhārehi bilehi saddhiṃ pacitaṃ bilanti atthaṃ dassento āha “dabbasambhārehi saddhiṃ pacita”nti. Abhidhāne pana (abhidhāne 461 gāthāyaṃ) “bilāla”nti pāṭho atthi. **Tanti** bilaṃ.

264. Assādīnaṃ kāyagandho viya kassaci kāyagandho hotīti yojanā. **Tassāpīti** bhikkhunopi. Pisaddena kaṇḍuvābādhabhikkhūādayopi sampiṇḍeti. Chakaṇasaddassa assādīnaṃ malepi pavattanato vuttaṃ “gomaya”nti. **Pākatikacuṇṇampīti** apakkarajanacuṇṇampi. **Etampīti** pākatikacuṇṇampi.

Tanti āmakamaṃsaṃ, na khādīti sambandho. **Tanti** āmakalohitaṃ vā, na pivīti sambandho. **Amanussoti** manussasadiṣo bhūto. **Tanti** āmakamaṃsalohitaṃ.

265. “Añjana”nti nāmaṃ sāmāññanti āha “añjananti sabbasaṅgāhakavacanameta”nti. **Sabbasaṅgāhakavacananti** sabbesaṃ añjanānaṃ saṅgāhakavacanāṃ. **Etanti** “añjana”nti etaṃ vacanaṃ. Añjati cakkhuṃ makkheti anenāti **añjanaṃ**, añjati cakkhuṃ byattaṃ karotīti vā **añjanaṃ**, tālujo tatiyakkharo. **Kapallanti** kapalle pavattaṃ. Kapālāñhi dīpasikhāya upari nikujjivā tattha pavattaṃ masi “kapalla”nti vuccati. Tamatthaṃ dassento āha “dīpasikhato gahitamasī”ti. **Añjanūpapisanehīti** ettha añjanehi saddhiṃ upanetuṃ pisitabbanti añjanūpapisananti vacanatthaṃ dassento āha “añjanena saddhiṃ ekato pisitehī”ti. “Ekato”ti iminā “saddhi”nti padasseva atthaṃ dasseti. **Hīti** saccaṃ. Yaṃkiñci añjanūpapisaṇaṃ cuṇṇaṃ na na vaṭṭatīti yojanā. Atha vā na vaṭṭati na hoti, vaṭṭatīyevāti yojanā. Imasmim̐ naye “na vaṭṭatī”ti ākhyātapadaṃ kiriyāntarāpekkhattā kattā hoti. Ākhyātesupi hi kattuttañca kammattañca labbhati. **Candananti**ādīni suviññeyyāneva.

Aṭṭhimayanti padassa atibyāpitadosaṃ paṭikkhipanto āha “manussaṭṭhiṃ ṭhapetvā”ti. **Salākaṭṭhāniyanti** ettha salākā tiṭṭhanti etthāti salākaṭṭhāniyanti vacanattaṃ dassento āha “yatthā”tiādi. Tattha **yatthāti** yasmim̐ susiradaṇḍakādike. **Salākanti** añjanisalākaṃ. **Odahantīti** ṭhapenti. **Aṃsabaddhakoti** aṃse baddhati anenāti aṃsabaddhako. **Yamakanatthukaraṇi**ti natthu kariyati imāyāti natthukaraṇī, yamakā natthukaraṇī yamakanatthukaraṇī.

267. Taṃ sabbam̐ telapākanti sambandho. “Ati viya khittamajjānī”ti iminā ati viya khipiyanti pakkhipiyantīti atikhittāni, tāniyeva majjāni atikhittamajjānīti vacanattaṃ dasseti.

Paṇṇasedanti paṇṇehi sedaṃ. **Āngārānanti** āngārehi. **Tatthāti** tesu paṃsuvālikādīsu. **Vātaharaṇapaṇṇānīti** vātassa apanayanāni uddālādīni paṇṇāni. **Tatthāti** tesu paṇṇesu. **Nānāpaṇṇabhaṅgakuthitanti** nānāpaṇṇāniyeva bhañjitabbaṭṭhena nānāpaṇṇabhaṅgaṃ, tena kuthitaṃ nānāpaṇṇabhaṅgakuthitaṃ. **Uṇhodakassāti** uṇhodakena. **Tatthāti** udakakoṭṭhake.

Pabbe pabbeti phaḷumhi phaḷumhi. **Yenāti** pajjena. Taṃ pajjaṃ abhisānkaritunti yojanā. “Pādānaṃ sappāyabhesajja”nti iminā pādassa hitaṃ pajjanti vacanattaṃ dasseti. **Tilakakkenāti** ettha kakkasaddassa cuṇṇavācakattā “piṭṭhehi”ti vuttaṃ. Kabaḷena pakkhipanaṃ **kabaḷikaṃ**. Sattupiṇḍassa bhattakabaḷasadisattā **sattupiṇḍanti** vuttaṃ. **Āṇi viyāti** khīlā viya. **Khārenāti** loṇasakkharikamayena khārena. Vikāsaṃ rundhatīti **vikāsikaṃ**, telarundhanapilotikaṃ. **Vaṇakammanti** vaṇassa, vaṇe vā kammaṃ.

268. Sappadaṭṭhakāleyeva kiṃ sāmam̐ gahetvā paribhuñjitabbanti āha “na kevala”ntiādi. **Idanti** mahāvikaṭam̐, paribhuñjikabbanti sambandho. **Aññesu panāti** sappadaṭṭhato aññesu pana. Sace bhūmipatto gūtho hoti, paṭiggahetabboti yojanā.

269. **Vasīkaraṇapānakasamuṭṭhitarogoti** kantibhāvasaṅkhātaṃ vasaṃ karoti anenāti vasīkaraṇam̐, bhesajjaṃ, pivate pānam̐, taṃyeva pānakaṃ, vasīkaraṇassa pānakaṃ vasīkaraṇapānakaṃ, tena samuṭṭhito rogo vasīkaraṇapānakasamuṭṭhitarogo. Iminā **gharadinnakābādhoti** ettha gharāṇiyā dinnena vasīkaraṇapānakena samuṭṭhito ābādho gharadinnakābādhoti vacanattaṃ dasseti. Sītāya āloḷetabbanti **sītāloḷam̐**, udakaṃ. Sītāsaddo naṅgalalekhāsaṅkhātaṃ phālapaddhatim̐ mukhyato vadati, phālapaddhatikare phāle laggamattikaṃ upacārato vadati. Tena vuttaṃ “sītāya āloḷetabba”nti. Aṭṭhakathāyampi tamattaṃ dassento āha “naṅgalenā”tiādi.

Vipakkagahaṇikoti visesena pācāpanagahaṇiko. **Muttaharītakanti** ettha “mutta”nti sāmāññato vuttepi gomuttameva gahetabbanti dassento āha “gomuttaparibhāvitaṃ harītaka”nti. Iminā muttena paribhāvitaṃ harītakaṃ muttaharītakanti vacanattaṃ dasseti. **Taṇḍulakasaṭoti** taṇḍuladhovanodakakasaṭo dhotasiniddho, **sova** muggapacitapāṇiyoti yojanā. “Maṃsarasenā”ti iminā maṃsaraso maṃsena paṭicchādetabbanti **paṭicchādanīyanti** vuccatīti dasseti.

163. Guḷādiānujānanakathā

272. **Hīti** saccam̐. **Pakkattāti** muggānaṃ pakkabhāvato. **Teti** muggā.

274. **Akappiyakuṭiyanti** akappiyakuṭiyā anto. **Assāti** bhikkhuno na vaṭṭatīti sambandho. **Tampīti** uṇhayāgumpi. Pisaddena pageva āmisam̐ pacitunti dasseti. **Uttanḍulabhattanti** pakkatanḍulato viyogoti uttanḍulo, ukāro hi viyogathavācako, apakkatanḍuloti attho. Uttanḍulamayaṃ bhattanti uttanḍulabhattaṃ. Sakim̐ kuthitesu khīratakkādīsu aggim̐ dātum̐ vaṭṭatīti yojanā. Biḷālādīnam̐ sattānam̐ samūho rūḷhīvasena **ukkapiṇḍakoti** vuccatīti āha “biḷālamūsikagodhāmaṅgusā”ti. Vighāsādhāvena nihataṃānattā kāyavācam̐ dametīti **damako** vighāsādoti āha “vighāsādā”ti.

276. Tato nīhaṭanti ettha tasaddassa visayaṃ dassento āha “yatthā”tiādi. **Yatthāti** yasmim̐ ṭhāne. **Nīhaṭanti** nīharitvā haritaṃ.

278. Vanaṭṭhaṃ pokkharatṭhanti ettha vane tiṭṭhatīti **vanaṭṭho**, pokkhare tiṭṭhatīti **pokkharatṭhoti** vacanatthaṃ dassento āha “vane cevā”tiādi. “Paduminigacche”ti iminā pokkharasaddo padumavācakoti dasseti. Yassa bījaṃ ankurāṃ na janeti, taṃ phalaṃ **abījaṃ** nāmāti yojanā.

167. Satthakammapaṭikkhepakathā

279. Dukkheṇa rupatīti **duropayoti** dassento āha “dukkheṇa ruhatī”ti. **Satthakammaṃ vā vatthikammaṃ vāti** ettha satthena kātabbaṃ kammaṃ **satthakammaṃ**, vatthipīḷanaṃ kātabbaṃ kammaṃ **vatthikammanti** vacanatthaṃ dassento āha “yathā paṭicchanne”tiādi. “Sūciyā vā”tiādinā satthakammanti ettha “sattha”nti padaṃ upalakkhaṇamattanti dasseti. “Satthena vā”ti padaṃ “chindanaṃ vā phālanāṃ vā”tipadehi yojetabbāṃ. “Sūciyā vā kaṇṭakena vā sattikāya vā”tipadāni “vijjhaṇaṃ vā”ti padena yojetabbāni. “Pāsāṇasakkhalikāya vā nakhena vā”ti padāni “lekhaṇaṃ vā”ti padena yojetabbāni. **Etanti** satthena chindanādikammaṃ. **Ettha cāti** satthakammavatthikammesu. **Tattha panāti** sambādhe pana. **Tenāti** khārādinā. Vaccamagge yāya bhesajjamakkhitādānavatṭiyā khārakammaṃ vā karonti, yāya veḷunālikāya telaṃ vā pavesenti, sā bhesajjamakkhitādānavatṭi vā sā veḷunālikā vā vaṭṭatiyevāti yojanā.

280. Taṃ divasanti tasmiṃ divase. Kiñci satthanti yojanā. **Imāyāti** suppiyāya aññaṃ kiñci adeyyaṃ kimpī bhavissatīti yojanā. **Yatra nāmāti** ettha trapaccayo kāraṇatthe hotīti āha “yasmā nāmā”ti. “Vīmaṃsī”ti iminā **paṭivekkhīti** ettha paṭiavapubbo ikkhadhātu vīmaṃsanatthoti dasseti. **Asukamaṃsanti** asukaṃ maṃsaṃ, asukassa vā sattassa maṃsaṃ.

169. Hatthimaṃsādipaṭikkhepakathā

281. Araññakokā nāmāti sasabīlādayo satte khādanatthāya kukati ādadātīti **koko** araññe jāto koko **araññakoko**, **sunakhasadisāti** gāmasunakhena sadisā. **Tesanti** araññakokānaṃ. **Yo panāti** sunakho pana, uppannoti sambandho. **Gāmasunakhiyāti** sāmīyatthe sāmivacanaṃ. **Kokenāti** sahādiyoge karaṇavacanaṃ. Tāni padāni “saṃyogenā”ti padena yojetabbāni. **Tassāti** sunakhassa.

Etthāti manussamaṃsādīsu. **Sajātikatāyāti** samānajātikabhāvato. **Anupaddavatthāyāti** anupaddavatthaṃ, paṭikkhittānīti sambandho. **Āpattīti** manussamaṃse thullaccayena, sese dukkaṭena āpatti. **Uddissa kataṃ panāti** bhikkhuṃ uddissa katamaṃsaṃ pana.

170. Yāgumadhugoḷakādikathā

282. Ekakoti ettha ekato asahāyatthe kapaccayoti āha “natthi me dutiyo”ti. **Soti** brāhmaṇo. **Vayaṃ katvāti** paribbayaṃ katvā, paṭiyādāpesi kirāti yojanā. **Anumodanagāthāyāti** anumodanapakāsakāya gāthāya. “Patthayataṃ icchata”nti padānaṃ alamattapayoge sampadānattā vuttaṃ “alameva dātunti iminā sambandho”ti. **Soyeva gahetabboti** “dātu”ntibhāvassa kattubhāvena so eva pāṭho gahetabboti attho.

283. Yā yāgu pavāraṇaṃ janeti, sā yāgu **bhojjayāgu** nāmāti yojanā. **Yanti** kālaṃ. “Ādiṃ katvā”ti iminā **yadaggenāti** ettha aggasaddo ādyattho kiriyāvisesanatthe karaṇavacanaṃ dasseti. “Sagganibbattakapuñña”nti iminā **saggāti** ettha phalūpacāraṃ dasseti. **Soti** guḷo.

284. Tathārūpenāti tathāsabhāvena. Guḷassa anurūpasabhāvenāti attho.

173. Pāṭaligāmaṅgavattukathā

285. Yathā sabbaṃ santhatāṃ hoti, evaṃ tathā sabbasantharisanthatanti yojanā.

286. Sunidho ca vassakāro cāti ettha cakārehi dvandavākyam dasseti.

Āyamukhapacchindanattanti suṅkamukhassa pacchedanattam. “Gharavattūnī”ti iminā vatthusaddassa kāraṇadabbatthe paṭikkhipitvā bhūbhedattham dīpeti. Tā devatā nāmenti kirāti yojanā. **Yathānurūpanti** yaṃ yaṃ bhogabalānurūpaṃ. **Loketi** sattaloke. **Saddoti** kittighoso. **Tenevāti** tena saddassa abbhuggatahetunā eva. “Osaraṇaṭṭhānaṃ nāmā”ti iminā **ariyaṃ āyatananti** ettha āyatanasaddo samosaraṇaṭṭhānatthoti dasseti. Yattakaṃ kayavikkayaṭṭhānaṃ nāmāti sambandho. “Vāṇijānaṃ...pe... kayavikkayaṭṭhānaṃ nāmā”ti iminā vaṇijā patanti sannipatanti etthāti **vaṇippatoti** vacanattam dasseti. “Vaṇijapato”ti vattabbe jakāralopoti daṭṭhabbo. Pāḷiyam “tesa”nti pāṭhasesassa ajjhāharitabbabhāvaṃ dassetuṃ vuttam “tesam ariyāyatanavāṇijapatāna”nti. **Tesanti** ca sāmīyatthe sāmīvacanaṃ, niddhāraṇatthe vā vibhattaapādānatthe vā. **Idanti** puram. **Puṭabhedananti** ettha puṭam bhindanti etthāti **puṭabhedananti** vacanattam dassento āha “bhaṇḍikabhedanaṭṭhāna”nti. “Samuccayatto vāsaddo”ti vuttavacanaṃ vitthārento āha “tatra hī”tiādi. Tattha **tatrāti** pāṭaliputte, tīsu vā aggiudakamithubhedesu. “Aññaṃaññaṃbheda”ti iminā **mithubhedāti** ettha mithusaddassa aññaṃaññaṃvevacanabhāvaṃ dasseti. Uḷumpakullasaddānaṃ atthe samānepi karaṇavisesam dassento āha “uḷumpa”ntiādi. Uḷu vuccati udakaṃ, tato pāti rakkhatīti **uḷumpo**. Kaṃ vuccati udakaṃ, tasmīṃ ulati gacchatīti **kullo**.

Aṇṇavanti ettha aṇṇavo nāma kiṃ samuddassa nāmanti āha “aṇṇava”ntiādi. “Aṇṇava”nti etaṃ nāmaṃ udakaṭṭhānassa adhivacanaṃ yojanā. Aṇṇo vuccati udakaṃ, taṃ etasmīṃ atthīti **aṇṇavo**. Sarasaddassa akārādīmhi ca kaṇḍe ca pavattanato vuttam “saranti idha nadī adhippetā”ti. **Idhāti** imissaṃ gāthāyaṃ. **Idanti** atthajātaṃ.

Yeti ariyā. **Teti** ariyā, tarantīti sambandho. **Visajjapallalānīti** ettha visajjasaddo tvāpaccayanto, pallalasaddo ninnatṭhānavācakoti āha “visajja...pe... ninnatṭhānānī”ti. Ayaṃ pana jano kullam bandhatīti yojanā. Tiṇṇā medhāvino janā iti vuttam hotīti yojanā.

287. **Ananubodhāti** ettha kāraṇatthe nissakkavacanaṃ āha “abujjhanenā”ti. **Sandhāvitam saṃsaritanti** ettha tapaccayassa kammattham sandhāya vuttam “mayā ca tumhehi cā”ti. Iminā kattutthe sāmīvacanaṃ dasseti. “Atha vā”tiādinā tapaccayassa bhāvattham dasseti. **Saṃsitanti** ettha saradhātuyā rakāro lopoti āha “saṃsarita”nti. “Taṇhārajjū”ti iminā bhavato bhavaṃ neṭīti **bhavanettīti** vacanattama taṇhārajju bhavanetti nāmāti dasseti.

289. Vaṇṇavatthālankārāni sāmāññavasena “nīlā”ti vuttānīti āha “nīlāti idaṃ sabbasaṅgāhaka”nti. **Tatthāti** “nīlā”tiādi pāṭhe. **Tesanti** licchavīnaṃ. Pakativāṇṇā nīlā na hontīti yojanā. **Etanti** “nīlā”tiādivacanaṃ. **Paṭivattesīti** ettha vatudhātu upasaggavasena vā atthātisayavasena vā paharaṇatthoti āha “pahāresi”ti. “Sajanapada”nti iminā **sāhāranti** ettha āhārasaddo janapadatthoti dasseti. Janapado hi yasmā nagarassa parivārabhāvena āharitabbo, imasmā ca rājapurisā baliṃ āharanti, tasmā āhāroti vutto. Sajanapadaṃ vesāliṃ dajjeyyāthāti yojanā. **Āṅgulim phoṭesunti** ettha phuṭadhātu sañcalanattoti āha “āṅgulim cālesu”nti. **Itthikāyāti** itthīyeva purisato khuddakaṭṭhena itthikā, tāya.

178. Sīhasenāpativatthukathā

290. **Dhammassa ca anudhammanti** ettha dhammasaddo kāraṇatthoti āha “kāraṇassa anukāraṇa”nti. “Parehī”ti padaṃ “vutta”iti pade kattā. “Vuttakāraṇenā”tipadaṃ “sakāraṇo”tipade karaṇam. Koci appamattakopi tumhākaṃ vādoti yojanā. “Viññūhī”ti padaṃ “garahitabba”iti pade kattā. “Garahitabbakāraṇa”nti padaṃ “na āgacchatī”ti pade kammaṃ. **Anabbhakkhātukāmāti** ettha abhīyūpasaggo abhibhavanattho āpubbo khādhātu pakathanatthoti āha “abhibhavitvā na

ācikkhitukāmā”ti.

293. Anuviccakāranti ettha anuviccāsaddo vicadhātu tvāpaccayantoti āha “anuvicitvā”ti. “Cintetvā”ti iminā vicadhātuyā nāṇattham dasseti. “Kātabba”nti iminā kātabbanti **kāranti** vacanattam dasseti. **Paṭākanti** dhajapaṭākam. “Āhiṇḍeyyu”nti iminā **pariyāyeyyunti** ettha paripubbaāpubba yādhātuyā gatyattham dasseti. Pāḷiyam “parihareyyu”ntipi pāṭho. **Āhiṇḍeyyunti** āhiṇḍanti. Muddhajo tatiyakkharo. **Opānabhūtanti** ettha opāno viya bhūto opānabhūtoti attham dassento āha “paṭiyattaudapāno viya ṭhita”nti. “Udapāno”ti iminā opānasaddo udapānatthoti dasseti. Udapāno hi sabbe janā osarivā pivanti etthāti **opānoti** vuccati. **Imesanti** nigaṇṭhānam. **Hīti** saccam, yasmā vā. Sampattānam dānam dātabbameva, tasmā mā upacchinditthāti yojanā. **Uddissāti** tvāpaccayasaddo “kata”nti uttarapadena samāsoti āha “uddisitvā kata”nti. Eseva nayo “**paṭiccakamma**”nti etthāpi.

294. Paṭiccakammanti etaṃ nāmaṃ nimittakammassa adhivacananti yojanā. **Yoti** yo koci jano. Vadhakassa pāṇaghātakammaṃ hoti viya, tassāpi hotīti yojanā. **Na jīrantīti** ettha jaradhātu gatyatthoti āha “na gacchantī”ti.

179. Kappiyabhūmianujānanakathā

295. Bahārāmakotṭhaketi ettha samīpatthe bhummavacananti āha “bahārāmakotṭhakasamīpeti ārāmakotṭhakassa bahi samīpeti attho”ti. **Acchantīti** vasanti. **Etanti** “paccantima”nti etaṃ vacanam. **Dhuravīhāropīti** padhānavīhāropi. **Tattha tatthāti** tasmim tasmim ṭhāne. **Anupageyevāti** pātoyeva. **Oravasaddanti** uccaravasankhātam saddam. **Kapilasuttapariyosāneti** suttanipāte (su. ni. aṭṭha. 2.kapilasuttavaṇṇanā) saṅgahitassa kapilasuttassa pariyosāne. Pañcasātanam kevaṭṭapurisānanti sambandho.

Ussāvanantikādīsu evam vinicchayo veditabboti yojanā. Yo vihāro kariyatīti sambandho. Bhūmiyā gati viya gati etesanti **bhūmigatikā**. Paṭiṭṭhāpentehi bahūhi bhikkhūhi paṭiṭṭhāpetabboti sambandho. Nicchārentehi bhikkhūhīti yojanā. **Sayanti** bhikkhu. **Tam panāti** “saṅghassa kappiyakuṭim adhiṭṭhāmī”ti vacanam pana. **Avatvāpīti** pisaddo tathā “vatvāpī”ti attham sampiṇḍeti. **Aṭṭhakathāsūti** mahāaṭṭhakathādīsu tīsu aṭṭhakathāsu. **Etthāti** ussāvanantikakuṭiyam. “Samakālam vaṭṭati”ti vacanam dalhīkaronto āha “sace hī”tiādi. **Vacaneti** “kappiyakuṭim karomā”ti vacane. **Tasminti** thambhe. **Tenevāti** akatabhāveneva. **Hīti** saccam. **Etthāti** bahūsu.

Yatoti iṭṭhakasilāmattikāpiṇḍato. **Vuttanayenevāti** “bahūhi samparivāretvā kappiyakuṭim karomā”ti vuttanayeneva. **Iṭṭhakādayoti** “kappiyakuṭim karomā”ti adhiṭṭhātabbaitṭhakādayo. Andhakaṭṭhakathāyam vuttanti sambandho. **Tathāti** yathā andhakaṭṭhakathāyam vuttam, tathā. Thambhādīni ukkhipitvā paṭiṭṭhāpanaṅca “kappiyakuṭim karomā”ti sāvanaṅca antam pariyosānametissāti **ussāvanantikā**.

Tāsūti dvīsu gonisādikāsu. **Yatthāti** kuṭiyam. Neva ārāmo parikkhitto hotīti sambandho. Puna **yatthāti** kuṭiyam. **Ayanti** kuṭi. **Ubhayatthāpīti** āramavīhāragonisādikāsu dvīsupi. Bahutaram parikkhittopi parikkhittoyeva nāmāti yojanā. **Etthāti** upaḍḍhaparikkhittabahutaraparikkhittaārāme. Gāvo pavisitvā yathāsukham nisīdanti etthāti **gonisādā** gosālā. Gonisādā viyāti **gonisādikā** kuṭi.

Manussā vadantīti sambandho. **Esāti** kuṭi. **Vuttepīti** pisadde, “kappiyakuṭim demā”ti vākyam apekkhati. Andhakaṭṭhakathāyam vuttanti sambandho. Yasmā vaṭṭati, tasmāti yojanā. **Tesanti** sesasahadhammikadevamanussānam. **Tehīti** sesasahadhammikadevamanussehi. Punapi vuttam, kim vuttanti āha “bhikkhussa...pe... hotī”ti. **Apīti** tādāñesaṃ. **Tanti** vacanam. **Hīti** saccam, yasmā vā. Saṅghassa santakameva vā bhikkhussa santakameva vāti yojanā. Iti tasmā suvuttanti sambandho. Gahapatīnam santakam **gahapati** kuṭi. “Kammavācam sāvetvā”ti idaṃ upalakkhaṇamattam

kammavācamavatvā apalokanenapi kappiyattā. Kammavācāya vā apalokanena vā sammanitabbāti **sammuti** kuṭi. Itisaddo parisamāpanattho.

Yaṃ āmisam vuttham, sabbam taṃ āmisantiyojanā. Akappiyabhūmiyaṃ sahaseyyapahonake gehe vuttham ṭhapitanti sambandho. Yaṃ pana saṅghikaṃ vā puggalikaṃ vā atthīti yojanā. **Tesamyevāti** bhikkhubhikkhunīnameva. Ekarattampi ṭhapitam yaṃ santakam atthīti yojanā. **Tanti** saṅghikādi. **Tatthāti** akappiyabhūmiyaṃ sahaseyyapahonakagehe. **Etanti** antovutthaantopakkasaṅkhātam yāvayāmakālikam, “na kappatī” ti byatirekassa anvayaṃ dassento āha “sattāhakālikam panā” tiādi.

Tatrāti purimavacanāpekkham. Tatra vacaneti hi attho. Sāmaṇero detīti sambandho. Yaṃkiñci taṇḍulādikaṃ āmisanti yojanā. **Mukhasannidhi nāmāti** āpattiyā mukho upāyo sannidhi nāmāti attho. **Tatthāti** mahāpaccariyaṃ, mukhasannidhiantovutthesu vā. Bhikkhu pacitvā paribhuñjatīti sambandho. **Āmisasamsatthanti** āmisena samsaggaṃ.

Jahitavatthukāti jahitam vatthu etāsanti jahitavatthukā. Ussāvanantikā katāti sambandho. **Sāti** ussāvanantikā. **Yo yoti** thambho vā bhittipādo vā. Iṭṭhakādīhi katā ussāvanantikāti yojanā. **Cayassāti** adhiṭṭhānassa. **Yehi pana iṭṭhakādīhīti** ādisaddena thambhasilāmatikāyo saṅgaṇhāti. **Tadaññesūti** tehi adhiṭṭhitaiṭṭhakādīhi aññesu.

Pākārādiparikkhepeti upacārasīmāparicchinnassa ārāmassa pākārādīnā parikkhepe kate. **Pākārādīti** ādisaddena vatim saṅgaṇhāti. **Kappiyakuṭim laddhum vaṭṭatīti** gonisādikāya abhāvena sesāsu tīsu kappiyakuṭisu yaṃkiñci kappiyakuṭim laddhum vaṭṭatīti attho. **Tattha tatthāti** tasmim tasmim ṭhāne. **Itarā panāti** ussāvanantikagonisādikāhi aññā. **Dveti** ubho gahapatisammutiyo, jahitavatthukāva hontīti sambandho. **Pakkhapāsakamaṇḍalanti** dve pakkhe apatanatthāya pasati bandhatīti pakkhapāsako, **maṇḍalanti** chadanakoṭigopānasīnam uparī ṭhapitakatthaviseso, pakkhapāsako ca maṇḍalañca pakkhapāsakamaṇḍalam.

Yatrāti yasmim ṭhāne. **Anupasampannassa datvāti** anapekkhavissajjanena anupasampannassa datvā. Cīvaravikappanaṃ viya sāpekkhavissajjanampi vaṭṭatīti vadanti. **Tatrāti** purimavacanāpekkham. **Soti** karavīkatissatthero, passitvā pucchīti sambandho. **Theroti** mahāsivatthero. **Lūkhadivaseti** asiniddhadivase. **Tatoti** bravanato, paranti sambandho. **Nanti** mahāsivattheram. **Pamukheti** gabbhassa pamukhe. **Tanti** sabbikumbhim. **Bahīti** vihārassa bahi. **Soti** mahāsivatthero.

180. Meṇḍakagahapativatthukathā

296. “Bahidvāre” ti ettha kassa bahidvāreti āha “dhaññāgārassa bahidvāre” ti. **Ālakathālikanti** ettha ālakataṇḍulapacanakam gaṇhakathāli ālakathāli, tāya pacitam bhattam ālakathālikanti vacanattham dassento āha “ālakataṇḍulapacanakathālika” nti. **Byañjanabhaṇḍikanti** byañjanaparikkhārikam, byañjanaparivārakanti attho. Iminā **sūpabhiñjanakanti** ettha sūpasaddo byañjanavācako, bhiñjanakasaddo bhaṇḍikapariyāyoti dasseti. **Dāsakammakaraporisanti** ettha dāsaporisā ca kammakaraporisā ca dāsakammakaraporisaṃ, samāhāradvando pubbapade uttaralopo, iti imamattham dassento āha “dāsapurise ca kammakarapurise cā” ti. Porisasaddopi purisasaddena samāno “puriso eva poriso” ti atthena. **Dhuvabhattenāti** ettha **dhuvāsaddo** nīccapariyāyoti āha “nīccakāla” nti. Duyhena khīrenāti sambandho. “Meṇḍakavatthusmim panā” ti pāṭhato paṭṭhāya yāva “khaṇaññeva duyhenā” ti pāṭhā kesuciyeva aṭṭhakathāpotthakesu atthi. **Etthāti** meṇḍakavatthumhi. **Goraseti** gayayehi nibbatte khīradadhitakkanavanītasabbisaṅkhāte rase. **Pātheyyanti** pathassa hitam pātheyyam. **Ñatvāti** pātheyyamīcchatīti ñatvā. **Bhikkhācāravattena vāti** aññātakaapavāritatthānato bhikkhācāravattena vā. **Yācitvāpīti** pisaddo pageva bhikkhācāravattenāti dasseti. Yattakena pātheyyenāti sambandho.

182. Keṇiyajaṭilavatthukathā

300. Kājehīti ettha kājassa gaṇanaṃ dassento āha “pañcahi kājasatehī”ti. Ekena kājena dvinnam kuṭānaṃ gahitattā vuttaṃ “kuṭasahassa”nti. **Voti** tumhe. Suṭṭhu pasannoti sambandho.

Tatthāti “aṭṭha pānānī”ti pāṭhe, aṭṭhasu pānesu vā. “Ambehi katapāna”nti iminā majjhelopasamāsaṃ dasseti. **Tatthāti** āmapakkesu. Karontena kātabbanti sambandho. **Ādiccapākenāti** ādiccahetunā pacanena. **Purebhattameva kappatīti** bhikkhunā sayam katattā purebhattameva kappati. Tena vuttaṃ “anupasampannehī”tiādi. Kataṃ ambapānanti sambandho. **Sabbapānesūti** jambupānādīsu sabbesu pānesu.

Tesūti jambupānādīsu sattasu pānesu. **Panasaddo** visesatthajotako. **Jambuphalehīti** āmehi vā pakkehi vā jambuphalehi. **Aṭṭhikehīti** aṭṭhi asmimatthīti aṭṭhikaṃ phalaṃ. **Jātirasenāti** yathājātena rasena. Iminā madhusakkharakappurādīhi na yojetabboti dasseti. **Taṃ panāti** madhukapānaṃ pana. **Muddikāti** muddikaphalāni. **Sāluketi** kande. **Sattannaṃ dhaññānaṃ phalarasanti** taṇḍuladhovanodakaṃ. “Pakkaḍākarasa”nti iminā apakkaḍākarasaṃ vaṭṭatīti dīpeti. **Hīti** saccam, vitthāro vā. **Rasoti** pakkaraso. Paṭiggahetvā ṭhāpitasabbiādīhi pakkānaṃ yāvajīvikānaṃ pattānaṃ rasoti yojanā. Pakkaṃ yāvajīvikapattarasanti sambandho. **Yāvakālikapattānampīti** pisaddo pageva yāvajīvikapattānanti dasseti. **Yaṃ pānanti** yaṃ madhukapuppharasapānaṃ. **Soti** madhukapuppharaso. **Tenāti** madhukapupphena. Yato kālato paṭṭhāya majjaṃ na karonti, tatoti yojanā. **Ucchuraso** nikasaṭo pacchābhattaṃ vaṭṭati sattāhakālikattā. **Ime cattāro rasāti** phalapattapupphaucchurasasankhātā ime cattāro rasā. **Agghuttamukhāti** yaññā agghutamukhā, agghutaseṭṭhāti attho.

183. Rojamallādivatthukathā

301. Saṅkaramakaṃsūti ettha saṅkarasaddassa yuddhatthādīsu pavattanato idha paṭiññātattethi dassento āha “katikamakamsū”ti. **Katikanti** paṭiññātasankhātāṃ katikaṃ. **Uḷāraṃ khoti** ettha uḷārasaddo seṭṭhavācako. **Seṭṭhanti** ca sundaramevāti āha “sundaraṃ kho te ida”nti. **Teti** tuyhaṃ. **“Bahukato”**ti padassa katabahumānoti atthaṃ dassento āha “pasādabahumānenā”ti. “Piṭṭhamayaṃkhādāniya”nti iminā **piṭṭhakhādāniyanti** ettha mayasaddalopaṃ dasseti.

303. Paṭibhāneyyakāti ettha paṭibhāne niyuttā paṭibhāneyyakāti dassento āha “paṭibhānasampannā”ti. “Niddosasippā”nti iminā **pariyodātasippāti** ettha parisamantato odātaṃ sippaṃ etesanti pariyodātasippāti atthaṃ dasseti. Sippatthikehi siyati seviyatīti **sippaṃ**, sippikānaṃ hitāya seti pavattatīti vā **sippaṃ**, oṭṭhajo paṭhamakkharo. **Nāliyāvāpakenāti** padassa dvandabhāvaṃ dassento āha “nāliyā ceva āvāpakena cā”ti. Iminā yakāro padasandhimattoti dasseti. “Nāliyā vā pasibbakenā”tipi pāṭho, so apāṭhoyeva. Ko āvāpako nāmāti āha **“āvāpako nāma yatthā”**tiādi. Tattha **yatthāti** yasmiṃ thavike. Iminā āharitvā yathāladdhaṃ vapanti pakkhipanti etthāti **āvāpakoti** vacanattaṃ dasseti. Vapa bījanikkhepeti dhātupāṭhesu (saddanītidhātumālāyaṃ 15 pakārantadhātu) vuttaṃ. Idha pana pakkhipaneti daṭṭhabbo. Tena vuttaṃ “pakkhipantī”ti. **Pariharitumevāti** pariggahetvā haritumeva. **Vetananti** bhatim. **Yoti** bhikkhu. **Taṃ vāti** pariharitakhurabhaṇḍaṃ vā. **Aññaṃ vāti** aññassa santakaṃ vā.

304. Idanti dasamabhāgadānaṃ. **Dasa koṭṭhāseti** dasa paṭivīse.

185. Catumahāpadesakathā

305. Idam na kappatītiādi “idam na kappatī”tiādayo ime cattāro mahāpadeseti yojanā. Apassayaṃ katvā disiyanti etthāti **apadesā** okāsā, apassayaṃ katvā disiyanti etehīti vā **apadesā** kāraṇā, “mahantā apadesā **mahāpadesā**. **Tañcāti** mahāpadesasankhātāṃ tañca suttaṃ, gahetvāti yojanā. **Parimaddantāti** punappaṇaṃ maddantā, upaparikkhantāti attho. **Idanti** kāraṇaṃ. **Tanti** navamahāphalaaparaṇṇaṃ. **Tānīti** khuddakaphalapānāni. **Hīti** saccam.

Tesanti channaṃ cīvarānaṃ. **Tatthāti** chasu anulomacīvaresu. “Pāṇakehi sañjātavatta”nti iminā koseyyavattabhāvaṃ dasseti. **Dve paṭāti** cīnapaṭasomārapaṭā. Dukūlaṃ sāṇassa anulomanti yojanā.

Tesaṃyevāti dvinnaṃ pattānameva. **Tesaṃyevāti** tiṇṇaṃ tumbānameva. **Tesaṃyevāti** dvinnaṃ kāyabandhanānameva. **Setacchattanti** setehi vatthehi kataṃ chattam. **Tesaṃyevāti** tiṇṇaṃ chattānameva.

Sambhinnarasanti saṃsaggarasaṃ. Ettha bhijjithāti **bhinnoti** vacanatthena bhididhātu dvidhākaṇasañkhāto bhedattho hoti, dhāvattabādhakena saṃtyūpasaggena bhididhātuyā bhedattham bādhetvā saṃsaggetthavācako hotīti daṭṭhabbam. **Challimpīti** tacampi. **Sakalenevāti** challyiā eva. Pāyāsena asaṃsaṭṭhaṃ yaṃ sabbīti yojanā. **Tānīti** takkolajātiphalādīni. **Yaṭṭhimadhukādīsūpīti** madhulaṭṭhikādīsūpi. “Laṭṭhimadhukādīsūpī”ti vā pāṭho, so apāṭhoyeva. **Yaṃ yanti** vatthu. **Yathāti** yenākārena, dhoviyamāne tacchiyamāneti sambandho.

Sambhinnarasanti vatvā tamevattham dassetuṃ vuttaṃ “saṃsaṭṭha”nti. **Sabhāvanti** yāvakālaṃ kappiyasabhāvaṃ. **Tasmāti** yasmā upaneti, tasmā. **Tenāti** sattāhakālikena. **Tadahupaṭiggahitanti** tadaheva paṭiggahitaṃ. Dvīhapaṭiggahitena sattāhakālikenaṭi sambandho.

Etthāti kālikasaṃsagge. **Āpattiyo veditabbāti** yathākkamaṃ āpattiyo veditabbā. **Sabbatthāti** sabbasmiṃ bhesajjakkhandhake.

Iti bhesajjakkhandhakavaṇṇanāya yojanā samattā.

7. Kathinakkhandhakaṃ

187. Kathinānujānanakathā

306. Kathinakkhandhake **pāveyyakāti** ettha pāvāraṭṭhe nivasantīti pāveyyakāti vacanattham dassento āha “pāvāraṭṭhavāsino”ti. **Tatthāti** pāvānāmake raṭṭhe. Eko pitā etesanti **ekapitukā**. Te ca te bhātaro ceti **ekapitukabhātaro**, tesam. **Etanti** “pāveyyakā”ti etaṃ nāmaṃ. **Tesūti** pāveyyakesu. “Dhutaṅgasamādānavasena”ti visesanassa byavacchedabhāvaṃ dassetuṃ vuttaṃ “na araṇṇāvāsamattenā”ti. Visesanañhi duvidham byavacchedaṃ, tappākaṭikaraṇaṅcāti. **Tesanti** pāveyyakānaṃ. Piṇḍapātikādībhavepīti sambandho. **Pisaddo** āraṇṇakaṃ apekkhati. **Etanti** “sabbe āraṇṇakā”tiādi etaṃ vacanaṃ. **Ime panāti** pāveyyakā pana. **Udakasaṃgaheti** ettha udakena saṃgahetabbanti dassento āha “udakena saṃgahite”ti. “Thale ca ninne cā”ti iminā “udakasaṃgahite”ti padassa sarūpaṃ dasseti.

Udakacikkhaloti udakena loḷito cikkhallo udakacikkhallo. **Okapuṇṇehīti** ettha okasaddo udakavevacanoti āha “udakapuṇṇehī”ti. Udañhi ucayati samavāyabhāvena pavattatīti **okanti** vuccati. **Tesanti** pāveyyakānaṃ. **Ghanānīti** nirantarāni. **Tesūti** cīvaresu. **Tenāti** cīvarānaṃ ghanattā, udakassa ca na paggharaṇattā. Bhagavatā “avivadamānā phāsukaṃ vassaṃ vasitthā”ti pucchiyamānāpi te bhikkhū yathāpucchitaṃ avatvā kasmā phāsukapadaṃ apantevā “avivadamānā vassaṃ vasimhā”ti avocunti āha “avivadamānā vassaṃ vasimhāti etthā”tiādi. **Ukkaṇṭhitatāya cāti** ettha **casaddo** “phāsutāya abhāvenā”ti etthāpi yojetabbo. Senāsanaphāsutāya abhāvena ca bhagavato dassanālābhena ukkaṇṭhitatāya cāti hi attho. **Anamataggiyakathanti** saṃyuttanikāye anamataggiyasuttantakathaṃ (saṃ. nī. 2.135). Sabbeva te pāveyyakā bhikkhūti yojanā. **Tanti** anamataggiyakathaṃ. **Tatoti** dhammakathanato, paranti sambandho. Bhagavā āmantesiṭi sambandho. **Ekam cīvaranti** saṅghāṭim. **Santaruttarenāti** saha antarenāti santaraṃ, santarañca taṃ uttarañceti santaruttaraṃ, tena. **Assuti** bhaveyyuṃ. Abhavissaṃsūti hi attho. Sattamīvibhattikālātipattivibhattīnaṃ samānatthabhāvo saddasatthesu vuttoyeva. **Casaddo** upanyāsatto. Esa kathinatthāro nāmāti yojanā. Anujānitukāmo hutvāti sambandho.

Tatthāti “anujānāmi bhikkhave”tiādipāṭhe. **Vokārassa** nipātamatte sati kathamatto bhavissatī āha “atthatakathinānanti attho”ti. Atthatakathinānaṃ bhikkhūnanti sambandho. Laddhaguṇaṃ dassento āha “evañhī”tiādi. **Hisaddo** laddhaguṇajotako. **Paratoti** paramhi. “So tumhāka”nti vā “so vo”ti vā avatvā “so nesam bhavissatī”ti vuttatā **vo**-kāro nipātamattoti adhippāyo. “Voti sāmivacanameveta”nti iminā **vo** tumhākanti atthaṃ dasseti. Evaṃ sati “parato so nesa”nti ettha kathamatto bhavissatī āha “so nesanti ettha panā”tiādi. Ye tumhe atthatakathinā, tesam tumhākanti yojanā. **Kathinasaddo** thirattavācako anipphannapāṭipadiko. Anāmantaacārādikānaṃ pañcānisamsānaṃ antokaraṇasamatthabhāve thiranti attho.

Tatthāti anāmantaacārādīsu pañcānisamsesu. **Anāmantaacāro**ti ettha caraṇaṃ cāro, anāmantetvā cāro anāmantaacāroti dassento āha “anāmantetvā caraṇa”nti. “Asamādāya caraṇa”nti iminā **asamādānacāro**ti ettha pubbapade tvāpaccayassa anādesam katvā asamādānacāroti vuttanti dasseti. **Yāvattatthacīvaranti** ettha ākāralopena sandhīti āha “yāvata cīvarena attho”ti. “Yāvattatthacīvara”ntipi pāṭho, evaṃ sati dakāro padasandhimatto. Yāvasaddo paricchadatthavācako, na abhivijhatthavācako. Atthasaddena samāso hoti. **Yo ca tattha cīvaruppādoti** ettha tatthasaddassa visayaṃ dassento āha “kathinatthārasīmāya”nti. **Tatruppādenāti** tatra kathinatthārasīmāyaṃ uppādena mūlena. “Cīvaraṃ uppajjati”ti iminā **cīvaruppādoti** ettha cīvameva uppādo cīvaruppādoti viśesanaparapadattaṃ dasseti.

Keti kittakā. Idaṃ “gaṇavasena”ti vacanaṃ sandhāya vuttaṃ. Atha vā **keti** kinnāma vutthavassā. Idaṃ “vutthavassavasena”ti vacanaṃ sandhāya vuttaṃ. Satasahassampi janā labhantīti yojanā. **Pisaddena** tato adhikampi labhantīti dasseti. **Chinnavassā vāti** purimikāya upagantvā chinnavassā vā. **Aññasmiṃ vihāreti** kathinatthāravihārato aparasmiṃ vihāre. Sabbe chinnavassādikā bhikkhū purimikāya vassūpagatānaṃ bhikkhūnaṃ gaṇapūrakā hontīti yojanā. **Itaresamyevāti** purimikāya vassaṃ upagantvā paṭhamapavāraṇāya pavāritānameva. **Paripuṇṇavassoti** paripuṇṇo vīsativasso, acchinnavasso vā. **Soti** sāmaṇero. **Iti etthāpīti** evaṃ etesu tīsu vāresupi.

Kena dinnaṃ kathinacīvaraṃ vaṭṭatīti yojanā. Yena kenaci dinnaṃ cīvaraṃ vaṭṭatīti sambandho. **Tanti** vattaṃ. **Ajānantoti** ajānanahetu. Hetvatthe hi antapaccayo. **Tassāti** kathinadāyakassa. **Evanti** iminā vakkhamānanayena. Aññatarapahonakaṃ vatthanti sambandho. **Tassāti** kathinacīvarassa. Ettakā nāma sūciyo vaṭṭatīti sambandho. Iti ācikkhitabbanti yojanā.

Kathinatthāraakenāpi vattaṃ jānitabbanti sambandho. **Pisaddo** kathinadāyakaṃ apekkhati. Vattaṃ vitthārento āha “tantavāyagehato hī”tiādi. **Ābhatasantānenevāti** ābhatasantatiyā eva. **Khalimakkhitasāṭakoti** ahatasāṭako. So hi khalena takkena kañjikenā makkhitasāṭakattā “khalimakkhitasāṭako”ti vuccati. **Kathinatthārasāṭakanti** kathinatthāratthāya dinnaṃ sāṭakaṃ. **Tadahevāti** tasmim dinnaahani eva. **Tasminti** paṭhamaṃ dinne kathinatthārasāṭake. **Aññāni cāti** kathinasāṭakato aññāni ca. Casaddena na kathinasāṭakameva āharati, aññāni cāti dasseti. **Yoti** kathinadāyako. **Itaroti** paṭhamaṃ kathinadāyako. **Yathā tathā ovaditvāti** tava santakato etassa santakaṃ saṅghassa bahupakāraṃ, saṅghassa bahupakārattaṃ tayāpi icchitabbaṃ, evamicchantassa bahupuññanti yena tenākārena ovaditvā.

Kena bhikkhunāti sambandho. Yassa saṅgho kathinacīvaraṃ deti, tena bhikkhunā attharittabbanti yojanā. Kassa bhikkhussāti sambandho. Yo jiṇṇacīvaro hoti, tassa dātabbanti yojanā. Mahatī parisā etassāti **mahāpariso** thero. “Navakataro sakkoti, tassa dātabba”nti vacanassa anekantabhāvaṃ dassento āha “api cā”tiādi. **Api cāti** ekantena. **Tadattthāyāti** tassa jiṇṇacīvarassa atthāya. **Assāti** bhikkhussa. **Pelavoti** virāḷo. **Tenāpīti** kathinatthāraakenāpi. **Tanti** vidhiṃ. **Dānakammavācāti** dānakāraṇakammavācā.

Evaṃ dinne pana kathine niṭṭhāpetabbānīti yojanā. **Ekenāpīti** pisaddena pageva bahūhi panāti dasseti. **Buddhappasatthanti** buddhehi pasatthaṃ. Atīte kappasatasahassamatthaketi yojanā. **Tassāti**

padumuttarassa. Kathinaṃ gaṇhi kirāti yojanā. **Tanti** kathinaṃ, satthā akāsīti sambandho.

Katapariyositaṃ kathinaṃ kiṃ kātābanti āha “katapariyositaṃ panā”tiādi. Kathinaṃ gahetvā attharittābanti sambandho. “Tena kathinatthārakena bhikkhunā”ti padaṃ “vacanīyo”ti pade suddhakattā, “anumodāpetabba”nti pade kāritakattā. Kiṃ vacanīyoti āha “atthataṃ...pe... anumodathā”ti. “Tehi anumodakehi bhikkhuhi”ti padaṃ “vacanīyo”ti pade avuttakattā, “anumodāpetabba”nti pade kāritakammaṃ avuttakammaṃ, vā. “Kathina”nti dhātukammaṃ vā vuttakammaṃ vā upanetabbaṃ. Kiṃ vacanīyoti āha “atthataṃ...pe... anumodamā”ti. **Itarehi cāti** anumodakehi ca. **Sabbesanti** atthāraakaanumodakānaṃ. **Hīti** saccaṃ. **Etanti** sabbesaṃ atthatabhāvaṃ, “dvinnaṃ...pe... anumodakassa cā”ti vacanaṃ vā.

Evam kathine atthate sati panāti yojanā. **Yenāti** bhikkhunā. **Avicāretvāvāti** “kathinatthāraakassa demā”ti vā “saṅghassa demā”ti vā avicāretvā eva. **Sesacīvarānipīti** kathinatthāracīvarato sesacīvarānipi. Saṅghena dātabbānīti sambandho. “Apaloketvā”ti iminā kammavācāya kiccābhāvaṃ dasseti. **Vassāvāsikaṭṭhitikāyāti** vassāvāsakāle pavattāya ṭhitikāya. **Garubhaṇḍanti** mañcabibbohanādigarubhaṇḍaṃ. **Ekasīmāyāti** ekāya upacārasīmāya.

308. Yathā cāti ettha **yathāsaddo** yaṃsaddattho. Yena vidhināti hi attho. **Mahābhūmikanti** mahāvisayaṃ. Catuvīsatiākāravantatāya mahāvittthārikanti vuttaṃ hoti. **Tatoti** anattathalakkhaṇato. **Parivārepīti** pisaddo na idha evāti dasseti.

Tatthāti catuvīsatiyā ākāresu. **Ullikhitamattenāti** ettha pamāṇassa uggahaṇattham nakhādīhi likhanaṃ ullikhitam, ullikhitam mattam pamāṇam ullikhitamattanti dassento āha “dīghato ca puthulato ca pamāṇagahaṇamattenā”ti. Tamevattham vitthārento āha “pamāṇam hī”tiādi. Dassento hutvā ullikhatīti yojanā. **Pañcakanti** pañcapamāṇam, pañcasamūham vā khaṇḍam. **Vāsaddena aññānīpi** terasakādīni saṅgaṇhāti. **Moghasuttakāropanamattenāti** moghasuttassa cīvarassūpari āropanamattena. **Dīghasibbitamattenāti** dīghato sibbitamattena. **Muddiyapaṭṭabandhanamattenāti** muddiyapaṭṭassa bandhanamattena. **Dve cimilikāyoti** dve pilotikāyo. **Paṭhamacimilikāti** kathinacimilikato aññā attano pakaticimilikā ghaṭetvā ṭhapitā hotīti yojanā. “Taṃ paṭhamacimilika”nti pāṭhasesaṃ ajjhāharitvā kathinasātakassa kucchicimilikaṃ katvāti iminā sambandhitabbaṃ. **Pakaticīvarassāti** attano pakaticīvarassa. **Pakatipaṭṭabandhacīvaranti** pakatipaṭṭena bandhacīvaram. **Piṭṭhianuvātāropanamattenāti** dīghato anuvātassa cīvarassūpari āropanamattena. Dīghānuvātāñhi pārūpanakāle piṭṭhiyaṃ ṭhitattā piṭṭhianuvātanti vuccati. **Kucchianuvātāropanamattenāti** puthulato anuvātassa cīvarassūpari āropanamattena. Puthulānuvātāñhi pārūpanakāle kucchiyaṃ ṭhitattā kucchianuvātanti vuccati. **Āgantukapaṭṭāropanamattenāti** āgantukapaṭṭassa cīvarassūpari āropanamattena. **Vāti** athavā.

Sārūppanti samaṇānucchavikaṃ. **Parikathāyāti** pariyāyena uppāditāya kathāya. **Atiukkaṭṭham vaṭṭatīti** atiukkaṭṭham eva vaṭṭati. **Otiṇṇasadisamevāti** otiṇṇena vatthena sadisameva kathinacīvaranti sambandho. **Tatthāti** duvidhesu sannidhīsu. **Tadahevāti** tasmim dinnaahani eva.

Rattinissaggiyenāti rattiatikkantaṃ hutvā nissaggiyena. **Aññenāti** ticīvarato aññena. **Samaṇḍalikanti** saha mahāmaṇḍalaaḍḍhamaṇḍalena kataṃ.

309. Evam catuvīsatiākāraṃ anattathalakkhaṇam dassetvā idāni sattarasākāraṃ atthatalakkhaṇam dassento āha “ahatenā”tiādi. Tattha paribhogaṃ na hanittha na gacchitthāti **ahataṃ**, paribhogaṃ na hanitabbaṃ na hiṃsītābanti vā **ahatanti** dassento āha “aparibhuttaṇā”ti. “Ahatasadisena”ti iminā **ahatakappenāti** ettha **kappasaddo** sadisatthoti dasseti. **Pāpaṇikenāti** ettha pasārito āpaṇo pāpaṇo, tasmim patitaṃ pāpaṇikanti dassento āha “āpaṇadvāre patita”nti. “Pilotika”nti iminā ṇikapaccayassa sarūpaṃ dasseti. **Vuttavipallāsenevāti** vuttehi “nimittakatenā”tiādihi vipallāsena eva. **Tatthāti** parivāre. **Hīti** saccaṃ, yasmā vā. **Idhāti** kathinakkhandhake. Avuccamānena tena vacanena parihāyatīti

sambandho.

310. Tatthāti “kathañca bhikkhave ubbhatam hoti kathina” ntiādipāṭhe. Janettiyo mātaroti yojanā. Iminā dhammena putte mānetīti **mātā**, dhammena puttehi māniyatīti vā **mātā**, sā viya hontīti **mātikāti** dasseti. **Kathinubbhāranti** ca **kathinuddhāranti** ca atthato sadisaṃ. **Etāti** etā padajātiyo. **Tāsūti** aṭṭhasu mātikāsu. **Assāti** kathinubbhārassa.

188. Ādāyasattakakathā

311. Na paccessanti ettha paṭītyūpasaggassa punattham, idhātuyā ca gatyattham dassento āha “na puna āgamissa”nti. Evaṃ pakkamato chijjātīti sambandho.

Etañcāti pakkamanantikam, kathinuddhārañca. **Tāhanti** te aham. **Teti** tuyham.

Aññanti attano vihārato aññaṃ. **Evaṃ hotīti** eso parivitakko hoti. **Soti** āvāsapalibodho. Ādiccabandhunā vuttoti yojanā.

Dve palibodhā ekato chijjantīti sambandho. **Apubbaṃ acarimanti** ekapahāreneva. So palibodhūpacchedo kasmā vitthārato na vuttoti āha “so panā”tiādi. **So panāti** palibodhūpacchedo pana. Na vuttoti sambandho. **Etthāti** imasmim kathinubbhāre. Kasmā ayam kathinuddhāro “**nāsanantiko**”ti vuttoti āha “yasmā”tiādi. **Tassāti** bhikkhuno.

Āsāvachedike chijjātīti sambandho. **Ayam panāti** āsāvachediko kathinuddhāro pana. Anekapabhedo hotīti sambandho. **Tassāti** bhikkhussa. **Vuttoti** ayam āsāvachediko kathinuddhāro vuttoti yojanā. **Ettha panāti** imasmim pana ṭhāne. **Tatthāti** sīmātikantike.

312-325. Evantiādi nigamanaṃ. **Sattaketi** aṭṭhasu mātikāsu āsāvachedato sese sattapamāṇe, sattasamūhe vā. **Teyevāti** sattuake eva. **Tatoti** vārato. **Ye yeti** kathinuddhārā. **Itarehīti** āsāvachedato aññehi. Ye palibodhā vuttāti sambandho. Āvāso caṇṇiyati anenāti **cattanti** vacanattham dassento āha “yena cittenā”tiādi. **Tanti** cittaṃ. “Eseva nayo”ti iminā āvāso vamiyati anenāti **vantaṃ**. Āvāsato muccati anenāti **muttanti** vacanattham atidisati. **Sabbatthāti** sabbasmim kathinakkhandhake.

Iti kathinakkhandhakavaṇṇanāya yojanā samattā.

8. Cīvarakkhandhakam

202. Jīvakavatthukathā

326. Cīvarakkhandhake padakkhiṇasaddassa apasabyattham paṭikkhipanto āha “chekā kusalā”ti. **Abhisatīti** ettha saradhātuyā gaticintāsu idha gatyattheti dassento āha “abhigatā”ti. **Abhigatīti** abhimukham gantabbā. Nanu pāḷiyam “**atthikānaṃ atthikānaṃ manussāna**”nti vuttaṃ, kasmā pana “atthikehi atthikehi manussehī”ti vuttanti āha “karaṇatthe panā”tiādi. Iminā chaṭṭhikattā nāma tatiyākattunā samānoyevāti dasseti. Niḡame vasatīti **negamoti** vutte kuṭumbiyagaṇo negamo nāmāti āha “kuṭumbiyagaṇo”ti.

327. Nagare nivasantīti **nāgarā**. Datvā, vuṭṭhāpesunti sambandho. **Ārāmuyyānavāhanādīti** ettha ādisaddena aññāni upabhogaparibhogāni saṅgaṇhāti. **Gaṇikaṭṭhāneti** gaṇikāya ṭhāne. **Gaṇikāti** ca nagarasobhinī. Sā hi atthikena janagaṇena abhigantabbāti **gaṇikāti** vuccati. **Paṭisatena cāti** ettha **casaddo** avadhāraṇattho. Rattim gamanassa paṇinidhisāṅkhātena satena evāti hi attho. **Gilānanti** ettha bhāvapaccayena vināpi bhāvatttho nītabboti āha “gilānabhāva”nti. “Jānāpeyya”nti iminā

paṭivedeyyanti ettha vidadhātuyā nāṇattham dasseti. **Kattarasuppeti** ettha **kattarasaddo** jīṇṇapariyāyoti āha “jīṇṇasuppe”ti. Supanti sunakhādayo etthāti **suppaṃ**, kattaraṃ suppaṃ kattarasuppaṃ.

328. Tanti jīvakaṃ. Aññe rājadārakā vadanti kirāti sambandho. Natthi mātā etassāti **nimmātiko**. **Yathā cātiādīsu** yathā pesanti, tathāti yojanā. **Casaddo** sampiṇḍanatto. Na kevalaṃ vadantiyeva, atha kho na koci kiñci pesetīti hi attho. **Aññesanti** jīvakato aññesaṃ. **Tassāti** jīvakassa. **Itīti** evaṃ. **Soti** jīvako. **Taṃ sabbanti** “nimmātiko nippitiko”ti vadanañca paṇṇākārassa apesanañcāti taṃ sabbam.

Yaṃnūnāti sādhu vata. Ahaṃ vajjasippaṃ sikkheyyaṃ sādhu vatāti yojanā. **Tassāti** jīvakassa. **Etadahosīti** etaṃ ahoṣi, parivitaṅko ahūti attho. **Parūpaghātapaṭisaṃyuttānīti** paraṃ upagantvā, upa bhusena vā hananena paṭisaṃyuttāni. **Mettāpubbabbhāganti** sippassa pubbabhāge pavattā mettā etassāti mettāpubbabbhāgaṃ. Iti ahoṣīti yojanā. Purimacintāya anekantabhāvato ekantabhāvaṃ dassento āha “api cā”tiādi. **Api cāti** ekantena. **Ayanti** jīvako. **Itoti** bhaddakappato. **Ayanti** upāsako. **Catuparisantareti** catuparisamajjhe. **Patthatagūṇanti** pattharitagūṇaṃ. **Ṭhānantaranti** ṭhānabhedam, **ahampīti** na ayaṃ upāsakoyeva, ahampīti attho. **Bhagavāti** ālapanapadametaṃ. **Patthananti** icchitavaraṃ. **Codiyamānopīti** uyyojyamānopi. **Pisaddena** purimacintanamapekkhati. **Esāti** eso jīvako.

329. Disāpāmokkhoti padassa disāsu pāmokkho disāpāmokkhoti vacanattham dassento āha “sabbadisāsū”tiādi. **Tasmīñca samayeti** jīvakassa tasmīṃ cintanasamaye ca, āgamaṃsūti sambandho. **Teti** vāñje, pucchīti sambandho. **Kutoti** nagarato. **Takkasīlatoti** takkasīlanagarato. **Tatthāti** takkasīle. **Āmāti** sampaṭicchanaṭṭhe nipāto, āma atthīti hi attho. **Teti** vāñjā. **Tathāti** yathā jīvako āha, tathā akaṃsūti attho. **Soti** jīvako. **Pitaranti** abhayaṛājakumāraṃ. **Tehīti** vāñjehi.

Tanti jīvakaṃ, pucchīti sambandho. **Soti** jīvako. Kasmā tāta tvaṃ idhāgato asī panāti pucchīti yojanā. **Tatoti** pucchato. **Soti** jīvako. Sikkhituṃ āgato amhīti yojanā. **Bahuñca gaṇhātīti**ādīsu so kiñci kammaṃ akatvā sippasseva sikkhitattā bahuñca gaṇhātīti āha “yathā”tiādi. Tattha yathā sikkhantiyeva, evaṃ tathā so na sikkhatīti yojanā. **So panāti** jīvako pana, karoti sikkhatīti sambandho. **Ekam kālanti** ekasmīṃ kāle. Evam sante kasmā so bahuñca gaṇhātīti āha “evaṃ santepī”tiādi. **Medhāvitāyāti** khippaṃ gahaṇadhāraṇapaññatāya, bahuñca sippanti sambandho. Assa jīvakassa gahitañca sippaṃ na sammussatīti yojanā.

Yattakaṃ sippaṃ ācariyo jānāti, tattakaṃ ayaṃ jīvako jānātīti yojanā. **Yanti** sippaṃ. **Ayanti** jīvako, bhavissatīti sambandho. **Nanti** jīvakaṃ. **Yathāti** yenākārena. **Kammavipākanti** kammavipākajaṃ rogaṃ. “Na”nti padaṃ “sikkhāpesi”ti pade kāritakammaṃ, “bhesajjayojana”nti padaṃ dhātukammaṃ. **Bhesajjayojananti** bhesajjena rogassa yojanaṃ. **So panāti** jīvako pana. **Imināti** jīvakena na uggahitaṃ, uggahitanti sambandho. **Ekena dvārenāti** catūsu dvāresu ekena dvārena. **Āhiṇḍantoti** vicaranto. **Parittaṃ pātheyyanti** ettha parittasaddassa ārakkhanatthepi pavattanato idha appatthe pavattatīti dassento āha “appamattaka”nti. Kasmā appamattakaṃ pātheyyaṃ adāsīti yojanā. **Tassāti** disāpāmokkhassa. **Ayanti** jīvako, labhissatīti sambandho. **Tatoti** labhanato. **Khīṇe pātheyyeti** pātheyye khīṇe satīti yojanā.

203. Seṭṭhibhariyādivatthukathā

330. Yā nāmāti yā nāma gharaṇī. **Kimpi māyanti** ettha ekāralopasandhīti āha “kimpi me aya”nti. Iminā yakāraḍesandhiṃ nivatteti, “myāya”ntipi pāṭho, evaṃ sati ādesasandhiyeva, na lopasandhi. Ayaṃ gharaṇī me kiñci deyyadhammaṃ kimpī dassatīti yojanā. **Tassa cāti** sabbissa ca, **katassātipi** pāṭho. **Rogūpasamassa cāti** mama rogassa upasamassa ca, imehi padehi **saṃyamassāti** padassa attham dasseti. “Upakāra”nti iminā **upajānāmīti** ettha upasaddassa attham dasseti. **Adhippāyoti** gharaṇiyā āsayo.

331. “Sabbālankāraṃ tuyhaṃ hotū”ti idaṃ vacanaṃ rājā sabhāvato āha, udāhu kiñci cintetvāti āha “rājā”tiādi. Tattha **imanti** alankāraṃ. **Pamāṇayutteti** kāraṇānurūpe. **Nanti** jīvakaṃ. **Nāṭakānampīti** pañcasatikānaṃ nāṭakānampi. **Sopīti** jīvakopi. **Tesanti** abhayakumāranāṭakānaṃ. **Meti** mayhaṃ, na patirūpanti sambandho. **Ayyikānanti** mātāmahīnaṃ. Katassa me upakāraṇti yojanā. Iminā adhikāro ca upakāro ca atthato sadisanti dasseti. Rājā pasanno datvā āhāti sambandho.

205. Rājagahaseṭṭhivatthukathā

332. Iriyāpathasamparivattanenāti iriyāpathassa punappunaṃ parivattanena. Tīhi sattāhehi niccalassa nipannassa assa seṭṭhissa matthaluṅganti yojanā. Appeva nipajjeyyāti yojanā. **Nanti** seṭṭhim. **Tenevāti** teneva kāraṇena. Sīsaṃ chādetīti **sīsacchavīti** vutte sīsapaṭicchādanacammanti āha “sīsacamma”nti. **Tassāti** seṭṭhissa. **Tīhi sattāhenāti** ettha pubbapadena pacchimapadaṃ guṇitvā gahetabbanti āha “tīhi passehi ekenekena sattāhenā”ti.

333. Janaṃ nīharāpetvāti janaṃ apakkamāpetvā.

207. Pajjotarājavatthukathā

334. Vicchikassa jātoti vicchikassa kāraṇā jāto, vicchikaṃ paṭicca jātoti attho. Sabbi ca bhesajjaṃ vicchikānaṃ paṭikūlaṃ hotīti yojanā. **Paññāsajjanikāti** ettha nīkapaccayassa gantuṃ samatthasā pavattabhāvaṃ dassento āha “gantuṃ samattho hotī”ti. **Assa raññoti** candapajjotanāmakassa assa rañño. **Hatthinīyevāti** bhaddavatikā nāma hatthinīyeva. **Vīsajjanasatanti** vīsādhikaṃ yojanasataṃ.

Bhuñjituṃ nisinnassa ekassa kulaputtassa dvāreti yojanā. **Tassāti** kulaputtassa, ārocesīti sambandho. **Soti** kulaputto, “āharā”ti āṇāpesīti sambandho. **Itaroti** puriso. **Tanti** pattamaṃ. **Yattha yatthāti** yasmiṃ yasmiṃ bhava. Tattha tattha vāhanasampanno homīti yojanā. **Soti** puriso. Pajjoto nāma ayaṃ rājā jātoti yojanā.

Sabbiṃ pāyevāti idaṃ upalakkhaṇamattanti dassento āha “sabbiñca pāyevā”tiādi. Sabbiñca pāyevā, paricāraṇānaṃ āhārācāre vidhiñca ācikkhitvāti attho. **Olumpetvāti** lupidhātu odahanatthoti āha “odahitvā”ti. **Virecesīti** uddhañca adho ca virecesi.

208. Siveyyakadussayugakathā

335. Sivathikanti sivā jambukā kuṇapakhādanatthāya āgantvā tiṭṭhanti etthāti **sivatthamaṃ**, tadeva **sivathikamaṃ**, iminā sivathikāyaṃ uppannaṃ siveyyakamaṃ thikasaddassa lopaṃ katvāti dasseti. **Tatthāti** uttarakurūsu. **Tanti** mataṃ. **Hatthisoṇḍakasakuṇāti** hatthiliṅgavihaṅgamā. Te hi hatthino soṇḍo viya soṇḍo etesu atthīti **hatthisoṇḍakā**, te ca te sakuṇā ceti hatthisoṇḍakasakuṇāti vuccanti. **Rañño āharantīti** rañño atthāya, santikaṃ vā āharanti. **Idanti** siveyyakamaṃ dussayugaṃ. Siviraṭṭhe vāyitaṃ **siveyyakanti** ca dassento āha “athavā”tiādi. **Tenāti** kāraṇena. “Siveyyakanti...pe... vadantī”ti porāṇā āhūti yojanā.

209. Samattiṃsavirecanakathā

336. Kimpanāti ettha kiṃsaddo aniyamattho. Lūkho kiṃ, na lūkho kinti hi attho. “Sinehapānaṃ pana temetī”ti ca “karotī”ti ca sambandho. **Sabbatthāti** sakalakāye. **Sirāti** kaṇḍarā. **Ayanti** jīvako. **Oḷārikadosaharaṇatthanti** oḷārikassa dosassa apanayanatthamaṃ. **Pakatatteti** pakatisaṅkhāte sabhāve saṭīti sambandho. Bhagavā bhanteti yojanā. **Kutoti** kassa santikā. Vaṭṭati nu khoti cintesīti yojanā. **Tatoti** cintanato. **Soṇoti** kolivīsasoṇo, bhuñjatīti sambandho. **Tatoti** soṇassa santikā. **Tassāti** soṇassa. **Soti** soṇo. **Therassāti** moggallānattherassa. Idaṃ “patta”ntipade sāmī, “adāsī”ti pade sampadānaṃ.

Aññaṃ piṇḍapātanti sambandho.

Rājāpi kho bhuñjitukāmo ahoṣīti sambandho. Yañca sujātā adāsi, yañca parinibbānakāle cundo kammāraputto, bhājanagatesu dvīsuyeva tesu piṇḍapātesu devatā ojaṃ pakkhipantīti yojanā. **Aññesūti** dvīhi piṇḍapātehi aññesu. **Ichanti** ruciṃ. **Soti** bimbisāro rājā. **Tavevāti** tuyhameva. **Tanti** bhagavato vacanaṃ. Rājā akāṣīti sambandho. **Teti** asītikulaputtasahassā. **Etadatthamevāti** soṇassa arahatte patiṭṭhāpanatthameva, na rañño anuggahatthanti adhippāyo.

210. Varayācanakathā

337. Kataṃ bhattakiccaṃ yenāti **katabhattakicco**, tasmim satīti sambandho. **Vuttanayenevāti** rāhulavatthumhi (mahāva. aṭṭha. 105) vuttanayeneva. **Idaṃ vatthanti** idaṃ siveyyakaṃ vatthaṃ, uppannanti sambandho. “Tāvā”ti ajjhāharitabbo. **Etthantareti** etasmim vatthuppannakālamajjhe. Koci bhikkhūti sambandho. **Tenāti** paṃsukūlikahetunā. **Ayanti** jīvako. **Gahapatīcīvaranti** ettha gahapatīnaṃ cīvaranti atthaṃ paṭikkhipanto āha “gahapatīhi dinnaṃ cīvara”nti. **Vatthadānānisamsapaṭisaṃyuttāyāti** “vatthado hoti vaṇṇado”tiādikāya (saṃ. ni. 1.42) vatthadānassa ānisamsena paṭisaṃyuttāya. Vicchāvasena vutto “itarītarenā”ti sabbanāmasaddo aniyamatthoti āha “appagghenapi mahagghenapi yena kenaci”ti. **Pāvāroti** uttarāsāngo. So hi pārūpanatthāya variyati icchiatīti pāvāroti vuccati. “Kappāsādibhedo”ti iminā tassa sarūpaṃ dasseti. **Pakatikojavamevāti** pakatiyā bhikkhūnaṃ sārūpaṃ kojavameva. Soḷasanāṭakittināṃ ṭhatvā naccayogyattā mahatī piṭṭhi etassāti **mahāpiṭṭhiyaṃ**, tameva kojavaṃ **mahāpiṭṭhiyakojavaṃ**. Tassa kira lomāni caturaṅgulādhikāni honti.

211. Kambalānujānanādikathā

338. **Kāsīnanti** kāsīnaṃ janapadānaṃ, kāsiraṭṭhe nivāsīnaṃ janānaṃ vā. **Pasenadissāti** paccuṭṭhaṃ, paṭipakkhaṃ vā senaṃ jinātīti **pasenadi** jakārassa dakāraṃ katvā. **Esāti** eso kāsīrājā. “Sahassa”nti iminā **kāsīsaddassa** saṅketasaṅkhyāṃ dasseti. **Tamaḡghanakoti** tena kāsīnā aḡghanako. Kasmā aḡḡhakāsīti (therīgā. aṭṭha. 25) vuttoti āha “ayaṃ panā”tiādi. **Ayanti** kambalo. **Panāti** kāraṇatthajotako. Yasmāti hi attho.

339. Bhañjitabbaṃ khomādīni pañca suttāni missitvā avamadditabbanti **bhaṅganti** dassento āha “bhaṅgaṃ nāmā”tiādi. **Vākamayamevāti** bhaṅganāmakena vākena nibbattameva.

340. **Teti** bhikkhū, sallakkhiṃsu kirāti sambandho. **Etassāti** padassa, atthanti sambandho. **Na acchiṃsūti** na āsiṃsu, na vasiṃsūti attho. **Nākāmāti** ettha kamudhātu icchattho yakāralopoti āha “na anicchāyā”ti. **Dātābhoti** bhāgo dātābbo. **Upacāreti** susānassa samīpe. “Akāmā bhāgaṃ dātu”nti vacanassa anekantabhāvaṃ dassetuṃ vuttaṃ “yadi panā”tiādi. **Idhāti** imaṃ susānaṃ. “Sampattā gaṇhantū”ti dentīti yojanā. **Yenāti** bhikkhunā. **Sadisā okkamīṃsūti** ettha sadisasaddo samapariyāyoti āha “samaṃ okkamīṃsū”ti. **Samanti** bhāvanapūṃsako. Samānadisāyāti vā dassento āha “ekadisāya vā”ti. Ettha pana yakāralopo daṭṭhabbo. **Bahimevāti** susānato bahi eva. **Katikanti** katena pavattaṃ saṅgamaṃ.

213. Cīvarapaṭiggāhakasammutikathā

342. “Yo na chandāgatiṃ gacchatī”tiādīsu evaṃ vinicchayo veditabboti yojanā. Nātakādīnaṃ cīvaranti sambandho. **Ekaccasminti** jane. **Vāsaddo** vikappattho. Etesu tīsu aññatarena kāraṇena chandāgatiṃ gacchati nāmāti hi attho. Āgatassāpi cīvaranti sambandho **pisaddo** garahattho. Pageva pacchā āgatassāti hi attho. **Avamaññanti** uññātaṃ. **Voti** tumhākaṃ. Natthi kinti yojanā. Muṭṭhā sati etassāti **muṭṭhassati**. Āgatānampi cīvaranti sambandho. **Pisaddo** sambhāvanattho. Pageva paṭhamāṃ āgatānanti hi attho. Etaṃ cīvarapaṭiggāhakatṭhānaṃ nāmāti yojanā. **Santasanto vāti** khedakhedo vā.

Idañcidañcāti idañca idañca cīvaraṃ. **Tasmāti** yasmā ca gacchati, yasmā ca jānāti, tasmā. **Yoti** bhikkhu. Sakkotīti sambandho. Evarūpo bhikkhu sammanitabboti yojanā.

Apalokanenapīti “itthannāmaṃ bhikkhuṃ cīvarapaṭiggāhakaṃ kātuṃ saṅghaṃ apalokemī”ti apalokanenapi, sammanitunti sambandho. **Yattha panāti** yasmim̐ pana dhuravihāre.

“Gahitaṭṭhāneyevā”ti iminā **tatthevāti** ettha tasaddassa visayaṃ dasseti. “Chaḍḍetvā”ti iminā **ujjhivāti** ettha udhadhātuyā vissajjanatthaṃ dasseti. **Cīvarapaṭiggāhakanti** padassa cīvaraṃ paṭiggaṇhātīti cīvarapaṭiggāhakoti vacanatthaṃ dassento āha “yo”tiādi. Tattha yo paṭiggaṇhāti, so cīvarapaṭiggāhako nāmāti yojanā. “Cīvarapaṭisāmaka”nti iminā cīvaraṃ gahitaṭṭhānato nīharitvā bhaṇḍāgāre dahati ṭhapatīti **cīvaranidahakoti** atthaṃ dasseti. Yo na chandātiṃ gacchatītiādīsu **ettha** etesu ca ito parañcāti yojanā.

214. Bhaṇḍāgārasammutiādīkathā

343. Yo vihāro vā yo aḍḍhayogo vā hoti, so vihārādiko sammanitabboti yojanā. “Ārāmikasāmaṇerādīhī”ti padaṃ vivittatthe apādānaṃ, karaṇampi yujjati. Paccantasenāsaṇaṃ pana na sammanitabbaṃ corādiupaddavattā. **Vihāramajjheyevāti** bhaṇḍāgāravihāramajjheyeva.

Yassāti bhaṇḍāgārassa. Idaṃ padaṃ “chadanādīsū”ti pade sāmī, “natthī”ti pade sampadānaṃ. **Yassa panāti** bhaṇḍāgārassa pana. **Yattha katthacīti** yasmim̐ kasmim̐ci ṭhāne. **Yenāti** patitahetunā. Mūsivā khādatīti **mūsiko**. Ādisaddena godhāmaṅgusādayo saṅgaṇhāti. Upa bhusaṃ, upaguhitvā vā cinantīti **upacikā**. **Tanti** ovassanādiṃ. **Hīti** saccam̐, yasmā vā. **Evantiādi** nigamaṇaṃ.

Cīvarapaṭiggāhakādīhīti ādisaddena cīvaranidahakabhaṇḍāgārike saṅgaṇhāti. **Tatthāti** tesu. Cīvarapaṭiggāhakena na gaṇhitabbanti sambandho. **Tāvāti** cīvaranidahakabhaṇḍāgārikānaṃ, tehi vā paṭhamam̐. **Yaṃ yanti** cīvaraṃ. **Tatthevāti** yathā visuṃ visuṃ katvā gaṇhāti, tatheva. **Cīvaranidahakenapīti** pisaddo na kevalam̐ paṭiggāhakeneva, atha kho nidahakenapīti sampiṇḍeti. **Tatthevāti** yathā nidahako ācikkhati, tatheva. **Tatoti** tehi cīvarehi, vibhattaapādānaṃ, tesu cīvaresu vā niddhāraṇaṃ. **Tadevāti** saṅghena vuttacīvareva.

Ittiādi nigamaṇaṃ. Bhagavatā anuññatoti sambandho. **Bhaṇḍāgāranti** bhaṇḍassa ṭhapanokāsaṃ agāraṃ. **Bhaṇḍāgārikoti** bhaṇḍāgāre niyutto. **Bāhullikatāyāti** paccayabāhullena niyuttabhāvatthaṃ. Evaṃ sante kimatthāya anuññatoti āha “api cā”tiādi. Anuggahāya anuññatoti sambandho. **Hīti** vitthāro. Neva jāneyyunti yojanā. Dve dve vā cīvareti sambandho. **Saṅghaṃ kātunti** saṅghena saṅghaṃ kātuṃ.

Na vuṭṭhāpetabboti ettha atthuddhāravasena aññepi avuṭṭhāpanīye dassento āha “aññepī”tiādi. **Hīti** vitthāro. **Tatthāti** catūsu. Saṅgho pana detīti sambandho. **Upakāratāya cāti** saṅghassa upakāratāya ca. Ettha ca purimesu tīsu ekoyeva hetu, pacchime pana dve hetavoti daṭṭhabbaṃ.

Sammukhībhūtenāti aññamaññassa mukhe saṃvijjamāno, sannipatito vā **sammukho**, sammukho hutvā bhūto **sammukhībhūto**. Bhūsaddayogattā akārassīkāro hoti, antoupacārasīmāyaṃ ṭhito saṅgho. Tamatthaṃ dassento āha “antoupacārasīmāyaṃ ṭhitenā”ti. **Kolāhalanti** bahujanehi sannipatitvā ekato kataṃ abyattasaddaṃ. Tadākāraṃ dassento āha “amhāka”ntiādi. “Cīvarabhājakesū”tiādinā agatigamanākāraṃ dasseti, taṃ suviññeyyameva. **Tulābhūtoti** tulāya sadiso hutvā bhūto, tulāya sadisabhāvaṃ patto vā. **Majjhattoti** majjhe ṭhito attā sabhāvo etassāti majjhatto.

Idanti cīvaraṃ. **Ghananti** nirantaram̐. **Tanukanti** viralaṃ. Ettha “uccinitvā”ti iminā vatthassa pamāṇena uccinanaṃ dasseti. “Tulayitvā”ti iminā agghena tulanaṃ dasseti. **Vañṇāvannaṃ katvāti**

vaṇṇaṅca avaṇṇaṅca khuddakaṅca pamāṇaṃ, mahantaṅca pamāṇaṃ katvāti attho. Ekaccāni cīvarāni appagghāni honti, ekaccāni mahagghānīti vuttaṃ hoti. **Dasadasaagghanakanti** dasahi dasahi kahāpaṇehi agghanakaṃ. **Yanti** cīvaraṃ, **bandhitvāti** navagghanakaṃ ekagghanakena, aṭṭhagghanakaṅca dviagghanakena bandhitvāti attho. **Same paṭivīseti** samapamāṇe paṭivīse ṭhapetvā, iminā “vaṇṇāvaṇṇa”nti ettha **vaṇṇasaddo** pamāṇatthoti dīpeti. **Dasa dasa bhikkhūti** idaṃ upalakkhaṇavasena vuttaṃ aññenākārenāpi gaṇetuṃ sakkuṇeyyattā. **Bhaṇḍikanti** cīvarabhaṇḍena niyuttaṃ puṭaṃ. **Kusoti** salākadaṇḍo.

Attissarāti attanāva attānaṃ issarā. Aññesaṃ vattapaṭipattinti sambandho. **Upaḍḍhabhāgoti** bhikkhūnaṃ laddhabhāgato upaḍḍho bhāgo. **Ye panāti** sāmaṇerā pana. **Samabhāgoti** bhikkhūnaṃ bhāgena samo bhāgo. **Idaṅcāti** “upaḍḍhapaṭivīsa”nti vacanaṅca, kathitanti sambandho. **Samakamevāti** bhikkhusāmaṇerānaṃ samapamāṇameva. **Tatruppādavassāvāsikanti** tasmim vihare uppādena mūlena uppāditaṃ vassāvāsikaṃ. **Phātikammanti** vaḍḍhanakammaṃ “yattakena vinayāgatena sammunjanibandhanādīnā hatthakammena viharassa ūnatā na hoti, tattakaṃ katvāti attho. **Etanti** phātikammaṃ katvā gahaṇaṃ. **Hīti** saccam. **Etthāti** tatruppādavassāvāsikagahaṇe. **Sabbesanti** akhīlānaṃ bhikkhusāmaṇerānaṃ. **Bhaṇḍāgārikacīvarepīti** bhaṇḍāgāre ṭhapite akālacīvarepi. Pisaddena tatruppādavassāvāsikamapekkhati. Sāmaṇerā ukkuṭṭhiṃ karontīti sambandho. **Apaharītakanti** haritavīrahitam. **Raṅgachallinti** rajanacchaviṃ. **Etanti** ukkuṭṭhikaraṇato samabhāgadānaṃ, vuttanti sambandho. **Ye cāti** sāmaṇerā ca. **Virajjhītvā karontīti** kattabbakālesu akatvā yathicchitakkahaṇe karonti. **Teti** sāmaṇere. **Samapaṭivīso dātabboti** “karissāmā”ti paṭiññātamattena samo paṭivīso dātabbo.

“Sakaṃ bhāgaṃ dātu”nti idaṃ vuttanti sambandho. Kiṃ sandhāya vuttanti āha “bhaṇḍāgārato... pe... sandhāya”ti. **Pahatāyāti** paharītabbāya, pahanītabbāya vā. **Tasmāti** yasmā sandhāya vuttaṃ, tasmā. **Anīhaṭesūti** bhaṇḍāgārato anīharītesu. **Imassa bhikkhunoti** uttaritukāmassa imassa bhikkhuno. **Tulāyāti** mānena.

Tesūti sātakesu, eko sātakoti yojanā. Sabbesu pātitesūti sambandho. **Ettakenāti** dvādasagghanakena. **Taṃ sutvāti** bhikkhūnaṃ taṃ vacanaṃ sutvā. **Sabbatthāti** sabbasmim saṅghagaṇasantake. Anuppādānena khipiyati pakkhipiyatīti **anukkhepanti** dassento āha “anukkhepaṃ nāmā”tiādi. Yattakaṃ agghanti sambandho. Tattakena agghena agghanaketi yojanā. **Vikallakāti** vikalassa bhāvo vikallaṃ, cīvarapuggalānaṃ apahonakabhāvo, tadeva vikallakā. “Tatthā”ti pāṭhaseso, tesu dvīsu vikallakesūti attho. **Atthīti** saṃvijjanti, nipātoyaṃ. Chindantehi ca dātabbānīti sambandho. **Dātabbānīti** ca chindītabbāni. Dāsaddo hi avakhaṇḍanattho. **Dātunti** avakhaṇḍituṃ. **Evantiādi** nigamaṇaṃ. **Etthāti** etesu vikallakesu. **Tanti** cīvaraṃ. **Athāti** tositato paraṃ. **Tatthāti** ekassa bhikkhuno koṭṭhāse. **Sāmaṇakanti** samaṇassa anurūpaṃ. **Yoti** bhikkhu. **Tenāti** parikkhārena. **Idampīti** aññaṃ sāmaṇakassa parikkhāreṇa ṭhapanampi. Pisaddena purimaṃ vatthachindanamapekkhati.

Vagganti samūhaṃ. Aṭṭha vā nava vā bhikkhū hontīti yojanā. **Tesanti** aṭṭhannaṃ vā navannaṃ vā. **Evantiādi** nigamaṇaṃ. Ayaṃ apahonakabhāvoti yojanā. Puna cīvarasseva vikallakabhāvaṃ dassento āha “athavā”tiādi. Ettha purimanaye cīvarassa ca puggalassa ca vikallakaṃ hoti, pacchime cīvarassevāti ayametesam viseso.

215. Cīvararajanakathā

344. Gihiparibhuttaṃ panāti gihinā paribhuttaṃ vatthaṃ pana, kiñci phalanti sambandho.

Sītudakāti sītaṃ udakaṃ. Liṅgavipallāso hi ayaṃ. **Uttarāḷumpanti** ettha uttara ḷumpanti padacchedaṃ katvā akārato ukārassa lopam katvā, pubbasarassa ca dīghaṃ katvā “uttarāḷumpa”nti vuccati. **Uttarāḷūti** uttaraudakaṃ. **Uḷusaddo** hi udakavācako, taṃ pāti rakkhatīti uttarāḷumpaṃ. Tassa sarūpaṃ dassento āha “vaṭṭadhāraka”nti. **Rajananti** rajanachallim. **Hīti** phalajotako. **Rajananti**

rajanudakaṃ. **Hīti** vitthāro. **Thevoti** rajanabindu. **Na visaratīti** na paggharati. **Rajanāluṅkanti** etthāpi purimanayeneva padasiddhi vedītabbā. **Rajanauḷuṅkanti** rajanasāṅkhātassa udakassa gahaṇatthāya kariyatīti rajanauḷuṅkaṃ. Daṇḍakena niyuttaṃ thālakam **daṇḍakathālakanti** dassento āha “tameva sadaṇḍaka”nti. **Rajanakuṇḍanti** rajanapakkipanaṃ mahāghaṭaṃ. **Aññatrāti** aññaṃ thānaṃ. **Patthinnasaddo** thaddhapariyāyoti āha “thaddha”nti. **Dantakāsāvānīti** ettha dantasaddena tassa vaṇṇo gahetabbo, so etesamatthīti dantāni, dantāni ca tāni kāsāvāni ceti dantakāsāvāni, tamatthaṃ dassento āha “dantavaṇṇāni”ti. Dantavaṇṇāni kāsāvāni dhārentīti sambandho.

216. Chinnakacīvarānujānanakathā

345. Dīghamariyādabaddhanti dīghena mariyādena baddhaṃ. **Catukkasaṅghānanti** catunnaṃ maggānaṃ samodhānasaṅghānaṃ. **Ussahasi tvanti** ettha upubbo sahadhātu samatthathoti āha “sakkosi tva”nti. Papubbo pana abhibhavanattho hoti “pasahati”tiādīsu. **Yo nāmāti** yo ānando ājānissati nāma, so ānando paṇḍitoti yojanā. “Kusi”ti etaṃ nāmaṃ adhivacananti yojanā. **Anuvātādīnanti** ādisaddena paribhaṇḍādīni saṅgaṇhāti. “Aḍḍhakuṣi”ti etanti yojanā.

Gīveyyakanti ettha gīvāyaṃ suttasaṃsibbitaṃ gīveyyakanti vacanatthaṃ dassento āha “gīvāveṭhanaṭṭhāne”tiādi. “Āgantukapaṭṭa”nti iminā eyyakapaccayassa sarūpaṃ dasseti. Eseva nayo **jaṅgheyakanti** etthāpi. **Etaṃ nāmanti** “gīveyyakaṃ, jaṅgheyaka”nti etaṃ nāmaṃ. **Itīti** evaṃ. **Etanti** “anuvivaṭṭa”ntiādi etaṃ. “Anuvivaṭṭa”nti etaṃ nāmanti yojanā. **Vivaṭṭassāti** majjhimakhaṇḍakassa. **Bāhantanti** ettha bāhāya upari ṭhapitā antā bāhantāti vacanatthaṃ dassento āha “bāhāyā”tiādi. **Tesanti** ubhinnaṃ mantānaṃ. **Etanti** “bāhanta”nti etaṃ.

217. Ticīvarānujānanakathā

346. “Ukkhittabhaṇḍikabhāvaṃ āpādite”ti iminā **ubbhaṇḍiteti** ettha ukkhittaṃ bhaṇḍam ubbhaṇḍam, ubbhaṇḍabhāvaṃ itā āpādītāti ubbhaṇḍītāti vacanatthaṃ dasseti. Te ubbhaṇḍite bhikkhū addasāti yojanā. **Bhisisaṅkhepenāti** bhisīyaṃ pakkhepena, pavesenāti attho, bhisīkārenāti vuttaṃ hoti. **Tatthāti** dakkhiṇāgiriṃ. Gacchantā te bhikkhūti yojanā. “Aṭṭhapamaṇāsū”ti iminā **antarattakāsūti** ettha kapaccayo pamānatthe hotīti dasseti, kesuci potthakesu pamāṇasaddo na dissati, galītoti daṭṭhabbo. Rattīsūti sambandho. **Bhagavantanti** ettha sampadānatthe upayogavacananti āha “bhagavato”ti. **Sītālukāti** ettha sītaṃ pakati etesanti sītāluno, teyeva **sītālukāti** vacanatthaṃ dassento āha “sītapakatikā”ti. Ye kulaputtā pakatiyāva sītena kilamanti, te sītālukā nāmāti yojanā. **Ekacciyaṃ** ettha ekaccasaddo ekapariyāyoti āha “ekaṃ paṭṭa”nti. Iminā ekoyeva ekacoti katvā sakatthe accapaccayoti dasseti. “Paṭṭa”nti iminā ekaccena niyuttaṃ ekacciyaṃ vacanatthaṃ katvā niyuttatthe pavattassa iyapaccayassa sarūpaṃ dasseti. **Itīti** evaṃ. Bhagavā anujānātīti sambandho. **Itareti** saṅghāṭito itare uttarāsaṅgaantaravāsake.

218. Atirekacīvarādīkathā

348. Acchupeyyanti ettha **acchi** vuccati nettamaṇḍalaṃ, taṃ viyāti acchi chiddo, tasmīṃ upagantabbaṃ upanetabbanti acchupeyyaṃ. “Laggāpeyya”nti iminā adhippāyatthaṃ dasseti. **Etthāti** paṃsukūle. **Sabbamidanti** “diguṇaṃ saṅghāṭi”ntiādīkaṃ sabbam idaṃ vacanaṃ. **Uddharitvāti** apanetvā. **Saṃsibbitanti** aññaṃ aññaṃ sambandhitvā sibbitaṃ.

351. Sovaggikanti ettha sundarāni aggāni rūpādīni etthāti saggo, pubbapade ukārassa lopo, ukārassa uvādesa “suvaggo”ti sijjhati. Suvaggappattahetukaṃ sovaggikaṃ, dānaṃ, tamatthaṃ dassento āha “saggappattahetuka”nti. “Apanetī”ti iminā **nudadhātuyā** apanayanatthaṃ dasseti. **Anāmayāti** ettha āmayasaddo rogapariyāyoti āha “arogā”ti. Natthi āmayo etissāti anāmayā.

353. Jhānalābhīnoti jhānalābhīnaṃ puthujjanānaṃ kāmaccchandanivaraṇassa vikkhambhanattā

vuttam.

356. Samodhānavasena dassiyitthāti **sandiṭṭho**. Samodhānavasena bhajiyitthāti **sambhatto**. Abhimukhaṃ lapitthāti **ālapito**. **Imehīti** imehi dvīhi.

221. Pacchimavikappanupagacīvarādikathā

359. **Katapamsukūloti** kato pamsukūlo. Iminā “**pamsukūlato**”ti padassa visesanaparapadattam dasseti. **Aggaḷāropanenāti** aggaḷassa āropanena. “Suttenevā”ti ettha evasaddena pilotikaṃ nivatteti. **Añchitvā añchitvāti** ākaḍḍhitvā ākaḍḍhitvā. **Abhidhātu** hi ākaḍḍhanattho. “Saṅghāṭikoṇo dīgho”ti iminā **vikaṇṇoti** ettha visamo kaṇṇo vikaṇṇoti katvā kaṇṇasaddassa koṇattham dasseti. **Tatoti** gaḷanato. **Lujjantīti** valiṃ gaṇhanti. **Aṭṭhapadakanti** padassa aṭṭhapadena sibbitam aṭṭhapadakanti vacanattham dassento āha “aṭṭhapadakacchinnena pattamukham sibbitu”nti. Tattha **aṭṭhapadakacchinnena pattamukham sibbitunti** aṭṭhapadalikhanena tattha tattha gabbham dassetvā pattamukham sibbitum. “Aṭṭhapadakacchannena”tipi pāṭho, aṭṭhaphalakākārenāti attho.

360. “Āgantukapattampi dātu”nti iminā **anvādikanti** padassa anupacchā āgantukabhāvena dīyatīti anvādikanti vacanattham dasseti. Catutthakkharenapi pāṭho, anupacchā āgantukabhāvena dhīyati ṭhapīyatīti **anvādhikanti** kātabbo. **Idam panāti** anvādhikam pana.

361. **Sesañātīnanti** mātāpitūhi sesañātīnam. **Vinipātetiyevāti** vinassanto nipātetiyeva.

362. “Vassiko”ti saṅketīyati gaṇhīyatīti **vassikasaṅketanti** vutte cattāro māsāti āha “cattāro māse”ti. **Hīti** saccam, yasmā vā. Āraññakassa bhikkhunoti sambandho. **Tenāti** āraññakena bhikkhunā.

222. Saṅghikacīvaruppādakathā

363. **Aññatthāti** dinnaṭṭhānato aññattha. Haṭānipi cīvarāni tuyheva santakānīti yojanā. **Tesanti** cīvarānam. **Aññoti** ekakavassāvāsikato añño. Pañcamāse tam sabbam tasseva bhikkhuno hotīti sambandho. **Yanti** cīvaram, tam sabbam cīvaranti sambandho. **Yampīti** cīvarampi. **Soti** bhikkhu, gaṇhātīti sambandho. **Vassāvāsattāyāti** vassam āvāsassa bhikkhuno atthāya. **Ṭhapitaupanikkhepatoti** veyyāvaccakarehi vaḍḍhiṃ payojetvā ṭhapitaupanikkhepatoti. **Tatruppādatoti** tasmim vihare uppādato nālīkeraārāmādīto. **Idanti** vakkhamānam. **Etthāti** “tasseva tāni cīvarāni yāva kathinassa ubbhārāyā”ti vacane. **Yanti** cīvaram. **Pana** saddo visesatthajotako. **Idanti** padālanākāramattam. **Idhāti** imasmim vihare. Abhilāpamattantipi vadanti. **Anatthatakathinassāpīti** pisaddo pageva atthatakathinassāti dasseti. **Pañcamāseti** accantasamyogathe upayogavacanam. **Tatoti** pañcamāsato. Atītavasse vassamvutthasaṅghassa idam vassāvāsikam deti kim? Udāhu anāgatavasseti yojanā. **Piṭṭhisamayeti** gimhānam paṭhamadivasato paṭṭhāya yāva assayujapuṇṇamī, tāva piṭṭhisamaye.

Vassānatoti vassānamāsato. **Etthāti** etesu cīvaresu. Keci bhikkhūti sambandho. **Tamatthanti** tassa saṅghikacīvarassa kāraṇam. **Tatthevāti** gataṭṭhāne eva. **Esāti** saṅghikacīvarahārako bhikkhu. **Tatrāti** vihārādīsu. **Nanti** cīvarahāraṇam bhikkhum.

Vattam vitthāretvā dassento āha “tena hī”tiādi. Tena bhikkhunā bhājetabbānīti sambandho. **Tassevāti** adhiṭṭhahantasēva.

Ekekaṃ bhāganti sambandho. Ettha ṭhāne ahameva asmīti yojanā. **Duggahitāni** hontīti saṅghikāneva hontīti adhippāyo. **Mayhamevimāni cīvarānīti** issaravasena gahaṇe duggahitāni. **Mayhetāni pāpuṇantīti** anissaravasena gahaṇe suggahitānīti viseso.

Pātite kuseti ettha tapaccayassa paccuppannakālikabhāvaṃ dassento āha “ekakoṭṭhāse”tiādi. **Gahitamevāti** ekakoṭṭhāse pātittassa kusadaṇḍassa vasena “imassida”nti ekakoṭṭhāse vidite sabbesaṃ viditattā gahitamevāti adhippāyo.

Itovāti sacīvarabhattatova. **Visuṃ sajjiyamāneti** cīvare ca bhatte ca visuṃ sajjiyamāne.

Yathā purimesu dvīsu vatthūsu “adaṃsū”ti vuttaṃ, tathā avatvā kasmā idha “dentī”ti vuttanti āha “saṅikaṃ saṅikaṃ dentiyevā”ti. Saṅikaṃ saṅikaṃ dente dānakiriyāya anupacchinnattā “dentī”ti paccuppannavasena vuttanti adhippāyo. **Pacchinnadānattāti** pacchinnadānakiriyabhāvato. Idaṃ pana vatthu uppananti sambandho. **Ime ca therāti** nilavāsīdayo vinayadharapāmokkhā ime ca therā.

223. Upanandasakyaputtavatthukathā

364. Etthāti upanandavatthumhi. **Tassāti** upanandassa. **Gāmakāvāsino**ti gāmake āvāsino. **Ayanti** upanando. **Mukharoti** mukhaṃ kharaṃ etassāti mukharo khakāralopo, atha vā mukhaṃ etassatthīti mukharo mantutthe pavatto rapaccayo nindatthavācako. **Lahukāpattīti** dukkaṭāpatti. **Tassevāti** gahitabhikkhusseva. Dhuranikkhepe satīti yojanā.

Ekassa puggalassatthāya adhippiyate icchiyateti **ekādhippāyo**, ekapuggalapaṭivīso, tenāha “ekapuggalapaṭivīsamevā”ti. **Yathā yathāti** yena yenākārena. **Yoti** paṭivīso. “Tathā tathā”ti ajjhāharitabbo. **Tatthāti** “idha panā”tiādivacane. Ekekasmiṃ āvāseti sambandho. Vāsaddo aññepi dvīhadvīhādivāre saṅgaṇhāti. **Yanti** paṭivīsaṃ. **Eko puggaloti** eko niccāvāso puggalo. **Evanti** upaḍḍhe diyyamāne. **Yattha vā panāti** ettha yasaddassa visayaṃ dassetuṃ vuttaṃ “evaṃ purimasmi”nti. Purimasmiṃ āvāseti sambandho. **Tatoti** ettha tasaddassa visayaṃ dassento āha “bahutaraṃ vasitavihārato”ti. **Idaṅcāti** “amutra upaḍḍho cīvarapaṭivīso dātabbo”ti vacanañca. **Ekaśīmavihārehīti** ekissaṃ upacārasīmāyaṃ ṭhitehi vihārehi. **Nānāsīmavihāreti** nānāupacārasīmāyaṃ ṭhite vihāre. **Senāsanaggāhoti** purimaupacārasīmāyaṃ senāsanaggāho. **Tatthāti** passambhanavihāre. **Sesanti** cīvarato sesaṃ. **Sabbatthāti** sabbesu vihāresu. **Antosīmagatassāti** antoupacārasīmāyaṃ gatassa, bhikkhunoti sambandho. Cīvaraṃ senāsanaggāhasseva pāpuṇāti, sesaṃ pana āmisabhesajjādisabbaṃ aññavihārato āgantvā antosīmagatassa pāpuṇātīti adhippāyo.

224. Gilānavatthukathā

365. Mañcake nipātesunti ettha mañcake nipātanaṃ nāma mañcake nipajjāpananti āha “mañcake nipajjāpesu”nti. **Muttakarīsakiliṭṭhanti** muttakarīsehi kiliṭṭhaṃ. **Yoti** yo koci. **Manti** mama. Tamatthaṃ dassento āha “ovādānusāsānikaraṇenā”ti. Mama ovādassa ca anusāsaniyā ca karaṇenāti attho. **Etthāti** “yo bhikkhave maṃ upaṭṭhaheyyā”tiā dipāṭhe. Suttassa neyyatthattā agahetabbatthaṃ dassento āha “bhagavato cā”tiādi. **Yassāti** gilānassa. **Upajjhāyādayoti** ettha ādisaddena ācariyasaddhivihārikaantevāsikasamānupajjhāyakasamānācariyakasaṅkhāte pañca jane saṅgaṇhāti. Ekacāriko vā hotīti sambandho. **Saṅghattheropīti** pisaddo pageva aññesanti dasseti.

366. Abhikkamantaṃ vāti ettha abhimukhaṃ kamatīti abhikkamantoti vutte vaḍḍhanatthoti āha “vaḍḍhantaṃ vā”ti. Ābādhaṃ nāvīkarotīti sambandho. Iminā antapaccayassa sarūpaṃ dasseti. Idaṃ nāma bhojananti sambandho. **Samvidhātuntī** ettha saṃvipubbo dhādhātu karadhātvattho, karadhātu ca sabbadhātvattho, tasmā vuttaṃ “bhesajjaṃ yojetu”nti. **Assāti** gilānupaṭṭhākassa. Antarasaddassa majjhatthādayo paṭikkhipanto āha “kāraṇaṃ vuccatī”ti.

225. Matasantakakathā

367. Kālaṅkateti ettha karaṇaṃ katanti dassento āha “kālakiriyāyā”ti. **Apaloketvāti** “itthannāmo

bhante bhikkhu kālāṅkato, tassa ticīvaraṅca pattaṅca gilānupaṭṭhākānaṃ dātuṃ saṅghaṃ apalokemī”ti apaloketvā.

369. Gilānupaṭṭhākālābheti gilānupaṭṭhākānaṃ labhitabbe.

Sabbepi bhikkhūti sambandho. **Tatthā**ti tasmim kālāṅkate. Kim vadanti? “Sabbepi...pe... sāmīno”ti vadantīti yojanā. Dvīsu vādesu pacchimavādo aṭṭhakathācariyena ruccatīti vadanti. **Yanti** yaṃ vatthu. “Yaṃ atthi, taṃ dātabba”nti vuttamevatthaṃ āvikaronto āha “aṅṅasmim...pe... dātabba”nti. **Tanti** parikkhāraṃ.

Samakoti samaṃ pamāṇametassa bhāgassāti samako. **Samvidahanamattamevā**ti idaṅcīdaṅca karohīti sajjanamattameva. **Jeṭṭhakabhāgo**ti diguṇabhāgo.

Yo panāti bhikkhu pana. **Etthā**ti bahūsu bhikkhūsu. **Yenā**ti yena kenaci, dinnam paṭiyāditanti sambandho. **Ekadivasampī**ti pisaddo pageva dvīhādiketi dasseti. **Sopī**ti pisaddo na kevalam bahudivasam upaṭṭhākoyeva, atha kho sopīti dasseti. **Samīpanti** gilānassa santikaṃ. **Āgacchatī** samīpamāgacchati.

Paccāsīsāyāti bhāgassa paccāsīsāya. “Puna āgantvā jaggissāmī”ti iminā “puna āgantvā na jaggissāmī”ti gacchantassa na dātabbanti dasseti. **Dhuraṃ nikkhipitvā**ti upaṭṭhahane dhuraṃ nikkhipitvā.

Mātugāmopi hotūti yojanā. **Tassa bhikkhunoti** kālāṅkatassa tassa bhikkhuno. Sacepi sahasam agghati, gilānupaṭṭhākānaṃyeva dātabbanti yojanā. **Aṅṅanti** pattacīvarato aṅṅam. **Teti** gilānupaṭṭhākā. **Avasesanti** pattacīvarato avasesam. **Tatoti** bahukamahagghato. **Ticīvaraparikkhāro**ti tiṇṇam cīvarānaṃ parivāro. **Sabbañcetanti** sabbameva etaṃ parikkhāraṃ. **Labhatī**ti gilānupaṭṭhāko labhati.

Soti kālāṅkato. **Kassacī**ti gahaṭṭhassa vā pabbajitassa vā. **Tassevā**ti dinnagāhakseva. **Ruciya evā**ti kāmā eva. **Tattha tattha saṅghassevā**ti tasmim tasmim vihāre ṭhitassa saṅghasseva. Idaṃ vihāre ṭhapitaparikkhāre sandhāya vuttam. Sace gāme vā araṅṅe vā ṭhapitā honti, sakalova saṅho issaro. Kasmā? Saṅghasseva dāyajjabhāvato. **Bahūnampī**ti tīhi paṭṭhāya bahūnampi. Īdisavacanam upanidhāya sāsanepi eko dve bahūti tīhi vacanāni atthe dissanti, sadde pana dvivacanabahuvacanānaṃ visesābhāvato dvivacanam natthīti daṭṭhabbam. **Adinnamevā**ti attanoyeva asantakattā, aṅṅesampi sādharāṇattā ca adinnameva. Sace sabbe matā anumatiyā denti, sudinnameva. **Tanti** santakaṃ. **Tesū**ti tesu sabbesu.

227. Kusacīrādipaṭṭhāpakathā

371. “Akkanālamaya”nti iminā akkanāleṇa nibbattam **akkanā**lanti vacanattham dasseti. **Makacimayoti** ettha makacisaddena **potthakasadda** ganthādayo atthe nivatteti. Mayasaddena purimanayeneva nibbattataddhitam dasseti. **Sesānī**ti akkanālapotthakehi sesāni kusacīrādīni. **Tesū**ti kusacīrādīsu.

372. **Tipaṭṭacīvarassa vā**ti idaṃ dvipaṭṭacīvarassa majjhe dānaṃ sandhāya vuttam. **Tesanti** sabbanīlakādīnaṃ. **Kaṅcukanti** vāraṇam. Tañhi kaciyaṭi kāye bandhiyaṭi kaṅcukoti vuccati. **Veṭhanepī**ti unḥīsepi. Tañhi yasmā yena sīse veṭhiyaṭi, tasmā veṭhananti vuccati. **Rukkhachallimayanti** ettha rukkhachallisaddena **tirīṭasadda** vakkalattham dasseti. Vakkalañhi nivasanānaṃ aṅgapaccāṅgam tirobhāvaṃ paṭicchannabhāvaṃ eti gacchati anenāti vā rukkham tiropaṭicchannam hutvā eti pavattatīti vā **tirīṭanti** vuccati. Abhidhāne (abhidhānappadīpikāyaṃ 442 gāthāyaṃ) pana **tarīṭanti** takāre ikāravirahito pāṭho atthi. **Pādapuñjananti** pādo pujiyaṭi sodhiyaṭi anenāti pādapuñjanaṃ, tālujo tatiyakharo.

374. Sante patirūpake gāhaketi ettha patirūpako nāma pakkamantassa bhikkhuno sandiṭṭhasambhatto. Iminā patirūpake gāhake asati adatvā saṅghena bhājite subhājitamevāti dasseti. **Satta janāti** pakkamantaummattakakhittacittavedanaṭṭā cattāro, ukkhittakā tayoti satta janā.

230. Saṅghe bhinne cīvaruppādakathā

376. Saṅgho bhijjatiti ettha dvikoṭṭhāsavasena bhijjanamevādhippetam, na aññanti āha “dve koṭṭhāsā”ti. Ekasmiṃ pakkhe cīvarāni dentīti yojanā. Dvipakkhaṃ sandhāya “**sakalassa saṅghassā**”ti vuttam. **Etanti cīvaram**. **Tasseva cīvaranti** tassa koṭṭhāsassa cīvarameva. **Yatthāti** yasmiṃ dese. **Dakkhīnodakam pamāṇanti** dakkhīnodakameva pamāṇam, na deyyadhammo. Tasmā dakkhīnodakam paṭiggaṇhantā, deyyadhammassa sāmīno hontīti adhippāyo. Ubhohipi pakkhehīti yojanā. **Parasamuddeti** jambudīpe. So hi sīhaḷadīpato samuddassa pārattā parasamuddoti vuccati. **Itaro pakkhoti** dakkhīnodakassa ca cīvarassa ca laddhapakkhato itaro aladdho pakkho.

232. Aṭṭhacīvaramātikākathā

379. Idāni āhāti sambandho. **Puggalādhiṭṭhānanayenāti** “sīmāya detī”ti kattuvācakena kiriyāpadena dāyakapuggalasaṅkhātakattuno adhiṭṭhānavasena vuttattā puggalādhiṭṭhānena nayena. **Etthāti** etāsu aṭṭhasu mātikāsu. Aṭṭhamā mātikāti yojanā. **Tatthāti** aṭṭhasu mātikāsu. **Sabbatthāti** sabbesu “katikāya detī”tiādīsu.

Sīmāya...pe... bhājetabbantiādīmhi mātikāniddese pana evaṃ vinicchayo veditabboti yojanā. **Sīmāya detīti** ettha pannarasa sīmā veditabbāti sambandho.

Tatthāti pannarasasu sīmāsu. Upacārasīmā paricchinnā hotīti sambandho. Ettakam ṭhānanti parikkhepārahaṭṭhānassa ekantena avuttattā ekantena parikkhepārahaṭṭhānam dassento āha “**apicā**”tiādi. Dhuvassannipātato vā khipitānanti sambandho. “Pariyante”ti padaṃ pubbāparāpekkham. Tasmā tīsu nissakkapadesu yojetabbaṃ. **Sā panāti** upacārasīmā pana. Bhikkhūsu vaḍḍhantesu āvāsopi vaḍḍhatīti manasikatvā vuttam “bhikkhūsu vaḍḍhantesū”ti. Sabbesaṃ bhikkhūnanti sambandho. **Vuttamevāti** sīmākathāyaṃ (mahāva. aṭṭha. 138, 144) vuttameva.

Apica khoti ettha apisaddo pucchattavācako. Kehi ṭhapitāti hi attho. Rājarājamahāmattā ṭhapentīti sambandho. **Lābhasīmāti** lābhassa mariyādo. **Yanti** yo lābho. **Etthantareti** etasmiṃ gāvutādiantare. **Lābhasīmā nāmāti** lābhena paricchinnā sīmā nāma. **Tatthāti** bahūsu janapadesu. **Antaradīpā cāti** mahādīpato aññadīpā ca, khuddakadīpāti adhippāyo.

Ettheva sīmāyāti khaṇḍasīmāya eva. **Tesaṃyevāti** khaṇḍasīmāgatānaṃyeva. Evatthaphalaṃ dassento āha “aññesa”ntiādi. Rukkhe vā pabbate vā ṭhitassa vā heṭṭhā pathavīmajjhagatassa vā bhikkhussāti yojanā. Imissā upacārasīmāya ṭhitassāti sambandho. **Samānasamvāsasīmāyāti** mahāsīmāya. **Khaṇḍasīmāntarikāsūti** khaṇḍasīmāyañca dvinnaṃ sīmānaṃ sīmāntarikāyañca. Tattha dvinnaṃ gāmaṭṭhānampi pāpuṇāti. Avippavāsasīmāya dinnaṃ gāmaṭṭhānaṃ na pāpuṇāti “ṭhapetvā gāmañca gāmūpacārañcā”ti vuttattā.

Jambuyā lakkhito dīpo **jambudīpo**. Tambo lohito pāṇi hattho etesanti **tambapāṇino**. Vijayakumārādayo sattasatā janā. Tesam nivāso **tambapaṇṇi**, soyeva dīpoti **tambapaṇṇidīpo**, tasmīṃ. Sabbesaṃ bhāganti sambandho. **Tatrevāti** jambudīpeyeva. **Evantiādi** nigamaṇam.

Yo pana bhaṇatīti sambandho. **Tatoti** kathanato, paranti sambandho. **Nanti** mahāsivattheram. **Tiyojanāpīti** pisaddo tato unāpi hotīti dasseti. **Sabbampetanti** sabbampi etaṃ lābhagaṇhanādīm. Iti āhaṃsūti yojanā.

Katikānaṃ yathicchitakatena pavattattā bahu hoti, tasmā idha icchitakatikaṃ dassetuṃ vuttaṃ “samānalābhakatikāyā”ti. **Tatrāti** “katikāya deti”ti pāṭhe. Sannipatitehi bhikkhūhi bhājetabbanti sambandho. **Tassāti** vihārassa. **Buddhādhivutthoti** buddhena adhi issaravasena vasiyitthāti buddhādhivuttho. **Ettāvatāti** ettakena sāvanamattena. **Nisinnovāti** nisinno eva hoti, nisinno iva vā. **Tasmiṃ vihārepīti** tasmiṃ porāṇakādivihārepi. **Evamevāti** “ayaṃ porāṇako vihāro tena navavihārena saddhiṃ samānalābhaṃ kātuṃ saṅghassa rucati”tiādina evameva. **Idhāti** porāṇakavihāre. **Tasminti** navavihāre. **Evanti** yathā ekena vihārena saddhiṃ eko vihāro kātabbo, evaṃ tathāti attho.

Bhikkhāpaññattiyāti ettha bhikkhā paññapiyati niccavasena ṭhapiyati etthāti bhikkhāpaññattīti dassento āha “attano pariccāgapaññāpanaṭṭhāne”ti. **Tassāti** “yattha saṅghassa dhuvakārā kariyanti”tipāṭhassa. Attho evaṃ veditabboti yojanā. **Yattha vāti** yasmiṃ vā ṭhāne. **Anenāti** cīvaradāyakena. Salākabhattādīni vā nibaddhāni kāritānīti sambandho. **Yena panāti** cīvaradāyakena pana. **Sakalopi vihāroti** sakalopi saārāmo vihāro. **Tatthāti** cīvaradāyake. **Imeti** pākavattassa vattanaṭṭhānādayo vihārā. Dhuvena kariyantīti **dhuvakārā** vihārā. **Soti** cīvaradāyako. **Yatthāti** yasmiṃ ṭhāne. **Sabbatthāti** sabbesu bahūsu vihāresu.

Tehīti bahutarehi bhikkhūhi. **Dhuvakāresūti** niddhāraṇe bhummaṃ. **Ekatthāti** ekasmiṃ dhuvakāre. “Sace bhikkhugaṇanāya gaṇhathāti vadati”ti iminā sace na vadati, bhikkhugaṇanāya bhājetvā gaṇhituṃ na vaṭṭatīti dasseti, vihāragaṇanāya gaṇhituṃ vaṭṭatīti adhippāyo. **Tathāti** yathā “bhikkhugaṇanāya gaṇhathā”ti vadati, tathāti attho. **Etthāti** bhājetabbavatthūsu. **Tanti** mañcapīṭhakaṃ, pucchitvā dātabbanti sambandho. **Pucchitvāti** dāyakaṃ pucchitvā, **vadatīti** dāyako vadati. **Saṅghassāpīti** pisaddo na dāyakassevāti dasseti.

Upacārasīmāyaṃ ṭhitena saṅghena bhājetabbanti sambandho. **Sīmatṭhassāti** upacārasīmāyaṃ ṭhitassa. **Asampattassāpīti** bhājanaṭṭhānaṃ asampattassāpi. **Alasajātikāti** kosajjajātikā. **Ṭhitikāti** pabandhavasena ṭhiyate **ṭhiti**, sāyeva **ṭhitikā**. Atha vā “ṭhitaṭṭhānato paṭṭhāya dātabba”nti aṭṭhakathāyaṃ (mahāva. aṭṭha. 379) vuttattā ṭiṭṭhati pabandhavasena etthāti **ṭhiti**, sāyeva **ṭhitikāti** vacanatto kātabbo. **Ṭhitikaṃ ṭhapetvāti** vīsativassasaṅkhātaṃ ṭhitikaṃ ṭhapetvā. **Tesanti** therānaṃ.

Sampattasampattānanti bhājanaṭṭhānaṃ sampattasampattānaṃ. Attano vihāradvāre vā attano antovihāreyeva vāti yojanā. **Sīmāti** upacārasīmā. Therānaṃ ārūḷhe satīti yojanā. **Vassaggenāti** vassagaṇanāya.

Pāṭekkanti paccekaṃ. Sabbāneva cīvarānīti sambandho. Dubbhāsidaduggahitānamatthaṃ dassento āha “gatagataṭṭhāne saṅghikāneva hontī”ti. **Ekanti** dasasu vatthesu ekaṃ.

Vatthasseva pupphaṃ vā vali vā atthīti yojanā. **Tenāti** pupphavalinā. **Ekaṃ tantanti** ekaṃ suttaṃ. **Tatthāti** tesu ṭhitikāya ṭhānāṭṭhānesu. Dvīhipi gahetabbaṃ ṭhitikāya abhāvato.

Bhikkhu attano santakaṃ yaṃ cīvaranti yojanā. **Paṃsukūlikānampi vaṭṭatīti** “saṅghassa demā”ti vā “tuyhaṃ demā”ti vā avatvā “bhikkhūnaṃ dema, therānaṃ demā”ti vuttattā paṃsukūlikānampi vaṭṭati. Bhikkhutherā nāma hi na attanāyeva hontī, aññepi bahū, tasmā vaṭṭati. “Saṅghassā”ti vutte attanā ekantena saṅghoyeva, tasmā “saṅghassā”ti vuttepi na vaṭṭati, pageva “tuyha”nti vutte.

Tatoti bahuvatthato. **Gahetuṃ na vaṭṭatīti** paṃsukūlikānaṃ gahetuṃ na vaṭṭati.

Yanti vatthaṃ. **Tatthāti** parikkhāresu. **Suttanti** tantam.

Evaṃ antosīmaṃ pavisitvā “saṅghassa demā”ti dinne vinicchayaṃ dassetvā bahisīmāya dinne taṃ dassento āha “sace panā”tiādi. **Ekabaddhā cāti** dvādasahatthamanatikkamitvā ekatobaddhā ca. **Ye**

panāti bhikkhū pana.

Ubhatosaṅghassa detīti ettha catunnaṃ vākyānaṃ vasena vuttepi ubhatosaṅghassa detiyeva nāmāti dassento āha “ubhatosaṅghassa dammīti vuttepi”tiādi. **Ubhatosaṅghaggahaṇena gahitattāti** puggalassa ubhatosaṅghaggahaṇena gahitattā. “Eseva nayo”ti iminā ekavīsati paṭivīse katvā eko cetiyassa dātabboti nayaṃ atidisati. **Pāpuṇanakotṭhāso** nāma natthi cetiyassa ubhatosaṅghaggahaṇena agahitattā.

Tatthāti ubhatosaṅghapuggalacetiyesu. Sesam suviññeyyameva.

Pubbeti buddhassa bhagavato dharamānakāle. **Tadāti** yadā buddho bhagavā dharati, tadā. **Paṭimaṃ vāti** paṭibimbaṃ vā. Tañhi bhagavatā paṭi sadisaṃ mānīyatīti paṭimāti vuccati. **Cetiyaṃ vāti** thūpaṃ vā. So hi devamanussehi cititabbaṃ, pūjetabbaṃ, iṭṭhakādīhi vā cinitabbanti cetiyanti vuccati. **Tatthāti** deyyadhammesu. **Yanti** kiriyāparāmasanaṃ. Yaṃ dentīti yojanā. **Tatthāti** tasmim dāne. Aniyamavācakassa “yo”ti sabbanāmassa atthaṃ dassento āha “pabbajito vā gahaṭṭho vā”ti. **Vattaṃ katvā paribhuñjīti** pubbakālaparakālakiriyānaṃ vikāravasena aniyatattā vuttaṃ “bhuñjivā pacchāpi vattaṃ kātu”nti.

“Dūrampi haritvā pūjetabba”nti iminā jaṅghapesanikakammaṃ na hotīti dasseti. Harantassa bhikkhunoti sambandho. **Gacchatoti** anādare sāmivacanaṃ. **Tanti** saṅghassa āhaṭṭhabbataṃ.

Vassaṃvutthasaṅghassāti vassaṃ vasitthāti vassaṃvuttho. Aluttakitantasamāsoyaṃ, soyeva saṅgho vassaṃvutthasaṅgho, tassa. **Yāvātikasaddo** yattakapariyāyoti āha “yattakā”ti. **Disāpakkantassāpīti** aññaṃ disaṃ pakkantassapi, dātabbanti sambandho. **Vadantīti** aṭṭhakathācariyehi apare ācariyā vadanti. **Etanti** vacanaṃ.

Sampattānanti dinnatṭhānaṃ sampattānaṃ. **Sabbesanti** yattha katthaci vutthavassānaṃ sabbesaṃ. **Tatrāti** vihāre. **Tatrāti** tasmim vadane sati, tesu bhikkhūsu vā. Vassaṃ vasantīti **vassaṃvasantā**, tesam. **Cīvaramāseti** cīvarena lakkhite pacchimakkattikamāse.

Hemantassa pacchimo divasoti phagguṇapūṇṇamāsānkhāto hemantassa pacchimo divaso. **Vassāvāsikanti** vassaṃ āvasantānaṃ dātabbaṃ cīvaram. Āropetabbākāraṃ dassento āha “atītavassāvāsassā”tiādi. Tattha **atītavassāvāsassāti** atītavassaṃ, atītavasse vā āvāsassa saṅghassa. **Tanti** cīvaram.

Ṭhapetvāti vihāre ṭhapetvā. **Sampattānanti** imaṃ ṭhānaṃ sampattānaṃ. **Itoti** cīvaradānakālato. **Teti** antovasse vutthabhikkhū.

Ādissāti padassa tvāpaccayantabhāvaṃ dassento āha “ādisitvā”ti. Ayamatto veditabboti yojanā. **Tatrāti** “yāguyā vā”tiā dipāṭhe. **Ajjatanāya vāti** ajja bhavānaṃ puññaṃ atthāya vā. **Tesanti** nimantakānaṃ, pavīṭṭhānaṃ bhikkhūnanti sambandho. **Yehi nimantitehīti** nimantitehi yehi bhikkhūhi. Yesam vā pattanti sambandho. **Tesam na pāpuṇātīti** sabbesaṃ tesam na pāpuṇāti, kasmā? Animantitattā. **Tesam na pāpuṇanti**, kasmā? Nimantitagehaṃ apavīṭṭhattā. **Soti** dāyako.

Pubbepīti ito pubbepi. **Assāti** dāyakassa. **Vāsetvāti** vāsāpetvā. **Soti** dāyako. **Yoti** bhikkhu, vasatīti sambandho. **Tānīti** bhesajjāni. **Idanti** cīvaram.

“Antevāsikānañcā”ti padena saddhivihārikāpi gahetabbā uddesādivasena ante vasanasīlattā. **Uddesaṃ gahetuṃ āgato ca gahetvā gacchanta cāti** ime ante avasanasīlāpi rūḷhivasena **antevāsikā** nāma. Iminā nissayaṃ gahetuṃ āgato ca therassa santike nissayaṃ gahitapubbo ca **antevāsiko** nāmāti

dasseti. Vattaṃ katvā uddesaparipucchādīni gahetvā vicarantānaṃ sabbesaṃ uddesantevāsikānaṃ pāpuṇātīti yojanā. Iminā saddhivihārikanissayantevāsikaupasampadantevāsikapabbajjantevāsikāpi gahetabbā tesampi nibaddhacārikabhikkhubhāvato. **Sabbatthā**ti sabbasmiṃ cīvarakkhandhake.

Iti cīvarakkhandhakavaṇṇanāya yojanā samattā.

9. Campeyyakkhandhakaṃ

234. Kassapagottabhikkhuvatthukathā

380. Campeyyakkhandhake **gaggarāya pokkharaniyā**ti ettha gaggarasaddassa nāmasaddabhāvaṃ dassento āha “gaggaranāmikāya itthiyā”ti. Iminā gaggarasaddo gaggaraiti nāmaṃ pavattinimittaṃ katvā itthidabbaṃ vadatīti dasseti. **Tantiṭṭibaddhoti** tantiyā ṭṭibaddho. “Ussukkampi akāsi yāguyā”tiādīsu evaṃ vinicchayo veditabboti yojanā. **Tassa bhikkhunoti** kassapagottanāmakassa tassa bhikkhuno. **Tatthevā**ti vāsabhagāmeveva.

382. Adhammena vaggakammaṃ karontītiādīnaṃ nānākaraṇanti sambandho.

236. Ānattivipannakammādikathā

385. Aññatrāpi dhammāti ettha **dhammā**ti upayogathe nissakkavacanametanti āha “aññatra dhamma”nti. “Aññatrā”ti nipātapayoge dutiyāṭṭiyāpañcamīsū aññatarassa sambhavato upayogavacanampi hoti. Tasmā vuttaṃ “ayameva vā pāṭho”ti. “Bhūtena vatthunā”ti iminā dhammasaddassa saccatthaṃ dasseti. “Eseva nayo”ti iminā saddasabhāvameva sandhāya atidisati, na atthaṃ. Tena vuttaṃ “ettha panā”tiādī. **Satthusāsana**nti satthu āṇā. **Satthuāṇā** nāma ñattianusāvanānaṃ sampadāti āha “ñattisampadā anusāvanasampadā cā”ti. “Ṭṭikuṭṭhañceva katañcā”ti iminā **ṭṭikuṭṭhakata**nti padassa dvandavākyāṃ dasseti. Ṭṭikusitabbanti **ṭṭikuṭṭhaṃ**, kattabbanti **kataṃ**, kammaṃ. Tamevatthaṃ dassento āha “yaṃ aññesū”tiādī. Tattha **yanti** kammaṃ.

387. Pāḷiyāti vinayapāḷiyā. **Yanti** kammaṃ, na kariyatīti sambandho. **Etthā**ti aṭṭhakathāyaṃ. **So ca khoti** so ca vitthāro, āgatoti sambandho. Kasmā ñattidutiyañatticatutthakammānameva vasena āgato, nanu ñattiapalokanakammavasena āgatena bhavitabbanti āha “yasmā panā”tiādī. Ānattidutiyañatticatutthesu hāpanaṃ vā aññathā karaṇaṃ vā atthi viya ñattikamme natthīti yojanā. Ānattikamme ñattiṭṭhapanato aññakiccassa asambhavato hāpanaṃ vā aññathā karaṇaṃ vā natthīti adhippāyo. **Tānī**ti ñattikammaapalokanakammāni. **Sabbesampi kammā**nti sabbesampi catunnaṃ kammānaṃ. **Paratoti** parasmiṃ parivārāvasāne (pari. aṭṭha. 482).

237. Catuvaggakaraṇādikathā

388. Yadidaṃ kammanti yojanā. **Tesanti** saṅghānaṃ. **Kammappattoti** ettha kammena, kammaṃ vā pattoti atthaṃ ṭṭikkhipanto āha “kammaṃ patto”ti. “Sabbakammesu kammappatto”ti pāḷinayena “kammesu patto”ti atthopi yujjati. Lokavohārasena “kammena kammaṃ vā patto”ti atthopi yujjateva.

389. Parisatoti parisakāraṇā. **Tatthā**ti “catuvaggakaraṇaṃ bhikkhave”tiādīpāṭhe, catuvīsatiṭṭhalesu vā. **Kammanānāsamvāsakoti** ukkhepanīyakammakato. **Laddhinānāsamvāsakoti** ukkhittānuvattako. “Hutvā”ti iminā “bhikkhunīcatuttho”tiādīsu catuvīsatiyā ṭṭhānesu kiriyāvisesanabhāvaṃ dasseti. Bhikkhunī catutthī etassāti bhikkhunīcatuttho, catuvaggo saṅghotiādīnā vacanattho kātabbo.

393. Parivāsādītiādisaddena mūlāyakassanamānattaabbhānāni saṅgaṇhāti. **Tesanti** parivāsādīkammānaṃ. **Paratoti** parasmim cūlavagge (cūlava. aṭṭha. 75 ādayo).

394. Paṭikuṭṭhakatakammassāti paṭikuṭṭhassa hutvā katassa kamma. **Pakatattassāti** ettha pakatisīlasaṅkhāto attā sabhāvo etassāti pakatattoti atthaṃ dassento āha “avipannasīlassā”ti. Saṅghādisesaṃ anāpajjantassāpi avipannasīlattā vuttaṃ “pārājikaṃ anajjhāpannassā”ti. Iminā saṅghādisesaṃ āpajjantopi pakatattoyevāti dasseti. Sopi hi idha avipannasīlo nāma, aññattha pana saṅghādisesassa sīlavipattibhāvato taṃ āpajjantopi vipannasīloyeva nāma. **Ānantarikassāti** ettha anantarasaddassa sambandhañca ṇikapaccayassa atthañca dassento āha “attano anantaraṃ nisinnassā”ti. Tatha “attano”ti iminā anantarasaddassa sambandhaṃ dasseti. “Nisinnassā”ti iminā ṇikapaccayassa atthaṃ dasseti.

239. Dvenissāraṇādīkathā

395. Vatthutoti vatthukāraṇā. **Tatthāti** “dvemā bhikkhave”tiā dipāṭhe. “Sandhāya vutta”nti iminā “appatto”tiādisuttassa neyyatthabhāvaṃ dasseti. **Hīti** saccaṃ, yasmā vā. **Tanti** pabbājanīyakammaṃ. Puna **tanti** pabbājanīyakammameva. Esa bhikkhu appattoti sambandho. Kasmā appattoti āha “yasmā”tiādi. **Āveṇikalakkhaṇenāti** avinā hutvā pavattena lakkhaṇena. Attanā avinā hutvā attano santakena visuṃ bhūtena lakkhaṇenāti vuttaṃ hoti. Yadi appatto, kasmā sunissāritoti āha “yasmā panassā”tiādi. **Assāti** bhikkhussa, kareyyāti sambandho. Taṃ ce saṅgho tajjanīyakammādivasena nissāreti, sunissāritoti sambandho. **Soti** bhikkhu. Yasmā anuññātā, tasmā sunissāritoti yojanā. Kittakena aṅgena anuññātāti āha “ekenapi aṅgenā”ti.

396. Osāraṇāti ettha otyūpasaggavasena saradhātu pavesanatthoti āha “pavesanā”ti. **Tatthāti** “osāraṇā”tiā dipāṭhe. **Osāretīti** ettha abbhānādivasena pavesanaṃ paṭikkhipanto āha “upasampadakammavasenā”ti. **Sahassakkhattumpīti** pisaddo garahattho. Ekavārādi ke pana kā nāma kathāti dasseti. **Sātisārāti** sadosā. **Tathāti** yathā ācariyupajjhāyā sātisārā, tathā. Seso kārakasaṅgho sātisāroti sambandho. “Hatthacchinnādayo pana dvattiṃsa suosāritā”ti vuttattā andhamūgabadhīraṇaṃ apabbajitānampi upasampadā ruhatīti daṭṭhabbaṃ. **Teti** hatthacchinnādayo dvattiṃsa.

397. Abhūtavatthuvasenāti asaccavatthuvaseṇa, asaṃvijjamānavatthuvaseṇa vā. **Tatthāti** “idha pana bhikkhave”tiā dipāṭhe. **Paṇinissajjitāti** ettha tapaccayassa kammaṭṭhe pavattabhāvaṃ dassento āha “paṇinissajjitabbā”ti.

241. Upālīpucchākathā

400. Tatthāti upālīpañhesu. Tassapāpiyasikādīhi saddhiṃ ekā pucchā katāti yojanā. Bhikkhūnampi vāreti sambandho. Pisaddena “na kevalaṃ upālīpañhesuyeva yojetabbāni, atha kho bhikkhūnaṃ vārepī”ti dasseti.

242. Tajjanīyakammakathā

407. “Idha pana bhikkhave bhikkhu bhaṇḍanakāraḷo”tiādi vuttanti sambandho. **Tatthāti** “idha pana bhikkhave”tiā dipāṭhe. **Anapadānoti** ettha apapubbo dāsaddo avakhaṇḍanatthoti āha “apadānaṃ vuccati paricchedo”ti. Natthi apadānaṃ avakhaṇḍanaṃ āpattipariyanto etassāti apadānoti vacanattho kātabbo. Sāyeva pālī vuttāti sambandho. **Tatthāti** tassaṃ pālīyaṃ. Kiñci atthavinicchayaṃ pālīanusāreṇa viditūṃ na sakkā na hotīti yojanā.

Iti campeyyakkhandhakavaṇṇanāya yojanā samattā.

10. Kosambakakkhandhakam

271. Kosambakavivādakathā

451. Kosambakakkhandhake ayamanupubbikathā evaṃ veditabbāti yojanā. Vinayaṃ pālito ca, tadatthato ca dhāretīti **vinayadharo**, tathā suttantaṃ dhāretīti **suttantiko**. **Tesūti** dvīsu bhikkhūsu. Suttantiko bhikkhu nikkhamīti sambandho. **Ācamanaudakāvasesanti** ācameti dhovati anenāti **ācamanaṃ**, tameva udakaṃ ācamanaudakaṃ, tameva avasesaṃ ācamanaudakāvasesaṃ, avasesaācamanaudakanti attho. **Taṃ bhikkhūnti** suttantikaṃ bhikkhuṃ. **Etthāti** ācamanaudakāvasesaṃtthapane. “Sace hoti, desessāmi”’ti iminā attano subbacabhāvañca sikkhākāmatañca dasseti. **Teti** tayā, kathanti sambandho. Atha vā teti tuyhaṃ, natthīti sambandho. Asañcicca asatiyā katattā anāpattipakkhopi bhaveyyāti āha “natthi āpattī”’ti. Ettha pana āpattiyeva. **Soti** suttantiko.

Vinayadharopīti vinayadharo pana, ārocesīti sambandho. **Āpajjamānopīti** pisaddo garahattho. **Teti** vinayadharassa nissitakā, āhaṃsūti sambandho. **Tassāti** suttantikassa. **Teti** suttantikassa nissitakā, ārocesunti sambandho. **Soti** suttantiko. **Musāvādīti** abhūtato, abhūtaṃ vā vacanaṃ vadanasiḷo. **Esoti** vinayadharo. **Teti** suttantikassa nissitakā, āhaṃsūti sambandho. **Tatoti** kalahavaḍḍhanakāraṇā. Vinayadharo akāsīti sambandho.

453. “Na tāva bhinno”’ti iminā **bhinnoti** ettha tapaccayassa avassambhāviyatthe anāgatakālikataṃ dasseti. Tamevatthaṃ saha upamāya dassento āha “apicā”’tiādi. **Tanti** sassam. “Bhijjissatī”’ti iminā bhijjissatīti **bhinnoti** vacanatthaṃ dasseti. **So ca khoti** saṅgho. Kalahavasena bhijjissatīti sambandho. **Sambhamaatthavasenāti** saṃvegaatthavasena. Sambhamasaddo hi tīsu atthesu vattati gārave, bhītiyaṃ, saṃvege cāti. Idha pana saṃvege vattati. Bhikkhusaṅghassa bhinne saṃvegaatthavasenāti adhippāyo. Idam heṭṭhā kathitāya “bhaye kodhe pasamsāya”’nti gāthāya (pārā. aṭṭha. 1.15) casaddena sampiṇḍitaṃ sambhamaatthaṃ sandhāya vuttanti daṭṭhabbaṃ. **Etthāti** “bhinno bhikkhusaṅgho bhinno bhikkhusaṅgho”’ti pāṭhe. **Āmedīanti** ā punappunaṃ bhayādipīlitattā meḍena ummādena itaṃ kathitaṃ āmedītaṃ.

454. **Hīti** vitthāro. Bhagavā vadeyyāti sambandho. Ukkhipanti apanentīti **ukkhepakā**. Ukkhittamanuvattantīti **ukkhittānuvattakā**. **Etesanti** ukkhittānuvattakānaṃ. Puna **etesanti** ukkhepakānaṃ. **Pakkhoti** sakhā. **Tantimevāti** pālīmeva, byāpārameva vā.

455. **Yoti** bhikkhu. Cittaṃ uppādetīti sambandho. **Tumheti** dhammavādino sandhāya vuttaṃ. **Kim bhaṇathāti** kiṃ vacanaṃ bhaṇatha. Iti pucchitvāti sambandho. **Tesañcāti** dhammavādīnañca. **Itaresañcāti** adhammavādīnañca. **Imeti** attano pakkhe ime bhikkhū. **Tesanti** adhammavādīnaṃ. “**Kammaṃ kopetī**”’ti “nānāsaṃvāsakacatuṭṭho ce bhikkhave kammaṃ kareyya, akammaṃ, na ca karaṇīya”’nti vacanato (mahāva. 389) kammaṃ kopeti. **Itaresampīti** dhammavādīnampi. Dhammavādīnaṃ pakkhe nisīditvā adhammavādīnaṃ laddhiṃ gaṇhantopi dhammavādīnaṃ nānāsaṃvāsako hotiyeva, ayaṃ nayo vuttanayassa atthato siddhoti katvā idha na vutto. **Evantiādi** nigamanaṃ. **Yoti** bhikkhu, pavisati gaṇhātīti sambandho. Nisinno hutvāti yojanā. **Imeti** attano pakkhe ime bhikkhū. **Itareti** parapakkhe itare bhikkhū. **Tesanti** dhammavādīnaṃ. **Yattha tattha vā pana pakkheti** yasmiṃ kasmīṃci vā dhammavādīnaṃ pakkhe. **Ime dhammavādīnoti gaṇhātīti** taṃtaṃpakkhagate bhikkhū yāthāvato vā ayāthāvato vā “ime dhammavādīno”’ti gaṇhāti.

456. Kāyena kataṃ kammaṃ **kāyakammaṃ**, vaciyā kataṃ kammaṃ **vacīkammaṃ**. Tattha kāyakammaṃ upadaṃsentā bhikkhū paharantā upadaṃsenti. Vacīkammaṃ upadaṃsentā bhikkhū pharusam vadantā upadaṃsenti. Tena vuttaṃ “kāyena paharantā”’tiādi. **Upadaṃsentīti** pavattenti. “Kodhavasenā”’ti iminā pemavasenāti atthaṃ nivatteti. **Adhammiyānti** adhammena kattabbāni. “Kiccānī”’ti iminā iyapaccayassa sarūpaṃ dasseti. **Asammodikāti** ettha yakāralopoti āha

“asammodikāyā”ti. “Kathāyā”ti iminā asammodaṃ janetīti asammodikāti katvā ṇikapaccayassa sarūpaṃ dasseti. **Upacāraṃ muñcitvāti** ettha upacāro nāma aññamaññaṃ paharantānaṃ hatthassa pāpuṇaṇaṭṭhānaṃ, taṃ muñcitvāti attho. **Āsanantarikāyāti** ettha ekaṃ āsanaṃ antaraṃ byavahitaṃ imissā nisinnakiriyāyāti āsanantarikāti dassento āha “eekaṃ āsanaṃ antara”nti. “Katvā”ti iminā kiriyāvisesanabhāvaṃ dasseti.

457-8. Ayaṃ assa bhikkhuno adhippāyo kirāti yojanā. **Eteti** kodhābhībhuṭe bhikkhū. Bhagavā pana kathesīti sambandho. “Anattho ato”ti iminā **anatthato**ti padassa okāralopasandhiṃ dasseti. Tesam padānamatthaṃ dassento āha “etasmā”tiādi. “Atha vā”tiādinā “anatthado”ti vattabbe “sugato”tiādīsu viya da-kārassa ta-kāraṃ katvā **anatthato**ti vuttanti dasseti. **Anatthado**ti anatthaṃ dadātīti anatthado.

464. **Puthusaddoti** ettha puthusaddo mahantapariyāyoti āha “mahā”ti. **Assāti** bhaṇḍanakāraḥassa janassa. **Samajanoti** ettha samasaddo sadisapariyāyoti āha “ekasadiṣo”ti, tulyādhikaraṇasamāsoyaṃ. Bhaṇḍanakārako ayaṃ janoti yojanā. **Tatthāti** bhaṇḍanakārakesu janesu. Aññampi ekaṃ idaṃ kāraṇanti sambandho. **Na maññitthāti** koci ekopi na maññitthāti yojanā. Iminā **amaññarunti** ettha āvibhattiyā “ru”nti ādeso dassito.

Parimuṭṭhāti parimuṭṭhā sati etesanti parimuṭṭhāti dassento āha “parimuṭṭhasatino”ti. Aṭṭhakkharagāthāyaṃ “pañcamam laghu sabbatthā”ti vuttattā pañcamassa rākārassa rasso hoti. Tena vuttaṃ “rākārassa rassādeso kato”ti. **Katham bhāṇinoti** vācam bhāṇino. **Mukhāyāmanti** ettha āyāmasaddo vitthārapariyāyo, vitthāro ca nāma pasāraṇanti āha “pasāretu”nti. Sampadānatthajotakena tuṃpaccayena sampadānatthe upayogavacananti dasseti. **Nītāti** kammavācakaḥassa kitassa appadhānakammaṃ dassento āha “imaṃ nillajjabhāva”nti. Dvikammakadhātubhāvato “attano”ti padhānakammampi ajjhāharitabbaṃ. **Tanti** kalahaṃ. “Jāna”nti padena “vidū”ti padassa atthañca vākyañca dasseti. Vidanti jānantīti **vidūti** vacanattho kātabboti adhippāyo. **Sādīnavoti**ādīnavena dosena saha pavatto. **Ayanti** kalaho.

Ye ca taṃ upanayhantīti ettha tasaddassa visayaṃ dassetuṃ vuttaṃ “āghāta”nti. **Yeti** janā. Upanayhanti upanahanti bandhanti. **Sanantanoti** ettha sanantanasaddo purāṇapariyāyoti āha “porāṇo”ti.

“Aññe”ti iminā **pareti** ettha parasaddassa pacchābhāgatthādayo nivāreti. **Mayamettha yamāmaseti** ettha etasaddassa visayaṃ dassento āha “saṅghamajjhe”ti. Yamudhātu upayamanattho sekāro nipātamatototi āha “upayamāmā”ti. “Satataṃ samitaṃ maccusantikaṃ gacchāmā”ti iminā “na jānantī”ti padassa ākāraṃ dasseti. **Tatthāti** mahājanakāye ye paṇḍitāti yojanā. **Evam hīti** evameva. Jānantā te paṇḍitā paṭipajantīti yojanā. Medhantā hiṃsantā gacchanti pavattantīti **medhagā** kalahā. Keci medhadhātuto ṇvupaccayaṃ vadanti, tesam matena medhakāti paṭhamakkharena paṭṭho bhaveyya.

Tesampīti brahmadattadīghāvukumārānampi. **Saṅgatīti** samāgamo. **Voti** tumhākaṃ. Yesam tumhākaṃ neva mātāpitūnaṃ aṭṭhīni chinnāni, na paṇā hatā, na gavassadhanāni haṭāni. Tesam tumhākaṃ kasmā saṅgati na hotīti yojanā.

Sabbāni parissayānīti ettha **sabbānīti** vuttakāraṇaṇca liṅgavipallāsaṇca dassento āha “pākaṭaparissaye ca paṭicchannaparissaye cā”ti. “Abhibhavitvā”ti iminā **abhibhuyyāti** padassa tvāpaccayantabhāvaṃ dasseti. **Tenāti** nipakena sahāyena.

Rājāvāti ettha rājā ivāti padavibhāgaṃ katvā rājasaddassa upalakkhaṇavasena mahājanaka, arindamarājāno ca ivasaddassa opammatthajotakañca dassento āha “yathā”tiādi. Raṭṭhavijitasaddā aññamaññapariyāyā. Visesanavisesyānaṃ kāmācārato gamyāmānattā vuttaṃ “vijitaṃ raṭṭha”nti. “Mātaṅgo araññe nāgo ivā”ti iminā padavibhāgaṃ dasseti. Tesam padānaṃ atthaṃ dassento āha “mātaṅgoti hatthī vuccatī”tiādi. “Hatthī vuccatī”ti iminā mahanto aṅgo sarīrametassāti **mātaṅgoti**

vacanatthēna hatthī mātaṅgo nāmāti dasseti. Mahantasaddassa mātādeso. **Nāgasaddo** urage ca hatthimhi ca nāgarukkhe ca uttame ca nāmapaññattiyāñcāti pañcasu atthesu vattati, idha uttamattheti dassento āha “nāgoti mahantādhivacanameta”nti. **Mātaṅgaraññevāti** ettha ivasaddassa opammatthajotakabhāvaṃ dassetvā atthayojanam dassento āha “yathā hī”tiādi. “Yathā ca pālileyako”ti iminā mātaṅganāgassa sarūpaṃ upalakkhaṇena dasseti.

275. Pālileyakagamanakathā

467. Pālileyakanti palilavanasāṇḍe vasantahatthināgaṃ. “Hatthī”ti ca “nāgo”ti ca dvinnam saddānam pariyaabhāvena vuttattā adhikatthoti āha “mahāhatthī”ti. Purato purato gacchantehi tehi hatthiādīhi chinnaggānīti yojanā. **Obhaggobhagganti** bhañjitvā adhopātitaṃ obhagganti dassento āha “bhañjitvā bhañjitvā pātita”nti. “Uccaṭṭhānato”ti iminā avatyūpasaggassa adhottham nayena dasseti. **Etassāti** hatthināgassa. **Teti** hatthiādayo. **Tehīti** hatthiādīhi. Pivantehi tehīti yojanā. **Kaddamodakānīti** kaddamena saṃsaṭṭhāni udakāni.

Īsādantassāti ettha īsāya sadiso danto imassāti īsādantoti dassento āha “rathāīsāsadisadantassā”ti. “Rathāīsā”ti iminā naṅgalaīsam nivatteti. **Yadekoti** yaṃ eko. Yaṃsaddo kāraṇatthoti āha “yasmā”ti. **Assa nāgassāti** hatthināgassa. **Nāgenāti** buddhanāgena.

Yathābhirantanti ettha kittakaṃ kālam ramatīti āha “temāsa”nti. **Ettāvatāti** ettakena temāsaviharaṇena. Patthaṭā ahoṣīti sambandho. **Sabbatthāti** sabbasmiṃ jambudīpatale.

“Kosambinivāsino”ti iminā kosambiyaṃ nivasantīti **kosambakāti** vacanattham dasseti.

276. Aṭṭhārasavatthukathā

471. “Laddhiggahaṇa”nti iminā ādīyate **ādāyoti** vacanattham dasseti.

475. Tam divasamevāti tasmim saṅghasāmaggikaraṇadivaseyeva.

476. Na mūlā mūlam gantvāti mūlato mūlam na gantvāva. “Atthato apagatā”ti iminā atthato apetā **atthāpetāti** vacanattham dasseti. “Byañjanamattaṃ upetā”ti iminā byañjanamattaṃ upetā upagatā **byañjanūpetāti** vacanattham dasseti.

477. Atthesu jātesūti ettha jātasaddo uppannapariyāyoti āha “vinayaatthesu uppannesū”ti. Tañca padaṃ “saṅghassa kiccesū”tiādīsū sabbapadesu yojetabbaṃ. **Mahatthikoti** mahanto upakārasaṅkhāto attho imassāti mahatthikoti dassanto āha “mahāupakāro”ti.

Anānuvajjo paṭhamenāti ettha paṭhamasaddo tāvāpariyāyoti dassento āha “tāvā”ti. **Silatoti** sīlena. **Upekkhitācāroti** upapattito ikkhitācāro. “Apekkhitācāro”tipi pāṭho. **Upaparikkhitācāroti** upaparikkhito ācāro etassāti upaparikkhitācāro.

Visayhāti ettha vipubbo sahadhātu abhibhavanattho, tvāpaccayo ca hotīti dassento āha “abhibhavītvā”ti. **Anapagatanti** kāraṇato anapetaṃ. Bhaṇanto bhikkhūti sambandho. Tamattham dassento āha “yasmā hī”tiādi. **Soti** bhikkhu, na hāpetīti sambandho. “Usūyāyā”ti iminā dosāgatigamanassa gahitattā “agatigamanavasenā”ti iminā pārisesanayena avasesaagatigamanamevādhippetaṃ. **Soti** bhikkhu. **Chambhati cevāti** thambhati ceva, thaddham karoti cevāti attho. **Vedhati cāti** kampati ca. **Yo cāti** bhikkhu pana. **Īdisoti** usūyāya vā agatigamanena vā bhaṇanasāṅkhāto ediso na hoti.

Kiñca bhiyyoti nipātasamudāyo, tato vuttato atirekaṃ kathetabbaṃ kiṃ panāti attho. Tassā gāthāya attho veditabboti yojanā. **Yoti** bhikkhu. **Hīti** saccaṃ. **Kālāgatanti** ettha gahetabbakālañca sattamītappurisāsamañsañca dassento āha “kathetabbayuttakāle āgata”nti. **Vacoti** padaṃ na vacanapadhānaṃ, vacanavantaṃ puggaloyeva padhānanti dassento āha “vadanto”ti.

Ācerakamhi ca saketi ettha ācariyassa eso **ācerako**, sassa attano eso **sakoti** vacanatthaṃ dassento āha “attano ācariyavāde”ti. Gāthābhāvato ācariyasaddassa ācerādeso kātabbo. “Vāde”ti iminā idamatthe pavattassa ṇikapaccayassa sarūpaṃ dasseti. **Alaṃ pametunti** ettha alaṃsaddo samatthatto, pamasaddotulanatthoti āha “tulayitūṃ samattho”ti. **Kathetaveti** ettha tavesaddo aññattha yebhuyyena bhāvavācako, idha pana kammavācako ti āha “kathetabbe”ti. **Viraddhaṭṭhānakusaloti** viraddhaṭṭhāne kusalo.

Ayaṃ gāthā vuttāti sambandho. **Tanti** kathetabbaṃ. **Ayaṃ hetthattthoti** ayaṃ eva ettha gāthāyaṃ atthoti yojanā. “Gacchanti”ti iminā **vajantīti** ettha vajadhātuyā gatyatthaṃ dasseti. “Attano ācariyavāda”nti iminā “sakaṃ ādāya”nti padassa atthaṃ dasseti. Ācariyavādo hi ādātābato gahetabbato **ādāyanti** vutto. **Tadanurūpanti** tassa vatthussa anurūpaṃ. Byākaramāno bhikkhūti sambandho. **Aṭṭhahi dūtaṅgehīti** “sotā ca hoti, sāvetā ca, uggahetā ca, dhāretā ca, viññātā ca, viññāpetā, ca kusalo ca sahitāsahitassa, no ca kalahakāraṃ”ti (cūḷava. 347; a. ni. 8.16) evaṃ vutthehi aṭṭhahi dūtassa aṅgehī. Kassa dūteyyakammanti āha “saṅghassā”ti. Dūtassa etāni **dūteyyāni**, tāniyeva kammāni **dūteyyakammāni**, tesu. **Idanti** atthajākaṃ, vuttaṃ hotīti yojanā. Atha vā **idanti** ayamattho. **Vuttaṃ hotīti** vutto hoti. Pacchimanaye līngavipallāsoti daṭṭhabbo. Ānetvā havanti pūjentīti **āhavo** dāyakā, tesāṃ āhūnaṃ. Ānetvā hunitabbaṃ pūjetābanti **āhuti**, taṃ āhutiṃ. **Saṅghassa kiccesūti** niddhāraṇe bhuttaṃ. Tena vuttaṃ “tassa tassa kiccassā”ti. **Karavacoti** ettha “vacokaro”ti vattabbe gāthābhāvato padavipariyāyavasena “karavaco”ti vuttoti āha “vacanaṃ karonto”ti. “Vacanakaraṇenā”ti iminā “na **tena maññati**”ti ettha tasaddassa visayaṃ dasseti.

Āpajjamāno bhikkhu āpatti hotīti yojanā. **Tassā cāti** ettha smāvacanassa ssādeso kātabbo. **Yathāti** yenākārena, vinayakammākārenāti attho. **Yesūti** yattakesu vatthūsu. Ubhaye ete vibhaṅgāti sambandho. **Assāti** bhikkhussa. **Āpattivuṭṭhānapadassāti** padasaddo kāraṇattho, bhuttaṃ samivacano ca hotīti āha “āpattivuṭṭhānakāraṇe”ti. “Kusalo”ti iminā cheko paṇḍito, kucchitaṃ pāpaṃ vidati jānātīti **kovidoti** vacanatthena kovido nāmāti dasseti.

Ācaranto bhikkhu gacchatīti yojanā. “Vatta”nti iminā **osāraṇaṃ tanti** ettha tasaddassa visayaṃ dasseti. “Yā”ti iminā **etampīti** ettha etasaddassa aniyamaniddesabhāvaṃ dasseti. **Sabbatthāti** sabbasmiṃ kosambakakkhandhake.

Iti kosambakakkhandhakavaṇṇanāya yojanā samattā.

Iti samantapāsādikāya vinayasaṃvaṇṇanāya

Mahāvaggavaṇṇanāya

Yojanā samattā.

Jādilañchitanāmena, nekānaṃ vācito mayā;
Mahāvaggakhandhakassa, samatto yojanāyoti.

Namo tassa bhagavato arahato sammāsambuddhassa

Pācityādiyojanā

Cūlavaggayojanā

Mahāvaggakhandhakkassevaṃ, katvāna yojanānayaṃ;
Adhunā cūlavaggassa, karissaṃ yojanānayaṃ.

1. Kammakkhandhakaṃ

1. Tajjanīyakammakathā

1. Cūlavaggassa paṭhame kammakkhandhake evamattho vedittabboti yojanā. “Cūlavaggassā”ti padaṃ “kammakkhandhake”ti pade avayavisambandho. **Tāvāti** pārivāsikkakkhandhakādito, pārivāsikkhandhakādīnaṃ vā paṭhamam. Cevasaddo ca casaddo ca “paṇḍukalohitakā”ti padassa asamāhāradvandavākyam dīpentī. Nissayānaṃ nāmaṃ nissitesu upacāravasena tesam saddhivihārikaantevāsikāpi paṇḍukalohitakanāmāyeva hontīti dassento āha “tesam nissitakāpi”tiādi. Pisaddena upacārattham sampiṇḍeti. “Suṭṭhu balava”nti iminā **balavābalavanti** dvinnam saddānam pariyaabhāvena vuttatā atisayatthoti dasseti. “Balavabalava”nti vattabbe vācāsiliṭṭhavasena dīgham katvā evam vuttam. **Paṭivadathāti** paṭicchannaṭṭhāne kathetha. Iminā **paṭimantethāti** ettha mantadhātuyā guttabhāsanattham dasseti. Atthesu karaṇabhāsanakicesu alam samatthāti alamattā, tesam visesenāti **alamatthatarāti** dassento āha “samatthatarā”ti.

Adhammakammadvādasakakathā

4. Asammukhā katantiādīsu evam vinicchayo vedittabboti yojanā. Sammukhehi virahitā **asammukhāti** dassento āha “saṅghadhamavinayapuggalasammukhānaṃ vinā kata”nti. “Appaṭipucchitvā”ti iminā **appaṭipucchāti** ettha tvāpaccayassākārabhāvam dasseti. **Tassevāti** cuditakasseva. **Adesanāgāminiyāti** ettha akārassa aññattham dassento āha “pārājikā...pe... vā”ti. **Etthāti** tajjanīyakamme. **Nava padāti** navasu padesu, niddhāraṇe cetam paccattavacanam. Purimakesu tīsu tikesu vuttesu navasu padesūti yojanā. “Ekeka”nti padena sambandhitabbaṃ. **Imehīti** imehi dvīhi padehi. **Dvādasa tikāti** purimehi tīhi tikehi nava tike missetvā dvādasa. **Sukkapakkhesupīti** paṭisedhavirahavasena suksesu pakkhesupī.

6. “Pabbajitāna”nti iminā gihīnaṃ ananulomikataṃ nivatteti. **Sahasokitādīhīti** ādisaddena sahanandim saṅgaṇhāti. Imasmiṃ ṭhāne sabbaaṭṭhakathāpotthakesu “na upasampādetabbanti upajjhāyena hutvā na upasampādetabba”nti pāṭhato paṭṭhāya yāva “na sampayojetabbanti aññamaññaṃ yojetvā kalaho na kāretabbo”ti pāṭho atthi, tāva aṭṭhārasasammāvattanavattānaṃ saṃvaṇṇanāpāṭho likhito, so pāṭho imasmiṃ ṭhāne na likhitabbo. Kasmā? Pāḷikkamānuppattābhāvato, aṭṭhakathāyameva “aṭṭhārasa sammāvattanavattāni pārivāsikkakkhandhake vaṇṇayissamā”ti vakkhamānattā, yathāvacanāṅca pārivāsikkakkhandhake (cūlava. aṭṭha. 76) saṃvaṇṇitattā ca. Tasmā so pāṭho na porāṇapāṭho hoti, pacchā pakkhittapāṭhoti daṭṭhabbo.

Tiṇṇam bhikkhave bhikkhūnantiādi vuttanti sambandho. **Ekekenāpīti** tīsu aṅgesu ekekenāpi. Iminā avayavavākyanibbattivasena kammārahabhāvam dasseti. **Hīti** saccam. Niyassassa visesena abhiṇhāpattikattam aṅgam itī vuttanti yojanā. Ettha ākāravācako itisaddo luttaniddiṭṭhoti daṭṭhabbaṃ. Eseva nayo anantarepi. Tajjīyati anena vinayakammenāti **tajjanīyam**, tameva kammaṃ **tajjanīyakammaṃ**. “Nissāya te vatthabba”nti niyassīyati bālo bhajāpīyati anena vinayakammenāti **niyassam**, divādigaṇikattā sakārassa dvebhāvo hoti “nassam vassa”ntiādīsu viya, niyassameva kammaṃ **niyassakammaṃ**. Gāmādito pabbājīyati anena vinayakammenāti **pabbājanīyam**, tameva kammaṃ **pabbājanīyakammaṃ**. **Tīsūti** bhaṇḍanakārakaabhiṇhāpattikakuladūsakavasena tividhesu aṅgesu. Yena kenaci aṅgenāti sambandho. Yadi sabbāni kammāni kātum vaṭṭatīti yojanā. Evam sati campeyyakkhandhake (mahāva. 400 ādayo) vuttam idaṃ vacanam virujjhatīti sambandho.

Vacanatthanānattatoti vacanassa ca atthassa ca nānābhāvato. Tamevatthaṃ vitthārento āha “tajanīyakammārahassāti imassa hī”tiādi. Tattha “tiṇṇaṃ bhikkhave”tiādivacanassa aṅgasambhavo atthoti yojanā. **Tasmāti** yasmā na virujjhati, tasmā. Saṅghena kataṃ hotīti sambandho. Iminā lakkhaṇena tajanīyādikammārahassa tassa bhikkhussāti yojanā. Evaṃ kammāsanniṭṭhānatthaṃ dassetvā aṅgasambhavatthaṃ dassento āha “yassa paṇā”tiādi. Tattha **yassāti** bhikkhussa, atthīti sambandho. **Bhaṇḍanakārakādīsūti**ādisaddena abhiñhāpattikakuladūsakāni saṅgaṇhāti. Ākaṅkhamāno saṅgho kareyyāti sambandho. **Kammārahanti** kammassa, kamme vā arahaṃ. **Etthāti** kammakkhandhake. **Pubbenāti** pubbe vuttena campeyyakkhandhakena. **Aparanti** apare vuttaṃ kammakkhandhakaṃ. **Sametīti** samaṃ gacchati.

Tatthāti kammesu, tajanīyakammeti sambandho, aṅgesu vā, bhaṇḍanakārakavasenāti sambandho. **Atha khoti** tathā vuttapīti attho. **Karontena** kammavācāvācakenāti sambandho. **Hīti** phalajotako. **Bhūtena vatthunāti** tacchena vatthunā. **Aññassa kammassāti** tajanīyakammato aññassa kammassa. Kasmā bālassa abyattassa āpattibahulassa tajanīyakammaṃ kātabbanti yojanā. **Idampīti** tajanīyakammampi. **Sabbatthāti** sabbesu kammesu.

Nappaṭippassambhetabbaatṭhārasakādikathā

8. Pannalomāti patitamānalomā. **Etanti** vattaṃ. **Netthāranti** ettha aphutṭhakkharasamyoge parassa takārassa thakāro hoti, tasmā dutiyakkharena pāṭho yutto. **Yenāti** vattena. **Nissāraṇāti** nissāraṇato. Dasa vā divasāni, pañca vā divasāni pūretabbanti yojanā. **Hīti** saccaṃ. **Ettakenāti** etappamāṇena dasapañcadivasena.

2. Niyassakammakathā

11. Apissu bhikkhū pakatāti ettha nipātānamanekatthattā idha apissusaddo niccattho hoti. Pakatasaddo “kukkuccapakatā”tiādīsu (pārā. atṭha. 1.tatīyasāṅgītikathā; pāci. atṭha. 438) abhibhavanattho, idha pana byāvaṭatthoti dassento āha “niccaṃ byāvaṭā hontī”ti.

3. Pabbājanīyakammakathā

27. Etthāti assajipunabbasukavatthumhi. **Kāyikoti** ettha kāyena kīlatīti kāyikoti vacanatthaṃ dassento āha “kāyakīlā vuccatī”ti. “Eseva nayo”ti iminā vācāya kīlatīti **vācasiko**, kāyiko ca vācasiko ca **kāyikavācasikoti** vacanatthaṃ atidisati. Ettha ca pacchimavacanattho samāhāradvando, samāhāradvandepi katthaci pullīngamicchanti saddavidū “dhammavinayo”tiādīsu (vibha. atṭha. 509) viya. Kāyadvārapaññattasikkhāpadaṃ vītikkamatīti **kāyikoti** vacanatthaṃ dassento āha “kāyadvāre paññattasikkhāpadavītikkamo vuccatī”ti. Kāyena paññattasikkhāpadaṃ vītikkametīti **kāyikoti** vacanatthopi yujjateva. “Upahananaṃ vuccatī”ti iminā upahananaṃ upaghātaṃ, tameva **upaghātikanti** vacanatthaṃ dasseti. “Nāsana”nti iminā hanadhātuyā hiṃsanatthaṃ dasseti. Paṭikkhattavejjakammādivasena telapacanaariṭṭhapacanādīni kāyiko micchājīvo nāmāti yojanā. Iminā micchājīvassa sarūpaṃ dasseti.

4. Paṭisāraṇīyakammakathā

33. Sudhammavattusmiṃ evamattho vedītabboti yojanā. Anapaloketvāti ettha apapubbo lokasaddo āpucchanatthoti āha “na āpucchitvā”ti.

34. Kinti kiṃ nāma khādanīyabhojanīyaṃ. **Voti** tumhehi. **Gahapatīti** ālapanapadaṃ. Therānaṃ atthāyāti sambandho. **Paṭiyattanti** paṭiyāditaṃ. “Etaṃ avocā”ti iminā **etadvocāti** ettha niggahitādesasandhiṃ dasseti. **Yadidanti** saddo “tilasaṃgulīkā”ti padena yojitattā itthilingoti āha “yā

aya’’nti. **Tilasakkhalikā**ti tilena samsaṭṭhā sakkhalikā. “Sā natthī’’ti iminā uttaravākye yaṃsaddassa pubbavākye taṃsaddāpekkhataṃ dasseti. Eko purisoti sambandho. **Pūviyoti** pūvaṃ, pūvena vā kayavikkayo. **Tenā**ti kārāṇena. **Nanti** gahapatiṃ. **Theroti** sudhammatthero. **Yadeva kiñcī**ti ettha kiñci eva yaṃ vacananti dassento āha “kiñcīdeva tilasaṃguḷikāvācana’’nti. **Idanti** imaṃ atthaṃ. **Soti** kukkuṭapotaṃ. **Kā kavassitanti** kākassa vassitaṃ, neva akāsīti sambandho. **Tayāpī**ti pisaddo kukkuṭapotaṃ apekkhati. Neva bhikkhuvācanaṃ vuttaṃ, na gihivācanaṃ vuttaṃ, iti imamatthaṃ dassetīti yojanā.

Adhammakammādidvādasakakathā

39. Purimehi kammehīti sambandho. **Tatthā**ti āṅgesu. Yathā parisakkiyamāne gihino lābhaṃ na labhantīti yojanā. Paripubbo sakkadhātu parakkamatthoti āha “parakkamanto’’ti. **Tatthā**ti anattādiṣu. **Atthabhaṅgoti** gihīnaṃ atthassa bhaṅgo. **Avasananti** gihīnaṃ avasaṇaṃ. **Gihīnanti** ettha sāmīyathe sāmīvacananti āha “gihīnaṃ santike’’ti. Yathā kariyamāne sacco hoti, evaṃ na karotīti yojanā. **Ekaṅgenāpī**ti pisaddo sambhāvanattho, tato adhikehi āṅgehi kā nāma kathāti dasseti. **Etthā**ti paṭisāraṇīyakamme. Paṭimukhaṃ attano dosaṃ sarāpetabbaṃ anena vinayakammenāti **paṭisāraṇīyaṃ**, tameva kammaṃ paṭisāraṇīyakammaṃ.

5. Āpattiyā adassane ukkhepanīyakammakathā

46. **Samsathā**ti ettha samsadhātuyā kathanatthaṃ dassento āha “ārocethā’’ti. Tumhe samsatha, kathethāti attho.

50. **Bhaṇḍanakārako hotī**tiādi kārāṇūpacāravasena vuttoti āha “bhaṇḍanādiṭṭhāyā’’tiādi. Bhaṇḍanakārakādi kārāṇaṃ, tena āpannā āpatti phalaṃ, tassā adassane ukkhepanīyakammaṃ kātābanti adhippāyo. **Tassā**ti āpattiyā.

51. **Etthā**ti ukkhepanīyakamme. **Tatthā**ti tecattālīsavattesu. **Anuddhamsetabboti** ettha dhamasadhātuyā gatyatthaṃ paṭikkhipanto āha “na codetabbo’’ti. “Rajonuddhamasati’’tiādiṣu (bu. vaṃ. 2.101) hi dhamasadhātu gatyatthe vattati. “Na bhikkhu bhikkhūhī’’ti ettha soyeva bhikkhu teheva bhikkhūhīti atthaṃ nivārento āha “aññe bhikkhu aññehi bhikkhūhī’’ti. Na gihiddhajoti ettha gihīnaṃ dhajo **gihiddhajoti** vutte odātavatthādīnīti āha “odātavatthānī’’tiādi. **Na titthiyādiṭṭhāyanti** “na titthiyā sevittabbā, bhikkhū sevittabbā, bhikkhusikkhāya sikkhitabba’’nti padānaṃ tayaṃ. “Na apasādetabbo’’ti iminā na **āsādetabboti** ettha āpubbasadadhātuyā apapubbasadadhātuyā samānabhāvaṃ dasseti. “**Anto vā bahi vā**ti’’ ettha kassa anto vā bahi vāti āha “vihārassā’’ti. Sesam sabbamvattanti yojanā. **Iminā**ti āpattiyā adassane ukkhepanīyakammena.

65. **Tassā**ti āpattiyā. **Idhā**ti pāpikāya diṭṭhiyā appaṭinissagge kate ukkhepanīyakamme. Āpattiadassanādiṣu uddharitvā khipīyati apanīyati anena vinayakammenāti **ukkhepanīyaṃ**, tameva kammaṃ **ukkhepanīyakammaṃ**.

Iti kammakkhandhakavaṇṇanāya yojanā samattā.

2. Pārivāsikakkhandhakaṃ

1. Pārivāsikavattakathā

75. Pārivāsikakkhandhake **pārivāsikā**ti padassa parivāsaṃ parivasantīti pārivāsikāti dassento āha “parivāsaṃ parivasantā’’ti. **Tatthā**ti “parivāsaṃ parivasantā’’ti taddhitavākye. **Tesū**ti catubbidhesu parivāsesu. **Titthiyaparivāsoti** titthiyānaṃ parivāso, titthiyānaṃ vā dātabbo parivāso, titthiyehi vā

parivasitabbo parivāso titthiyaparivāso. **Appaṭicchannaparivāsoti** appaṭicchanno parivāso appaṭicchannaparivāso. **Tatthāti** appaṭicchannaparivāse. **Yanti** vacanam. **Ayam panāti** ayam paṭicchannaparivāso pana. **Idhāti** pārivāsikakkhandhake. **Sesāti** appaṭicchannaparivāsato sesā. **Tayoti** appaṭicchannaparivāsādayo tayo, dātabbāti sambandho. Kassa dātabbāti āha “yenā”tiādi. **Āpannā cevāti** āpajjitabbā ceva. **Tesūti** tividhesu parivāsesu. **Ete panāti** tayo pana. **Idhāti** pārivāsikakkhandhake. **Tasmāti** yasmā idha adhippetā, tasmā. **Etesūti** tividhesu parivāsesu.

Pakatattānaṃ bhikkhūnanti ettha adhippetapakatatte dassento āha “ṭhapetvā”tiādi. **Mūlāyapaṭikassanārahādīnampīti** ettha ādisaddena mānattārahāmānattacārikaabbhānārahādayo saṅgaṇhāti. Pisaddena pakatipakatattaṃ apekkhati. **Teti** pakatattā. Yam abhivādanādīṃ karontīti yojanā. **Sādiyantīti** ettha sādiyanam nāma sampaṭicchanti āha “sampaṭicchanti”ti. **Tatthāti** abhivādanādīsu, niddhāraṇe cetam bhumavacanam. **Sāmīcikkammanti** etaṃ ābhisamācārikassa adhivacanti yojanā. **Abhivādanādīnīti** abhivādanapaccuṭṭhānaañjalikkammāni. **Bījanavātadānādīnōti** bījanīyā paharitena pavattassa vātassa dānādīno. **Āsanābhīhāranti** ettha abhīhāraṇam abhīhāro, āsanassa abhīhāro āsanābhīhāroti vacanattaṃ dassento āha “āsanassa abhīhāraṇa”nti. Paññāpanampi abhīharitvā paññāpitattā abhīhāroyeva nāmāti āha “paññāpanameva vā”ti. “Pādadhovanaudaka”nti iminā pādassa dhovanaṃ udakam **pādodakanti** vacanattaṃ dasseti. “Pādaṭṭhapanaka”nti iminā pādassa ṭhapanakam pīṭham **pādapīṭhanti** vacanattaṃ dasseti. “Pādaghamsanam vā”ti iminā pādassa ghamsanam kathalikam **pādakathalīkanti** vacanattaṃ dasseti. Saddhivīhārikānampi abhivādanādīnti sambandho. Pisaddena aññesaṃ sādiyantassa kā nāma kathāti dasseti. **Teti** saddhivīhārikā. **Saddhāpabbajītāti** saddhāya pabbajītā. **Kulaputtāti** jātikulaputtā, ācārakulaputtā ca. Karontī, āpucchantiyevāti sambandho. Vāritampi asādiyanam nāmāti āha “vāritakālatō paṭṭhāya anāpattī”ti. **Mīthu yathāvuḍḍhanti** ettha mithusaddo aññamaññāpariyāyo, yathāsaddo yamsaddapariyāyo, vicchattho cāti āha “aññamaññam yo yo vuḍḍho”ti. Aññamaññāñhi mithati saṅgamaṃ karontīti **mīthūti** vuccati. **Tena tenāti** bhikkhūnā, “sādītu”nti pade bhāvakkattā. Sādītuṃ anujānāmīti sambandho.

“Vuḍḍhapaṭipāṭiyā”ti iminā vuḍḍhānam paṭipāṭi **yathāvuḍḍhanti** catutthābyayībhāvaṃ dasseti. Purimāpade pana paṭhamābyayībhāvo. **Pāḷiyāti** pantiyā. **Tatthevāti** saṅghanavakaṭṭhāne eva. **Pavāraṇāyapīti** pisaddena na kevalam uposatheyyeva, atha kho pavāraṇāyapīti dasseti. Saṅghena bhājīyamānanti sambandho.

Oṇojananti avanudate oṇojanam. Avapubbo nudadhātu nakārassa ṇakāram, dakārassa ca jakāram katvā oṇojananti vuccati. Nudadhātu apanayanattho, tena vuttaṃ “vissajjanam vuccati”ti. **Uddesabhattādīnīti** ādisaddena salākabhattādīni saṅgaṇhāti. **Assāti** pārivāsikassa. **Tānīti** dve tīṇi uddesabhattādīni. **Heṭṭhāti** attano heṭṭhā. **Gāhethāti** navakatāre bhikkhū gāhēpetha. **Bhappaccāsāti** bhattameva paccāsā bhappaccāsā, paccāsābhattanti attho. “Vissajjetabbānī”ti iminā avanuditabbanti **oṇojananti** attham dasseti. **Evanti** gahetvā vissajjamāneti yojanā. **Tānīti** uddesabhattādīni. **Yadi pana na gaṇhātīti** sace saṅghato vassaggena na gaṇhāti. **Na vissajjetīti** sace aññassa na vissajjeti. **Odissāti** uddisītvā. **Tassāti** pārivāsikassa. **Hīti** yasmā. Saṅghanavakaṭṭhāne nisinnassa tassāti yojanā. **Bhappaggeti** bhattassa gahaṇaṭṭhāne. **Soti** pārivāsiko, mā kilamīthāti sambandho. **Idanti** oṇojanam. **Assāti** pārivāsikassa, anuññātanti sambandho.

Āgatāgatehi bhikkhūhīti sambandho. **Catussālabhattanti** catumukhā sālā catussālā bhojanasālā, tattha paṭipāṭiyā dinnam bhattam catussālabhattam. **Etanti** catussālabhattam. **Pāḷiyāti** bhikkhūnam pāḷiyā. **Osakkītvāti** heṭṭhā sakkītvā. **Hatthapāseti** bhattadāyakkassa hatthapāse. **Senoti** kulalo. “Ārāmikasamaṇuddesehī”ti padaṃ “āharāpetu”nti pade kāritakammaṃ. **Sayamevāti** pārivāsikena anāṇatto hutvā sayameva. **Mahāpeḷabhattepīti** mahatīyam peḷāyam pakkhipitvā dinne bhattepi. **Yattha panāti** parivisaṭṭhāne pana.

76. Tatrāyam sammāvattanāti ettha tasaddassa aniyamaniddesabhāvaṃ dassento āha “idāni yā ayam sammāvattanā vuttā”ti. Sammā vattitabbam etāyāti **sammāvattanā**. **Tatthāti** sammāvattanāyam.

Na **upasampādetabbanti** ettha ācariyena hutvā kammavācāsāvanampi upasampādanamevāti āha “ācariyena hutvāpi kammavācā na sāvetabbā”ti. **Aññasmiṃ asatīti** attanā aññasmiṃ kammavācāvācāke asati. Na nissayo dātabboti ettha āgantukānameva nissayo na dātabbo, na dinnanissayānampīti dassento āha “āgantukānaṃ nissayo na dātabbo”tiādi, yehipi bhikkhūhi gahitoti sambandho.

Añño sāmaṇeroti pakatattakāle upajjhaṃ datvā gahitasāmaṇerehi añño sāmaṇero. **Ādhipaccaṭṭhānabhūtāti** sabbasammutīnaṃ adhipatībhāvassa ṭhānabhūtā. **Paṭibalassāti** bhikkhuniyo ovaditūṃ paṭibalassa. Iminā laddhasammutikena āṇatto aladdhasammutikopi garudhammehi vā aññehi vā bhikkhuniyo ovaditūṃ labhatīti dasseti. Āgatā bhikkhuniyo vattabbāti sambandho. **Voti tumhākaṃ. Soti** bhikkhu. **Voti** tumhākaṃ, dassatīti sambandho.

Sukkavissaṭṭhiyāti sukkavissaṭṭhiāpattikāraṇā. Kāyasamsaggādigarukāpatti nāpajjitabbāti yojanā. Āpattikkhandhavasena āpattivatthūnaṃ pāpiṭṭhabhāvañca pāpiṭṭhatarabhāvañca vitthārento āha “sattasu hī”tiādi. **Pāpiṭṭhatarāti** dubbhāsītāpattito dukkaṭāpatti pāpiṭṭhatarā. **Tāsanti** sattannaṃ āpattīnaṃ. **Purimanayenevāti** purimānaṃ āpattīnaṃ nayeneva. **Bhedoti** vatthūnaṃ viseso. Evaṃ āpattikkhandhavasena āpattivatthūnaṃ pāpiṭṭhapāpiṭṭhatarabhāvaṃ dassetvā idāni sikkhāpadavasena tesam taṃ dassento āha “paṇṇattivajjasikkhāpade panā”tiādi. **Ubhayampīti** vatthuāpattisaṅkhātaṃ ubhayampi.

Kammanti ettha kāraṇabhūtassa kamma nāmaṃ kāriyabhūtāyaṃ kammavācāyaṃ upacāravasena kāriyabhūtā kammavācā kammanti vuccatīti āha “parivāsakammavācā vuccatī”ti. Kammasmiṃ sati, kammena vā vacitabbāti **kammavācāti** vacanattho kātabbo. **Kasikammanti** kasisaṅkhātaṃ kammaṃ. **Gorakkhakammanti** gorakkhasaṅkhātaṃ kammaṃ. “Kammaṃ kata”nti iminā kammaṃ karontīti **kammikāti** vacanatthaṃ dasseti. **Teti** kammikā bhikkhū, na garahitabbāti sambandho.

Vacitabbaṃ anena dosenāti **vacanīyaṃ**, saṃvijjati vacanīyaṃ assāti **savacanīyaṃ**, taṃ na kātabbanti attho. Tamevatthaṃ vitthārento āha “palībodhatthāya hī”tiādi. Yāva na taṃ adhikaraṇaṃ vūpasantaṃ hoti, tāva imamahā āvāsā ekapadampi mā pakkāmīti yojanā. **Teti** tuyhaṃ.

Anuvādoti ettha anusāsanavasena aññe vadatīti anuvādoti vutte jeṭṭhakaṭṭhānanti āha “vihāre jeṭṭhakaṭṭhānaṃ na kātabba”nti. Jeṭṭhakaṭṭhānaṃ sarūpena dassento āha “pātimokkhuddesakena vā”tiādi. **Meti** mayhaṃ. **Tanti** tavaṃ. **Na codetabboti** ettha kena na codetabboti āha “vatthunā vā āpattiyā vā”ti. **Na sāretabboti** na sarāpetabbo. **Na bhikkhūhi sampayojetabbanti** ettha bhikkhūhi attanā kalahavasena na sampayojetabbanti dassento āha “aññaṃaññaṃ yojetvā kalaho na kāretabbo”ti.

Saṅghattherena hutvāti saṅghattherena hontenapīti attho. Purato agantabbe samāne kiṃ pacchato gantabbanti āha “dvādasahattha”ntiādi. **Āsanapariyantoti** āsanaṃ eva pariyaṇto lāmakoti āsanapariyaṇto, tadatthaṃ dassento āha “saṅghanavakāsaṇaṃ vuccatī”ti. **Svāssāti** so assa. **Soti** āsanapariyaṇto. **Assāti** pārivāsikassa. **Tatthāti** āsanapariyaṇto. **Ayanti** pārivāsiko, na labhatīti sambandho. **Gahitāvasesāti** gahitāhi seyyāhi avasesā. **Maṅgulagūṭhabharitāti** maṅgulānaṃ gūṭhehi pūritā. **Assāti** pārivāsikassa. Rajehi hatā nāsītā bhūmi etthāti **rajohatabhūmi**. **Jatukamūsikabharitāti** jatūhi ca mūsikāhi ca pūritā. **Paṇṇasālāti** paṇṇehi chādītā sālā. **Assāti** pārivāsikassa. Sabbepi āvāsāti yojanā. **Etehīti** pakatattehi. **Tesūti** āvāsesu. **Yanti** āvāsaṃ. **Paccayanti** vassāvāsikalābhaṃ. **Ekapasseti** bhikkhūnaṃ pāliyaṃ aṭṭhatvā ekasmiṃ passe.

Assāti pārivāsikassa, dentīti sambandho. **So evāti** āsanādi pariyaṇto eva. **Ñātipavāritaṭṭhāne** nimantitenāti sambandho. **Tatthāti** taṃ kulaṃ. **Saṃvidhāyāti** saṃvidahitvā. **Assāti** kulassa, bhaveyya vā.

Harāyamānenāti lajjamānena. **Yenāpī**ti pārivāsikenapi. **Samādinnanti** āraññikadhutaṅgasamādinnaṃ. **Tathā**ti yathā āraññikaṅgaṃ na samādātappaṃ, tathā. **Piṇḍapātikadhutaṅgampī**ti pisaddo āraññikaṅgaṃ apekkhati. **Yo panā**ti pārivāsiko pana.

Anārocentassa meti yojanā. Anārocente satīti vā yojanā. “Iminā kāraṇenā”ti iminā **tappaccayā**ti ettha paccayasaddo kāraṇattho, nissakkavacanañca kāraṇatthe hotīti dasseti. So ratticchedo eva paccayo **tappaccayoti** vacanattho kātabbo. “Sāmaṇerehī”ti padaṃ “pacāpetvā”ti pade kāritakammaṃ. Etthāpi pakatiyā nīharāpetvāpi vihāre pacāpetvāpi bhuñjantassa paṭisedho natthi. Kasmā? “Tappaccayā”ti vuttattā. **Gāmeti** mahāgāme, sabbakālaṃ anekasatehi bhikkhūhi avivitte gāmeti attho. **Gāmakāvāsanti** gāmo yeva khuddakaṭṭhena gāmako, tasmim̄ kārito āvāso gāmakāvāso, taṃ.

Gatena āgantukapārivāsikenāti sambandho. **Tatthā**ti kismiñci vihāre, sabbe bhikkhūti sambandho. **Tattha tatthā**ti tasmim̄ tasmim̄ ṭhitaṭṭhāne. Na ekacce passati, apassitattā nāroce, ratticchedova hotīti adhippāyo.

Ekassa vā bahūnaṃ vā āgantukānanti sambandho. **Etthā**ti “āgantukassa āroceṭabba”nti pade. **Vuttanayenevā**ti “āgantukena āroceṭabba”nti pade vuttanayeneva. Taṃ vuttanayamāvikaronto āha “sace”tiādi. **Tesampī**ti āgantukānampi. **Tassā**ti pārivāsikassa. **Ajānantassevā**ti anādare cetam̄ sāmivacanaṃ. **Ayañca panā**ti pārivāsiko ca. **Gatakāleti** āgantukānaṃ gatakāle. **Yepī**ti āgantukāpi. **Okkamitvā**ti osarivā, pavisitvāti attho. **Ayañcā**ti pārivāsiko ca, jānātīti sambandho. **Nesanti** āgantukānaṃ. **Yopī**ti āgantukopi. **Assā**ti pārivāsikassa. **Aññātattā**ti āgatabhāvassa ajānitattā. “Abbhāna”nti padaṃ “karotī”ti pade kammaṃ, “hotī”ti pade kattā. **Adhikā rattiyo**ti āpattiṭṭhannarattito adhikā rattiyo. **Ayanti** pārivāsikavattapaṭipadā. **Apaṇṇakapaṭipadā**ti aviraddhapaṭipadā, ekamsapaṭipadāti attho.

Gacchantampi bhikkhūti sambandho. **Sāvetunti** suṇāpetuṃ. **Visayāvisayenā**ti āroceṭuṃ desādesena. Karavīkatissatthero āhāti sambandho.

“Uposathadivase”ti iminā **uposatheti** ettha uposathasaddassa pātimokkhuddesādayo atthe nivatteti. **Pavāraṇāyapī**ti pavāraṇadivasepi. **Gantunti** bhikkhussa ṭhitaṭṭhānaṃ gantuṃ. **Dūtenāpī**ti ettha anadhippetadūtaṃ paṭikkhipivā adhippetadūtaṃ dassetuṃ vuttaṃ “anupasampannaṃ...pe... ārocāpetabba”nti.

Suññavihāroti bhikkhūhi vivittavihāro. **Yatthā**ti yasmim̄ āvāse. **Hīti** saccaṃ, yasmā vā. **Tatthā**ti suññavihāre. Dasavidhantarāye sati pana gantabbamevāti yojanā. **Nānāsaṃvāsakehī**ti kammanānāsaṃvāsakaladdhinānāsaṃvāsakehi.

81. Āvāsādīnaṃ sarūpaṃ dassento āha “āvāso nāmā”tiādi. **Tatiyapadenā**ti “āvāse vā anāvāse vā”ti tatiyapadena. **Etesū**ti āvāsādīsu. **Chadanatoti** chadanaḷoṭito. **Antoāvāseti** bhittiparicchinne antoāvāse. **Avisesenā**ti “ukkhittako”ti vā “pārivāsiko”ti vā visesaṃ akatvā sāmāñña. **Udakapātenā**ti chadanato udakaṃ patati etthāti udakapāto, tena. **Pañcavaṇṇacchadanabaddhaṭṭhānesū**ti pañcapamāṇena chadanena baddhaṭṭhānesu etesu āvāsesūti sambandho. Pārivāsikassa ca ukkhittakassa ca pakatattena saddhim̄ vāritanti yojanā. **Nānūpacārepī**ti pisaddena ekūpacāre pana kā nāma kathāti dasseti. **Etthā**ti ekacchane āvāsādi, sace nipajjatīti sambandho. **Tasminti** saṭṭhivassepi pārivāsike.

Vuṭṭhātappaṃ, nimantetabboti ettha kiṃ attano vuḍḍhataraṃ pakatattaṃ disvā vuṭṭhātappaṃ, nimantetabboti āha “tadahupasampannaṃ”tiādi. **Obuddhanti** palibuddhaṃ. **Ekāsaneti** ettha ekasaddo samānapariyāyoti āha “samānavassikāsane”ti, samānavassikānaṃ āsaneti attho. **Chamāyaṃ nisinneti** ettha chamāsaddo bhūmipariyāyoti āha “bhūmiyaṃ nisinne”ti. **Itarenā**ti pārivāsikena. Sahāyena saddhim̄ caṅkamati viyāti yojanā. “Ekasmim̄ caṅkame”ti iminā ekacaṅkamasaddassa

tulyādhikaraṇasamāsavākyam dasseti.

Chamāyaṃ caṅkamantanti ettha bhummatthe upayogavacananti āha “chamāyaṃ caṅkamante”ti. **Ayaṃ panāti** vakkhamāno pana. **Etthāti** “chamāyaṃ caṅkamante”ti pāṭhe. **Caṅkamanteti** pakatatte caṅkamante. **Na caṅkamitabbanti** pārivāsikena na caṅkamitabbaṃ. Ko pana vādo iṭṭhakācayasampanne vedikāparikkhitte iti atthoti yojanā. **Pabbatantaravanantaragumbantaresūti** pabbatamajjhavanamajjhagumbamajjhesu, pabbatavivaravanavivaragumbavivaresu vā. **Upacāranti** dvādasahatthaṃ upacāraṃ.

82. Itaroti navako. **Assāti** navakassa. **Na vattabhede dukkaṭanti** aññātattā na vattabhede dukkaṭaṃ. Eseva nayo sabbattha. **Apacchāpurimanti** apacchā apurimaṃ, ekapahārenāti attho. Samavassā dve pārivāsikāti yojanā. Dvinnaṃ pārivāsikānaṃ ekato vasanadosaṃ dassento āha “sace hi dve”tiādi. **Nesanti** dvinnaṃ pārivāsikānaṃ. **Etthāti** pārivāsikādīsu pañcasu bhikkhūsu. Mūlāyapaṭikassanārahādayo cattāroti yojanā.

Parivāsadānādīti ādisaddena mūlāyapaṭikassanamānattadānaabbhānāni saṅgaṇhāti. **Etessevāti** parivāsadānādīsu eva. **Ayanti** pārivāsiko.

83. “Atha kho āyasmā upālī”tiādivacanassa anusandhiṃ dassento āha “imaṃ panā”tiādi. Rahogatassa upālittherassāti yojanā. Atha vā anādare sāmivacanāṃ katvā upālittherassa rahogatassāti yojanā kātabbā. **Etthāti** pārivāsikavatte. **Soti** upālitthero. **Assāti** upālittherassa. **Tatthāti** tīsu ratticchedesu. **Yvāyanti** yo ayaṃ, ekato vāsoti sambandho. So vāso saḥavāso nāmāti yojanā. **Vippavāsoti** ettha pakatattena vippayutto hutvā vāsoti dassento āha “ekakasseva vāso”ti. **Āgantukādīnanti** ādisaddena āvāsikā gahetabbā.

84. Tattha tatthāti taṃ taṃ ṭhānaṃ. **Dvīsu padesūti** dvīsu vākyasaṅkhātesu padesu. **Ekenekenapīti** ekena ekena vākyapadenapī. Parivasiyitthāti parivuttho, parivuttho parivāso etassāti **parivutthaparivāso**, tassa. **Hīti** saccaṃ. **Esāti** eso bhikkhūti sambandho. **Suddhanteti** suddhakoṭṭhāse. **Dukkhassāti** vaṭṭadukkhassa. **Antanti** avasānaṃ, vināsaṃ vā.

2. Mūlāyapaṭikassanārahavattakathā

86. Navakataraṃ mūlāyapaṭikassanārahaṃ ṭhapetvāti yojanā. Imesaṃ pañcannaṃ pakatattā evāti sambandho. **Nesanti** mūlāyapaṭikassanārahāmānattārahāmānattacārikaabbhānārahānaṃ catunnaṃ, mūlāyapaṭikassanārahādīlakkaṇanti sambandho. **Etthāti** mūlāyapaṭikassanārahassa vatte. **Itoti** mūlāyapaṭikassanārahassa vattato.

87. Yatheva pārivāsiko gaṇapūraḥko na hoti, evaṃ etepi na hontīti yojanā.

4. Mānattācārikavattakathā

92. Ūne gaṇeti ettha gaṇo nāma gaṇabhojanasikkhāpade (pāci. 217 ādayo) viya hotīti āha “cattāro vā atirekā vā”ti. **Sabbatthāti** pārivāsikakkhandhake.

Iti pārivāsikakkhandhakavaṇṇanāya yojanā samattā.

3. Samuccayakkhandhakaṃ

1. Sukkavissatṭhikathā

Samuccayakkhandhake **tatthā**ti catubbidhesu mānattesu. Yaṃ mānattaṃ diyyati, idaṃ appaṭicchannamānattaṃ nāmāti yojanā. Eseva nayo anantaravākyesupi. **Paṭicchannāya āpattiyāti** hetvatthe karaṇavacanāṃ, kāraṇatthe nissakkavacanāṃ vā. **Addhamāsanti** pannarasadivasakālaṃ. **Odhāyāti** samūhaṃ katvā. “Ekato katvā”ti iminā “odhāyā”ti padassa atthaṃ dasseti. **Tesūti** catubbidhesu mānattesu. **Idanti** mānattaṃ. **Appaṭicchannāya...pe... vacanatoti** nāpakahetu. Etena appaṭicchannāya āpattiyā dātabbaṃ mānattaṃ **appaṭicchannamānattanti** vacanatthaṃ dasseti. **Tanti** appaṭicchannamānattaṃ. **Idhāti** imissaṃ pāḷiyāṃ. **Tatuttarīti** tato tīhipi uttari. Nānāvattthūni etāsanti **nānāvattthukāyo**. **Tāsanti** nānāvattthukānaṃ.

Mālakasīmāyamevāti sīmamālake eva, sīmaṅgaṇe evāti attho. **Tatthevāti** mālakasīmāyameva.

Vedayāmahanti vedayāmi ahaṃ. Mama mānattacarabhāvaṃ saṅghaṃ jānāpemi attho. **Vedayatīti** manti jānāpeti, iti maṃ saṅgho dhāretūti adhippāyo. **Vuttanayenevāti** parivāsikakkhandhake vuttanayeneva. **Nikkhipitabbanti** “mānattaṃ nikkhipāmi, vattaṃ nikkhipāmi”ti nikkhipitabbaṃ. **Mālakatoti** sīmaṅgaṇato. **Sopīti** saha gacchantopi. “Mālake nārocita”nti iminā yassa mālake ārocitaṃ, tassa anārocetvāpi nikkhipitabbanti dasseti. Ārocentena vattabbanti sambandho.

Visabhāgehi saha vasantassa vattassa duppūritattā vuttaṃ”sabhāgā bhikkhū vasantī”ti. **Catūhi, pañcahi vāti vāsaddena** tato atirekampi saṅgaṇhāti. **Parikkhepārahaṭṭhānatoti** cīvarakkhandhake (mahāva. aṭṭha. 379) vuttaparikkhepārahaṭṭhānato. “Dve leḍḍupāte atikkamivā”ti idaṃ vihāre bhikkhūnaṃ sajjhāyādisaddasavanūpacārapahānatthaṃ vuttaṃ. Sace savanūpacārato na muccati, tato atirekampi atikkamitabbaṃ. **Okkammāti** maggapaṭipannānaṃ bhikkhūnaṃ vacanasaddasavanūpacārapahānatthaṃ okkamitvā. “Gumbena vā vatiyā vā”ti dassanūpacārapahānatthaṃ vuttaṃ. Idha upacāro nāma yattha ṭhatvā passati suṇāti, soyeva deso. **Aññoti** catūhi pañcahi vā bhikkhūhi añño. **Esāti** eso mānattacāriko.

“Dvādasahatthaṃ upacāraṃ okkamitvā”ti iminā anokkamitvā ajānantasseva gacchati, natthi ratticchedopīti dasseti. Ettha diṭṭharūpānaṃ sutasaddānaṃ dvādasahatthūpacārato bahi ṭhitānampi ārocetabbaṃ. Adiṭṭhāsutānampi anto dvādasahatthūpacāragatānaṃ ārocetabbanti daṭṭhabbaṃ. **Sati karaṇīyēti** idaṃ gantussa kāraṇadassanatthaṃ vuttaṃ. Asati karaṇīyēpi gantuṃ vaṭṭati. **Sopīti** eko bhikkhupi. “Tassa santike ārocetvā”ti iminā anārocane vattabhedadukkaṭṭaṃ hotīti dasseti. Ekassa santike ārocetvā nikkhipiyamāne kiṃ ūne gaṇe caraṇadoso vā vipavāso vā na hotīti āha “ayañcā”tiādi. Tattha **ayañcāti** mānattacāriko pana. Yasmā kāraṇā vasi, tena kāraṇenāti yojanā. **Bhikkhūnañca atthibhāvaṃ sallakkhetvāti** pakatattāgatakāle tassa anārocetvāva gacchanti, tasmā bhikkhūnañca dvādasahatthūpacāre atthibhāvaṃ sallakkhetvāti attho. Ettha ca “gaṇassa ārocetvā”ti iminā ūne gaṇe caraṇadosābhāvaṃ dasseti. “Bhikkhūnañca atthibhāvaṃ sallakkhetvā”ti iminā vipavāsadosābhāvaṃ dasseti. **Yanti** pubbe anārocitaṃ yaṃ bhikkhuṃ. **Ayanti** paṭhamāṃ passitabbassa ārocetvā nikkhipanaṃ. “Nikkhattavattassa pariḥāro”ti iminā anikkhattavatte antoupacāragatānaṃ sabbesaṃ ārocetabbanti dasseti.

Ayanti mānattacāriko, ṭhitoti sambandho. **Tenāpīti** mānattacārikenapi, yācitabbanti yojanā. **Soti** anikkhattavatto bhikkhu. **Tatrāti** “so abbhetaḥ”ti vacane. Ayaṃ abbhānavidhi vuttoti yojanā. **Ayañcāti** abbhānavidhi ca. **Tāsanti** āpattīnaṃ. **Evantiādi** nigamaṃ. Paṭicchannamānattaṃ pana dātabbaṃ hotīti sambandho. “Paṭicchannāyā”tiādinā paṭicchannāya āpattiyā dātabbaṃ mānattaṃ **appaṭicchannamānattanti** vacanatthaṃ dasseti. **Nanti** paṭicchannamānattaṃ.

2. Parivāsakathā

102. Tassāti paṭicchannamānattassa. **Samodhānetvāti** idheva parivāsakathāyaṃ samodhānetvā. **Idheva** parivāsakathāyaṃ dassayissāmāti yojanā. Idhevasaddo hi pubbāparāpekkho.

Idha adhippetam parivāsam vitthāretvā dassento āha “ayam hī”tiādi. Idha adhippeto parivāso nāma tividho hotīti yojanā. **Tatthā**ti tividhesu parivāsesu. “Yathapaṭicchannāya āpattiyā”ti vacanam vitthārento āha “kassaci hī”tiādi. Yathā udāyittherassa ekāhapaṭicchannā ayam āpatti hoti, tathā kassaci ekāhapaṭicchannā āpatti hotīti yojanā. Yathā ca parato āgatā udāyittherasseva āpatti hoti, tathā kassaci dvihādipaṭicchannā āpatti hotīti yojanā. Iminā vuttanayānusārena paratopi nayo netabbo. **Tasmā**ti yasmā ekāhādipaṭicchannā ekādiāpatti hoti, tasmā jānitabboti yojanā.

Paṭicchannabhāvaṃ vitthārento āha “ayam hī”tiādi. **Tatthā**ti “dasahākārehī”ti pāthe. Āpattiiti saññā etassāti **āpattisaññī**. **Pahu cāti** samattho ca. Papubbo hūdhātu samatthatthe hoti.

Tatthāti tassam mātikāyaṃ. **Yanti** āpattiṃ. **Sopi cāti** bhikkhupi ca. **Tatthā**ti tassam āpattiyam. **Ayanti** bhikkhu. **Tatthā**ti āpattiyam. **Alajjipakkhe tiṭṭhatī** “sañcicca āpattiṃ parigūhatī”ti (pari. 359) vuttapakkhe ṭhitattā alajjipakkhe tiṭṭhati.

Pakatattoti ettha “pārājikaṃ anajjhāpanno”ti attham paṭikkhipanto āha “tividham ukkhepaniyakammaṃ akato”ti. **Etanti** appaṭicchannabhāvaṃ, “āpajjati...pe... kusalehi cintitā”ti vacanam vā.

Gāthāya “sāvasesa”nti iminā pārājikaṃ nivatteti. **Garukanti** ettha saṅghādīsesameva adhippetanti dasseti. **Anādariyanti** sikkhāpade anādariyam. **Vajjanti** dukkaṃ. Ukkhittakena karaṇabhūtena.

Yassāti bhikkhussa, natthīti sambandho. **Bhīrukajātikatāyāti** bhīrukasabhāvatāya. Pabbatavihāre vasantassa yassa bhikkhunoti yojanā. **Pabbatavihāreti** pabbatassa tale, antare vā kārite vihāre. **Etasminti** etādise. Antarāye satiyevāti yojanā. Tassa acchannāva hotīti yojanā. **Anantarāyikasaññāya chādayato acchannāvāti** anantarāyikasaññāya chādentassāpi ekantena antarāyikattā acchannāvāti adhippāyo.

Assāti bhikkhussa. **Hanukavātoti** hanukassa gelaññakaro vāto. **Vijjhatīti** hanukaṃ vijjhati. **Imināti** bhikkhunā. Pahusaññino chādītāpi ekantena apahuttā acchādītāva hoti.

Chādetukāmo cāti ettha idaṃ catukkaṃ veditabbaṃ chādetukāmo chādeti, chādetukāmo nacchādeti, acchādetukāmo chādeti, nacchādetukāmo nacchādetīti. Tattha paṭhamapadam sandhāya vuttam “idaṃ uttānatthamevā”ti. Evaṃ sesāsupi mātikāsu catukkaṃ veditabbaṃ. Catūsu catukkesu paṭhamapade eva channā hoti, na sesapadesu. Anuttānattham dassento āha “sace panā”tiādi. **Purebhatte vāti** purebhattam vā, bhattato, bhattassa vā pureti **purebhattam**. Abyayībhāvasamāse sattamīvibhattiyā amitikāriyassa aniccabhāvato vuttam “purebhatte”ti. Eseva nayo “pacchābhatte”ti etthāpi. Dutiyapadassa attham dassetvā tatiyapadassa attham dassento āha “yassa panā”tiādi. Abhikkhuke ṭhāne vasantassa yassa bhikkhussāti yojanā. Āgamentassa gacchantassāti anādare cetāni sāmivacanāni.

Catutthapadassa attham dassento āha “yo panā”tiādi. Tattha **yo panāti** bhikkhu pana, āvi karotīti sambandho. **Sabhāganti** averiṃ. **Ayanti** bhikkhu. Upajjhāyo iti vā ācariyo iti vāti yojanā. **Lajjāyāti** lajjanimittam, lajjakāraṇā, lajjahetu vā. **Hīti** saccam, yasmā vā, **idhāti** āpattiārocanaṭṭhāne. **Averisabhāgassāti** averī hutvā sabhāgassa.

Pakāsetukāmoti aññesaṃ pakāsetukāmo. **Upajjhāyassāpīti** pisaddena aññassa santike kā nāma kathāti dasseti. **Tatthāti** āpattiārocanaṭṭhāne. **Sabhāgasaṅghādīsesanti** vatthusabhāgasaṅghādīsesam. **Suddhassāti** vatthusabhāgasaṅghādīsesato suddhassa. Āvikaraṇākāraṃ dassento āha “āvikaṇṭo cā”tiādi. **Iti imānīti**ādi nigamanam.

Tatoti jānitabbato, paranti sambandho. **Ekāhapaṭicchannāti** ekāhena paṭicchannā. Yāva cuddasa divasāni, tāva divasavasena yojanā kātabbāti yojanā. **Pakkhapaṭicchannanti** pakkhena paṭicchannaṃ. **Atirekapakkhapaṭicchannanti** pakkhato atirekena paṭicchannaṃ.

Samvaccharapaṭicchannanti samvaccharena paṭicchannaṃ. **Tato vāti** atirekasatṭhisamvaccha rato vā. **Bhiyyopīti** atirekampi.

Tatoti tīhi āpattīhi. **Paranti** atirekaṃ. **Gaṇanavasena**ti āpattigaṇanavasena. **Vatthukittanavasena vāti** āpattīnaṃ vatthukittanavasena vā. **Nāmamattavasena vāti** “saṅghādisesāpattiyo”ti evaṃ nāmasseva vasena vā. Ettha hi mattasaddo avadhāraṇattho, tena vatthum nivatteti.

Tatthāti “nāmamattavasena”ti pade. **Sajātisādhāraṇanti** sassa attano jāti sajāti, tāya sādharmaṇaṃ sajjātisādhāraṇaṃ. Sabbesaṃ, sabbehi vā āpattīhi sādharmaṇaṃ **sabbasādhāraṇaṃ**. **Tatthāti** duvidhesu nāmesu. **Sabbasādhāraṇanāmavasena**ti ettha pisaddo “ahaṃ bhante sambahulā saṅghādisesā āpajjīm ekāhapaṭicchannāyo”ti evaṃ sajjātisādhāraṇanāmavasenaapi “ahaṃ bhante sambahulā saṅghādisesā āpattiyo āpajjīm ekāhapaṭicchannāyo”ti evaṃ ubhayasādhāraṇavasenaapi vattum vaṭṭatīti dasseti. **Hīti** saccaṃ. Sabbampi parivāsādikam idam vinayakammanti yojanā. Vasati āpatti ettha tadāyattavuttitāyāti **vatthu**. Go vuccati vacanaṃ vā ñāṇaṃ vā, tam tāyatīti **gottaṃ**.

Tatthāti vatthādīsu catubbidhesu. **Tatthāti** tesu vacanesu. **Sukkavissatṭhiṃ kāyasamsaggantiādinā vacanenā**ti ettha ādisaddena duṭṭhullādivacanaṃ saṅgaṇhāti. **Idha panāti** imasmiṃ pana ṭhāne. **Yo yoti** tisso vā phusso vā āpanno hoti.

Evaṃ ārocetabbanti evaṃ vakkhamānanayena ārocetabbanti yojanā. Kim ārocetabbaṃ? “Ahaṃ bhante...pe... saṅgho dhāretu” iti ārocetabbanti yojanā.

Vedayāmahanti vedayāmi ahaṃ. Mama parivāsikabhāvaṃ saṅghaṃ, saṅghassa vā jānāpemīti attho. **Vedayatīti** mantī vedayati itī maṃ. Parivāsikabhāvaṃ saṅghaṃ, saṅghassa vā jānāpetīti maṃ saṅgho dhāretūti attho. Ettha bahūsu aṭṭhakathāpotthakesu “tiṇṇaṃ vā atirekānaṃ vā ārocentena āyasmanto dhārentū”ti pāṭho atthi. Kesuci aṭṭhakathāpotthakesu “tiṇṇaṃ ārocentena āyasmanto dhārentū”ti ettakoyeva pāṭho atthi. Heṭṭhā mānattakathāyampi evameva atthi. Tattha “atirekāna”nti iminā tīhi atirekānaṃ ārocentena saṅghaṃ apekkhitvā sace ekavacanavasena vattukāmo hoti, “maṃ saṅgho dhāretū”ti vattabbaṃ. Atha sambahule bhikkhū apekkhitvā sace bahuvacanavasena vattukāmo hoti, yathā tiṇṇaṃ, evaṃ “maṃ āyasmanto dhārentū”ti vattabbanti dasseti. Idañca saddasatthavaseneva vuttaṃ, na vinayakammavipattivasenaṭi daṭṭhabbaṃ.

“Vihāreyeva rattipariggaho”ti iminā antoupacārasīmāyampi parivasitabbabhāvaṃ dasseti. **Upacārasīmanti** parikkhittassa vihārassa parikkhepaṃ, aparikkhittassa parikkhepārahaṭṭhānaṃ. **Esāti** parivāsiko bhikkhu. **Assāti** āgatassa bhikkhuno.

Tatoti āpattipaṭicchannadivasato. **Kukkuccavinodanattāyāti** āpattipaṭicchannadivasena samaṃ parivasitabbaṃ nukho, na nukhoti kukkuccassa vinodanattāya. **Parivutthattāti** parivasitattā. **Soti** parivuttho bhikkhu. **Idanti** dātabbamānattaṃ. **Tanti** paṭicchannamānattaṃ. **Chārantanti** charattiyo samāhaṭṭhāti chāraṇaṃ, samāhāre digu. “Charatta”nti vattabbe sukhuccāraṇatthaṃ chakārassa dīghaṃ katvā evaṃ vuttaṃ, accantasamyoge cetam upayogavacanaṃ.

Appaṭicchannāpattim dātuṃ vaṭṭatīti sambandho. Iminā heṭṭhā vuttaṃ paṭicchannamānattaṃ imasmiṃ paṭicchannamānante samodhānetvāpi dātuṃ vaṭṭatīti dasseti. Evaṃ santepi mūlamānattaṃ paṭicca paṭicchannamānattanti vuccati. Kathaṃ dātuṃ vaṭṭatīti yojanā.

Assāti mānattaṃ yācantassa. **Tadanurūpanti** tassa yācanassa anurūpaṃ. **Sace paṭicchannā** dveti

ettha **dvēti** nidassanamattaṃ tato atirekampi gahetabbatā. **Sabbatthāti** sabbesu ekabahūsu. **Tadanurūpame vāti** tassa mānattadānassa anurūpameva. **Idha panāti** paṭicchannamānatte pana. **Ittiādi** nigamaṇaṃ. Yaṃ mānattaṃ diyyatīti yojanā. **Etthāti** paṭicchannamānatte.

Avasesāti appaṭicchannaparivāsapaṭicchannaparivāsehi avasesā. **Tatthāti** avasesesu dvīsu parivāsesu. Adhammikamānattacārāvasāne anuññātaparivāsoti sambandho. Kismiṃ vatthusmiṃ anuññātoti āha “imasmiṃ vatthusmi”nti. **Esāti** suddhanto, dātabboti sambandho. **Etanti** jānanājānaṇaṃ.

Tatthāti dvīsu suddhantesu, cūlasuddhantoti vuccatīti sambandho. **Yoti** bhikkhu, vadatīti sambandho. **Ārocitadivasatoti** āpattiārocitadivasato.

Tanti cūlasuddhantaṃ, parivasantena parivasitabbanti sambandho. **Aggahesīti** parivāsaṃ aggahesi. **Aññanti** gahitamāsato aññaṃ. “Parivāsadānakiccaṃ natthī”ti iminā parivāsagahaṇakiccampa natthīti dasseti gaṇhantasveva dātabbatā, dentasseva gahetabbatā vā. **Uddhampi ārohatīti** parivāsagahaṇakālato aññampi kālaṃ parivasitabbatā uddhampi ārohati. **Heṭṭhāpi orohatīti** parivāsagahaṇakālato ūnampi kālaṃ parivasitabbatā heṭṭhāpi orohati. **Idanti** ārohanorohaṇaṃ. **Tassāti** suddhantaparivāsassa. Ekameva paṭicca dve, tisso, sambahulā vā bhavantīti āha “ekaṃ vinā sambahulānaṃ abhāvato”ti.

Evam cūlasuddhantaṃ dassetvā mahāsuddhantaṃ dassento āha “yo panā”tiādi. **Tanti** mahāsuddhantaṃ. **Yāva** yattako upasampadadivaso hoti, **tāva** tattakaṃ kālanti yojanā. **Uddhaṃ nārohatīti** uddhaṃ ārohanakālassa abhāvato uddhaṃ na ārohati. **Etthāti** suddhantaparivāse. **Ayaṃ suddhantaparivāso nāmāti** nigamaṇaṃ.

Tatthāti tividhesu samodhānaparivāsesu. “Odhunitvā samodahitvā dātabbaparivāso”ti iminā odhunitvā samodhānetvā dātabbo parivāso **odhānasamodhānoti** vacanatthaṃ dasseti, “parivāso”ti iminā taddhitaṇapaccayassa sarūpaṃ dasseti. Ettha ca avadhuniyate, avadhunitabbanti vā **odhānaṃ**, saṃ ekato odahīyate sampiṇḍīyate, udahiyati sampiṇḍiyatīti vā **samodhānanti** avayavavacanattho kātabbo. “Makkhetvā”ti iminā dhudhātuyā pappoṭanadhaṃsanadhovanāni dasseti. **Soti** odhānasamodhāno, āgatoti sambandho.

Etthāti odhānasamodhāne. **Yoti** bhikkhu, paṭicchādetīti sambandho. Parivasanto vā mānattāraho vā mānattaṃ caranto vā abbhānāraho vā yo bhikkhūti yojanā. “Purimāya āpattiyā”ti padaṃ “samā vā”ti pade sahādiyogo. “Ūnatarā”tipade vibhattiapādānaṃ, anumeyyavisayaapādānaṃ vā. “Adivase katvā”ti iminā **odhunitvāti** ettha dhudhātuyā yathāvuttattheyeva dasseti. **Ūnakapakkhapaṭicchannāti** pakkhato ūnakena paṭicchannā. **Etenupāyenāti** pakkhe vuttana etena upāyena.

Tatthāti mūlāpattito atirekapaṭicchanne. **Āvi kārāpetvāti** mūlāpattito antarāpattiyā paṭicchannabhāvaṃ āvi kārāpetvā. **Etthāti** āpattipaṭicchanne. **Pamāṇanti** kāraṇaṃ. **Yāti** āpatti. **Tatthāti** mūlabhāvena kattabbāyaṃ mūlāpattiyaṃ. **Itaranti** mūlibhāvena kattabbaṃ mūlāpattiṃ. **Samodhāyāti** samodahitvā. Pakkhipitvāti attho.

Ekā vā yā āpatti sabbacirapaṭicchannā hotīti yojanā. **Sabbacirapaṭicchannāyoti** sabbāsaṃ āpattīnaṃ cirena paṭicchannāyo. **Tāsanti** āpattīnaṃ. **Agghenāti** paricchena. Agghasaddo hettha paricchadatthavācako. Abhidhāne (abhidhānappadīpikāyaṃ 1048 gāthāyaṃ) vuttaṃ “aggho mulye ca pūjane”ti. Ettha “mulye cā”ti padassa mūlaparicchedetī attho daṭṭhabbo. Tamevatthaṃ dassento āha “tāsaṃ rattiparicchedavasenā”ti. Imehi padehi agghena rattiparicchedenā samodhānetvā dātabbo parivāso **agghasamodhānoti** vacanatthaṃ dasseti. Ettha ca “sabbacirapaṭicchannāyo”ti vuttatā kiñcāpi koṭṭiatthavācako tatiyakkharena pāṭho yutto viya dissati. Tathāpi so pāṭho na gahetabbo. Kasmā? Bahūsu pālīpotthakesu, aṭṭhakathāpotthakesu ca alikhittatā. Bahūsu hi porāṇapotthakesu catutthakkharena pāṭhoyeva likhito, tasmā so pāṭhoyeva gahetabbo, na aññoti daṭṭhabbaṃ. **Soti** agghasamodhāno.

Āgatoyevāti sambandho.

Yassa panāti bhikkhussa, paṭicchannāti sambandho. **Sabbanti** sakalaṃ. Āpattisahassagāthāya –

Dasasatam āpattiyo rattisatam chādayitvānāti yojanā. Iminā nāyēnapi **agghasamodhānoti** ettha agghasaddassa catutthakkharena pāṭhassa yuttabhāvo veditabbo. Agghena dasarattiparicchēdena samodhāya dātabbo **agghasamodhāno**.

Yo parivāso nānāvattukāyo āpattiyo ekato katvā diyyati, ayaṃ parivāso missakasamodhāno nāmāti yojanā. Ettha vattuvāsena missakā āpattiyo samodhānetvā dātabbo parivāso **missakasamodhānoti** vacanatto kātabbo. **Tatrāti** missakasamodhāne. **Tadanurūpāyāti** tassa yācanassa anurūpāya.

Ettha cāti missakasamodhāne ca, kātuṃ vaṭṭatīti sambandho.

“Pakkhamānattañca ...pe... kathayissāmā”ti yaṃ vacanaṃ vuttaṃ, tassa vacanassa okāsoti yojanā. **Taṃ panāti** pakkhamānattaṃ pana. “Aḍḍhamāsameva dātabba”nti iminā pakkhameva dātabbaṃ mānattaṃ **pakkhamānattanti** vacanattaṃ dasseti. **Hīti** saccaṃ. **Taṃ panāti** pakkhamānattaṃ pana, dātabbanti sambandho. **Attano sīmanti** attano vihārasīmaṃ, mahāsīmanti attho. **Sodhetvāti** sabbāsaṃ hatthapāsānāyāvasena, chandārahānaṃ chandanāyāvasena, sīmato bahikaraṇāvasena ca sodhetvā. **Catuvaggagāṇanti** catuvaggasaṅghaṃ. **Gaṇoti** cettha saṅghoyevādhippeto.

Tatrāti “yojanā kātabbā”ti vacane. **Mukhamattadassananti** upāyamattadassanaṃ, ādimattadassanaṃ vā. “Āpannāya bhikkhuniyā”ti padaṃ “evamassa vacanīyo”ti pade kattā, “yācāpetvā”ti pade kāritakammaṃ. “Byattāya bhikkhuniyā”ti padaṃ “ñāpetabbo”ti pade kāritakattā, “saṅgho”ti padaṃ tattheva kāritakammaṃ. “Etaṃ kāraṇa”nti dhātukammaṃ ajjhāharitabbaṃ. Tabbapaccayena kāritakammameva vuttaṃ. Nāpetabbākāraṃ dassento āha “suṇātu me”tiādi.

Nikkhattavattanti karaṇatthe cetam upayogavacanaṃ. Nikkhattavattenāti hi attho. **Tatthevāti** mālakasīmāyameva. **Hīti** saccaṃ, yasmā vā. **Assāti** mānattacārikāya bhikkhuniyā. **Tatrāti** tasmā kattabbavinayakammabhāvatoti attho. **Noti** amhākaṃ, santikanti sambandho. Catūhi pakattabhikkhunīhi nisīditabbanti sambandho. **Gāmūpacārato dve leḍḍupāte atikkamitvāti** idaṃ bhikkhunīvihārūpacārātikkaṃ sandhāya vuttaṃ. **Vihārūpacāratopīti** bhikkhuvihārūpacāratopī. **Tatthāti** bhikkhunīnaṃ nisīnaṭṭhānaṃ. Kurundimāhāpacārīsu pana vuttanti sambandho. **Vihārassa cāti** bhikkhuvihārassa ca. Gāmassa upacāraṃ muñcituṃ vaṭṭatīti na vuttanti yojanā. Tasmā gāmūpacārepi nisīdituṃ vaṭṭatīti adhippāyo.

Tāya bhikkhuniyā ārocetabbanti sambandho.

Tatthevāti bhikkhunīnaṃ nisīdanaṭṭhāneyeva. **Ṭhānanti** bhikkhūnaṃ ṭhānaṃ. **Etīti** āgacchati. **Pagevāti** pātoyeva. **Tāyāti** mānattacārinīyā.

Anikkhattavattāya pana bhikkhuniyāti sambandho. **Ajānanapaccayāti** ajānanakāraṇā. **Tanti** vacanaṃ. **Pārivāsikavattādīnanti** ādisaddena āgantukavattapūraṇanissayapaṭippassaddhādayo saṅgaṇhāti. **Yuttataraṃ dissatīti** yuttataraṃ hutvā dissati. Iminā anikkhattavattabhikkhunā viya bhikkhuniyāpi antoupacārasīmagatānaṃyeva ārocetabbaṃ, na gāme ṭhitānampi gantvā ārocetabbanti dīpeti. **Uposatheti** uposathadivase. Eseva nayo pavāraṇāyapi. **Devasikanti** divase divase. **Tasmiṃ gāmeti** bhikkhunīnaṃ vasanaḡāme. **Aññatrāti** bhikkhunīnaṃ vasanaḡāmato aññasmiṃ gāme. **Tatrāti** bhikkhunīnaṃ vasanaḡāmaṃ. **Dassetvāti** bhikkhunīnaṃ dassetvā. **Tāyāti** mānattacārinīyā. **Vihāranti** bhikkhūnaṃ vihāraṃ. **Upacārasīmāyāti** upacārasīmato bahīti sambandho. **Ayanti** mānattacārinī.

Vīsati gaṇo imassāti **vīsati gaṇo**, saṅgho, tasmim. Mānattaṃ caramānā bhikkhunīti yojanā. **Idaṃ pakkhamānattaṃ nāmāti** idaṃ pubbavacanassa nigamavasena paravacanassa kathanatthāya vuttanti daṭṭhabbaṃ.

Tatthāti tividhesu mānattesu. Yadetaṃ mānattaṃ anuññātanti sambandho. **Paratoti** parasim. Parivāsaṃ parivasantassa mūlāyapaṭikassitassa udāyittherassa anuññātanti sambandho. **Āpajjitvāti** āpajjanato. **Idanti** mānattaṃ vuccatīti sambandho. **Hīti** saccaṃ, yasmā vā. **Odhānasamodhānanti** ettha vacanatto heṭṭhā vuttoyeva. **Tampīti** kurundiyaṃ vuttavacanampi.

Tanti agghasamodhānamissakasamodhānaṃ, dātabbanti sambandho. **Ettāvātāti** etaparimāṇena vacanakkamena, “ayañhi idha adhippeto parivāso nāmā”ti (cūlava. aṭṭha. 102) vacanato paṭṭhāya yāva “yojetvā dātabba”nti vacanaṃ, tāva vacanakkamenāti attho. “Tena hi bhikkhave...pe... dassessāmā”ti yaṃ vacanaṃ vuttanti yojanā. “Atthato”ti iminā saddopi gahetabbo avinābhāvato.

Paṭicchannaparivāsakathā

102. Yā pāli vuttāti sambandho.

108. **Tatoti** pālito. **Taṃ āpattinti** taṃ antarāpattiṃ. **Assāti** bhikkhussa. Nikkhittavatto bhikkhūti sambandho, hutvāti vā. **Soti** bhikkhu, ṭhito hutvāti sambandho. **Tassā āpattiyāti** tassā antarāpattiyā. **Paṭicchannā hotīti** antarāpattipi paṭicchannā hoti. **Tasmimpīti** mūlāya paṭikassanepi. **Makkhitāti** pisitā, dhamṣitā vā. Makkhiyanti pisiyanti, dhamṣiyantīti vā **makkhitā**, parivutthadivasā. **Tatoti** pālito paranti sambandho. Paratopi eseva nayo. **Evantiādi** nigamanaṃ. Paṭicchannavāre dassitā hotīti sambandho.

Samodhānaparivāsakathā

125. **Tatoti** paṭicchannavārato, paraṃ dassitanti sambandho. **Ettha cāti** etasmim vāre ca. **Yasmāti** yasmā kāraṇā, yena kāraṇena vā. **Tenevāti** teneva kāraṇena, tasmā kāraṇā vā, “mūlāya...pe... detū”ti vuttanti yojanā. Tasmā sabbe makkhitāva hotīti yojanā. **Tatoti** vārato paraṃ niṭṭhāpitanti sambandho.

Agghasamodhānaparivāsakathā

134. **Tatoti** vārato paraṃ dassitoti sambandho. **Tatoti** vārato paraṃ pāli ṭhapitāti sambandho. Lajjidhamme vā uppanneti sambandho. **Yanti** kammaṃ. **Tatoti** vārato paraṃ tatheva pāli ṭhapitāti sambandho.

138. **Tatoti** vārato paraṃ purimanayeneva pāli ṭhapitāti sambandho.

Suddhantaparivāsādikathā

156. **Tatoti** vārato paraṃ suddhantaparivāso dassitoti sambandho.

160. **Tatoti** pālito paraṃ pāli ṭhapitāti sambandho.

165. **Tatthāti** pāliyaṃ. **Antarā...pe... appaṭicchannāyotiādīsu** attho daṭṭhabboti sambandho.

166. **Pacchimasim āpattikkhandheti** ettha āpattikkhandhassa bhedabhāvato kiṃ “pacchimasim āpattikkhandhe”ti vuttanti āha “ekova so āpattikkhandho”ti. Atha kasmā “pacchimasim āpattikkhandhe”ti vuttanti āha “pacchā chādītattā panā”tiādi. Ettha **panasaddo** garahatthavācako, tathāpīti hi attho. Ekopi āpattikkhandho pacchā chādītattā pacchimasim

āpattikkhandheti vuttanti adhippāyo.

180. “Vavatthitā sambhinnā”ti etaṃ vacananti yojanā.

8. Dvebhikkhuvāraekādasakādīkathā

181. **Tatoti** pālito paraṃ vuttanti sambandho. **Tatthāti** pāliyaṃ. **Missakanti** ettha kehi missakanti āha “thullaccayādīhi missaka”nti.

184. **Tatoti** pālito paraṃ vuttanti sambandho. **Tatthāti** “idha pana bhikkhave”tiādīpāṭhe. **Tañcāti** “idha pana bhikkhave”tiādivacanañca ito pubbe avuttaṃ sabbam vacanañcāti yojanā.

Iti samuccayakkhandhakavaṇṇanāya yojanā samattā.

4. Samathakkhandhakam

1. Sammukhāvinayakathā

186-7. Samathakkhandhake evamattho vedītabboti yojanā. **Cha mātīkāpadānīti** vākyampi samāsopi yuttoyeva. **Tattha** samāso pana asamāhāradiguyeva. “Nikkhipitvā”ti padaṃ “vutto”ti pade pubbakālakiriyāvisesanaṃ, tulyattho vā. **Vitthāroti** vibhaṅgo. **Tatthāti** vibhaṅge. **Saññāpetīti** ettha saññaṃ katvā jānāpetīti atthaṃ paṭikkhipanto āha “paritosevā jānāpetī”ti. Iminā saṃpubbo nādhātu paritosaṃatthaṃ antokatvā avabodhanattho hotīti dasseti. **Kāraṇapatirūpakānīti** kāraṇassa paṭibhāgāni. **Nijjhāpetīti** ettha jhedhātu olokanatthoti āha “oloketī”ti. **Yathāti** yenākārena, kariyamāneti sambandho. **Soti** dhammavādī. Paratopi eseva nayo. “Punappuna”nti iminā **anupekkhatīti** ettha anusaddo na upacchinnatthoti dasseti. **Pekkhati anupekkhatīti** ettha ikkhadhātu “dasseti anudasseti”ti ettha disadhātuyā sadisatthoti āha “dasseti...pe... pariyāyavacanānī”ti. **Tesaññevāti** “pekkhati anupekkhatī”ti padānaññeva. **Pariyāyavacanānīti** vevacanasaddā atthe paribyattim ayanti gacchanti imehīti **pariyāyāni**, tāniyeva vacanāni pariyāyavacanāni. **Soti** adhammavādī. **Mohetvāti** dhammavādīpuggalādim mohāpetvā.

188. Dhammavādī puggalo dassetīti sambandho. **Amohetvāti** adhammavādīpuggalādim amohāpetvā, aviparītaṃ jānāpetvāti attho.

2. Sativinayakathā

195. Parammukhaṃ vineti vināsetīti **vinayo**, parammukhaṃ vineti vināseti anenāti vā **vinayo**, vinayakammaṃ. Saṅghadhammavinayapuggalasammukhānaṃ dātabbo vinayo **sammukhāvinayo**. **Pañcimānīti** ettha pañcanaṃ sarūpaṃ dassento āha “suddhassā”tiādi. Anuvaditassa dānanti sambandho. **Etānīti** pañca aṅgāni. “Ekekaaṅgavasena na labbhantī”ti iminā samudāyavākyanibhattibhāvato pañcaṅgavaseneva labbhantīti dasseti. **Desanāmattamevetanti** “pañcimānī”ti etaṃ vacanaṃ desanāmattameva, na avayavavākyanibhattivacananti adhippāyo. **Dhammanti** bhūtaṃ. **Etthāti** “pañcimāni bhikkhave”tiādivacane. **Tattha cāti** “pañcimāni bhikkhave”tiādivacane ca. **Anuvadantīti** ettha anuddhamśanena vadantīti dassento āha “codentī”ti. Ayaṃ pana sativinayo dātabboti sambandho. **Anāgāminopīti** pisaddo sambhāvane, sakadāgāmiādike pana kā nāma kathāti dasseti. **So ca khoti** sativinayo ca. **Codiyamāneyevāti** codiyamānasseva, ayameva vā pāṭho. **Tasminti** sativinayasmiṃ dinneti sambandho. Acoditattā kathā na rūhatīti āha “codentopī”tiādi. **Āpajjatīti** codako āpajjati. Codanādiasārurpe vineti vināsetīti **vinayo**, vineti vināseti anenāti vā **vinayo**, vinayakammaṃ. Sativepullapattassa dātabbo vinayo **sativinayo**.

3. Amūḷhavinayakathā

196. Bhāsitaparikantanti ettha bhāsitaparikantasaddānaṃ karaṇāpekkhattā viṣuṃ karaṇaṃ dassento āha “vācāya bhāsitam, kāyena parikanta”nti. “Parikkamētvā kata”nti iminā parikamatīti **parikantaṃ**, parikantaṃ hutvā kataṃ **parikantanti** vacanattaṃ dasseti. **Parikkamētvā**ti atikkamitvā. **Saratāyasmā**ti ettha ukāralopasandhiṃ dassento āha “saratu āyasmā”ti. “Evarūpiyā āpattiyā”ti iminā **āpajjitā**ti ettha tupaccayayogabhāvato kammaṭṭhachattiyāpi sambhavabhāvaṃ dasseti. Tupaccayayoge kammaṭṭhachattiyā aniccaṃ hoti, tasmā pāḷiyam “evarūpiyā āpattiyā”ti kammaṭṭhachattiyābhāvena avatvā “evarūpiṃ āpatti”nti kammaṭṭhadutiyaḷbhāvena vuttanti daṭṭhabbaṃ. **Tassā**ti “āpajjitvā”ti pāṭhassa. “Paṭṭhamaṃ pacchā”ti padehi adhippāyattaṃ dasseti. Codakassa kathaṃ vineti vināsetīti **vinayo**, codakassa kathaṃ vineti vināseti anenāti vā **vinayo**. Paṭṭhamaṃ mūḷhabhāvaṃ upagantvā pacchā amūḷhassa dātabbo vinayo **amūḷhavinayo**.

4. Paṭiññātakaraṇakathā

200. Paṭijāniyate, paṭijānaṃ vā **paṭiññā**, tāya kāretabbaṃ.

5. Yebhuyyasikākathā

202. Yebhuyyasikāti ettha yebhuyyena pavattā yebhuyyasikā, dhammavādīnaṃ yebhuyyatāsampādikā kiriyāti dassento āha “yassā kiriyāyā”tiādi. Tattha **yassā kiriyāyā**ti yassā yebhuyyatāsampādikāya kiriyāya. **Esā**ti yebhuyyatāsampādikā kiriyā.

204. Oramattakanti ettha orasaddo ca mattasaddo ca samūhaṃ katvā parittavācako appamattavācakoṭi āha “parittaṃ appamattaka”nti. “Bhaṇḍanamattamevā”ti iminā na mahantaṃ vivādādhikaraṇaṃ hotīti dasseti. **Na ca gatigatanti** ettha cirakālabhāvaṃ na ca gatanti dassento āha “dve tayo...pe...avinicchita”nti. **Tattha tatthevā**ti tasmim tasmim vivādādhikaraṇajātāāvāse eva, na ca saritasāritapadānaṃ suddhakāritakiriyabhāvaṃ dassento āha “sayam saritaṃ vā aññehi sāritaṃ vā na hotī”ti. **Tehi bhikkhūhī**ti vivādakārahehi bhikkhūhi. “Salākaṃ gāhento”ti iminā “jānātī”ti padassa kattāraṃ dasseti. **Iminā nīhārenā**ti iminā kāraṇena. **Api nāmā**ti iminā **appevanāmasaddo** apināmapariyāyoti dasseti. **Assū**ti bhavēyyuṃ. Iminā “pāḷiyam adhammavādī bahutarā bhavēyyuṃ, appeva nāma sādhu”ti yojanānaṃ dasseti. “Ayamassa ajjhāsayo hotī”ti iminā pāṭhasesaṃ dasseti. **Assā**ti salākagāhassa. **Dvīsupī**ti “jānāti saṅgho bhijjissatī”ti ca “appeva nāma saṅgho bhijjeyyā”ti ca dvīsupi padesu.

“**Adhammena gaṇhantī**”ti ettha “gaṇhantī”ti kiriyāpadassa adhammavādino eva kattā nāmāti āha “adhammavādino”ti. “Dve dhammavādino”ti iminā “vaggā gaṇhantī”ti ettha “gaṇhantī”ti kiriyāpadassa dhammavādino eva kattā nāmāti dasseti. **Na ca yathādiṭṭhiyā gaṇhantī**ti ettha dhammavādino hutvā dhammavādisalākaṃ aggahetvā adhammavādisalākassa gahaṇaṃ na ca yathādiṭṭhiyā gaṇhantī nāmāti dassento āha “dhammavādino hutvā”tiādi. **Paṭivattetvā**ti imamevatthaṃ paṭisedhetvā. “Parivattetvā”tipi pāṭho, heṭṭhupariyāyaṃ katvāti attho. **Teti** dhammavādino. **Etthā**ti samathakkhandhake.

6. Tassapāpiyasikākathā

207. Asucīti ettha natthi sucīni kāyavacīkammāni etassāti asucīti vacanattaṃ dassento āha “asucīhi kāyavacīkammehi samannāgato”ti. Eseva nayo **alajjī**ti etthāpi. **Sānuvādoti** ettha anuvādaupavādasaddānaṃ pariyaṃyattā vuttaṃ “saupavādo”ti. **Iti pañcā**ti imāni pañca āṅgāni. **Etthā**ti tassapāpiyasikakamme. **Idanti** kammaṃ vuccatīti sambandho. **Hī**ti vitthāro. Yo puggalo pāpiyoti yojanā. **Pāpussannatāyā**ti lāmakussannatāya. Iminā ayañca pāpo ayañca pāpo, ayamimesaṃ viśesena pāpoti **pāpiyoti** ca pāpānaṃ atisayena pāpoti **pāpiyoti** ca vacanatto dassito. **Tassā**ti puggalassa. Iminā tassa

pāpiyassa kattabbaṃ **tassapāpiyasikaṃ**, tameva kammaṃ **tassapāpiyasikakammanti** vacanattaṃ dasseti. Kesuci potthakesu yakāre dvebhāvo atthi, so ayuttoyeva. “Yebhuyasikā”ti ettha yakāre dvebhāvassa dassanato etthāpi dvebhāvo yutto bhavyeyyāti likhantīti daṭṭhabbaṃ.

7. Tiṇavatthāarakādikathā

212. Kakkhaḷatāya vālatāyāti ettha kakkhaḷassa bhāvo kakkhaḷatā, vāḷassa bhāvo vālatāti vacanattaṃ dassento āha “kakkhaḷabhāvāya ceva vāḷabhāvāya cā”ti. Iminā tāpaccayassa samūhatthañca svatthañca paṭikkhipati. “Kakkhaḷatāya vālatāyā”ti byañjanatoyeva nānaṃ, na atthato. **Bhedāyāti** ettha aññassa bhedaṃ paṭikkhipanto āha “saṅghabhedāyā”ti. **Gilānepīti** pisaddo aññe pana kā kathāti dasseti. **Tatthevāti** adhikaraṇavūpasamaṭṭhāneyeva. “Ekato”ti iminā **ekajjhanti** padassa “ekato”ti padena samānataṃ dasseti, ekasaddato jhappaccayo ca topaccayo ca viseso, “tiṇavatthāarakasadisattā”ti iminā sadisūpacāraṃ dasseti. Tiṇehi avattharittābanti **tiṇavatthāraṃ**, gūthamuttaṃ, tiṇavatthāramiva **tiṇavatthāraṃ**. Ettha adhikaraṇameva mukhyato labbhati, samatho pana phalūpacārato, sadisatthe kapaccayo. Tamevatthaṃ pākataṃ karonto āha “**yathā hī**”tiādi. Ghaṭṭiyamānaṃ gūthaṃ vā muttaṃ vāti yojanā. “Ghaṭṭiyamāna”nti padaṃ hetuantogadhavisesanaṃ, “bādhati”ti iminā sambandhitabbaṃ. Suppaṭicchādītassa pana assa gūthamuttassāti yojanā. “Suppaṭicchādītassā”ti padampi hetuantogadhavisesanameva, “na bādhati”ti iminā sambandhitabbaṃ. Yaṃ adhikaraṇaṃ saṃvattatīti sambandho. **Mūlānumūlanti** mūlañca anumūlañca mūlānumūlaṃ. **Tanti** adhikaraṇaṃ. **Iminā kammēnāti** tiṇavatthāarakakammēna. Gūthaṃ tiṇehi paṭicchannaṃ suvūpasantaṃ hoti viya tiṇavatthārakena paṭicchannaṃ suvūpasantaṃ hotīti yojanā. **Itīti** tasmā.

213. Thullavajjanti ettha thullaccayassāpi thullavajjantā idha pārājikasāṅghādīsēsamevādhippetanti āha “pārājikañceva saṅghādīsēsāñcā”ti. **Gihipaṭisaṃyuttanti** ettha gihīnaṃ paṭisaṃyuttaṃ gihipaṭisaṃyuttanti vacanattaṃ dassento āha “gihīna”ntiādi. “Hīnenā”ti padaṃ “khuṃsanavambhana” itī padeneva sambandhitabbaṃ. **Dhammikapaṭissavesūti** nimittatthe bhummavacanaṃ.

214. Kammavācāpariyosāne vuṭṭhitā hontīti sambandho. **Tatthāti** adhikaraṇavūpasamaṭṭhāne. **Aññāvihitāpīti** adhikaraṇavinicchayato aññasmim̐ ṭhāne cittaṃ āvihitāpi ṭhapitāpi. **Upasampadamaṇḍalatoti** upasampadasīmabimbato, **ye panāti** bhikkhū pana, diṭṭhāvikkammaṃ karontīti vā anāgatāti vā nisinnāti vā sambandho. **Tehi vāti** adhikaraṇaṃ vinicchinantehi bhikkhūhi vā. **Tatthāti** adhikaraṇavinicchitattānaṃ. **Chandaṃ datvāti** chandaṃ saṅghassa datvā. **Pariveṇādīsūti**ādisaddena āvāsādayo saṅgaṇhāti. **Teti** bhikkhū.

8. Adhikaraṇakathā

215. Vipaccatāyāti ettha vikārabhāvena patati pavattatīti **vipaccaṃ**, cittadukkhaṃ, tadeva **vipaccatā**, tadatthāyāti dassento āha “cittadukkhattha”nti. “Pharusavacana”nti iminā **vohāra** saddo vacanapariyāyoti dasseti. **Yo tatthāti** ettha tasaddassa visayaṃ dassento āha “tesu anuvadantesū”ti. Yo upavādoti yojanā. “Anuvadanā”ti etaṃ padanti yojanā. **Ākāradassananti** anuvadanassa ākāradassanaṃ, dassanahetu vā. “Punappuna”nti iminā **anusampavaṅkatāti** ettha anusaddassa na upacchinnattaṃ dasseti. **Tatthevāti** anuvadane eva. **Sampavaṅkatāti** sammā pakārena ninnaponapabbhāratā. **Abbhussahanatāti** ettha atirekaṃ ussāhanatāti dassento āha “kasmā”tiādi. **Anubalappadānanti** ettha punappunaṃ balassa padānanti dassento āha “purimavacanassā”tiādi.

Kiccayatāti ettha “mā paṇḍiccaya”ntiādisu (jā. 2.22.1) viya byañjanavaḍḍhanavasena yakārāgamoti āha “kiccameva kiccaya”nti. “Ubhayaṃpetam saṅghasseva adhivacana”nti iminā kiccakaraṇīyasaddo kattuvācakoti dasseti, saṅgho hī karotīti vacanattena **kiccoti** ca **karaṇīyoti** ca vuccati. Tassa bhāvo, **kiccayatā karaṇīyatāti** vutte saṅghakammaṃyeva labbhati. Tena vuttaṃ “ubhayaṃpetam saṅghakammasseva adhivacana”nti. Yadi kammavācako bhavyeya, “kattābanti

kiccaṃ, karaṇīya’nti vuttayeveva saṅghakammassa labhanato tāpaccayo svattho bhaveyya. Evañhi sati kiccayassa bhāvo **kiccayatā** karaṇīyassa bhāvo **karaṇīyatāti** vacanatto na kattabbo bhaveyya, kato ca, tasmā na kammavācakoti daṭṭhabbaṃ. **Tassevāti** saṅghakammasseva. **Tatthāti** apalokanādisu catūsu kammesu. **Sīmaṭṭhakasaṅghanti** “upacārasīmādisu ṭhitaṃ saṅghaṃ. **Sodhetvāti** ettha sodhanaṃ nāma sīmaṭṭhakasaṅghassa hatthapāsānāyanaṃ, chandārahānaṃ chandassa āharaṇaṃ, sīmato bahikaraṇaṃ. Tamevatthaṃ ekadesato dassetuṃ vuttaṃ “chandārahānaṃ chandaṃ āharitvā”ti. Apaloketi āpucchati anenāti **apalokanaṃ**, taṃyeveva kammaṃ **apalokanakammaṃ**. **Vuttanayenevāti** “sīmaṭṭhakasaṅghaṃ sodhetvā”tiādinā vuttanayeneva. “Suṇātu me”tiādinā saṅghagaṇapuggale ñāpeti etāyāti **ñatti**, sāyeveva kammaṃ **ñattikammaṃ**, ñattiyeva dutiyaṃ **ñattidutiyaṃ**, tameva kammaṃ **ñattidutiyaṃ**. Ettha kiñcāpi ñatti paṭhamāṃ ṭhapitā, kammavācāyeveva dutiyā hoti, “phassapañcamā”tiādisu (dhātu. 316) viya pana paṭilomavasena vohāraṃ katvā “ñattidutiya”ti vuttaṃ. **Phassapañcamāti** ettha kiñcāpi dhammasaṅgaṇiyaṃ (dha. sa. 1 ādayo) “phasso hoti, vedanā hoti, saññā hoti, cetanā hoti, cittaṃ hoti”ti phassaṃ paṭhamāṃ vuttaṃ, paṭilomavasena pana vohāraṃ katvā “phassapañcamā”ti dhātukathāyaṃ vuttanti daṭṭhabbaṃ. Eseva nayo ñatti catutthakammepi. **Ekāya ca anusāvanāyāti** ñattito anupacchā sāvetabbāti **anusāvanā**, tāya, **tīhi ca anusāvanāhīti** ñattitoanu pacchā, punappunaṃ vā tikkhattuṃ sāvetabbāti **anusāvanā**, tāhi. **Tatthāti** catūsu kammesu.

Apaloketvāvāti ettha evaphalaṃ dassento āha “ñattikammādivasena na kātabba”nti. **Ñattikammampīti** pisaddena na kevalaṃ apalokanakammameva, atha kho ñattikammampīti dasseti. **Ñattidutiyaṃ** **panāti** ettha panasaddo visesatthajotako, pakkhantarajotako vā. **Tatthāti** dvīsu kammesu. **Garukānīti** alahukāni. **Avasesānīti** chahi kammehi avasesāni, evarūpāni lahukakammānīti sambandho. “Avasesā”tipi pāṭho, sammutiyoti sambandho. **Apaloketvāpīti** pisaddo ñattidutiyaṃ kammavācāṃ sāvetvāpīti sampiṇḍeti. Aññatthāpohanaṃ dassento āha “ñattikammañatticatutthakammavasena pana na kātabbamevā”ti. Ñatticatutthakammaṃ kātabbanti sambandho. **Etthāti** samathakkhandhake.

Vitthārato pana āgatoyevāti sambandho. **Etesanti** catunnaṃ kammānaṃ. Yaṃ pana atthajātaṃ anuttānanti sambandho. **Tatthāti** catūsu kammesu. **Tanti** atthajātaṃ. **Evanti** evaṃ kammavaggeyyeva vaṇṇayamāne. **Hīti** laddhaguṇajotako. **Suviññeyyāti** sukkena viññātabbā.

216. Pāḷivasenevāti na aṭṭhakathāvasenāti adhippāyo.

220. Yenāti cittuppādena. Iminā vivadanti anenāti **vivādoti** vacanatthaṃ dasseti. **Samathehi cāti** casaddo sampiṇḍanattho. Tena na kevalaṃ vivādoyeva, atha kho adhikaraṇaṅcāti sampiṇḍeti, atha vā **samathehi cāti** samathehi eva. Iminā samathehi adhikarīyati vūpasamīyatīti **adhikaraṇanti** vacanatthaṃ dasseti. Vivādoyeva adhikaraṇaṃ **vivādādhikaraṇaṃ**. **Evamādinā nāyenti** ādisaddena anuddhaṃsanena vadanti anena cittuppādenāti **anuvādoti**tiādayo vacanatthe saṅgaṇhāti.

222. Sandhāyabhāsitavasenāti lokavajjaṃ sandhāya bhāsitassa vacanassa vasena. Sandhāyabhāsitatthaṃ vitthārento āha “yasmim hī”tiādi. Tattha pathavikhaṇanādikē yasmim āpattādhikaraṇeti yojanā. **Tasminti** kusalacittaṅge āpattādhikaraṇe. **Tasmāti** yasmā na sakkā vattuṃ, tasmā. **Idanti** “natthi āpattādhikaraṇaṃ kusala”nti vacanaṃ, vuttanti sambandho. Sandhāya avuttam dassetvā sandhāya vuttaṃ dassento āha “idaṃ pana sandhāya vutta”nti. Tattha **idaṃ panāti** kāraṇaṃ pana sandhāyāti sambandho. Yaṃ āpattādhikaraṇanti yojanā. “Lokavajja”nti pade tulyādhikaraṇaṃ. Lokasmim, lokehi vā vajjetabbanti **lokavajjaṃ**. **Tanti** āpattādhikaraṇaṃ. **Tatthāti** āpattādhikaraṇe. **Vikappoti** vividhā kappanaṃ, vividhataṅko vā. **Yaṃ panāti** āpattādhikaraṇaṃ pana. “Paṇṇattivajja”nti pade tulyādhikaraṇaṃ. Bhagavato paññattiyā hetubhūtāya vajjetabbanti **paṇṇattivajjaṃ**. **Tanti** āpattādhikaraṇaṃ, akusalaṃ hotīti sambandho. **Kiñcīti** appamattakaṃ, āpattānāpattiṃ ajānantassa āpajjanatoti sambandho. **Tasmāti** yasmā abyākataṃ hoti, tasmā. **Tatthāti** paṇṇattivajjabhūte āpattādhikaraṇe. “Āpattādhikaraṇaṃ...pe... kusala”nti idaṃ vacanaṃ vuttanti yojanā.

Yadi kusalacitto āpajjati, atha nanu āpattādhikaraṇaṃ kulalanti vattabbo bhaveyyāti āha “sace panā”tiādi. **Yanti** āpattādhikaraṇaṃ. “Idaṃ vuccati...pe... kusala”nti vadeyya saceti yojanā. Eḷakalomañca padasodhammañca eḷakalomapadasodhammāni, tāni ādīni yesaṃ tānīti **eḷakalomapadasodhammādīni**, tāni samuṭṭhānāni yāsanti **eḷakalomapadasodhammādisamuṭṭhānā**, tāsāṃ āpattīnampīti sambandho. **Tatthāti** eḷakalomapadasodhammādisamuṭṭhānāsu āpattīsu. **Āpattiyā aṅgānti** āpattiyā kāraṇaṃ. Evaṃ āpattiyā anaṅgaṃ dassetvā tassāyeva aṅgaṃ dassento āha “kāyavacīviññattivasena panā”tiādi. Tattha **calitappavattānanti** calitena hetubhūtena pavattānaṃ. Atha vā calito ca kāyo, pavattā ca vācāti **calitappavattā**, tāsāṃ calitappavattānaṃ kāyavācānaṃ. **Taṅcāti** kāyavācānaṃ aññatarañca. **Abyākatanti** ettha itisaddo parisamāpanattho.

Ayamatto evaṃ veditabboti yojanā. **Tenāti** cittena. “Idaṃ...pe... saddhi”nti iminā **sañjānantoti** ettha saṃsaddassa sundaratthaṃ saha ākārena dasseti. “Vītikkama...pe... kappetvā”ti iminā **ceccāti** padassa atthaṃ saha viśesanena dasseti. “Upakkamavasena...pe... pesetvā”ti iminā **abhivitaritvāti** padassa atthaṃ dasseti. Pāḷiyāṃ yaṃsaddovītikkamavisayoti āha “yaṃ āpattādhikaraṇaṃ vītikkama”nti. “Āpajjati”ti iminā pāṭhasesaṃ dasseti. Evaṃ vītikkamato tassa bhikkhunoti yojanā.

Abyākatavārepīti pisaddo akusalavāraṃ apekkhati. **Tassāti** cittassa. **Ajānantoti**ādīnaṃ padānamattho akusalavāre vuttapaṭipakkhavasena veditabbo. Yaṃ āpattādhikaraṇantiādīnaṃ padānamattho akusalavārena sadisoṃyeva.

224. Ayam vivādo no adhikaraṇantiādīsu evamattho veditabboti sambandho.

9. Adhikaraṇavūpasamanasamathakathā

228. Catuvaggakaraṇe kammeti sīmasammutiādīkamme. **Pañcavaggakaraṇeti** paccantimesu janapadesu upasampadādīkamme. **Dasavaggakaraṇeti** majjhimesu janapadesu upasampadakamme. **Viśativaggakaraṇeti** abbhānakamme. **Kammappattāti** kammassa pattā yuttā anurūpā.

230. Sampaṭicchitabbanti paṭiggaṇhitabbaṃ. Sampaṭicchitvā ca pana atikkāmetabbanti sambandho. **Bhaṇḍakanti** cīvarādibhaṇḍakaṃ. **Mānaniggahatthāyāti** bhaṇḍanaṃjātānaṃ mānassa niggahatthāya. **Katipāhanti** katipayāhaṃ, dvīhatīhanti attho.

231. Anantāni ceva bhassānīti ettha anantasaddo aparimāṇasaddena atthato ekoti āha “aparimāṇāni”ti. “Vacanāni”ti iminā **bhassasaddo** vacanapariyāyoti dasseti. **Ubbāhikāya sammanitabboti** kena sammanitabboti āha “apaloketvā vā”tiādi. Iminā apalokanakammena vā ṇattidutiyakammena vā sammanitabboti dasseti. Anantāni bhassāni dhammakathikaṃ uddharitvā bhāti paṭisedheti imāya sammutiyāti **ubbāhikā**, tāya. Evaṃ sammatehi pana bhikkhūhi vinicchitabbanti sambandho. Viśuṃ nisīditvā tassāyeva parisāya nisīditvā vāti yojanā. **Aññehīti** sammatabhikkhūhi aññehi.

233. Tatrassāti ettha tatra assāti padavibhāgaṃ katvā tasaddo parisavisayo pasiddhavisayo, assasaddo ākhyātikoti āha “tassaṃ parisati bhaveyyā”ti. “Neva suttaṃ āgata”nti sāmāññato vuttepi “no suttavibhaṅgo”ti vakkhamānattā mātikaṃ sandhāya vuttanti āha “na mātikā āgata”ti. **Vinayopīti** khandhakavinayopi. Pisaddena suttavibhaṅgaṃ apekkhati. **Byañjanacchāyāyāti** ettha **chāyāsaddo** paṭibimbe ca pabhāya ca hotīti āha “byañjanamattamevā”ti, byañjanapaṭibimbikabyañjanapabhāvantabhūtaṃ atthaṃ aggahetvā byañjanapaṭibimbabyañjanapabhāmattameva gahetvāti adhippāyo. “Paṭisedheti”ti iminā **paṭibāhasaddo** paṭisedhatthoyeva, na maddanatthoti dasseti. Paṭibāhanākāraṃ dassento āha “jātarūparajatakhattavattupāṭiggahaṇādīsū”tiādi. **Kinti** kena kāraṇena, kasmā kāraṇā vā. **Imeti** jātarūpādipaṭiggāhake bhikkhū. **Kārethāti** tumhe kāreyyātha. Eyyāthassa hi ethādeso. Pucchāyaṃ sattamīvibhatti hoti. **Sutteti** suttantapaṭītake. Aparo dhammakathiko vadatīti sambandho. **Imesanti**

olambetvā nivāsentānaṃ. **Etthāti** olambetvā nivāsane.

234. Bahutarā bhikkhūti ettha dviguṇatiguṇādinā adhikā eva bahutarā nāmāti āha “ekenapi adhikā bahutarāvā”ti. “Ko pana vādo”tiādinā “ekenapi”ti ettha pisaddassa garahattham dasseti.

Tividhasalākaggāhakathā

235. Saññattiyāti ettha saññāpanaṃ saññatti, tadatthāyāti dassento āha “saññāpanatthāyā”ti. Gūhitabboti **gūlho**, soyeva **gūlhako**, salākaggāho kātābboti sambandho. Vivaritabboti **vivaṭo**, soyeva **vivaṭako**. Sassa attano kaṇṇasamāpe jappiyāti kathiyatīti **sakaṇṇajappo**, soyeva **sakaṇṇajappako**. “Nimittasaññaṃ āropetvā”ti iminā **vaṇṇāvāṇṇāyo katvāti** ettha vaṇṇasaddo saṅghānavācako dasseti. Susaṅghānadusaṅghānā salākāyo katvāti attho. **Tatoti** visabhāgakaraṇato paraṃ gahetabboti sambandho. Sabbāpi tā salākāyoti yojanā. **Katvāti** pakkhipanaṃ katvā. **Vuttanayenāti** “alajjussannāyā”tiādinā vuttanayena. “Yāvatiya”nti iminā **paccukkaḍḍhitabbanti** ettha punappunaṃ uddham kaḍḍhitabbanti attham dasseti. **Atirekajātetī** adhammavādīhi atirekato jāte satīti sambandho. **Yāvatiyampīti** pisaddo tato ūne ekadvevāre pana kā nāma kathāti dasseti.

Sakaṇṇajappake pana evaṃ vinicchayo veditabboti yojanā. Sace saṅghatthero gaṇhātīti sambandho. **Soti** saṅghatthero. **Vayoanuppattāti** pacchimavayaṃ anuppattā. **Etanti** adhammavādisalākaṃ. **Assāti** saṅghattherassa. **Itarā salākāti** adhammavādisalākāhi aññā dhammavādisalākā. **Soti** saṅghatthero. **Tanti** dhammavādisalākaṃ. **Tatoti** neva avabujjhanakāraṇā. **Vuttanayamevāti** gūlhake vuttanayameva. **Vivaṭo** attho imassāti **vivaṭattho**.

Tassapāpiyasikāvinayakathā

238. Pārājikasāmantam nāmāti pārājikassa āsannaṃ nāma. **Adinnādānādisūti** ādisaddena manussaviggaha uttarimanussadhammapārājike saṅgaṇhāti. **Nibbeṭṭhayamānanti** veṭhanarahitaṃ, tamenam bhikkhūti sambandho. Iminā **nibbeṭṭhanti** ettha antasaddo mānasaddapariyāyoti dasseti. **Ativeṭṭhetīti** ettha kehi ativeṭṭhetīti āha “iṅghāyasmātiādivacanehi”ti. **Tenāti** codakena. **Manti** mamaṃ. **Āhāti** cuditako āha. **Etassāti** avajānanapaṭijānanādikārakassa pāpiyassa puggalassa. **Sīlavā bhavissatīti** pāpiyo puggalo sace sīlavā bhavissati. **Paṭippassaddhanti** pāpiyabhāvato paṭippassambhanaṃ. **No ceti** sīlavā no bhavissati ce. **Tathā nāsitoti** tena tassa pāpiyasikakammakaraṇena nāsaṃ gato bhavissati. **Sabbatthāti** sabbasmim samathakkhandhake.

Iti samathakkhandhakavaṇṇanāya yojanā samattā.

5. Khuddakavatthukkhandhakam

Khuddakavatthukathā

243. Khuddakavatthukkhandhake **muṭṭhikamallāti** muṭṭhikena mathanti aññamaññaṃ himsantīti muṭṭhikamallā. Iminā pāliyaṃ padassa heṭṭhupariyaṃ dasseti. **Gāmamudavāti** ettha chavirāgamaṇḍanānuyuttēna mudo modanaṃ etesamatthīti **mudavā**, gāme vasantā mudavā **gāmamudavāti** dassento āha “chavirāgamaṇḍanānuyuttā nāgarikamanussā”ti. “Vaṇṇavā ahesu”ntiādīsu (pārā. 193; pāci. 67) viya vacanaṃ daṭṭhabbaṃ. **Thambheti** ettha na yattha katthaci thambho hoti, atha kho nhānatitthe nikhaṇitvā ṭhapitathambhoyevāti āha “nhānatitthe nikhaṇitvā ṭhapitatthambhe”ti.

Iṭṭhakāsīlādārukuṭṭānanti iṭṭhakākuṭṭāsīlākuṭṭadārukuṭṭānaṃ. **Aṭṭhapadākārenāti** aṭṭhapadaphalakākārena. **Rājīyoti** lekhāyo. **Tatthāti** aṭṭhāne, ākiritvāti sambandho.

Gandhabbahatthakoti gandhabbānaṃ vīṇāhattho viyāti gandhabbahatthako. Dārūhi katattā vuttam “dārumayahatthenā”ti. **Tenāti** gandhabbahatthena, gahetvāti sambandho.

Kuruvindakapāsānacunṇānīti evaṃnāmakassa pāsāṇassa cunṇāni. **Tanti** katagūlikakalāpakam, gahetvāti sambandho. **Viggayhāti** aññamaññassa sarīre daḷham gahetvāti dassento āha “aññamaññaṃ sarīrena sarīra”nti. **Makaradantaketi** makaranāmakassa macchassa dantasadise dante.

Mallakamūlasaṅṭhānenāti kheḷapaṭṭiggaḥapādasaṅṭhānena. **Gilānassāpīti** pisaddo agilānassa pagevāti dasseti.

244. Danteti makaradante. Akataṃ mallakam **akata mallakam**. **Kapālakhaṇḍam** vāti vāsaddo samuccayattho. Kāsaphullavirahitattā vatthavaṭṭi **ukkāsikā** nāma. Natthi kāsam phullametissāti **ukkāsā**, sā eva **ukkāsikā**. **Yassa kassacīti** gilānāgilānassa vā jarādubbalataruṇabalavassa vā. **Piṭṭhinti** piṭṭhiyaṃ, ayameva vā pāṭho. Pāṇitalassa puthuṭṭhānaṃ **puthupāṇi**, tena kataṃ **puthupāṇikam**, hatthaparikkammaṃ, tena vuttam “hatthaparikkammaṃ vuccatī”ti. **Sabbesanti** nhāyantānaṃ vā anhāyantānaṃ vā sabbesaṃ.

245. Kaṇṇatoti kaṇṇacchiddato. Muttolambakādivallisadisattā **vallikā** nāma. **Palambakasuttanti** parimuñcivā lambiyati anenāti palambakam, tameva suttaṃ palambakasuttaṃ. **Valayanti** niyuraṃ.

246. Dvīhi māsehi niyuttaṃ **dumāsikam**. **Dve** aṅgulāni etassāti **duvaṅgulaṃ**, keso. **Ubhayenapīti** dumāsikaduvaṅgulasāṅkhātena ubhayenapī. Ayampi ukkaṭṭhaparicchedova vuttoti yojanā. **Tatoti** dumāsikaduvaṅgulato.

Osāṅṭhentīti ettha olikhitvā samaṃ patiṭṭhāpentīti dassento āha “olikhitvā sannisīdāpentī”ti. **Dantamayādīsūti** ādisaddena aṭṭhimayādayo saṅgaṅhāti. **Hatthaphaṇenāti** hatthasaṅkhātena phaṇena. **Cikkhallenāti** cikkhallasadisena niyyāsena. **Udakatelenāti** ettha udakañca telañcāti ca udakasaṅkhātena telenāti ca atthaṃ nivattento āha “udakamissakena telenā”ti. Iminā udakena missakam telam **udakatelanti** vacanattaṃ dasseti. **Uṭṭhalometi** uṭṭhitalome. **Hatthaṃ temetvāti** hatthaṃ udakatelena temetvā. **Uṇhābhitattarajokiṇṇasirānampīti** uṇhena abhitatto ca rajehi okiṇṇasiro ca uṇhābhitattarajokiṇṇasirā, atha vā uṇhena abhitatto siro etesanti uṇhābhitattasirā, rajehi okiṇṇo siro etesanti rajokiṇṇasirā, uṇhābhitattasirā ca rajokiṇṇasirā ca uṇhābhitattarajokiṇṇasirā, pubbapade uttarapadalopo, tesampi. **Allahatthenāti** addahatthena, ayameva vā pāṭho.

247. Yesu kaṃsapattādīsū mukhanimittam paññāyati, sabbāni tāni kaṃsapattādīnipīti yojanā. **Yattha katthacīti** yasmiṃ kasmimci ādāse vā udakapatte vāti sambandho. **Sañchavi nu khoti** sañjātā chavi nu kho, aham jīṇo amhi nu kho, noti yojanā.

Mukham ālimpantīti ettha kehi ālimpantīti āha “vipasannachavirāgakarehi mukhalepanehi”ti. “Manosilāyā”ti iminā manosilā eva **manosilikāti** dasseti. **Tānīti** lañchanāni. **Haritālādīhipīti** pisaddena na kevalam manosilikāya eva, atha kho haritālādīhipīti dasseti.

248. Na bhikkhave naccam vātiādīsū evaṃ vinicchayo veditabboti yojanā. **Niccāpentassa vāti** parehi naccāpentassa vā. **Sādhugītanti** sundaram aniccatādipaṭisaṃyuttaṃ gītam, sajjanānaṃ vā. Dantagītampi na vaṭṭatīti sambandho. **Yanti gītam**. **Pubbabhāgeti** gāyanato pubbabhāge. **Gāyāpentassāpīti** parehi vā gāyāpentassāpi. **Yaṃ panāti** kiriyaḥparāmasanaṃ. Yaṃ paharati, **tattha** paharaṇe anāpattīti yojanā. **Sabbanti** akhilaṃ naccagītavāditaṃ. **Passatoti** passantassa ca suṇantassa ca. Savanampi hi ekasesena vā sāmāññaniddesena vā passaneneva saṅgahitaṃ. **Vihāratoti** anaccaagītaavāditaṭṭhānavihārato. **Vihāranti** naccagītavāditaṭṭhānavihāram. **Asanasālāyāti** gāme ṭhitāya asanasālāya.

249. Sarakiriyanti sarassa kiriyaṃ. Iminā **sarakuttinti** ettha sarassa karaṇam sarakuttīti vacanattaṃ dasseti. Aladdham samādhinti sambandho. **Pacchimā janatāti** ettha samūhiṃ avayavaṃ

vinā samūhassa avayavino abhāvā tāpaccayo svatthopi hotīti āha “pacchimo jano”ti. **Taṃ taṃ vattanti** suttantavattādīṃ taṃ taṃ vattaṃ. **Akkharāni vināsetvāti** aññathā vattabbāni akkharāni aññathā vadanena ca dīghādīni rassādivadanena ca vināsetvā. **Dhamme panāti** ettha saddo **pana** visesajotako. Gītato visesova veditabboti hi attho. **Suttantavattanti** suttantassa uccāraṇaṃ vattaṃ. Eseva nayo “jātakavattaṃ gāthāvatta”nti etthāpi. **Tanti** vattaṃ. Yadi pana taṃ vināsetvā atidīghaṃ kātuṃ na vaṭṭati, evaṃ sati yathā suttantavattādīni honti, tathā kathaṃ dassetabbānīti āha “caturassena vattenā”tiādi. Tattha **caturassena vattenāti** paripuṇṇena uccāraṇavattena. **Parimaṇḍalānīti** samantato maṇḍalāni bimbāni puṇṇānīti attho. “Sarena bhaṇita”nti iminā **sarabhaññanti** ettha sarena bhaṇitabbanti sarabhaññanti vacanattaṃ dasseti. Sarabhaññe kira atthīti sambandho. **Taraṅgavattādīnaṃ** uccāraṇavidhānāni (vajira. ṭī. cūlavagga 249; sāratta. ṭī. cūlavagga 3.249; vi. vi. ṭī. cūlavagga 2.248-9) etarahi natthi. **Dvattiṃsavattānīti** ca saṅkhyāmatameva atthi, na saṅkhyeyyaṃ. Tasmā ṭīkāsu (sāratta. ṭī. cūlavagga 3.249; vajira. ṭī. cūlavagga. 249) “taraṅgavattādīnaṃ uccāraṇavidhānāni naṭṭhapayogānī”ti vuttaṃ. **Atthīti** saṃvijjanti. Ayañhi atthisaddo nipāto. **Tesūti** dvattiṃsavattesu. **Yanti** vattaṃ. Uccāraṇavidhānāni naṭṭhapayogānīpi tesam sabbesaṃ sāmāññalakkhaṇaṃ dassento āha “sabbesa”ntiādi. Tattha **sabbesanti** dvattiṃsavattānaṃ, lakkhaṇanti sambandho. “Avināsetvā”ti vatvā tamevatthaṃ pākaṭaṃ karonto āha “vikāraṃ akatvā”ti. Tattha **vikārakaraṇaṃ** nāma yattakāhi mattāhi akkharaṃ paripuṇṇaṃ hoti, tato adhikamattāyuttaṃ katvā kathaṇaṃ, tathā akatvā samaṇasārūppena caturassena nayena pavattanaṃyeva lakkhaṇanti attho.

Bāhiralomiṃ uṇṇinti ettha “bāhiralomi”nti padaṃ bhāvanapūmsakanti āha “uṇṇalomāni bahi katvā”ti. “Uṇṇapāvāra”nti iminā **uṇṇīti** ettha uttarapadalopaṃ dasseti. Atha vā pāvārapadena uṇṇā etassa atthīti **uṇṇīti** katvā taddhitapaccayassa sarūpaṃ dasseti. “Tathā dhārentassa dukkaṭa”nti vacanassa atthāpattinayaṃ dassento āha “lomāni anto katvā pārūpitaṃ vaṭṭati”ti.

251. Aṅgajātaṃ chindantassevāti aṅgajātameva chindantassāti yojanā. Atha vā aṅgajātaṃ chindantassa thullaccayamevāti yojanā. Ahikīṭadaṭṭhādīsu nimittabhūtesu chindantassāti yojanā.

252. Uppannā hotīti paṭilābhavasena uppannā hoti. Uppannabhāvaṃ pākaṭaṃ karonto āha “so”tiādi. Tattha **soti** rājagahako seṭṭhi, kīlātīti sambandho. **Tassāti** seṭṭhissa. Idaṃ padaṃ “jāle”ti pade sāmīyattachattāhī, “uppannā hoti”ti pade sampadānaṃ. **Tanti** candanagaṇṭhiṃ. **Assāti** seṭṭhissa. Idaṃ padaṃ “purisā”ti pade sāmīyattachattāhī, “adamsū”ti pade sampadānaṃ. **Vikubbaniddhīti** vividhaṃ, vikāraṃ vā kubbanavasena pavattā iddhi (paṭi. ma. 3.12-16; visuddhi. 2.369-373). **Adhiṭṭhāniddhīti** adhiṭṭhānavasena pavattā iddhi (paṭi. ma. 3.12-16; visuddhi. 2.369-373).

Gihī upanāmentīti sambandho. **Byañjanaṃ katvāti** byañjanaṃ pakkhipanaṃ katvā. **Tanti** suvaṇṇataṭṭikādīṃ. **Āmasitumpīti** pisaddo pageva paṭiggaṇhitunti dasseti. **Saṅghikaparibhogena vāti vāsaddo** panasaddattho. Saṅghikaparibhogena panāti hi attho. **Gihivikaṭāni vāti vāsaddo** sampiṇḍanattho. Gihivikaṭāni bhājanānīpi vaṭṭantīti hi attho. Kaṃsalohavaṭṭalohānaṃ sabhāgattā vuttaṃ “kaṃsa...pe... saṅgahito”ti.

253. “Likhitu”nti etaṃ vuttanti yojanā. **Pakatimaṇḍalanti** ettha kiṃ makaradantamattampi acchinnamaṇḍalanti āha “makaradantacchinnakamaṇḍalamevā”ti.

254. Paharivāti āvaṭṭanato aññamaññaṃ paharivā. Tayo patte uparupari ṭhapetaṃ vaṭṭatīti sambandho. **Bhūmiādhārako** nāma bhūmiyā āsanno dantādīhi kato valayādhārako. **Dāruādhārako** nāma ekadārunā kato ādhārako. **Daṇḍādhārako** nāma catudaṇḍato paṭṭhāya bahūhi daṇḍehi kato ādhārako. **Tatthāti** bhamakoṭisadisadāru ādhāratidaṇḍakādhāresu. **Gahetvā evāti** pattaṃ gahetvā eva, ekameva ṭhapetabbaṃ iti vuttanti yojanā.

Tatthevāti miḍḍhanteyeva. **Vitthiṇṇāyāti** vitthārāya. **Bāhirapasseti** kuṭṭassa bāhirapasse. **Katāyāti** kuṭṭassa thirabhāvattaṃ katāya. **Etthāti** paribhaṇḍante.

Yaṃ vatthaṃ pattharivā patto ṭhapiyatīti vatthaṃ **coḷakaṃ** nāmāti yojanā. **Tasmiṃ panāti** coḷake pana. **Yatthāti** yassaṃ vālikāyaṃ. **Na dussatīti** patto na dussati. **Pattamāḷakanti** pattassa ṭhapanatthāya kataṃ aṭṭaṃ. **Bhaṇḍakukkhālikāti** pattādibhaṇḍakānaṃ pakkhipanā ukkhālikā. **Yattha katthacīti** bhittikhilādike yasmim kasmimci. **Laggentassāti** pattam thavikāya laggentassa. Nisīdanasayanatthaṃ vā kataṃ hotūti yojanā. **Aññenāti** pattato aññena. **Aṭṭakachannenāti** aṭṭapatirūpena, aṭṭakasadenāti attho. **Tatthāti** aṭṭakachannena ṭhapite mañcapīthe. Aṃse baddhiyati anenāti **aṃsabaddho**, soyeva **aṃsabaddhako**, tena laggetvāti sambandho. Chatte ṭhapatuṃ na vaṭṭatīti sambandho. Bhattena pūro **bhattapūro**, patto. Bandhitvā ṭhapite chatte vā aṭṭakaṃ katvā ṭhapite chatte vāti yojanā. Yo koci bhattapūropi tucchapattopīti sambandho.

255. Yassāti bhikkhuno. Hatthe patto atthi, so eva bhikkhu **pattahattho** na hoti, apica kho pana hatthe vā piṭṭhipāde vā yattha katthaci sarīrāvayave pattasmiṃ satīti yojanā. Eseva nayo anantaravākyepi. Imehi vākyehi “pattahattho”ti ca “kavāṭaṃ paṇāmetu”nti ca upalakkhaṇamattamevāti dasseti. Sūciṃ vā avāpuritunti sambandho. **Kuñcikāya vāti vāsaddo** “sarīrāvayavenā”ti padaṃ apekkhati.

Lābukaṭāhanti lambatīti **lābu**, lābuyā kaṭāhaṃ lābukaṭāhaṃ. “Tāvakālika”nti iminā ekavārameva tena āmisam gahetvā paribhuñjitvā chaḍḍetabbanti dasseti. **Ghaṭikapālanti** bhājanakapālaṃ. **Abhuṃ meti** avaḍḍhi mayhaṃ, uppajjitthāti attho. “Abhu me”ti (ma. ni. aṭṭha. 2.149; ma. ni. ṭī. 2.149) vattabbe niggahitāgamavasena evaṃ vuttaṃ. **Utrāsavacananti** utrāsena vacanakāraṇaṃ padaṃ. **Dinnakamevāti** parehi dinnakameva āmisanti sambandho.

Cambetvāti mukhena cambetvā. **Apaviddhāmisānīti** chaḍḍitāni āmisāni. **Etesūti** calakādīsū. **Anucchiṭṭhaṃ suddhapattanti** natthi ucchiṭṭho etthāti **anucchiṭṭho**, suddhapatto, taṃ. **Ucchiṭṭhahatthenāti** ucchiṭṭho ettha atthīti ucchiṭṭho, soyeva hattho ucchiṭṭhahattho, tena. Vāmahatthena āsiñcitvāti sambandho. **Etthāti** suddhapatte. **Ettāvatāpīti** ettakena ekaudakageṇḍusagahaṇamattenāpi. **Soti** suddhapatto. **Hatthaṃ panāti** ucchiṭṭhahatthampi. Panasaddo hettha sampiṇḍanattho. Yaṃ aṭṭhiṃ vā yaṃ calakaṃ vāti yojanā. **Tatthāti** macchamaṃsaphalādīsū. **Tanti** aṭṭhicalakaṃ. **Yaṃ panāti** aṭṭhicalakādhiṃ pana, paṭikhādītukāmoti sambandho, puna khādītukāmoti attho. **Tatthevāti** patte eva. **Katvāti** ṭhapanam katvā. Yaṃ kiñci aṭṭhikaṇṭakādinti sambandho.

256. Satthakaveṭhanakanti satthakassa veṭhanakaraṇaṃ. Pippalikam vā daṇḍasatthakam nāmāti yojanā. Pippāleti etāyāti **pippali**, sāyeva **pippalikam**. **Aññampīti** pippalikato aññampi. Yaṃkiñci daṇḍam yojetvā katasatthakam vā daṇḍasatthakam nāmāti yojanā. Iminā daṇḍena yojitam satthakam **daṇḍasatthakanti** vacanatthaṃ dasseti.

Malaggahitāti ayamalaggahitā. **Kiṇṇenāti** madirādibījena kiṇṇena. **Tenāti** pāsānacunṇasaṅkhātena saritakena. **Makkhetunti** sūciṃ makkhetuṃ. Makkhitamadhusitthakam taṃ saritakam paribhijjatīti yojanā. **Madhusitthakapilotikanti** madhusitthakena makkhitam pilotikam. **Tatthāti** nissenīyam. Yāya rajjuyā kathine bandhanti, sā rajju **kathinarajju** nāmāti yojanā. **Tatthāti** dīghassa bhikkhuno pamāṇena kate kathine. **Daṇḍaketi** kathinadaṇḍakamhi. **Tassāti** dīghassa bhikkhuno pamāṇena katassa kathinassa. **Itarassa bhikkhunoti** dīghabhikkhuto itarassa rassabhikkhuno.

Daṇḍakathinapamāṇena katassa kaṭasārakassāti yojanā. “Dugūṇakaraṇa”nti iminā **pidalakanti** dugūṇakaraṇasaṅkhātassa kiriyāvisesassa nāmanti dasseti. **Vinandhanarajjunti** visesena nahiyati bandhiyati etāyāti vinandhanā, sāyeva rajju vinandhanarajju, tamevatthaṃ dassetuṃ vuttaṃ “vinandhituṃ rajju”nti. **Vinandhanasuttakanti** etthāpi eseva nayo. **Tena suttakenāti** vinandhanasuttakena. **Tatthāti** khuddakanissenīyam kāci suttantarikāyoti sambandho. **Pamāṇasaññākaraṇanti** suttantarikapamāṇassa saññākaraṇaṃ. Kāḷasuttana saññākaraṇaṃ viya haliddisuttana saññākaraṇanti yojanā. **Aṅguliyaṃ paṭiggaṇhantīti** ettha “paṭiggaṇhantī”ti padassa

“aṅgulyā”ti karaṇasseva vuttatā kammaṣa avuttatā tassa kammaṃ dassetuṃ vuttam
“sūcimukha”nti. **Aṅgulikosakanti** aṅgulikañcukam.

257. Pāticaṅkoṭakādinti ettha **pāti** nāma paṭiggahasañṭhānena kato sūciādibhaṅḍaṭṭhapano bhājanaviseso. **Ākiritvāti** pakkhipitvā. **Odhunitvāti** papphoṭetvā. **Ghanadaṅḍakanti** nirantaradaṅḍakam. **Antokatvāti** kathinassa antokatvā.

258. Vinandhitvāti coḷakena vinandhitvā.

259. Aparissāvanakasseva bhikkhunoti yojanā. Yo pana yācatīti sambandho. **Majjhedaṅḍaketi** daṅḍakassa majjhe. **Udakanti** akappiyaudakam. **Tanti** udakam. **Yanti** parissāvanam. Udakam parissuddham hutvā savati gacchati pavattati anenāti **parissāvanam**. Yam udake ottharivā ghaṭena udakam gaṇhanti, tam **ottharakam** nāmāti yojanā. Tamevattham vitthārento āha “tam hī”tiādi. **Tanti** parissāvanam, bandhitvāti sambandho. **Tesūti** catūsu khāṇukesu. **Sabbapariyanteti** sabbapariissāvanassa pariyanthe mocetvāti sambandho. **Ottharivāti** ogāhetvā. **Cīvarakuṭikāti** cīvarena katā kuṭikā, sā makasānam parittāṇattham katattā **makasakuṭikāti** vuccati.

260. Semhādidosussannakāyāti semhādidosēhi ussannakāyā. **Aggaḷatthambhoti** kavāṭatthambho. **Yatthāti** aggaḷatthambhe. **Tatthāti** dvārabāhāya. **Tatthāti** aggaḷapāsake. **Dhūmo nikkhamati etenāti dhūmanetto**, chiddo. Tena vuttam “dhūmanikkhamanachidda”nti. “Gandhehī”ti iminā “vāsetu”nti padassa karaṇam dasseti. “Udakaṭṭhapanatṭhāna”nti iminā **udakaṭṭhānanti** ettha udakassa ṭhapanam ṭhānam udakaṭṭhānanti majjhepadalopasamāsam dasseti. **Tatthāti** udakaṭṭhāne. **Koṭṭhakoti** ettha na yattha katthaci, yassa kassaci vā koṭṭhako hoti, api ca kho pana dvāre eva, dvārasseva vā koṭṭhakoti āha “dvāraḷakotṭhako”ti.

261. Parikammanti piṭṭhiādiparikammam. Paṭicchādiyati imāyāti **paṭicchādi**, vatthameva paṭicchādi **vatthapaṭicchādi**. **Udakam na hotīti** ettha pānodakam nivattento āha “nhānodakam na hotī”ti.

262. Paṇṇikānam tulam viya udakaubbāhanakatulanti yojanā. **Dīghavarattādīhīti** ādisaddena rajju ādayo saṅgaṇhāti. **Arahatthaghaṭiyantam** nāma cakkasaṅṭhānam anekāram are are ghaṭāni bandhitvā ekena vā dvīhi vā paribbhāmiyamānam yantam. Arasaṅkhātesu hatthesu ghaṭā bandhitabbā etthāti **arahatthaghaṭi**, tameva yantam arahatthaghaṭiyantam. **Cammabhājananti** cammamayam bhājanam. **Aparikkhittā hotīti** candanikā apākārā hoti. Udakapuñjanam vaṭṭatīti sambandho. **Tasminti** udakapuñjane. “Udakapuñjanī”tipi pāṭho. Evaṃ sati tāya udakapuñjaniyāti attho. **Paccuddharitunti** apānetum.

263. Ā samantato viddham pakkhapāsakam etthāti **āviddhapakkhapāsakam**. **Maṅḍaleti** kaṇṇikamaṅḍalamhi. Katam kūṭaṅca chadanaṅca etthāti **katakūṭacchadanam**, jantāgharam, tassa. **Etanti** “nillekhajantāghara”nti etam nāmam. “Cattāro māse”ti iminā “**catumāsa**”nti digusamāsassa vākyam dasseti.

264. Namatakanti ettha heṭṭhā vuttanamatakato (cūḷava. aṭṭha. 256) visesam dassento āha “eḷakalomehī”tiādi. **Avāyimanti** vāyitvā na katam. **Cammakhaṅḍaparīhārenāti** cammakhaṅḍam viya adhiṭṭhānavikappanaapanayanena, paribhuñjitabbanti attho. **Peḷāyāti** aṭṭhamāsiādikārena katāya mañjūsāya. **Etanti** “āsittakūpadhāna”nti etam nāmam. **Dārumayāpīti** pisaddo na tambaloharajatamayā evāti dasseti. **Etthevāti** maḷorikāyameva. **Ādhārakasāṅkhepagamanatoti** ādhārake saṅkhepam gamanato. **Hīti** saccam, yasmā vā. Pubbe pattarakkhanattham ādhārako anuññāto, idāni bhuñjanatthanti daṭṭhabbam. Eko bhikkhu gacchati sambandho. **Sesakanti** gahetabbaphalapūvehi sesakam. **Tasmim khaṇeti** tasmim bhuñjanakkhaṇe.

265. Ekekenapi aṅgenāti pisaddo sambhāvanattho, tato pana adhikehi aṅgehi pagevāti hi attho. Samannāgatassa upāsakassa nikkujjitunti sambandho. **Tassāti** upāsakassa. **Na gahetabboti** saṅghena na gahetabbo. Asukassa upāsakassāti sambandho. **Ukkujjanakāleti** pattassa ukkujjanakāle. **Yācāpetvāti** pattanikujjitena upāsakena yācāpetvā. **Hatthapāsanti** saṅghassa hatthapāsaṃ.

268. Purakkhatvāti ettha purasaddassa aggatthabhāvaṅca karasaddassa khādesabhāvaṅca dassento āha “aggato katvā”ti. **Soti** bodhirājakumāro, santharīti sambandho. **Lacchāmīti** labhissāmi, esa bodhirājakumāro puttalābhāya abhabboti yojanā. Akkamane dosaṃ dassento āha “yadī”tiādi. **Pacchāti** akkamanato pacchā. **Ayanti** bhagavā. **Idanti** kāraṇaṃ. **Tāvāti** sikkhāpadapaññattito, sikkhāpadapaññattiyā vā paṭhamamaṃ. **Paribhavatoti** gihīnaṃ paribhavato.

Maṅgalatthāyāti arogādikassa maṅgalassa atthāya. **Dhotapādakanti** ettha dhotehi pādehi akkamanatthāne attharitaṃ dhotapādakanti vacanatthamaṃ dassento āha “dhotapādakaṃ nāmā”tiādi. Tattha “paccattharaṇaṃ atthata”nti iminā “dhotapādaka”nti ettha ṇikapaccayassa attharitatthe pavattabhāvaṃ dasseti.

269. Padumakaṇṇikākāranti padumakaṇṇikasatthānaṃ. Kataṃ pādaghamaṃsanamaṃ **katakaṃ** nāmāti yojanā. **Tanti** katakaṃ, paṭikkhattamevāti sambandho. Potthakesu taṃsaddo galitoti daṭṭhabbo. **Bāhullikānuyogattāti** paccayabahulabhāvāya anuyogattā. **Pāsānaphenakopīti** pāsānaabbudampi. **Bījanīti** caturassabījanī. **Tanti** vidhūpanamaṃ, kataṃ hotūti sambandho. Idhāpi taṃsaddo galito. Veḷudantavilīvehi vā morapiñchehi vā cammavikatīhi vā kataṃ hotūti yojanā. Sabbaṃ vidhūpananti sambandho. Pāliyaṃ **tālavaṇṭanti** saha vaṇṭena kataṃ tālaṃ tālavaṇṭamaṃ, tālasaddena taṃmayā maṅḍalabījanī gahetabbā vikārīvikārabhāvena sambandhattā. **Makasabījanīti** makasānaṃ palāyanakabījanī, dantamayavisāṇamayadaṇḍakāpi makasabījanī vaṭṭatīti yojanā. “Vākamayabījanīyā”ti padaṃ “saṅgahitā”ti pade ādhāro, karaṇaṃ vā.

270. Yassāti bhikkhussa cakkhuṃ vā dubbalaṃ hotūti yojanā. **Aññoti** kāyaḍāhādīhi ābādhehi añño, koci ābādho vā uppajjatīti yojanā. “Vasse paṇā”ti padaṃ “cīvaraguttattha”nti pade eva sambandhitabbaṃ. **Cīvaraguttatthanti** cīvarassa vassatemanato guttatthamaṃ, vālamigacorabhayesu santesūti sambandho. Tālapaṇṇādinā ekena paṇṇena kataṃ chattaṃ **ekapaṇṇacchattaṃ**. **Sabbatthevāti** sabbesu eva gāmāraññesu.

“Asi assā”ti iminā **asissāti** padassa anavakāsavidhiṃ dasseti. **Asīti** khaggo. **Assāti** corassa, asīti sambandho. **Vijjotalatīti** ettha alapaccayo rūpasiddhimattovāti āha “vijjotati”ti. “Catuhatthoyevā”ti iminā pamāṇayuttoti padassa atthamaṃ dasseti. **Tatoti** catuhatthato. **Sabbesanti** gilānāgilānānaṃ. “Sakkā paṇā”ti padaṃ “na vaṭṭatī”ti pade kattā, “dātābbā”ti pade kammaṃ. Sammānitvāva dātābbā, na vinā sammutiyāti adhippāyo.

273. Āgatanti udariyato nikkhamitvā āgataṃ. **Uggāranti** galato uggāraṃ bhojananti sambandho. **Sandhāretvāti** patiṭṭhāpetvā. Asandhāritameva hutvāti sambandho.

Yanti khādanīyabhojanīyaṃ, patitanti sambandho. **Tanti** khādanīyabhojanīyaṃ, gahetvā paribhuñjitunti sambandho. **Idanti** vacanaṃ.

274. Kubbaṃ karissāmīti ettha kariyati uccāriyatīti kubbanti vutte saddoti āha “saddaṃ karissāmī”ti. **Saddanti** “ayaṃ maṃ bhikkhu vipparotī”ti uccāsaddaṃ. **Nakhādīhīti** iādīsaddena mukhakuṭṭe saṅgaṇhāti. **Anurakkhanatthanti** anudayena pālanatthamaṃ. **Nakhacchedananti** nakhaṃ chindati anenāti nakhacchedanaṃ, satthakādi. Vīsatiatthanti ettha vīsatiyā nakhānaṃ maṭṭhaṃ vīsatiatthanti dassento āha “vīsatiṃ nakhe”tiādi. **Likhitamattṭheti** likhite hutvā maṭṭhe. **Kārāpentīti** nahāpīte kārāpentī. **Nakhatoti** nakhato vā nakhantarato vā. **Apakaḍḍhitunti** kaḍḍhitvā apanetumaṃ.

275. Khurakosakanti khurassa ṭhapanakaṃ. **Kattariyāti** kantiyati chindiyati imāyāti kattari, ayomayo eko upakaraṇaviseso, tāya. “Chedāpentī” ti iminā **kappāpentīti** ettha kappasaddassa vidhyatthaṃ adhippāyena dasseti. **Massuṃ vadḍhāpentīti** ettha massuṃ vadḍhetvā ruhāpentīti atthaṃ paṭikkhipanto āha “massuṃ dīghaṃ kārapentī” ti. **Ēlakamassūti** ēlakassa viya massūti ēlakamassu. “Golomika” nti vuccatīti sambandho. “Catukoṇa” nti iminā **caturassanti** ettha aṃsasaddo koṇatthoti dasseti. Caturassanti ettha hi “caturamsa” nti vattabbe niggahitassa lopam katvā parassa sakārassa dvebhāvaṃ katvā “caturassa” nti vuttaṃ. **Lomasamharaṇanti** lomānaṃ apanayanam. **Lomarājīṭṭhapananti** lomalekhāṭṭhapanam. **Sabbatthāti** sabbesu, massukappanādīsūti sambandho. **Gaṇḍavaṇarudhiābādhapaccayāti** gaṇḍo ca vaṇo ca rudhi ca gaṇḍavaṇarudhaya, teyeva ābādhā gaṇḍavaṇarudhiābādhā, tesam paccayā. **Vaṇoti** mahanto vaṇo. **Rudhīti** khuddako vaṇo. **Sakkharādīhīti** sakkharamadhusitthakehi. **Sanḍāsoti** suṭṭhu lomam ḍamsatīti sanḍāso. **Yanti** lomam, ṭhitanti sambandho. Kattha ṭhitanti āha “bhamukāya vā” tiādi. Kiṃ hutvā ṭhitanti āha – “uggantvā vibhacchaṃ ṭhita” nti, vibhacchaṃ hutvā ṭhitanti yojanā. Visesena sobhaṇam bhakkhatīti **vibhaccho**, asobhaṇo. “Vigaccha” ntipi pāṭho, virūpaṃ gacchati, gamayatīti vā **vigaccho**. Tattha purimapāṭhoyeva mūlapāṭhoti daṭṭhabboti. Palitaṃ vā apalitaṃ vā tādisam lomanti yojanā.

277. Kamsapattharikāti ettha kamsāpaṇe pattharanti pasārentīti kamsapattharikāti vutte kamsabhaṇḍavāṇijā gahetabbāti āha “kamsabhaṇḍavāṇijā” ti. Vāsidaṇḍādīnaṃ apātanatthaṃ bandhati anena lohenāti **bandhanam**, tameva mattam appanti bandhanamattaṃ.

278. Nikkhamantenāti āramato nikkhamantena. **Yatthāti** yasmiṃ ṭhāne. “Saritvā” ti iminā asarivā piṇḍāya caritabbanti dasseti. **Bahurajjukanti** bahū rajjuyo etassāti bahurajjukam. Iminā kalāpena bahurajjūnaṃ samūhena kattabbanti **kalāpukanti** vacanatthaṃ dasseti, ikārassukāro. **Deḍḍubhakanti** ettha deḍḍubhasaddena tassa sīsam gahetabbaṃ ekadesūpacārena, deḍḍubham viyāti deḍḍubhakam, sadisatthe kapaccayo hoti. Tena vuttaṃ “udakasappasāsasādisa” nti. “Murajavaṭṭisaṅṭhāna” nti iminā murajasaddena murajavaṭṭi gahetabbā tassa vikāratā, tena sadisaṃ **murajanti** vacanatthaṃ dasseti. **Veṭhetvāti** bahurajjuke ekato veṭhetvā. **Maddavīṇasaddo** pāmaṅgapariyāyo. Maddavīṇam viyāti **maddavīṇam**. Tena vuttaṃ “pāmaṅgasanṭhāna” nti. “Pageva bahūni” ti iminā “ekampī” ti ettha pisaddassa sambhāvanatthaṃ dasseti. **Macchakaṇṭakavāyimāti** macchakaṇṭakam viya dassetvā vāyimā. **Kuñjaracchikādibhedāti** vāraṇaacchikādibhedā. Vāraṇo hi kuṃ bhūmiṃ jarāpetīti **kuñjaroti** (vi. va. aṭṭha. 31; a. ni. ṭī. 1.1.2) ca kuñje nikuñje ramatīti **kuñjaroti** ca vuccati. Tassa acchi viyāti **kuñjaracchikam**, tam ādi yesam tānīti kuñjaracchikādīni, tesam bhedāti **kuñjaracchikādibhedā**. Ādisaddena goṇacchikādayo saṅgaṇhāti. “Kuñcikākosakasaṅṭhāna” nti iminā sūkarassa antam viya **sūkarantakanti** atthaṃ dasseti. Sūkarassa hi antam kuñcikākosakam viya majjhe susiro hoti. **Sūkarantakam anulometīti** sūkarantakena anulometi. **Dasāsuyevāti** kāyabandhanassa antesuyeva. **Etthāti** dasāsu. “Catunnam upari na vaṭṭatī” ti iminā murajadasā tato upari vaṭṭatīti dasseti. **Veṭhetvāti** rajjuṃ vatthena veṭhetvā. **Muddikasaṅṭhānenāti** varakasāsasaṅṭhānena. **Evam sibbitāti** evam sibbiyamānā. **Hīti** phalajotako. **Pāsantoti** pāsakoti.

280. Olambakam katvā nivatthaṃ **hatthisoṇḍakam** nāmāti yojanā. **Colikaitthīnanti** colāraṭṭhe nivāsīnaṃ itthīnaṃ. Hatthiyā soṇḍo viya hatthisoṇḍakam nivatthaṃ. Macchavālam viyāti **macchavālakam**. Cattāro kaṇṇā etassa nivatthassāti **catukaṇṇakam**. Tālavaṇṭam viyāti **tālavaṇṭakam**. Sataṃ valino etassa nivatthassāti **satavalikam**. “Anekakkhattu” nti iminā “satavalika” nti ettha satasaddassa anekatthavācakatam dasseti. “Vāmadakkhiṇapassesu vā” ti iminā purimanivatthaṃ kaṭṭho paṭṭhāya heṭṭhā nivatthaṃ nāmāti dasseti.

Saṃvallitvā nivatthaṃ **saṃvalliyaṃ**. Mallo ca kammakāro ca **mallakammakārā**, te ādayo yesam teti mallakammakārādayo. Ādisaddena dhuttādayo saṅgaṇhāti. Yampi nivatthaṃ nivāsenti, sabbaṃ tam nivatthaṃ na vaṭṭatīti yojanā. Ekam vā koṇanti sambandho. **Koṇeti** antaravāsakassa koṇe. “Tathā” ti iminā “ekam vā dve vā koṇe ukkhipitvā antaravāsakassa upari laggenti” ti atthaṃ atidisati. Antokāsāvassa dassetvāti sambandho. Dve nivāsentena agilānenāti yojanā. **Saguṇanti** antokāsāvena

bahikāsāvaṃ samānaguṇaṃ katvā. **Itti**ādi nigamaṇaṃ. **Yañcā**ti yaṃ nivatthaṇca. **Idhā**ti khuddakavatthukkhandhake. Yañca sekhiyavaṇṇanāyaṃ (pāci. aṭṭha. 576 ādayo) paṭikkhittanti sambandho. Sabbamaṃ taṃ nivatthanti yojanā. Nibbikāraṃ katvāti sambandho. **Ubho kaṇṇeti** heṭṭhā ṭhite ubho kaṇṇe upari ca ṭhite ubho kaṇṇe. **Tanti** parimaṇḍalapārupanaṃ.

Tatthāti “gihipāruta”nti vacane yaṃkiñci aññathāpārutaṃ atthīti sambandho. **Tasmā**ti yasmā gihipārutaṃ nāma, tasmā, parimaṇḍalaṃ pārupitabbanti sambandho. “Yathā pārupanti, yathā ca ṭhapentī”tiādinaṃ yojanā kātabbā. **Tassevā**ti dīghasāṭakasseva. **Tassevā**ti sāṭakasseva. **Pālikā**rakoti pāliṃ gaṇhantaṃ vā vācentaṃ vā kārako. **Tathā**ti yathā pārupanti, tathā.

281. Kuhiñci ṭhānaṃ gacchato raññoti yojanā. “Parikkhārabhaṇḍavahanamanussā”ti iminā te manussā muṇḍaṃ sīsaṃ coḷakena veṭhentīti **muṇḍaveṭhino** nāmāti dasseti. **Adhippā**yoti ujjhāyantānaṃ manussānamadhippāyo. **Antarākā**janti ettha antarāsaddo majjhathavācakoti āha “majjhe”ti. “Laggetvā”tiādinaṃ kājassa antare laggetvā vahitabbaṃ antarākājanti vacanatthaṃ dasseti.

282. “Cakkhūnaṃ hita”nti iminā **acakkhussanti** ettha ssapaccayo cakkhusaddato hitatthe hotīti dasseti. **Pamāṇaṅ**gulenāti vaḍḍhakīnaṃ pamāṇayuttana aṅgulena.

283. “Tiṇavanādīsū”ti iminā **dāyaṃ ā**limpentīti ettha dāyasaddo vanavācakoti dasseti. “Aggiṃ dentī”ti iminā āpubbo lipidhātu upasaggavasena aggidānatthoti dasseti. **Parittanti** ettha samantato tāyati anenāti parittanti dassento āha “appaharitakaraṇena vā parikhākhaṇena vā parittāṇa”nti. **Etthā**ti parittakaraṇe. **Dātuṃ labbhatī**ti sayamaṃ dātuṃ labbhati. **Haritunti** apanetuṃ. Pattamaṃ vā apattamaṃ vā agginti sambandho. **Tathā**ti aggidānādinaṃ ākārena. Udakena nibbāpentena bhikkhunāti sambandho.

284. **Sati karaṇī**yeti ettha karaṇīyasaddo kiccariyāyoti āha “sukkhakaṭṭhādiggahaṇakicce”ti. “Sukkhakaṭṭhādiggahaṇa”iti padena kiccasarūpaṃ dasseti. “Purisappamaṇa”nti iminā **porisiyanti** ettha ṇiyapaccayo pamāṇatthe hotīti dasseti. Purisappamaṇaṃ nāma upari bāhudvayatatassa purisassa pamāṇaṃ. Disvā vā hutvā vā disvāti yojanā. **Atiuccampī**ti pisaddo sambhāvanattho. Nīcaṃ pana rukkhamaṃ pagevāti hi attho.

285. **Kalyāṇavā**kkaraṇāti ettha kariyati uccāriyatīti **karaṇo**, saddo, vācāyeva karaṇo **vā**kkaraṇo, kalyāṇo vākkaraṇo etesanti kalyāṇavākkaraṇāti dassento āha “madhurasaddā”ti. **Vedaṃ viyā**ti sutimaṃ viya. **Vācanā**magganti vācanāya upāyaṃ. **Sakā**ti sammāsambuddhasaṅkhātassa sassa attano esā sakā. Tena vuttaṃ “sammāsambuddhena”ti. Sammāsambuddhena hi māgadhaniruttīyā eva dhammo bhāsito, tasmā sā māgadhanirutti sakā nāmāti vuccati. **Nirutti**ti atthaṃ nīharitvā vuccate imāya saddapaññattiyāti nirutti, vacadhātussa vakārassa ukāro, sabbavohāro labbhati. Idha pana “sakāyā”ti vuttattā māgadhavohāro eva. Tena vuttaṃ “māgadhavohāro”ti. “Sabhāvanirutti”tipi pāṭho. Evañhi sati sabbasattānaṃ sabhāvena pavattā mūlabhāsābhūtā māgadhaniruttīyeva.

286. Lokāyataṃ nāma titthiyasatthanti sambandho. **Iminā**va **kāraṇenāti** “seto kāko, kasmā? Aṭṭhīnaṃ setattā. Ratto bako, kasmā? Lohitassa rattattā”iti (ma. ni. aṭṭha. 2.223; saṃ. ni. aṭṭha. 3.5.1080; a. ni. 10.69-70) iminā eva kāraṇena.

288. **Antarā aho**sīti ettha antarāsaddo byavadhānatthoti āha “antaritā ahoṣi paṭicchannā”ti. Tena saddena dhammakathā byavadhānā ahoṣīti attho.

289. **Ābādhappaccayā**ti ettha ābādhassa bhesajjasāṅkhāto paccayo ābādhappaccayoti dassento āha “yassā”tiādi. Iminā ābādhoyeva paccayo ābādhappaccayoti atthaṃ paṭikkhipati.

293. Dukkaṭavattu nāma akappiyavohārādinaṃ mālāvaccharopanādi, pācittiyavattu nāma

mālāvaccharopanādiatthāya pathavīkhaṇanādi. **Paharaṇīti** paharati imāyāti paharaṇī. **Etanti** “paharaṇī”ti etaṃ nāmaṃ. Yassa kassaci āvudhasaṅkhātassa lohabhaṇḍassāti sambandho. **Tanti** āvudhasaṅkhātaṃ lohabhaṇḍaṃ. **Vuttamevāti** “katakaṃ nāma padumakaṇṇikākāra”ntiādīnā (cūḷava. aṭṭha. 269) vuttameva. **Dhaniyassevāti** dhaniyassa eva. Aññesañhi katāya sabbamattikāmayakuṭiyā apākaṭattā vuttaṃ “dhaniyassevā”ti. Atha vā dhaniyassa sabbamattikāmayakuṭi ivāti yojanā. **Sabbatthāti** sabbasmiṃ khuddakavatthukkhandhake.

Iti khuddakavatthukkhandhakavaṇṇanāya yojanā samattā.

6. Senāsanakkhandhakaṃ

Vihārānujānanakathā

294. Senāsanakkhandhake **apaññattaṃ hotīti** ettha na ñapadhātu hoti, apica ñādhātuyeva, so ca kho anujānanatthoti āha “ananuññātaṃ hotī”ti. Iminā ñādhātussa avabodhanādayo atthe nivatteti, anujānanatthameva dasseti. Aḍḍhayogādīnaṃ viṣuṃ gahitattā vihārasaddena pārisesato avasesāvāsova gahetabboti āha “aḍḍhayogādīmuttako avasesāvāso”ti. **Suvaṇṇavaṅkagehanti** suvaṇṇavaṅkachadanena chāditaṃ gehaṃ. **Iṭṭhakāguhāti** iṭṭhakāya katā guhā. Eseva nayo sesesupi. **Āgatassa ca anāgatassa cāti** ettha casaddena dvandavākyam dasseti. Āgacchatīti **āgato**, na āgato **anāgato**, saṅgho. Āgato ca anāgato ca **āgatānāgato**, samāhāradvando puṃliṅgo, tassa. “Appaṭihatacārassā”ti iminā catūsu disāsu appaṭihatacāro **cātuddisoti** vacanattham dasseti.

295. Anumodanagāthāsu evaṃ vinicchayo veditabboti yojanā. **Utuvisabhāgavāsenāti** sītaunhānaṃ utūnaṃ visabhāgavāsenā. **Samphusitakavātoti** saha udakabindunā āgato vāto. Ettha hi saṃsaddo sahattho, phusitasaddo udakabinduvācako. **Ujukameghavutṭhiyo evāti** vātena apaharittā ujukaṃ patitā meghavutṭhiyo eva. Pāḷiyam **tatoti** ettha topaccayo paccattatthe vattati. So vihāroti hi attho. **Vālamigāni cāti** vālamige ca. Liṅgavipallāso hesa. **Etāni sabbānīti** “sīta”ntiādīni sabbāni satta padāni. **Yojetabbānīti** so vihāro sītaṃ paṭihanati...pe... vutṭhiyo paṭihanatīti yojetabbānīti attho.

“Vihārenā”ti iminā pāḷiyam **tatoti** ettha topaccayo kattutthe hotīti dasseti, tena vihārenāti attho. **Paṭihaññatīti** paṭihanīyati. **Sukhatthanti** ettha uttarapadalopoti āha “sukhavihārattha”nti. “Leṇatthañca sukhatthañcā”ti padadvayaṃ “hotī”ti pāṭhasesena yojetabbaṃ. Vihāradānaṃ leṇatthañca sukhatthañca hotīti hi attho. **Idanti** ayaṃ adhippāyo. **Vuttanti** vutto. Vihāradānaṃ sukhatthañca hotīti yojanā. Jhāyituṃ vipassituṃ yaṃ sukhaṃ atthīti sambandho. **Tadatthanti** tassa sukhasa atthāya. **Parapadenapīti** “jhāyituṃ vipassitu”nti padadvayato paraṃ ṭhitena “vihāradāna”nti padenapi. **Idhāti** imasmiṃ vihāre. **Vihāradānanti** vihārasa dānaṃ, dātabbavihāraṃ vā, vaṇṇitanti sambandho. **Vuttanti** saṃyuttanikāye vuttaṃ. Sādhakapāḷiyam yo upassayam dadāti, so ca **sabbadado** sabbesaṃ balādīnaṃ dado hotīti yojanā. **So cāti** ettha casaddo avadhāraṇattho. So evāti hi attho.

“Vihāre”ti iminā **vāsayetthāti** ettha etasaddassa visayam dasseti. **Vāsayeti** vāseyya. **Tesaṃ annaṅcāti** ettha “tesa”nti padaṃ “anucchaviya”nti pāṭhasesena yojetabbanti dassento āha “tesam anucchaviya”nti. Tattha anucchaviyam annaṅca anucchaviyāni vatthāni cāti yojanā. Atha vā **tesanti** bhummattthe sampadānavacananti dassento āha “tesū”ti, bhikkhūsūti attho. **Ujubhūtesūti** ettha sampadānatthe bhummavacanaṃ katvā ujubhūtānaṃ tesaṃ bhikkhūnaṃ dadeyyāti atthopi yujjateva. “Akuṭīlacittesū”ti iminā “ujubhūtesū”ti ettha ujusaddassa akuṭīlatthañca bhūtasaddena bāhiratthasamāsaṅga dasseti. Ujubhūtaṃ cittametesanti **ujubhūtāti** vacanattho kātabbo. **Nidaheyyāti** nikhānitvā ṭhapeyya. “Na cittapasādaṃ virādhavā”ti iminā **vippasannena cetāsāti** ettha evatthaphalaṃ vā aññatthāpohanaṃ vā dasseti. **Hīti** phalajotako. Evaṃ vippasannacittassa tassa vihāradāyakkassa te bhikkhū dhammaṃ desentīti yojanā.

296. **Āviñchanachiddanti** aṅgulim āva pavesetvā añchati ākaḍḍhati ettha, etenāti vā **āviñchanam**.

Avapubbo achidhātu, upasaggaakārassa dīghaṃ katvā, dhātuakārassa ca ikāraṃ katvā “āviñchana”nti vuttaṃ, tameva chiddaṃ āviñchanachiddaṃ. **Āviñchanarajjūnti** kavāṭacchidde ava pavesetvā añchati ākaḍḍhati imāyāti **āviñchanā**, sāyeva rajjūti āviñchanarajju. Kāci rajju na na vaṭṭatīti yojanā. Atha vā na vaṭṭati na hoti, vaṭṭatiyevāti yojanā. **Tṭi tālānīti** ettha tālasaddo kuñcikāpariyāyoti āha “tisso kuñcikāyo”ti. Iminā tālasaddassa rukkhātūriyavisesse nivatteti. **Yaṃ yanti** upakaraṇaṃ. **Tassāti** yantakassa. **Vedikāvātapānanti** vātaṃ pivati anenāti **vātapānaṃ**, vedikāya kataṃ vātapānaṃ vedikāvātapānaṃ. **Cakkalikanti** ettha cakkākārena alati pavattatīti **cakkalaṃ**, coḷakapādapuñjanaṃ. Tena bandhitabbanti **cakkalikanti** dassento āha “coḷakapādapuñjanaṃ bandhitu”nti. “Vātapānappamaṇena bhisiṃ katvā”ti iminā vātapānapamaṇena katā bhisi **vātapānabhisiṃ** vacanattaṃ dasseti.

297. “Uccakampi āsandika”nti vacanato vaṭṭatīti veditabboti sambandho. Ekato bhāgena dīghapīṭhaṃ aṭṭhaṅgulapādakameva vaṭṭatīti yojanā. Tato adhikaṃ na vaṭṭatīti adhippāyo. **Pamāṇātikkantopīti** pisaddo pamāṇayutto pana pagevāti dasseti. **Sattaṅgoti** tīsu disāsu apassayo, cattāro pādāti satta āṅgāni etassāti sattaṅgo. **Ayampīti** pisaddo āsandikaṃ apekkhati. Eḷakapādapīṭhaṃ nāma vuccatīti sambandho. Eḷakassa pādo viya pādo etthāti **eḷakapādaṃ**, tameva pīṭhaṃ **eḷakapādapīṭhaṃ**. **Āmalakavaṇṇikapīṭhanti** āmalakāya vaṇṇo saṅṭhāno āmalakavaṇṇo, tena yojitaṃ āmalakavaṇṇikaṃ, tadeva pīṭhaṃ āmalakavaṇṇikapīṭhaṃ. “Ākārenā”ti iminā vaṇṇasaddassa saṅṭhānatthaṃ dasseti. **Imānīti** pīṭhāni. **Etthāti** pīṭhe. **Muñcapabbajamayanti** muñjena ca pabbajena ca kataṃ.

Manussānanti vaḍḍhakīmanussānaṃ. **Chavisamrakkhanatthāyāti** chaviyā vināsanato suṭṭhu rakkhanatthāya. **Simbalirukkhādīnanti**ādisaddena tūlanibbattake sabbarukkhe saṅgaṇhāti. **Khīravallīādīnanti**ādisaddena tūlanibbattakā sabbā latāyo saṅgaṇhāti. **Poṭakītiṇādīnanti**ādisaddena tūlanibbattakā sabbā tiṇajātiyo saṅgaṇhāti. **Tīhīti** rukkhalatāpoṭakīhi. Nanu bhūtagāmānaṃ anekattā etehi tīhi mutto bhūtagāmo atthi, kasmā pana sabbabhūtagāmā saṅgahitā hontīti āha “rukkhavallītiṇajātiyo hī”tiādi. Tattha hi yasmā natthi, tasmā saṅgahitā hontīti yojanā. **Tasmāti** yasmā natthi, tasmā. Sabbampi etaṃ tūlanti yojanā. Bibbohane lomampi vaṭṭatīti sambandho. **Lomampīti** pisaddena tūlaṃ apekkhati. **Yaṃkiñci pupphanti** sabbaṃ pupphaṃ. Pattaṃ pāpuṇitvā suddhaṃ tamālapattameva na vaṭṭati, avasesaṃ sabbaṃ pattaṃ suddhampi vaṭṭatīti adhippāyo. **Pañcavidhanti** uṇṇacoḷavākatīṇapaṇṇavasena pañcapakāraṃ.

“Upaḍḍhakāyapamaṇānī”ti iminā **addhakāyikānīti** ettha addhassa kāyassa pamāṇena katāni **addhakāyikānīti** atthaṃ dasseti. Yesu bibbohanesu kaṭṭito paṭṭhāya yāva sīsaṃ upadahanti, tāni bibbohanāni addhakāyikāni nāmāti yojanā. **Yassāti** bibbohanassa. Vitthārato muṭṭhiratanaṃ hotīti sambandho. Iminā yattha saha gīvāya sakalaṃ sīsaṃ ṭhapetuṃ sakkā, tassa muṭṭhiratanaṃ vitthārapamaṇānti dasseti. “Tīsu kaṇṇesu dvinnaṃ kaṇṇāna”nti idaṃ bibbohanassa ubhosu antesu ṭhapetabbacoḷapamaṇaṃ sandhāya vuttaṃ. Idaṃ pana bibbohanassa ubhosu antesu ṭhapitacoḷassa koṭiyā koṭiṃ āhacca dviguṇaṃ kataṃ tikaṇṇaṃ hoti, tesu tīsu kaṇṇesu dvinnaṃ kaṇṇānamantaraṃ vidatthi caturaṅgulaṃ hoti, majjhaṭṭhānaṃ koṭito koṭimāhacca muṭṭhiratanaṃ hoti, idaṃ pana bibbohanaṃ tikaṇṇaṃ hoti. Vaṭṭaṃ vā caturassādiṃ vā katvā sibbitaṃ yathā koṭito koṭi vitthārato puthulaṭṭhānaṃ muṭṭhiratanaṃ hoti, evaṃ sibbitabbaṃ. Ito adhikaṃ na vaṭṭati, ūnaṃ pana vaṭṭatiyeva. **Sīsūpadhānanti** sīsaṃ upadahanti ṭhapenti etthāti sīsūpadhānaṃ. **Bibbohanānīti** visesena, visesaṃ vā sukhaṃ vahantīti bibbohanāni. **Uparīti** bibbohanānaṃ upari. Yāni pana kappiyatūlāni santīti yojanā. **Mahantampīti** pisaddo khuddakaṃ pana pagevāti dasseti. Vinayadharaupatisatthero pana āhāti sambandho. “Vinayadhara” iti padena phussadevattherato visesaṃ dasseti. **Akappiyatūlaṃ vāti** bhisiyaṃ akappiyatūlaṃ vā. Bibbohane hi akappiyatūlaṃ nāma natthi.

Pañcabhisiyoti ettha vākyabhāvaṅca asamāhāradigubhāvaṅca paṭikkhipanto āha “pañcahi uṇṇādīhi pūrītā bhisiyo”ti. Iminā pañcahi uṇṇādīhi pūrītā bhisiyo pañcabhisiyoti vacanattaṃ dasseti. Atthato pana vākyampi asamāhāradigupi yujjateva. Kasmā pañcagaṇanā hotīti āha “tūlagaṇanāya

hī’ tiādi. **Hi** yasmā tūlagaṇanāya eṭasaṃ gaṇanā vuttā, tasmā pañcabhisiyo hontīti yojanā. **Tatthāti** uṇṇādīsu pañcasu. Uṇṇaggahaṇena gahitanti sambandho. **Kambalamevāti** uṇṇāmayam kambalameva. Uṇṇāya, uṇṇam vā pakkipitvā katā bhisi **uṇṇābhisi**. Eseva nayo **colābhisiādīsu**.

Pamāṇaniyamoti ettakā pamāṇāti pamāṇassa niyamo. Mañce attharittabbā bhisi **mañcabhisi**. **Eṭāsanti** mañcabhisiādīnaṃ. Yam etam tūlanti yojanā. **Sūrakepīti** cammamayabhisiyampi. **Etenāti** kurundiyaṃ vuttavacanena siddham hotīti sambandho.

Mañcabhisinti mañce attharittabbaṃ bhisim. “Attharaṇatthāya saṃharantīti yujjati” ti iminā “attharantī” ti ettha kāriyūpacārena attho gahetabboti dasseti. Attharaṇāya hi saṃharaṇam kāraṇam nāma, attharaṇam kāriyam nāma. **Uparīti** bhisichaviyā upari. **Phusitānīti** bindūni. **Bhittikammanti** bhittiyam nānāvāṇṇehi rājikaraṇam viya kattabbaṃ kammaṃ.

298. “Ikkāsa” nti nāmaṃ niyyāsasilesānaṃ nāmanti āha “rukkhaniyyāsaṃ vā silesam vā” ti. “Kuṇḍakamissakamattika” nti iminā kuṇḍakena missakā mattikā **kuṇḍakamattikāti** vacanattam dasseti. **Sāsapapīṭṭhanti** sāsapacuṇṇam. “Bindu bindu hutvā” ti iminā **accussannaṃ hotīti** ettha kāraṇūpacāraṃ dasseti. Accussannañhi kāraṇam hoti, “bindu bindu hutvā” ti ṭhānaṃ kāriyam hoti. “Puñjitu” nti sodhetum. **Gaṇḍuppādagūthamattikanti** mahilatāya gūthamayaṃ mattikaṃ. Iminā **laṇḍamattikanti** ettha laṇḍasaddo gūthapariyāyoti dasseti.

299. Na bhikkhave paṭibhānacittanti ettha “itthirūpakaṃ purisarūpaka” nti pāliyaṃ vuttattā kiṃ itthipurisarūpameva na vaṭṭatīti āha “na kevala” ntiādi. Tiracchānarūpampi kātuṃ vā “karohī” ti vattuṃ vā na vaṭṭatīti sambandho. **Dvārapālanti** dvārapālarūpaṃ. **Pasādanīyānīti** pasādetabbāni, pasādetum arahānīti attho.

300. Ekaṅgaṇāti avihāraṭṭhānena samānabhūmibhāgā. **Muṇḍacchedanagabbhoti** muṇḍena chādetabbo gabbho.

Tatthāti vijjhitabarukkhe. “Kata” nti iminā **kulaṅkapādakanti** ettha ṇikapaccayassa attham dasseti. Tam āharimaṃ bhittipādam paṭiṭṭhāpetunti sambandho. **Vassaparittāṇatthanti** vassodakaparittāṇattham. “Madditamattika” nti iminā **uddasudhanti** ettha sudhāsaddassa lepanasudham dasseti, bhojanasudham nivatteti.

Pamukhanti vihārassa pamukham. **Yanti** padesaṃ, hanantīti sambandho. Tassa katapadesassāti yojanā. **“Paghāna” ntipi vuccatīti** dīghavasena “paghāna” ntipi vuccati. Iminā purimapāṭhe rassabhāvaṃ dīpeti. **“Pakuṭṭa” ntipi pāṭhoti** saṃyogavasena “pakuṭṭa” ntipi pāṭho. Iminā purimapāṭhe nisaṃyogabhāvaṃ dasseti. **Vaṃsanti** veḷum. **Tatoti** vaṃsato. “Osāretvā kata” nti iminā osāretvā kataṃ **osārakanti** vacanattam dasseti. “Chadanapamukha” nti iminā ṇikapaccayassa sarūpaṃ dasseti. **Cakkalayuttoti** cakkalena yutto.

301. Pānīyadānabhājananti pānīyaṃ deti anenāti pānīyadānaṃ, tameva bhājanaṃ pānīyadānabhājanaṃ. “Uḷuṅko ca thālakañcā” ti iminā dve pānīyasaṅkhassa anulomānīti yojanā.

303. Dvārathakanakanti dvāraṃ thaketi anenāti dvārathakanakaṃ. Gāmadvāresu dvārathakanakaṃ viya cakkalayuttaṃ dvārathakanakanti yojanā.

305. Assatarirathāti assānaṃ visesena, atisayena vāti **assataro**, atha vā pakatiasse tarati atikkamatīti assataro, so etesu rathesu yujjitabboti assatarī, teyeva rathāti assatarirathāti dassento āha “assatarayuttā rathā assatarirathā” ti. Tattha “assatarayuttā” ti iminā **“assatarī”** ti padassa assatthitaddhitam dasseti. **Āmuttamaṇikuṇḍalāti** padassa “sataṃ kaññā sahasānī” ti padena

sambandhitabbattā vuttam “āmuttamaṇikuṇḍalānī”ti. Iminā nikārassa ākāro hotīti dasseti. Kaṇṇesu āmuttam maṇikuṇḍalam etāsanti **āmuttamaṇikuṇḍalā** kaññāyo.

Khandhapariniḅbānena pariniḅbutoti attham paṭikkhipanto āha “kilesapariniḅbānena pariniḅbuto”ti. **Sītibhūto**ti ettha kilesātapānam abhāveneva sītibhūto, na aññesanti āha “kilesātapābhāvenā”ti. “Kilesūpadhiabhāvenā”ti iminā **nirupadhīti** ettha khandhūpadhiabhisankhārūpadhiabhāvenāti attham paṭikkhipati.

Āsattiyoti ettha punappunam visayesu, bhavesu vā sañjantīti āsattiyoti dassento āha “rūpādīsū”tiādi. **Patthanāyoti** taṇhāyo. Iminā āsattīnam sarūpaṃ dasseti. “Chinditvā”ti iminā **chetvāti** ettha chedhātuyā chedanattham dasseti. **Vineyyahadaye daranti** ettha “vineyyā”ti padassa tvāpaccayantabhāvaṇca hadayasaddassa cittavācakahāvaṇca darathasarūpaṇca dassento āha “citte kilesadaratham vinetvā”ti. Tattha “citte”ti iminā hadayasaddasattham dasseti, “kilesa”ti padena darathasarūpaṃ, “vinetvā”ti iminā tvāpaccayantabhāvaṃ dasseti. **Vayakaraṇanti** paribbayamūlam. Tañhi vayam kariyati anenāti vayakaraṇanti vuccati. Iminā vayassa karaṇam vayāyikaṃ, karaṇatthe āyikapaccayo, vayāyikameva **veyyāyikanti** attham dasseti.

307. Ādeyyavācoti ettha ādiyitabbāti **ādeyyā**, sā vācā etassāti ādeyyavācoti dassento āha “tassa vacana”ntiādi. Tattha **tassāti** anāthapiṇḍikassa. **Sadhanāti** saṃvijjamāna dhanā, attano vā dhanavanto. **Mandadhanāti** appadhanā. **Adāsīti** anāthapiṇḍiko adāsī. **Itīti** evam, datvā katvāti sambandho. **Soti** anāthapiṇḍiko, agamāsīti sambandho.

Kahāpaṇe santharīti sambandho. Koṭiyā karaṇabhūtāya, ādhārabhūtāya vā. **Paṭipātetvāti** paṭihanāpetvā. Tattha tasmim ṭhāne ye rukkhā vā yā pokkharāṇiyo vā tiṭṭhantīti yojanā. **Tesanti** tāsam rukkhapokkharāṇīnam. Sāmaññañhi apekkhitvā pulliṅgavasena vuttam. **Parikkhepapamāṇanti** pariṇāhassa pamāṇam. **Assāti** anāthapiṇḍikassa.

Evam bahudhanam cajantassāpi gahapatinoti yojanā. **Koṭṭhakam māpesīti** ettha aññe koṭṭhake paṭikkhipanto āha “dvārakoṭṭhakapāsāda”nti.

Vihārādayoti ettha ādisaddena pāliyam āgate pariveṇādayo cuddasa upakaraṇe saṅgaṇhāti. Amhākam bhagavato viharākārāpanapasāṅgena sattannampi buddhānam viharākārāpanam dassento āha “vipassissā”tiādi. Tattha vipassissa bhagavato viharāṃ (dī. ni. aṭṭha. 2.12) kārāpesīti sambandho. Tigāvutappamāṇam bhūmim suvaṇṇayaṭṭhisantharena kiṇitvā viharāṃ kārāpesīti yojanā. Eseva nayo paratopi. Aṭṭhakarīsappamāṇā bhūmi usabhena dasausabhappamāṇā yaṭṭhiyā dvisatayaṭṭhippamāṇā hotīti daṭṭhabbam. “Evam anupubbena parihāyantī”ti vatvā sabbajanam saṃvejento āha “sampattiyo hī”tiādi. Tattha yasmā sampattiyo parihāyanti, tasmā alameva sabbasampattīsu virajjitum, alam eva sabbasampattīhi vimuccitunti yojanā. “Sabbasampattīsū”ti padañhi “vimuccitu”nti padena vibhattipariṇāmam katvā sambandhitabbam.

308. Khaṇḍaphullasaddānam adhikaraṇabhāvaṃ dassento āha “khaṇḍanti chinno kāso. Phullanti phalitokāso”ti. Tattha “chinno kāso”ti iminā khaṇḍati chijjati etthāti **khaṇḍanti** vacanattham dasseti. “Phalitokāso”ti iminā phullati phalati etthāti **phullanti** vacanattham dasseti. **Paṭisaṅkharissatīti** ettha pāṭisaddassa pākātikatthabhāvaṃ, saṅkharissatisaddassa ca karadhātuyā nipphannabhāvaṃ dassetuṃ vuttam “pākātikam kariyatī”ti.

310. Theroti sārīputtatthero, āgacchatīti sambandho. **Idanti** gilānapaṭijagganādi. **Assāti** therassa. **Aggāsananti**ādīsū aggasaddo paṭhamatthopi uttamatthopi yujjati. Tena vuttam “therāsana”ntiādi. **Antarā satthīnanti** ettha **antarāti** bhummatthe nissakkavacanam. Satthisaddo ca ūrusāṅkhāto pādavācakoti āha “catunnam pādānam antare”ti.

315. Patiṭṭhāpesīti ettha kaṃ vayaṃ katvā patiṭṭhāpesīti āha “atṭhārasakoṭipariccāgaṃ katvā”ti. **Evantiādi nigamanam.**

Āsanappaṭibāhanādikathā

316. Vippakatabhojanenāti ettha vippakatasaddo aniṭṭhitapariyāyoti āha “aniṭṭhite bhojane”ti. Pakiriyittha, pakiriyissate vā **pakatam**, na pakatam **vippakatanti** viggaho kātabbo, atthato pana “kariyamāno aniṭṭhito”ti vuttam hoti. **Etthāti** thāne. **Atisamīpanti** bhuñjamānassa bhikkhussa atiāsannaṃ. **Tassāti** bhuñjamānassa bhikkhussa. **Pivivā vāti** yāguṃ pivivā vā. **Khādīvā vāti** khajjakam khādīvā vā. **Rittahatthampīti** tucchahatthampi. Pisaddena āmisahattham pana pagevāti dasseti. **Hīti** saccaṃ, yasmā vā. **Soti** rittahattho bhikkhu.

Āpattinti dukkaṭāpattim. **Yanti** vippakatabhojanam bhikkhum. **Soti** pacchā āgato bhikkhu. **Ayañca bhikkhūti** vippakatabhojano ayañca bhikkhu. **Tenāti** vippakatabhojanena navakena vā vuḍḍhatarena vā bhikkhunā. Kiṃ navakena vuḍḍhataram āṇāpetum vaṭṭatīti āha “vuḍḍhataram hī”tiādi. **Hīti** saccaṃ, yasmā vā. **Soti** vuḍḍhataro bhikkhu. **Tatoti** udakam āharāpetum ānattito. **Yanti** kammaṃ.

Yoti bhikkhu. “Evarūpassā”ti padena tassa niyamanam veditabbaṃ. Kāsassa kheḷamallakam ṭhapetabbaṃ. Bhagandaraatisārānam vaccakapālam ṭhapetabbaṃ. Aññesaṃ aññāni ṭhapetabbāni honti. Tena vuttam “kheḷa...pe... hontī”ti. **Yasmiṃti** yasmiṃ gilāne. Yopi bhesajjam karotīti sambandho. **Lesakappenāti** ettha lesakappasaddānam atthato ekattā vuttam “appakena sīsābādhādimmattēnā”ti. **Bhikkhū gaṇetvāti** ettha gaṇam ṇatvāti dassento āha “paricchedam ṇatvā”ti. Tattha “pariccheda”nti iminā gaṇasaddassa adhippāyattham dasseti. “ṇatvā”ti iminā idhātuyā attham dasseti.

Senāsanaggāhakathā

318. Seyyāti kāyapasāraṇasaṅkhātāṃ sayanakiriyaṃ paṭikkhipivā senāsanasaṅkhātāṃ seyyam dassento āha “mañcaṭṭhānāni”ti. “Seyyāparicchedenā”ti iminā **seyyagghenāti** ettha agghasaddassa pūjanattham paṭikkhipivā paricchedanattham dīpeti. Ettha ca agghasaddassa catutthakkharena yuttabhāvo heṭṭhā samuccayakkhandhakavaṇṇanā (cūḷava. aṭṭha. 102) yojanāya vuttoyeva. **Kālanti** seyyāpaṭiggahaṇassa kālam. **Gāhiyamānāti** gāhāpiyamānā. “Atirekāni ahesu”nti iminā **ussārayimsūti** ettha uddham sārāyimsu gacchimsu pavattimsūti attham dasseti. **Atirekānīti** ca bhikkhuparicchedato seyyāparicchedāni atirekāni. **Anubhāganti** ettha anu pacchā dātabbo bhāgo anubhāgoti dassento āha “puna aparampi bhāgam dātu”nti. **Atimandesūtiādivacanena** kiñcimandesu bhikkhūsu ekekassa bhikkhuno dve tisso seyyā dātabbā. Yato kiñcimandesu bhikkhūsu dve tayo viharā dātabbāti atthopi gahetabbo. **Tatthāti** “na akāmā dātabbo”ti vacane. Anubhāge gahiteti yojanā. Yena anubhāgo ca paṭhamabhāgo ca gahito, so bhikkhūti yojanā.

“Upacārasīmato bahī”ti iminā **nissīmeti** ettha sīmato bahi nikkhantam, nisinnam vā nissīmanti attham dasseti. Upacārasīmāya āvāsavaḍḍhanavasena ativittārattā vuttam “dūre ṭhitassāpī”ti. **Utukālepīti** hemantagimhakālepi. Tasmīñhi kāle sītaṇhātu tikhīṇo hoti, tasmā tasseva vīsesena utukāloti nāmaṃ pākātam hoti. Tena vuttam “hemantagimhakālepī”ti. Pisaddena vassakālam apekkhati. Purimavassūpanāyikadivase gāho **purimako**, pacchimavassūpanāyikadivase gāho **pacchimako**.

Antarā dvīhi vassūpanāyikadivasehi mutte kāle gāho **antarāmuttako**. **Ekasmiṃ viharēti** ekissam viharasīmāyam. **Senāsanasāmikāti** senāsanadāyakā, dentīti sambandho. **Tanti** senāsanam. Āvāsikā na oloketīti sambandho. **Etthāti** senāsane. **Palujjantampīti** vinassantampi. Bhagavā āhāti sambandho. **Tassāti** senāsanassa. **Aparajjūti** aparasmim ahani aparajju. **Gatāyāti** atikkamītāya. **Pavāraṇāya gatāya** pavāraṇadivase atikkamite sati aparajju antarāmuttako gāhetabboti yojanā.

Tanti antarāmuttakam. **Gāhentenāti** gāhāpentena. **Tenāti** gaṇhantena. **Aṭṭhamāseti** cattāro hemantamāse, cattāro ca gimhamāseti aṭṭhamāse. Kadāci pañca gimhamāseti navamāse vā. **Khaṇḍam vāti** chinnaṭṭhānaṃ vā. **Phullam vāti** phalitaṭṭhānaṃ vā. **Paṭisaṅkharitabbanti** pākātikam kātabbam. **Divasam khetvāti** pariveṇe divasam khetvā. **Tatthāti** gahitasenāsane. **Rattindivanti** ratti ca divo ca rattindivam, samāhāradvando, accantasamyoge cetam upayogavacanam. **Na labbhāti** saṅghattherena na labbhati. **Idanti** senāsanam.

Antarāmuttakagāhena agahetabbasenāsanam dassento āha “yasmim panā”tiādi. **Temāsaccayena temāsaccayenāti** tiṇṇam māsānam atikkamena tiṇṇam māsānam atikkamena. **Hīti** saccam, yasmā vā. **Yasmim panāti** senāsane pana. **Sakidevāti** ekavārameva. **Ayanti** esā kathā.

Tatthāti duvidhesu senāsanaggāhesu. **Utukālanti** utukāle āgacchantīti sambandho. Tesam tadāva dātabbanti sambandho. **Akālo nāmāti** utṭhāpanassa akālo nāma natthi. Ekaṃ vā mañcaṭṭhānaṃ vā ṭhapetabbanti yojanā. Eko vā thero āgacchatīti yojanā. **Ubbhaṇḍikāti** ukkhittabhaṇḍikā.

Bahūsūti tayo ādiṃ katvā bahūsu bhikkhūsu. **Pahotīti** ekekassa bhikkhussa pahoti. **Tatthāti** pariveṇe. **Tassevāti** pariveṇasāmikasaveva. **Evaṃ apahontesūti** evaṃ pariveṇagghena apahontesu. **Pāsādagghenāti** vihārasaṅkhātassa pāsādassa paricchena. **Ovarakagghenāti** gabbhassa paricchena. **Seyyagghenāti** catupañcahatthappamāṇāya seyyāya paricchena. **Mañcaṭṭhānenāti** dvihatthavitthārassa catuhatthāyāmassa mañcassa ṭhānena. Ekamañcaṭṭhānassa dvinnam pīṭhakānaṃ ṭhānattā vuttam “ekapīṭhakaṭṭhānavasena”ti. Idam nisīditum sakkuṇeyyavasena vuttam. Sace na sakkā nisīditum, na dātabbam. Tena vuttam “bhikkhuno pana ṭhitokāsamattam na gāhetabba”nti. **Etanti** ṭhitokāsamattam. **Hīti** saccam, yasmā vā. Ekamañcaṭṭhānassa tiṇṇam janānam ekapīṭhakaṭṭhānabhāvena apahontattā vuttam “ekaṃ mañcaṭṭhānaṃ vā tiṇṇam janānam dātabba”nti. **Hīti** saccam. “Sītasamaye”ti iminā uṇhasamayepi sabbadivasam ajjhokāse vasitum na sakkāti dīpeti. Pariḷāhasamaye pana sakkā sabbarattim ajjhokāse vasitum. Kiñcāpi sakkā, sītuṇhakāle pana na dātabbattā pariḷāhasamayepi na dātabbanti veditabbam. Ekamañcaṭṭhāne vā ekapīṭhakaṭṭhāne vā tiṇṇam janānam nisīdanākāram dassento āha “mahātherenā”tiādi. Tattha mahātherena vattabbanti sambandho. **Niddāgarukoti** niddāya garukārako. **Sītam anudhatīti** sītam maṃ pīleti. **Tenāti** mahātherena. **Dutiyattherenāpīti** pisaddo mahātheram apekkhati. **Vuttanayenevāti** “ukkāsivā”tiādinā vuttanayeneva. **Evantiādi** nigamanam. Jambudīpe pana ekacce bhikkhū gāhentīti sambandho. Kiñciveva mañcaṭṭhānaṃ vā pīṭhaṭṭhānaṃ vāti yojanā. **Ayantiādi** purimavacanassa nigamanavasena pacchimavacanassa kathanatthāya vuttavacanam.

Vassāvāse senāsanaggāho evaṃ veditabboti yojanā. **Āgantukavattanti** āgantukassa vattam. **Aññatthāti** aññasmim ṭhāne. Gantvā vasitukāmena āgantukenāti yojanā. **Vassūpanāyikadivasamevāti** vassam upagamanadivaseyeva. **Tatthāti** aññam ṭhānaṃ. Nagantabbakāraṇam dassento āha “vasanaṭṭhānaṃ vā hī”tiādi. **Hīti** yasmā. **Tatrāti** aññasmim ṭhāne. **Tenāti** sambādhaasampajjanakāraṇā. **Tasmāti** yasmā na phāsum vihareyya, tasmā. **Tam vihāranti** yasmim vasitukāmo, tam vihāram. **Tatthāti** vihāre, vasanto sukham vasissatīti sambandho. **Uddesatthikoti** uddesam atthiko, uddesena vā. **Kammaṭṭhānasappāyatanti** kammaṭṭhānena, kammaṭṭhānassa vā sappāyabhāvaṃ.

Tatthāti aññavihāram. Gacchantena ghaṭṭetabboti sambandho. Ghaṭṭetabbākāram dassento āha “na tatthā”tiādi. Tattha **tatthāti** sakaṭṭhāne. Kim na vattabbāti āha “tumhe”tiādi. Salākabhattādīni vā yāgukhajjakādīni vā natthi na vijjantīti yojanā. Uposathāgārassa parikkhāroti sambandho. Tumhākam vihārassa idam tālañceva imam sūciñca sampaṭicchathāti yojanā. **Gamiyavattanti** gamikānaṃ bhikkhūnaṃ vattam. “Daharehī”ti padaṃ “ukkipāpetvā”ti ca “gāhāpetvā”ti ca padadvaye kāritakammaṃ, “pattacīvarabhaṇḍikāyo”ti padaṃ “ukkipāpetvā”ti pade dhātukammaṃ, “telanālikattaraṇḍādīni”ti padaṃ “gāhāpetvā”ti pade dhātukammameva. **Attānam dassentenāti** attānam manussānaṃ pakāsenta. **Vitakkanti** paccayabāhullikavitakkaṃ. “Saparivāra”nti padaṃ “gacchantañcā”ti pade kiriyāvisesanaṃ. Evañhi sati saparivāram gacchantañcāti sambandho. “Na”nti pade pana kāravisesanaṃ. Evañhi sati saparivāram nam bhikkhūnti sambandho. “Disvā”ti pade ca

kiriyāvisesanameva. Evañhi sati gacchantañca naṃ bhikkhuṃ sapaṇḍarāṃ disvāti sambandho. Manussā vadantīti sambandho. **Tesūti** manussesu. Eko paṇḍitamanussoti sambandho. Ayaṃ kālo vassūpanāyikakālo nāmāti yojanā. **Yatthāti** ṭhāne. **Tassāti** ekassa paṇḍitamanussassa, vacananti sambandho. Te manussā yācantīti sambandho. **Aññatthāti** aññaṃ ṭhānaṃ. Mejjanti aññamaññaṃ sinehantīti **mittā**. Sukhadukkhesu amā saha vattantīti **amaccā**. Mittāyeva amaccāti **mittāmaccā**, te. **Sammantayitvāti** samam, sammā vā mantayitvā. **Idhevāti** gāme eva, vihāre eva vā. Kasmā sādituṃ vaṭṭati, nanu sabbametaṃ akappiyañca sāvajjañcāti āha “sabbāñhetam kappiyañceva anavajjañcā”ti. Hi yasmā etaṃ sabbam kappiyañca anavajjañca, tasmā sabbam sādituṃ vaṭṭatīti yojanā. Kurundiyaṃ pana vuttanti sambandho. **Ubhayampīti** mahāatṭhakathākurundīsu vuttavacanavasena ubhayampi etaṃ vacananti sambandho.

Āvāsikavattaṃ vitthārento āha “paṭikacceva hī”tiādi. Tattha **paṭikaccevatī** āgantukānaṃ āgatato paṭhamameva. **Padhānagharavihāramaggoti** padhānagharamaggo ca vihāramaggo ca. **Muddavedikāyāti** cetiyassa hammiyavedikāya. Kasmā idampi sabbam kātabbanti āha “vassam vasitukāmā hī”tiādi. **Hīti** saccam, yasmā vā. Vassam vasitukāmā sukham vasissantīti sambandho. Kataparikkammehi āvāsikehīti sambandho. Yato kulato pakatiyā labbhati, tasmim kule vassāvāsikam pucchitabbanti yojanā. **Na dinnapubbanti** pubbe na dinnam. **Hīti** yasmā. **Upaddutāti** upagantvā, bhusam vā pīṭitā. **Tatthāti** manussesu. **Yeti** manussā. **Vassāvāsike gāhīti** vassāvāsike senāsane gāhāpiyamāne. **Gāhitabhikkhūnanti** gāhāpitabhikkhūnam. **Vassāvāsikanti** vassam āvasantānam dātābham cīvaram. **Gāhaṇakāloti** gāhāpanakālo. **Upakaṭṭhoti** āsanno. **Chātakādīhīti** ādisaddena rogādayo saṅgaṇhāti. **Yanti** cīvaram. **Tatoti** cīvarato. **Tanti** vacanam. **Tadanurūpenāti** tesam manussānam vacanassānurūpena. **Tesam tesanti** manussānam, vassāvāsikam cīvaranti sambandho.

Yassāti bhikkhuno. **Soti** bhikkhu. Iti vadantīti yojanā. **Tanti** cīvaram. **Paṭikkammāti** paṭikkamitvā. Vihārato apasakkivāti attho. **Tatrāti** gāme. **Upanikkhepaṃ ṭhapetvāti** kappiyavatthum vā akappiyavatthum vā āramikādīnam hatthe upanikkhepaṃ ṭhapetvā. **Vihāreti** vihārassa, vihāre vassam vasantassa vā. **Apucchitvāpīti** pisaddena “pucchitvāpī”ti attham dasseti. **Tesantikulānam**. **Vattanti** jagganādivattam. **Tesanti** kulānam. **Āgatañca tanti** tam paṃsukūlikam āgatañca vadantīti sambandho. **Tenāti** paṃsukūlikena. **Dātuṃ na icchantīti** saṅghassa ācikkhantepi saṅghassa dātuṃ na icchanti. **Sabhāgo bhikkhūti** attanā sabhāgo bhikkhu. **Etanti** vassāvāsikam. Paṃsukūlikassa na vaṭṭati, kasmā? Gahapaticīvarattā. **Itītiādi** nigamanam. **Saddhādeyyeti** saddhāya dātābbe vassāvāsikalābhavisaye.

Tatruppādeti tasmim vihāre uppajjanakalābhavisaye. **Bhaṇḍapaṭicchādananti** paṭicchādanacīvarabhaṇḍam. Cīvarabhaṇḍameva hi yasmā anena sarīram paṭicchādiyati, tasmā bhaṇḍapaṭicchādananti vuccati. **Gāhethāti** bhikkhūhi gāhāpetha. **Gāhetabbanti** bhikkhūhi gāhāpetabham. **Vatthu panāti** sātakato aññaṃ kappiyam vā akappiyam vā vatthu pana. Kasmā vaṭṭatiyeva, nanu akappiyavatthu na vaṭṭatīti āha “kappiyakāraṇāñhi”tiādi. Tattha **hi** yasmā anuññātam, tasmā vaṭṭatiyevāti yojanā. Dinnavatthuto uppananti sambandho.

Yanti vatthu dinnanti sambandho. **Etthāti** kappiyakāraṇānam hatthe dinnavatthūsu. **Tanti** vatthu upanāmentehīti sambandho. Garubhaṇḍam hoti, garubhaṇḍattā aññesu paccayesu na upanāmetabbanti adhippāyo. **Puggalavasenevatī** “bhikkhū cīvarena kilamanti, ettakam nāma taṇḍulabhāgam bhikkhūnam cīvaram kātuṃ ruccati saṅghassā”tiādinā puggalam parāmasitvā puggalavaseneva. **Saṅghavasenāti** “saṅgho cīvarena kilamati”tiādinā saṅghavasena na kātabbanti sambandho. Evaṃ puggalavasena apalokanakammassa akattabbatam dassetvā idāni vatthuvaseva tasseva akattabbatam dassento āha “jātarūparajatavasenāpī”tiādi. **Kappiyabhaṇḍavasenāti** cīvarataṇḍulehi avasesassa kappiyabhaṇḍassa vasena. Cīvarataṇḍulānañhi visum gahitattā “kappiyabhaṇḍavasenā”ti ettha tehi avaseso kappiyabhaṇḍova gahetabbo. **Tam panāti** apalokanakammaṃ pana. Kattabbākāram dassento āha “idāni”tiādi. **Subhikkhanti** samiddhabhikkham. **Sulabhapiṇḍanti** sukhena labhapiṇḍam. Dvīhi padehi aññamaññassa kāraṇam dasseti, subhikkhattā sulabhapiṇḍam, sulabhapiṇḍattā subhikkhanti vuttam hoti.

Evam cīvarapaccayaṃ sallakkhetvā senāsanam sallakkhetabbanti sambandho. **Kāleti** gāhāpanassa kāle. **Vuttanti** mahāatthakathāya vuttam. Kasmā dve sammannitabbā, nanu ekampi sammannitum vaṭṭatīti āha “evañhi”tiādi. Tattha hi yasmā gāhessati, tasmā dve sammannitabbāti yojanā. Ekena hi sammutiladdhena sakkā param gāhāpetum, attanā pana attano pāpetum na sakkā, tasmā dvīsu sammatesu navako vuḍḍhassa, vuḍḍho ca navakassāti ubho aññamaññaṃ gāhessantīti adhippāyo. **Sammannitabbāti** ekato sammannitabbā. **Aṭṭhapi soḷasapīti** ettha pisaddena tato adhikampi ekato sammannitum vaṭṭatīti dīpeti. Sattasatikakkhandhake ubbāhikasammutiyaṃ (cūlava. 456) aṭṭhapi janā ekatova sammatāti vacanañcetha sādhamam. Niggahakammameva hi saṅgho saṅghassa na karotīti daṭṭhabbam. **Tesanti** aṭṭhasoḷasajanānam, sammuti vaṭṭatiyevāti sambandho. Kinti sallakkhetabbanti āha “cetiyaḥara”ntiādi.

Āsanagharanti paṭimāgharam. Maggapokkharānānam samīpe katā sālāyo upacārasena vuccanti “maggo”ti ca “pokkharāni”ti ca. Tā hi sālāyo upacārasīmabbhantaragate gāmābhikumhamagge ca antoupacārasīmāyaṃ khaṇitā yattha katthaci pokkharāniyo ca karīyanti, iti sallakkhetabbanti yojanā. Asenāsanam dassetvā senāsanam dassento āha “vihāro”tiādi. **Rukkhamūlanti** channakavāṭabaddharukkhamūlam. Eseva nayo veḷugumbepi. Gāhentena ca gāhetabbānīti sambandho. **Saṅghikoti** tatruppādo. **Tesūti** dvīsu cīvarapaccayesu. **Yanti** cīvarapaccayaṃ. **Tassāti** cīvarapaccayassa. **Ṭhitikatoti** pabandhavasena ṭhitaṭṭhānato. **Itaroti** paṭhamam gahitacīvarapaccayato itaro.

Appatāyāti appabhāvato, gāhiyamāneti sambandho. **Pariveṇagghenāti** pariveṇaparicchena. **Labhantīti** pariveṇasāmikā bhikkhū labhanti. **Tanti** pariveṇam. **Vijaṭetvāti** vijaṭam katvā, dve vā tayo vā koṭṭhāse katvāti attho. **Pakkhipitvāti** bhāgakoṭṭhāsam pakkhipitvā. **Na evam kātabbanti** yathā mahāsumatthero āha, tathā na kātabbanti attho. Akātabbakāraṇam dassento āha “manussā hī”tiādi. **Tatthāti** pariveṇe, pavisitabbam iti āhāti yojanā. **Etthāti** etasmiṃ gāhaṇaṭṭhāne. **Paṭikkosātīti** paṭisedheti. Paṭikkosanākāram dassento āha “mā āvuso”tiādi. Iti vuttam, iti paṭikkosātīti yojanā. Eko hi itisaddo luttaniddiṭṭho. **Tassāti** mahātherassa. **Saṅghanti** bhikkhūnam saṅgham. **Tanti** mahātheram.

Evam vattabbanti evam vakkhamānanayena vattabbam. Paccayaṃ dhāretha, iti vattabbanti yojanā. Pāpuṇāti āvuso iti vutteti yojanā. “Gahitam hoti”ti iminā “gaṇhatha, gaṇhāmī”ti paccuppannakālavasena vuttatā gahitam hotīti dasseti. Atītanāgatakālavasena aghitabhāvaṃ dassento āha “sace panā”tiādi. **Satuppādamattanti** gahaṇe satiyā uppādanamattam. **Etthāti** senāsanapaccayaḥaṇaṭṭhāne.

Yopīti yampi. Upayogathe cetam paccattavacanam, yampi paccayaṃ vissajjetīti yojanā. **Paccayanti** ca cīvarapaccayaṃ. **Ayampīti** ayampi paccayo. Pisaddo mahālābhapariveṇe paccayaṃ sampiṇḍeti. **Tasmiṃyeva pariveṇeti** tasmiṃ paṃsukūlikena gahitapariveṇe eva. **Aññassāti** paṃsukūlikato aññassa bhikkhussa. Paṃsukūliko “ahaṃ vasāmī”ti senāsanam jaggissati. Itaro “ahaṃ paccayaṃ gaṇhāmī”ti senāsanam jaggissatīti yojanā. **Dvīhi kāraṇehīti** vasanaḥaṇavasena dvīhi kāraṇehi. Paṃsukūlike gaṇhanteti sambandho. **Idhāti** senāsane. **Tenāti** paṃsukūlikena. **Heṭṭhāti** senāsanassa heṭṭhā, ṭhitam aññam bhikkhanti sambandho. **Tenāti** paṃsukūlikena, kiñci vacananti sambandho. Vutthavassassa paṃsukūlikassāti yojanā. **Vaṭṭatīti** paṃsukūlikassa vaṭṭati. **Tasmiṃ senāsaneti** paṃsukūlikena gahitasenāsane. **Yesam panāti** manussānam pana. **Tesanti** manussānam.

Thūpaṃ katvāti cetiyam katvā. **Tassāti** thūpassa. **Tena bhikkhunāti** vassāvāsikam gāhakabhikkhunā. **Tanti** bhojanasālam. Gāhetum vaṭṭatīti sambandho. **Sabbamidanti** sabbam idaṃ vacanam.

Pātipadaaruṇatoti vassūpanāyikadivasasaṅkhātassa pātipadassa aruṇuggamanato. **Vitakkacārikoti** “kattha nu kho vasissāmī”tiādinā vitakkena caraṇe anuyutto. **Senāsanam yācatīti** senāsanaggāhāpakam senāsanam yācati. **Gahitanti** saṅghena gahitam. **Yatthāti** ṭhāne. Vassūpagatehi vattabbāti sambandho. Punappunam, samam vā cetiyāṅgaṇādiṃ muñcanti sodhenti imāhīti

sammuñcaniyo. Mucidhātu sodhanatthe yuppaccayo karaṇatthe hoti. Tālujo paṭhamakkharo. Sulabhā ce daṇḍakā, ekekena dve tisso yaṭṭhisammuñcaniyo bandhitabbā. Sulabhā ce salākā, chapañcamuṭṭhisammuñcaniyo bandhitabbāti attho. **Pañca pañca ukkāti** araññavihāresu parissayavijānanatthaṃ pañca pañca aggiukkā koṭṭetabbā chinditabbāti attho.

“Nibaddhavattaṃ ṭhapetvā”ti ettha akattabbavattaṃ dassento āha “vattaṃ karontehi cā”tiādi. Tattha vattaṃ karontehi ca evarūpaṃ adhammikavattaṃ na kātabbanti sambandho. **Hi** saccaṃ, sabbeva ete uddesādayo papañcāti yojanā. Papañcenti saṃsāre ciraṃ ṭhapentīti **papañcā. Mūgabbatanti** mūgānaṃ vataṃ, mūgehi kattabbaṃ vā, mūgena viya vā amūgehi kattabbaṃ vataṃ. Evaṃ akātabbavattaṃ dassetvā idāni kātabbavattaṃ dassento āha “pariyattidhammo nāmā”tiādi. **Tividhampīti** pariyattipaṭipattipaṭivedhavasena tippakārampi. Avayavapariyattidhammopi avayavipariyattidhammaṃ, avayavipariyattidhammo vā avayavapariyattidhammaṃ paṭiṭṭhāpeti, tasmā pariyattidhammo attanāpi attānaṃ paṭiṭṭhāpesīti veditabbaṃ. **Uddisathāti** pariyattiṃ uddisatha. **Sodhetvā...pe... upasampādetthāti** ettha sodhanaṃ nāma sabbesaṃ ācāraikulaputtānaṃ upaparikkhanaṃ. **Sodhetvā nissayaṃ detthāti** ettha sodhanaṃ nāma bhikkhusabhāgataṃ upaparikkhanaṃ. **Hīti** saccaṃ. **Kulaputtoti** ācāraikulaputto. Yattakāni dhutaṅgāni samādiyitum sakkothāti yojanā. **Antovassaṃ nāmetanti** bhummatthe upayogavacanametā. Etasmiṃ antovasseti hi attho, bhavitabbantiādisu sambandhitabbaṃ. **Sakaladivasanti** sakaladivasamhi, appamattehīti sambandho. **Ekacārikavattanti** ekakena caritabbaṃ vattaṃ. **Bhasseti** vacane. **Dasavatthukakathanti** appicchatādidavasatthuka kathaṃ.

Viggāhikapisuṇapharusavacanāniti viggahaṃ kalahaṃ janetīti viggāhikaṃ, viggāhikavacanañca pisuṇavacanañca pharusavacanañca viggāhikapisuṇapharusavacanāni. Manasikārabahulā viharatha iti ovaditabbāti yojanā. **Dantakaṭṭhakhādānavattanti** heṭṭhā adinnādānavāṇṇanāyaṃ vuttaṃ dantakaṭṭhakhādane, dantakaṭṭhakhādānassa vā vattaṃ. “Pattaṃ thavikāya pakkhipantena na kathetabba”nti iminā kathente pamādena patto bhijjeyyāti pattassa guttatthāya kathanaṃ nivāreti. **Ācikkhitabbāti** itisaddo parisamāpanattho.

Koci dāyakoti sambandho. **Āgantuko bhikkhūti** cīvaraggāhitato pacchā āgato āgantuko bhikkhu. **Saṅghattheroti** āvāsikasāṅghatthero. **Paṭhamabhāganti** pubbe gāhitaṃ paṭhamabhāgaṃ, **parivattetvāti** pubbe gāhitabhāgena pacchā dātabbaṃ vassāvāsikaṃ parivattetvā. Āgantukassa vassaggena pattaṭṭhāne āgantukassa dātabbanti yojanā. “Āgantukassā”ti padaṃ pubbāparaṃ apekkhati. Tasmā dvinnaṃ padānaṃ majjhe vuttaṃ. **Paṭhamavassūpagatāti** paṭhamavassūpanāyikadivase vassūpagatā. “Dve tīṇi cattārī”ti vacanassa vā bahūnaṃ bhikkhūnaṃ vā byāpanatthāya “laddhaṃ laddha”nti vicchāvasena vuttaṃ. **Tena panāti** āgantukena pana. Paṭhamavassūpagatehi appake laddhe pacchimavassūpanāyikadivase dātabbānaṃ vassāvāsikānaṃ bahukepi ayaṃ nayo nātāboti katvā na vutto.

Dvīsupīti paṭhama dutiyavasena dvīsupi. Vassūpagatā bhikkhū bhikkhāya kilamantā vadantīti sambandho. **Idhāti** ṭhāne. **Vasantāti** ekato vasantā. Dve bhāgā homa sādhu vatāti yojanā. **Sādhu vatāti** ekaṃsena sundarā bhavēyyunti attho. **Yesanti** bhikkhūnaṃ. **Tatthāti** nātipavāritaṭṭhānesu. **Pavāraṇāyāti** pavāraṇādivase. **Tesūti** bhikkhūsu. **Yeti** bhikkhū. **Tatthāti** nātipavāritaṭṭhānesu. Kasmā apaloketvā dātabbaṃ, nanu te sādīyantīti āha “sādī yantāpi hī”tiādi. Tattha **hīti** yasmā. “Neva vassāvāsikassa sāmīno”ti iminā tesāṃ vassacchinnataṃ dīpeti. **Neva adātuṃ labhantīti** paṭhamameva katikavattassa katattā adātuṃ neva labhanti, sabbesaṃ no amhākantīti yojanā. **Idhāti** ṭhāne. **Tanti** katikavattaṃ. Eko bhikkhūti sambandho. **Tesanti** bhikkhūnaṃ. **Tatthāti** sabhāgaṭṭhāne. Vasitvā āgatānaṃ tesāṃ bhikkhūnanti yojanā. Na labbhati iti vuttanti yojanā. **Imesanti** vassāvāsīappattakānaṃ ekaccānaṃ. **Gāhitasadisamevāti** vassāvāsikassa gāhitena sadisameva. **Tesamevāti** ekaccānameva.

Pakkantopīti aññaṃ ṭhānaṃ pakkamantopī. **Hīti** saccaṃ, yasmā vā. Tena bhikkhunā kataṃ pānīyaupaṭṭhapanādīkammaṃ **bhatinivīṭṭhaṃ** bhatiyā ṭhitanti yojanā. Apalokanakammaṃ katvā

gāhitaṃ saṅghikanti sambandho. **Saṅghikanti** tatrappādaṃ sandhāya vuttaṃ. **Vibbhantopīti** pisaddo pageva chinnavassoti dasseti. **Paccayavasenevāti** saddhādeyyapaccayavasena. **Vadantīti** keci vadanti.

Disaṃgamiko bhikkhu vibbhamatīti sambandho. **Manusseti** vassāvāsikadāyakamanusse. **Sammukhāti** āvāsikassa sammukhā. **Sampaṭicchāpetvāti** “suṭṭhu dassāmā”ti paṭicchāpetvā. **Yassa gāhitanti** yassa bhikkhuno senāsanam gāhitaṃ. **Senāsanasāmikassāti** senāsanadāyakassa puttadhītādayoti sambandho. **Senāsane demāti** senāsanassa dema. **Tatthāti** senāsane. Ekameva vatthaṃ dātābbaṃ. Kasmā? Puggalassa adatvā senāsanasseva dātābhattā. **Vassāvāsikaṭṭhitikāyāti** vassāvāsikagāhitassa ṭhitikāya. **Eseva nayoti** senāsanasseva dinnattā eseva nayo. **Tasseva hontīti** puggalasseva dinnattā tasseva honti.

Dutiyo therāsane gāhito hotīti sambandho. Paṭhamabhāgassa sāmaṇerassa gāhitattā vuttaṃ “varabhāgaṃ sāmaṇerassa datvā”ti. **Ubhopīti** dve therasāmaṇerepi. **Sayamevāti** dāyako sayameva. **Yanti** vassāvāsikaṃ. **Yassāti** therassa vā sāmaṇerassa vā.

Itoti vuttanayato. **Daharasāmaṇerassāti** taruṇassa sāmaṇerassa. **Soti** gharasāmiko. **Nanti** pattajanaṃ. **Yassāti** bhikkhuno. **Tesanti** manussānaṃ. **Yathābhūtaṃ ācikkhitabbanti** vibbhamakālāṅkatakāraṇaṃ yathābhūtaṃ ācikkhitabbam. **Suddhapamsukūlikāyevāti** aññehi amissā suddhā pamsukūlikāyevāti. **Idaṃ nevāsikavattanti** nigamaṇaṃ.

Upanandavatthukathā

319. Ayamattoti ayam vakkhamāno attho, evaṃ veditabboti sambandho. **Tatthāti** gāmake. **Tanti** senāsanam, gaṇhantenevāti sambandho. **Idhāti** sāvattiyaṃ. **Muttanti** te senāsanam muñcitaṃ hoti. **Tatrāpīti** gāmakepi. **Ubhayatthāti** sāvattiyaṃ, gāmake cāti ubhayattha.

Etthāti upanandavatthusmiṃ. **Kathanti** kena pakārena paṭippassambhati. **Idhāti** sāsane. Ekacco gaṇhātīti sambandho. **Tatrāpīti** sāmantavihārepi. **Tassāti** bhikkhussa. **Idhāti** senāsane. **Ālayamattanti** cittuppādamattaṃ. **Iccassāti** iti assa, evaṃ assa bhikkhussāti attho. **Sabbatthāti** sabbasmim “gahaṇa gahaṇa”ntiādike catukke. Yo pana gacchatīti sambandho. **Upacārasimātikkameti** nimittatthe cetam bhumavacanaṃ, bhāvena bhāvalakkhaṇe vā. **Tatthāti** aññasmim vihāre paccāgacchati, vaṭṭati, senāsanaggāho na paṭippassambhatīti adhippāyo.

320. Yoti bhikkhu. **Mahantataro vā daharataro vāti** attano mahantataro vā daharataro vā hoti. So bhikkhu tivassantaro nāmāti yojanā. Ekassa bhikkhuno tiṇṇaṃ vassānamantare ṭhito tivassantaro añño bhikkhu. **Tatthāti** bhikkhūsu. **Ime sabbeti** tivassantaradvivassantarasamānavassike ime bhikkhū, labhantīti sambandho. **Yaṃ tiṇṇaṃ pahotīti** mañcapīṭhavinimuttaṃ yaṃ āsanaṃ tiṇṇaṃ sukhaṃ nisīdituṃ pahoti, tathārūpe āsanepi dve dve hutvā nisīdituṃ labhantīti yojanā. Apisaddena mañcapīṭhāni apekkhati. Idaṃ pacchimadīghāsanam. **Anupasampannenāpīti** pisaddo pageva upasampannenāti dasseti.

Hatthikumbheti hatthisiropiṇḍe. Iminā hatthisaddena hatthikumbho gahito avayavūpacārena vā uttarapadalopena vāti dasseti. Hatthī viyāti hatthī, bhūmibhāgo, hatthimhi patiṭṭhito pādasāṅkhāto nakho imassāti **hatthinakhako**, pāsādo. Etaṃ “hatthinakhako”ti nāmaṃ evaṃkatassa pāsādassa nāmanti yojanā. “Suvaṇṇarajatādivicitrānī”ti padaṃ “kavāṭāni mañcapīṭhāni tālavaṇṭānī”ti sabbapadesu yojetabbam. Yaṃkiñci cittakammakataṃ atthi, sabbam vaṭṭatīti yojanā. Pāsādassa demāti sambandho. **Pāṭekkanti** pāsādato visuṃ. **Paṭiggahitamevāti** sabbam paṭiggahitameva hoti. Gonakādīni aṭṭhārasa attharaṇāni paribhuñjitunti sambandho. **Gihivikaṭaṇihārenāti** gihīhi visesena yathākāmaṃ kariyatīti **gihivikaṭaṃ**, gihisantakaṃ. “Gihivikaṭa”nti nīhāro abhinīhāro gihivikaṭaṇihāro, tena. **Labbhantīti** nisīditumeva labbhanti. **Tatrāpīti** dhammāsanepi.

Avissajjiyavattukathā

321. Etānīti garubhaṇḍāni. **Tatthāti** rāsivasena pañcasu sarūpavasena pañcavīsatiyā garubhaṇḍesu. Āgantvā, ābhuso vā ramanti etthāti **ārāmo. Tesamyevāti** pupphārāmaphalārāmānameva. “Ṭhapitokāso”ti iminā vatthusaddassa bhūmibhedattham dasseti. Vasati ārāmo patitṭhahati etthāti **ārāmavattu. Tesu vāti** ettha vāsaddena navabhūmibhāgato aññassa porāṇabhūmibhāgassapi ārāmavattubhāvaṃ vikappeti. Visesa catuiriyāpathe harati pavatteti etthāti **vihāro. Tassāti** vihārassa. **Catunnam mañcānanti** niddhāraṇatthe sāmivacanaṃ. Aññataro mañco nāmāti yojanā. Eseva nayo sesesupi. “Lohena katā kumbhī”ti iminā **lohakumbhīti** ettha majjhelo pasamāsaṃ dasseti. Lohamayā kumbhī **lohakumbhīti** vacanattropi yujjateva. “Eseva nayo”ti iminā lohena kataṃ **bhāṇakam**, lohena kato **vārako**, lohena kataṃ **kaṭāhanti** attham atidisati. **Etthāti** bhāṇakavārakakaṭāhesu. **Arañjaroti** atimahantattā araṃ khippaṃ jarati vināsetīti arañjaro. Atha vā jalaṃ gaṇhituṃ alanti arañjaro lakārānaṃ rakāre katvā.

Gāthāvasena nigamanaṃ dassento āha “eva”ntiādi. Tattha evaṃ pakāsayīti sambandho. Dve garubhaṇḍāni **dvisaṅgahāni** honti, **tatiyaṃ** garubhaṇḍaṃ catusaṅgahaṃ hoti, **catuttham** garubhaṇḍaṃ navakoṭṭhāsaṃ hoti, **pañcamam** garubhaṇḍaṃ atṭhabhedanaṃ hoti, **iti** iminā pakārena **pañcanimmalalocano** nātho pañcahi rāsīhi **pañcavīsa vidham** garubhaṇḍaṃ pakāsayīti yojanā.

Tatrāti garubhaṇḍe. **Hīti** vitthāro. Sabbampi idaṃ garubhaṇḍaṃ avissajjiyanti vuttanti yojanā. **Idhāti** imasmim vatthusmim. Parivāre pana āgatanti sambandho.

Pañca rāsayo mahesinā vuttāti yojanā. **Etthāti** parivāre.

Tatrāti “parivattanavasenā”ti vacane. Idaṃ garubhaṇḍaṃ upanetunti sambandho. Niccaṃ tiṭṭhantīti **thāvarā**, ṭhādhatu varapaccayo, ṭhākārassa thākāro. Iminā ārāmaārāmavattuvihāravihāravatthūni gahetabbāni. Avissajjiyaavebhaṅgīyattā garu alahukaṃ bhaṇḍaṃ **garubhaṇḍaṃ**. Iminā mañcādīni ekavīsati garubhaṇḍāni gahetabbāni. **Thāvareti** ādhāre bhummaṃ, pariyaṇanti sambandho. Atha vā niddhāraṇe bhummaṃ, thāvaresūti hi attho, khettantiādisu sambandhitabbaṃ. Khipati pubbaṇṇabījametthāti **khettam**. Vasati aparāṇṇabījaṃ patitṭhāti etthāti **vatthu**, tale bhūmibhāge ekato vā dvīhi vā tīhi vā ṭhānehi āvaraṇaṃ karīyati etthāti **taḷāko**, saro. Kassakānaṃ matena kattabbāti **mātikā**. Ārāmena parivattetunti sambandho. Kāni parivattetunti āha “imāni cattāripī”ti. **Pisaddo** avayavasampiṇḍano.

Tatrāti “parivattetuṃ vaṭṭatī”ti vacane. **Dūreti** saṅghārāmato dūraṭṭhāne. **Yampīti** nāḷikeraphalampi. **Harantīti** saṅghassa haranti. **Aññesanti** saṅghato aññesaṃ manussānanti sambandho. **Teti** manussā. Saṅghena sampaṭicchitabboti sambandho. **Ruccatīti** saṅghassārāmena manussānamārāmaṃ, manussānamārāmena vā saṅghassārāmaṃ parivattetuṃ rucīyati icchīyati. Bhikkhūnaṃ ārāmoti sambandho. **Ayanti** manussānamārāmo. **Khuddakoti** saṅghārāmato khuddako. **Āyanti** ayati āyasāmiko dhanena vaḍḍhiṃ gacchati anenāti āyo, taṃ. **Samakamevāti** samappamāṇameva, āyaṃ sace detīti sambandho. Pamāṇatthe kapaccayo. Manussānaṃ rukkhāti sambandho. Atirekaṃ saṅghassa demāti sambandho. **Jānāpetvāti** “saṅghe dinnam mahapphala”nti (ma. nī. 3.376) saṅghassa dinnadānassa ānisaṃsaṃ manussānaṃ jānāpetvā. Phaladhārino honti nanūti yojanā. **Evantiādi** nigamanaṃ. **Eteneva nāyenti** yena nāyena ārāmo ārāmena parivattetabbo, eteneva nāyena. Mahantena vā khuddakena vā ārāmavattunā cāti yojanā. Ārāma ārāmavattuvihāravihāravatthūni parivattetabbānīti sambandho.

Ubhopīti gehapāsādasasena ubhopi. **Tatthāti** gehe. **Idam panāti** pāsādasānkhātaṃ gehaṃ, manussānaṃ gehanti sambandho. Mahagghena vā appagghena vā vihāravattunā cāti yojanā. Vihāravihāravattuārāmaārāmavattūni parivattetabbānīti sambandho. **Evantiādi** nigamanaṃ.

Garubhaṇḍena garubhaṇḍaparivattane evaṃ vinicchayo veditabboti yojanā. **Paṃsvāgārakesūti** paṃsukīlanatthāya katesu agārakesu. **Kappiyamañcāti** saṅghagaṇapuggalānaṃ kappiyā suvaṇṇarajatādīhi akatā mañcā. Vihārassa pana suvaṇṇarajatamayādīkāpi kappiyā mañcā dātabbāti sambandho. **Bahisīmāyāti** upacārasīmato bahi. **Tatthāti** saṅghattherassa vasanaṭṭhāne. **Tatthāti** tassa bhikkhuno vasanaṭṭhāne. “**Mahagghenā**”ti vuttavacanāṃ niyamento āha “satagghanakena vā saḥassagghanakena vā”ti. **Mañcasatanti** mañcabahuṃ. **Etesupīti** pīṭhabhisibibbohanesupi. **Tatthāti** pīṭhabhisibibbohanesu. Kappiyaṃ pīṭhādīti sambandho. **Akappiyaṃ vā mahagghaṃ kappiyaṃ vāti** kappiyena vā mahagghakappiyena vā parivattetvāti sambandho. “Vuttavatthūnī”ti padaṃ “parivattetvā”ti pade avuttakammaṃ, “gahetabbānī”ti pade vuttakammaṃ, pubbāparāpekkhapadaṃ.

Pasatamattaudakagaṇhakānīpīti ettha pasato nāma kuñcitapāṇi. **Sīhaḷadīpeti** sīhaṃ lāti gaṇhātīti **sīhaḷo** lakārassa ḷakāraṃ katvā, sīhabāhunāmako rājā, tassa puttattā vijayakumārōpi sīhaḷo nāma, tena ādimhi nivāsabhāvena gahitattā dīpo **sīhaḷadīpo** nāma, tasmīṃ. Pādaṃ gaṇhātīti **pādagaṇhano**, soyeva **pādagaṇhanako**. **Pādo nāmāti** “pādagaṇhanako”ti ettha pādo nāma. Yo lohavārako magadhanāḷiyā pañcanāḷimattaṃ gaṇhāti, so lohavārako pādo nāmāti yojanā. Iminā pamāṇassa nāmaṃ pamāṇavante upacārato vohāranayaṃ dasseti. **Tatoti** pañcanāḷimattagaṇhanakavārakato. **Imānīti** lohakumbhādīni.

Bhīṅgāra ...pe... kaṭacchuādīnīti bhīṅgāro ca paṭiggaho ca uḷuṅko ca dabbi ca kaṭacchu ca pāti ca taṭṭako ca sarako ca samuggo ca aṅgārakapallo ca dhūmakakaṭacchu ca **bhīṅgāra...pe... dhūmakakaṭacchuyo**, tā ādi yesaṃ tānīti **bhīṅgāra...pe... kaṭacchuādīni**. Adisaddena aññāni upakaraṇāni gahetabbāni. **Bhājanīyānīti** bhājetabbāni. **Kaṃsalohādīti** adisaddena vaṭṭalohaṃ saṅgaṇhāti. **Vaṭṭalohaṃ nāma** pītalohaṃ. **Hīti** saccāṃ, yasmā vā. **Pārihāriyanti** saṅghikaparibhogāṃ pariharitvā apanetvā puggalikaparibhogena paribhuñjanaṃ, “attasantaka”nti vā pariggahena haritvā bhūñjanaṃ na vaṭṭati. **Gihivikaṭānīhārenevāti** “gihivikaṭa”nti abhinīhāreneva.

Aññasmimpi kappiyalohabhaṇḍe pariyāpannā añjanīti yojanā. Atha vā **kappiyalohabhaṇḍeti** niddhāraṇe bhummaṃ, “añjanī”tiādīnā sambandhitabbaṃ. **Sūcīti** cīvarādisibbanakā sūci. **Paṇṇasūcīti** paṇṇe likhanā sūci. **Aññampīti** añjaniādīto aññampi. Dhūmanettaṃca phālaṃca dīparukkho ca dīpakapallako ca olambakadīpo ca **dhūmanetta...pe... olambakadīpā**. Itthipurisatiracchānagatasāṅkhātāni rūpāni etesu atthīti **itthipurisatiracchānagatarūpakāni**. Dhūmanetta...pe... olambakadīpā ca te itthipurisatiracchānagatarūpakāni ceti **dhūmanetta...pe... rūpakāni**, visesanaparanipāto. Tāni vā aññāni vā bhitticchadanakavāṭādīsu upanetabbāni lohahhaṇḍānīti sambandho. **Lohakhilakanti** lohamayaṃ āṇiṃ. **Pariharitvāti** “attano santaka”nti pariggahena haritvā, saṅghikaparibhogagihivikaṭāni vā apanetvā. **Khīrapāsāṇamayānīti** khīravaṇṇena pāsāṇena katāni.

Suvaṇṇaṅca rajataṅca hārakūṭaṅca jātiphalikaṅca **suvaṇṇa...pe... jātiphalikāni**, tehi katāni bhājanāni **suvaṇṇa...pe... bhājanāni**. **Sabbanti** suvaṇṇarajatādisabbaṃ. **Vaṭṭatīti** saṅghagaṇapuggalānaṃ vaṭṭati.

Vāsiādīsu evaṃ vinicchayo veditabboti yojanā, niddhāraṇe vā bhummaṃ. Yāya vāsiyā na sakkāti sambandho. **Tatoti** vāsīto. **Mahattarīsaddo** mahantapariyāyo anipphannaṃpāṭipadiko. Mahattarī vāsīti sambandho. **Vejjānanti** bhisakkānaṃ. **Sirāvedhanapharasupīti** pisaddena tato mahantaṃ pana pagevāti dasseti. Yā pana kuṭhārī āvudhasāṅkhepena katāti sambandho. Atha vā āvudhasāṅkhepena katā yā pana kuṭhārī atthīti yojanā. **Anāmāsāti** anāmasitabbā, anāmāsārahāti attho. **Caturaṅgulamatopīti** pisaddo tato adhiko pana pagevāti dasseti. Nikhaṇitvā khādātīti **nikhādanam**. Caturassaṃ mukhametassāti **caturassamukham**. Doṇisadisam mukhametassāti **doṇimukham**. Sammuñcanidaṇḍavedhanampi nikhādanam daṇḍabaddham hoti ceti yojanā. Daṇḍena bandhitabbanti **daṇḍabaddham**, daṇḍam baddhametassāti vā daṇḍabaddham. “Adaṇḍaka”nti vatvā tassevattham dassetuṃ vuttam “phalamattamevā”ti. Natthi daṇḍametassāti **adaṇḍakam**. **Yanti** nikhādanam. **Pariharituntī** puggalikabhāvena pariggahetvā harituṃ, saṅghikabhāvaṃ apanetuṃ vā. Sikharampi nikhādaneneva saṅghitaṃ lakkhaṇāhāranayena samānakiccabhāvato. **Sikharanti** yena paribbhamitvā chindanti, yehi

manussehi dinnānīti sambandho. **Teti** manussā, vadantīti sambandho. **Noti** amhākaṃ. **Pākatiketi** pakatiyā ðhite, yathā paṭhamam ðhitā honti, tathā karissāmāti attho. **Sace āharantīti** sace āyācanam akatvā haranti. **Anāharantāpīti** puna anāharantāpi.

Kammāro ca taṭṭakāro ca cundakāro ca naḷakāro ca maṇikāro ca pattabandhako ca **kammāra... pe... pattabandhakā**, tesam. Adhikaraṇī ca muṭṭhiko ca saṇḍāso ca tulā ca **adhikaraṇi...pe... tulā. Saṅghe dinnakālatoti** saṅghassa dinnakālato. Tipuṃ chindati anenāti **tipucchedanam**, tameva satthakam **tipucchedanasatthakam**. Mahākattariṇca mahāsaṇḍāsaṇca mahāpipphilaṇca ṭhapetvāti yojanā. Kasmā ṭhapitānīti āha “mahākattariādīni garubhaṇḍānī”ti. Tattha yasmā mahākattariādīni garubhaṇḍāni, tasmā “ṭhapetvā mahākattari”nti ādi mayā vuttanti yojanā.

Valliādīsu evam vinicchayo veditabboti yojanā. **Vettavalliādikāti** vettasaṅkhātavalliādikā. **Aḍḍhabahuppamāṇāti** ettha –

“Byāmo saharā bāhu, dvepassadvayavitthatā”ti. –

Abhidhāne (abhidhānappadīpikāyaṃ 269 gāthāyaṃ) vuttattā bāhu nāma idha byāmovā adhippeto. Tasmā dvīsu passesu vitthatānam byāmasaṅkhātānam saharānam dvinnam bāhūnam aḍḍhoti **aḍḍhabāhu**, tassa pamāṇametassāti **aḍḍhabahuppamāṇāti** vacanatto kātabbo, dīghato dvihatthā vallīti vuttam hoti. **Tatthajātakāti** tissam saṅghassa bhūmiyaṃ jātakā. **Rakkhitagopitāti** saṅghena sayam rakkhitā, parehi gopitā. Iminā arakkhitaagopitā garubhaṇḍam na hotīti dasseti. **Sāti** valli. Atirekā hotīti sambandho. **Upanetunti** tam vallim upanetuṃ. Suttaṇca makacivākaṇca nāḷikerahīraṇca cammaṇca **sutta...pe... cammāni**, tehi katā **sutta...pe... cammamayā**. Rajjukā vā yottāni vā garubhaṇḍam hotīti sambandho. **Ekavaṭṭā vā dvivaṭṭā vāti** ettha vāsaddena tivaṭṭādiṃ saṅgaṇhāti. Avaṭṭetvā dinnam suttaṇca avaṭṭetvā dinnā makacivākanāḷikerahīrā cāti yojanā.

Yo koci veḷūti sambandho. **Sopīti** veḷupi vaṭṭatīti sambandho. Pisaddena vallim apekkhati. **Idametthāti** idam sabbam ettha veḷumhi, veḷūsu vā idanti sambandho. **Samakam** vāti gahitaveḷunā samappamāṇam vā. **Atirekam vāti** tato atirekam vā. **Tamaḅḅhanakanti** tassa veḷuno agghanāraham. **Phātikammanti** vaḍḍhikammam. **Tatthevāti** gaṇhanaṭṭhāneva. **Gamanakāleti** gaṇhanaṭṭhānato aññattha gamanakāle. “Pahiṇitvā dātabbo”ti iminā sayam vā āgantvā dātabboti atthopi lakkhaṇahāranayena gahetabbo samānakiccattā.

Muṅḅapabbajasaddena muṅḅapabbajatiṇānam pāḷiyam visum gahitattā tiṇasaddena tāni ṭhapetvā pārisesañāyena avasesatiṇameva gahetabbanti dassento āha “muṅḅam pabbajaṇca ṭhapetvā”tiādi. Samānaphalattā lakkhaṇahāranayena paṇḅampi tiṇeneva saṅgahitanti dassento āha “yatthā”tiādi. Tattha **yatthāti** yasmim ṭhāne, **itīti** evam. Tiṇaṇca garubhaṇḍam hotīti sambandho. **Tatthajātakam vāti** tasmim saṅghārāme jātakam vā. **Bahārāmeti** saṅghārāmato bahi. **Tampīti** tiṇampi. Pisaddena valliveḷū apekkhati. **Aṭṭhaṅgulappamāṇopīti** dīghato aṭṭhaṅgulapamāṇopi. **Rittapotthakoti** alikhitattā tuccho makacivatthādīkopi paṇḅamayopi potthako. Idaṇca paṇḅapasāṅgena vuttam.

Paṅcavaṇṇā vāti nīlapītalohitodātamaṅḅijṭṭhavasena paṅcavaṇṇanā vā. **Tampīti** mattikampi. Pisaddena valliveḷutiṇāni apekkhati.

Dārubhaṇḍe evam vinicchayo veditabboti yojanā. Rakkhitagopito yo koci dārubhaṇḍako atthīti yojanā. Mahāaṭṭhakathāyaṃ pana vuttoti sambandho.

Tatrāti mahāaṭṭhakathāyaṃ, “tena kho pana samayenā”ti pāḷiyam vā. **Imesūti** āsandikādīsu. **Etthāti** pīthesu, palālapīthenāti sambandho. **Byagghacammaonaddhanti** byagghacammaṇa avanaddham. **Vāḷarūpaparikkhittanti** vāḷarūpehi parivāritam. **Ratanaparisibbanti** ratanasuttēna samantato sibbitam.

Etesupīti vaṅkaphalakādīsupi. “Saṅkhathālakam pana bhājanīya”nti pāṭhassānantaram “tathā”ti pāṭho atthi, so ettha na yujjati, parato pana “yena kenaci katam garubhaṇḍamevā”ti pāṭhassānantaram yujjati. Tattha hi yathā yena kenaci katam garubhaṇḍameva hoti, tathā thambhatulāsopānaphalakādīsu dārumayaṃ vā pāsānamayaṃ vā yaṃkiñci gehasambhārarūpaṃ garubhaṇḍamevāti attho.

Sabbanti sakalam udakatumbapādakathalikamaṇḍalam. **Etesupīti** ādhārakādīsupi. **Tathā thambhatalāti** ettha tathāsaddena ‘garubhaṇḍamevā’ti padaṃ atidisati. **Saṅghe dinnanti** saṅghassa dinnam. **Bhūmattharaṇanti** bhūmiyaṃ attharittabbaṃ. **Tampīti** eḷakacammampi.

Udukkhalaṃ garubhaṇḍamevāti sambandho. Eseva nayo **musalanti**ādīsupi. **Etesūti** mañcapādādīsu. **Anuññātavāsīyāti** bhājanatthāya anuññātavāsīyā. **Dhamakaraṇoti** ettha “saṅkham dhamati, saṅkhadhamako”tiādīsu viya nissamyo gapāṭhoyeva yujjati. Tasmā dhamati vātena pavattatīti **dhamo**, vātahetuko saddo, dhamam karotīti **dhamakaraṇoti** vacanattho kātabbo. **Sabbametanti** anuññātavāsidaṇḍādīkam etaṃ sabbam. **Tatoti** anuññātavāsidaṇḍādīkato, mahantataram vāsidaṇḍādīkam garubhaṇḍanti yojanā.

Yathājātamēvāti yathāpavattameva. **Tehīti** hatthidantādīhi, “kata”iti padena sambandhitabbaṃ. **Tacchitanīṭṭhitopīti** tacchitakammena niṭṭhitopi.

Mattikābhaṇḍe evaṃ vinicchayo veditabboti yojanā, upabhogo ca paribhogo ca **upabhogaparibhogam**, samāhāradvando. Idaṃ padaṃ “ghaṭapīdhānādīkulālabhājana”nti padeneva sambandhitabbaṃ. **Thupikāṭṭīti** ettha itisaddo imasaddattho. Idaṃ sabbam saṅghassa dinnakālato paṭṭhāya garubhaṇḍanti yojanā. “Anatirittapamāṇo”ti visesanapadam “ghaṭako”ti visesyapadeneva sambandhitabbaṃ. **Etthāti** mattikābhaṇḍe, ādhāre vā niddhāraṇe vā ttha paccayo. Mattikābhaṇḍe kuṇḍikā bhājanīyakoṭṭhāsam bhajati, evaṃ lohabhaṇḍepīti yojanā. **Etthāti** garubhaṇḍavinicchaye.

Navakammadānakathā

323. Bhaṇḍikāṭṭhapanamattenāti ettha bhaṇḍikāṭṭhapanam nāma bhaṇḍikayojananti āha “kapotabhaṇḍikayojanamattenā”ti. **Assāti** bhikkhussa. **Citakadhūmoti** citake uṭṭhito dhūmo. **Etassevāti** bhikkhussa eva vihāroti sambandho. **Dhūmakāleti** dhūmassa uṭṭhitakāle. “Apaloketvā”ti iminā dhūmakāle apalokitam **dhūmakālikam**. Dhūmakālikam hutvāti atthayojanam katvā pāḷiyam “pariyositavihāra”nti padena sambandhitabbabhāvaṃ dasseti. **Katapariyositavihāranti** katapariyosito vihāro imassa navakammassāti katapariyositavihāram. Idaṃ navakammaṃ dentīti sambandho. Yāva gopānasiyo na ārohani, tāva vipakato nāmāti yojanā. **Tatoti** gopānasiārohanato. **Kaṅcīdeva samādapetvā kāressatīti** vihārasāmikoyeva kañci bhikkhūsamādapetvā kāressati. Pañchatthe vihāreti sambandho. Chavassikaṃ navakammanti sambandho. **Etthāti** aḍḍhayoge. **Soti** aḍḍhayogo. Mahallakam niyāmetvā dassento āha “dasahatthe ekādasahatthe”ti. Dasavassikaṃ vā ekādasavassikaṃ vā navakammanti sambandho. **Tatoti** dvādasahatthato. Lohapāsādasadisepi pāsādeti sambandho. **Tatoti** dvādasavassikanavakammato.

Navakammikoti navakamme yuttapayutto. **Utukāleti** hemantagimhakāle. **Paṭibāhitunti** aññesaṃ sampattabhikkhūnam paṭisedhetuṃ. **Āvāsasāmikassāti** āvāsadāyakassa. **Tassāti** āvāsasāmikassa. **Vamseti** anvaye. **Teti** tava. **Soti** āvāsasāmīādīko. Bhikkhūhi jaggitabboti sambandho. **Tepīti** nātiupaṭṭhākāpi. **Tasmimpīti** saṅghikapaccayepi. Bahū āvāseti sambandho. Ekaṃ āvāsanti yojanā.

Ekaṃ vā āvāsanti sambandho. **Tatoti** visajjitāvāsehi, uppannānīti sambandho. Kurundiyam pana vuttam, kinti vuttanti yojanā. **Ekaṃ mañcaṭṭhānam gahetvāti** ekaṃ mañcaṭṭhānam puggalikabhāvena gahetvā. **Tibhāganti** tatiyabhāgam. Ayameva vā pāṭho. **Etthāti** natṭhavihāre. **Puggalikamevāti** puggalikaṃ eva, puggalikaṃ iva vā. **Jaggāti** jaggāhi. **Hīti** phalajotako. **Evaṃ jaggito panāti** evaṃ jaggito vihāro pana. **Tasminti** jaggante. **Saddhivihārikādīnam dātukāmo hotīti** saṅghassa

bhaṇḍaṭṭhapanam vā navakānam vasaṇaṭṭhānam vā adatvā attanoyeva saddhivihārikādīnam dātukāmo hoti. **Saddhivihārikādīnam dātuṃ labbhatī**ti sabbavihāraṃ puggalikabhāvena aggahetvā ekadesasseva gahitattā saddhivihārikādīnam dātuṃ labbhatīti attho. Jaggāpetabbo iti vuttanti yojanā. Ettha “vutta”nti pāṭho atthi, so apāṭhoyeva “kurundiyam pana vutta”nti padassa ākārattā.

Aññaṃ idampi ca vakkhamānavacanam tattheva kurundiyam vuttanti yojanā. Kinti vuttanti āha “dve bhikkhū”tiādi. Dve bhikkhū karontīti sambandho. **Yenāti** bhikkhunā. **Soyeva sāmīti** yena sā bhūmi paṭhamam gahitā, soyeva sāmīti attho. **Patirūpe ṭhāneti** patirūpe senāsaṇaṭṭhāne. **Tanti** puggalikakaraṇam. Yam pana vayakammanti yojanā. Ettha ca **vayakammanti** tasmim vihare katassa kammassa mūlam. Vihārassa mūlam dātabbanti vuttaṃ hoti. **Tassāti** saṅghikam karontassa. **Tatthevāti** katavihāre eva. **Katāvāseti** samīpatthe bhummavacanam, katāvāsasamīpeti vuttaṃ hoti. **Chāyūpagaphalūpagāti** chāyam upagacchantā ca phalam upagacchantā ca, chāyaphalāni upaharantāti attho. **Apaloketvāti** saṅgham apaloketvā. **Sāmikāti** rukkhasāmikā. **Hāretabbāti** apanetabbā.

“Saṅghikavallimattampi aggahetvā”ti iminā saṅghikam gahetvā saṅghikāya bhūmiyā sace vihāram karoti, saṅghikamevāti dasseti. Dvibhūmakatibhūmakādīsu pāsādesu upaḍḍhabhāgaṃ dassento āha “pāsādo ceva hoti”tiādi. Upari pāsādoti sambandho. **Soti** viharakārako bhikkhu, tassa heṭṭhāpāsādoti sambandho. **Vihāreti** saṅghikavihāre, viharasamīpeti attho. **Akataṭṭhāneti** cayapamukhānam akatapubbaṭṭhāne. **Cayam vā pamukham vāti** saṅghikavihārassa cayam vā pamukham vā. **Bahikuṭṭeti** kuṭṭassa, kuṭṭato vā bahi. **Tassāti** cayapamukhakārakassa bhikkhussa hotīti sambandho. **Visamam** pabbatakandarādīnti sambandho. **Apadeti** sukarassa akāraṇe. **Katam hotīti** cayam vā pamukham vā katam hoti. **Tatthāti** cayapamukhesu, saṅgho anissaro iti vuttanti yojanā.

Varaseyyam gahetunti sambandho.

Puna āgantvāti pakkamitvā puna āgantvā. **Tassāti** navakammagāhakassa bhikkhussa. **Etanti** senāsanam.

Aññatraparibhogapaṭikkhepādikathā

324. Nātiharantīti ettha atisaddo haraṇattho, harasaddo paribhuñjanatthoti āha “aññatra haritvā na paribhuñjanti”ti. Yam mañcapīṭhādīti yojanā. **Tatthāti** undriyamahāvihāre. **Tanti** mañcapīṭhādīm. **Tasmāti** yasmā anujānāti, tasmā. **Tanti** mañcapīṭhādīm. **Aññatrāti** aññaṃ vihāram. **Aroganti** anaṭṭhājīṇṇattā arogaṃ. **Tasmim vihareti** undriyavihāre. **Tasminti** undriyavihāre. **Tatoti** undriyavihārato. **Suyojitānīti** suṭṭhu yojitāni. Mūladānam vā paṭipākatikam vā natthīti adhippāyo. **Chaḍḍitavihāratoti** bhikkhūhi anapekkhena chaḍḍitasāṅghikavihārato ca puggalena sāpekkhena chaḍḍitapuggalikavihārato ca. **Āvāsikakāleti** āvāsikānam ṭhitakāle. **Tatoti** chaḍḍitavihārato.

Phātikammatthāyāti ettha phātisaddo vaḍḍhanatthoti āha “vaḍḍhikammatthāyā”ti. **Etthāti** “phātikammatthāyā”ti pāṭhe.

Cakkalikanti cakkākārena lāti pavattati, cakkākāram vā lāti gaṇhātīti **cakkalam**, tadeva **cakkalikam**, pādapuñjanam, “kambalādīhi veṭhetvā kata”nti iminā tassa karaṇākāram dasseti. **Yehīti** pādehi. **Udakanti** senāsanassa tintakam udakam. Udakam na paññāyatīti yojanā. Saupāhanena akkamituṃ na vaṭṭatīti yojanā.

Sudhābhūmiyanti sudhāya littāyam bhūmiyam. **Paribhaṇḍabhūmiyanti** gomayakasāvaparibhaṇḍabhūmiyam. **Pādāti** mañcapādā. **Tasminti** coḷake. **Ṭhapentassāti** mañcapāde ṭhapentassa. **Tatthāti** tesu bhikkhūsu. **Nevāsikāti** nibaddham vasantīti nevāsikā. **Ṭhapentīti** mañcapāde ṭhapenti. **Tatthevāti** yathā nevāsikā vaḷaṅjanti, tattheva āgantukehi vaḷaṅjitum vaṭṭatīti attho.

Setabhitti vāti ettha vāsaddena nīlabhittiādayo sampiṇḍeti. “Dvārampi vātapānampī” tiādinā sāmāññato vuttattā dvāravātapānādayo aparikkammakatāpi na apassayitabbā. Kenaci vā vatthādināti sambandho.

“Hutvā” ti iminā “dhotapādakā” ti padassa “nipajjitu” nti pade kiriyāvisesanabhāvaṃ dasseti, “bhikkhū” ti pade kāravisesanabhāvaṃ nivatteti. Kasmim̃ thāne nipajjitum kukkucāyantīti āha “dhotehi pādehi akkamitabbaṭṭhāne” ti. “Akkamitabbaṭṭhānassetam̃ adhivacana” nti iminā “dhotapādake” ti pāthassa dhotopādo tiṭṭhati ettha thāneti **dhotapādakam̃**, tasmim̃ dhotopādaketi attham̃ dasseti. **Etanti** “dhotapādake” ti nāmaṃ. “**Paccattharivā**” ti ettha kena paccattharivāti āha “paccattharaṇenā” ti. “Attano santakenā” ti iminā saṅghikena paccattharaṇena paccattharaṇam̃ paṭikkhipati. **Niddāyatopīti** niddāyakāraṇāpi, samkuṭiteti sambandho. Atha vā **niddāyatopīti** niddāyantassapi. “Sarīravayavo” ti pade sāmīyattachattāhi, “āpattiyevā” ti pade sampadānam̃. Lomesu phusantesūti sambandho. “Paribhogasīsenā” ti iminā paribhogam̃ akatvā kenaci kammena sarīravayavena phusantassa anāpattīti dasseti. Hatthatalena phusitum̃ pādatalena phusitum̃ vā akkamitum̃ vāti yathālābhayanā daṭṭhabbā. “Paribhogasīsenā” ti padassa attham̃ dassento āha “mañcapīṭham̃ nīharantassā” tiādi.

Saṅghabhattādiānujānanakathā

325. “Saṅghassa bhatta” nti iminā **saṅghabhattanti** padassa chaṭṭhīsamaṃ dasseti. Saṅghassa atthāya ābhataṃ bhataṃ kātum̃ na sakkontīti yojanā. Uddesabhattantiādisu evamattho vedītabboti yojanā. “Uddesena laddhabhikkhūnam̃ bhataṃ kātu” nti iminā uddesena laddhabhikkhūnam̃ kātabbam̃ bhataṃ **uddesabhattanti** vacanattham̃ dasseti. **Tathevāti** yathā saṅghato uddisitvā laddhabhikkhū, tatheva. **Paricchindivāti** “ekam̃ vā” tiādinā paricchindivā. **Tesanti** laddhabhikkhūnam̃. Iminā nimantevā laddhabhikkhūnam̃ kātabbam̃ bhataṃ **nimantanabhattanti** vacanattham̃ dasseti. “Salākāyo chindivā” ti iminā salākāyo chindivā kātabbam̃ bhataṃ **salākabhattanti** vacanattham̃ dasseti. Pakkhikanti uposathikanti pāṭipadikanti evam̃ niyāmetvāti yojanā. Pañcamīādisu pakkhesu kātabbam̃ **pakkhikam̃**. Uposathe kātabbam̃ **uposathikam̃**. Pāṭipade kātabbam̃ **pāṭipadikam̃**, tameva bhataṃ **pāṭipadikabhataṃ**. **Uddesabhataṃ nimantananti** ettha itisaddo ādyattho, uddesabhataṃ nimantanantiādiṃ imaṃ vohāram̃ pattānīti hi attho. Uddesabhattādinīyeva anujānanamakavā kasmā saṅghabhattampi anujānātīti āha “yasmā panā” tiādi. Tattha yasmā sakkhissantīti sambandho. **Teti** manussā. **Tampīti** saṅghabhattampi. Pisaddena uddesabhattādinī apekkhati.

Saṅghabhattādinam̃ vitthāram̃ dassento āha “tatthā” tiādi. Tattha **tatthāti** “saṅghabhataṃ uddesabhata” ntiādi pāṭhe, evam̃ vinicchayo vedītabboti yojanā, saṅghabhattādisu vā niddhāraṇe bhummam̃, bhūñjantānam̃ amhākam̃ ajja dasa dvādasa divasā ahesunti yojanā. **Aññatoti** aññasmā thānā. **Tatthāti** saṅghabhata. **Vattabbāti** manussā vattabbā. **Tanti** saṅghabhataṃ, dhātukammaṃ, “amhāka” nti kāritakammaṃ. **Tanti** saṅghabhataṃ.

Uddesabhatakkathā

Ayam̃ nayo evam̃ vedītabboti yojanā. Raññā vā pahiteti sambandho. **Sace atthīti** sace ṭhitikā atthi. **Uddesakenāti** bhattuddesakena. **Na atikkāmetabbanti** uddesabhataṃ na atikkāmetabbam̃. **Te panāti** piṇḍapātikā pana. **Ṭhitikam̃ ṭhapetvāti** ṭhitikam̃ ṭhitatthāne ṭhapetvā muñcivāti attho. **Tesanti** mahātherānam̃. **Yojanantarikavīhāratopīti** yojanena byavadhāne ṭhitavīhāratopī. **Ṭhitatthānatoti** ṭhitikāya ṭhitatthānato. **Asampattānampīti** bhattuddesatthānam̃ asampattānampī. **Vaḍḍhitā nāma sīmāti** upacārasīmā vaḍḍhitā nāma. **Saṅghanavakassa dinnepi**ti yāva dutiyabhāgo na dātabbo, tāva saṅghanavakassa dinnepi. **Vassaggenāti** gaṇiyatīti gaṃ, vassameva gaṃ **vassaggaṃ**, tena vassaggena, vassagaṇanāyāti vuttam̃ hoti. Yadi “vassagghenā” ti catutthakkharena pāṭho bhavēyya, evam̃ sati vassaparichedenāti attho daṭṭhabbo, ayameva yuttatāro.

Ekasmiṃ vihāreti ekissaṃ vihārasīmāyaṃ. **Tasmiṃyeva bhattuddesaṭṭhāneti** ettha evasaddena aññasmiṃ ṭhāne gāhaṇaṃ paṭikkhipati. **Ekoti** eko dāyako. **Tenāti** pahitabhikkhunā. **So atthoti** so hetu. **Taṃdivasanti** tasmiṃ pahitadivase. **Pamussatīti** satipavāseṇa mussati. **Bhojanasālāyāti** bhattuddesaṭṭhānasāṅkhātāya bhojanasālāya. Yā pakatiṭṭhitikāti yojanā. “Ekābaddhā hontī”ti vuttavacanassa atthaṃ dassento āha “aññamaññaṃ dvādasahatthantaraṃ avijahitvā”ti. **Navam ṭhitikanti** bhattuddesaṭṭhāne ṭhapitapakatiṭṭhitikato aññaṃ navam ṭhitikaṃ. **Hīti** saccaṃ, yasmā vā. **Etanti** uddesabhattaṃ. “Sve”ti niyāmetvā vuttattā dutiyadivase na labbhati.

Kocīti dāyako. **Sakavihāre ṭhitikāvaseneva gāhetabbanti** yaṃ vihāraṃ gacchanti, tattha apaviṭṭhattā sakavihāre ṭhitikāvaseneva gāhetabbaṃ. Dinnaṃ pana bhattaṃ gāhetabbanti sambandho. **Sampattānanti** dinnatṭhānaṃ sampattānaṃ. **Tatthāti** dinnatṭhānaṃ, sampattānaṃyevāti sambandho. **Tassa vihārassāti** pavitṭhavihārassa. **Tasmiṃ tasmiṃ ṭhāneti** gāmadvāravīthicatukkasaṅkhāte tasmiṃ tasmiṃ ṭhāne. **Antoupacāragatānanti** ettha antoupacāro nāma dvādasahatthabbhantaraṃ.

Gāmadvārūpacāra vīthicatukkūpacāra gharūpacāresu tīsu gharūpacārassa viśesaṃ dassento āha “gharūpacāro cetthā”tiādi. **Etthāti** tīsu upacāresu. Gharūpacāro veditabboti sambandho. Eko upacāro etthāti **ekūpacāraṃ** gharaṃ. **Imesanti** catunnaṃ gharānaṃ. **Tatthāti** catūsu gharesu. Ekakulassa yaṃ gharanti sambandho. **Ekavaḷaṅjanti** ekadvāreṇa samānaparibhogaṃ. **Tatthāti** ekūpacāre.

Yaṃ pana ekaṃ gharaṃ katanti sambandho. **Sukhavihāratthāyāti** kalahaṃ vicchinditvā sukhavihāratthāya. **Tasmiṃ tasmiṃ ṭhāneti** bhittiyā paricchinne tasmiṃ tasmiṃ ṭhāne.

Yasmiṃ pana ghare nisīdāpentīti sambandho. Yampi nivesananti yojanā.

Yo pana uddesalābho uppajjati, so pāpuṇātīti yojanā. Kiñcāpi dissanti, tathāpīti yojanā.

Yo panāti bhikkhu pana, labhatīti sambandho. **Aññasmiṃti** attanā aññasmiṃ. **Tenāti** uddesabhattaṃ labhantena bhikkhunā.

Kālaṃ paṭimānentesūti bhojanakālaṃ paṭimānentesu bhikkhūsu, nisinnesūti sambandho. Koci manusso vadatīti sambandho. Saṅghuddesapattaṃ detha itī vāti yojanā. “Eseva nayo”ti iminā pattassa ṭhāne bhikkhuṃ pakkhipitvā vutte atidisati.

Etthāti uddesabhatte, evaṃvacane vā. **Pesaloti** piyasīlo. **Tenāti** uddesakena. Kinti jānātīti āha “dasavassena laddha”nti. **Tassāti** uddesakassa, vacananti sambandho. **Appasaddāti** saṅkassaddā. “Apasaddā”tipi pāṭho, nissaddāti attho. **Sabbanavakassāti** sabbesaṃ bhikkhūnaṃ navakassa. **Chāyāyapi pucchiyamānāyāti** anādare bhummavacanaṃ, sāmivacanaṃ vā. **Na labhatīti** pāpuṇāpitattā na labhati. **Nisinnassāpi niddāyantassāpīti** anādare sāmivacanaṃ, bhikkhussa nisinnassāpi niddāyantassāpīti attho. **Hīti** saccaṃ. Etaṃ bhājanīyabhaṇḍaṃ nāmāti yojanā. **Tatthāti** “sampattasseva pāpuṇātī”ti vacane. **Upacārenāti** dvādasahatthūpacāreṇa. **Tasminti** antoparikkhepe.

Koci upāsako pahiṇātīti sambandho. **Paṇītabhojanānanti** paṇītabhojanehi. **Udakassāti** udakena, pūretvāti sambandho. Āgatā manussāti sambandho. **Yenāti** bhikkhunā. **Yanti** vatthu. **Ticīvaraparivārananti** ticīvareṇa parivāritaṃ, ticīvaraparivāravantaṃ vā uddesabhattanti attho. **Hi** saccaṃ assa bhikkhussa puññaviseso īdisoti yojanā. Nanu udakampissa puññavisesaṃ, kasmā aññaṃ uddesabhattaṃ labhatīti āha “udakaṃ panā”tiādi.

Gahetvā āgatā te manussāti yojanā. **Tesanti** mahātherādīnaṃ. **Daharasāmaṇerehīti** daharehi sāmaṇerehi, laddhesūti sambandho.

Tatthāti uddesabhatte. **Puratoti** mahātherānaṃ purato. **Patteti** saṅghuddesapatte, agāhiteyevāti sambandho. Āhaṭampi uddesabhattanti sambandho.

Eko vadatīti sambandho. **Soti** manusso, bhaṇatīti sambandho. Yathā te rucati, tathā vatvā āharāti yojanā. **Vissatṭhadūto nāmāti** attano ruciṃ vissajjitvā tassa ruciyā vissatṭho dūto nāma. **Paṭipāṭipattam vāti** saṅghato paṭipāṭiyā laddham pattam vā, idam nimantanabhattam sandhāya vuttam. **Yaṃ icchatīti** vissatṭhadūto yaṃ icchati. **Soti** bālo, na vattabboti sambandho. Pucchāsabhāgena vadeyyāti sambandho. **Tatoti** vadanakāraṇā.

Kūṭaṭṭhitikā nāmāti aññehi uddesabhattehi missetvā ujukaṭṭhitikāya pavattitvā kūṭena pavattā ṭhitikā nāma hoti. Tamevattham vitthārento āha “rañño vā hī”tiādi. **Ekacārikabhattānīti** pati ekaṃ katvā caritabbāni bhakkhitabbānīti ekacārikāni, aññehi uddesabhattehi amissetvā pati ekaṃ katvā bhakkhitabbānīti vuttam hoti, tāniyeva bhattāni ekacārikabhattāni. Ekacce bhikkhū gatāti sambandho. **Tesūti** ekaccesu bhikkhūsu. **Taṅkhaṇaṃyevāti** tasmim nisinnakkhaṇeyeva. Puna **taṅkhaṇaṃyevāti** tasmim gāhaṇakkhaṇeyeva. “Paṇītabhatta”nti vutte “kativassato paṭṭhāyā”ti vadanti, “ettakavassato nāmā”ti vutteti yojanā. **Gāhite**ti ṭhitikaṃ ajānantehi āgantukehi patte gāhite. Āgatehipi ṭhitikaṃ jānanakabhikkhūhīti sambandho. Eseva nayo paratopi. **Bhikkhūyeva āgacchantūti** pattam aggahetvā bhikkhūyeva āgacchantūti adhippāyo.

Neti ṭhitikaṃ ajānante āgantuke. **Rājā bhojetvāti** rājā attano gehe bhojetvā. **Nesanti** āgantukānaṃ, pattepiṭi sambandho. **Yaṃ āhaṭanti** yaṃ bhattam abhuñjitvā āhaṭam. **Tam na gāhetabbanti** tam bhattam ṭhitikāya na gāhetabbaṃ thokattā. **Nesanti** āgantukānaṃ. **Gīvā hotīti** iṇam hoti. Iṇam nāma paṭidātabbasabhāvo hoti, tasmā paṭidātabbanti adhippāyo. **Etthāti** ṭhitikaṃ ajānitvā bhuttaṭṭhāne. **Tāva nisīditabbanti** tāva āgametvā nisīditabbaṃ. Pattaṭṭhānena gāhaṇampi gīvāsadisoti purimatherassa mati bhavye. Evañhi sati dvinnaṃ therānaṃ vādo sadiso. yeva.

Eko piṇḍapātoti sambandho. **Tathārūpoti** ticīvaraparivāro satagghanako. **Ayanti** piṇḍapāto. Iti vuttam aṭṭhakathāsu.

Eko bhikkhūti sambandho. **Antarābhaṭṭhakoti** uddesabhattassa antare vemajjhe bhassati galatīti antarābhaṭṭhako. Paripuṇṇavasso yo pana sāmaṇeroti yojanā. Tassa upasampajjitāsāmaṇerassa ṭhitikā atikkantāti sambandho. **Soti** uddesabhattapatto bhikkhu. **Samīpeti** attano samīpe. **Taṅce theyyāya harantīti** tam pattam pattahārakā theyyāya haranti ce. **Gīvā hotīti** pattadāpakassa gīvā hoti. **So bhikkhūti** samīpe nisinno so bhikkhu. **Assāti** pattadāpakassa. “Aya”nti potthakesu pāṭho atthi, so na sundaro. **Tatoti** uddesabhattagharato. “Suhaṭo”ti vacanassa attham dassento āha “bhattassa dinnattā gīvā na hotī”ti.

Sādiyanakoti uddesabhattasādiyanako, hotīti sambandho. Dasahipi pattehi bhattam āharāpetvāti yojanā. **Bhikkhudattiyam nāmāti** bhikkhunā dattiyam nāma. **So bhikkhūti** sādiyanako so bhikkhu. **Te bhikkhūti** piṇḍapātike te bhikkhū. Etha bhante mayham sahāyā hotha iti vatvāti sambandho. **Tassāti** upāsakassa. **Tatthāti** upāsakassa ghare. **Tassevāti** sādiyanakasseva. **Itareti** navapiṇḍapātikā. **Nesanti** dasannaṃ bhikkhūnaṃ. **Tassa bhikkhunoti** sādiyanakassa bhikkhuno. **Bhuttāvīnanti** bhuttavantānaṃ.

Teti navapiṇḍapātikā, vuttā gacchantīti sambandho. **Tatthāti** upāsakassa ghare. **Tatrāti** dasasu bhikkhūsu. Madhurena sarena anumodanaṃ karontassa ekassa dhammakathaṃ sutvāti yojanā. **Akatabhāgo nāmāti** pubbe na kariyitthāti akato, soyeva bhāgo koṭṭhāsoti akatabhāgo, āgantukabhāgo nāmāti attho.

Eko upāsako detīti sambandho. **Imanti** khādanīyabhojanīyam. Pattasāmikassa dātabbanti yojanā. **Ṭhapetvāti** pakatiyā ṭhapetvā. “Sabbo saṅgho bhuñjatū”ti vatvā ca kiñci avatvā ca gatepi paṭhamameva “sabbam saṅghikaṃ pattam dethā”ti vuttattā bhājetvā paribhuñjitabbaṃ.

Pāṭiyā āharitvāti sambandho. **Ekekaṃ ālopanti** ekekassa bhikkhussa ekekaṃ ālopaṃ. **Acchatīti** vasati. **Kassa teti** kassa atthāya tayā, ānīṭanti yojanā. “Ekena bhikkhunā”ti padaṃ “gāhetabba”nti pade kāritakammaṃ, “bhatta”nti dhātukammaṃ tabbapaccayo vadati.

Kiṃ āharīyatīti avatvāti kiṃ vatthu tayā āharīṭīti upāsakaṃ apucchitvā. “Kiṃ āharissasī”tipi pāṭho, kiṃ vatthum tvam āharissasīti attho. Saparivārāya yāguyā ca mahagghānaṃ phalānaṃ paṇīṭanaṃ khajjakānaṃ tathā āveṇikā ṭhitikā kātabbāti yojanā. **Ekā eva ṭhitikā**ti samānā eva ṭhitikā. **Tathā phāṇitassāti** ettha tathāsaddena “ekā eva ṭhitikā vaṭṭatī”ti padaṃ atidisati.

Iti uddesabhattakathāya yojanā samattā.

Nimantanabhattakathā

Nimantanam puggalikaṃ saṅghikaṃcāti duvidham. Tattha puggalikaṃ sandhāya vuttam “puggalikaṃ ce sayameva issaro”ti. “Ettake bhikkhū saṅghato uddisathā”tiādīni avatvā “ettakānaṃ bhikkhūnaṃ bhattam gaṇhathā”ti nimantevā dinnam saṅghikaṃ **nimantanam** nāma. **Etthāti** nimantane. **Piṇḍapāṭikānampi vaṭṭatīti** “bhikkha”nti kappiyavohārena vuttattā piṇḍapāṭikānampi vaṭṭati. **Paṭipāṭiyāti** saṅghato laddhapaṭipāṭiyā. Āgatamanusso vadatīti sambandho. **Vicchinditvāti** “tumhe ca gacchathā”ti vacanam vicchinditvā.

Nimantanabhattagharatoti nimantanabhattassa dinnagharato. Eko āharatīti sambandho. **Pūretvāti** bhattassa pūretvā. **Tanti** bhattam. **Idhāpīti** nimantanepi.

Tatoti vadanakāraṇā. “So bhikkhū”ti padaṃ “assā”ti pade pakatikattā, “jigucchānīyo”ti padaṃ tattheva vikatikattā. **Assāti** bhavēyya, hoti vā. “Pattatthāya āgatomhī”ti vadantassa tassa patto dātabboti yojanā. **Bhattāharaṇakapattanti** bhattam āharati anenāti bhattāharaṇako, soyeva patto bhattāharaṇakapatto, tam. **Paṭipāṭibhattanti** paṭipāṭiyā laddham bhattam.

Ālopabhattatṭhitikatoti ekekaālopa laddhassa bhattassa ṭhitikato. **Ālopasaṅkhepenāti** ekekasmim ālope taṃsaṃkhipanena. Ayam nayo uddesabhattato viseso. **Kassa te ābhatanti** kassa atthāya tayā ābhatanti yojanā. **Saṅghassa me bhattanti** saṅghassa atthāya mayā bhattam ābhatam. **Therānaṃ me bhattanti** therānaṃ mayā bhattam ābhatam.

Upāsako paṇīṭatīti sambandho. **Ime tayo janāti** saṅghatthero ca ganthadhutaṅgavasena abhiññāto ca bhattuddesako cāti ime tayo janā. **Pucchitunti** “kiṃ saṅghato gaṇhāmi, udāhu ye jānāmi, tehi saddhim āgacchāmī”ti pucchitum. Āruhiyitthāti **ārūḷhā**. **Attanavamehīti** attā navamo etesanti attanavamā, tehi bhikkhūhīti sambandho. **Hīti** yasmā. **Ete bhikkhūti** saṅghattherādayo tayo ete bhikkhū. **Tenāti** ganthadhutaṅgādīhi anabhiññātena bhikkhunā paṭipajjitabbanti sambandho. Nissitake vā, ye bhikkhū jānātha, te bhikkhū vā gahetvāti yojanā. Attanā añño gāmo gantabboti sambandho. **Soyeva gāmoti** nimantanagāmoyeva.

Tatrāti asanasālāyam. **Ussavādīsūti** chaṇādīsū. Ādisaddena aññena kenaci kāraṇena manussānaṃ bhusannipātam saṅgaṇhāti. **Tadāti** tasmim nimantanakāle. **Sannipātatṭhānatoti** bhikkhūnaṃ sannipātatṭhānato. **Yathāsattīti** sattiyā anurūpaṃ, sattim anatikkamitvāti attho. Ettha ca sattisaddassa kuntasāṅkhātassa satthassapi vācakattā tam paṭikkhipanto āha “yathābala”nti.

Saṅghatthero vā āgacchantīti sambandho. Bahukattāramapekkhitvā “āgacchantī”ti bahuvacanavasena vuttam. **Ekavāranti** ekasmim divase, āgamanadivaseti attho. **Paṭibaddhakālatoti** tattheva sakaṭṭhāne vāsassa nibaddhakālato. **Dutiyavāreti** dutiyadivase. **Abhinavaāgantukāvāti** anāgamanapubbā abhinavā āgantukāva. **Tatrāti** tasmim pattatṭhāne. **Tesanti** abhinavaāgantukānaṃ.

Etthāti anāgatapubbaṭṭhāne.

Sabbatthāti sabbesu sakaṭṭhānāāgantukaṭṭhānesu. **Tenāti** atilābhina bhikkhunā. **Avisesetvāti** visesamakavā.

Salākabhattakathā

Salākabhattam pana evam veditabbanti yojanā. “Vacanato” ti padaṃ “dātabbā” ti pade ñāpakahetu. **Salākāya vāti** kusadaṇḍe vā. **Asukassa nāmāti** asukassa nāma upāsakassa. **Upanibandhitvāti** likhitvā, chinditvāti attho. “Opunjitvā” ti padassa attham dassento āha “punappunam heṭṭhupariyavasena āloḷetvā” ti. Bhattuddesakena dātabbāti sambandho.

Na bahukāti appakā. **Gānavasenapīti** yebhuyyena samānalābhagāmavasenapi. Pisaddena kulam apekkhati. Gāhentena gāhitānevāti sambandho. Saṭṭhisalākabhattāni hontīti yojanā. **Tesanti** dvinnam tiṇṇam salākabhattānam.

Tanti bahusalākabhattagāmaṃ. **Tam panāti** ekasalākabhattam pana. **Etesūti** bhikkhūsu. **Niggahenāti** dūrattā anicchantassapi ekassa niggahena. **Tanti** salākabhattam. **Orimagāmeti** orabhāge ṭhite gāme. **Gāhitasaññāyāti** gāhitā iti saññāya. **Puna vihāram āgantvāti** puna vihāram anāgantvā orimagāme salākabhattāni paṭhamam gahetvā pacchā vihāram āgantvā attano pāpetvā bhuñjitumpi vaṭṭati. Kasmā puna vihāro āgantabbo, nanu agāhitopi attano pattattā gahetvā bhuñjituṃ vaṭṭatīti āha “na hī” tiādi. **Hi** yasmā bahisīmāya saṅghalābho gāhetuṃ na labbhati, tasmā vihāro āgantabboti yojanā. **Ekabāhavasena vāti** ekāya gharapāḷisankhātāya bāhāyavasena vā. **Vīthiādīsu cāti** vīthibāhakulesu ca, niddhāraṇe bhummaṃ. **Yatthāti** yasmim ṭhāne. Salākāsu **asati** asantāsūti yojanā. **Uddisitvāpīti** “asukagāmassa salākabhattāni tuyham pāpuṇantī” ti gāmādīni uddisitvāpi.

Tamevattham vitthārento āha “tena hī” tiādi. Tattha **tenāti** salākadāyakena bhikkhunā. Gāhetabbanti sambandho. **Vāragāmeti** atidūrattā varena gantabbe gāme. **Tatrāti** tam gāmaṃ.

Atirekagāvuteti gāvutato atireke ṭhāne. **Tamdivasanti** tasmim salākabhattagahaṇadivase. Yo na gacchati, tassa na dātabbāti yojanā. **Hīti** yasmā. **Tīpi pana divasānīti** accantasamyoge cetam upayogavacanam. **Tanti** orimavāragāmasalākam. Daṇḍakammaṃ pana kinti gāḷham kātabbanti āha “saṭṭhito vā paṇṇāsato vā na parihāpetabba” nti. **Vihāravāroti** vihārassa rakkhanatthāya vāro. **Vihāravārikassāti** vihāram varena, vāram gahetvā vā rakkhatīti vihāravāriko, tassa dātabbāti sambandho. **Vihāragopakāti** vihāram gopentīti vihāragopakā. **Aññathattanti** pasādaññathattam. **Aññesu kulesu dātabbāti** aññesaṃ kulānam yāguādayo dātabbā.

Vāram gāhetvāti aññehi vāram gāhāpetvā. **Nesanti** vihāravārikānam. **Salākāti** pakatikattāram apekkhitvā “bhavanti” ti bahuvacanavasena vuttam. **Phātikammamevāti** vihārarakkhanatthāya saṅghena dātabbaphātikammameva. **Aññampīti** pisaddena na kevalam phātikammameva, aññampīti dasseti. **Atirekauttaribhaṅgassāti** atirekam uttaribhaṅgametassāti atirekauttaribhaṅgam, tassa.

Salākā laddhāti salākā eva laddhā. **Tamdivasanti** tasmim salākā laddhadivase. **Ekassevāti** ekekasēva. **Vijaṭetvāti** tāni dve tīpi ekacārikabhattāni vijaṭam nigumbaṃ katvā.

Ekasambhogāti ekato sambhogā. Gāhentena dātuntī sambandho. **Sammukhībhūtassāti** upacārasīmāyam ṭhitassa yassa kassaci, pāpetvāti yojanā. **Rasasalākanti** ucchusalākam. “Rasālasalāka” ntipi pāṭho, ayamevattho. Khuddakavihāre gāhetabbavidhānam dassetvā mahāāvāse tam dassento āha “mahāāvāse” tiādi.

“Takkasalākampi ...pe... dātuṃ vaṭṭati”ti idaṃ khuddakavihāraṃ sandhāya vuttaṃ, tena vuttaṃ “mahāvāse”tiādi. **Bhesajjādisalākāyoti** ettha ādisaddena gandhamālāsālākāyo saṅganhāti. **Etthāti** salākāsu. **Aggabhikkhamattanti** aggato dātabbaṃ bhikkhāmatṭaṃ. **Tādisāni bhattānī** aggabhikkhāmatṭasabhāvāni bhattāni. **No ceti** tādisāni bhattāni bahūni no ce honti. **Laddhā vā aladdhā vāti** labhitvā vā alabhitvā vā.

Salākāsu gāhitāsūti aññāsu salākāsu gāhitāsu. **Samīpe ʘhitassāti** hatthaṃ apasāretvā samīpe ʘhitassa. **Assāti** bhikkhussa. **Ayaṃ salākāti** “ayaṃ tassa salākā”ti ʘhabetuṃ vaṭṭati. **Adhammikāti** katikā adhammayuttā. **Anāgatassa dethāti** anāgatassa bhikkhussa salākāṃ detha.

Soti bhattuddesako, vadeyyāti sambandho. Mayā mayhaṃ pāpitanti sambandho. **Tatthāti** gāme. Bhuñjeyyātha iti vadeyya, vaṭṭatīti yojanā. **Tatthevāti** asanasālāyameva. **Tatrāti** tasmīṃ gāme. **Vihāraṃ ānetvāti** vihāraṃ salākabhattāṃ ānetvā. **Salākaggāhaṇakāleti** salākāya bhikkhūhi gāhāpanakāle.

Tatthāti tasmīṃ disābhāge. **Aññenāti** attanā aññena, laddhā hotīti sambandho. **Tena panāti** gamikato itarena. **Tasminti** gamike. Upacārasīmaṃ anatikanteyevāti yojanā.

Tatthāti chaḍḍitavihāre. **Tesūti** āvāsikesu bhikkhūsu, gatesūti sambandho. **Sovāti** āgantuko eva. Yo pana gacchatīti sambandho. **Tanti** salākabhattāṃ, na pāpuṇatīti sambandho.

Puññenāti puññasmā. **Tā ca kho panāti** salākāyo pana. **Pacchiṃ panāti** salākāpacchiṃ pana. **Tatthāti** pacchiyaṃ. **Ettovāti** ākīraṇaṭṭhānatova. **Ekanti** ekaṃ salākāṃ. **Vattabbanti** salākādāyakena vattabbaṃ.

Bhikkhū gatāti sambandho. **Tatthāti** aññasmiṃ vihāre. Mahātheropi gacchatīti sambandho. Gatavihāre abhuñjitvāva gocaragāmaṃ anuppattehi bhikkhūhi pattā na dātabbāti yojanā. **Vihāraṭṭhakaṃ bhattanti** vihāre ʘhitaṃ bhattāṃ.

Pakkhikabhattādikathā

Yanti bhattāṃ diyyatīti sambandho. Cātuddasīpañcaddasīpañcamīaṭṭhamīti abhilakkhitesūti yojanā. **Kammappasutehīti** kammūpacayehi. Imehi pāṭhehi pakkhesu dātabbaṃ **pakkhikanti** vacanatthaṃ dasseti. **Tanti** pakkhikabhattāṃ. “Hotī”ti pade vuttakattā, “gāhetvā”ti pade dhātukammaṃ, “bhuñjitabba”nti pade vuttakammaṃ. **Sabbesanti** bhikkhūnaṃ. **Yesanti** bhikkhūnaṃ. **Mandāti** appā. **Tanti** salākabhattāṃ. **Paṇītaṃ dentīti** paṇītaṃ katvā denti. **Lūkhabhattanti** asiniddhabhattāṃ.

Yaṃ bhattāṃ attanā bhuñjati, tadeva diyyatīti yojanā. Iminā uposathe dātabbaṃ **uposathikanti** vacanatthaṃ dasseti. **Uposatheti** uposathadivase. Ettha ca pañcaddasiyaṃ sace dāyaka “pakkhika”nti vatvā denti, **pakkhikaṃ nāma**. Atha “uposathika”nti vatvā denti, **uposathikaṃ** nāmāti viseso. **Pāṭipadeti** pāṭipadadivase. **Uposathakammenāti** uposathakammena hetubhūtena. “Pāṭipade diyyanakadāna”nti iminā pāṭipade dātabbaṃ **pāṭipadikanti** vacanatthaṃ dasseti. **Tampi ubhayanti** uposathikapāṭipadikavasena ubhayampi taṃ bhattāṃ. **Iti imānīti** ettha imasaddena itisaddassa imasaddatṭhabhāvo dassito hoti. **Sattapi bhattānīti** imasmīṃ senāsanakkhandhake āgatāni saṅghabhattādīni sattapi bhattāni.

Aparānipi cattāri bhattānīti sambandho. **Tatthāti** catūsu bhattesu. “Āgantukānaṃ dinna”ntiādinā **āgantukabhattanti** padassa catutthīmajjhelopasamāsaṃ dasseti. Aññattha pana “āgantukassa atthāya ābhata”ntiādinā chaṭṭhīmajjhelopasamāsaṃ dasseti. **Etthāti** catūsu bhattesu. **Sabbesanti** bhikkhūnaṃ. Eko āgantuko nisīdatīti sambandho. **Tenāti** paṭhamaāgantukena.

Yoti āgantuko. **Āgantvāpīti** pisaddo garahattho, pacchā pana pagevāti attho. Tena gaṇhitabbanti yojanā. “Āgatadivasevā”ti iminā na dutiyadivasādīsu bhuñjitabbanti dasseti.

Katthacīti kiñci thānaṃ. **Tanti** āgantukabhattaṃ. **Nibandhāpitanti** niccaṃ thapitaṃ. **Asanasālāyanti** antogāme asanasālāyaṃ. **Asatīti** asantesu.

Āvāsikopīti pisaddo na gamikoyevāti dasseti. Yathā āgantukabhattaṃ dve vā tīṇi vā satta vā divasāni labbhāti, evaṃ idaṃ gamiyabhattaṃ na labbhātīti yojanā. **Panthanti** maggaṃ. **Rundhantīti** pidahanti. Udakaṃ vā rundhatīti sambandho. **Ete upaddaveti** corādayo ete upaddave. **Oḍḍetvāti** thapetvā.

Etassāti mahāgilānassa. Puna **etassāti** anāgatassa mahāgilānassa. **Sappāyabhojananti** gilānānaṃ sappāyabhojanaṃ. **Missakayāgunti** nānātaṇḍule missetvā pacitaṃ yāguṃ. **Na kuppātīti** na vikāraṃ karoti.

Idampīti gilānupaṭṭhākabhattampi. **Tatthāti** tasmim kule. **Assāti** gilānassa. **Evaṃ dinnānīti** evaṃ vakkhamānanayena dinnāni honti. **Piṇḍapātīkānampi vaṭṭatīti** “bhikkha”nti kappiyavohārena vuttattā piṇḍapātīkānampi vaṭṭati. **Na vaṭṭatīti** “bhatta”nti akappiyavohārena vuttattā na vaṭṭati.

Aparānīpi tīṇi bhattānīti sambandho. **Tatthāti** tīsu bhattesu. **Dhurabhattanti** ettha dhurasaddassa dhuvasaddena atthato sadisattā niccatthoti āha “niccabhattaṃ vuccatī”ti. **Tanti** dhurabhattaṃ. **Tatthāti** duvidhesu. “Saṅghike”ti pāthaseso yojetabbo. **Puggalikepīti** pisaddo “saṅghike”ti padaṃ apekkhāti. **Pacchāti** paṭhamam “bhikkhaṃ gaṇhathā”ti vuttavacanato, vuttavacanassa vā paraṃ.

Kuṭim katvā dātabbam bhattaṃ **kuṭibhattanti** dassento āha “kuṭibhattaṃ nāmā”tiādi. **Yanti** bhattaṃ, nibandhāpitanti sambandho, senāsanavāsino bhikkhūti sambandho. **Yaṃ panāti** bhattaṃ pana, dinnanti sambandho. **Tassevāti** puggalasseva. **Tasminti** puggale.

Vārena, vāraṃ gahetvā vā dinnam bhattaṃ **vārabhattanti** dassento āha “vārabhattaṃ nāmā”tiādi. **Tampīti** vārabhattampi. Nigamanavasena sampiṇḍetvā dassento āha “**īti imāni cā**”tiādi.

Aṭṭhakathāyanti mahāaṭṭhakathāyaṃ, vuttānīti sambandho. **Tatthāti** catūsu bhattesu. Vihāre uppannam bhattaṃ **vihārabhattanti** dassento āha “vihārabhattaṃ nāmā”tiādi. **Tatruppādabhattanti** tasmim vihāre dinnakhattavattuādīhi uppādabhattaṃ. **Tanti** vihārabhattaṃ. **Yathāti** yenākārena, paṭiggahiyamāneti sambandho. Aṭṭhannaṃ samūho, aṭṭha parimāṇāni yassāti vā **aṭṭhako**, tassa dinnam bhattaṃ aṭṭhakabhattaṃ. Evaṃ **catukkabhattanti** ethāpi. Tamevatthaṃ dassento āha “aṭṭhannaṃ bhikkhūnaṃ demā”tiādi. **Mahābhisaṅkhārikenāti** sabbanonītādīhi mahanto abhisaṅkhāro mahābhisaṅkhāro, so etassa atthīti mahābhisaṅkhāriko, tena atirasakapūvena patte pakkhipitvāti sambandho. “Thaketvā dinna”nti iminā gūhitvā dātabbam **gulhakaṃ**, tameva bhattaṃ **gulhakabhattanti** vacanatthaṃ dasseti.

Idhāti imasmim loke. Ekacce manussā dentīti sambandho. “Bhikkhuparicchedajānanatthaṃ gulake dentī”ti iminā gulakena bhikkhū gaṇetvā dātabbam bhattaṃ **gulakabhattanti** vacanatthaṃ dasseti. Ettha ca purimanaye lakāre hakārasamyogo atthi, pacchimanaye natthīti daṭṭhabbam. Gulapiṇḍagaṇānāya bhikkhugaṇānaṃ jānāti. **Itīti**ādi nigamaṃ. Cīvarabhājanīyaṃ vuttanti sambandho.

Sabbiādīsu bhesajjesūti niddhāraṇe bhummaṃ, “sabbissā”ti padaṃ “kumbhasatampī”ti pade nissitasambandho.

Pacchā āgatānaṃ dātabbamevāti dutiyabhāge adātabbeyeveva pacchā āgatānaṃ dātabbameva.

Sabbasannipātaṭṭhāneyevāti sabbesaṃ bhikkhūnaṃ sannipātaṭṭhāneva. Bhājanīyabhaṇḍaṃ nāma bhājanaṭṭhānaṃ sampattasseva pāpuṇāti, na asampattassa. Sabbasannipātaṭṭhāne ca yebhuyyena sampatto hoti, tena vuttaṃ “sabbasannipātaṭṭhāneyevā”ti.

Yathāṭṭhitāmyevāti kiñci abhājetvā yathāṭṭhitāmyeva. “Duggahita”nti vatvā tadatthaṃ dassento āha “taṃ gatagataṭṭhāne saṅghikameva hoti”ti. **Āvajjetvā**ti pariṇāmetvā. **Tampī**ti thālake pakkhittaṃ sabbimpi. **Thinanti** ghanabhāvena tiṭṭhatīti thinaṃ, ghananti vuttaṃ hoti. **Vuttaparicchedatoti** “dasa bhikkhū, daseva ca sabbikumbhā”ti vuttaparicchedato.

Gāthāyaṃ **pālī**nti vinayapālīṃ. **Aṭṭhakathañcevā**ti tassā aṭṭhakathañceva. **Vicakkhaṇoti** vividhaṃ atthaṃ cakkhati passatīti vicakkhaṇo. **Evanti** yathāvuttanayena. Tatrāyaṃ yojanā – evaṃ vicakkhaṇo bhikkhu pālīṃ, aṭṭhakathañceva oloketvā appamattova hutvā saṅghike paccaye bhājayeti.

Iti paccayabhājanīyakathāya yojanā samattā.

Upaḍḍhabhāgoti bhikkhūnaṃ laddhabhāgato upaḍḍho bhāgo. Sesāṃ suviññeyyameva.

Iti senāsanakkhandhakavaṇṇanāya yojanā samattā.

7. Saṅghabhedakakkhandhakaṃ

Chasakyapabbajjākathā

330. Saṅghabhedakakkhandhake **abhiññātā abhiññātā**ti ettha abhipubbo ñātasaddo pākaṭatthoti āha “pākaṭā pākaṭā”ti. **Kāḷudāyippabhūtayoti** kāḷudāyīdayo. Parivārehi saddhiṃ dasa dūtā ca aññe ca bahū janā sakyakumārā nāmāti yojanā. **Amhesūti** sakyakulasāṅkhātesu amhesu, niddhāraṇe bhumbaṃ. Iminā pāṭhasesaṃ dasseti. “Kulato”ti iminā “**kulā**”ti ettha nissakkatthe nissakkavacananti dasseti. **Gharāvāsattanti** ettha ghare āvasantānaṃ manussānaṃ kiccanti dassento āha “gharāvāse ya”ntiādi. Tattha **yanti** yaṃkiñci. **Udakaṃ ninnetabbanti** ettha udakaṃ nīharitvā netabbaṃ apānetabbanti dassento āha “yathā udakaṃ sabbatṭhānesu susaṃ hoti”ti. **Susanti** sukkhaṃ. **Tiṇānti** sassadūsakāni tiṇāni. “Uddharitabbānī”ti iminā **niddhāpetabbanti** ettha dhudhātuyā papphoṭanadhamsanathe dasseti. **Bhusāti** sassanāḷadaṇḍā, tehi missā palālā **bhusikā**. **Ophuṇāpetabbanti** ettha phuṇadhātuyā avakiraṇatthaṃ dassento āha “apānetabba”nti. **Tvaññeva gharāvāsattena upajānāti** ettha **gharāvāsattentā**ti upayogathe karaṇavacanāṃ. **Upajānāti** upatyūpasaggo dhātuvatthānūvattako, hivibhatti ca lopo hoti, tena vuttaṃ “tvaññeva gharāvāsattam jānāhi”ti. **Ahanti** bhaddiyakumāranāmako ahaṃ. **Tayāti** anuruddhakumāranāmakena tayā. “Saddhiṃ pabbajissāmī”ti iminā pāṭhasesaṃ dasseti. **Sesanti** “saddhiṃ pabbajissāmī”ti vacanaṃ.

331. Nippātītāti ettha nikkhamitvā gamāpitāti dassento āha “nikkhāmitā”ti. **Mānassinoti** ettha mānaṃ sayanti nissayantīti mānassinoti dassento āha “mānassayino”ti.

332. Yassantarato na santi kopāti ettha antarasaddo cittavācako, topaccayo ca sattamyatthavācako dassento āha “yassa citte”ti. Kasmā kopā na santīti āha “tatiyamaggena samūhatattā”ti. Anāgāmimaggena dosassa samūhatattā yassa khīṇāsavassa citte kopā na santīti adhippāyo. **Iti bhavābhavatañca vītivattoti** ettha atthaṃ dassento āha “yasmā panā”tiādi. Tattha yasmā pana vuccati, tasmā evamattho daṭṭhabboti yojanā. Vibhavoti pāpaṃ vuccatīti sambandho. Nanu pālīyaṃ “vibhavo”ti natthi, “abhavo”ti eva atthi, atha kasmā “vibhavoti abhavo”ti vuttanti āha “vibhavoti ca abhavoti ca atthato ekamevā”ti. Iminā saddatoyeva nānanti dasseti. Yā esā bhavābhavata vuccatīti sambandho. “Anekappakārā”ti iminā itisaddassa pakāratthaṃ dasseti. Catūhipi maggehi vītivattoti sambandho. **Tassāti** khīṇāsavassa.

333. Ahimekhalikāti mekhalā viya mekhalikā, ahimeva mekhalikā ahimekhalikā. Tamevattham dassento āha “ahim kaṭiyaṃ bandhitvā”ti.

334. Sammānetīti ettha “sammānetī”ti curādigaṇikadhātuvasena vattabbe divādigaṇikadhātuvasena vuttanti dassento āha “sammānetī”ti. Acinteyyo hi pāḷinayo. **Sammānetī**ti sammānaṃ karoti. **Yanti** kammaṃ. **Soti** satthā. Iminā **yaṃ tumoti** ettha **tumoti** ruḷhīsaddo idha “so”ti sabbanāmasaddena sadisatthoti dasseti.

Pakāsanīyakammādikathā

336. “Kheḷasadisā”ti iminā micchājīvena uppannapaccayānaṃ sadisūpacārena kheḷabhāvaṃ dasseti. Tasmā kheḷā viyāti **kheḷo**, micchājīvapaccayā, kheḷe asati bhakkhati ajjhoharatīti **kheḷāsakoti** vacanattho kātabbo. Etarahi pāḷiyaṃ, aṭṭhakathāyañca “**kheḷāpakassā**”ti oṭṭhajena paṭhamakkharena pāṭho atthi.

340. Patthaddhenāti ettha bhūso thaddho patthaddho, bāḷhathaddhoti attho. Tena vuttam “niccalenā”ti. **Potthakarūpasadisena**ti ettha potthakarūpaṃ nāma vatthadantādimaṃ, tena sadiso potthakarūpasadiso, tena.

342. Rājañātakā nāmāti ettha raññā jāniyanti “amhākaṃ garū”ti **rājañātā**, teyeva **rājañātakā**ti attho daṭṭhabbo. Tadattham adhippāyena dassento āha “rājā amhe jānātī”tiādi. **Pahaṭṭhakaṇṇavāloti** pahaṭṭho kaṇṇo ca vālo ca etassāti pahaṭṭhakaṇṇavālo. **Bandhaniccaleti** rajjuvallihi bandho viya niccale, pahaṭṭhakaṇṇavāleti sambandho. “Katvā”ti iminā “abhidhāvī”ti pade kiriyāvisesanabhāvaṃ dasseti.

Dukkhañhi kuñjara nāgamāsadoti ettha kuñjarasaddassa āmantanapadabhāvaṃ āvikaronto āha “bho kuñjarā”ti. Nāgasaddassa ahināgahatthināgesu pavattanato vuttam “buddhanāga”nti. **Āsadoti** padassa ākodhena sadanaṃ upagamaṃ āsadoti dassento āha “vadhakacittena upagamaṃ nāmā”ti. **Dukkham** etarahi ca āyatiñca dukkhakāraṇaṃ. **Dukkham hīti** hisaddo padapūraṇamattam, aha vā dukkhamevāti attho. “Buddhanāgaṃ ghātakassā”ti iminā nāgaṃ hanatīti **nāgahatoti** vacanattham dasseti.

Paṭikuṭiyova osakkīti ettha tathāgatassa paṭimukhaṃ kuṭena gamanametassāti **paṭikuṭiyō**, paṭikuṭiyō eva hutvā osakkīti dassento āha “tathāgatābhimukhoyeva piṭṭhimehi pādehi osakkī”ti. “Na jānātī”ti iminā lakkha dassanañkesūti dhātupāṭhesu (pāṇinī 1539 saddanītidhātumālāyaṃ 18 dakārantadhātu) vuttessu atthesu idha dassanatthoti dasseti. **Na lakkhitabboti** aññehi sappurisehi na lakkhitabboti attho. Ettha ṇyapaccayo kattukammesu hoti, yakārassa kakāraṃ katvā **alakkhikoti** vuttam.

343. “Bhuñjitabbabhojana”nti iminā **tikabhojananti** ettha yupaccayassa kammattabhāvaṃ dasseti. **Tanti** tikabhojanaṃ. **Yathādhammoti** “gaṇabhojane pācittiya”nti (pāci. 209) vuttāya mātikāvibhaṅgapāḷiyā anurūpaṃ. **Pañcavatthuyācanakathā**ti pañca vatthūni yācanassa kathā. **Āyukappanti** avīcimahāniraye āyukappaṃ sandhāya vuttam. Avīcimahāniraye āyukappo nāma eko antarakappoti jinālaṅkāraṭīkādisu (mi. pa. 4.1.3; kathā. aṭṭha. 654-657; itivu. aṭṭha. 18; sāraththa. ṭī. cūlavagga 3.343; a. ni. ṭī. 3.662) vutto. “Eko asaṅkhyeyyakappo”ti sammohavinodanādisu (vibha. aṭṭha. 809; ma. ni. aṭṭha. 3.128; vi. vi. ṭī. 1.410; vajira. ṭī. pārājikaṇḍa 410) vutto. **Seṭṭham puññanti** mahantaṃ puññaṃ. Iminā **brahaṃ puññanti** brahasaddo mahantatthoti dasseti. Braha vuddhiyanti dhātupāṭhesu (pāṇinī 735; saddanītidhātumālāyaṃ 16 hakārantadhātu) vuttatā brahasaddo mahantavācako hoti. Brahadhātuto apaccayaṃ katvā “**brahā**”tipi, mapaccayaṃ katvā “brahmā”tipi pāṭho atthi. **Āyukappamevāti** saggesu āyukappameva.

Saṅghabhedakathā

344. Soti devadatto, gato kirāti sambandho. **Tatthevāti** vihārasīmāyameva. **Āveṇikanti** bhikkhusaṅghato āveṇikaṃ.

345. **Āgilāyatīti** ettha ātyūpasaggo abhibhavanattho, giledhātu bādhanatthoti āha “vedanābhībhūtā bādhatī”ti. **Tanti piṭṭhiṃ.** Parassa cittaṃ ādisitvā desayati etāyāti **ādesanā**, sā eva pāṭihāriyaṃ **ādesanāpāṭihāriyaṃ.** Anusāsati etāyāti **anusāsani**, imamevatthaṃ dassento āha “evampi te”tiādi.

346. **Mamānukrubbanti** ettha anutyūpasaggo anukiriyattho karadhātu antapaccayo gacchantādigaṇoti dassento āha “mamānukiriyam kurumāno”ti. “Dukkhitō”ti iminā **kapaṇoti** ettha kapadhātu himsanatthoti dasseti. **Mahāvarāhassāti** varāhasaddassa sūkaratthaṃ paṭikkhipanto āha “mahānāgassā”ti. “Pathavi”nti iminā **mahiṃ vikubbatoti** ettha mahāsaddassa evaṃnāmakaṃ mahānadiṃ paṭikkhipati. “Padālentassā”ti iminā karadhātuyā vityūpasaggavasena padālanatthaṃ dasseti. **Bhisam ghasamānassāti** ettha mānasaddo katvatthoti āha “bhisam ghasantassā”ti. **Ghasantassāti** bhakkhantassa. Nadīnāmakaṃ taṃ pokkharaṇinti yojanā. Iminā **nadisu jaggatoti** ettha nadī nāma pokkharaṇīti dasseti. **Jaggatoti** hatthiyūthaṃ pālentassa.

347. “Sutāti sotā”ti iminā pāḷiyā dvidhābhāvaṃ dasseti. “Nissandeho”ti iminā **asandiddhoti** ettha dihadhātuṃ dasseti, disadhātuṃ nivatteti.

350. **Buddhasahassenapīti** pisaddo garahattho, pageva ekena buddhenāti dasseti.

“Satto”ti iminā kocisaddassa padhānapadaṃ dasseti. **Aṭṭhāti** ākhyātapadassa atthaṃ dassento āha “ṭhito”ti. Devadattoti me sutanti ettha “me”ti padaṃ bhagavantaṃ sandhāya vuttanti āha “bhagavatā”ti. **Tadevāti** sutameva. **Idanti** “devadattoti me suta”nti vacanaṃ. **Anucinātīti** anuvaḍḍheti. “Patvā”ti iminā **āsajjananti** ettha sadadhātuyā gatyatthaṃ, kiriyāvisesanañca dasseti. **Avīcinirayaṃ pattoti** ettha idāni na devadatto avīcinirayaṃ patto hoti, āyatim pana avīciniraye avassambhāvīyattā “avīcinirayaṃ patto”ti vuttanti āha “āsamsāyaṃ atītavacana”nti. **Āsamsāyanti** avassambhāvīyatthe. Bhesmā hi udadhī mahāti ettha **bhesmāsaddo** bhayānakapariyāyoti āha “bhayānako”ti.

Upālīpañhākathā

351. **Ekatotī** ettha topaccayassa sattamyatthe pavattabhāvaṃ dassento āha “dhammavādīpakkhe”ti. “Anunayanto”ti iminā **anussāvetīti** ettha anusaddassa atthaṃ dasseti. **Anunayantoti** punappunaṃ nayanto. Sāvanākāraṃ dassento āha “na tumhākaṃyevā”tiādi. Ayaṃ adhammo vā ayaṃ avinayo vā idaṃ asatthusāsanam vā yadī bhaveyyāti yojanā. “Bodhetī”ti iminā **sāvetīti** ettha sudhātuyā atthaṃ dasseti. “Anussāvetvā”ti iminā “anussāveti, salākaṃ gāhetī”ti ettha anussāvanakiriyā pubbhāge pavattā, salākaggāhakeriyā pacchābhāgeti dasseti.

Ettāvatāti ettakena anussāvanasalākaggāhamattena. Na pana saṅgho bhinno hoti, anussāvetvā salākaṃ gāhetvā āveṇikaṃ saṅghakamme kateyeva saṅgho bhinno hotīti adhippāyo.

Ettha ṭhatvā kassaci codakassa anuyogo siyāti yojanā. Kinti siyāti āha “evaṃ devadatto”tiādi. Tattha **evanti** pakatatte saṅghe bhinde satīti attho. **Kathanti** kenākārena. Puna **kathanti** kasmā kāraṇā. **Raṇṇoti** ajātasatturaṇṇo, kāritakammaṃ. “**Ghātāpitattā**”ti bimbisārārājānaṃ ghātāpitattā. **Tatthāti** “bhikkhu kho upālī”tiādivacane, ṭhatvā parihāraṃ vadāmāti yojanā. **Viraddhattāti** virādhitattā. Tamatthaṃ vitthārento āha “tena hī”tiādi. Tattha **tena hīti** uyyojanatthe nipāto. **Evañhīti** evameva. **Tassāti** devadattassa. **Kumāro panāti** ajātasattukumāro pana, katamatteyeva na vuttāti sambandho. **Tassāti** devadattassa. **Tasmāti** yasmā saṅghabhedaṃ pubbe ruhituppādakammaṃ karontassāpi pacchā abhabbhāvo ropito, tasmā.

Bhedakaravatthūsu evaṃ vinicchayo veditabboti yojanā. Dhammādhammādīnaṃ suttantavinayapariyāyena visesaṃ dassento āha “suttantapariyāyena”tiādi. Tattha **suttantapariyāyena**ti suttantadesanāya, suttantadesanāyatatoti vuttaṃ hoti. **Tathā**ti tato aññathā.

Tatthāti dvīsu dhammādhammesu. **Evaṃ amhā**kanti evaṃ kariyamāne amhākaṃ. Evaṃ suttantapariyāyena dhammādhammānaṃ visesaṃ dassetvā idāni vinayapariyāyena tesam taṃ dassento āha “vinayapariyāyena panā”tiādi. Bhūtena vatthunā kātabbanti sambandho. Evaṃ “abhūtena vatthunā”ti etthāpi.

Evaṃ dvinnaṃ pariyyāyānaṃ vasena dhammādhammadukassa visesaṃ dassetvā idāni vinayāvinayadukassa visesaṃ dassento āha “suttantapariyāyena”tiādi. Tattha suttantanayena rāgādayo vinetīti **vinayo**, vinayanayena kāyaṃ vācaṃ vinetīti **vinayoti** vacanattho kātabbo.

Evaṃ dvinnaṃ pariyyāyānaṃ vasena vinayāvinayadukassa visesaṃ dassetvā idāni bhāsītābhāsīdadukassa visesaṃ dassento āha “suttantapariyāyena cattāro satipaṭṭhānā”tiādi. Tattha “aṭṭhaṅgiko maggo”ti idaṃ vacanaṃ tathāgatena bhāsitaṃ lapitanti yojanā.

Evaṃ dvinnaṃ pariyyāyānaṃ vasena bhāsītābhāsīdadukassa visesaṃ dassetvā idāni āciṇṇānāciṇṇadukassa visesaṃ dassento āha “suttantapariyāyena devasika”ntiādi. Tattha “devasika”nti padaṃ “samāpajjanaṃ, volokana”nti tīsuyeva padesu yojetabbaṃ. **Aṭṭhuppattivase**nāti kāraṇuppattivase. Kāraṇāñhi arati phalaṃ etasmāti **atthoti** vuccati, atthassa uppatti atthuppatti, sāyeva aṭṭhuppatti tthakārassa tthakāraṃ katvā, aṭṭhuppattiyā vaso aṭṭhuppattivaso, tena. Idaṃ padaṃ “suttantadesanā jātakakathā”ti dvīhipi padehi yojetabbaṃ. **Idanti** phalasaṃpattisaṃpajjanādi. **Āciṇṇanti** ā bandhitam, punappunaṃ vā upacitam vaḍḍhitam, paṇaṃ vā. **Cāriyapakkamananti** cāriyattham pakkamaṃ.

Evaṃ dvinnaṃ pariyyāyānaṃ vasena āciṇṇānāciṇṇadukassa visesaṃ dassetvā idāni paññattadukassa visesaṃ dassento āha “suttantapariyāyena cattāro satipaṭṭhānā”tiādi. Taṃ bhāsītābhāsīdadukasadisameva. Evaṃ dvinnaṃ suttantavinayapariyāyānaṃ vasena pañcannaṃ dukānaṃ viseso dassito.

Āpattānāpattiduke “na mocanādhippāyassā”ti pāṭhassa anantare pacchimavākye tthito ādisaddo ānetabbo. Iti ādinā nayanāti hi attho. **Tattha tatthā**ti tasmim tasmim sikkhāpade. Idaṃ padaṃ pacchimavākyepi anuvattetabbaṃ.

Lahukagarukaduke **pañcāpattikkhandhāti** thullaccayapācittiyapāṭidesanīyadukkaṭṭadubbhāsītasvasena pañca āpattirāsayo. **Dve āpattikkhandhāti** pārājikasaṅghādisesavasena dve āpattirāsayo.

Sāvasesānāvasesaduke cha āpattikkhandhāti pārājikāpattito avasesā cha āpattirāsayo.

Duṭṭhullāduṭṭhulladuke lahukagarukadukasadisameva. Ayaṃ pana viseso – garukāpatti **duṭṭhullā** nāma, lahukāpatti **aduṭṭhullā** nāmāti evaṃ vinayapariyāyavaseneva catunnaṃ dukānaṃ viseso dassito.

Etthāti “adhammaṃ dhammoti dīpentī”tiādivacane. **Catunnaṃ saṅghakammānanti** apalokaṇādivasena catunnaṃ saṅghakammaṃ. **Karontehi** hetubhūtehi, hetvatthe cetam karaṇavacanaṃ.

Tatthāti “te imehī”tiādivacane. **Apakassantī**ti ettha kasadhātussa gatyattham dassento āha “parisaṃ ākaḍḍhantī”ti. **Vijaṭentī**ti vijaṭam karonti, visum karontīti attho. **Ekamantaṃ ussādentī**ti ekasmiṃ ante ussadaṃ karonti. **Avapakassantī**ti ettha dvinnaṃ upasaggānaṃ vasena ativiyaṭtho

daṭṭhabboti āha “ati viya ākaḍḍhantī”ti. Ativiyatthaṃ āvikaronto āha “yathā viṣaṃsaṭṭhāva honti, evaṃ karontī”ti. **Yathāti** yenākārena kariyamāneti sambandho. “Visu”nti iminā **āveṇisaddo** “visu”ntiatthavācako anipphannapāṭipadikoti dasseti. **Vatthūsūti** bhedakaravatthūsu. **Imaṃ gaṇhathāti** imaṃ vādaṃ gaṇhatha. **Visunti** āveṇiṃ. Imasmiṃ khandhake vuttavacanaṃ parivārapāliyā saṃsando āha “parivāre panā”tiādi. Tattha **pañcahi ākārehīti** “kammena uddesena voharanto anussāvanena salākaggāhenā”ti (pari. 458) evaṃ pañcahi kāraṇehi. **Tassāti** parivāre vuttavacanassa. **Idhāti** imasmiṃ saṅghabhedakakkhandhake, vuttana iminā saṅghabhedalakkhaṇenāti yojanā. “Atthato nānākaraṇaṃ natthī”ti iminā saddato nānākaraṇaṃ atthīti dīpeti. **Assāti** saṅghabhedalakkhaṇassa. Taṃ pana nānākaraṇābhāvanti yojanā. **Tatthevāti** parivāre eva. **Sabbatthāti** sabbasmiṃ saṅghabhedakakkhandhake.

Iti saṅghabhedakakkhandhakavaṇṇanāya yojanā samattā.

8. Vattakkhandhakaṃ

1. Āgantukavattakathā

357. Vattakkhandhake **ārāmanti** upacārasīmaṃ sandhāya vuttanti āha “upacārasīmasamīpa”nti. “Gahetvā”ti padassa “upāhanā”ti kammaṃ pākaṭaṃ, karaṇaṃ pana apākaṭaṃ. Tasmā karaṇaṃ dassento āha “upāhanadaṇḍakena gahetvā”ti. Iminā “hatthenā”ti karaṇaṃ nivatteti. **Paṭikkamantīti** ettha pavisantīti ca apakkamantīti ca atthaṃ paṭikkhipanto āha “sannipatantī”ti. **Upāhanā...pe... pucchitabbāti** ettha “pucchitabbā”ti padassa saha kammaṃ pucchitabbākāraṃ dassento āha “katarasmiṃ ṭhāne”tiādi. Tattha “katarasmiṃ...pe... coḷaka”nti iminā pucchitabbākāraṃ dasseti. “Āvāsikā bhikkhū”ti iminā kammaṃ dasseti. “Pattharitabba”nti iminā **viṣajjetabbanti** ettha sajadhātuyā cajanatthaṃ paṭikkhipati. **Gocaro pucchitabboti** ettha gocarasaddo bhikkhācārasaddena atthato ekanti dassento āha “bhikkhācāro pucchitabbo”ti. Bhikkhāya caranti etthāti **bhikkhācāro**, gocaragāmo. **Yatthāti** yasmiṃ gāme. “Ki”ntiādinā **pānīyaṃ pucchitabbanti**ādisu pucchitabbākāraṃ dasseti. **Kaṃ kālanti** kasmīṃ kāle.

Bahi nikkhamantassāti vihārato bahi nikkhamantassa. **Nilloketabboti** oloketabbo. “Yadi sakkotī”ti iminā **sace ussahatīti** ettha sacesaddo yadipariyāyo, ussahatisaddo sakkoti pariyāyoti dasseti. Sakkontassa vihārasodhanavatteti sambandho.

2. Āvāsikavattakathā

359. Āvāsikavatte evaṃ vinicchayo veditabboti yojanā. Sabbaṃ kātabbanti sambandho. **Tassāti** vuḍḍhatarassa āgantukassa. “Paṇḍito”tiādinā sace bālo “sammajjāhi tāva cetiyaṅgaṇa”nti na vadati, sammajjaniṃ nikkhipitvā tassa vattameva kātabbanti dasseti. **Bhesajjameva kātabbanti** sahāvadhāraṇena vuttattā bālo “karohi tāva bhesajja”nti avadantopi bhesajjameva kātabbaṃ. “Paṇḍito hī”tiādinā pana āgantukassa vattabbabhāvamattameva dasseti. Pālimuttakavattaṃ dassento āha “**apicā**”tiādi. **Bījanenāti** bījanīyā. “Bījana”nti hi napuṃsakalīṅgo, “bījanī”ti itthilīṅgo. “Bījitabbo”ti ca “bījitabba”nti ca iminā aṭṭhakathāvacanena bījiyati anenāti **bījanaṃ**, bījiyati etāyāti **bījanīti** vacanattho kātabbo. **Assāti** vuḍḍhatarāāgantukassa. **Makkhetabbāti** añjetabbā. **Hīti** saccam. **Etthāti** upāhanapuñchane. **Katthāti** kasmīṃ vihāre. Pucchitena āvāsikenāti sambandho.

“Attano santikaṃ...pe... na labhatī”ti iminā attānaṃ sandhāya anāgacchantopi attano santikaṃ sampattassa āgantukassa vattaṃ akātum na labhatīti dasseti.

3. Gamikavattakathā

360. Gamikavatte evaṃ vinicchayo veditabboti yojanā. **Tatthā**ti senāsanakkhandhake. Taṃ sabbam paṭisāmetvāti sambandho. Yattha yesu pāsānapitṭhipāsānatthambhesu upacikā nārohani, tassam pāsānapitṭhiyam vā tesu pāsānatthambhesu vā yam katasenāsanam atthi, tam anāpucchantassāpi anāpattīti yojanā. Catūsu pāsānesūtiādi vuttanti sambandho, upacikānam uppattiṭṭhāne kateti sambandho. **Ayanti** ānisaṃso. Ovassakagehe pana ṭhapitānam mañcapīṭhānanti sambandho.

4. Anumodanavattakathā

362. Iddham ahoṣīti ettha idhadhātuyā vaḍḍhanattham paṭikkhipanto āha “sampannam ahoṣī”ti. Saṅghatthere nisinneti sambandho. Anuthere anumodanattāya nisinneti yojanā. Saṅghattherena ajjhiṭṭhepīti sambandho. Anumodako vadatīti sambandho. Anu punappunam, pacchā vā dāyake dhammakathāya modetīti **anumodako**. “Gacchathā”ti sace vadati anumodakoti yojanā. **Tassā**ti anumodakassa. Manussā kārentīti sambandho. “Ekenā”ti padaṃ “kārentī”ti pade kāritakammaṃ. **Tassā**ti kāritabhikkhussa. **Anumodanatoti** anumodanakāraṇā. **Upanisinnakathā**ti upasamīpe nisinnānam kathiyati etāyāti upanisinnakathā. **Anumodanāyā**ti anumodanattāya. **Ajjhiṭṭhovā**ti sayam ajjhiṭṭho eva. **Etthā**ti anumodanavattusmiṃ. “Saṅjātavacco”ti iminā vacco saṅjāto imassāti **vaccitoti** katvā saṅjātatthe ita paccayoti dasseti.

5. Bhattaggavattakathā

364. Bhattaggavatteti bhattam gaṇhanti etthāti bhattaggaṃ, parivisanatṭhānam. Tasmim kattabbaṃ vattam bhattaggavattam, tasmim bhattaggavatte evaṃ vinicchayo veditabboti yojanā. Manussānam parivisanatṭhānam nāma yattha manussā saputtadārā āvasitvā bhikkhūbhojenti. “Atiālyitvā”ti iminā **anupakhajjā**ti ettha khadadhātussa hiṃsanam nāma atīālyananti dasseti. **Āsanesu satī**ti āsanesu santesu. Nisīdantassa navakassāti sambandho. **Āpajjati**ti āpattim āpajjati. Āpucchite ananujānanto thero āpajjati yojanā. **Saṅghā**nti pārutasaṅghāṭim.

Pattadhovanaudakanti bhūñjanattāya pattānam dhovanaudakam. **Gahetabbanti** hatthena gahetabbam.

Yathā gaṇhiyamāneti yojanā. **Mattāyā**ti pamāṇāya. **Sabbiādīsu evā**ti evasaddo ajjhāharitabbo. **Sabbiādīsū**ti sabbitelauttaribhaṅgesu, niddhāraṇe bhummaṃ. **Yanti** sabbiādikaṃ. **Appahoti**ti sabbesam bhikkhūnam nappahoti. **Tanti** sabbiādikaṃ, sampādehīti sambandho. Tādisam sabbiādikanti sambandho.

Yam bhattagganti yojanā. **Hatthadhovanaudakanti** bhuttāvīnam hatthassa dhovanaudakam. **Antarā**ti bhojanassa majjhe. **Pipāsitenā**ti pivitum icchantena. **Galeti** kaṇṭhe.

Nivattantenāti ettha kasmā ṭhānā nivattantenāti āha “bhattaggato”ti. Katham kenākārena nivattitabbanti yojanā. Kasmā navakehi bhikkhūhi paṭhamataram nivattitabbanti āha “sambādhesu hī”tiādi. **Nikkhamanokā**soti paṭhamataram nikkhantokāso. **Paṭipāṭiyā**ti vuḍḍhapaṭipāṭiyā. **Dhureti** gehadvārassa samīpe. Dhurasaddo hi idha samīpavācako. Navakā antogehe ce nisinnā hontīti yojanā. **Antarenā**ti bhikkhūnam vivarena, majjhena vā. **Viralāyā**ti tanukāya.

6. Piṇḍacārikavattakathā

366. Piṇḍacārikavatte evaṃ vinicchayo veditabboti yojanā. Kappāsam vā gahetvāti sambandho. **Yañcā**ti yañca kiñci vatthum, gahetvāti sambandho. **Karontī ṭhitā vā**ti karontī hutvā ṭhitā vā. **Tanti** kammaṃ. **Na ca bhikkhādāyikāyā**ti itthilingavasena vuttatā itthiyā eva mukham na ulloketabbanti attham paṭikkhipanto āha “itthī vā hotū”tiādi. “Bhikkhādānasamaye”ti iminā aññasmim samaye oloketopi natthi dosoti dasseti. Ekasmim kāle bhikkhāya dadamānāya sabbakālampi na oloketabbanti anicchitattham paṭikkhipati.

7. Āraññikavattakathā

368. Āraññikavatte evaṃ vinicchayo veditabboti yojanā. **Senāsanā otaritabbanti** ettha araññe rukkhamūlādīsu nisinnassa viharābhāvato senāsanam nāma vasanaṭṭhānam sandhāya vuttanti āha “vasanaṭṭhānato nikkhamitabba”nti.

Pattam thavikāya pakkhipitvāti ettha katham patto thavikāya pakkhipitabboti āha “sace bahī”tiādi. Tattha patto pakkhipitabboti sambandho. **Dhovitvā katvāti** padesu “pattam vodaka”nti vibhattipariṇāmaṃ katvā sambandhitabbaṃ. **Tampīti** veḷunālikampi. **Samīpeti** āraññakassa senāsanassa samīpe. Yathā ca āraññakassa araṇisahitam icchitabbaṃ, evaṃ kantāraṃ paṭipannassāpi araṇisahitam icchitabbanti yojanā. **Gaṇavāsīnoti** gaṇena saha vāsīno, āraññakassāti sambandho. **Tenāti** araṇisahitena. “Nakkhattāneva nakkhattapadānī”ti iminā assayujādinakkhattāneva (abhidhānappadīpikāyaṃ 58-60 gāthāsu) disābhāgajānanassa, ca samayajānanassa ca kāraṇattā **nakkhattapadāni nāmāti** dasseti.

8. Senāsanavattakathā

369. Senāsanavatte evaṃ vinicchayo veditabboti yojanā. **Dvāraṃ nāmāti** mahādvāraṃ. **Mahāvaḷaṅjanti** mahantehi janehi paribhuñjitabbaṃ. **Tatthāti** dvāre. **Āpucchitvāvāti** vuḍḍham āpucchitvāva, sabhāgassa vuḍḍhatarassāti sambandho. **Vaṭṭatiyevāti** yathāsukhaṃ viharitum vaṭṭatiyeva. **Parivattitabbanti** parimukhaṃ vattitabbaṃ.

9. Jantāgharavattādīkathā

371. Jantāgharavatte evaṃ vinicchayo veditabboti yojanā. **Bahijagatīti** bahiālindo.

373. Ācamanavattusmiṃ evamattho veditabboti yojanā. **Nīharitvāti** udakaṃ nīharitvā. **Ācamitabbanti** dhovitabbaṃ. “Āpubbo camu dhovane”ti hi dhātupāṭhesu vuttaṃ. **Idaṃ ativivaṭṭanti** idaṃ ṭhānaṃ ativivaṭṭaṃ, na kenaci paṭicchannanti attho. **Udakaṃ alabhantassevāti** udakaṃ alabhanteyeva.

374. Vaccakuṭivatte evaṃ vinicchayo veditabboti yojanā. **Ayanti** dantakaṭṭhaṃ khādato vaccakaraṇaṃ. **Sabbatthevāti** sabbasmiṃ eva ṭhāne. “Na pharusena kaṭṭhenā”ti ettha na kevalaṃ kharakaṭṭhameva, phālitakaṭṭhādayopi chaviavalekhanakaṭṭhā pharusāyeva nāmāti dassento āha “phālitakaṭṭhena vā”tiādi. **Paviṭṭhassāti** vaccakuṭiṃ paviṭṭhassa.

Sabbasādhāraṇaṭṭhānanti sabbesaṃ bhikkhūnaṃ, sabbehi vā sādhāraṇaṃ vaccakuṭisaṅkhātaṃ ṭhānaṃ. **Tatrāti** tasmīṃ sabbasādhāraṇe ṭhāne. **Nibaddhagamanatthāyāti** attano nibaddhagamanatthāya kataṃ yaṃ ṭhānaṃ vā yaṃ puggalikaṭṭhānaṃ vā hotīti yojanā.

Uhatāti ettha upubbo hadadhātūti dassento āha “uhaditā”ti. “Hada karīsossagge”ti dhātupāṭhesu (pāṇinī 977 dhātupāṭhe; saddanītidhātumālāyaṃ 15 dakārantadhātu) vuttattā vaccakūpato bahi karīsassa ossajjananti āha “bahī vaccamakkhītā”ti. **Dhovitabbāti** udakena dhovitabbā. **Etampīti** udakassa avijjamānampi. **Sabbatthāti** sabbasmiṃ vattakkhandhake.

Iti vattakkhandhakavaṇṇanāya yojanā samattā.

9. Pātimokkhaṭṭhapanakkhandhakaṃ

1. Pātimokkhuddesayācanakathā

383. Pātīmokkhaṭṭhapanakkhandhake **nandimukhiyā rattiyā**ti ettha nandiyati tusiyatīti nandi, ikārantoyaṃ napuṃsakaliṅgo. “Nandiseno (jā. atṭha. 3.4.1) nandivisālo”tiādīsu ikārantoyaṃ pulliṅgo hoti, idha pana mukhaṃ apekkhitvā ikārantō napuṃsakaliṅgo hoti. Aruṇuṭṭhitakāle odādadisāmukhatāya nandi mukhaṃ etissaṃ rattiyanti nandimukhī, ratti, tāya nandimukhiyā rattiyā, tena vuttaṃ “aruṇuṭṭhitakālepi hi nandīmukhā viya ratti khāyati”ti. **Antopūtinti** ettha kāyassa anto kuṇapapūtinti atthaṃ paṭipakkhipanto āha “attacittasantāne”tiādi. “Kilesavassanavāsena”ti iminā udakavassanavāsenaṭi atthaṃ paṭikkhipati. **Avassutanti** tintaṃ, kilinnanti attho. **Kasambujātanti** ettha **kasambūti** saṅkāro. So hi sammūṇicaniyā kasiyamāne vilekhiyamāne sambati saddaṃ karotīti **kasambu**, taṃ viya jātanti kasambujātanti attho daṭṭhabbo. Atṭhakathāyaṃ pana adhippāyavasena “ākiliṭṭhajāta”nti vuttaṃ, ativiya kiliṭṭhajātanti attho. “Ākiṇṇadosatāya kiliṭṭhajāta”ntipi pāṭho. “**Yāva bāhāgahaṇāpi nāmā**”ti iminā pāṭhena dassētīti sambandho. **Hīti** padapūraṇamattaṃ. **Tenāti** moghapurisena. “Yāvā”ti nipātapayogattā “bāhāgahaṇāpi”ti ettha pañcamīvibhatti avadhiatthe hoti. **Nāma**-saddo garahatthajotako, tassa payogattā “āgamessatī”ti ettha atītatthe anāgatavacanāṃ (saddanītisuttamālāya 893 sutte). Āgamessatī nāmāti yojanā. **Āgamessatīti** īsaṃ adhivāsessatī. “Āto gamuīsamadhivāsane”ti hi dhātupāṭhesu (saddanītidhātumālāyaṃ 18 makārantadhātu) vuttaṃ.

384. Na āyatakeneva papātoti ettha dīgheneva papātoti dassento āha “na paṭhamameva gambhīro”ti. Āyatasaddo hi dīghapariyāyo. “Na āyakena gītassarena dhammo gāyitabbo”tiādīsu (cūḷava. 249) viya papāto dīghena tīrassa ādimhi na hotīti vuttaṃ hoti. **Paṭhamamevāti** tīrassa ādimhiyeva. “Anupubbena gambhīro”ti iminā “na paṭhamameva gambhīro”ti vacanassa adhippāyatthaṃ dasseti. **Ṭhitadhammoti** tīrassa antoyeva ṭhitasabhāvo. **Velaṃ nātivattatīti** ettha velāsaddassa tīramariyādatthesu pavattabhāvaṃ dassento āha “osakkanakandaraṃ mariyādavela”nti. Tattha “osakkanakandara”iti padena tīratthaṃ dasseti, “mariyāda” iti padena mariyādatthaṃ. Kena udakena daritabboti **kandaro**, udakena osakkano kandaro etthāti **osakkanakandaraṃ**, tīraṃ. Osakkanakandarabhūtaṅca mariyādabhūtaṅca velaṃ tīraṃ nātikkamattīti attho. **Tīraṃ vāhetīti** ettha vahadhātuyā pāpuṇanattaṃ dassento āha “tīraṃ appetī”ti. Tattha **appetīti** pāpuṇāpeti. “Ussāreti”ti iminā pāḷiyāṃ “thalaṃ ussāreti”ti padena “tīraṃ vāheti”ti padassa atthaṃ dassētīti attho dassito. **Ussāreti**ti uddharitvā gamāpeti. **Aññāpaṭivedhoti** ettha ājanāti, ājanitthāti vā **aññaṃ** arahattamaggo vā arahattaphalaṃ vā, tassa paṭivijjhaṇaṃ aññāpaṭivedho, sukhuccāraṇattaṃ majjhe dīgho, aññāpaṭivedho nāma arahattupattiyeva hoti. Tena vuttaṃ “arahattupattī”ti.

385. Channamativassatīti udānapāḷiyā sandhāyabhāsitaṭipāḷibhāvaṃ dassento āha “āpattī”ntiādi. Tattha **idanti** “channamativassatī”ti vacanaṃ vuttanti sambandho. **Etanti** navāpattīāpajjanaṃ sandhāyāti sambandho.

4. Pātīmokkhasavanārahakathā

386. Pure vā pacchā vāti ñattito pure vā pacchā vā. **Khetteti** pātīmokkhaṭṭhapanassa khette. Khettaṃ dassento āha “tasmā”tiādi. **Rekāraṃ bhaṇatīti** chattiṃsatyakkhāresu re-kāraṃ ñattiṭṭhapanako bhaṇati. **Idanti** pañcatīṃsatyakkharānaṃ uccāraṇaṭṭhānaṃ. **Vutteti** ñattiṭṭhapanakena vutte. “Suṇātu me”ti vacane anāraddheyyevāti yojanā.

5. Dhammikādharmikapātīmokkhaṭṭhapanakathā

387. Tena puggalenāti tena cuditakena puggalena. **Sā vipattīti** sīlavipattīādisaṅkhātā sā vipattī. **Saññāamūlikavasenaṭi** “katā” iti saññāya amūlikavasena. **Katañcāti** ekantena katañca. **Akatañcāti** ekantena akatañca.

Kopetukāmatāya neva āgacchatīti sambandho. **Tenāti** anāgamanādikāraṇena. **Āpajjati** pātīmokkhaṭṭhapanako āpajjati. **Iccassāpīti** iti evaṃ assa pātīmokkhaṭṭhapanakassāpi. **Paccādiyati** pati ādiyati, “akataṃ kammaṃ, puna kātabbaṃ kamma”ntiādinā puna ādiyati, puna ārabhatīti attho.

6. Dhammikapātimokkhaṭṭhapanakathā

388. Maggaṭṭipādanādisūti maggasmim paṭipādanādisu. Ādisaddena theyyacittena avahārādayo saṅgaṇhāti. **Ākārādisaṅṅhāti** ākārasaṅṅhā liṅgasaṅṅhā nimittasaṅṅhā. **Tanti** parisankam sandhāyāti sambandho.

7. Attādānaṅgathā

398. Attādānaṃ ādātukāmenāti ettha kiṃ attādānanti āha “sāsanam sodhetukāmo”tiādi. Iminā param codetum attanā ādātubbam adhikaraṇam **attādānanti** vuccatīti dasseti. **Akālo imam attādānaṃ ādātunti** ettha akālam dassento āha “rājabhaya”ntiādi. Tattha **vassārattoti** vassakālo. So hi vasso ativiya rañjati ettha kāleti vassārattoti vuccati. Vassārattopi adhikaraṇavūpasamattham lajjiparisāya dūrato ānayanassa dukkarattā akālo nāma. **Itīti** ayam rājabhayādikaloti attho. **Viparītoti** rājabhayādīnam abhāvakālo.

Abhūtam idam attādānanti ettha abhūtasaddo avijjamānapariyāyoti āha “asantamida”nti, idam attādānaṃ avijjamānanti attho. Mayā gahitoti sambandho. Sīlavā puggaloti yojanā. **Yanti** attādānaṃ saṃvattatīti sambandho. **Idanti** attādānaṃ.

Na labhissāmi sandiṭṭhe, labhissāmi sandiṭṭheti ettha “na labhissāmi, labhissāmī”ti idam kiṃ sandhāya vuttanti āha “appekadā hī”tiādi. Tattha **appekadāti** api ekadā. **Hisaddo** vitthārajotako. **Evarūpāti** sandiṭṭhasambhattasabhāvā. **Tanti** upatthambhakabhikkhulabhanam sandhāyāti sambandho. “Na labhissāmī”ti idam vacanam vuttanti sambandho.

Kosambakānaṃ bhaṇḍanādi bhavati viya bhaṇḍanādi bhavissatīti yojanā. **Pacchāpi avippaṭṭisārakaram bhavissatīti** ettha kesam avippaṭṭisārakaram bhavati viya pañcaṅgasampannāgatam attādānaṃ ādiyato pacchāpi avippaṭṭisārakaram bhavati āha “subhaddam vuḍḍhapabbajita”ntiādi. Tattha **pañcasatikasaṅgītinti** pañcasatehi mahākassapādīhi kattabam saṅgītiṃ. Mahākassapattherassa pacchā samanussaraṇakaram hoti iva hotīti yojanā. Eseva nayo sesesupi. **Samanussaraṇakaranti** sammodavasena punappunam anussaraṇassa karam. Iminā “avippaṭṭisārakara”nti padassa attham dasseti. **Pacchāpīti** ettha pisaddassa avuttasampiṇḍanattham dassento āha “sāsanassa cā”tiādi. Tattha sāsanassa ca sassirikatāyāti sambandho. Vigataupakkilesacandimasūriyānam viya sāsanassa ca sassirikatāya saṃvattatīti adhippāyo.

8. Codakena paccavekkhitabbadhammakathā

399. “Acchiddena appaṭṭimaṃsenā”tiādīsu evamattho veditabboti yojanā. Chiddasappaṭṭimaṃsam paṭhamam dassetvā viparītavasena acchiddaappaṭṭimaṃsam dassento āha “yenā”tiādi. Tattha yena katānīti sambandho. Chijjatīti **chiddo**, paṭi punappunam masiyati āmasiyatīti **paṭimaṃso**, niggahitāgamo, bhāvappadhānoyam kammaniddeso. Saha paṭimaṃsenāti **sappaṭimaṃso**, kāyasamācāro. **Viparītoti** viparivattavasena ito pavatto, kāyasamācāroti attho. **Amūlakānuddhamāsanādīhīti** ādisaddena duṭṭhullavācādayo saṅgaṇhāti.

Mettam nu kho me cittanti ettha appanābhāvappattam mettacittamevādhippetanti dassento āha “palibodhe chinditvā”tiādi. Tattha **palibodheti** āvasapalibodhādike palibodhe. “Vikkhambhanavasena vihatāghāta”nti iminā appanābhāvappattam mettacittameva dasseti. **Idam panāvuso kattha vuttam bhagavatāti** ettha idam saddakimsaddānam visayam dassento āha “idam sikkhāpadam katarasmim nagare”ti.

9. Codakena upaṭṭhāpetabbakathā

400. “Kālena vakkhāmī”tiādīsu codanāya kālaakālādīṃ dassento āha “eko eka”ntiādi. Tattha ekoti ekako codako. Ekanti ekakaṃ cuditakaṃ. Saṅghamajjha...pe... asanasālādīsu vā parivāritakkhaṇe vāti yojanā. Tattha “saṅghamajjha...pe... asanasālādīsū”ti iminā ṭhānābhāvaṃ dasseti, “upaṭṭhākehi parivāritakkhaṇe”ti iminā kālābhāvaṃ dasseti. Imehi padehi ṭhānampi kālena saṅgahetvā “kālena vakkhāmī”ti vuttanti dasseti. **Tacchenāti** saccena. **Hambhoti** nipāto pacchimapadesu paccekaṃ yojetabbo. Hambho mahallaka, hambho parisāvacara, hambho paṃsukūlika, hambho dhammakathikāti hi attho. **Idanti** kammaṃ. **Kāraṇanissitanti** mahallakabhāvakāraṇādīsu nissitaṃ. “Bhante”ti nipātopi paccekaṃ yojetabbo. Ettha ca “hambho”ti nipātena lokavohāravasena anādarassa pakāsakattā pharusena vadati nāma, “bhante”ti nipātena sādārassa pakāsakattā saṅghena vadati nāma. **Kāraṇanissitaṃ katvāti** imasmīṃ vītikkame ayaṃ nāma dosoti kāraṇanissitaṃ katvā. “Mettacittaṃ upaṭṭhapetvā”ti iminā **mettacittoti** padassa “vakkhāmī”ti pade kiriyāvīsesanabhāvaṃ dasseti. **No dosantaroti** ettha antarasaddassa cittavācakahāvaṃ dassento āha “na duṭṭhacitto”ti. “Hutvā”ti iminā kiriyāvīsesanabhāvaṃ dasseti.

10. Codakacuditakapaṭisaṃyuttakathā

401. Ajjhantanti ettha attasaddassa cittavācakahāvaṃca sattamīvibhattiyāpi amādesabhāvaṃca dassento āha “attano citte”ti. **Uppādetvāti** iminā “manasikarivā”ti padassa adhippāyattaṃ dasseti. **Kāruṇṇatāti** ettha dvīsu ṇyapaccayatāpaccayesu ekasseva bhāvavācakahāvaṃ eko svatthoti dassento āha “karuṇabhāvo”ti. Tattha karuṇassa puggalassa bhāvo **kāruṇṇaṃ**, tadeva **kāruṇṇatā**. Atha vā karuṇo eva puggalo kāruṇṇaṃ, tassa bhāvo kāruṇṇatāti vacanatto kātabbo. **Imināti** “kāruṇṇatā”ti padena. **Karuṇāncāti** appanāpattaṃ karuṇāṃca. **Karuṇāpubbabhāgaṅcāti** appanāpattāya karuṇāya pubbabhāge parikammūpacāravasena pavattaṃ kāmāvacarakaruṇāṃca. **Dvīhipīti** “hitesitā, anukampitā”ti dvīhipi padehi. **Mettaṅcāti** appanāpattamettaṅca. **Mettāpubbabhāgaṅcāti** appanāpattāya mettāya pubbabhāge parikammūpacāravasena pavattaṃ kāmāvacaramettaṅca. **Suddhanteti** suddhe koṭṭhāse. **Paṭiṇṇaṃ āropetvāti** cuditakaṃ paṭiṇṇaṃ āropetvā. **Ye eteti** “kāruṇṇatā”tiādīnā nayena ye ete paṅca dhammā vuttāti yojanā. Iminā **ime paṅca dhammeti** ettha imasaddassa aniyamaniddesabhāvaṃ dasseti.

Sacce ca akuppe cāti ettha saccasaddassa viratisaccaparamatthasaccāni paṭikkhipanto āha “vacīsacce cā”ti. “Akuppanatāyā”ti iminā nakupassa bhāvo **akuppanti** katvā ṇyapaccayassa bhāvattaṃ dasseti. **Hīti** saccam, vitthāro vā. **Na paro ghaṭṭetabboti** na paro kujjhāpetabbo. **Sabbatthāti** sabbasmīṃ pātimokkhaṭṭhapanakkhandhake.

Iti pātimokkhaṭṭhapanakkhandhakavaṇṇanāya yojanā samattā.

10. Bhikkhunikkhandhakaṃ

Mahāpajāpatigotamīvattukathā

402. Bhikkhunikkhandhake kasmā paṭikkhipatīti codanaṃ dassetvā tassā ābhogaṃ dassento āha “nanū”tiādi. “Kāma”ntiādīnā abhyūpagamaparīhāravasena vissajjeti. Tattha **kāmaṃsaddo** anuggahatto, **pana** saddo garahatto, pana tathāpi paṭikkhipatīti sambandho. **Tanti** mahāpajāpatīṃ gotamīṃ. Yācītena hutvā anuṇṇātanti yojanā. **Ayanti** pabbajjā. **Bhaddakaṃ katvāti** laddhakaṃ katvā, manāpaṃ katvāti attho.

403. Kumbhathenakehīti ettha kumbhe dīpaṃ jāletvā tenālokena thenentīti **kumbhathenakāti** dassento āha “kumbhe dīpaṃ jāletvā”tiādi.

Nālimajjhagatanti sassanāḷassa majjhe gataṃ. **Gaṇṭhinti** phaḷuṃ. “Kaṇḍa”ntipi pāṭho, daṇḍanti attho. **Yenāti** pāṇakena. Ayañhi yaṃsaddo taṃsaddānapekkhoti daṭṭhabbo.

Antorattabhāvoti antolohitabhāvo. **Etamatthanti** etaṃ vakkhamānaṃ atthaṃ. **Āḷiyāti** āvaraṇāya. **Abaddhāyapīti** pisaddo anuggahattho, baddhāya pana pagevāti attho. **Kiñcīti** appamattakaṃ. **Yanti** udakaṃ. **Tampīti** udakampi. Pisaddo abaddhāya ṭhitaṃ kiñci udakaṃ apekkhati. Ye ime garudhammā paññattāti yojanā. **Paṭikaccevāti** pageva, paṭhamamevāti attho. **Tesūti** garudhammesu. Apaññattesu santesupīti yojanā. **Paṭhamam vuttantiādi** vuttaṃ, vassasahassameva ṭhassati iti imamattaṃ dassetīti yojanā. **“Vassasahassa”**nti ca etaṃ vacanaṃ vuttanti sambandho. **Tatoti** vassasahassato. **Pariyattidhammopīti** pisaddo paṭivedhasaddhammaṃ apekkhati. Dvīsu saddhammesu ṭhitesu paṭipattisaddhammo ṭhitoyevāti katvā na vuttaṃ. **Tāniyevāti** pañcavassasahassāniyeva. Pariyattiyā sati paṭivedho na hotīti nāpi vattabboti yojanā. **Liṅganti** samaṇavesaṃ, samaṇākāranti attho.

Bhikkhunīupasampadānujānanakathā

404. Imāya anupaññattiyāti mahāpajāpatiyā aṭṭhagarudhammapaṭiggahaṇūpasampadaṃ upanidhāya ayaṃ paññatti anupaññatti nāma, tāya anupaññattiyā upasampādetunti attho. **Mahāpajāpatiyā saddhivihāriniyo katvāti** mahāpajāpatiṃ upajjhaṃ katvā pañcasatā sākiyāniyo tassā saddhivihāriniyo katvāti attho. **Itīti** tasmā ahesunti sambandho. **Iminā ovādenāti** bhagavato iminā ovādena.

410. Etissāti etissā bhikkhuniyā. **Tanti** kammaṃ. **Aññasminti** aññasmiṃ kamme. **Aññanti** ropitabbakammato aññaṃ kammaṃ.

411. Kaddamodakenāti kaddamena āluḷitena udakeneva. **Kaddamādīsupīti** pīsaddo “yena kenacī”ti ettha yojetabbo. Yena kenacipīti hi attho. **Sannipativāti** bhikkhunisaṅghena sannipativā. **Apasādanīyanti** apasādetabbaṃ kammaṃ. **Ettāvatāti** ettakena sāvanamattena. **Avandiyoti** na vandetabbo, vanditum na arahoti attho. **Tatoti** tikkhattum sāvetabbato. Na **vandantīti** bhikkhuniyo na vandanti. **Disvāpīti** taṃ bhikkhum disvāpi. **Tena bhikkhunāti** apasādanīyaṃ dassentena bhikkhunā, khamāpetabbanti sambandho. **Vihāreyevāti** bhikkhūnaṃ vihāreyeva. **Tena bhikkhunāti** upasaṅkamitabbena bhikkhunā, vattabbanti sambandho. **Tatoti** vattabbakālato. **Soti** apasādanīyaṃ dassento bhikkhu. **Etthāti** bhikkhunikkhandhake. **Kammavibhaṅgeti** parivārāvasāne kammānaṃ vibhaṅgaṭṭhāne (pari. aṭṭha. 495-496).

Obhāsantīti ava hīnena bhāsantīti dassento āha “asaddhammena obhāsantī”ti. “Bhikkhunīhi saddhiṃ sampayojentī”ti ettha kammakaraṇe dassento āha “purise asaddhammenā”ti. Ettha “purise”ti iminā kammaṃ dasseti, “asaddhammenā”ti iminā karaṇaṃ. **Vihārappavesaneti** bhikkhūnaṃ vihārappavesane. **Ovādam ṭhapetunti** ettha ovādaṭṭhapanākāraṃ dassento āha “na bhikkhunupassaya”ntiādi. **Ovādatthāyāti** ovādapatiṅgahaṇatthāya. **Mā karitthāti** mā kareyyātha.

416. Gihidārikāyoti gihibhūtā dārikāyo bandhanti viyāti yojanā. **Ghanapaṭṭakenāti** ghanabhūtena paṭṭena niyuttana. **Ekapariyakanti** ettha ekavāraṃ kaṭiyaṃ parikkhipitvā kataṃ kāyabandhanaṃ ekapariyakanti dassento āha “ekavāraṃ parikkhipanaka”nti. Tattha **parikkhipanakanti** kaṭiyaṃ parikkhipanārahaṃ.

Vilīvenāti ettha bahutthe ekavacananti āha “saṅhehi vilīvehi”ti. “Katapaṭṭenā”ti iminā pāḷiyaṃ “katenā”ti pāṭhasesaṃ dasseti. **Setavatthapaṭṭenāti** setavatthena katena paṭṭena. **Kataveṇiyāti** katāya veṇiyā. Iminā dussena katā veṇi **dussaveṇīti** vacanattaṃ dasseti. Eseva nayo purimacchimapadesupi. **Coḷakāsāvanti** coḷameva kasāvena rattattā coḷakāsavaṃ.

Aṭṭhillenāti addena aṭṭhinā. “Gojaṅghaṭṭhike”ti iminā aṭṭhino sambandhaṃ dasseti. **Hatthaṃ koṭṭāpentīti** ettha hatthaṃ nāma aggabāhamevādhippetaṃ, na kapparato paṭṭhāyāti dassento āha “aggabāha”nti. **Piṭṭhihatthanti** hatthapiṭṭhiṃ. **Piṭṭhipādanti** pādapiṭṭhiṃ.

417. Vuttanayānevāti chabbaggiyānaṃ mukhalimpanādīsu (cūḷava. aṭṭha. 247) vuttanayāneva. **Aṅgadeseti** sarīrappadese. **Gaṇḍappadeseti** kapolappadese. **Sāloke tiṭṭhantīti** ettha saṃvijjati āloko etthāti **sālokanti** katvā dvāraṃ gahetabbaṃ. Tena vuttaṃ “dvāraṃ vivarivā”ti. **Vuṭṭhāpentīti** upasampādentī. **Sūnaṃ ṭhapentīti** ettha sūnāsaddo maṃsapariyāyoti āha “maṃsaṃ vikkiṇantī”ti. **Tenāti** dāseṇa. Idaṃ padaṃ “kārentī”ti pade kāritakammaṃ. “Haritakañceva pakkañcā”ti iminā **haritakapakkikanti** padassa dvandavākyam dasseti. Tattha **haritakanti** haritameva paṇṇaṃ. **Pakkanti** seditaṃ paṇṇaṃ.

418. Kathitāyevāti cīvarakkhandhake kathitāyeva.

419. Pālimuttakavinicchayoti pāḷiyam vuttavinicchayato mutto vinicchayo. Pālimuttakavinicchayam vitthārento āha “**sace hī**”tiādi. Yo koci kālam karonto vadatīti sambandho. **Mamaccayenāti** mama atikkamena. **Aññassāti** vuttehi upajjhāyādīhi aññassa. **Tesanti** upajjhāyādīnaṃ. **Na hotīti** parikkhāro na hoti. **Hīti** saccaṃ, yasmā vā. **Accayadānanti** accayena hotūti dānaṃ. Na **ruhatīti** pañcannaṃ sahadhammikānaṃ pabbajitassa vā gahaṭṭhassa vā yassa kassaci accayadānaṃ tesam na ruhati, saṅghasseva ruhatīti adhippāyo. Gihīnaṃ pana accayadānanti sambandho. **Ruhatīti** gihīnaṃ pabbajitassa vā gahaṭṭhassa vā yassa kassaci accayadānaṃ tesam ruhati, tesamyeva santako hotīti adhippāyo.

420. Purāṇamallīti ettha mallassa bhariyā mallī, purāṇe mallī purāṇamallīti dassento āha “purāṇe”tiādi. “Gihikāle”ti iminā “purāṇe”ti ettha ṇapaccayassa sarūpaṃ dasseti. **Mallassāti** muṭṭhimallassa. **Purisabyañjananti** ettha **byañjanasaddo** nimittapariyāyoti āha “purisanimitta”nti. **Cittanti** rāgacittaṃ.

421. Yanti yaṃ vatthu, **agganti** paṭhamabhāgaṃ. **Asappāyanti** attano asappāyam.

Hiyyoti atītānantarāhani. **Aññasminti** bhikkhunīhi aññasmiṃ. “Bhikkhunīhi”ti padaṃ “paṭiggāhāpetvā”ti pade kāritakammaṃ. **Hīti** saccaṃ, yasmā vā.

426. “Bhojanakāla”nti iminā “kālam vītināmesu”nti ettha kālavisesaṃ dasseti.

Pureti ādimhi. **Tāsanti** aṭṭhannaṃ bhikkhunīnaṃ. **Abbhantarimāti** abbhantare pariyāpannā. **Aññāti** aṭṭhahi bhikkhunīhi aññā. Navakatarā hotūti sambandho. “Ṭhapetvā bhattagga”nti iminā **aññattha sabbattha yathāvuddham na paṭibāhitabbanti** ettha aññasaddassa apādānaṃ dasseti. **Aññasminti** ettha smiṃvacanena tthapaccayassa atthaṃ dasseti. “Catupaccayabhājanīyaṭṭhāne”ti iminā sarūpaṃ dasseti.

430. Dūtenapi upasampādetunti ettha kiṃ sabbathā dūtena upasampadā vaṭṭatīti āha “dūtena... pe... vaṭṭatī”ti. Yena kenaci antarāyenāti sambandho, asati antarāye na vaṭṭatīti adhippāyo. Kammavācāpariyosāne upasampannāva hotūti sambandho. **Tāvadevāti** upasampannakkhaṇeyeva.

431. Navakammampīti pisaddo udositaupassaye apekkhati.

432. Tassāti tassā itthiyā. **Yāva so dārako viññutaṃ pāpuṇātīti** ettha kathaṃ viññubhāvo gahetabboti āha “yāva khādītu”ntiādi.

Ṭhapetvā sāgāranti ettha sakāro sahasaddakāriyo, agāranti ca seyyāgāranti dassento āha “sahāgāraseyyamattaṃ ṭhapetvā”ti. Yathā aññasmiṃ purise paṭipajjitabbaṃ, evaṃ tathāti yojanā. “Aññasmi”nti iminā pāḷiyam **aññe puriseti** ettha smiṃvacanassa sabbanāmato ekārādeso dassito, taṃdassanena ca kaccāyane (kaccāyane 110 sutte) sabbanāmato smiṃvacanassa ekārādesanisedhanaṃ

aniccanti dasseti.

434. “**Yadeva sā vibbhantā**”ti iminā dassetīti sambandho. “**Yasmā**”ti iminā **yadevā**ti ettha yaṃsaddassa kāraṇatthaṃ dasseti. Odātāni vatthāni nivatthāti sambandho. “**Tasmāyevā**”ti iminā **tadevā**ti padassa kāraṇatthameva dasseti. “**Na sikkhāpaccakkhānenā**”ti iminā evatthaphalaṃ dasseti. **Sā puna upasampadaṃ na labhatī**ti sā vibbhantā bhikkhunī puna upasampadaṃ na labhati.

Pabbajjampi na labhatīti titthāyatanasaṅkantā bhikkhunī pabbajjampi na labhati, pageva upasampadaṃ.

Pāde sambāhantāti bhikkhunīnaṃ pāde sambāhantā. **Keseti** bhikkhunīnaṃ kese. **Tatrā**ti “**kukkucayantā na sādīyantī**”ti vacane. Eke ācariyā vadantīti sambandho. **Sārattā** hortīti yojanā. **Etthā**ti purisānaṃ abhivādanādīsu. **Idanti** purisānaṃ abhivādanādi, “**anuññāta**”nti pade vuttakammaṃ “**vaṭṭatī**”ti pade vuttakattā. Atha vā odissa anuññātaṃ idaṃ purisānaṃ abhivādanādi vaṭṭatīti yojanā. Evañhi sati “**odissa anuññāta**”nti padaṃ hetuantogadhavisesanaṃ, odissa anuññātattā vaṭṭatīti adhippāyo. **Tanti aṭṭhakathāsu vuttavacanaṃ. Hīti** saccaṃ, yasmā vā.

435. Pallaṅkena nisīdantīti ettha āsanapallaṅkaṃ paṭikkhipanto āha “**pallaṅkaṃ ābhujitvā nisīdantī**”ti. Tattha **ābhujitvā**ti ābandhitvā. **Kūpoti** vaccakūpo. **Uparīti** kūpato upari. “**Sabbadisāsu paññāyati**”ti iminā paṭicchannameva atthi, na upari channanti dasseti.

436. Kuṇḍakanti kaṇaṃ. **Etthā**ti bhikkhunikkhandhake.

Iti bhikkhunikkhandhakavaṇṇanāya yojanā samattā.

11. Pañcasatikakkhandhakaṃ

1. Khuddānukhuddakasikkhāpadakathā

441. Pañcasatikakkhandhake “**cattāri...pe... khuddakānī**”ti evamādi vuttanti sambandho. **Pariyāyenā**ti kāraṇena. **Dhūmakālikanti** ettha dhūmassa kālo dhūmakālo, dhūmassa uṭṭhitakāloti attho. So etassatthīti **dhūmakālikaṃ**, sikkhāpadapaññattaṃ. Iti imamatthaṃ dassento āha “**yāvā**”tiādi.

443. **Idanti** “**katamāni pana bhante khuddānukhuddakāni sikkhāpadānī**”ti apucchanaṃ. “**Tayā**”ti iminā **idaṃ teti** ettha tesaddassa “**tuyhaṃ, tavā**”ti atthe paṭikkhipati. **Āpattinti** dukkaṭāpattiṃ. **Hīti** saccaṃ, yasmā vā. **Teti** therā. “**Saṅgho...pe... na samucchindatī**”ti etaṃ vacanaṃ anussāvitanti yojanā. “**Desehi taṃ āvuso dukkaṭa**”nti idampi ca vuttanti sambandho. **Thero panā**ti ānandatthero pana āhāti sambandho. **Tatthā**ti apucchane. **Yathā**ti yenākārena. **Catūsu ṭhānesū**ti “**bhagavato vassikasāṭikaṃ akkamitvā sibbesī**”tiādīsu catūsu ṭhānesu. **Etthā**ti pañcasatikakkhandhake.

Iti pañcasatikakkhandhakavaṇṇanāya yojanā samattā.

12. Sattasatikakkhandhakaṃ

Dasavatthukathā

447. Sattasatikakkhandhake **vaḍḍhenti kaṭasinti** ettha kaṭasīsaddo susānabhūmivācakoti dassento āha “**punappunaṃ kaḷevaraṃ nikkhipamānā bhūmiṃ vaḍḍhentī**”ti. Tattha **kaḷevaranti** dehaṃ. Tañhi kaḷe aṅgapaccāṅgānaṃ avayave sampiṇḍetvā variyati icchiyatīti **kaḷevaranti** vuccati. Evaṃ ghoram kaṭasiṃ vaḍḍhentāva punabbhavaṃ ādiyantīti yojanā.

454. Pāpakaṃ no āvuso katanti ettha nosaddo amhasaddakāriyo, chaṭṭhikattā ca hotīti dassento āha “āvuso amhehi pāpakaṃ kata”nti.

455. “Piyavacana”nti iminā **katamena tvam bhūmi-vihārenā**ti ettha **bhūmisaddo** piyavācako ruḷhīsaddoti dasseti. “Āmanteti”nti iminā ālapanapadanti dasseti. Āvuso bhūmīti attho. **Kullavihāro** nāma mettāvihāro, so ca heṭṭhimajhānattaye yuttattā uttānavihāroti āha “uttānavihārenā”nti.

457. Sāvattthiyāti sāvattthinagare. **Suttavibhaṅgeti** padabhājanīye. Paṭikkhittabhāvaṃ vitthārento āha “tatra hī”tiādi. **Tatrāti** suttavibhaṅge, paṭikkhittam hotīti sambandho. **Tatrāti** “sannidhikārake asannidhikārakasaññi”tiādivacane. Eke ācariyā evaṃ maññantīti yojanā. Kinti maññantīti āha “yo pana bhikkhū”tiādi. Aloṇakaṃ yampi āmisanti yojanā. **Tenāti** purepariggahitaloṇena. **Tanti** āmiṣaṃ. **Tadahupaṭiggahitamevāti** tasmim ahani paṭiggahitameva. **Tasmāti** yasmā tadahupaṭiggahitameva, tasmā. **Vadatoti** vadantassa, bhagavato vacanenāti sambandho. **Etthāti** aloṇakāmiṣaparibhuñjane, dukkaṭena bhavitabbaṃ iti maññantīti yojanā. **Teti** eke ācariyā. **Dukkaṭenapīti** pisaddena pageva pācittiyenāti dasseti. **Hīti** saccaṃ, yasmā vā. **Etthāti** yāvajīvikayāvakālikesu. Yāvajīvikaṃ na tadahupaṭiggahitaṃ, yāvakālikameva tadahupaṭiggahitanti yojanā. Tadahupaṭiggahitañca yāvakālikanti sambandho. Taṃ dukkaṭaṃ tumhe yadi maññathāti yojanā. **Yāvajīvikamissanti** loṇasankhātena yāvajīvikena saṃsaṭṭhaṃ. **Byañjanamattanti** vikāle na kappatīti byañjanamattaṃ.

Etthāti “yāvakālikena bhikkhave”tiādivacane (mahāva. 305) tadahupaṭiggahitaṃ yāvajīvikanti yojanā. Yāvakālikassa gati viya gati etassāti **yāvakālikagatikam**. Tasmā dukkaṭaṃ na hotīti sambandho. **Etthāti** purepaṭiggahitaloṇena āmiṣaparibhuñjane. Tadahupaṭiggahitaṃ yāvakālikena sambhinnarasam yāvajīvikanti yojanā. **Tanti** yathāvuttaṃ yāvajīvikaṃ, vikālabhojanapācittiyā eva kāraṇaṃ hotīti yojanā. **Evanti** tathā, ajja paṭiggahitampi yāvajīvikanti sambandho. Aparajju paṭiggahitena yāvakālikenāti yojanā. **Tanti** yāvajīvikena sammissaṃ yāvakālikam, ajānantopīti sambandho. **Idanti** yathāvuttaṃ yāvakālikam. **Tatoti** sannidhibhojanapācittiyato. **Hīti** saccaṃ. “Sāvattthiyā suttavibhaṅge”nti idaṃ byākaraṇaṃ parisuddhanti yojanā.

“Rājagahe uposathasamnyutte”nti idaṃ vacanaṃ vuttanti sambandho. **Uposathasamnyutteti** uposathena sambandhe uposathakkhandhake. Kiṃ sandhāya vuttanti āha “na bhikkhave...pe... dukkaṭassāti (mahāva. 141) etaṃ sandhāyā”nti. **Atisāreti** atikkamitvā saraṇe gamane pavattaneti attho. Nimittatthe cetaṃ bhummaṃ. “Campeyyake vinayavattthusmi”nti idaṃ vuttanti sambandho. “Campeyyakkhandhake āgata”nti iminā campeyye āgataṃ **campeyyakanti** vacanatthaṃ dasseti.

Dhammikanti bhūtena pavattaṃ. Suttavibhaṅge **hi** yasmā āgatanti sambandho. **Dasāyevāti** dasāyameva, ādhāre cetaṃ bhummaṃ. **Vidatthimattāti** vidatthipamāṇā. **Dasāya vināti** dasaṃ vajjetvā. **Taṃ pamāṇanti** vidatthittayasankhātaṃ taṃ pamāṇaṃ karontassa vuttapācittiyam āpajjatīti sambandho. “Taṃ atikkāmayato chedanakaṃ pācittiya”nti (pāci. 533) idaṃ vacanaṃ āgatameva hotīti yojanā. **Sabbatthāti** sabbasmim sattasatikakkhandhake.

Iti samantapāsādikāya vinayasaṃvaṇṇanāya

Sattasatikakkhandhakavaṇṇanāya

Yojanā samattā.

Dvivaggasaṅghāti mahāvaggacūlavaggavasena dvīhi vaggehi saṅghatā. **Dvāvīsati** pabhedanāti mahāvagge dasa, cūlavagge dvādasāti evaṃ dvāvīsati pakārā. **Pañcakkhandhadukkhappahāyino**ti pañcakkhandhasankhātaṃ dukkhaṃ pajahanasīlassa, bhagavatoti sambandho. **Āsāpīti** icchāpi. Ayaṃ panettha yojanā-pañcakkhandhadukkhappahāyino bhagavato sāsane dvivaggasaṅghā dvāvīsati pabhedanā ye khandhakā bhagavatā vuttā, tesam khandhakānaṃ esā vaṇṇanā antarāyaṃ vinā

yathā siddhā, evaṃ tathā paṇīnaṃ kalyāṇā āsāpi sijjhantūti.

Iti samantapāsādikāya vinayasamvaṇṇanāya

Cūlavaggasamvaṇṇanāya

Yojanā samattā.

Jādilañchitanāmena, nekānaṃ vācīto mayā;
Cūlavaggakhandhakassa, samatto yojanāyoti.

Namo tassa bhagavato arahato sammāsambuddhassa

Pācityādiyojanā

Parivāravaggayojanā

Cūlavaggakhandhakkassevaṃ, katvāna yojanāyamaṃ;
Adhunā parivārassa, karissamaṃ yojanāyamaṃ.

Soḷasamahāvāro

Paññattivārayojanā

Evaṃ dvāvīsatikhandhakānaṃ samvaṇṇanaṃ katvā idāni “parivāro”ti saṅghamārūlhassa vinayassa samvaṇṇanaṃ karonto ayamācariyo paṭhamaṃ tava anusandhidassanamukhena paṭiññaṃ kātukāmo āha “visuddhaparivārassā”tiādi. Tattha **visuddhaparivārassāti** visuddhāya catuparisāya parivāritassa, athavā visuddhena catuparisasaṅkhātena parivārena samannāgatassa bhagavatoti sambandho. Parivāre hi visuddhe tena parivārito, taṃparivārito vā bhagavāpi visuddhoyeva nāma hoti. Iminā samvaṇṇiyamānassa “parivāro”ti saṅghamārūlhassa desetabbadhammassa anurūpena desakabhūtaṃ bhagavato thomaṃ kataṃ hoti. **Dhammakhandhasarīrassāti** sīlādidhammakhandhasaṅkhātena sarīrena samannāgatassa, iminā samvaṇṇitānaṃ khandhakānaṃ anurūpena bhagavato thomaṃ kataṃ hoti. Pakati hesācariyānaṃ yadidaṃ desetabbadhammānurūpena desakassa thomaṃ (sārattha. ṭi. 1.ganthārambhakathā; visuddhi. mahāṭi. 1.1). **Anantarāti** anantare kāle.

Yoti vinayo. **Pubbāgatanti** pubbe vuttesu vibhaṅgakhandhakesu āgataṃ. **Nayanti** saddaattaviniicchayanayasāṅkhātaṃ sabbaṃ nayaṃ. **Hitvāti** cajitvā. **Anuttānatthavaṇṇananti** anuttānānaṃ padānamattavaṇṇanaṃ. Ayaṃ panettha yojanā – visuddhaparivārassa dhammakhandhasarīrassa bhagavato sāsane khandhakānaṃ anantarā “parivāro”ti yo vinayo saṅghamaṃ samārūlho, tassa vinayassa pubbāgataṃ nayaṃ hitvā idāni anuttānatthavaṇṇanaṃ karissāmīti.

1. Tattha **tatthāti** “tassa anuttānatthavaṇṇanaṃ karissāmī”ti yo parivārasaṅkhāto vinayo samvaṇṇetabbabhāvena vutto, tattha. **Saṅkhepatthoti** samāsatto. Yaṃ tenāti ettha tasaddassa niyamaniddesabhāvaṃ dassento āha “yo so”ti. Tattha **yoti** aniyama niddeso, tassa “tenā”ti niyamaṃ daṭṭhabbaṃ. **Soti** padālānkāro. Dvīsu hi sabbanāmesu yebhuyyena pubbameva padhānaṃ, pacchimaṃ pana vacanālānkāraṃ. Yo so bhagavā paññapesīti sambandho. **Ciraṭṭhitikatthanti** ciraṃ pañcavassasahassakālaṃ ṭhitikatthāya, “yācīto”ti ca “paññapesī”ti ca sambandho. Dhammasenāpatinā yācītoti sambandho. Yācīto hutvā paññapesīti yojanā. Tena bhagavatā paññattanti sambandho. “Jānatā passatā”ti dvinnāṃ padānaṃ kammameva dassento āha “tassa tassā”tiādi. Tattha “**paññattikāla**”nti

iminā “jānatā”ti padassa kammaṃ dasseti, “**dasa atthavase**”ti iminā “passatā”ti padassa kammaṃ.

Evam kammadassanena yojanānayaṃ dassetvā idāni karaṇadassanena aparampi yojanānayaṃ dassento āha “**apicā**”tiādi. “Pubbenivāsādīhī”tiādisaddena dibbacakkhussa visuṃ gahetabbatā iddhividhadibbasotaparacittavijānanāni gahetabbāni. Imehi padehi “jānatā, passatā”ti dvinnaṃ padānaṃ pañcannaṃ lokiyaabhiññānameva karaṇabhāvaṃ dasseti. **Tīhi vijjāhīti** pubbenivāsadibbacakkhuāsavakkhayaññāsañkhātāhi tīhi vijjāhi. **Chahi vā pana abhiññāhīti** saha āsavakkhayaññāna pañcalokiyābhiññāsañkhātāhi chahi abhiññāhi. **Sabbatthāti** sabbesu tīsu kālesu, pañcasupi ñeyyadhammesu. **Samantacakkhunāti** anāvaraṇasabbaññūtaññāsañkhātena samantacakkhunā. **Paññāyāti** sabbaññutapaññāya. **Tirokuṭṭādīti** ādisaddena tiropabbatādayo saṅgaṇhāti. **Mamsacakkhunāti** pasādacakkhunā. **Paṭivedhapaññāyāti** maggapaññāya. **Desanāpaññāyāti** sabbaññutapaññāya. Sabbaññutapaññāyeva hi atthato desanāpaññā nāma. Tena vuttaṃ “tassā paññāya tejasā. Abhidhammakathāmaggaṃ, devānaṃ sampavattayīti (dha. sa. aṭṭha. ganthārambhakathā 5). Imehi padehi avatthāvasena visuṃ visuṃ dvinnaṃ padānaṃ karaṇasambhavaṃ dasseti. **Arahatāti** arīnaṃ arānañca hatattā, paccayādīnañca arahattā arahatā. **Sammāsambuddhenāti** sammā sāmañca sabbadhammānaṃ buddhattā sammāsambuddhena, tena bhagavatāti sambandho. **Kenābhatanti** taṃ paṭhamaṃ pārājikaṃ kena ābhatam, iti sañkhepatthoti yojanā.

2. Pucchāvisajjane pana evamattho veditabboti yojanā. **Yaṃ tena...pe... pārājikanti** idaṃ padaṃ paccuddharaṇamattamevāti sambandho. Patiuddharaṇamattameva, na atthadassananti attho. **Ettāhāti** etesu padesu. **Ekā paññattīti** ekā paṭhamapaññattīti. **Anupaññattiyoti** pacchā ṭhapitā paññattiyoti.

Ettāvātāti ettakena “ekā paññattīti, dve anupaññattiyoti”ti vacanamattena vissajjitā hontīti sambandho. Tatiyaṃ pucchanti sambandho. Kasmā anuppannapaññattīti tasmim natthīti āha “ayaṃ hi”tiādi. Tattha **hi** yasmā aññatra natthi, tasmā natthīti yojanā. “Anuppanne dose paññattā”ti iminā anuppanne dose paññapetabbāti **anuppannapaññattīti** vacanattaṃ dasseti. **Sāti** anuppannapaññattīti. **Tasmāti** yasmā aññatra natthi, tasmā. **Sabbatthapaññattīti** ettha sabbasmim padese paññattīti sabbatthapaññattīti aluttasamāsaṃ dassento āha “majjhimadese cevā”tiādi. “Majjhimadese ceva paccantimajanapadesu cā”ti iminā “sabbatthā”ti padassa sarūpaṃ dasseti. Padesapaññattim apanetvā sabbatthapaññattim pārisesanayena dassento āha “vinayadharapaññāmenā”tiādi. Tattha **vinayadharapaññāmenāti** anussāvanācarīyapaññāmenā. **Etthevāti** majjhimadeseyeva. **Etehīti** catūhi sikkhāpadehi. **Sesānīti** catūhi sikkhāpadehi sesāni.

Sādhāraṇapaññattīti ettha sādhāraṇā nāma bhikkhubhikkhunīnamevāti āha “bhikkhūnañceva bhikkhunīnañcā”ti. **Idaṃ panāti** paṭhamapārājikaṃ pana, paññattanti sambandho. **Vinītakathāmatamevāti** vinītavatthupakāsakaṃ kathāmatameva. **Tāsanti** bhikkhunīnaṃ. **Byañjanamattamevāti** “sādhāraṇā”ti ca “ubhato”ti ca byañjanamattameva. **Ettāhāti** sādhāraṇapaññattītiubhatapaññattītipade.

“Nidāne anupaviṭṭha”nti iminā “**nidānogadha**”nti padassa sattamīsamaññāsañca **ogadhasaddassa** anupaviṭṭhatthañca dasseti. Ogāḷho hutvā dharati tiṭṭhatīti **ogadham**. Nanu nidānogadhe sati “paṭhamena uddesenā”ti vattabbaṃ, kasmā “dutiyaena uddesenā”ti vuttanti āha “nidānogadha”nti. **Nidānapariyāpannampi samānanti** nidānapariyāpannaṃ samānampīti yojanā. **Pisaddo** garahattho, pageva dutiye uddese pariyaṇneti dasseti. “Sīlavipattiādīna”nti vacanaṃ vitthārento āha “**paṭhamā hi**”tiādi.

Dvaṅgikenāti kāyacittasañkhātena dvaṅgikena. Nanu “ekena samuṭṭhānenā”ti vuttattā “kāyatoyevā”ti vattabbaṃ, atha kasmā “kāyato ca cittato ca samuṭṭhātīti”ti vuttanti āha “ettha hi”tiādi. **Ettāhāti** “ekena samuṭṭhānenā”ti vacane. **Cittanti** sevanacittaṃ. **Āpannosīti** tvaṃ āpanno asīti yojanā. **Āma āpannomhīti** āma ahaṃ āpanno amhīti yojanā. **Tāvadevāti** tasmim paṭijānakkhaṇeyeva. **Taṃ**

puggalanti pārājikamāpannaṃ taṃ puggalaṃ. **Tappaccayāti** tassa pārājikamāpannassa kāraṇā. “Na katamena samathena sammatī” ti yaṃ pana vacanaṃ vuttanti yojanā. **Tanti** vacanaṃ, vuttanti sambandho.

Vuttamātikā paññattīti vuttamātikāsaṅkhātā paññatti vinayo nāmāti yojanā. Mātikā hi yasmā paññapīyati saṅkhepena ṭhapīyati, pakāraṃ jānāpeti vā, tasmā **paññattīti** vuccati. “Padabhājanaṃ vuccatī” ti iminā vitthārena bhājiyati eṭāyati **vibhattīti** dasseti. **Vītikkamoti** kāyavācāvītikamo. So hi na saṃvarati kāyavācaṃ na pidahaṭṭīti **asaṃvaroti** vuccati. **Yesaṃ vattatīti** ettha vattatikiriyāya kattāraṃ dassento āha “vinayapiṭakaṅca aṭṭhakathā cā” ti. **Paguṇāti** vācuggatā. **Teti** te puggalā, dhārentīti sambandho. **Hīti** saccaṃ, yasmā vā. **Etassāti** paṭhamapārājikassa. **Kenābhatanti** ettha bharadhātuyā dhāraṇaposaṇatthesu (pāṇinī 108 dhātupāṭhe) dhāraṇatthaṃ dassento āha “kena ānīta” nti. “Paramparāya ānīta” nti iminā **paramparābhatanti** padassa tatiyāsamāsaṃ dasseti. Athavā “kenābhata” nti pucchāya anurūpaṃ yakāralopavasena vākyanti dasseti.

3. Upāli dāsako cevātiādikā gāthāyo kimatthaṃ kehi ṭhapitāti āha “idānī” tiādi. **Tanti** paraṃ paraṃ. **Tatthāti** tāsū gāthāsū. **Yanti** vacanaṃ. **Iminā nāyēnāti** paṭhamapārājikassa pucchāvisajjane vuttēna iminā nāyēna.

Iti mahāvibhaṅge paññattivāraṇṇanāya yojanā samattā.

Katāpattivārādivaṇṇanā

157. Itoti paññattivārato, paraṃ vuttā satta vārā uttānatthā evāti yojanā. **Katāpattivāroti** “katāpattī” ti padena lakkhito vāro. Eseva nayo sesesupi. **Tadanantaroti** tesam sattanāṃ vārānaṃ anantare vutto. **Samuccayavāroti** saṃ ekato āpattivipattīdayo uciyanti sampiṇḍiyanti etthāti samuccayo, soyeva vāro samuccayavāro.

188. Tatoti tehi aṭṭhahi vārehi, paraṃ vuttāti sambandho. Paccayavasena vutto eko paññattivāroti yojanā. **Paccayavasēnāti** paccayasaddassa vasena. **Tassāti** paccayassa. **Tepīti** aṭṭha vārāpi. **Itīti**ādi nigamaṇaṃ. **Tatoti** mahāvibhaṅgato, paraṃ āgatāti sambandho. Evaṃ ime dvattiṃsa vārāti yojanā. **Hīti** saccaṃ, yasmā vā. **Etthāti** dvattiṃsavāresu.

Samuṭṭhānasīsaṇṇanā

257. Tadanantarāyāti tesam dvattiṃsavārānaṃ anantaraṃ vuttāya samuṭṭhānakathāya evamattho veditabboti yojanā. **Anattā iti nicchitāti** anattāteva vinicchitā. Iminā **anattā iti nicchayāti** ettha cidhātuyā vinicchayatthaṃ dasseti. “Aniccākārādīhī” ti iminā **sabhāgadhammānanti** ettha aniccākārādīhi samāno bhāgo etesanti **sabhāgā**, teyeva dhammā **sabhāgadhammāti** vacanatthaṃ dasseti. **Nāmamattampīti** aniccādināmamattampi. **Pisaddena** pageva nāmiko aniccādisabhāvoti dasseti. **Na paññāyatīti** na khāyati. Iminā **na nāyatīti** ettha ñādhātuyā khāyanatthaṃ dasseti. **Dukkhaḥāninti** ettha dukkhaṃ jahātīti **dukkhaḥānīti** dassento āha “dukkhaghātana” nti. Dukkhaṃ hanatīti **dukkhaghātano**, saddhammo, taṃ. “**Khandhakā yā ca mātikā**” ti vattabbe sukhuccāraṇatthāya rassavasena pāṭho atthīti āha “khandhakā ya ca mātikā” ti. **Samuṭṭhānaṃ niyatokatanti** (saṃ. ni. 1.216) ettha “samuṭṭhānaṃ niyatokata” nti vattabbe “parosahassa” ntiādīsū viya okārāgamavasena “samuṭṭhānaniyatokata” nti vuttanti āha “samuṭṭhānaṃ niyatokata” nti. **Etenāti** “samuṭṭhānaṃ niyatokata” nti pāṭhena. **Paccetabboti** pati etabbo, paṭimukhaṃ ñātabboti attho. **Aññehīti** tīhi sikkhāpadehi aññehi sikkhāpadehi.

Tatthāti sambhedanidānavacanesu. Sambhedavacanena paccetabbanti sambandho. **Hīti** saccaṃ. Tāni tīṇi sikkhāpadāni ṭhapetvāti sambandho. **Paññattidesasaṅkhātanti** paññattiṭṭhānabhūtadesasaṅkhātāṃ. “Imāni tīṇī” ti iminā “dissantī” ti kiriyāya kattāraṃ dasseti.

“Paññāyanti”’ti iminā disadhātuyā khāyanattham dasseti. **Tatthāti** samuṭṭhānaniyamasambhedanidānasāṅkhātesu tīsu, niddhāraṇe bhummaṃ. **Itaraṃ panāti** samuṭṭhānaniyamasambhedehi aññaṃ pana.

Ālavīti ālavīyaṃ. Sakkesu bhaggesu cāti ettha janapadanāmattā bahuvacanavasena vuttaṃ.

Dvīsu vibhaṅgesu paññattaṃ yaṃ sikkhāpadaṃ uddisantīti yojanā. “Vibhaṅgesū”’ti iminā **vibhaṅgeti** ettha sukāralopoti dasseti. **Tassāti** sikkhāpadassa. **Yathāñāyanti** yuttīyā anurūpaṃ. **Tanti** samuṭṭhānaṃ. **Me suṇāthāti** mama santikā suṇātha. **Itīti** ayamatto.

Kathinanti paṭhamakathinasamuṭṭhānaṃ. **Ananuññātāya saddhinti** ananuññātasamuṭṭhānena saddhiṃ. **Sadisā idha dissareti** ettha **idhasaddo** atthapakaraṇavasena ubhatovibhaṅgavisayoti āha “idha ubhatovibhaṅge”’ti. “Sadisānī”’ti iminā **sadisāti** ettha nikārassākārādeso dassito. “Dissantī”’ti iminā **dissareti** ettha antisaddassa rekāro (niruttidīpaniyaṃ 570 sute) dassito.

Samuṭṭhānasīso

Paṭhamapārājikasamuṭṭhānavañṇanā

258. Kimattham “methunaṃ sukkasaṃsaggo”’tiādivacanaṃ vuttanti āha “idānī”’tiādi. Tattha **tatthāti** “methunaṃ sukkasaṃsaggo”’tiādivacane. **Samuṭṭhānasīsanti** samuṭṭhānānaṃ, samuṭṭhānesu vā sīsam. **Sesānīti** paṭhamapārājikato sesāni pañcasattati sikkhāpadāni. **Tenāti** paṭhamapārājikena. “Sukkasamsaggo”’tiādivacanaṃ saṃvaṇṇento āha “tathā”’tiādi. Tattha **tatthāti** “sukkasamsaggo”’tiādivacane.

Khuddakavaṇṇanāvasāneti khuddakaṭṭhakathāya avasāne.

Liṅgavipariyāyoti liṅgavipallāso. **Kāyamānasikā katāti** ettha kāyamānasesu pavattā kāyamānasikāti vutte samuṭṭhānāti āha “kāyacittasamuṭṭhānā katā”’ti.

Dutiyapārājikasamuṭṭhānavañṇanā

259. Idaṃ samuṭṭhānaṃ ekaṃ samuṭṭhānasīsanti sambandho. “Adinnādāna”’nti iminā **adinnanti** ettha samudāyanāme ekadesavohāroti dasseti. **Sesānīti** dutiyapārājikato sesāni ekūnasattati sikkhāpadāni. **Tenāti** dutiyapārājikena. **Tatthāti** “viggahuttarī”’tiādivacane. **Viggahuttarīti**ādivadānaṃ byañjane ādaramakatvā atthameva dassetuṃ vuttaṃ “manussaviggahuttarimanussadhammasikkhāpadānī”’ti. **Aniyatā dutiyikāti** āpattiṃ apekkhitvā pāliyaṃ ithiliṅgavasena vuttaṃ, aṭṭhakathāyaṃ pana sikkhāpadaṃ apekkhitvā napuṃsakaliṅgavasena dutiyanti vuttaṃ.

Samuṭṭhānā tikā katāti ettha “tikasamuṭṭhānā”’ti vattabbe padavipariyāyavasena kakārassa dīghavasena samuṭṭhānā tikāti vuttanti dassento āha “tikasamuṭṭhānā katā”’ti.

Sañcarittasamuṭṭhānavañṇanā

260. “Sañcarī”’ti idaṃ tāva sañcarittaṃ nāma ekasamuṭṭhānasīsaṃ, sesāni tena sadisāni.

Vibhaṅge āgatena “riñcantī”’ti (pārā. 576) padena eḷakalomadhovāpanasikkhāpadaṃ upalakkhitvā vuttanti āha “vibhaṅge riñcanti uddesanti āgata”’nti.

“Yāva dvāraḥkosā aggaḷaṭṭhapanāya” iti (pāci. 135-136) ca “aññātikāya bhikkhuniyā cīvaram dadeyya” iti (pāci. 169) ca “cīvaram sibbeyya” iti (pāci. 176-177) ca vuttasikkhāpadattayanti yojanā.

“Samaṇacīvarena cā” ti evaṃ vacanaṃ vuttanti sambandho. “Samaṇacīvaram dadeyyā” ti idaṃ (pāci. 917) vacanaṃ sandhāyāti sambandho.

Samanubhāsanāsamuṭṭhānavaṇṇanā

261. Bhedanti idaṃ samanubhāsanam nāma ekaṃ samuṭṭhānasīsam, sesāni tena sadisāni.

Kathinasamuṭṭhānavaṇṇanā

262. Ubbhatanti idaṃ kathinasamuṭṭhānam nāma ekaṃ samuṭṭhānasīsam, sesāni tena sadisāni.

Āvasathena saddhinti āvasathasaddena saddhiṃ.

Eḷakalomasamuṭṭhānavaṇṇanā

263. “Eḷakalomā” ti idaṃ eḷakalomasamuṭṭhānam nāma ekaṃ samuṭṭhānasīsam. **Itoti** yathāvuttato. **Pāḷinti** mātikāpāḷiṃ. **Virajjhivāti** pubbāparato virādheta. **Yathāti** yenākārena. **Panasaddo** anuggahattho. Kiñcāpi likhanti, pana tathāpīti yojanā. **Evanti** tathākārena. **Atthānukkamoti** atthassa anukkamo.

“Abhikkhukāvā sena cā” ti etaṃ vacanaṃ vuttanti sambandho. “Abhikkhuke āvāse vassaṃ vaseyyā” ti (pāci. 1047) idaṃ vacanaṃ sandhāyāti sambandho. “**Bhikkhuni**” tiādinā vuttānīti sambandho. Ādisaddena “sikkhamānā ca sāmaṇerī gihiniyā” ti pāṭhaṃ saṅgaṇhāti.

Padasodhammasamuṭṭhānavaṇṇanā

264. Padanti idaṃ padasodhammasamuṭṭhānam nāma ekaṃ samuṭṭhānasīsam, sesāni tena sadisāni. “Tathā atthaṅgata cā” ti etaṃ vacanaṃ vuttanti sambandho. “Atthaṅgate sūriye ovadeyyā” ti (pāci. 154-155) idaṃ vacanaṃ sandhāyāti sambandho. Anokāso ca...pe... sandhāya vuttanti (pāci. 1219-1221) etthāpi eseva nayo.

Addhānasamuṭṭhānavaṇṇanā

265. Addhānanti idaṃ addhānasamuṭṭhānam nāma ekaṃ samuṭṭhānasīsam, sesāni tena sadisāni.

Theyyasatthasamuṭṭhānavaṇṇanā

266. Theyyasatthanti idaṃ theyyasatthasamuṭṭhānam nāma ekaṃ samuṭṭhānasīsam, sesāni tena sadisāni. “**Byūhena sattamā**” ti idaṃ vacanaṃ vuttanti yojanā. **Tadanantaramevāti** tassa sikkhāpadassa anantarameva, “āgata” iti sambandho.

Dhammadesanāsamuṭṭhānavaṇṇanā

267. Dhammadesanāsamuṭṭhāne samuṭṭhānasīsam natthi, sabbāni ekadasa sikkhāpadāni sampiṇḍetvā dhammadesanāsamuṭṭhānānīti vuttāni. **Evanti**ādi nigamanaṃ. **Tesanti** tesam sikkhāpadānaṃ. **Sambhinnasamuṭṭhānanti** saṃsaggasamuṭṭhānaṃ. **Tividhanti** bhūtārocanacorivutthāpanaanuññātasamuṭṭhānavasena tippakāraṃ. **Tanti** niyatasamuṭṭhānaṃ, hotīti

sambandho. Puna **tanti** niyatasamuṭṭhānaṃ, dassetunti sambandho. Puna **tanti** vacanaṃ. **Nettidhammānulomikanti** ettha kāyavācaṃ neti vinetīti **netti**, kāyavācaṃ neti vineti ettha, etāyāti vā **netti**. **Dhammoti** pāli. Sā hi yasmā atthaṃ dhāreti, tasmā dhammoti vuccati. Nettiyeva dhammo **nettidhammo**, tassa anulomikaṃ nettidhammānulomikaṃ. Tena vuttaṃ “vinayapāḷidhammassa anuloma”nti.

Iti samuṭṭhānasāvāṇṇanāya yojanā samattā.

Antarapeyyāla katipucchāvāraṇṇanā

271. Idāni vuttoti sambandho. “Idānī”ti padena sambandhattā **vuttoti** ettha **tapaccayo** paccuppannakālikoti daṭṭhabbo.

Tatthāti mātikāyaṃ, pucchāsu vā. **Āgatāpattipucchāti** āgatāpattiyā pucchā. **Hīti** visesajotako, hi visesaṃ vakkhāmīti attho. **Etthāti** “kati āpattikkhandhā”ti dutiyapade. “Rāsivasenā”ti iminā **khandhasaddassa** rāsathāṃ dasseti. **Vinītavatthūnīti** ettha vinītasaddo vinayapariyāyoti āha “vinayapucchā”ti. Nanu vinītavinayasaddānaṃ saddato nānattā atthatoṇi nānaṃ, kasmā pana “vinayapucchā”ti vuttanti āha “vinītaṃ...pe... eka”nti. **Idanti** padattayaṃ. **Atthato ekanti** atthatoyeva ekaṃ, na saddato. **Vinītavatthūnīti** āpattivinayakāraṇattā vinītavatthūni. **Yesūti** agāra vesu. **Satīti** santesu. Ettha ca yesu satī āpattiyō na honti, asati honṭīti vākyampi avuttasiddhinayena gahetabbaṃ. **Yesūti** gāra vesu. **Teti** agāravagāra ve. Yasmā pana natthīti sambandho. **Vipattibhāvapucchāti** vipattibhāvassa pucchā. Pucchiyati imāyāti **pucchā**. **Vivādamūlāni anuvādamūlānīti** imā pucchāyo mūlapucchāti sambandho. Potthakesu “imānī”ti nikārena saha pāṭho atthi, so apāṭhoyeva. **Mūlapucchāti** pucchiyanti imāhīti pucchā, mūlānaṃ pucchā mūlapucchā. “Adhikaraṇa”ntiādīsu “vuttaṃ” itī sambandho. **Tesaṃyevāti** adhikaraṇānaṃyeva. Ayamettha mātikā.

Niddese **mātikāyāti** pātimokkhe. **Vibhaṅgeti** padabhājanīyaṃ, āgatavasena vuttāti yojanā. Ayamettha niddeso.

Paṭiniddese **āratīti**ādīpadānaṃ vacanatthaṃ dassento āha “**ārakā**”tiādi. Tattha “**ārakā**”ti iminā **āratīti** ettha āupasaggassa atthaṃ dasseti. **Etehīti** āpattikkhandhehi, ārakāti sambandho. “**Ramatī**”ti iminā tipaccayo katvatthe hotīti dasseti. **Ratīti** ramaṇaṃ. Iminā tipaccayo bhāvatthepi hotīti dasseti. **Vināti** etehi āpattikkhandhehi vinā. Iminā **viratīti** ettha vityūpasaggassa atthaṃ dasseti. **Paccekanṭi** pati ekaṃ, **paṭisaddo** vicchatthajotako, visuṃ visunti attho. Iminā **paṭiviratīti** ettha paṭityūpasaggassa atthaṃ dasseti. Virati paṭiviratīti etthāpi tipaccayo bhāvatthepi veditabbo. **Veranti** anattakarattā viramitabbanti virāṃ, tadeva veraṃ, rāgādiakusaladhammā. Te hi verahetuttā veranti vuccanti. **Etāyāti** viratiyā. Iminā **akiriyāti** ettha ririyaṃpaccayo karaṇatthe hotīti dasseti. Yaṃ āpattikkhandhakaraṇanti yojanā. **Tassāti** āpattikkhandhakaraṇassa. **Paṭipakkhatoti** viruddhabhāvato. Iminā **akaraṇanti** ettha akāro viruddhatthoti dasseti. **Āpattikkhandhaajjhāpattiyāti** āpattikkhandhānaṃ atikkamitvā āpajjanassa. “**Velanato**”ti iminā velatīti **velā**, velanaṃ vā velāti vacanatthe dasseti. **Niyyānanti** maggaṃ. Maggo hi nibbānaṃ āramaṇakaraṇavasena yāti gacchatīti **niyyānanti** vuccati. “**Bandhati**”ti iminā sidhātuyā bandhanatthaṃ dasseti. “**Nivāreti**”ti iminā bandhadhātuyā adhippāyatthaṃ. **Etanti** “**setū**”ti nāmaṃ. **Taṃ setunti** āpattikkhandhasaṅkhātāṃ taṃ setuṃ. Ettha kesuci potthakesu “so setū”ti ca “**etāya paññattiyā**”ti ca pāṭho atthi, so apāṭhoyeva.

Buddhe agāravādīsu evaṃ vinicchayo veditabboti yojanā. **Yoti** yo koci, na gacchatītiādīsu sambandho. **Dharamāneti** tiṭṭhamāne, saṃvijjamāneti attho. **Upaṭṭhānanti** upaṭṭhānaṭṭhānaṃ, upaṭṭhānatthaṃ vā. **Etassāti** yassa kassaci gahaṭṭhassa vā pabbajitassa vā. **Dhammassavananti** dhammassavanaṭṭhānaṃ, dhammassavanatthaṃ vā. **Dhammassavanagganti** dhammassavanaṃ gaṇhanti etthāti dhammassavanaggo, dhammassavanaṃgaṇḍapo. Atha vā dhammassavanaṃ gaṇhātīti dhammassavanaggo, dhammassavanaṭṭhāne samāgamajano, taṃ dhammassavanaggaṃ. **Cittikāraṇanti**

apacāyanākāraṃ. Vikkhitto vā anādaro vā hutvā nisīdatīti yojanā. **Kāyapāgabbhiyanti** bhusaṃ garati aññe pīleti anenāti **pagabbo**, atimāno, oṭṭhajo tatiyakkharo. Pagabbassa bhāvo pāgabbhiyaṃ, kāyena pāgabbhiyaṃ kāyapāgabbhiyaṃ (vajira. ṭi. parivāra 271; sāratta. ṭi. parivāra 3.271; vi. vi. ṭi. parivāra 2.271 saṃ. ni. aṭṭha. 2.2.146; a. ni. aṭṭha. 3.6.82-84; su. ni. aṭṭha. 1.144), kāyānācāraṃ. **Tisso sikkhāti** adhisīlasikkhādikā tisso sikkhā. Pamajjanaṃ **pamādo**, sativippavāsoti āha “pamāde ca sativippavāse”ti. **Āmisapaṭisandhāranti** āmisena attano, paresañca antarassa paṭisandhanaṃ āmisapaṭisandhāro, tathā dhammapaṭisandhāro.

272. Sattharipi agāravotiādīnaṃ atthoti sambandho. “Anīcavuttī”tiādīnā **appatissoti** padassa adhippāyatthaṃ dasseti, saddattho panevaṃ veditabbo, paṭimukhaṃ ādarena satthuvacanaṃ asuñanto appatisso nāmāti. **Ajjhattaṃ vāti** ettha niyakajjhataḍḍisu catūsu niyakajjhatabhāvañca sattamīvibhattiyā amādesabhāvañca dassento āha “attano santāne vā”ti. “Attano pakkhe vā”ti iminā attano cittasantāneti atthaṃ paṭikkhipati. **Tatra tumheti** ettha tasaddassa visayaṃ dassento āha “tasmim ajjhatabhiddhābhede”ti. **Saparasantāneti** attaparasantāne. **Pahānāyāti** ettha hādhātuyā karaṇaṃ āyasaḍḍassa tadatthabhāvañca dassento āha “mettābhāvanādīhi nayehi pahānattha”nti. **Mettābhāvanādīhīti** ādisaddena karuṇābhāvanādīm saṅgaṇhāti. **Tanti** vivādamūlaṃ. “Appavattibhāvāyā”ti iminā **anavassavāyāti** ettha avapubba sudhātuyā pavattanatthaṃ dasseti.

Sandiṭṭhiparāmāsīti ettha sassa attano idaṃ saṃ, saṃ diṭṭhiṃ parato āmasatīti sandiṭṭhiparāmāsīti dassento āha “sakameva diṭṭhiṃ parāmasatī”ti. “Ya”ntiādīnā parāmasanākāraṃ dasseti. **Ādhānaggāhīti** ettha ābhuso ṭhiyate ādhānanti vacanatthena **ādhānasaddo** daḷhapaṭiyāyoti āha “daḷhaggāhī”ti. Daḷhaṃ gaṇhātīti **daḷhaggāhī**.

273. Anuvādamūlaniddeso kiñcāpi samānoti yojanā. **Atha khoti** tathā samānopi, ayamettha visesoti sambandho. Vivadantānaṃ puggalānanti yojanā. **Tathā vivadantāti** tenākārena vivadantā, anuvadantīti sambandho. “Asukaṃ nāma vipattim āpanno”ti vuttamevatthaṃ āpattiyā sallakkhetvā dassento āha “pārājikaṃ āpannosī”tiādi. **Etthāti** anuvādamūle. **Visesoti** vivādamūlato viseso. Vivadantānaṃ kodhūpanāhādīni vivādamūlāni, anuvadantānaṃ anuvādamūlānīti vuttaṃ hoti.

274. Mettaṃ kāyakammaṃ nāmāti ettha mettā etassatthīti mettaṃ, kāyakammaṃ, mettacittasahagataṃ kāyakammanti vuttaṃ hoti. Tena vuttaṃ “mettacittena kataṃ kāyakamma”nti. Sammukhaparammukhānaṃ vitthāraṃ dassento āha “tatthā”tiādi. Tattha **tatthāti** tesu sammukhaparammukhesu. **Kāyakammaṃ nāmāti** mettaṃ kāyakammaṃ nāma. Therānaṃ dānaiti sambandho. **Ubhayehipīti** navakattherehipi. **Tesūti** navakattheresu. **Avamaññanti** avamaṇaṃ. Attano dunnikkhattānaṃ paṭisāmanaṃ viya paṭisāmananti yojanā. “Mettākāyakammasaṅkhāto”ti iminā **ayampi dhammoti** ettha dhammasarūpaṃ dasseti. **Pisaddo** upari vakkhamāne dhamme apekkhati. “Saritabbo”ti iminā **anīyasaddo** kammavācakoti dasseti. **Satijanakoti** sabrahmacārīnaṃ satijanako. Tassa padassa adhippāyaṃ dassento āha “yo na”ntiādi. Tattha **yoti** puggalo. **Nanti** mettaṃ kāyakammaṃ. Taṃ puggalaṃ anussarantīti sambandho. **Yesanti** sabrahmacārīnaṃ. **Teti** sabrahmacārīno. Pasannacittā hutvāti sambandho. “Piyāṃ karotī”ti iminā **piyakaraṇoti** padassa piyaṃ karotīti piyakaraṇoti vacanatthaṃ dasseti. Eseva nayo **garukaraṇoti** etthāpi. “Saṅgahetabbabhāvāyā”ti iminā **saṅgahāyāti** padassa bhāvappadhānakammaṇiddesabhāvaṃ dasseti. Saṅgahetabboti **saṅgaho**, tadatthāya. **Tehīti** sabrahmacārīhi. “Samaggabhāvāyā”ti iminā samaggassa bhāvo **sāmaggīti** vacanatthaṃ dasseti.

Paggayha vacananti paggahetvā vacanaṃ. **Vihāreti** ādhāre bhummaṃ, there asanteti yojanā. **Tanti** therāṃ kadā āgamissati nukhoti yojanā. **Mamāyanavacananti** mamāyanākārena pavattaṃ vacanaṃ. **Mettāsinehasiniddhānīti** mettāsaṅkhātena sinehena sinehitāni. **Nayanānīti** cakkhūni. “Appābādho”ti iminā **arogoti** padasseva atthaṃ dasseti. Niccābādhena vā arogo, āgantukābādhena appābādho, ajjhatabādhena vā arogo, bahiddhābādhena appābādho, kāyābādhena vā arogo, cittābādhena appābādho. **Samannāharaṇanti** punappunaṃ manasikaraṇaṃ.

Na puggalaṃ paṭivibhajitvā bhuñjatīti yojanā. Tadatthaṃ vitthārento āha “**yo hī**”tiādi. Tattha **yoti** puggalo, bhuñjatīti sambandho. “Ettakaṃ...pe... bhuñjissāmi”ti iminā āmisapaṭivibhattabhogibhāvaṃ dasseti. “Ettakaṃ vā asukassa ca...pe... bhuñjissāmi”ti iminā puggalapaṭivibhattabhogibhāvaṃ dasseti. **Ayanti** puggalo. **Ābhatanti** gāmādito ānītaṃ. **Adātumpīti** pisaddena dātumpi vaṭṭatīti dasseti. Dānañhi nāma na kassaci vāritaṃ. **Sabbesanti** dussīlasīlavantānaṃ. **Vuttanti** aṭṭhakathāyaṃ (dī. ni. aṭṭha. 2.141; ma. ni. aṭṭha. 2.492; a. ni. aṭṭha. 3.6.11) vuttaṃ. **Viceyyāti** vicinitvā. **Dātumpīti** pisaddena avicinitvā sāmāññato dātumpi vaṭṭatīti sampiṇḍeti. Nanu evaṃ sati puggalavibhāgo kato nāma hoti, kasmā viceyya dātumaṃ vaṭṭatīti āha “na hī”tiādi. **Hīti** yasmā. **Eteti** gilānādayo. Idaṃ padaṃ vicinitvāti pade kammaṃ, “dentenā”ti pade sampadānaṃ. **Hīti** saccaṃ. **Iti ayanti** iti manasikatvā ayaṃ saraṇiyadhammapūraho.

Akhaṇḍānītiādīsū paṭhamamaṃ tāva khaṇḍachiddasabalakammāsāni dassetvā tesamaṃ paṭipakkhavasena akhaṇḍādīni dassento āha “yassā”tiādi. Tattha **yassāti** bhikkhussa, sikkhāpadaṃ bhinnanti sambandho. **Sattasu āpattikkhandhesūti** ādhāre bhummaṃ, sikkhāpadanti sambandho. Āpattiñhi paṭicca sikkhāpadassa paññattatā āpatti tassa visayo hoti. **Ādimhi vā ante vāti** sikkhāpadānaṃ ādimhi vā ante vā. **Vāsaddo** aniyamavikappattho. Sikkhāpade bhinne āpattisambhavato vuttaṃ “sikkhāpadaṃ bhinna”nti. **Khaṇḍamaṃ nāmāti** chinnaṃ nāma. **Vemajjheti** sikkhāpadānaṃ vemajjhe. **Bhinnanti** sikkhāpadaṃ bhinnaṃ. **Chiddamaṃ nāmāti** vivaraṃ nāma. Dve tīni sikkhāpadānīti sambandho. **Sabalaṃ nāmāti** citraṃ nāma. **Bhinnānīti** sikkhāpadāni bhinnāni. **Kammāsaṃ nāmāti** vicitraṃ nāma. Ettha ca ekasmiṃ thāne ekena visabhāgavaṇṇena citraṃ sabalaṃ nāma, nānāthāne nānāvaṇṇena vicitraṃ kammāsaṃ nāmāti ayametesamaṃ viseso. Khaṇḍādīnaṃ viparivattanavasena akhaṇḍādīni dassento āha “yassa panā”tiādi. **Abhinnānisīlānīti** abhinnāni sikkhāpadasīlāni. **Tāni panāti** sīlāni pana. “**Etānī**”ti padaṃ padālaṅkāramattaṃ. **Bhujissabhāvakaraṇatoti** taṇhādāsabyato mocetvā bhujissakaraṇabhāvato. Iminā “bhujissabhāvakaraṇānī”ti vattabbe uttarapadalopavasena evaṃ vuttanti dasseti. Bhujissānīti vuccantīti sambandho. **Viññūhīti** buddhādīhi sappurisehi. **Upacārasamādhiṃ appanāsamādhiṃ vāti** ettha vāsaddo samuccayattho. Upacārasamādhiṃca appanāsamādhiṃ cāti hi attho. “Samvattayanti”ti iminā **samādhisamvattanikānīti** ettha anīyasaddo bahulaṃ kattuvācakoti dasseti. **Sīlasāmaññagatoti** ettha samānassa bhāvo sāmāññaṃ, taṃ gatoti sāmāññagato, sīlena sāmāññagato sīlasāmaññagato, hutvā viharatīti yojanā. Tena vuttaṃ “samānabhāvūpagatasīlo viharatī”ti.

Yāyaṃ diṭṭhīti ettha “diṭṭhī”ti sāmāññagatassāpi saddassa “ariyā”ti saddantarassannidhānena visesavisayattā sammādiṭṭhīti āha “maggasampayuttā sammādiṭṭhī”ti. “Maggasampayuttā”ti iminā lokiyasammādiṭṭhiṃ paṭikkhipati. **Niddosāti** visuddhattā, uttamattā vā niddosā. Iminā **ariyasaddo** niddosatthavācako anipphannaṃ paṭipadikoti dasseti. **Niyyātīti** nibbānaṃ yāti. Iminā anīyasaddo bahulaṃ kattuvācakoti dasseti. Yo tathākārī hoti, takkarassāti yojanā. **Tathākārīti** tāya maggasampayuttāya sammādiṭṭhiyā kārī hoti. Iminā tāya sammādiṭṭhiyā karotīti **takkaroti** vacanatthaṃ dasseti. **Dukkhaḅbhayāyāti** ettha khīyanaṃ khayō, dukkhassa khayō dukkhaḅbhayō, tadatthāyāti dassento āha “sabbadukkhaḅbhayaṭṭha”nti. **Sesanti** vuttavacanato sesamaṃ vacanaṃ.

Iti katipucchāvāraṇṇanāya yojanā samattā.

Khandhakapucchāvāro

Pucchāvissajjanāvāṇṇanā

320. Upasampadakkhandhakanti mahākhandaṃ. “Nidānena ca niddesena ca saddhi”nti iminā saha nidānenāti **sanidānaṃ**, saha niddesenāti **saniddesanti** vacanatthaṃ dasseti. Ettha **nidānenāti** sikkhāpadapaññattidesasaṅkhātena nidānena. **Niddesenāti** puggalādiniddesena. **Tatthāti** upasampadakkhandhake. **Samukkaṭṭhapadānanti** ettha samukkaṭṭhasaddo uttamapariyāyoti āha “uttamānī”ti. **Padānīti** “na bhikkhave ūnavīsativasso puggalo upasampādetabbo”ti (pāci. 402-403; mahāva. 124) ādinā nayena vuttāni padāni. Imehi padehi “samukkaṭṭhāni padāni

samukkaṭṭhapadānī’ti vacanattamaṃ dasseti. **Iti** ayamatto. Kasmā panettha “samukkaṭṭhapadānaṃ kati āpattiyo” ti padānameva sāmivasena niddeso kato, nanu āpattiyo nāma puggalānaññeva hontīti āha “**yena yena hī**”tiādi. **Hīti** yasmā. Yena yena padena paññattāti sambandho. **Sā** sāti āpatti. **Dve āpattiyoti** ettha dvinnamaṃ āpattīnaṃ sarūpaṃ dassento āha “pācittiyamaṃ, dukkaṭa”nti.

Nassanteteti nassantu ete. **Vinassanteteti** vinassantu ete bhikkhūti attho. **Tehīti** bhikkhūhi. **Vadatoti** vadantānaṃ. Sesesu uposathakaraṇesūti sambandho. “Dukkaṭāpattiyevā”ti iminā **ekā āpattīti** ettha atthapakaraṇādivasena dukkaṭāpattiyevāti dasseti.

Pavāraṇakkhandhakepīti pisaddo uposathakkhandhakaṃ apekkhati.

Cammaṣaṃyuttepīti cammena ṣaṃyuttaṃ katvā desite khandhakepi, cammakhandhakepīti attho. **Pisaddo** pavāraṇakkhandhakaṃ apekkhati. **Bhesajjakkhandhakepīti** pisaddo cammakhandhakaṃ apekkhati. **Samantāti** āngajātassa samantato.

Tatthāti kathinakkhandhake. **Cīvarasaṃyutteti** cīvarakkhandhake.

Campeyyaketi campeyyakkhandhake. **Samuccayakkhandhakesupīti** pisaddo campeyyakkhandhakaṃ apekkhati.

Samathakkhandhake imā dve āpattiyo hontīti yojanā. Eseva nayo sesesupi. **Khuddakavatthuketi** khuddakavatthukkhandhake. **Garubhaṇḍavissajjaneti** garubhaṇḍassa vissajjane.

Saṅghabhedeti saṅghabhedakkhandhake. “Samācāraṃ pucchissanti vutte vattakkhandhake”ti iminā **samācārasaddena** vattakkhandhakaṃ gahetabbanti dasseti. **Sāti** dukkaṭāpatti. “Tathā”ti padena “ekā dukkaṭāpattiyevā”ti padaṃ atidisati. “Pātimokkhaṭṭhapane”ti iminā pāliyaṃ **ṭhapanamaṃ pucchissanti** ettha “pātimokkha”ntiādi padassa lopamaṃ dasseti. **Pañcasatikasattasatikēsūti** pañcasatikakkhandhakasattasatikakkhandhakesu. **Āropitoti** ettha rupadhātuyā dvikammikattā, nyādigāṇattā ca “dhammo”ti padhānakammameva vuttaṃ, na “saṅgaha”nti apadhānakammaṃ. Tena vuttaṃ “dhammo saṅgaha”nti. **Tatthāti** pañcasatikasattasatikēsūti.

Iti khandhakupucchāvaṇṇanāya yojanā samattā.

Ekuttarikanayo

Ekuttarikanayo ekakavāraṇṇanā

321. Evaṃ khandhakupucchāya vaṇṇanaṃ katvā idāni ekuttarikanayassa taṃ karonto āha “āpatti... pe... naye”ti. Tattha ekuttarikanaye evaṃ vinicchayo veditabboti yojanā. “Cha āpattisamuṭṭhānāni”ti iminā samuṭṭhānāni āpattiṃ karontīti atthena **āpattikarā** nāmāti dasseti. **Etesanti** channaṃ āpattisamuṭṭhānaṃ. **Hīti** yasmā, āpajjātīti sambandho. **Sikkhāpade cāti** mātīkāsikkhāpade ca. **Lahukā āpattīti** ettha appasāvajjattā na lahukā nāma hoti, lahukena pana vinayakammenāti āha “lahukena vinayakammena visujjanato”ti. **Pañcavidhāti** thullaccayādivasena pañcapakārā. **Kenacīti** lahukena vā garukena vā kenaci ākārena. Saṃvijjati gihibhāvato avaseso samaṇabhāvo etissāti **sāvasesā**, paṭipakkhavasena **anavasesā**. **Dve āpattikkhandhāti** pārājikasāṅghādisesavasena dve āpattikkhandhā.

“Karontī”ti iminā **antarāyikāti** ettha ṇikapaccayassa atthamaṃ dasseti. Antarāyikā āpattiyo sabbathā antarāyikā hontīti āha “antarāyikamaṃ āpanassāpī”tiādi. Desetvā suddhipattassāti sambandho. **Lokavajjāti** lokehi vajjetabbā. **Paṇṇattivajjāti** bhagavato paṇṇattiyā vajjetabbā. **Yanti** yaṃ āpattiṃ āpajjātīti sambandho. **Karontoti** kiriyamānato. Ettha hi mānasaddassa antādeso. Iminā karaṇamaṃ

kiriyanti bhāvattham dasseti. **Āpajjātī** puggalo āpajjati. Sā āpatti kiriyato samuṭṭhitā nāmāti yojanā. Kā āpatti viyāti āha “pārājikāpatti viyā”ti. Eseva nayo anantaravākyesupi.

Pubbāpattīti ettha pubbasaddo paṭhamatthoti āha “paṭhamam āpannāpattī”ti. “Āpannā”ti padena majjheloṇam dasseti. **Pacchā āpannāpattī**ti vattabhedadukkaṭṭāpatti. **Mūlavisuddhiyā**ti mūle kāyaci āpattiyā amissattā visuddhiyā āpattiyā. Kurundiyam vuttanti sambandho. **Idampī**ti kurundiyam vuttavacanampi. **Pisaddena** purimam mahāaṭṭhakathāvacaṇam apekkhati. **Ekena pariyāyenā**ti ekena kāraṇena.

Yāti āpatti, desitā hotīti sambandho. Ayaṃ desitā gaṇanūpikā nāmāti yojanā. Yā desitā hoti, ayaṃ gaṇanūpikā nāmāti yojanā. **Saussāhenevāti** punapi āpajjissāmīti saha ussāheneva. **Hīti** saccaṃ, yasmā vā. “Gaṇanam na upetī”ti iminā gaṇanam na upagacchatīti **agaṇanūpikā**ti vacanattham dasseti. Aṭṭhame vatthusmiṃ pūraṇeti sambandho. Idaṃ pāḷiyam aṭṭhavatthukapūraṇavasena bhikkhunīnam āgatattā bhikkhuniyo sandhāya vuttam. Bhikkhūnampi dutiyapārājikaṭṭhāne labbhatiyeva.

Thullavajjāti ettha thullam vajjam etissāti thullavajjāti dassento āha “thulladose paññattā”ti. Yā ca dhammikassa paṭissavassa asaccāpane āpatti atthi, sā ca gihipaṭisaṃyuttāti yojanā. **Pañcānantariyakammāpattī**ti pañcahi ānantariyakammehi āpannā pārājikāpatti. **Sudinnattherādī**ti ādisaddena dhaniyattherādayo saṅgaṇhāti. **Ādikammikoti** ādikammaṃ karonto, tasmīṃ niyutto vā. **Makkaṭisamaṇādī**ti ādisaddena vajjiputtakādayo saṅgaṇhāti. Yo kadāci karahaci āpattim āpajjati, so **adhiccāpattiko** nāmāti yojanā. Paratopi eseva nayo.

“Codetī”ti iminā codetīti **codakoti** vacanattham dasseti. “Codito”ti iminā coditabboti **cudito**, soyeva **cuditakoti** vacanattham dasseti. **Pañcadasasūti** pātimokkhaṭṭhapanakkhandhake vuttesu pañcadasadhammesu. **Tenāti** adhammacodakena, coditoti sambandho. Pātimokkhaṭṭhapanakkhandhake (cūḷava. 401) vutte sacce ca akuppe ca aṭṭhantopi adhammacuditakoyeva nāma, so pana dhammacodakena coditeyeva kuppanto adhammacuditako nāma, adhammacodakena codite pana kuppantopi adhammacuditako nāma na hoti, tasmā idha na vutto. “Samannāgato”ti iminā niyatā etassa santīti **niyatoti** vacanattham dasseti.

Āpajjītuṃ bhabbāti **bhabbāpattikā**. Kenaci kammena akatopi anukkhittakoyeva nāma, so pana ukkhittakoti saṅkābhāvato idha na vutto. **Ayanti** tajjanīyādikammaṃ kato bhikkhu. **Hīti** yasmā, na kopetīti sambandho. **Liṅgadaṇḍakammaṃvāsanaṇhīti** liṅganāsanena ca daṇḍakammaṇāsanena ca saṃvāsanaṇāsanena ca. **Yenāti** bhikkhunā. **Soti** nānāsaṃvāsako. Dvīnam nānāsaṃvāsakānam vireso heṭṭhā (pāci. aṭṭha. 428) vuttoyeva. Ṭhapanam jānitabbanti ettha kiṃ ṭhapanam nāmāti āha “pātimokkhaṭṭhapanā”nti.

Iti ekakavāraṇṇanāya yojanā samattā.

Ekuttarikanayo dukavāraṇṇanā

322. Dukesu acittakā āpattīti sambandho. **Bhūtārocanāpattī**ti pācittiyāpatti. **Abhūtārocanāpattī**ti pārājikathullaccayāpatti. **Padasodhammādīkā**ti ādisaddena uttarichapañcavācā saṅgahitā. **Mañcapīṭhādīnanti** ādisaddena bhisiādayo saṅgaṇhāti. **Anāpucchāgamanādīsūti** ādisaddena anuddharitvā gamanam saṅgaṇhāti. **Sapuggaloti** so attasaṅkhāto puggalo sapuggalo. **Parapuggaloti** paro puggalo parapuggalo. **Garukanti** saṅghādisesaṃ. **Lahukanti** pācittiyam. Puna **garukanti** pārājikam. Puna **lahukanti** pācittiyameva.

Aṅgulimattampīti pisaddena kesaggamattampīti attham sampiṇḍeti. **Tanti** mañcapīṭham. Gamiyo āpajjati nāmāti sambandho.

“Ādiyanto āpajjati nāmā”tiādinā **atthāpatti ādiyanto āpajjati**ti pāliyaṃ ādiyanto hutvā āpajjati āpatti atthīti yojanānayaṃ dasseti. Evañhi sati “**āpajjati**”ti ākhyātapadaṃ “atthī”ti kiriyantaram apekhitvā kattā hotīti daṭṭhabbaṃ. Atha vā ādiyanto puggalo yaṃ āpattiṃ āpajjati, sā āpatti atthīti yojanā. Eseva nayo aññesupi. **Mūgabbatādīnīti** ādisaddena govatakukkuravatādīni saṅgaṇhāti. Pārivāsikādayo āpajjantīti sambandho. Tajjanīyādikammakatā vā puggalāti yojanā. **Asamādiyantā āpajjantīti** asamādiyantā hutvā āpajjanti. **Teti** puggale. **Karonto āpajjati nāmāti** karonto hutvā āpajjati nāmāti yojanā. Evaṃ **dento āpajjati nāmāti**ādisupi.

Ekarattachārattasattāhadāsāhamāsātikamesūti “ekarattampi ticīvarena vipavaseyyā”ti (pārā. 475-476) ca “chārattaparamaṃ tena bhikkhunā tena cīvarena vipavasitabba”nti (pārā. 653) ca “sattāhaparamaṃ sannidhikārakaṃ paribhuñjītabba”nti (pārā. 622-623) ca “dasāhaparamaṃ atirekacīvaraṃ dhāretabba”nti (pārā. 462-463) ca “māsaparamaṃ nikkhipitabba”nti (pārā. 499-500) ca vuttakālātikamesu.

Imaṃ pana āpattiṃ āpajjati nāmāti sambandho.

Yasmiṃ pakkhe nisinnoti yasmiṃ pakkhe sayāṃ nisinno. **Tesanti** attano pakkhe nisinnānaṃ, nānāsaṃvāsakanti sambandho. **Yesanti** sakapakkhe nisinnānaṃ. **Kammaṃ kopetīti** nānāsaṃvāsakattā kammaṃ kopeti. **Itaresanti** parapakkhe nisinnānaṃ. Hatthapāsaṃ anāgatattā kammaṃ kopetīti yojanā. “Eseva nayo”ti vuttavacanaṃ vitthārento āha “**yesaṃ hī**”tiādi. **Yesanti** sakapakkhe vā parapakkhe vā nisinnānaṃ yesaṃ bhikkhūnaṃ. **Soti** bhikkhu. **Āpajjītabbatoti** āpajjītabbabhāvato. Iminā puggalena chahi samuṭṭhānehi āpajjītabbāti **āpattiyoti** vacanatthaṃ dasseti. **Kammena vā salākaggāhena vāti** ettha uddeso kamme lakkhaṇahāranayena saṅgahaṃ gacchati, vohārānussāvanā salākaggāheti dassento āha “**uddeso ceva...pe... eka**”nti. **Pubbabhāgāti** saṅghabhedassa pubbhāge pavattā. **Pamāṇanti** saṅghabhedassa kāraṇaṃ.

Addhānahīno nāmāti ettha addhānasaddo kālapariyāyoti āha “ūnavīsativasso”ti. **Theyasamvāsakādayoti**ādisaddena titthiyapakkantakabhikkhunīdūsakapañcānantariyā saṅgahetabbā. Aṭṭha abhabbapuggalā karaṇadukkaṭakā nāma hotīti yojanā. Ettha kattabbanti **karaṇaṃ**, kammaṃ, duṭṭhu kattabbanti **dukkaṭaṃ**, kammameva. Karaṇaṃ dukkaṭametassāti **karaṇadukkaṭako**. Viśesanaparanipāto “agyāhito”tiādisu viya. Tadevatthaṃ dassento āha “dukkaṭakiriyā”tiādi. **No ca yācatīti** ettha yācadhātuyā padhānakammaṃ dassento āha “upasampada”nti, “saṅgha”nti apadhānakammamānetabbā. **Tepītakoti** tipītakam vācuggatavasena dhārako. **Āṇāyapīti** pisaddo “matenapī”ti atthaṃ sampiṇḍeti. **Yācāntassevāti** nissayaṃ ācariyaṃ yācāntasseva. Yaṃ vatthum ajjhācaranto āpattiṃ āpajjati, taṃ vatthu **sātisāraṃ** nāmāti yojanā.

Upaghātikāti ettha upahanantīti upaghātā, teyeva upaghātikāti dassento āha “upaghātā”ti. **Tatthāti** dvīsu upaghātikesu. **Dve venayikāti** ettha vinayena siddhā **venayikāti** dassento āha “vinayasiddhā”ti. “Dve atthā”ti iminā ṇikasaddassa sarūpaṃ dasseti. Paññattānulomaṃ nāma daṭṭhabbanti sambandho. **Paccayaghātoti** paccayassa ghāto. Iminā **setughātoti** ettha setusaddo paccayavācakoti dasseti. **Cittassāpīti** pisaddo pageva kāyavācānantī dasseti. **Itipīti** pisaddo dutiyatthasampiṇḍano. “Pamāṇenā”ti iminā **mattakāritāti** ettha mattasaddo pamāṇatthoti dasseti. “Karaṇa”nti iminā **kāritāti** taddhitabhāvaṃ kitabhāvena dasseti sabhāgattā. **Kāyadvārikanti** kāyadvāre pavattaṃ āpattiṃ. Iminā **āpajjati**ti padassa kammaṃ dasseti. **Kāyeneva vuṭṭhāti**ti kāyasāmaggiyā dānattā kāyeneva vuṭṭhāti. **Sīsamakhanādīti** ādisaddena pādāmakhanādīṃ saṅgaṇhāti.

Tanti bhāraṃ. “Nītharitaṃ vīriyaṃ ārabhatī”ti iminā vahanākāraṃ dasseti. Thero samānoti yojanā. Navahanākāraṃ dassento āha “anujānāmī”tiādi. “Kukkuccāyitvā karotī”ti iminā kukkucasaddassa nāmadhātuṃ dasseti. “Divā ca ratto cā”ti iminā abhiṇhaṃ āsavavaḍḍhanaṃ dasseti. **Tattha tatthāti** tesu tesu vibhaṅgakkhandhakesu.

Iti dukavāraṇṇanāya yojanā samattā.

Ekuttarikanayo tikavāraṇṇanā

323. Tikesu bhagavati tiṭṭhante yaṃ āpattiṃ āpajjati, sā āpatti atthīti yojanā. **Sabbatthā**ti sabbesu padesu. Vitthāraṃ dassento āha “tatthā”tiādi. Tattha **tatthā**ti tikesu, vitthāro evaṃ veditabboti yojanā. **Lohituppādāpattī**ti anulomaparājīkāpatti. “Āvusovādenā”ti “āvuso”ti vohārena. **Voti** tumhehi.

Kāleti purebhattakāle. **Vikāleti** pacchābhattakāle. Avasesaṃ āpattinti sambandho. **Dasavassomhī**ti ahaṃ dasavasso amhi. **Navoti** pañcavassaaparipuṇṇo. **Majjhimoti** pañcavassato paṭṭhāya yāva dasavassaaparipuṇṇo. **Kusalacitto āpajjati**ti kusalacitto hutvā āpajjati. **Abyākatacittoti** supantassa bhavaṅgacittaṃ sandhāya vuttaṃ. **Yanti** āpattiṃ. **Sabbanti** āpattiṃ, āpajjati sambandho. **Dukkavedanāsamaṅgī** hutvā āpajjati yojanā. **Yanti** āpattiṃ.

Tayo paṭikkhepāti ettha paṭikkhepassa sāmikaṃ dassento āha “buddhassa bhagavato”ti. **Kilesasallekhanakapaṭipattiyā**ti kilesaṃ sallikhati tanuṃ karotīti kilesasallekhanakā, sāyeva paṭipatti kilesasallekhanakapaṭipatti, tāya.

Parisaṃ upaṭṭhāpento bāloti sambandho. Parisaṃ upaṭṭhāpento paṇḍito cāti sambandho. Avasesaṃ āpattinti yojanā. **Kāleti** kālapakkhe. **Juṇheti** juṇhapakkhe.

Kattikapuṇṇamāsiyāti pacchimakattikapuṇṇamāsiyā. Kurundiyaṃ vuttanti sambandho. Suvuttakāraṇaṃ dassento āha “cātumāsa”ntiādi. **Hīti** yasmā, pariyesanto ca nivāsento ca bhikkhūti yojanā.

Vatthunti methunadhammādivatthum.

Paṭicchādeti etāyāti **paṭicchādī**ti karaṇatthopi yujjati. Vitthāraṃ dassento āha “dvāraṃ pidahitvā”tiādi. **Etadevā**ti parikammameva. **Ubhayatthā**ti ubhayesu jantāgharapaṭicchādiudakapaṭicchādīsu. **Sabbanti** akhilaṃ parikammādiṃ. **Niyyantī**ti niliyitvā yanti. Iminā **vahantī**ti ettha vahadhātu gatyatthoti dasseti. **Abbhamaḥikādhūmarajārāhuvimuttanti** abbhena ca mahikāya ca dhūmena ca rajena ca rāhunā ca vimuttaṃ. **Tesū**ti abbhādīsu. **Tathā**ti yathā candamaṅḍalaṃ virocati, tathā sūriyamaṅḍalaṃ.

Karaṇīyena hutvāti sambandho.

Kappentoti karonto. Āgantuko āpajjati sambandho. **Anajjhīṭṭhoti** anajjhesito hutvāti sambandho. Tiṇavatthāraḥasamathe **kāyena vuṭṭhā**ti kāyasāmaggiyā dānattā.

Āgāḷhāya ceteyyāti āgāḷhasaddo dalhapariyāyoti āha “dalhabhāvāyā”ti. Ā bhuso gāhiyate **āgāḷho**, gāḷho bāḷho dalhoti atthato ekaṃ. **Ceteyyā**ti pakappeyya. **Na pūrayatoti** na pūrayantassa. **Alajjī ca hoti bālo ca apakatatto cāti** ettha bālamattaapakatattamattena kammaṃ na kātabbaṃ, āpattivāseneva pana kātabbanti dassento āha “bālo”tiādi. Tattha bālo na jānātīti sambandho. **Ayanti** bālo. **Ettāvatā**ti ettakena ajānanamattena. Bālabhāvamūlakaṃ āpattinti sambandho. **Dve āpattikkhandheti** pārājikasaṅghādisesavasena dve āpattirāsayo. **Tesanti** tiṇṇaṃ puggalānaṃ, kātabbanti sambandho.

Kāyiko davo nāmāti kāyiko parihāso nāma. **Mukhālambarakaraṇādibhedoti** mukhena ālambaranāmakatūriyakiccassa karaṇādibhedo. **Dvīhipi dvārehī**ti kāyavacīvasena dvīhipi dvārehi. **Kāyadvāre paññattasikkhāpadavītikkamoti** kāyadvāre paññattassa kāyasaṃsaggādīsikkhāpadassa vītikkamo. **Vacīdvāre paññattasikkhāpadavītikkamoti** vacīdvāre paññattassa

duṭṭhullavācādisikkhāpadassa vītikkamo. **Kāyikena upaghātikenāti** ettha upaghātikam nāma asikkhananti āha “asikkhanenā”ti. Kasmā asikkhanam upaghātam nāmāti āha “yo hī”tiādi. Tattha **yoti** puggalo. **Tanti** kāyadvāre paññattasikkhāpadaṃ. **Nanti** evameva. Hi yasmā upaghātetīti sambandho. Vejjakammena samannāgatoti sambandho. Sāsanauggahaṇaārocanādinā vācasikena micchājīvenāti yojanā.

“**Mā bhaṇḍanam karī**”ti iminā “mā”ti paṭisedhassa “karī”ti pāṭhasesena sambandhitabbabhāvaṃ dasseti. **Na voharitabbanti** ettha vipubbaavapubba-haradhātu kathanatthoti āha “na kiñci vattabba”nti. **Hīti** saccam. **Bījanaggāhādiketī** ādisaddena dhammajjhesanādiṃ saṅgaṇhāti. **Okāsakammaṃ kārentassāti** ettha “okāsa”nti ca “okāsakamma”nti ca sadisanti āha “okāsam kārentassā”ti. **Na ādātābbanti** na gaṇhitabbaṃ. Tamevattham dassento āha “yattha gahetvā”tiādi.

Yanti vinayaṃ. **Soti** bhikkhu. **Soti** vinayo. **Tassāti** bhikkhussa. **Idanti** kammaṃ. **Aññaṃ pucchāti** mayā aññaṃ bhikkhuṃ pucchāhīti yojanā. **Itīti** evaṃ. **Soti** tīhaṅgehi samannāgato bhikkhu. **Assāti** tīhaṅgehi samannāgatassa. Na **sācacchitabboti** na saha kathetabbo.

“Laddhi”nti iminā **idamappahāyāti** ettha idaṃsaddassa visayaṃ dasseti. “Avijahitvā”ti iminā hādhatu tvāpaccayoti dasseti. **Suddham brahmacārinti** ettha sabbathā kilesasuddho khīṇāsavova gahetabboti āha “khīṇāsavaṃ bhikkhu”nti. “Pātabyabhāva”nti iminā **pātabyatanti** ettha tāpaccayo bhāvatthe hotīti dasseti. “Paṭisevana”nti iminā pātabyasaddo yathākāmaparibhuñjanatthoti dasseti. **Gativisodhananti** duggatito sugatīyā visujjhanam. “Akusalāni ceva mūlāni cā”ti iminā akusalasaddassa ca mūlasaddassa ca tulyādhikaraṇabhāvaṃ dasseti. Tasmā akusalasankhātāni mūlāni **akusalamūlānīti** tulyādhikaraṇasamāso kātabbo. **Duccarītānīti** ettha dusaddassa duṭṭhuvirūpatthabhāvaṃ dassento āha “duṭṭhu caritāni, virūpāni vā caritāni”ti. **Virūpānīti** vikārasabhāvāni. “Karaṇabhūtenā”ti iminā “kattubhūtenā”ti attham paṭikkhipati. **Tattha tatthāti** tasmim tasmim khandhake.

Iti tikavāraṇṇanāya yojanā samattā.

Ekuttarikanayo catukkavāraṇṇanā

324. Catukkesu evaṃ vinicchayo veditabboti yojanā. **Tiṇavatthārakasamathaṭṭhānanti** tiṇavatthārakasamathena adhikaraṇavūpasamitaṭṭhānam. **Parassa kammavācāyāti** parassa karaṇabhūtāya kammavācāya. **Tatotī** catukkato. **Paresūti** aññesu catukkesu evamattho veditabboti yojanā. **Tamevāti** kāyadvārikameva. Puna **tamevāti** vacīdvārikameva. Āpajjitabbāpattiṇca sahāgāraseyyāpattiṇcāti yojanā. **Jaggantoti** jāgaranto.

Acittako āpajjati nāmāti “acittako bhikkhu āpajjati nāmā”ti vā “acittako hutvā āpajjati nāmā”ti vā yojanā kātabbā. **Sabhāganti** vatthusabhāgaṃ. **Tañcāti** aññataram tañca āpattim. **Itīti** evaṃ.

Kammenāti samanubhāsanakammena. **Kammena vuṭṭhātīti** kammena eva vuṭṭhāti.

Soti ghiparikkhāro, āhaṭo hotīti sambandho. **Avāpuraṇanti** kuñcikaṃ. **Antoti** bhaṇḍāgārassa anto.

Sammukhā vuṭṭhātīti sammukhā eva vuṭṭhāti.

Sayitāya eva bhikkhuniyāti yojanā. **Idanti** sahāgāraseyyāpattim, paṭiccāti sambandho. **Etanti** “liṅgapātubhāvenā”ti vacanam, vuttanti sambandho. **Ubhinnampīti** bhikkhubhikkhunīnampi. **Liṅgapāṭilābhenāti** itthiliṅgapāṭilābhena. **Paṭhamanti** ādikappakāle. “Paṭhamam uppannavasenā”ti iminā pure uppannam **purimanti** vacanattham dasseti. “Seṭṭhabhāvenā”ti iminā purabhāvena seṭṭhabhāvena uppannam **purimanti** vacanattham dasseti. “Purisaliṅga”nti iminā imapaccayassa

sarūpaṃ dasseti. **Purisakuttapurisākārādīti** ādisaddena purisanimittādayo saṅgaṇhāti. Yāni chacattālīsa sikkhāpadānīti yojanā. Iminā vuttanayānusārena dutiyacatukkepi attho veditabbo. **Tehīti** tiṃsādhikehi satasikkhāpadehi.

Mahāpadesāti vinaye (mahāva. 305) āgatā mahāpadesā. Kasmā mahāpadesā “sāmukkaṃsā”ti vuccantīti āha “**te hī**”tiādi. Tattha **teti** cattāro mahāpadesā, vuccantīti sambandho. “Saya”nti iminā **sāmukkaṃsāti** ettha saṃsaddassa sayamatthaṃ dasseti. “Ukkhipitvā”ti iminā **ukkaṃsasaddo** ukkhipanatto dasseti. “Ṭhapitattā”ti iminā sayam ukkaṃsitvā ṭhapitā **sāmukkaṃsāti** vacanatto dasseti. “Ajjhoharaṇīyaparibhogā”ti iminā bāhiraparibhogam nivatteti. **Udakaṃ panāti** kenaci asaṃsaggaṃ pasannodakaṃ pana. **Kāleti** sappadaṭṭhakāle. “Pañca vā dasa vā sīlānī”ti iminā pañca vā dasa vā sīlāni upāsakasīlanti dasseti.

Tattha cāti vihāre ca. **Ubhopīti** āgantukāvāsikavasena ubhopi. **Asādhāraṇanti** dvīhi asādhāraṇam. **Āpattinti** bhikkhunīhiyeva sādharmaṇam āpattim. **Gamiyacatukkepīti** pisaddo āgantukacatukkaṃ apekhati. **Vatthunānattatāvāti** methunādivatthunānattatā eva. **Hīti** saccaṃ, yasmā vā. **Sāti** āpatti. **Tathāti** yathā kāyasamagge, tathā lasuṅkhādaneti yojanā. **Etthāti** vatthunānattatādicatukke. **Cattāri pārājikānīti** bhikkhupātimokkhe āgatāni. Visuṃ āpajjantesupi eseva nayoti sambandho.

Purimacatukketi vatthunānattatādicatukke. Yo paṭhamo pañhoti yojanā. **Idhāti** vatthusabhāgatādicatukke. **Yo cāti** yo ca pañho. **Tatthāti** vatthunānattatādicatukke. Tatiyacatutthesu pañhesūti sambandho.

“Saddhivihārikassā”ti padaṃ “kattabba”iti pade sampadānaṃ.

Garukanti pārājikaṃ. **Lahukanti** thullaccayaṃ vā dukkaṭaṃ vā.

Aṭṭhannaṃ bhikkhunīnaṃ paṭipāṭiyā nisīditabbato vuttaṃ “navamabhikkhunito”ti. **Paccuṭṭhānārahāti** paṭimukhaṃ upaṭṭhātuṃ arahā. **Avisesena cāti** “bhikkhū”ti vā “bhikkhunī”ti vā visesa, makatvā sāmāññena ca. “Āsanārahacatukkassā”ti padaṃ “paṭhamapada”nti pade avayavisambandho.

Asādhāraṇanti bhikkhūhi asādhāraṇam. **Vikāle kappatīti** tadahuvikāle kappati. **Kālātīnti** kālayāmasattahātītaṃ. Yāvakālikādittayañca akappiyamaṃsañca uggahitakañca apaṭiggahitakañcāti yojanā.

Guṇaṅguṇūpāhanañca dhuvanāhanañca cammattharaṇaṇca guṇaṅguṇūpāhanadhuvanāhanacamattharaṇāni. **Imāni cattārīti** pañcavaggena gaṇena upasampadadānādīni. **Idhāti** paccantimesu janapadesu. **Idhāti** majjhimesu. **Idanti** catubbidhaṃ vatthu. **Dīpetumpīti** dīpanampi. Tumpaccayo hi katvatthajotako. Eseva nayo **dīpetum panāti** etthāpi. Sesam anuññatakanti sambandho. **Ubhayatthapīti** paccantimamajjhimavasena ubhayatthāpi.

Chandapārisuddhiakkhānaṃ ekaṃ katvā “**cattāro**”ti vuttaṃ. **Cattāro pubbakiccāti** liṅgavipallāso, “cattāri pubbakiccānī”ti hi attho. Evaṃ vuttāni imāni cattārīti sambandho. Evaṃ āgatā sammutiyoti sambandho. **Sabbatthāti** sabbesu catukkesu.

Iti catukkavāraṇṇanāya yojanā samattā.

Ekuttarikanayo pañcakavāraṇṇanā

325. Pañcakesu “pañca puggalā niyatā”ti etaṃ ānantariyānameva gahaṇanti yojanā. Pañca chedana

kā āpattiyo nāma veditabbāti sambandho. Yā vikappanā vuttāti yojanā. **Ussañkitoti** uṭṭhahitvā sañkito. **Parisañkitoti** punappunam sañkito. Akuppo arahattaphalasañkhāto dhammo imassāti **akuppadhammo**, khīṇāsavo. Khīṇāsavo samānopi ussañkito ceva parisañkito cāti yojanā. **Pariharitabbāti** apanetabbā. **Hīti** saccam, yasmā vā. **Etesūti** agocaresu. **Thūpacīvaranti** ettha thūpaṃ parikkhipitvā kataṃ cīvaram thūpacīvaranti dassento āha “vammika”ntiādi. Vammiko hi thūpayati uddham ārohatīti **thūpoti** vuccati. **Nhānaṭṭhāneti** sabbesam nhānaṭṭhāne. Tañhi udakena kāyam abhisiñcati etthāti **abhisekanti** vuccati. Abhiseke chaḍḍitaṃ **ābhisekikaṃ**, cīvaram. Tena vuttam “chaḍḍitacīvara”nti. **Bhatapaṭiyābhatanti** ettha bharadhātuyā posanattam paṭikkhipitvā dhāraṇattam dassento āha “susānam netvā puna ānītaka”nti. Tattha “susāna”nti iminā kammaṃ dasseti, “puna”ti iminā paṭisaddassa attam dasseti. Imehi padehi susānam bhatam hutvā geham paṭiābharitabbanti **bhatapaṭiyābhatanti** vacanattam dasseti, yakāro padasandhikaro. Pāliyam, aṭṭhakathāyañca potthakesu “gatapaṭiyāgata”nti kaṇṭhajatatiyakkharena pāṭho atthi, so asundaro.

Kāyo paṭhamam, vācā dutiyam, kāyavācā tatiyam, idam sandhāya “**tatiyenā**”ti vuttam. **Tatthevāti** antarapeyyāle eva.

Adinnanti ettha akārassa nakāriyabhāvañca tapaccayassa kammavācakahāvañca dassento āha “aññena na dinna”nti. Tattha “aññenā”ti iminā tapaccayassa kammavācakahāvam dasseti, nakārena akārassa kāriyam dasseti. Kena kāraṇena aviditanti āha “paṭiggaṇhāmīti cetanāya abhāvenā”ti. **Aviditanti** apākaṭam. **Naṭasamajjādīnanti** naṭasamajjādīnam sabbesam dānam. **Usabhavissajjananti** usabhassa vissajjanam. Idam upalakkhaṇavasena vuttam. Sabbāsampi pana manussāmanussānam itthīnam methunarativasena purisānam dānampi gahetabbam. **Itthidānanti** etthāpi yāsam kāsāñci itthīnam yesam kesañci purisānam dānam gahetabbam. **Paṭibhānacittakammadānanti** methunasevanapaṭibhānacittakammadānam. **Lokassāti** lokena. **Kathetukamyatāti** kathetukāmatā. “Na suppaṭivinodayā”ti iminā dukkhena paṭivinodetabbāti **duppaṭivinodayā**, paṭivinodetum na sukarāti dasseti. **Upāyenāti** yuttiyā.

Phussadevatthero aṭṭhāsi kirāti sambandho. **Ekamsanti** bhummatthe cetam upayogavacanam. Ekasmiṃ aṃseti hi attho. **Buddhārammaṇanti** buddhagūṇārammaṇam. **Māroti** devaputtamāro, gatoti sambandho. **Gomayanti** gomīlham. **Jaraggavoti** jaragoṇo. **Tādisamevāti** gomayavippakiraṇasabhāvameva. **Vippakāranti** visesapakārena karaṇam. **Vañkapādanti** kuṭilapādam. **Parikasantoti** paricchedam katvā vilekhanto. **Vigacchapurisoti** vikāram, virūpaṃ vā gatapuriso. “Vibhacchapurisoti”tipi pāṭho, visesena sobhaṇam bhakkhapurisoti attho. Ayameva pāṭho abhidhānādīsu (abhidhānappadīpikāyam 102 gāthāyam) dissati. **Samantāti** kaṭaandhakāravihārassa samantato. Māro siyā nu khoti yojanā. Na asakkhiṃ iti āhāti yojanā. **Diṭṭhapubboti** pubbe diṭṭho. **Mahānubhāvoti** deviddhiyā mahānubhāvo. **Inghāti** uyyojanatthe nipāto, uyyojemīti attho. **Attabhāvanti** tava attabhāvam. **Tādisam rūpanti** buddhassa bhagavato attabhāvasadisam rūpaṃ. **Tamsarikkhakanti** tena rūpena sadisam. Patirūpameva sadisaṭṭhena **patirūpakam**, na ekamsasadisam rūpaṃ kiñci sadisarūpanti attho. **Sakattabhāvanti** sassa eso sako, soyeva attabhāvo sakattabhāvo, tam. **Ayanti** māro. **Kathanti** kena kāraṇena bhagavā na sobhati nu kho, sobhatiyevāti attho. Tadeva samatthetum vuttam “sabbaso vītarāgadosamoho”ti. **Vañcitomhīti** aham vañcito amhi. **Kiṃ atthīti** kiṃ nāma atthi, mama vañcanacittam natthīti adhippāyo. Daharabhikkhu paṭilabhatītiādinā sambandhitabbam.

Daharabhikkhu aṭṭhāsīti sambandho. Sañkārachaḍḍaniṃ pacchinti sambandho. Sañkāram chaḍḍeti imāyāti **sañkārachaḍḍanī**. Tissadattatthero nāma pucchīti sambandho. **Nāvātoti** potato. **Pañhāsahassanti** samathavipassanākammatṭhānesu pucchāsahassam. **Pucchīti** daharam pucchi. **Paricchindīti** tasmiṃ divase kātabbavattam niṭṭhapesīti attho. **Yonakavisayatoti** yonakalokato. **Aṭṭha kappe anussarīti** cetiyaṅgaṇam disvā cittassa pasīdanato pubbenivāsāññena aṭṭha kappe anussari.

Eko bhikkhu gatoti sambandho. **Devatā pupphahatthā aṭṭhamsūti** manussavesam gahetvā aṭṭhamsu. Tena vuttam “kataragāmaṃvāsikāthā”ti. Tumhe katarasmiṃ gāme vasanasīlā attha bhavathāti

yojanā. **Idhevāti** imasmimyeva thāne. **Thitāmhāti** mayam thitā amhāti yojanā.

Ayam kathāti ayam vakkhamānakathā. Kim amaccaputto pāsādiko nu khoti yojanā. **Neti** amaccaputtaabhayatthere. Nātakā agamaṃsūti sambandho. Theramātāpi pahiṇīti sambandho. **Pisaddena** ṇātake apekkhati. Pahiṇākāraṃ dassento āha “putto me”tiādi. Amaccaputto ārūḷhoti sambandho. Abhayatthero āhāti sambandho. **Tenāti** amaccaputtena. **Yugaggāhanti** yugassa gāhaṃ. “Mahallakattherassa sammatthāthāne kacavaram chaḍḍetvā”ti vacanaṃ āvi karonto āha “**atītattabhāve kirā**”tiādi. Amaccaputto chaḍḍesīti sambandho.

Tanti sammajjanavattaṃ. **Tatrāti** “satthusāsanaṃ kataṃ hotī”tivacane. Āyasmā sārīputto nisīdi kirāti sambandho. Bhagavā paccāgañhīti sambandho. **Pādānīti** pādassa akkamaṇaṭṭhānāni, pādacetiyānīti attho. Thero nisīdīti sambandho. Jaṇṇukehi patiṭṭhāya “pādacetiyam vanditvā”ti pāthaseso ajjhāharitabbo. Me nisinnabhāvaṃ me satthā aññāsī vatāti yojanā. Mesaddo hi pubbaparāpekkho. **Codananti** dosāropanaṃ. **Kāressāmīti** dasabalaṃ kāressāmi. Bhagavā āhāti sambandho. **Gatosīti** tvam gato asi, vicarantassa tuyhaṃ na patirūpanti yojanā. **Tatoti** codanakālato.

Ettako vinicchayo upalabbhatīti sambandho. **Bhāsapariyantanti** vacanaparicchedaṃ. **Ayanti** kathā. Ettakaṃ vacananti sambandho. **Gayhūpaganti** gahetabbabhāvaṃ upagamaṃ, gaṇhituṃ khamaṇīyanti attho. **Tānīti** dve mūlāni. Puna **tānīti** samudayabhūtāni cha āpattisamuṭṭhānāni. **Vatthunti** methunādivatthum. **Itipīti** pisaddo paṭhamanayaṃ apekkhati. Ettha paṭhamanaye mūlena samudayassa pāyato abhedo hotī, pacchimanaye pana sabbathā bhedo hotī. Tasmā pacchimanayoyeva yuttatarotī daṭṭhabbo. “Vūpasammatī”ti iminā “nirujjhatī”ti padassa samucchedanirodhaṃ dasseti. **Vuṭṭhānenāti** parivāsādivinayakamma.

Tettiṃsamūlānaṃ sarūpaṃ dassento āha “vivādādhikaraṇassa dvādasa mūlānī”tiādi. Ekaṃ mūlanti sambandho. **Tānīti** tettiṃsa mūlāni. **Paratoti** parasmim. “Aṭṭhārasa bhedakaravatthūnī”tiādinā adhikaraṇānaṃ samuṭṭhānaṃ dasseti. Cattāri saṅghakiccāni nissāya uppajjatīti yojanā. **Idanti** vatthu. **Sattannaṃ nidānanti** sattannaṃ āpattikkhandhānaṃ paññattiṭṭhānasāṅkhātaṃ nidānaṃ. **Etthāti** thāne. **Paññattim na jānātīti** ettha “anupaññattim na jānātī”ti vakkhamānattā paṭhamapaññatti gahetabbāti āha “paṭhamapaññattim na jānātī”ti. **Anupaññattīti** ettha anusaddo naupacchinnatthoti āha “punappunaṃ paññattim na jānātī”ti. Pacchātthopi yujjateva paṭhamapaññattito pacchā paññattattā. **Anusandhivacanapathanti** ettha anusandhīnaṃ vasena vacanapathanti dassento āha “kathānusandhivinicchayānusandhivasena vatthu”nti. **Ñattikiccanti** ñattiyā kiccaṃ. Iminā **ñattiyāti** ettha sāmīyathe sāmīvacanaṃ. Karadhātusambandhe karaṇavacanampi yujjateva. **Karaṇanti** ettha ca yupaccayassa kammaṭṭhabhāvaṇca dasseti. Na kevalaṃ ñattikamme eva ñattikiccaṃ na jānāti, atha kho ñattidutiyañatticatutthakammesupī na jānātīti dassento āha “ñattidutiyañatticatutthakammesū”tiādi. **Pubbe thapetabbāti** ñatti nāma kammavācāya pubbe thapetabbāti na jānāti. Iminā napubbakusalabhāvaṃ dasseti. “Pacchā”ti iminā naaparakusalabhāvaṃ dasseti. **Pisaddena** paṭhamanayaṃ apekkhati. “Kālaṃ na jānātī”ti iminā **akālaññūti** padassa viggahavākyaṃ dasseti. Kālaṃ dassento āha “anajjhīṭṭho”tiādi.

“Dhutaṅge ānisaṃsaṃ ajānitvā”ti iminā mandamomūhānaṃ phalaṃ dasseti. **Pāpicchoti** ettha pāpiccho nāma paccayalābhassa patthanāti āha “paccayalābhaṃ patthayamāno”ti. Kāyaviveko ca cīttaviveko ca upadhiviveko ca **kāyacittaupadhivivekaṃ**, samāhāradvando, pubbapadesu uttarapadalopo. **Etassāti** āraññikassa. Iminā imāya attho **idamattho**, so etassatthīti **idamatthīti** vacanattaṃ dasseti. **Appicchaññevāti**ādīsū **evasaddānaṃ** chaḍḍetabbattaṃ dassento āha “na aññaṃ kiñci lokāmisā”nti.

Navavidhanti divasavasena tividhaṃ, tathā kattabbākāravasena, tathā kārakavasenaṇāti navavidhaṃ uposathaṃ.

Kāyaduccarītādi yasmā na pasādaṃ saṃvatteti, na pasādāya vā saṃvattati, tasmā **apāsādikanti** vuccati. Tena vuttam “apāsādikanti kāyaduccarītādi akusala”nti. **Velaṃ atikkammāti** bhojanādikālaṃ atikkamitvā. Iminā **ativelanti** ettha atisaddassa atikkamanatthaṅca “ativela”nti padassa “viharato”ti pade kiriyaṅvasesanabhāvaṅca dasseti. Appaṃ kālanti yojanā. Avataraṇaṃ **otāroti** dassento āha “otaraṇa”nti. **Sabbatthāti** sabbesu pañcakesu.

Iti pañcakavāraṇṇanāya yojanā samattā.

Ekuttarikanayo chakkavāraṇṇanā

326. Chakkesu evamattho vedītabboti yojanā. **Itti** evaṃ. Imā cha sāmīciyoti yojanā. **Tatthāti** chasu ākāresu. **Satisammosenāti** satiyā vippavāsena.

Tatthāti cuddasasu paramesu. **Tatoti** chakkato. **Ekaṃ apanetvāti** yaṃkiñci ekaṃ apanetvā. **Sesesūti** chahi paramehi sesesu aṭṭhasu paramesu. **Aññānīpi chakkānīti** paṭhamachakkato aññānīpi aṭṭha chakkāni.

Cha āpattiyoti tīṇi chakkānīti “cha āpattiyoti”ti vuttāni tīṇi chakkānīti yojanā. Vuttadvayaṃ ekaṃ katvā. **Nhāneti** nhānasikkhāpade. **Chakkadvayanti** ādāyasamādāyavasena chakkadvayaṃ. **Sabbatthāti** sabbesu chakkesu.

Iti chakkavāraṇṇanāya yojanā samattā.

Ekuttarikanayo sattakavāraṇṇanā

327. Sattakesu chasu sāmīcīsu pakkhipitvāti sambandho. **Tatthevāti** samathakkhandhake eva.

Campeyyaketi campeyyakkhandhake. “**Asaddhammā**”ti padassa bhedanissitatulyanissitasamāsaṃ dassento āha “asataṃ dhammā”tiādi. Tattha “asataṃ dhammā”ti iminā bhedanissitasamāsaṃ dasseti, “asanto vā dhammā”ti iminā tulyanissitasamāsaṃ dasseti. **Sabbatthāti** sabbesu sattakesu. Sesam suviññeyyameva.

Iti sattakavāraṇṇanāya yojanā samattā.

Ekuttarikanayo aṭṭhakavāraṇṇanā

328. Aṭṭhakesu aṭṭhānisamsādīnaṃ desanākāradesanaṭṭhānāni dassento āha “na maya”ntiādi. Tattha “na mayaṃ...pe... karissāmā”ti iminā desanākāraṃ dasseti, “kosambakakkhandhake”ti iminā desanaṭṭhānaṃ dasseti. **Tampīti** dutiyaṭṭhakampi.

Terasake vuttāti sambandho. **Kulāni dūsetīti** ettha “dūsetī”ti kiriyaṅpadassa karaṇaṃ dassento āha “pupphena vā”tiādi. Imehi aṭṭhahi dūsetīti yojanā. “Lābhenā”tiādinā “**aṭṭhahi asaddhammehī**”ti ettha asaddhammasarūpaṃ dasseti. **Sārāgoti** saṃrāgo, bhusaṃ rajjananti attho. **Paṭivirodhoti** doso. So hi yasmā alābhādīsu paṭivirujjhati, tasmā paṭivirodhoti vuccati. **Pāliyanti** vinayaṭṭhāyamaṃ.

Pānantiādikā dve gāthāyo dvādasakkharena bandhitā. Paṭhamagāthāya tatiyaṭṭhāyā cariyasaddena yuttattā ekakkharo adhiko. Ayaṃ panettha yojanā – pānaṃ **na hane** na ghāteyya, ādinaṅca **na ādiye** na gaṇheyya, **musā** vitathavacanaṃ **na bhāse** na katheyya, **majjapo** majjapānaṃ na ca siyā, **abrahmacariyā** methunā virameyya, rattim vikālabhojanaṃ na bhuñjeyya.

Mālaṃ na dhāre na dhāreyya, gandhañca na ācare, santhate mañce ca chamāyañca sayetha. Etañhi uposathaṃ aṭṭhaṅgikaṃ uposathaṃ iti dukkhantaṅgā buddhena pakāsītanti āhu paṇḍitāti.

Saṅghabhedaketi saṅghabhedakakkhandhake. **Tāsaṃyevāti** bhikkhunīnameva. “Upāsikā aṭṭha varāni yācatī”ti evaṃ sāmāññavacanassāpi atthapakaraṇādīnā visesavisayo hotīti āha “**visākhā**”ti. Sā hi vividhā puttanaṭṭusāṅkhātā sākhā etissāthhīti **visākhāti** vuccati. **Sabbatthāti** sabbesu aṭṭhakesu. Sesam suviññeyyameva.

Iti aṭṭhakavāraṇṇanāya yojanā samattā.

Ekuttarikanayo navakavāraṇṇanā

329. Navakesu **acarītiādīnī**ti ādisaddena “carati, carissatī”tiādīni (dī. ni. 3.340; aṭṭha. ni. 9.29-30) saṅgaṇhāti. **Taṃ kutettha labbhāti** ettha tanti anattacaraṇaṃ, kopakaraṇaṃ vā. **Kutoti** kena kāraṇena. **Etthāti** etasmīṃ anattacarakapuggale. **Labbhāti** laddhā, sakkā laddhuṃ na labbhā evāti attho. Navannaṃ vā bhikkhūnaṃ kāraṇāti yojanā. **Taṇhanti** dvīsu esanataṇhāesitatanhāsu esanataṇhaṃ. **Paṭiccāti** ārabha. **Pariyesanāti** punappunaṃ esanā. **Lābhoti** rūpādīraṃmaṇalābho. **Vinicchayoti** ñānataṇhādīṭṭhivittakavasena catubbidho vinicchayo. Catubbidho hi dhammo “ettakaṃ mayhaṃ bhavissatī”tiādīnā vinicchinati anenāti vinicchayoti vuccati. **Chandarāgoti** balavarāgo. **Ajjhosānanti** “ahaṃ mama”nti balavasanniṭṭhānaṃ, **pariggahoti** taṇhādīṭṭhivasena paricchinditvā gahaṇaṃ. **Macchariyanti** paresaṃ sādharmaṇabhāvassa asahanatā. **Ārakkhāti** dvārapidahanamañjūsagopanaṭṭivivasena ābhuso rakkhanaṃ. **Ārakkhādhikaraṇanti** ārakkhakāraṇā, hetvatthe cetam paccattavacanamaṃ. Daṇḍādānādīsu paranisedhanattham daṇḍassa ādānaṃ **daṇḍādānaṃ**. Tathā ekatodhārādino satthassa ādānaṃ **satthādānaṃ**. **Kalahoti** kāyakahopī vācākahopī. **Viggahoti** viruddhavasena gahaṇaṃ. **Vivādoti** viruddhavasena vadaṇaṃ. “Tuvaṃ tuva”nti anādaravasena vadaṇaṃ **tuvamtuvaṃ vādo**, pesuññavasena vadaṇaṃ **pesuññavādo**, musāvavasena vadaṇaṃ **musāvādo**, daṇḍādānañca satthādānañca kalaho ca viggaho ca vivādo ca tuvaṃtuvaṃvādo ca pesuññavādo ca musāvādo ca **daṇḍādāna...pe... musāvādā**. **Musāvādāti** ettha **vādasaddo** “tuvaṃ tuva”nti ca “pesuñña”nti ca etthāpi yojetabbo. “Ahaṃ seyyohamasmi”ti pavattamānādayoti yojanā. **Adhiṭṭhitakālato paṭṭhāya na vikappetabbānī**ti adhiṭṭhānavikappanaṃ ekato na kātabbaṃ, adhiṭṭhite na vikappetabbanti adhippāyo. Pariṇataṃ lābhaṃ pariṇāmetīti sambandho.

Etesaṃyeva dānānanti etesaṃyeva adhammikānaṃ dānaṇaṃ. **Saṅghassa ninnanti** saṅghassa nataṃ, nāmitaṃ vā lābhanti sambandho. Saṅghassa namatī, nāmiyatīti vā **ninnaṃ**. **Tesaṃyevāti** tesāmyeva tiṇṇaṃ dhammikadānaṇaṃ. Tayo tayo dānapaṭiggahaparibhoge sampiṇḍetvā navako gahetabbo. **Tatthevāti** samathakkhandhake eva. **Ovādavaggassāti** bhikkhunovādavaggassa. **Tatthevāti** ovādavaggassa paṭhamasikkhāpade eva. **Sabbatthāti** sabbesu navakesu.

Iti navakavāraṇṇanāya yojanā samattā.

Ekuttarikanayo dasakavāraṇṇanā

330. Dasakesu **aṭṭhāne vā panāti** akāraṇe vā pana. **Tatthāti** navakesu. “Natthi dinnantiādivasenā”ti ādisaddena “natthi yīṭṭhaṃ natthi huta”ntiādayo (dha. sa. 1.221; ma. ni. 94.225; 3.91, 116; saṃ. ni. 3.210; a. ni. 10.176) nava natthikā saṅgahetabbā. “**Sassato lokoti ādivasenā**”tiādisaddena (dī. ni. 1.31; ma. ni. 1.269) “asassato loko”tiādayo (ma. ni. 1.269) nava antaggāhike saṅgaṇhāti. **Viparītā sammattāti** dasahi micchattehi viparītā dasa sammattā sammādiṭṭhi sammāsaṅkappo sammāvācā sammākammanto sammāājīvo sammāvāyāmo sammāsati sammāsamādhi sammāññaṇaṃ sammāvimuttīti.

Dasa ādīnavā niddiṭṭhāti sambandho. **Undūrakkhāyitanti** mūsikena khāditaṃ. Ettha hi khedhātu

khādanattho hoti. **Aggidaddhanti** agginā daddham. **Etesūti** etesu dasasu pamsukūlesu. **Udakasāṭikaṃ vā saṃkaccikaṃ vāti** bhikkhunīnaṃ udakasāṭikaṃ vā saṃkaccikaṃ vā. Ettha **vāsaddo** aniyamavikappattho.

Paṇṇasanthāro tiṇasanthārena saṅgahito. **Sabbatthāti** sabbesu dasakesu.

Iti dasakavāraṇṇanāya yojanā samattā.

Ekuttarikanayo ekādasakavāraṇṇanā

331. Ekādasakesu **tiṇapādūkāti** muṅḍapabbajehi avasesā tiṇamayapādūkā.

Kaṭṭhapādūkasāṅgahamevāti kaṭṭhapādūke saṅgahaṃ eva. **Tambalohamayena vā dārumayena vāti** vāsaddo aniyamavikappattho. **“Nasi animittā”**tiādayo bhikkhunikkhandhake (cūlava. 423) niddiṭṭhā. **Te sabbeti** sabbe te gaṇṭhikavidhā. **Naggenāti** acelakena. **Te sabbeti** sabbe te avandiyapuggalā. **Pubbeti** dasake. **Kammavaggeti** avasāne kammavagge.

So bhikkhu yaṃ na nigaccheyya, etaṃ na nigataṃ aṭṭhānaṃ anavakāsoti yojanā. Evañhi sati **yaṃsaddo** kiriyāparāmasano hoti, atha vā yaṃ yena kāraṇena na nigaccheyya, etaṃ kāraṇaṃ aṭṭhānanti yojanā. Anadhigataṃ samādhinti yojanā. **Saddhammāssāti** saddhammā assa. Assa akkosakaparibhāsakassa bhikkhussa saddhammā na vodāyanti na pariyodapentīti attho. **Rogātaṅkanti** rogasāṅkhātaṃ ātaṅkaṃ. **Nirayaṃ upapajjati** nirayamhi upapajjati. **“Upapajjati”**ti ettha upaiti kammappavacanīyaupasaggena yuttattā “niraya”nti ettha bhummatthe upayogavacanāṃ daṭṭhabbaṃ. **Ettha** etasmiṃ ānguttarapāḷiyaṃ (a. ni. 11.6).

Āsevitāyāti ettha ātyūpasaggo ādikammatthoti āha “ādito paṭṭhāya sevitāyā”ti. “Nippādītāyā”tiiminā **bhāvitāyāti** ettha bhūsaddo sattatthoti dasseti, “vaḍḍhitāyā”ti iminā vaḍḍhanatthoti dasseti. **Bahulikatāyāti** ettha bahulaṃ nāma atthato punappunanti āha “punappunaṃ katāyā”ti. **Suyuttayānasadisāyāti** suṭṭhu yuttana yānena sadisāya. Iminā **yānikatāyāti** ettha na yaṃkiñci yānaṃ viya kataṃ hoti, atha kho icchicchitakkhaṇe ārohanīyattā suyuttayānaṃ viya kataṃ hotīti dasseti. Yathā kariyamāne patiṭṭhā hotīti yojanā. **Vatthukatāyāti** ettha vatthusaddo patiṭṭhatthoti dasseti. Vasati patiṭṭhahati etthāti **vatthūti** vacanattho kātabbo. **Anuṭṭhitāyāti** ettha **anusaddo** naupacchinnattho, ṭhādḥātu uppajjanatthoti dassento āha “anu anu pavattitāyā”ti. “Samantato”ti iminā **paricitāyāti** ettha **parisaddo** samantatthoti dasseti. “Abhivaḍḍhitāyā”ti iminā **cidhātu** vaḍḍhanatthoti dasseti. **Samāraddhāyāti** paripuṇṇaṃ ārādhītāya. **Rādhadhātu** hi sādhanattho hoti. “Vasībhāvaṃ upanītāyā”ti iminā tadatthaṃ adhippāyena dasseti. **“Na pāpakaṃ supinaṃ passati”**ti vacanassa atthāpattinayaṃ dassento āha “bhadraṃ panā”tiādi. **Vuddhikāraṇabhūtanti** vuddhiyā kāraṇabhūtaṃ supinanti sambandho. **Devatā rakkhantīti** ettha sāmāññato vuttepi ārakkhadevatāyeva gahetabbāti āha “ārakkhadevatā”ti. Ārakkhadevatā nāma bhummadevādayo. **Khippanti** bhāvanapūṃsakaṃ. Iminā **tuvaṇṇaṃ cittanti** ettha tuvaṇṇasaddo khippapariyāyoti dasseti. **Uttarimappaṭivijjhantoti** ettha “uttari”nti padassa avadhipekkhattā tassa avadhi ca uttarisaddassa idha arahattavācakahāvañca vidhadhātuyā sacchikaraṇatthañca dassento āha **“mettājhānato”**tiādi. Tattha “mettājhānato”ti iminā avadhiṃ dasseti, “arahatta”nti iminā “uttari”nti padassa sarūpatthaṃ dasseti, “asacchikaronto”ti iminā vidhadhātuyā sacchikaraṇatthaṃ dasseti. **Sabbatthāti** sabbesu ekādasakesu.

Iti ekādasakavāraṇṇanāpariyosānāya

Ekuttarikavaṇṇanāya

Yojanā samattā.

Uposathādipucchāvissajjanā

332. Vissajjane evamattho veditabboti yojanā. Kāyasāmaggī ādi nāmāti yojanā. **Osāraṇakiriyāti** kathanakiriyā. **Chandapavāraṇaṃ āharitvāti** chandañca pavāraṇaṃ āharitvā. **Pavāraṇākathāti** “saṅghaṃ bhante pavāremī”tiādikā (mahāva. 210) pavāraṇākathā. Tajjanīyakammādīsu vatthu nāma kiṃ? Puggalo nāma koti āha “vatthu nāmā”tiādi. Tattha **yena vatthunāti** bhaṇḍanakāraḍādinā yena vatthunā karaṇabhūtena, hetubhūtena vā. **Yenāti** puggalena kattubhūtena, katanti sambandho. “Tassā tassā kammavācāyā”ti padaṃ “avasānavacana”nti pade avayavisambandho. **Sabbatthāti** sabbesu vissajjanesu.

Iti uposathādipucchāvissajjanavaṇṇanāya yojanā

Samattā.

Atthavasapakaraṇavaṇṇanā

334. Atthavasapakaraṇeti avayaviādhāro. **Dasa atthavasetiādīsūti** avayavādhāro. **Yanti** vacanaṃ. **Uparimaṃ uparimaṃ padanti** “saṅghaphāsutāyā”tiādikaṃ uttaruttari vuttaṃ padaṃ. **Heṭṭhimassa heṭṭhimassa padassāti** “saṅghasutṭhūtāyā”tiādikassa adho adho vuttassa padassa.

Yadetaṃ padasataṃ vuttanti yojanā. **Tatthāti** tasmim padasate, niddhāraṇe bhummaṃ, **atthasatanti** abhidheyyasataṃ. **Dhammasatanti** abhidhānasataṃ, pāḷisatanti attho. “Atthasataṃ dhammasata”nti padānaṃ atthantaravikappaṃ dassento āha “**atha vā**”tiādi. Tattha ye dasa atthavase paṭicca paññattaṃ, tesam dasaatthavasānanti yojanā, ye dasa atthavase pubbe vaṇṇitā, tesam dasaatthavasānanti yojanā. Paṭhamapārājikavaṇṇanāyaṃ (pārā. aṭṭha. 1.39) vaṇṇitāti sambandho. **Tatthāti** “saṅghasutṭhūtāyā”tiādipāṭhe. **Sutṭhu devāti** sutṭhu mahārāja. Hi yasmā āṇābalabhogabalaissariyabalehi dibbati, tasmā **devoti** vuccati. **Yo cāti** gahaṭṭho vā pabbajito vā, sampaṭicchatīti sambandho. **Tasmāti** yasmā hitāya sukhāya hoti, tasmā. Ānisaṃsaṃ dassetvā paññapessāmīti sambandho. Abhibhavitvā na paññapessāmīti yojanā. **Idhāti** atthavasapakaraṇe. **Tadatthajotakānanti** soyeva attho tadattho, tassa jotakā tadatthajotakā, tesam. Idāni veditabbānīti sambandho. Atthaṃ jotenti **atthajotakā**, saddā. Nīharitvā, niyametvā vā attho vuccate imāhi saddapaññattīhīti **niruttiyo**.

Atthasatanti gāthāyaṃ atthavase pakaraṇe atthasataṃ veditabbantiādinā yojanā kātabbā. **Iti hīti** iti eva. **Hisaddo** hi evasaddattho. **Idanti** “atthasata”ntiādivacanaṃ, vuttanti sambandho. **Etanti** yathāvuttaṃ atthaṃ paṭiccāti sambandho.

Iti samantapāsādikāya vinayasaṃvaṇṇanāya

Mahāvaggavaṇṇanāya

Yojanā samattā.

Paṭhamagāthāsāṅgaṇikaṃ

Sattanagaresu paññattasikkhāpadavaṇṇanā

335. **Ekamsanti** ettha bhummatthe upayogavacanaṃ āha “ekasmim amse”ti. **Dasanakhasamodhānasamujjalanti** dasannaṃ nakhānaṃ samūhena sutṭhu ujjalaṃ. Ettha “samujjala”nti iminā **añjalinti** padassa ādarena, abhimukhaṃ vā jalati dibbatīti añjalīti atthaṃ dasseti.

Āsīsamānarūpovāti ettha āsīsamānarūpo evāti atthaṃ paṭikkhipanto āha “paccāsīsamānarūpo viyā”ti. Ettha “vīyā”ti iminā “āsīsamāno ivā”ti padavibhāgaṃ katvā **ivasaddo** upamatthajotakoti dasseti. **Kissāti** ettha karaṇatthe chaṭṭhīvibhatti hotīti āha “kena kāraṇenā”ti. **Idhāti** mama nisinnatṭhānaṃ. “Āgato”ti iminā **idhamāgatoti** ettha makāro padasandhikaramattoti dasseti. **Assāti** upālissa vissajjesīti sambandho. **Sabbatthāti** sabbesu pañhesu. **Itīti** evaṃ.

Tatthāti vissajjane. **Bhaddako te ummaṅgoti** ettha **ummaṅgasaddo** pañhavācakoti āha “bhaddakā te pañhā”ti. Tattha **te**ti tava. Kasmā pañhā “ummaṅgo”ti vuccatīti āha “pañcā hī”tiādi. **Hi** yasmā ummaṅgoti vuccati, tasmā pañhā ummaṅgo nāmāti yojanā. “Ummujjitvā tṭhitattā”ti iminā ummujjatīti **ummaṅgoti** vacanattṭhaṃ dasseti. Mujadhātu ukāraṃ akāro, avijjandhakārasaṅkhātā udakato ummujjatīti attho. “**Tagghā**”ti nipātassa tasmā kāraṇāti atthaṃ dassento āha “**yasmā**”tiādi. “Sampaṭicchanaṭṭhe”ti iminā tagghasaddo sādhuatthoti dasseti, taggha sādhuāti attho. **Tiṇṇiyevāti** “samādahitvā visibbentī”ti ekaṃ, “sāmisenā”ti ekaṃ, “sasitthaka”nti ekanti imāni tiṇṇiyeva.

Catuvipattivaṇṇanā

336. Yaṃ taṃ pucchimhāti ettha niggahitato paraṃ akāralopoti āha “yaṃ taṃ apucchimhā”ti. Tattha **yanti** pañhaṃ. **Tanti** tuvaṃ. “Tva”ntipi pāṭho, ayamevattho. **Taṃ tadevāti** taṃ taṃ eva pañhaṃ. **Aññathāti** aññaṃ ākāraṃ.

Ye duṭṭhullā sā sīlavipattīti ettha nanu sīlavipattiṃ pucchanto pañho natthi, kasmā pana “sā sīlavipattī”ti vissajjanaṃ vuttanti āha “kiñcāpi”tiādi. **Etanti** “ye duṭṭhullā sā sīlavipattī”ti vacanaṃ. Tamevatthaṃ vitthārento āha “catūsu hī”tiādi. **Vatvāti** saṃkhepena vatvā.

Tissannaṃ vipattīnanti sīlavipattito avasesānaṃ tissannaṃ vipattīnaṃ. **Tatthāti** “thullaccaya”ntiādivacane.

“Abbhācikkhantī”ti padassa kattāraṃ dassento āha “vadantā”ti. “Tathāha”ntiādinā vadanākāraṃ dasseti.

“Ayaṃ चाहि”ti iminā **ayaṃ sāti** ettha sāsaddo padālānkāroti dasseti. **Ettāvatāti** ettakena “thullaccaya”ntiādivacanamattena. Vissajjitaṃ hotīti sambandho.

Chedanakādivaṇṇanā

337. Kati chedanakānītiādi pucchānaṃ anusandhipucchābhāvaṃ dassento āha “**yasmā panā**”tiādi. Pucchā hi anusandhiananusandhivasena duvidhā. Tattha vissajjanaṃ anusandhivasena pucchā **anusandhipucchā** nāma, vissajjanamanapekkhitvā yathākāmapucchā **ananusandhipucchā** nāma. Tāsaṃ vitthāro nettiaṭṭhakathādīsu gahetabbo. Idhāpi “ekādasa yāvatiyakā”ti vissajjanaṃ anusandhānattā anusandhipucchā nāma. Yasmā pana vissajjitoti sambandho. **Saṅkhāvasenāti** ekādasā”ti saṅkhāya sattiya, āyattena vā. **Saṅkhānusandhivasenevāti** “katī”ti saṅkhāya anusandhivasena eva. **Tesanti** pañhānaṃ. **Tatthāti** “cha chedanakānī”tiādi pāṭhe. **Idamevāti** idaṃ eva vacanaṃ. **Apubbanti** pubbe na vuttaṃ, aporāṇaṃ navanti attho. **Yaṃ panetanti** yaṃ pana etaṃ vacanaṃ. “Soḷasā”ti iminā **sodasāti** ettha dakāraṃ ḷakāraṃ katvā “soḷasā”ti pāṭhopi yujjatīti dasseti. **Jānanti paññattāti** ettha “evaṃ vatvā”ti pāṭhasesaṃ ajjhāharitvā yojetabbabhāvaṃ dassento āha “jāna”nti evaṃ vatvā paññattā”ti. **Teti** “jāna”nti paññattā sikkhāpadāti attho. **Evanti** vakkhamānanayena. **Paviseyyātīti** ettha **itisaddo** parisamānattho. Iti veditabboti yojanā.

Asādhāraṇādivaṇṇanā

338. Purima pañhanti “kati chedanakānī” tiādipañhānaṃ pure vuttaṃ pañhaṃ. **Tatthāti** “vīsaṃ dve satānī” tiādipāṭhe. “**Dveaniyatehī**” ti padassa asamāhāradiguvākyāṃ dassento āha “dvīhi aniyatehī” ti. “**Saddhi**” nti iminā sahādiyoge karaṇavacananti dasseti.

Gāthāyaṃ “dhovanañca sikkhāpada” ntiādinā yojanā kātabbā. **Dve lomāti** dve eḷakalomasikkhāpadāni.

“**Sakalo**” tiādikāya aḍḍhateyyagāthāya yojanā suviññeyyāva.

Saṅghamhā dasa nissareti ettha “saṅghamhā nissārīyatī” ti (pāci. 680, 730) evaṃ vuttā dasāti yojanāyāṃ dassento āha “saṅghamhā nissārīyatī” tiādi. **Tatthāti** bhikkhunivibhaṅge. **Tathāti** yathā khuddakā, tathāti attho. **Itīti** evaṃ.

Tesanti pārājikānaṃ. Kaṇhasappādayo durāsadā viya durāsadā hontīti yojanā. “**Durūpagamanāti** iminā sadadhātuyā gatyatthaṃ dasseti. **Durāsajjanāti** dukkhena āsajjitabbā, āsajjituṃ na sukarāti attho. **Samūpamāti** samaupamā. Samūpamākāraṃ dassento āha “**yathā**” tiādi.

Sādhāraṇanti aṭṭhahi pārājikehi sādharmaṇaṃ. Ekekassa pārājikassāti sambandho. **Avirūḷhī bhavanti** teti ettha upamānopameyyānaṃ pakaṭabhāvaṃ katvā yojanāyāṃ dassento āha “yathā ete” tiādi. **Avirūḷhidhammāti** avirūḷhīsabhāvā. **Pakatisīlabhāvenāti** pakatiyā sīlavantabhāvena, “**pakatisīlabhāvenā**” tipī pāṭho, pakatisīlassa abhāvena, abhāvahetūti attho. **Ettāvatāti** ettakena “aṭṭheva pārājikā” tiādivacanamattena, dassitaṃ hotīti sambandho. **Vibhattiyoti** pārājikādivasena vibhajitabbāti vibhattiyoti. **Tatthāti** “tevīsati saṅghādisesā” tiādipāṭhe. **Sabbasaṅgāhikavacananti** sabbesaṃ tiṇṇaṃ samathānaṃ, sabbāsaṃ vā āpattīnaṃ samathānaṃ saṅgāhikavacanāṃ. “**Dvīhi samathehī**” ti sammukhāvinayena ca paṭiññātakaraṇena cāti dvīhi samathehi.

Etanti “dve uposathā dve pavāraṇā” ti vacanaṃ. **Vibhajanānīti** vibhajitabbānaṃ vibhajanakiriyāya avinābhāvato bhāvavasena vuttaṃ, tasmā vibhajitabbāti **vibhattiyoti** vacanattho kātabbo. Aparāpi imā vibhattiyo hontīti yojanā. Heṭṭhā vuttassa “vibhattimattadassaneneva cetāṃ vuttaṃ, na samathehi vūpasamanavasenā” ti vacanassa atthanayato aññaṃ atthanayaṃ dassento āha “**athavā**” tiādi, “imāpi vibhattiyo” ti padaṃ “nissāyā” ti pade avuttakammaṃ. Nissāya āpajjantīti sambandho. **Tāti** āpattiyō. **Vuttappakārehevāti** tīhi samathehīti vuttapakāreheva. **Taṃmūlikānanti** te eva uposathādayo mūlametāsanti taṃmūlikā, tāsāṃ. Iminā kāriyūpacārena vuttanayaṃ dasseti. **Tā vibhattiyoti** uposathādivibhattiyo.

Pārājikādiāpattivaṇṇanā

339. Evaṃ vissajjetvāti sambandho. Yadiḍaṃ āpattipārājikaṃ nāmāti yojanā. **Āpattipārājikanti** āpattisaṅkhātāṃ pārājikaṃ. “Parājayamāpanno” ti iminā sāsānato puggalaṃ parājetīti **pārājikanti** vacanatthaṃ dasseti. Nyapaccayo hetukatvatthavācako, yakārassa kakāro. **Cutoti** cavako. **Paraddhoti** viraddho. **Bhaṭṭhoti** patito. **Niraṅkatoti** saṅghamhā apasārito. **Anihate tasmim puggaleti** tasmim puggale saṅghamhā nīharitvā na harite, anapanīteti attho. “Uposathapavāraṇādibhedo” ti iminā saṃvāsasarūpaṃ dasseti. Byañjane ādaramakatvā “etaṃ āpattī” ti vuttaṃ. **Ayaṃ hīti** ayaṃ evaṃ vakkhamāno. **Etthāti** gāthāyaṃ. **Tena tasmāti** ettha “tasmā” ti padena “tenā” ti padassa kāraṇatthaṃ dasseti.

Etthāti dutiyagāthāyaṃ. Ādimhi ceva icchitabboti sambandho. **Hīti** saccāṃ. **Etthāti** parivāsādānādīsu catūsu kammesu. “Saṅgho” tiādivacanattho tipadabhinnādhikaraṇabāhiratthasamāso hoti, cevasaddacasaddehi ādisesapadānaṃ ubhayapadatthapadhānabhāvaṃ dasseti, “icchitabbo” ti padaṃ kārakānaṃ kiriyāpekkhattā kiriyatthāya pakkhittaṃ. **Assāti** āpattiyā, iminā aññapadaṃ dasseti.

icchitabbatthe apaccayaṃ katvā taddhitantipi vadanti. Lahukanayo panesa. Ayaṃ panettha garukanayo – ādi ca seso ca **ādisesā**, saṅgho ādisesesu assā icchitabboti **saṅghādisesoti**.

Anekaṃsikatam padanti ettha **padanti** sikkhāpadam. Anekaṃsena katham **anekaṃsikatanti** dassento āha “yasmā idam sikkhāpadam anekaṃsena kata”nti. Yasmā katham, tasmā aniyatoti pavuccatīti yojanā. **Tatthāti** aniyate. **Yatthāti** sikkhāpade. **Sopīti** sikkhāpadadhammopi.

Accayesūti dosesu. Te hi niddosaṃ atikkamma ayanti gacchanti pavattantīti **accayāti** vuccanti. **Tenāti** accayena. **Thūloti** oḷāriko. “Thūlattā”ti iminā “**teneta**”nti ettha tenasaddassa kāraṇattham dasseti. Accayassa thūlattāti sambandho. **Etanti** āpattidhammam. Imāya gāthāya aññesaṃ lahukāpattīnam thūlo accayo **thullaccayoti** vacanattham dasseti. Dvebhāve sati saṃyogaparattā rasso hotīti daṭṭhabbam.

“Nissajjitvā desetabbato”ti iminā nissajjanam **nissaggo**, āpattidesanato pubbabhāge kattabbassa vinayakammassetamadhivacanam, so etassathīti **nissaggiyanti** vacanattham dasseti.

Kusaladhammasaddena kusalacittameva gahetabbanti āha “kusaladhammasaṅkhātam kusalacitta”nti. “Kusalacittam pātetī”ti iminā cittam pātetīti **pācittiyanti** vacanattham dasseti. Ettha “cittapātiya”nti vattabbe padavipariyāyam katvā, takārassa ca lopam katvā “pācittiya”nti vuttam. Acinteyyo hi pālinayo. Nyapaccayo hetukatvatthavācako. Nanu “pātetī kusalam dhamma”nti imināva “pācittiya”nti padassa nibbacanam siddham, kasmā pana “aparajjhati cittasammohanatṭhāna”nti vuttanti āha “yam panā”tiādi. Yasmā hotīti sambandho.

Pāṭidesanīyāsu nibbacanameva adassetvā kasmā “bhikkhu aññātaḥ santo”tiādi vuttanti āha “vuttagārayhabhāvākāraṇadassanattamevā”ti. “Paṭidesetabbato”ti iminā aññāpattidesanāyato “gārayha”ntiādinā paṭi viṣum vatvā desetabbāti **pāṭidesanīyāti** nibbacanam dasseti.

Dukkaṭanti ettha dusaddo duṭṭhuattho ca virūpattho ca hotīti dassento āha “duṭṭhu katham, virūpam vā kata”nti. **Tanti** kammam. **Tam panetanti** dukkaṭam, khalitanti sambandho. **Assāti** dukkaṭassa. Tassattho evam veditabboti yojanā. **Hīti** vitthāro. Yam pāpanti yojanā. **Yadīti** atha. **Yadisaddo** hi athapariyāyo. **Idampīti** idampi kammam, pāpanti sambandho.

“Lapita”nti iminā **durābhaṭṭhanti** ettha bhāsadhātuyā kathanattham dasseti. **Yanti** vacanam. **Kiñca bhīyyoti** tato atirekam kathetabbavacanam kiñcāti attho. **Samkiliṭṭhañca yam padanti** ettha cakāro pisaddattho “pada”nti ettha yojetabbo, **yamsaddo** kāraṇatthoti āha “samkiliṭṭham yasmā tampi pada”nti. **Tampi padanti** tampi vacanam. **Padasaddo** hi vacanavācako. Tampi vacanam yasmā samkiliṭṭham hotīti yojanā. Katham samkiliṭṭham hotīti yojanā. “Yasmā”ti padena **yamsaddo** kāraṇatthoti dasseti. **Nanti** padam. “**Etam iti vuccatī**”ti samvaṇṇetabbapadam. “Dubbhāsītanti etam vuccatī”ti samvaṇṇanāpadam. **Etanti** etam padam, etam vacananti attho.

Etthāti sekhiyagāthāya. **Idanti** āpattīnam nibbacanadīpakam vacanam, vuttanti sambandho. Kassa dīpanattham vuttanti āha “saṅgahitassa atthassa dīpanattha”nti.

Tatthāti “channamativassatī”tiādivacane. **Gehanti** pakatigeham. Idam pana gehanti yojanā. Vitthārento āha “mūlapattīñhī”tiādi. “Avivaṭa”nti vatvā tassattham dassetuṃ vuttam “succhanna”nti. **Vivaṭanti** acchannam. Nātivassanabhāvam vitthārento āha “mūlapattīñhī”tiādi. Vivaranto bhikkhu nāpajjatīti sambandho. **Suddhanteti** suddhakoṭṭhāse. “Tasmā”ti ca “tenā”ti ca yebhuyyena atthato ekam, tasmā vuttam “tena kāraṇenā”ti. **Evañcetam vivaṭanti** evam etam channam ce vivaṭanti yojanā.

Paripātiyamānānti abhibhūyamānānam. “Rukkadhādigahanam arañña”nti iminā **pavananti**

padassa araññapariyāyatam dasseti. Gatisaddassa bhavabhedādiattham paṭikkhipitvā paṭissaraṇatthe hotīti dassento āha “paṭissaraṇam hotī”ti. **Tanti** pavanam. **Teti** migā. “**Assasanti**”ti padena “passasanti”ti atthopi gahetabbo avinābhāvato, ānāpānam karontīti attho. **Ākāsoti** ajaṭākāso. **Pakkhīnanti** vihaṅgamānam. “Sabbesam saṅkhatadhammāna”nti iminā **dhammānanti** ettha saṅkhatadhammoyeva gahetabboti dasseti. “Vināsovā”ti iminā **vibhavasaddo** vināsavācakoti dasseti. **Tesanti** sabbesampi saṅkhatadhammānam. **Gatīti** patiṭṭhā. Kasmā vibhavo dhammānam gati hotīti āha “na hī”tiādi. **Hīti** yasmā. **Teti** sabbepi saṅkhatadhammā. **Vināsanti** vibhavam. **Sucirampīti** asītivassādikālampi. **Nibbānam arahato gatīti** saṃvaṇṇetabbapadam. “Khīṇāsavassā”ti iminā **arahatoti** padassa attham dasseti. “Anupādisesanibbānadhātū”ti iminā “**nibbāna**”nti padassa idha adhippetanibbānam dasseti. Gāthāya te te atthā saṃgahetvā gaṇiyanti etthāti **gāthāsaṅgaṇikam**.

Iti paṭhamagāthāsaṅgaṇikavaṇṇanāya yojanā samattā.

Adhikaraṇabhedam

Ukkoṭanabhedādivaṇṇanā

340. Adhikaraṇabhede evamattho veditabboti yojanā. Dassetum āhāti sambandho. **Dve samatheti** ettha dvinnam samathānam sarūpam dassento āha “sammukhāvinayañca yebhuyyasikañcā”ti. “Paṭisedhetī”ti iminā **ukkoṭetīti** ettha kuṭadhātuyā chedanattham atthato dasseti. Chedanam nāma atthato samathapaṭisedhananti attho.

341. Dvādasasu ukkoṭesūti niddhāraṇe bhummam. **Akatam kammantiādayoti** ettha ādisaddena “dukkaṭam kammaṃ, puna kātabbam kamma”nti dve ukkoṭā saṅgahetabbā. **Anihatam kammantiādayoti** ettha ādisaddena “dunnihatam, puna nihanitabba”nti dve ukkoṭā saṅgahetabbā. **Avinicchitantiādayoti** ettha ādisaddena “duvinicchitam, puna vinicchitabba”nti dve ukkoṭā saṅgahetabbā. **Avūpasantantiādayoti** ettha ādisaddena “duvūpasantam, puna vūpasametabba”nti dve ukkoṭā saṅgahetabbā. **Apicāti** sāmāññato pana.

Tattha jātakanti ettha tasaddassa visayam dassento āha “yasmimvīhāre”ti. Yasmimvīhāre uppannam hotīti sambandho. Aññamaññassa attesu, attānam vā paṭipakkham atthayanti icchantīti **attapaccatthikā**. **Pālimuttakavinicchayenevāti** pāliyam āgatehi samathehi muttakena dhammadesanāmatavinicchayeneva. **Idanti** adhikaraṇam. **Yenāpi vinicchayenāti** pālimuttakena yenāpi vinicchayena.

Aññoti nevāsikehi añño vinayadharo pucchati sambandho. **Tehi cāti** nevāsikehi ca.

Etassāti vinayadharassa. **Ayanti** vinayadharo. **Tatthāti tam gāmam**. **Aññamaññam vā saññāpentīti** attapaccatthikā aññamaññam vā saññāpentīti. **Te bhikkhūti** te attapaccatthikā bhikkhū. **Nijjhāpentīti** saññāpentīti. **Ukkoṭeti yoti** yo ukkoṭeti. **Eteti** attapaccatthike bhikkhū, disvāti sambandho. **Tatthāti gāmam**. **Tatthevāti** antarāmagge eva.

Tatthevāti gāmameva. **Tatthevāti** tasmimyeva ṭhāne. **Tattha gatanti tam gāmam gataṃ**.

“Eseva nayo”ti iminā pācittiyameva atidisati.

Saṅghena...pe... adhikaraṇe vadantopīti sambandho. Yam panetam āpattivuṭṭhānam nāma hotīti yojanā. **Etanti** āpattivuṭṭhānam. **Vadantopīti pisaddo** na kevalam tiṇavattārakam ukkoṭentoyeva ukkoṭeti nāma, atha kho vadantopīti dasseti.

Chandāgatim gacchantotitiādīsu agatigamanākāraṃ dassento āha “vinayadharo hutvā”tiādi. Atthāya ukkoṭentoti sambandho. **Tassāti** anantthaṃ carantassa. Mando pana ukkoṭeti nāmāti sambandho. Eko balavanissito ca hotīti sambandho. **Gahanamicchādīṭṭhinti** gahanasadisaṃ micchādīṭṭhim pavanasadisaṃ micchādīṭṭhinti attho. **Balavante cāti** ettha **casaddo** sabbakammesu yojetabbo. **Nissitattāti** ekassa nissitattā. **Balavanissito cāti** etthāpi ca saddo sabbakattūsu yojetabbo. **Tassāti** visamādinissitassa.

Soti sāmaṇero. **Maṅkubhūtāthhāti** maṅkū hutvā bhūtā, maṅkuṃ vā pattā attha bhavathāti attho. **Teti** parājayabhikkhū. **Tassāti** sāmaṇerassa. **Soti** sāmaṇero. **Teti** parājayabhikkhū. **Tanti** sāmaṇeraṃ. **Soti** daharo. **Tatoti** sannipātakāraṇā. **Hiyyoti** anantarātītahe. **Itīti** evaṃ vadeti. **Soti** daharo. Idam sikkhāpadaṃ paññattanti yojanā. **Gacchāti** gacchāhi. **Itīti** evaṃ vattabboti yojanā.

Saṅghena saddhim adhikaraṇaṃ vinicchinitvā pariveṇagataṃ ekaṃ bhikkhunti yojanā. **Kissāti** kena kāraṇena. Evaṃ iminākārena vinicchitabbaṃ nanūti yojanā. **Soti** vinicchayakārako bhikkhu. Chandadāyako suviññeyyoyeva.

Adhikaraṇanidānādivaṇṇanā

342. Kiṃnidānantitiādīsu chasu padesu samāsabhāvaṃ dassento āha “kiṃnidānamassā”tiādi. **Assāti** vivādādhikaraṇassa. “Kiṃnidāna”nti padānaṃ satipi samāsabhāve byañjanantapakatikattā “ki”nti niggaḥitantabhāvena uccāraṇaṃ kātabbaṃ. **Sabbānetānīti** sabbāni nidānantiādīni etāni padāni. **Vevacanānīti** ekasmimyeva “kāraṇa”nti atthe vividhāni vacanāni **vivacanāni**, tāniyeva **vevacanāni**. Atha vā vividhaṃ vacanametassatthassāti vivacanaṃ, kāraṇasaṅkhāto attho, abhidheyyaabhidhānabhāvena sambandhattā vivacanaṃ etāni **vevacanāni**, padāni.

“Atthārasabhedakaravattusāṅkhāto”ti iminā vivādasarūpaṃ dasseti. **Vivādanti** atthārasabhedakaravattusāṅkhātaṃ vivādaṃ. **Etanti** “vivādanidāna”nti etaṃ vacanaṃ. **Assāti** anuvādādhikaraṇassa. **Idampīti** “anuvādanidāna”nti vacanampi. **Assāti** āpattādhikaraṇassa. **Etanti** “āpattinidāna”nti vacanaṃ. Kiccameva byañjanavaḍḍhanavasena **kiccayanti** vuttaṃ. **Assāti** kiccādhikaraṇassa. Samanubhāsanādīnaṃ uppajjanakakiccānanti sambandho. **Etanti** “kiccayanidāna”nti vacanaṃ. **Ekapadayojanāti** ekena “nidāna”nti padena yojanā. **Sabbapadānīti** sabbāni samudayādīni padāni.

Navannanti jātivasena channaṃ hetūnaṃ navasu antogadhattā tikavasenetam vuttaṃ. **Byañjanamattanti** hetupaccayavasena byañjanameva. **Hīti** saccam, yasmā vā. **Etthāti** tatiyapucchāvissajjane.

343. Dvādasa mūlānīti ettha dvādasannaṃ mūlānaṃ sarūpaṃ dassento āha “kodhaupanāhayugaḷakādīni”tiādi. Ettha (vibha. 833, 944) ādisaddena makkhapaḷāsayugaḷa issāmacchariyayugaḷa māyāsāṭṭheyyayugaḷa pāpicchamicchādīṭṭhiyugaḷa sandīṭṭhiparāmāsīadhānaggāhiduppaṭinissaggiyugaḷavasena pañca yugaḷāni saṅgaṇhāti. **Ajjhattasantānappavattānīti** niyakajjhattasantāne pavattāni.

Atthārasabhedakaravattūnaṃ samuṭṭhānabhāvaṃ nibbacanena pakāsento āha “taṃ hī”tiādi. **Tanti** anuvādādhikaraṇaṃ, samuṭṭhātīti sambandho. Ettha ca “etesū”ti iminā adhikaraṇabhāvaṃ dasseti. “Etehi”ti iminā karaṇabhāvaṃ dasseti. **Tenāti** kāraṇena. **Assāti** vivādādhikaraṇassa. **Etānīti** atthārasabhedakaravattūni. **Sabbatthāti** sabbesaṃ adhikaraṇānaṃ sabbesu samuṭṭhānesu.

344. Ekena adhikaraṇena kiccādhikaraṇenāti idam vuttanti sambandho. **Etānīti** adhikaraṇāni. **Ekamsatoti** ekamsena, ekakoṭṭhāsenāti attho. **Hīti** saccam, yasmā vā.

Sāvasesāpatti sammati viya anavasesāpatti na sammatīti yojanā. Kasmā na sammatīti āha “na hī”tiādi. **Hīti** yasmā. **Sāti** anavasesā āpatti. **Tatoti** anavasesāpattito. Ettha ca “na sakkā desetū”nti iminā desanāgāminiyā abhāvaṃ dīpeti. “Na sakkā...pe... patiṭṭhātu”nti iminā vuṭṭhānagāminiyā abhāvaṃ dīpeti.

349. Tatoti nayato. **Yattha sativinayotiādikā** cha yamakapucchāti sambandho. **Tāsanti** pucchānaṃ. **Pakāsitoti** pākaṭo.

351. Dvinnampi samathānanti sammukhāvinayasativinayavasena dvinnampi samathānaṃ. **Yasmāti** yena kāraṇena na sakkāti sambandho. **Pattavaṭṭīnaṃ nānākaraṇanti** sambandho. **Tesanti** sammukhāvinayasativinayānaṃ nānākaraṇanti sambandho. **Ayaṃ panettha yojanā – yasmā** kadalikkhandahe **pattavaṭṭīnaṃ nānākaraṇaṃ** vinibbhujitvā dassetuṃ na sakkā viya **tesaṃ nānākaraṇaṃ** vinibbhujitvā dassetuṃ na sakkāti. **Tenāti** kāraṇena. **Sabbatthāti** sabbesu vissajjanesu.

Sattasamathanidānavaṇṇanā

352. Assāti sammukhāvinayassa. **Tatthāti** “nidānanidāno”ti pāṭhe. **Idanti** sammukhācatukkaṃ. **Laddhupavādoti** laddho paresaṃ upavādo yenāti laddhupavādo, khīṇāsavo. **Yassa cāti** yassa ca santiketī sambandho. **Ubhinnanti** desakapaṭiggāhakaṇaṃ dvinnāṃ.

353. Nanu pucchāyaṃ “sattannaṃ samathāna”nti vuttaṃ, kasmā pana vissajjanāyaṃ sammukhāvinayassa samuṭṭhānaṃ na vuttanti āha “kiñcāpī”tiādi. Tattha kiñcāpī vuttanti yojanā. Ettha **kiñcāpisaddo** sambhāvanattho, **panasaddo** garahattho. Tathā vuttampīti yojanā. **Kammasaṅgahābhāvenāti** kamme saṅgahassa abhāvena. **Tatthāti** tasmīṃ “kammassa kiriyā”tiādi pāṭhe. Kammaṃ kariyati imāyāti kiriyā, ñatti. Tena vuttaṃ “kammassa kiriyāti ñatti veditabbā”ti. Kariyate ṭhapiyate **karaṇaṃ**. Sayāṃ upagamiyate **upagamaṇaṃ**. Ajjesanena paraṃ upagamāpiyate **ajjhupagamaṇaṃ**. Adhivāsiyate **adhivāsanā**. Appaṭikkosiyate **appaṭikkosanā**. Iti imamatthaṃ dassento āha “karaṇanti tassāyevā”tiādi. **Etanti** kammaṃ. **Meti** mayhaṃ. Khamudhātupayoge sampadānatthe sampadānavacanaṃ. Atha vā meti mayā. Katvatthe karaṇavacanaṃ, sāmivacanaṃ vā. **Khamatīti** katturūpasadisāṃ kammarūpaṃ. Rūpañhi katturūpasadisāṃ kammarūpaṃ “khamati saṅghassā”tiādīsu (mahāva. 127) viya. Kammarūpasadisāṃ katturūpaṃ “upāsako sīlaṃ samādiyati”tiādīsu (paṭṭhā. 1.1.423) viya. Ettha kammattthe pavatto yapaccayo lopoti daṭṭhabbaṃ.

Sattasamathanāntthādivaṇṇanā

354. Mātāputtādīnaṃ ayaṃ vivādoti yojanā. “Viruddhavādattā”ti iminā vadaṇaṃ vādo, viruddho vādo **vivādoti** nibbacanaṃ dasseti. **Adhikaraṇīyatāyāti** vūpasamitatāya. Iminā adhikariyati samathehi vūpasamiyatīti **adhikaraṇanti** vacanattaṃ dasseti. **Sabbatthāti** sabbesu adhikaraṇabhedesu.

Iti adhikaraṇabhedavaṇṇanāya yojanā samattā.

Dutiyagāthasaṅgaṇikaṃ

Codanādipucchāvissajjanāvaṇṇanā

359. Dutiyagāthasaṅgaṇiyaṃ codanā nāma kiṃ dassetvā codanāti āha “vatthuñca āpattiñca dassetvā codanā”ti. Dosaṃ sarāpetīti **dosasāraṇā**. **Saṅghasannipātoti** saṅghassa sannipatanāṃ. Iminā **saṅghoti** ettha uttarapadalopaṃ dasseti. **Matikammaṃ** ettha matisaddo icchatthoti āha “vuccati mantaggahaṇa”nti. **Tanti** matikammaṃ.

“Tena cuditakapuggalenā”ti padam “sāraṇatthāyā”ti pade kārītakammaṃ. **Tassa puggalassāti** tassa cuditakassa puggalassa, iminā “niggahatthāyā”ti padassa kammaṃ dasseti. **Tatthāti** tasmim adhikaraṇavinicchayaṭṭhāne. **Pariggahaṇatthāyāti** pari vīmaṃsitvā gahaṇatthāya. **Dhammā-dhammanti** bhūtābhūtaṃ. “Vinicchayasanniṭṭhāpanattha”nti iminā pāḷiyam pāṭhasesaṃ dasseti.

Mā kho paṭighanti ettha **paṭighasaddo** kopapariyāyoti āha “kopam mā janayī”ti. “Cuditake vā codake vā”ti iminā “saṅghe”ti ādhāraṃ paṭikkhipati. **Sace anuvijjako tuvanti** ettha **anuvijjakasaddo** vinayadharapariyāyoti āha “vinayadharo”ti. Vinayadharo hi yasmā codakacuditakānaṃ vacanaṃ anuminitvā vatthuāpattādivasena vidati, tasmā **anuvijjakoti** vuccati.

Viruddham gāham saṃvatteti **viggāhikam**. “Na tva”ntiādinā ṇikapaccayassa sarūpaṃ dasseti. **Yāyāti** kathāya. Suttādīnaṃ sarūpaṃ dassento āha “**suttaṃ nāmā**”tiādi.

Anuyuñjanavattanti anuyuñjanassa, anuyuñjane vā vattaṃ. Kusalena buddhimatāti ettha **kusalasaddo** chekapariyāyo, **buddhimantusaddo** paṇḍitapariyāyoti āha “chekena paṇḍitenā”ti. “Ñāṇapāramippattena”ti iminā **buddhimatāti** ettha na kevalam ñāṇasāmaññaṃ, atha kho sabbaññutaññānti dasseti. **Ayanti** eso yathāvutto attho. **Ayam panāti** eso vakkhamāno pana. **Etthāti** imāsu gāthāsu. Sace tvaṃ anuvijjako hosīti yojanā. Yam pana anuyogavattaṃ kataṃ supaññaṭṭam sabbasikkhāpadānaṃ anulomanti yojanā. **Tanti** anuyogavattaṃ. **Itīti** ayam sādhippāyasankhepavaṇṇanā. **Attanoti** anuvijjakassa. **Samparāyeti** paraloke. **Yoti** anuvijjako. **Tanti** anuyogavattaṃ. **Gatinti** sugatiṃ. **Hitanti** codakacuditakānaṃ hitaṃ. **Gavesantoti** ñāṇena esanto. Iminā hitaṃ esantoti **hitesīti** vacanattaṃ dasseti. **Mettañcāti** appanāpattaṃ mettañca. **Mettāpubbabhāgañcāti** appanāmettāya pubbabhāge pavattaṃ parikammaupacāramettañca. Tava bhāre saṅghena kate evāti yojanā.

Yoti anuvijjako. **Etesanti** codakacuditakānaṃ. “Bhāsita”nti iminā **vohārasaddo** bhāsītapariyāyoti dasseti. **Tanti** sahasā vohāraṃ.

Anusandhitanti ettha vinicchayānusandhiṃ paṭikkhipanto āha “kathānusandhi vuccatī”ti. Kathāya anurūpaṃ sandahanaṃ **kathānusandhi**. **Paṭiññānusandhitenāti** ettha paṭiññāsaddaanusandhisaddānaṃ tulyādhikaraṇato aññaṃ bhinnādhikaraṇaṃ dassento āha “**athavā**”tiādi. Lajjiṃ puggalanti sambandho. **Tatthāti** gāthāyaṃ. **Vattānusandhināti** ācārasaṅkhātena vattena anusandhinā assa alajjīssa vattena saddhiṃ yā paṭiññā sandhiyatīti yojanā.

Jānanto āpajjati jānanto hutvā āpajjati. Iminā **sañciccāti** padassa sañcetevāti atthaṃ dasseti. Vītikamacetanāya saddhiṃ cetevāti attho. “Na deseti na vuṭṭhātī”ti iminā **parigūhatīti** ettha parigūhanaṃ nāma atthato na desanaṃ na vuṭṭhānanti dasseti.

Yanti “sañcicca āpattiṃ āpajjati”ti vacanaṃ. **Tumhehīti** parihārakārahehi. **Saccanti** tathaṃ avitathaṃ. **Ahampīti** codakopi. **Pisaddena** parihāraṃ sampiṇḍeti. **Nanti** “sañciccā”tiādivacanaṃ. **Tanti** tvaṃ, tvaṃ vā.

Pubbāparanti ettha pubbe kathetabbaṃ **pubbaṃ**, aparamhi kathetabbaṃ **aparaṃ**, pubbañca aparāñca pubbāparanti dassento āha “pure”tiādi. “Tasmim pubbāpare”ti iminā pāḷiyam **pubbaparassāti** ettha bhummattaṃ sāmivacananti dasseti.

Dvīhīti pārājikasāṅghādisesavasena dvīhi. **Pañcahīti** thullaccayādivasena pañcahi. **Micchādīṭṭhiyāti** “natthi dinna”ntiādinā (dha. sa. 1221) dasavatthukāya micchādīṭṭhiyā. **Antaggāhikadīṭṭhiyāti** “sassato loko”tiādinā (dī. ni. 1.31; ma. ni. 1.269) dasavatthukāya antaggāhikadīṭṭhiyā. **Sabbatthāti** sabbesu dutiyagāthāsāṅgaṅikesu.

Iti dutiyagāthāsaṅgaṇikavaṇṇanāya yojanā samattā.

Codanākaṇḍaṃ

Anuvijjakakiccavaṇṇanā

360-1. Idāni āradhanti sambandho. Eko bhikkhu ekena mātugāmenāti yojanā. **Soti** passanto bhikkhu. **Tanti** nikkhamantaṃ pavisantaṃ vā bhikkhuṃ. **Itaroti** cuditako. **Tassāti** codakassa. **Na upetīti** na upagacchati. **Na paṭijānātīti** na paṭissavaṃ karoti. **Etthāti** mātugāmena nikkhamantapavisantaṭṭhāne. **Yanti** kammaṃ. **Tenāti** codakena. **Tassāti** codakassa vacanenāti sambandho. **Itaroti** cuditako. **Asuddhapaṇisaṅkito**ti asuddhāya aṭṭhāne uppannāya paṇisaṅkāya paṇisaṅkito. Tadatthaṃ dasseti “amūlakapaṇisaṅkito”ti iminā. **Tassa puggalassāti** cuditakassa paṭiññāyāti sambandho. **Sabbatthāti** sabbesu anuvijjakakiccesu.

Iti anuvijjakakiccavaṇṇanāya yojanā samattā.

Codakapucchāvissajjanā

362-3. Sacce ca akuppe cāti padhānaṃ sambandhaṭṭhānaṃ dassento āha “paṭiṭṭhātabba”nti. “Ya”ntiadinā sacce paṭiṭṭhātabbabhāvaṃ dasseti. **Yanti** kammaṃ. “Na cā”tiadinā akuppe paṭiṭṭhātabbabhāvaṃ dasseti. **Otiṇṇaṅcāti** vinicchayaṃ otiṇṇaṅca. “Vacana”nti iminā otiṇṇānotiṇṇasarūpaṃ dasseti. **Tatrāti** purimavacanāpekkhaṃ. “Otiṇṇānotiṇṇaṃ jānitabba”nti vacaneti hi attho. **Codakassa pamāṇanti** “dhammo”ti vā “adhammo”ti vā “bālo”ti vā “paṇḍito”ti vā codakassa pamāṇaṃ. **Cuditakassa pamāṇanti** dhammacuditako nu kho, noti cuditakassa pamāṇaṃ. **Anuvijjakassa pamāṇanti** sakkā nu kho vinicchitūṃ, noti anuvijjakassa pamāṇaṃ. Anuvijjako vattabboti sambandho. **Yena dhammenāti**ādīsu dhammādīnaṃ sarūpaṃ dassento āha “dhammoti bhūtaṃ vatthū”tiādi. Etena dhammena ca etena vinayena ca etena satthusāsanena cāti yojanā. Tasmā anuvijjakena vūpasametabbanti sambandho. **Etthāti** anuvijjakassa paṭipajjitabbaṭṭhāne.

Avaññanti avajānanaṃ. **Imeti** therā. “Khatattā”ti iminā attanāva attā khaññatīti **khatoti** vacanattaṃ dasseti. Upahaniyantīti **upahatāni**, upahatāni indriyāni anenāti **upahatindriyo**. “Paññāya abhāvato”ti iminā **dummedhoti** ettha dusaddo abhāvatto, medhāsaddo paññāpariyāyoti dasseti. Natthi medhā etassāti **dummedhoti** nibbacanaṃ kātabbaṃ. Khato...pe... dummedho so anuvijjako upagacchatīti yojanā. **Tasmāti** yasmā upagacchati, tasmā vuttanti sambandho. **Tassāti** pāṭhassa, gāthāya vā. Vitthāraṃ dassento āha “cuditakacodakesu hī”tiādi. **Ubhopeteti** ubhopi ete āmisapuggalanissaye. **Dhammoti** sāsanadhammo. **Itīti** ayamatto.

Upakaṇṇakaṃ jappatīti ettha kaṇṇassa samīpaṃ upakaṇṇaṃ, tadeva upakaṇṇakanti dassento āha “evaṃ kathehī”tiādi. “Kaṇṇamūle”ti iminā upakaṇṇakanti ettha upasaddassa samīpatthaṃ dasseti. **Mantetīti** katheti. Iminā jappadhātuyā kathanattaṃ dasseti. **Jimhaṃ pekkhatīti** ettha jimhasaddo kuṭīlavācako, kuṭīlaṃ nāma atthato idha dosoti āha “dosamevā”ti.

Kathānusandhīti cuditakaanuvijjakānaṃ kathāya anusandhi. **Vinicchayānusandhīti** anuvijjakena katassa āpattānāpattivinicchayassa anusandhi. **Sabbatthāti** codanākaṇḍe.

Iti codanākaṇḍavaṇṇanāya yojanā samattā.

Cūlasaṅgamaṃ

Anuvijjakassa paṭipattivaṇṇanā

365. Cūlasaṅgāme samāgamaṃ **saṅgāmo**, samāgamenti sannipatanti etthāti vā **saṅgāmoti** vacanattamaṃ dassento āha “saṅgāmo vuccati...pe... saṅghasannipāto”ti. Sannipatanaṃ **sannipāto**, sannipatanti ettha deseti vā sannipāto, saṅghassa sannipāto **saṅghasannipāto**. Saṅgāma yuddheti dhātupāthesu (saddanītidhātumālāyaṃ 18 makārantadhātu) vuttaṃ. Tattha yuddhaṃ nāma atthato adhikaraṇavinicchayoti gahetabbaṃ. Tadattamaṃ vitthārento āha “tatra hī”tiādi. Tattha **tatrāti** tasmaṃ saṅgāme, samosarantīti sambandho. **Attapaccatthikāti** attano paṭipakkhaṃ atthayanti. **Uddhammanti** dhammato viyogaṃ. Dīpentā hutvāti yojanā. Ke viyāti āha “vajjiputtakā viyā”ti. So bhikkhu pavatteti sambandho. **Laddhinti** uddhammādivādaṃ. **Tatthāti** saṅgāme. **Avacaratīti** ogāhetvā cāreti pavatteti. Tamevatthamaṃ dassento āha “ajjhogāhetvā vinicchayaṃ pavatteti”ti. Ettha “ajjhogāhetvā”ti iminā **avatyūpasaggassa** ogāhattamaṃ dasseti. “Vinicchayaṃ pavatteti”ti iminā caradhātussa kārītantogadhattā sahakāritakammaṃ pavattanattamaṃ dasseti. Iminā saṅgāme avacaratīti **saṅgāmāvacaroti** nibbacaṃ dasseti. Ko viyāti āha “yasatthero viyā”ti. **Mānaddhajanti** ketukamyatāpaccupaṭṭhānamānasāṅkhātamaṃ dhajamaṃ. **Rajoharaṇasamenāti** ettha rajamaṃ harati apaneti anenāti **rajoharaṇamaṃ**, pādapuñjanaṃ, tena samenāti dassento āha “pādapuñjanasamenā”ti. Pādaṃ puñjati sodheti anenāti **pādapuñjanaṃ**, tena samo **pādapuñjanasamo**, tena. Samākāraṃ dassento āha “yathā”tiādi. Rajoharaṇassa neva rāgo hotīti sambandho. **Yathāpatirūpanti** patirūpassa anulomaṃ, patirūpānatikkantanti attho. Akathentena nisīditabbanti sambandho. **Sāmaṃ vā dhammoti** ettha dhammo nāma koti āha “kappiyākappiyanissitā vā”tiādi. Rūpārūpaparicchedo ca samathācāro ca vipassānacāro ca ṭhānavattañca nisajjavattañca, ādisaddena caṅkamavattādīni saṅgaṇhāti. Cuddasamahāvattādīnaṃ “kappiyākappiyanissitā”ti padena gahitattā vattasaddena ṭhānavattādīni eva gahetabbāni, ādisaddena caṅkamavattādīni gahetabbāni. **Paro vā ajjhesitabboti** yovā so vā koci ajjhesitabboti āha “yo”tiādi. Iminā na yo vā so vā koci ajjhesitabbo, samatthoyeva pana ajjhesitabboti vā dasseti. “Āvuso”tiādīnaṃ vattabbākāraṃ dasseti. **Ariyo vā tuṅhībhāvoti** ettha na kevalamaṃ kathetumaṃ asamatthavasena tuṅhībhāvo, kammaṭṭhānamanasikāravasena panāti āha “kammaṭṭhānamanasikāravasena tuṅhībhāvo”ti. Ariyānaṃ eso **ariyo**, tuṅhībhāvo. “Nāvajānitabbo”ti iminā **nātimaññitabboti** padassa atikkamma na maññitabboti dasseti.

Upajjhāyoti codakacuditakānaṃ upajjhāyo. **Sabbatthāti** sabbesu “na ācariyo pucchitabbo”tiādi padesu. Kulameva jātināmagottavasena ayanti apadisiyatīti **kulapadeso**. **Atrassāti** ettha atra assāti padacchedamaṃ katvā atrasaddo puggalavisayo, assasaddo ākhyātikoti āha “atra puggale”tiādi. Tattha “bhaveyyā”ti iminā assasaddassa sabbanāmattañca “bhavati”ti vattamānikabhāvañca paṭikkhipati. **Parisānuvidhāyakenāti** parisāya anumataṃ karontena. Iminā **no parisakappikenāti** ettha **kappasaddo** vijhatthoti dasseti. **Yanti** vacanaṃ. **Na hatthamuddāti** mudanti etāyāti **muddā**, sakkhamaṅguliyaṃ hatthassa muddā avayaviavayavavasena sambandhattāti **hatthamuddā**. Tassā vikāro “hatthamuddā”ti gahetabboti āha “hatthavikāro”ti.

“Atthamaṃ anuvidhiyantena”ti ettha **atthanti** vinicchayatthamaṃ. **Anuvidhiyantenti** sallakkhentena. Iti imamatthamaṃ dassento āha “vinicchayaapaṭivedhameva sallakkhentena”ti. **Sannipātamaṅḍaleti** sannipātāya parisāya samūhe, sannipātamaṅḍalassa majjhenti attho. **Na vītiḥātabbanti** ettha vītiḥaraṇamaṃ nāma atthato hāpananti āha “na vinicchayo hāpetabbo”ti. **Duruttavācanti** codakacuditakānaṃ duruttavācaṃ. **Hitaparisakināti** ettha hitamaṃ pari esatīti hitaparisako, karuṇā ca karuṇāpubbabhāgo ca, so etassatthāti **hitaparisakī**, puggalo, tena hitaparisakinā. Tamevatthamaṃ dassento āha “hitesinā hitagavesinā”ti. **Karuṇāti** appanāpattā karuṇā. **Karuṇāpubbabhāgoti** appanāpattāya karuṇāya pubbabhāge pavattā parikkammaupacāraṅkaruṇā. **Padadvayepīti** “hitānukampinā kāruṇikena bhavitabbaṃ. Hitaparisakinā asamphappalāpinā bhavitabba”nti padadvayepi. Ayaṃ adhippāyo veditabboti yojanā. “Asundaravacana”nti iminā **asuruttanti** ettha sundaraṃ uttamaṃ **suruttamaṃ**, na suruttamaṃ asuruttanti vacanattamaṃ dasseti. **Pariggahetabboti** parivīmaṃsitvā gahetabbo.

Tassāti adhammacodakassa. **Anosaṭamaṃ vatthunti** ettha “codakacuditakehi vutta”nti padaṃ adhikāravasena veditabbaṃ. Ettha ca **anosatanti** vinicchayaṃ anosatanti attho. Kiṃ paggaṇhitabboti āha “nanu tva”ntiādi. **Anuyogavattanti** “kālena vakkhāmī”tiādīnaṃ (cūlava. 399; pari. 362, 437) vuttaṃ, “sacce ca akuppe cā”ti (cūlava. 401) ca vuttaṃ anuyūñjanavattaṃ. Tañhi yasmā anena vattena codako

cuditakam, cuditako vā codakam anuyuñjati, codakena cuditako, cuditakena vā codako anuyuñjiyati, tasmā **anuyogavattanti** vuccati. **Kathāpetvāti** codakacuditakeheva kathāpetvā. **Tassāti** codakassa vā cuditakassa vā, **sārajanti** bhayaṃ. **Teti** tava. **Vatvāpīti** mukhena vatvāpī. **Pisaddena** kāyavikāraṃ dassetvāpīti sampiñḍeti. “Anuyogavatta”nti dhātukammaṃ, “so bhikkhū”ti kāritakammaṃ ajjhāharitabbaṃ, taṃ kammaṃ tabbapaccayo vadati. **Asuci vibhāvetabboti** ettha natthi suci sīlametassāti **asucīti** vutte alajjīti āha “alajji”nti. Uju sīlavā kāyavaṅkādirahito hotīti yojanā. Ettha ca kāyavaṅkādirahito hotīti iminā ujuno kāraṇaṃ dasseti. Kāyavaṅkādirahitattā uju hotīti adhippāyo. **Soti** bhikkhu. **Maddavenevāti** mudubhāveneva. **Upacaritabboti** kathetabbo. Iminā **ujumaddavenāti** padassa sambandhaṭṭhānaṃ pāṭhasesaṃ dasseti. **Yoti** bhikkhu. **Ayamevāti** evasaddena na dhammagaruko, puggalagaruko, dhammesu ca puggalesu ca na majjhattoti veditabboti dasseti.

366. Tena ca pana anuvijjakenāti yojanā. **Suttādīsūti** ādisaddena vinayaanuloma paññattaanulomikāni saṅgahetabbāni. Suttaṃ saṃsandanatthāya hotīti yojanā. Kesam saṃsandanatthāyāti āha “āpattānāpattīnaṃ saṃsandanattha”nti. Opammaṃ atthadassanatthāya hotīti yojanā. Eseva nayo sesesupi. **Paccekaṭṭhāyino avisamvādakaṭṭhāyino**ti ettha paccekasmiṃ tiṭṭhanti sīlenāti **paccekaṭṭhāyino**, avisamvādake tiṭṭhanti sīlenāti **avisamvādakaṭṭhāyino**ti dassento āha “issa...pe...ṭhitā”ti. “Issariyādhipaccajeṭṭhakaṭṭhāne”ti iminā paccekasarūpaṃ dasseti. **Teti** saṅghena anumatā puggalā.

Kimatthaṃ “vinayo saṃvaratthāyā”tiādi vuttanti āha “idānī”tiādi. Idāni dassetuṃ āhāti sambandho. Ye mandā mandabuddhino hutvā evaṃ vadeyyunti yojanā. Atha vā mandā mandabuddhino ye puggalā evaṃ vadeyyunti yojanā. Sakalāpi vinayapaññatti upanissayo hotīti sambandho. Iminā “saṃvaratthāyā”tiādīsū “anupādāparinibbānatthāyā”tipariyosānesu terasavākyesu “upanissayo hotī”ti pāṭhaseso ajjhāharitabboti dasseti. “Paccayo”ti iminā “upanissayo”ti padassa upanissayapaccayoti atthaṃ dasseti. **Sabbatthāti** sabbesu dvādasavākyesu. Visesaṃ dassento āha “apicetthā”tiādi. Tattha **apica** visesaṃ vakkhāmīti yojanā. **Etthāti** “avipparatthāyā”tiādīsū. **Tanti** sukhaṃ. Taruṇavipassanā nāma kassa adhivacānanti āha “udayabbayaññassetamadhivacāna”nti. Nanu “virāgo”ti ettha catubbidhassa ariyamaggassa gahitattā “vimuttī”ti etthāpi catubbidhaṃ phalaṃ gahetabbaṃ, kasmā pana “vimuttīti arahattaphala”nti vuttanti āha “catubbidhopi hī”tiādi. **Hīti** saccam, yasmā vā. **Apaccayaparinibbānatthāyāti** asaṅkhataparinibbānatthāya. Natthettha hi parinibbāne koci paccayo, tasmā apaccayaparinibbānanti vuccati. **Tanti** vimuttiñānadassanaṃ. **Tasmīmanuppatteti** tasmīṃ vimuttiñānadassane anukkamena patte. **Avassanti** dhuvaṃ ekantenāti attho. **Etadatthāti** eso anupādā parinibbānasaṅkhāto attho payojanaṃ imissā kathāyāti etadatthā. **Kathāti** atthassa kathā. **Mantanāti** dhammassa mantanā. **Etadatthā upanisāti** ettha upanisāsaddo paccayavācakoti āha “paraṃparapaccayatāpī”ti. Paraṃparapaccayo hi yasmā ettha paraṃparaphalaṃ upagantvā nisīdati, tasmā **upanisāti** vuccati. “Vinayo saṃvaratthāyā”tiādikā ayaṃ paraṃparapaccayatāpīti yojanā. **Sotāvadhānanti** ogāhetvā dhiyate ṭhapiyate **avadhānaṃ**, sotassa avadhānaṃ sotāvadhānaṃ. **Imaṃ kathanti** “vinayo saṃvaratthāyā”tiādiṃ imaṃ kathaṃ. Yaṃ ñānaṃ uppajjati, tampi etadatthanti yojanā. **Yadidaṃ anupādā cittassāti** ettha “yadida”nti nipāto “vimokkho”ti padamapekkhitvā yo ayanti atthaṃ vadati. **Anupādāti** ettha “sayam abhiññā”tiādīsū (mahāva. 11) viya yakāralopo hoti, tassa padassa karaṇaṃ pana “catūhi upādānehi”ti veditabbaṃ. Iti ima matthaṃ dassento āha “yo ayaṃ catūhi upādānehi anupādiyitvā”ti. Ettha catūhi upādānehi anupādiyitvā cittassa arahattaphalasaṅkhāto yo ayaṃ vimokkho atthi, sopi etadatthāya hotīti yojanā. “Arahattaphalasaṅkhāto”ti iminā “vimokkho”ti padassa atthaṃ dasseti. Arahattaphalañhi yasmā viruddhehi, visesena vā sabbakilesehi mucchittha, tasmā **vimokkhoti** vuccati. “Apaccayaparinibbānatthāya evā”ti iminā **etadatthāyāti** padassa atthaṃ dasseti.

367. Vatthum...pe... na jānātīti etthāti yojanā kātabbā. **Tasmāti** yasmā sambandho, tasmā. **Etthāti** imāsu gāthāsu. **Samena cāti** ettha “samenā”ti padaṃ “aññāṇenā”ti atthassa vācakaṃ rūlhipadanti dassento āha “teneva pubbāparaṃ ajānanassa samena aññāṇenā”ti. Pāliyaṃ kena kāraṇena katākataṃ na jānātīti āha “samenā”ti. Samena pubbāparassa aññāṇena katākataṃ na jānātīti attho.

Evantiādi nigamanam. Yam panetaṃ vacanam vuttanti yojanā. “Tatthā”ti ca “ākāraakovido”ti ca ādhārādheyyānamabhedo hoti, tasmā avayavī ādhāro, avayavo ādheyyoti daṭṭhabbam. Ākārasaddo iṅgitatthoti āha “kāraṇākāraṇe”ti. Kāraṇaakāraṇasaṅkhāte iṅgiteti attho. **Ākārasāti** bhummatthe sāmivacanam. Ākārasminti hi attho.

Tathevāti yathā vatthuādāni na jānāti, tatheva. **Itti** evaṃ. **Yvāyanti** yo ayaṃ bhikkhu. “Bhayenā”ti iminā **bhayāti** ettha kāraṇatthe nissakkavacanananti dasseti. Bhayā bhayena gacchatīti yojanā. Eseva nayo **sammohena mohā gacchatīti** etthāpi. **Chandāti** chandena. **Dosāti** dosena. Attanā ñātuṃ asamattatāya na saññattiyā kusaloti āha “paraṃ saññāpetuṃ asamattatāyā”ti. Kasmā nijjhattiyā ca akovidoti āha “kāraṇā...pe... tāyā”ti. “Parisāya laddhattā”ti iminā laddho parisasaṅkhāto pakkho yenāti **laddhapakkhoti** vacanattham dasseti. Sace tādīsako bhikkhu hoti, so bhikkhu “apaṭikkho”ti vuccatīti yojanā. Eseva nayo heṭṭhāpi. “Na paṭikkhitabbo”ti iminā paṭimukham na ikkhitabboti **apaṭikkhoti** vacanattham dasseti. “Na oloketabbo”ti iminā ikkhadhātuyā dassanattham dasseti.

Iti cūlasaṅgāmaṇṇanāya yojanā samattā.

Mahāsaṅgāmaṃ

Voharantena jānitabbādivaṇṇanā

368-74. Mahāsaṅgāme eteneva nayena vedītabbanti sambandho. Vatthusāṅkamanākāram dassetvā avajānanapaṭijānanākāram dassento āha “yo panā”tiādi. Yo pana vadatīti sambandho. **Esevāti** eso eva, avajānanapaṭijānanabhikkhūti attho.

375. **Nīlādivaṇṇāvāṇṇavasenāti** nīlādivaṇṇavasena ca ārogyatthādivaṇṇavasena ca. Sañcarittam yasmā anena sikkhāpadena dhanam anupadīyati, tasmā **dhanamanuppādānanti** vuccati. **Pubbapayogoti** pubbe payujjitabbo.

Agatiagantabbavaṇṇanā

379. **Bahujanaahitāya paṭipanno hotīti** pāliṃ vitthārento āha “vinayadharena hī”tiādi. Tattha **vinayadharenāti** anuvijjakena, vinicchiteti sambandho. **Ovādūpajiviniyoti** bhikkhūnam ovādam upanissāya jīviniyo. **Upāsakāpīti** ratanattayam paṭissaraṇanti upāsakāpi. **Dāyakāpīti** bhikkhūnam paccayadāyakāpi. **Tesanti** upāsakādīnam. **Tathevāti** yathā upāsakādayo dvidhā bhijjanti, tatheva. **Tatoti** ārakkhadevatāhi paranti sambandho. **Tenāti** dvidhākāraṇena.

382. **Gahananissitoti** ettha gahanasaddo diṭṭhipariyāyoti āha “micchādiṭṭhiantaggāhikadiṭṭhisāṅkhātam gahana”nti.

393. **Tassa avajānantoti** ettha “tassā”ti padaṃ “vacana”nti pāṭhasesena sambandhitabbanti āha “tassa vacana”nti. **Tassāti** navakassa. **Tanti** navakam.

394. “**Yamatthāyā**”ti eso saddo samāsoti āha “yadatthāyā”ti. “**Tam attha**”nti eso saddo liṅgavipallāsoti āha “so attho”ti. **Atthasaddo** hi pulliṅgo, pāliyam **na parihāpetabbanti** etthāpi liṅgavipallāso vedītabbo. **Sabbatthāti** sabbasmiṃ mahāsaṅgāme.

Iti mahāsaṅgāmaṇṇanāya yojanā samattā.

Kathinabhedam

Kathinaatthatādivaṇṇanā

403. Kathine khandhaketi kathinakkhandhake. **Pubbeti** kathinakkhandhake.

404. Payogassāti ettha payogo nāma koti āha “cīvaradhovanādino”tiādi. Ettha ādisaddena vicāraṇachedanabaddhanasibbanarajanakappabinduādiyanāni cha pubbakaraṇāni saṅgaṇhāti. Udaḅharaṇādiko yo payogo karīyatīti yojanā. **Anantaro** nāma atītānantaraanāgatānantaravasena duvidho, idha anāgatānantaroyeva adhippetoti āha “anāgatavasena”ti. Udaḅharaṇādipayoge hi uppanne pacchā dhovanādipubbakaraṇassa uppattito tappayogassa anāgatavaseneva paccayo. **Samanantarapaccayenāti** ettha **samsaddo** suṭṭhuatthoti āha “suṭṭhu anantarapaccayenā”ti. “Āsannatara”nti iminā suṭṭhubhāvaṃ dasseti. “Payogassā”ti padaṃ “ādhārabhāva”nti pade sāmī, “paccayā hontī”ti pade sampadānaṃ. “Nissaya”nti padaṃ “ādhārabhāva”nti padena saṃvaṇṇeti. “Upetenā”ti iminā **upasaddassa** upagamanatthaṃ dasseti, balavatthaṃ paṭikkhipati. **Paṭhamanti** payogato, payogassa vā tāva. Iminā **purejātapaccayenāti** ettha puresaddo paṭhamatthoti dasseti. **Pacchāti** payogato, payogassa vā paraṃ. **Apubbaṃ acarimanti** ekapahārena. Iminā saḅjātasaddassa atthaṃ dasseti.

Evam pucchitvāti sambandho. **Yanti** dhammajātaṃ. Idāni āhāti sambandho. **Yassāti** payogādikassa. **Tadevāti** dhammajātameva. **Tassāti** “pubbakaraṇaṃ payogassā”tiādivacanassa attho evam veditabboti yojanā. “Payogassa katame dhammā”tiādi yaṃ vacanaṃ vuttaṃ, tattha vissajjanaṃ mayā vuccateti yojanā. Iminā pāḷiyaṃ ajjhāharitvā yojetabbabhāvaṃ dasseti. Catūhi paccayehi paccayākāraṃ vitthārento āha “payogassa hī”tiādi. Payogassa pubbakaraṇaṃ paccayo hotīti sambandho. **Uddiṭṭhadhammesūti** “anantarapaccayena paccayo”tiādinā uddiṭṭhesu dhammesu purejātapaccayo panesāti sambandho. Atha vā **uddiṭṭhadhammesūti** pubbakaraṇavasena uddiṭṭhesu dhovanādiddhammesu ekadhammampīti sambandho. **Na labhatīti** udaḅharaṇādipayogassa pubbe na labhati. **Ayanti** udaḅharaṇādipayogo. **Pacchājātapaccayaṃ pana labhatīti** udaḅharaṇādipayogo pacchājātapaccayaṃ labhati. Kasmā labhatīti āha “pacchā uppajjanakassa hī”tiādi. **Pacchāti** payogassa, payogato vā paraṃ. Hi yasmā kayirati, tasmā labhatīti yojanā. Saḅjātapaccayaṃ pana na labhatīti sambandho. **Mātikāpalibodhānisamsasaṅkhāteti** aṭṭhamātikādvēpalibodhapañcānisamsasaṅkhāte. **Aññoti** pannarasahi dhammehi añño. **Payogādīsūti**tiādisaddena pubbakaraṇapaccuddhāradhiṭṭhānāni saṅgaṇhāti. **Etenupāyenāti** etena yathāvuttaupāyena.

Pubbakaraṇanidānādivibhāgavaṇṇanā

406-7. Dvikkhattuṃ pucchitattā “pucchādvaya”nti vuttaṃ. Hetupaccayānaṃ sarūpaṃ dassento āha “cha cīvarānī”ti. Kasmā veditabbānīti āha “pubbapayogādīnañhī”tiādi. **Hīti** yasmā. **Tāniyevāti** cha cīvarāni eva. Evasaddo pacchāpi yojetabbo, tāni evāti attho. **Hīti** saccaṃ, pubbakaraṇādīni na atthīti yojanā.

408. “Imāya saṅghāṭiyā”tiādinā vacībhedākāraṃ dasseti. Kathinatthārakena yasmā paccuddhāro ca adhiṭṭhānañca karīyati, tasmā **kiriyaṭi** vuccati. Tena vuttaṃ “paccuddhāro ceva adhiṭṭhānañcā”ti.

411. Vatthuvipannādīnaṃ sarūpaṃ dassento āha “akappiyadussaṃ hotī”tiādi. Vināsaṃ, vikāraṃ vā pajjatīti **vipannaṃ**, vatthumeva vipannaṃ **vatthuvipannaṃ**.

Kathinādijānitabbavibhāgavaṇṇanā

412. Tesaññeva dhammānanti ettha dhammānaṃ sarūpaṃ dassento āha “yesu rūpādidhammesū”ti. Tattha **rūpādidhammesūti** vaṇṇagandhādīsū suddhaṭṭhakarūpakalāpadhammesu. **Satīti** santesu. **Tesanti** rūpādīnaṃ dhammānaṃ. “Samodhāna”nti iminā **saṅghoti** padassa atthaṃ dasseti. “Missībhāvo”ti iminā **samavāyoti** padassa atthaṃ dasseti. Avayavadhammānaṃ saṃ

ekabhāvassa gahaṇaṃ **saṅgaho**. Avayavadhammānaṃ samaṃ ayaṇaṃ pavattanaṃ **samavāyo**. **Bahūsu dhammesūti** bahūsu paramatthapaññattidhammesu. **Nāmamattanti** nāmapaññattimattaṃ. **Pubbeti** kathinakkhandhake.

“Kāraṇehī”ti iminā **ākārasaddo** kāraṇatthoti dasseti. **Yanti** vacanaṃ.

416. Uppajjantīti kathinuddhārā uppajjanti. **Kinti** kiṃ atthajātaṃ. Sabbepi kathinuddhārāti sambandho. **Hīti** saccaṃ, yasmā vā. **Etthāti** kathinuddhāresu. **Purimā dveti** antarubbhārasahubbhāravasena purimā dve. **Etesañcāti** purimānaṃ dvinnāca. **Itareti** avasesā kathinuddhārā. **Tesupīti** itaresu kathinuddhāresu. **Sabbatthāti** sabbasmiṃ kathinavinicchaye.

Iti samantapāsādikāya vinayasaṃvaṇṇanāya

Paññattivaggaṇṇanāya

Yojanā samattā.

Upālīpañcakaṃ

Anissitavaggaṇṇanā

417. Upālīpañhesu “kati hi nu kho bhante”ti pucchāya sambandho natthīti kassaci maññaṇaṃ nivārento āha “āya sambandho”ti. **Theroti** upālītthero, pucchīti sambandho. **Imesanti** pañcakānaṃ tantinti sambandho. Kesam atthāya tantim ṭhapessāmīti āha “nissāya vasanakārīnaṃ atthāyā”ti. Vasanakārīnaṃ bhikkhūnanti sambandho. **Tesanti** pañhānaṃ.

Āpanno kammakatoti ettha “āpanno”ti padaṃ “kammakato”ti padassa kāraṇadassananti āha “āpattim āpanno, tappaccayāva saṅghena kammaṃ kataṃ hotī”ti. **Tappaccayāvāti** taṃpattīpannasankhātā kāraṇā eva.

Nappaṭippassambhanavaggaṇṇanā

420. Ayanti kammakato bhikkhu, na vattatīti sambandho. **Anulomavatteti** katakammaṃ anulome vatte. **Assāti** bhikkhussa. **Sarajjukoti** saha kammaṃ sankhātāya rajjuyāti sarajjuko.

421. Samaggehi bhikkhūhīti sambandho. **Hīti** saccaṃ. **Accayaṃ desāpetvāti** aññaṃaññaṃ dosam desāpetvā. **Tiṇavattārakasamathaṃ vāti** vāsaddo atthantaravikappo. **Tatra ceti** ettha tasaddo kammavisayo, **cesaddo** sacepariyāyoti āha “sace tādise kamme”ti. **Diṭṭhāvīkammampi katvāti** diṭṭhāvīkammaṃ katvāpīti yojanā. **Pisaddena** akatvāpīti sampiṇḍeti. **Yatra panāti** kamme pana. **Tatthāti** kamme. **Pakkamītabbanti** saṅgāmāvacarena pakkamītabbaṃ.

422. **Ussitamantīti** ettha ussitaṃ mantī ussitamantīti dassento āha “lobha...pe... bhāsītā”ti. Tattha “lobhadosa mohamānussannaṃ vāca”nti iminā ussitapadassa atthaṃ dasseti. “Bhāsītā”ti iminā “mantī”ti padassa atthaṃ dasseti. **Nissitajappīti** ettha aññaṃnissitaṃ jappametassāti nissitajappīti dassento āha “attano”tiādi. Ettha **jappanti** vacanaṃ. Jappa vacaneti hi dhātupāṭhesu vuttaṃ. **Ussadayuttanti** lobhādiussadayuttaṃ, vacananti sambandho. **Evamaññanti** evaṃ attanā aññaṃ. **Kathānusandhivacaneti** codakacuditakānaṃ kathāya anusandhivacane. Ettha “vacane”ti iminā “bhāsānusandhī”ti ettha bhāsāsaddo vacanapariyāyoti dasseti.

Ussāretīti uddhaṃ gamāpeti. Iminā ussādeti upari gamāpetīti **ussādetāti** vacanatthaṃ dasseti. Ettha

hi dakārarakārā sadisatthā. Te hi dve akkharā kadāci katthaci sadisatthā honti. **Avasāretīti** hīnabhāvaṃ gamāpeti. Iminā avasādeti adbhāvaṃ gamāpetīti **avasādetāti** vacanattamaṃ dasseti. “Apasādetā”tipi pāṭho, upasaggamattameva nānaṃ. **Samphañca bahum bhāsātīti** ettha samphasaddo niratthakakathāvacanoti āha “niratthakakatha”nti. Niratthakakathā hi yasmā saṃ hitasukhaṃ phalati vināseti, tasmā samphanti vuccati. Phā dhātūti ca phaladhātūti ca dhātupāṭhesu (saddanītidhātumālāyaṃ 16 lakārantadhātu) vuttam.

Bhāre anāropitēti “tava bhāro”ti saṅghena bhāre anāropite. **Ajjhottharivāti** abhibhavivā. Iminā **pasayha pavattāti** ettha pasayhasaddassa abhibhavanattamaṃ dasseti. **Anadhikāretīti** anadhipaccaṭṭhāne. “Kathetā”ti iminā vatudhātuyā kathanattamaṃ dasseti. **Anokāsakammaṃ kāretvāti** ettha nakārassa ayuttayogabhāvato yuttaṭṭhānaṃ dassento āha “okāsakammaṃ akāretvā”ti. **Yassāti** yā assa. Assa bhikkhuno attano yā diṭṭhi atthīti yojanā, athavā attano yā diṭṭhi bhavēyyāti yojanā. **Tanti diṭṭhiṃ.** “Kathetā”ti iminā **byākatāti** ettha vi ā pubbakaradhātuyā kathanattamaṃ dasseti.

Vohāravaggavaṇṇanā

424. “Neva desanāya na vuṭṭhānenā”ti idaṃ pārājīkappattim sandhāya vuttam. **Dosānurūpanti** vatthusāṅkhātassa dosassa anurūpam.

Payogaṃ na jānātīti ettha sace payogo mūlena visadiso hutvā bhinnō hoti, evaṃ sati mūlapayoganti na vattabbanti āha “adhikaraṇānaṃ hī”tiādi. **Hīti** saccam, yasmā vā. Mūlameva payogā nāma honti, na aññanti adhippāyo.

Kātabbanti na jānātīti kātabbam itī kammaṃ karaṇam na jānātīti yojanā. **Vatthūti** bhaṇḍanakalahādivatthu, niyassādīnaṃ vatthūti sambandho. **Catunnanti** tajjanīyanīyassapabbājanīyapaṭisāraṇīyavasena catunnam. **Yācatīti** saṅgham kammaṃ vūpasamaṃ yācati.

Vatthuntī ettha āpattikkhandhānameva vatthuntī āha “sattannaṃ āpattikkhandhāna”nti. Padesapaññattisabbatthapaññattisādhāraṇapaññattiasādhāraṇapaññattiekatopaññattiubhatopaññattivasena channaṃ paññattīnaṃ paññattīyaṃ pavīṭṭhattā vuttam “tividham paññatti”nti. “Heṭṭhupariyaṃ katvā padaṃ yojetī”ti iminā **padapaccābhaṭṭhanti** ettha padānaṃ heṭṭhupariyavasena paṭinivattivā ābhassanaṃ gaḷanaṃ cutam padapaccābhaṭṭhanti attamaṃ dasseti.

Vinayeti ettha na kevalam pāḷiyaṃyeva, atha kho aṭṭhakathāyampīti āha “vinayapāḷiyañceva aṭṭhakathāyañcā”ti.

Ñattim na jānātīti ettha ñattibhedam dassento āha “saṅkhepato”tiādi. **Tatthāti** duvidhāsu ñattīsu. **Kammañattīti** anussāvanakammaṃ ṭhāne ṭhitā ñatti. Anussāvanakammaṃ natthi, sayameva anussāvanakammaṭṭhāne ṭhitāti attho. **Kammapādañattīti** anussāvanakammaṃ pādabhūtā mūlabhūtā ñatti. **Navasu ṭhānesūti** osāraṇādīsū navasu ṭhānesū. **Dvīsū ṭhānesūti** ñattidutiyañatticatutthavasena dvīsū ṭhānesu, kammapādañattīyā karaṇam na jānātīti sambandho. Yvāyaṃ catubbidho samathoti yojanā. **Tanti** catubbidham samatham. **Ñattiyāti** sāmyatthe sāmivacanaṃ. Yaṃ adhikaraṇam vūpasamatīti sambandho. **Tassāti** adhikaraṇassa. Tam vūpasamaṃ na jānātīti sambandho.

Suttam na jānātīti ettha suttasaddassa kadāci katthaci mātikāyañca suttantapiṭake ca pavattanato idha ubhatovibhaṅgeti āha “ubhatovibhaṅga”nti. **Vinayam na jānātīti** ettha vinayasaddassa sakale vinayapiṭake vattamānassāpi suttanti ettha ubhatovibhaṅgassa gahitattā idha khandhakaparivārāva gahetabbāti āha “khandhakaparivāram na jānātī”ti.

Vinayaṃ na jānātīti ettha vinayapiṭakassa gahetabbattā vuttaṃ “ṭhapetvā vinayapiṭaka”nti. **Suttantike cattāro mahāpadese**ti (dī. ni. 2.187 ādayo; a. ni. 4.180) buddhāpadesasaṅghāpadesasambahulattherāpadesaekattherā padesavasena cattāro mahāpadese. **Etthā**ti pañcake. **Yanti** vacanaṃ. **Sabbatthā**ti sabbesu pañcakesu.

Iti

Anissitavagga-nappaṭippassambhanavagga-vohāravaggavaṇṇanāya

Yojanā samattā.

Diṭṭhāvikkammavaggavaṇṇanā

425. Diṭṭhāvikkammavagge **diṭṭhāvikkammā**ti ettha āvi karīyate **āvikkammaṃ**, diṭṭhīnaṃ āvikammaṃ **diṭṭhāvikkammanti** dassento āha “diṭṭhīnaṃ āvikammānī”ti. “Laddhipakāsanāna”nti iminā **diṭṭhi**saddo laddhipariyāyo, **āvikkamma**saddo pakāsanapariyāyoti dasseti. **Etanti** “diṭṭhāvikkammā”ti nāmaṃ. Adesaṅgāminī nāma atthato garukanti āha “garukāpattiyā”ti. **Lahukāyapī**ti pisaddo garahattho. Lahukāyapī desitāya diṭṭhāvikkammaṃ adhammikaṃ hoti, pageva garukāyāti attho.

Yathā ...pe... hotīti yathā āvikate catūhi pañcahi ekībhūtehi āvikatā hotīti yojanā. **Catūhi pañcahī**ti antimaparicchedadassanaṃ. Tato atirekehipi ekato desetum na vaṭṭati, desitā ca āpatti na vuṭṭhāti, desanāpaccayā dukkaṭaṅga hoti. “Catūhi pañcahī”ti antimaparicchedassa dassitattā dvīhi tīhi pana ekato desetum vaṭṭatīti daṭṭhabbaṃ. **Manomānasenā**ti ettha manosaddena mānasasaddassa rāgaarahattesupi pavattanato tadatthe paṭikkhipitvā citte eva vattatīti dasseti. Tena vuttaṃ “manasaṅkhātena mānasenā”ti. Iminā manabhūtaṃ mānaṃ **manomānasanti** vacanattamaṃ dasseti.

Samānasamvāsakassāpīti pisaddo samānasamvāsakassapi nānāsīmāya ṭhitassa santike āvikammaṃ adhammikaṃ hoti, pageva nānāsamvāsakassāti dasseti. **Mālakasīmāyāti** khaṇḍasīmāya aṅgaṇe. **Avippavāsasīmāyāti** mahāsīmāya, ṭhitassāpi santiketī sambandho. Pisaddena “khaṇḍasīmāya ṭhitassapī”ti atthamaṃ sampiṇḍeti.

430. Na **pariyattanti** na samatthamaṃ. Iminā **nālanti** ettha alaṃsaddo pariyattatthova, nārahabhūsanavāraṇatthoti dasseti. **Idhāpī**ti pañcakepi. Pisaddena purimapañcamaṃ apekkhati. “Sāsanato”ti iminā cudhātuyā apādānaṃ dasseti. “Kāmo”ti iminā adhippāyasaddo kāmapariyāyoti dasseti.

432. **Mandattā momūhattāti** ettha ttipaccayassa bhāvatthe, pañcamīvibhattiyā ca kāraṇatthe pavattabhāvaṃ dassento āha “mandabhāvena momūhabhāvenā”ti. **Paribhavāti** ettha paribhavakāmāti atthamaṃ dassento āha “paribhavaṃ āropetukāmo hutvā”ti. **Aññabyākaraṇesupī**ti arahattabyākaraṇesupi. **Sabbatthā**ti diṭṭhāvikkammavagge. **Yanti** vacanaṃ.

Iti diṭṭhāvikkammavaggavaṇṇanāya yojanā samattā.

Musāvādavaggavaṇṇanā

444. Dhammapadhānaṃ dhammādhiṭṭhānaṃ sandhāya “pārājikaṃ gacchatīti pārājikagāmī”ti suddhakattavasena vuttaṃ, puggalapadhānaṃ puggalādhiṭṭhānaṃ sandhāya “pārājikaṃ gacchati anena, gamāpetīti vā pārājikagāmī”ti karaṇahetukattavasenapi vattabbaṃ. Vitthāraṃ dassanto āha “tatthā”tiādi. Tattha **tatthāti** “musāvādo pārājikagāmī”tiādi pāṭhe, evaṃ vitthāro veditabboti

sambandho. Tesu “musāvādo pārājikagāmī”tiādīsu vā, niddhāraṇe bhummaṃ.

Adassanenāti ettha kassa adassanenāti āha “vinayadharassā”ti. Vitthāraṃ dassento āha “kappiyākappiyesu hī”tiādi. **Tanti** vinayadharam. **Assavanenāti** ettha kesam vacanam assavanenāti āha “ekavihārepī”tiādi. **Ekavihārepīti** vinayadharena ekavihārepi. Pisaddena nānāvihāre pana pagevāti dasseti. **Upatthānanti** upatthānattham, upatthānatthānam vā. Vuccamānam aññesam vacanam asuṇanto hutvā vāti yojanā. **Pasuttakatāti** ettha yakāralopoti āha “pasuttakatāyā”ti. **Pasuttakabhāvenapīti** pisaddo aññampi adassanādikāraṇam sampiṇḍeti. **Tathāsaññīti** ettha tathāsaddo kovisayoti āha “akappiye...pe... āpajjanto”ti. **Ekarattātikkamādivasenāti** ādisaddena chārattātikkamādiṃ saṅgaṇhāti. **Sabbatthāti** musāvādavagge.

Iti musāvādavaggavaṇṇanāya yojanā samattā.

Bhikkhunovādavaggavaṇṇanā

450. Bhikkhunivagge **alābhāyāti** ettha labhadhātuyā kammaṃ, sampadānavacanassa ca tadattham dassento āha “catunnam paccayānam alābhatthāyā”ti. “Vāyamatī”ti iminā **parisakkatīti** ettha sakkadhātuyā samatthattam paṭikkhipivā vāyamattham dasseti. **Kalisāsananti** pāpaparājayaṇam. **Nīharaṇatthāyāti** niddharitvā apanayanatthāya.

451. “Kamma”nti sāmāññato vuttattā “sattannaṃ kammānaṃ aññatara”nti.

454. **Na sākacchātabboti** ettha ko nāma kathāmaggo na sākacchātabbo, nanu vinayoyevāti āha “kappiyā...pe... kathāmaggo”ti. “Na kathetabbo”ti iminā kacchāsaddassa kathadhātuyā nipphannabhāvaṃ dīpeti. Kasmā pana paṭhamapañcake “na asekkhenā”ti paṭikkhipivā dutiyapañcake “asekkhenā”tiādi vuttanti āha “yasmā panā”tiādi. Itaro puthujjano na kathetīti yojanā.

Na atthapaṭisambhidāpattoti ettha attho nāma aṭṭhakathāyevādhippetāti āha “aṭṭhakathāyā”ti. “Pabhedagataññappatto”ti iminā atthādīsu pati visuṃ sambhijjati **paṭisambhidā**, paññā, tam pattoti **paṭisambhidāpatto**. Atthe paṭisambhidāpatto atthapaṭisambhidāpattoti dasseti. “Pāḷidhamme”ti iminā **dhammapaṭisambhidāpattoti** ettha dhammasarūpaṃ dasseti. **Vohāraniruttiyanti** paññatiniruttiyaṃ. Iminā **niruttipaṭisambhidāpattoti** ettha niruttisarūpaṃ dasseti. **Paṭibhānapaṭisambhidāpattoti** ettha paṭibhānaṃ nāma heṭṭhimaññattayamevāti āha “atthapaṭisambhidādīni ñāṇāni”ti, **tesūti** ñāṇesu, yaṃ yaṃ vimuttaṃ **yathāvimuttaṃ**, cittaṃ. **Paccavekkhitāti** punappunaṃ olokita. **Sabbatthāti** bhikkhunivagge.

Iti bhikkhunovādavaggavaṇṇanāya yojanā samattā.

Ubbāhikavaggavaṇṇanā

455. Ubbāhikavagge **atthakusaloti**ādīpadānaṃ bhedanissitasamāsaṃ dassento āha “aṭṭhakathākusaloti”tiādi. **Ācariyamukhatoti** ācariyavadanato, ācariyasammukhe vā, **sithiladhanitādīti** ādisaddena dīgharassādīni (pari. aṭṭha. 485; vi. saṅga. aṭṭha. 252) saṅgaṇhāti. **Akkharaparicchedeti** ettako sithilo, ettako dhanitotiādīnā akkharaparicchede. Iminā **byañjanakusaloti** ettha byañjanasaddo akkharapariyāyoti dasseti. **Na pubbāparakusaloti** ettha pubbāparo nāma purimānaṃ catunnañceva kathāya ca pubbāparoti āha “atthapubbāpare”tiādi.

Kodhanotiādīni vuttānīti sambandho. Yasmā na sakkotīti yojanā. **Pasāretāti** ettha saradhātu upasaggavasena vecittavācakoti āha “mohetā”ti.

Iti ubbāhikavaggaṇṇanāya yojanā samattā.

Adhikaraṇavūpasamavaggaṇṇanā

457. Adhikaraṇavūpasamavagge saṅghagaru nāma koti āha “dhammañca...pe... saṅghagaru nāma hoti”ti. **Tānīti** cīvarādīni.

458. Pañcahupāli ākārehīti ettha ākārasaddo kāraṇatthoti āha “pañcahi kāraṇehī”ti. **Kammenāti**ādīsu kammādīnaṃ sarūpaṃ dassento āha “apalokaṇādīsū”tiādi. **Upapattīhīti** yuttīhi. Mayhaṃ uccākulā pabbajitabhāvañca bahussutabhāvañca tumhe jānāthāti yojanā. Mādiso nāma...pe... tumhākaṃ yuttaṃ nanūti yojanā. **Kaṇṇamūleti** kaṇṇasamīpe. **Anussāvanenāti** anusamīpe sāvāpanena. **Tesanti** bhikkhūnaṃ. **Anivattidhammeti** anivattanasabhāve. **Salākaggāhenāti** attano salākāya gāhāpanena.

Etthāti kammādīsū. **Pamāṇanti** saṅghabhedassa kāraṇaṃ. **Pubbabhāgāti** saṅghabhedato pubbhāge pavattā. Pubbhāgabhāvaṃ āvikaronto āha “aṭṭhārasavattudīpanavasena hī”tiādi. Voharantepīti yojanā. **Tatthāti** vohāre. Kadā pana saṅgho bhinnoti āha “yadā panā”tiādi. Yadā pana karotīti sambandho. **Kammanti** uposathakammato aññaṃ kammaṃ gahetabbaṃ. **Uddesanti** uposathakammaṃ. **Itīti** evaṃ. Saṅghabhedakakkhandhakavaṇṇanāyaṃ “evaṃ...pe... pakāsayissāmā”ti (cūlava. aṭṭha. 351) yaṃ vacanaṃ avocumhāti yojanā. Tassa vacanassāti pāṭhaṃ ajjhāharitvā “svāyaṃ attho”ti padena sambandhitabbo.

Paññattanti ettha niggahitalopasandhīti āha “paññattaṃ eta”nti. **Kvāti** kismiṃ khandhake. **Tatrāti** vattakkhandhake. **Ettāvatāti** ettakena āgantukavattādiakaraṇamattena. **Anupubbenāti** anukkamena. **Yathārattanti** ettha yathāsaddo anurūpatthavācako, rattisaddena rattippamāṇaṃ gahetabbanti dassento āha “rattiparimāṇānurūpa”nti. Iminā rattiyā anurūpaṃ **yathārattanti** nibbacaṇaṃ dasseti. “Rattiparimāṇānurūpa”nti vutte rattiparimāṇassa atikkantattā atthato theroti āha “yathātheranti attho”ti. **Vavatthānanti** paricchedo. So hi viṣuṃ avahito hutvā tiṭṭhatīti vavatthānanti vuccati. **Kammākammānīti** ettha kammaṃ akammānīti padavibhāgaṃ katvā akāro vuddhatthoti āha “khuddakāni ceva mahantāni ca kammānī”ti. Sati ca akammaṃ mahantabhāve kammaṃ nāma khuddakanti atthato siddhaṃ hoti. Tena vuttaṃ “khuddakāni cevā”ti. Akārassa appatthaṃ gahetvā “mahantāni ceva khuddakāni ca kammānī”ti atthopi yujjateva. So pana idha na gahito, aññattha pana dissati. “Uccāvācāni kammānī”ti hi vākyavasena vuttaṭṭhāne uccasaddena mahantatthaṃ dasseti, avacasaddena khuddakatthaṃ dasseti. Tasmā mahantakhuddakāni kammānīti attho vedītabbo. Sati ca akammaṃ khuddakabhāve kammaṃ nāma mahantanti atthatopi siddhanti daṭṭhabbaṃ.

Saṅghabhedavaggaḍvayaṇṇanā

459. Saṅghabhedavaggaḍvaye **eteti** sabhāvā. **Teti** adhammādayo. **Itīti** evaṃ. Yaṃ kammanti yojanā. Diṭṭhiṃ vinidhāyāti sambandho. Ekasmiṃ pañcake ayaṃ atthayojanā kātabbāti sambandho. **Etthāpīti** imasmiṃ pañcakepi. **Pisaddena** heṭṭhā vuttaṃ pañcakaṃ apekkhati. **Sabbatthāti** sabbesu pañcakesu. **Hīti** saccaṃ. Pubbe avuttanayaṃ yaṃ vacanamatthi, taṃ vacanaṃ ettha pañcakesu na atthīti yojanā.

Āvāsikavaggaṇṇanā

461. Āvāsikavagge “haritvā”ti iminā **yathābhatanti** ettha bharadhātuyā haraṇatthañca kiriyāvisesanabhāvañca dasseti. “Ṭhapito”ti iminā **nikkhittoti** ettha khipadhātuyā ṭhapanatthaṃ dasseti.

462. Pariṇāmetīti pariṇatampāpeti. “Niyāmeti kathetī”ti iminā adhippāyatthaṃ dasseti, **etthāti** āvāsikavagge.

Kathinatthāravaggavaṇṇanā

467. Kathinatthāravagge **otamasikoti** ettha avatamaṃ gato otamasikoti dassento āha “andhakāragato”ti. Andhakārasaddena tamasaddo andhakārapariyāyoti dasseti. **Tanti** otamasikaṃ. **Asamannāharantoti** taṃ asamannāharanto, kasmā asamannāharantoti āha “kiccayapasutattā vandana”nti. **Ekatoti** kopena saddhiṃ. Verī visabhāgapuggalo ekato ākodhena vattanaṭṭhena **ekāvattoti** vuccati. **Pahareyyāti** vandantaṃ pahareyya. “Aññaṃ cintayamāno”ti iminā aññasmiṃ ārammaṇe cittaṃ vidahati ṭhapetīti **aññavihitoti** dasseti.

Saṅghato uddharitvā khipitabbo apanetabboti ukkhitto, soyeva **ukkhittako**. **Tehīti** catūhi. Avandiyesu pannarasapuggalesūti sambandho. **Antarā vuttakāraṇena cāti** antare vuttena “tañhi vandantassa mañcapādādīsupi nalāṭaṃ paṭihaññeyyā”tiādinā kāraṇena ca. **Itoti** pannarasapuggalamhā. **Itīti** evaṃ. Sace uddesācariyo ca ovādācariyo ca navako hoti, na vandanīyo. **Sabbatthāti** kathinatthāravagge.

Iti kathinatthāravaggavaṇṇanāya yojanā samattā.

Niṭṭhitā ca upālīpañcakavaṇṇanāya yojanā.

Āpattisamuṭṭhānavaṇṇanā

470. “Acittako āpajjati”tiādisu evamattho veditabboti yojanā. **Acittako āpajjati**ti acittako hutvā āpajjati. Eseva nayo **acittako vuṭṭhāti**ti ethhāpi. Yamkiñci āpattinti sambandho. Itaraṃ āpattinti yojanā. **Dhammadānaṃ karomīti** “sabbadānaṃ dhammadānaṃ jināti”ti (dha. pa. 354) ca “amataṃdado ca so hoti, yo dhammamanusāsati”ti (saṃ. ni. 1.42) ca bhagavatā vuttavacanaṃ sutvā dhammadānaṃ karomi. **Domanassikoti** domanassena yutto, domanassavanto vā. **Etthāti** abyākatamūle.

473. **Yassa yassāti** sikkhāpadassa. **Taṃ sabbanti** sabbaṃ taṃtaṃsamuṭṭhānasikkhāpadaṃ.

Aparadutiyagāthāsaṅgaṇikam

(1) Kāyikādiāpattivaṇṇanā

474. **Cha āpattiyo kāyikāti** ettha cha āpattiyo nāma kāti āha “antarapeyyāle”tiādi. Antarapeyyāle vuttāti sambandho. “Kāyadvāre samuṭṭhitattā”ti iminā kāye samuṭṭhantīti **kāyikāti** vacanattaṃ dasseti. Tasmimyeva antarapeyyāle vuttāti sambandho. “Vajjapaṭicchādīkāyā”tiādinā **chādentassa tissoti** ettha tiṇṇaṃ sarūpaṃ dasseti. “Bhikkhuniyā”tiādinā **pañca saṃsaggapaccayāti** ettha pañcannaṃ sarūpaṃ dasseti.

“Ekaratta”tiādinā **aruṇugge tissoti** ettha tiṇṇaṃ sarūpaṃ dasseti. **Dve yāvatatiyakāti** saṃvaṇṇetabbena “ekādasa yāvatatiyakā nāmā”ti saṃvaṇṇanāya viruddhabhāvaṃ paṭikkhipanto āha “paññattivāsena paṇā”tiādi. “Imasmim sāsane”ti iminā etthasaddassa visayaṃ dasseti. **Ekena sabbasaṅgahoti** ettha eko nāma ko, sabbāni nāma kānīti āha “yassa siyā”tiādi. “Nidānuddesenā”ti iminā ekassa sarūpaṃ dasseti. “Sikkhāpadānañca pātimokkhuddesānañcā”ti imehi padehi sabbasarūpaṃ dasseti. Saṅgha saddena kammachāṭṭhīsamāso.

“Vajjapaṭicchādīkāyā”tiādinā **dve duṭṭhullacchādanāti** ettha dvinnaṃ sarūpaṃ dasseti.

“Bhikkhu bhikkhuniyā”tiādinā **gāmantare catassoti** ettha catassannaṃ sarūpaṃ dasseti. Puna “bhikkhu bhikkhuniyā”tiādinā **cetassā nadipārapaccayāti** ettha catassannameva sarūpaṃ dasseti.

“Cīvaradāne pācittiya”nti iminā pācittiyabhāvena sadisattā saṅkhyāviseso na kātabboti dasseti.

(2) Desanāgāminiyādivaṇṇanā

475. **Eketthā**ti etthasaddo sāsanavisayo.

Ekasikkhāpadampi natthīti pisaddo bhusikkhāpadāni pana pagevāti ca āpatti pana pagevāti ca āpattīpi natthīti ca atthaṃ dasseti.

“Sakalepi vinaye”ti iminā **dvetthā**ti pāṭhe etthasaddassa visayaṃ dasseti. **Ubhinnanti** bhikkhubhikkhunīnaṃ. Aññathā pana kittakā paṭhamāpattikāti āha “itarathā panā”tiādi. Tattha **itarathā**ti paññattito aññena pakārena. **Kammañcā**ti kammañatti ca. **Kammapādikā cāti** kammapādañatti ca. **Navasu ṭhānesūti** osāraṇādīsu navasu ṭhānesu. **Dvīsūti** ñattidutiya, ñatticatutthakammesu.

Vajjapaṭicchādikāya pārājikaṃ, ukkhittānuvattikāya pārājikaṃ, aṭṭhavatthukāya pārājikanti iti ime tayoti yojanā. **Kāraṇabhūtenā**ti hetubhūtena, “kāraṇabhūtenā”tipi pāṭho, sādakatamasattibhūtenāti attho.

Tesanti addhānahīnādīnaṃ. **Etthā**ti “tayo puggalā na upasampādetabbā”ti pāṭhe, etesu aṅgahīnādīsu vā. **Yoti** puggalo. Aparipūro na yācatīti sambandho. Mātughātakādayo karaṇadukkaṭakā cāti yojanā. **Tatthā**ti tesu ñattikappanādīsu. **Ñattikappanā**ti ñattividhi. **Vippakatapaccattanti** vippakataṃ paccattaṃ. **Aṭṭakaraṇanti** aṭṭassa karaṇaṃ. Vitthārento āha “vatthusampannaṃ hī”tiādi. **Tayo kammāna saṅgahā**ti ettha chandabhedarakkhanatthāya nakāre niggaḥitalopo. **Nāsita**kāti nāsetabbā puggalā, nāsitabbāti **nāsitā**, nāsitā eva nāsitaḥ. **Tiṇṇaṃ janānanti** tiṇṇaṃ upasampadāpekkhajanānaṃ ekūpajjhāyena nānācariyena hutvāti yojanā. **Ekānussāvanā**ti ekato anussāvanā.

Pādo nāma kahāpaṇassa catutthabhāgo. **Māsako** nāma pādassa pañcamabhāgo. **Pārājikanti** vanappatiṃ chindantassa dutiyapārājikaṃ (pārā. 110). **Anodissāti** “manusso maratū”tiādinā na uddisitvā. **Tenā**ti visena.

Bhikkhunovādakavaggasminti sāmāññādhāro. **Dasasu sikkhāpadesūti** visesādhāro. **Paṭhamasikkhāpadamhiyevāti** dasasu sikkhāpadesu paṭhamasikkhāpadamhiyeva. Upasampannāya bhikkhuniyāti sambandho. “Āpatti hoti”ti iminā “cīvarena”ti padassa sambandhaṭṭhānaṃ dasseti.

“Catasso evā”ti iminā **tattikā**ti ettha tasaddassa visayaṃ dasseti. Tā catasso parimāṇā yāsaṃ āpattīnanti **tattikā**. **Nipannassāpi tattikā**ti etthāpi eseva nayo. **Sāti** bhikkhunī.

(3) Pācittiyavaṇṇanā

476. **Pañca bhesajjānī**ti sabbiādīni pañca bhesajjāni. Imaṃ āpattinti sambandho. Pacchā āpannoti yojanā.

Ekam kabaḷanti ekam ālopaṃ, **tumhamūleti** tumhaṃ santike.

Yathāvatthukanti vatthuanulomaṃ, āpattiyo desitāva hontīti yojanā.

Kokālikādīnantiādisaddena kaṭamodakatissakādayo (pārā. 417) saṅgaṇhāti. Pāpikāya diṭṭhiyā appaṭinissagge pācittiyañca caṇḍakāḷikāya bhikkhuniyā pācittiyañcāti yojanā. **Payuttavācāpaccayāti**

viññattinimittādīhi pakārena yuttāya vācāya paccayā. **Āpatti pārājikassāti** pārājikassa āpajjanam. Athavā **pārājikassāti** assa bhikkhussa pārājikā āpatti hotīti vā pārājikā āpatti assa bhavatīti vā yojanā kātabbā. **Itīti** imā cha āpattiyō āpajjatīti yojanā.

Bhojanam gahetvā ajjhoharamānāti sambandho. **Tathevāti** yathā khādane, tatheva maṃsam lasuṃam ajjhoharamānāti yojanā. “Pañītabhojanānī”ti ca “akappiyamaṃsa”nti ca padāni “ajjhoharamānā”ti padena sambandhitabbāni.

Pañca ṭhānānīti pañca āpattisaṅkhātāni ṭhānāni. **Tatthāti** pañcasu sahadhammikesu. **Dvinnanti** bhikkhubhikkhunīnam. **Tesanti** sikkhamānādīnam. **Pañcannamevāti** sahadhammikānaṃyeva. **Vinicchayavohāroti** vinicchayavacanam. Iminā cattāri adhikaraṇāni paṭikkhipati. **Aḍḍakammaṃ nāmāti** abhiyūñjantānam kammaṃ nāma.

“Sahadhammikāna”nti iminā **pañjannam vinicchayoti** ettha pañcasarūpaṃ dasseti. Sobhaṇabhāvaṃ vitthārento āha “katavītikamo hī”tiādi. **Abbhūṇhasīloti** abhinavuppannasīlo. Abbhūṇhasīlo nāma atthato pākatikasīloti āha “pākatiko”ti, pakatisīlena niyuttoti attho.

“Kāyadvārasambhavā”ti iminā **kāyikāti** padassa taddhitabhāvaṃ dasseti. **Mukham oloketabbanti ettha** vuttāti sambandho.

Catunnam desanāya cāti ettha “desanāyā”ti padaṃ ādipadalopanti āha “accayadesanāyā”ti. **Sāti** accayadesanā. Abhinilīyitvā dhanunā mārentīti **abhimārā**.

Chejjam hotīti ettha chejjam nāma pārājikāpajjanamevāti āha “devadatto viya pārājikam āpajjatī”ti. **Imā pana āpattiyoti** pārājikathullaccayāpattiyō.

(4) Avandanīyapuggalādivaṇṇanā

477. **Tesanti** dasannam puggalānam. “Saddhi”nti iminā **sāmīcenāti** ettha sahatthe karaṇavacananti dasseti. **Sāmīcenāti** ca sāmīcinā kattabbaṃ **sāmīcam** kammaṃ, tena sāmīcena. **Dasa cīvaradhāraṇāti** padassa samāsabhāvaṃ paṭikkhipanto āha “dasa divasāni atirekacīvarassa dhāraṇā”ti.

Katisatantiādīsu dvīsu gāthāpādesu catūsu vibhatyantapadesu purimaṃ purimena, pacchimañca pacchimena yathākkammaṃ yojetabbanti dassento āha “katisataṃ āpattiyō rattisataṃ chādayitvānā”ti. Pacchimagāthāya pubbaḍḍhepi eseva nayo. **Ayam hīti** ayam eva vakkhamāno. **Etthāti** gāthāyaṃ. **Yoti** bhikkhu, paṭicchādetīti sambandho. **Itīti** ayam saṅkhepattho.

Heṭṭhā vuttesu catūsu catukkesu dhammena samaggaṃ apanetvā dvādasa kammadosā vuttāti daṭṭhabbaṃ. Adhammena vaggakammaṃ, adhammena samaggakammanti yojetabbaṃ.

Etthāti chasu kammesu. **Etadevāti** dhammena samaggakammameva.

Yam desitāti ettha yaṃsaddo vacanavipallāsoti āha “yāni desitānī”ti. “Desitānī”ti iminā **desitāti** ettha nikārassa ākāraḍesabhāvaṃ dasseti. “Pariyantaparichedabhāvarahitattā”ti iminā natthi antaṃ pariyantametassāti **anantanti** vacanattham dasseti. **Tanti** nibbānam, jītanti sambandho. Kena kaṃ kinti katvā jītanti āha “bhagavatā kilesagaṇam abhimadditvā”ti. Kena kaṃ kinti katvā kiṃ jitaṃ viyāti āha “raññā sapattagaṇam abhimadditvā rajjam viyā”ti. Tattha “raññā”ti iminā “kenā”ti pucchaṃ vissajjesi. “Sapattagaṇa”nti iminā “ka”nti pucchaṃ vissajjesi. “Abhimadditvā”ti iminā “kinti katvā”ti pucchaṃ vissajjesi. “Rajja”nti iminā “ki”nti pucchaṃ vissajjesi. **Sapattagaṇanti** verigaṇam. Ayam panettha yojanā – raññā sapattagaṇam abhimadditvā rajjam rājabhāvaṃ jitaṃ viya, bhagavatā

Tāsūti dvīsu bhikkhunīsu.

Caturo janāti ettha catunnaṃ janānaṃ sarūpaṃ dassento āha “ācariyo ca tayo ca antevāsikā”ti. **Sāhatthikāti** sahatthā avaharītā. **Āṇattiyāpīti** āṇattena avaharītāpi. **Itaresanti** antevāsikānaṃ, ekeko māsakoti sambandho. **Etthāti** parivāre sedamocikagāthāyaṃ.

(2) Pārājikādipaṅhāvaṇṇanā

480. Santhatapeyyālañcāti paṭhamapārājikavibhaṅge (pārā. 65) vuttaṃ santhatapeyyālañca.

Liṅgaparivattaṃ sandhāyāti sati liṅge parivatte paṭiggahaṇassa vijhanaṃ sandhāya vuttaṃ.

Yoti bhikkhu, pariṇāmetīti sambandho. Attano atthāyāti yojanā.

Assāti gāthāya. **Kākauhadanti** kākehi karīsussaggaṃ. **Kaddamamakkhīti** kaddamena makkhitaṃ. Kāyagātāneva hutvāti sambandho.

Hīti vitthāro. Anariyaṃ taṃ itthiṃ vā taṃ purisaṃ vā haneyyāti yojanā. Liṅgaparivattena hetubhūtena itthibhūtaṃ, purisabhūtañcāti sambandho. **Itthibhūtanti** ca itthi hutvā bhūtaṃ, itthibhāvaṃ vā pattaṃ.

Migasiṅgātāpasasīhakumārādīnaṃ tiracchānagatamātāpitaro viyāti yojanā. **Migasiṅgātāpasoti** migasiṅganāmako (jā. aṭṭha. 5.17.96 ādayo) tāpaso. **Sihakumāroti** sīhabāhukumāro. Ādisaddena bhūridattādayo saṅgaṇhāti.

Kurundiyaṃ āgatanti sambandho.

“**Saccaṃ bhaṇantoti gāthāyā**”ti padaṃ “saccaṃ bhāsato lahukāpatti hoti”ti ettha itisaddena sambandhitabbaṃ. “Saccaṃ bhaṇanto”ti gāthāya iti atthoti yojanā.

(3) Pācittiyādipaṅhāvaṇṇanā

481. Salākaṃ dentassa assa bhikkhussa chejjaṃ hotīti yojanā. “Pārājikaṃ hoti”ti iminā **hotichejjanti** padassa atthaṃ dasseti.

Suppatiṭṭhitānigrodhasadisāṃ rukkhamūlaṃ, tameva vā gahetabbaṃ.

Tissitthiyoti ettha bhummatthe upayogavacanaṃ, paccattavacanaṃ vāti āha “tāsupī”ti. “Yaṃ taṃ methunaṃ nāma ta”nti iminā “methunaṃ yaṃ ta”nti padānaṃ samānādhikaraṇabhāvaṃ dasseti. “Na sevati”ti iminā **na sevati** ettha tikārassa ekārādesabhāvaṃ (jā. aṭṭha. 4.11.76 putto vā pitaraṃ yāce viya) dasseti. **Tayo puriseti** ettha “upagantvā”ti padaṃ ajjhāharitvā sambandhitabbanti dassento āha “tayo purisepi upagantvā”ti. Iminā **tayo puriseti** ettha upayogathe upayogavacanaṃ dasseti. Purimanayaṃ gahetvā etthāpi “tīsu purisesū”ti bhummatthe upayogavacanaṃ atthopi yujjateva. Imaṃ nayaṃ gahetvā purimapadepi tissitthiyo upagantvāti upayogathe upayogavacanaṃ atthopi yujjateva. Tasmā te dve nayā aññamaññopadesadāyakanayā nāmāti daṭṭhabbaṃ. “Ubhatobyañjanasankhāte”ti iminā anariyasaddena ubhatobyañjanova idha gahetabboti dasseti. “Nācarati”ti iminā **na cācāreti** etthāpi tisaddassa ekārādesabhāvameva dasseti. Methunadhammassa pubbabhāgaṃ kāyasaṃsaggaṃ āpajjitum vāyamantiyā tassā bhikkhuniyāti yojanā.

Assāti gāthāya, titthiyo ārādhako hotīti yojanā. **Tatthevāti** titthiyavatte eva. **Assāti** titthiyassa.

Tamevāti titthiyavattameva.

Saṅghādisesantiādigāthā vuttāti sambandho. **Tanti** ajjhoharaṇaṃ.

Ākāśagataṃ sāmaṇeranti sambandho. **Saṅghenapīti** pisaddo na kammārahenevāti dasseti. “Na kātabba”nti iminā saṅghopi kammārahopi bhūmigatova vaṭṭatīti dasseti.

Assāti gāthāya vinicchayoti sambandho.

“Na deti, na paṭiggaṇhātī”ti kiriyāpadānaṃ kattāraṃ dassento āha “nāpi uyyojikā”tiādi. **Tassāti** avassutapurisassa. “Kāraṇenā”ti iminā **tenāti** padassa kāraṇatthaṃ dasseti. Evasaddo pana sambhavavasena yojito, na aññena kāraṇenāti attho, avassutassa purisassāti sambandho. **Gahaṇeti** uyyojitāya gahaṇe. **Tañca paribhogapaccayāti** ettha tasaddassa visayaṃ, paribhogassa ca sambandhaṃ dassento āha “tañca panā”tiādi. Tattha “āpatti”nti iminā tasaddassa visayaṃ dasseti. “Tassā uyyojitāya”ti iminā paribhogassa sambandhaṃ dasseti. **Tassāti** uyyojitāya.

Sattarasakesu saṅghādisesesūti sambandho. **Vajjaṃ na phusatīti** padassa atthaṃ dassento āha “aññaṃ navaṃ āpatti”nti.

Iti sedamocikagāthāvaṇṇanāya yojanā samattā.

Pañcavaggo

Kammavaggavaṇṇanā

482. Kammavagge “gaṇanaparicchedavacana”nti iminā na pamāṇavacananti dasseti. Iminā kammānaṃ tato ūnātirekabhāvaṃ nivāreti. Gaṇiyate **gaṇanaṃ**, paricchijjati anenāti **paricchedo**, gaṇanassa paricchedo **gaṇanaparicchedo**. Atha vā gaṇiyati anenāti gaṇanaṃ, tameva paricchedo gaṇanaparicchedo, soyeva vacanaṃ **gaṇanaparicchedavacanaṃ**. Apalokanakammaṃ nāmāti kattabbaṃ kammanti sambandho. **Vuttanayenevāti** “sīmaṭṭhakasaṅghaṃ sodhetvā chandārahānaṃ chandaṃ āharitvā”ti vuttena eva nayena.

Tatthāti catūsu kammesu, ñattidutiyakammaṃ pana atthīti sambandho.

Tatthāti dvīsu kammesu. **Avasesāti** chahi kammehi avasesā. Yadi parivattetvā kataṃ daḷhīkammaṃ na hoti, evaṃ sati daḷhīkammattāyā kinti kātabbanti āha “sace panā”tiādi. Tattha “akkharaparihīnaṃ vā padaparihīnaṃ vā”ti idaṃ akkharapadānaṃ gaḷitaṃ sandhāya vuttaṃ. “Duruttapadaṃ vā”ti idaṃ sithiladhanitādiapariṇaṇaṃ sandhāya vuttaṃ. Ettha “duruttakkharaṃ vā”ti ajjhāharitabbaṃ. **Idanti** punappunaṃ vacanaṃ. **Kammaṃ hutvāti** sukammaṃ hutvā.

483. Sammukhākaraṇīyaasammukhākaraṇīyesu asammukhākaraṇīyāni appakattā paṭhamaṃ dassetvā sesānaṃ sammukhākaraṇīyabhāvaṃ dassento āha “tatthā”tiādi. Tattha **tatthāti** tesu dvīsu, asammukhākaraṇīyaṃ nāma aṭṭhavidhaṃ hotīti sambandho. **Tattha tatthāti** tesu tesu khandhakesu. “Sukataṃ hotī”ti vacanasāmatthiyato sammukhākatampi sukataṃ hotīti atthopi gahetabbo.

Sesānīti aṭṭhakammehi sesāni. **Etānīti** kammāni. **Vatthuvipannānīti** vatthunā vipannāni.

Tesampīti paṭipucchākaraṇīyānampi. **Etthāti** “paṭipucchākaraṇīya”nti pade. “Pucchitvā”ti iminā **paṭipucchāti** padassa tvāpaccayantabhāvaṃ dasseti. “Kātabba”nti iminā **karaṇīyanti** ettha anīyasaddassa kammattabhāvaṃ dasseti. **Yathādinnyāhi** cuditakena yathādinnyāya.

Vippalapantassāti vikārena yaṃ vā taṃ vā vacanaṃ palapantassa cuditakassāti sambandho. **Sabbatthāti** sabbesu “tajanīyakammārahassā”tiādīsu.

Anuposathadivaseti uposathadivasato aññasmiṃ divase. Tamevatthaṃ dassento āha “uposathadivaso nāmā”tiādi. **Kattikamāsanti** pacchimakattikamāsaṃ. Tassa pavāraṇamāsattā “ṭhapetvā”ti vuttaṃ. Sāmaggidivaso ca yathāvuttā cātuddasapannarasā ca uposathadivaso nāmāti yojanā. **Yatrahīti** yasmiṃ pana vihāre, ṭhapentīti sambandho. **Antarāti** cātuddasipannarasīnaṃ majjhe.

Paccukkaḍḍhitvā ṭhapitadivasoti pacchā upari kaḍḍhitvā ṭhapitaṃ kattikakālapakkhacātuddasiṃ vā pañcadasiṃ vā sandhāya vuttaṃ. **Idhāpīti** apavāraṇāya pavāraṇaṭṭhānepi. Pāḷiyamāgatanayato aññampi nayaṃ dassento āha “apicā”tiādi. **Antimavatthunti** pārājikavatthum. **Yassāti** puggalassa. Iminā kammāraho puggalo vatthu nāmāti dasseti.

484. Dabbassa aggaṇhanaṃ vatthuaparāmasanaṃ nāma na hoti, atha kho nāmassa aggaṇhanevāti āha “tassa nāmaṃ na gaṇhātī”ti. Aparāmasanākāraṃ dassento āha “suṇātu me”tiādi.

Puggalaṃ na parāmasatīti ettha **puggalo** nāma upajjhāyoti āha “yo upasampadāpekkhassa upajjhāyo”ti. **Tanti** upajjhāyaṃ.

Sabbena sabbanti sabbathā sabbaṃ, nipātasamudāyoyaṃ, sabbena vā ākārena sabbaṃ ñattinti yojanā.

Ñattikamme paṭhamaṃ kammaṃ katvā pacchā ñattiṭṭhapanampi pacchā ñattiṃ ṭhapetiyeva nāma. **Iti imehīti**ādi nigamanaṃ.

485. “Vuttanayenevā”ti atidisitvāpi ñattikammavācānaṃ asadisattā aparāmasanākāraṃ dassento āha “evaṃ panā”tiādi. Tattha **nesanti** vatthusaṅghapuggalānaṃ, paṭhamānussāvane vā dutiyatatiyānussāvanāsu vā vattabbe vadantoti sambandho.

Sāvanaṃ hāpetīti ettha anusaddo lopoti āha “anussāvanaṃ na karotī”ti. “Sāvanaṃ hāpetī”ti ettha na kevalaṃ sabbena sabbaṃ anussāvanaṃ akarontoyeva sāvanaṃ hāpeti nāma, atha kho anussāvanāya duruttachaḍḍanampi hāpetiyeva nāmāti dassento āha “yopī”tiādi. “Sakimeva vā dvikkhattum vā”ti iminā tikkhattum aparipūrentoyeva sāvanaṃ hāpeti nāmāti dasseti. Imassa vacanassa sāmattiyaṭṭhāyato ñattidutiyakamme ekakkhattuto, ñatticatutthakamme tikkhattuto atirekaṃ kammavācāṃ karonto na hāpetīti ñāyati.

“Chaḍḍetī”ti ettha chaḍḍanassa padakkharānaṃ gaḷitabhāvena pākāṭattā taṃ adassetvā “duruttaṃ karotī”ti ettha duruttameva dassento āha “duruttaṃ karotīti ettha panā”tiādi. Karontena bhikkhunā upalakkhetabboti sambandho.

“Sithila...pe... pabhedo”ti yvāyaṃ byañjanappabhedo vutto, ayaṃ byañjanappabhedoti yojanā. Gāthāyaṃ **dasadhāti** dasappakārena. **Byañjanabuddhiyāti** vaddhetīti **buddhi**, byañjanameva akkhrameva sithilādivasena dasadhā buddhi **byañjanabuddhi**, tāya. Ettha “dasadhā”ti padena “byañjanabuddhi”ti samāsapadassa antare dasadhāsaddassa lopaṃ dasseti “kammajaṃ evā”tiādīsu (visuddhi. 2.450; visuddhi. mahāṭi. 2.450) viya. Ettha hi evasaddena kamma eva jātaṃ **kammajanti** samāsaṃ katvā samāsamajjhe evasaddalopaṃ dasseti. **Pabhedoti** viseso. Ayaṃ panettha yojanā – sithilañca dhanitañca dīghañca rassañca garukañca lahukañca niggahitañca sambandhañca vavatthitañca vimuttañcāti dasadhā byañjanabuddhiyāva pabhedo viseso ñātabboti. “Sithila”nti ādīni dasa padāni “akkharaṃ padaṃ byañjana”nti napuṃsakalingavasena vuttapāṭhaṃmissāya vuttānīti daṭṭhabbaṃ.

Gāthāya vitthāraṃ dassento āha “ettha hī”tiādi. Agāḷhena vacīpayogena vattabbaṃ akkharaṃ

sithilaṃ. Gāḷhena vacīpayogena vattabbaṃ akkharaṃ **dhanitaṃ.** **Tesvevāti** pañcasu eva vaggesu. Na kevalaṃ dīghameva garukaṃ nāma, atha kho saṃyogaparampīti āha “yaṃ vā”tiādi. Yaṃ akkharaṃ saṃyogaparam katvā vuccati, tampi **garukaṃ** nāmāti yojanā. Saṃyogo paro yassa akkharassāti **saṃyogaparam.** “Saṃyogapada”ntipi pāṭho. Yaṃ asaṃyogaparam katvā vuccati, tampi **lahukaṃ** nāmāti yojanā. Yaṃ sānunāsikaṃ katvā vattabbaṃ, taṃ **niggahitaṃ** nāmāti yojanā. **Niggahetvāti niggahitaṃ** nāma atthato ṭhānakaraṇānaṃ avissajjanaṃ amuñcananti āha “avissajjetvā”ti. Yaṃ sambandhitvā vuccati, taṃ **sambandhaṃ** nāmāti yojanā. Yaṃ asambandhaṃ katvā vuccati, taṃ **vavatthitaṃ** nāmāti yojanā. Yaṃ aniggahetvā vuccati, taṃ **vimuttaṃ** nāmāti yojanā. **Aniggahetvāti** aniggahaṃ nāma atthato vissajjananti āha “vissajjetvā”ti.

Evam byañjanabuddhivisesaṃ dassetvā idāni kammavācāya uccāraṇavisesaṃ vitthārena dassento āha “tatthā”tiādi. Tattha **tatthāti** tāsū dasasu byañjanabuddhīsu. Tathāsaddena takārassa thakārakaraṇāṇca sithilassa dhanitakaraṇāṇca atidisati, tathā “pattakallaṃ esā ñatti”tiādivacanaṇca sithilassa dhanitakaraṇaṃ nāmāti yojanā.

Itti evaṃ. Sithile kattabbe dhanitaṃ karotīti sambandho. **Cattāri byañjanānīti** cattāri akkharāni. Byañjanasaddo hi idha akkharavācako. Catassannaṃ byañjanabuddhīnaṃ kammadūsaṇaṃ dassetvā itarāsaṃ adūsaṇaṃ dassento āha “itaresu panā”tiādi. **Anukkamāgatanti** ariyehi otarivā anukkamena āgataṃ. **Paveṇinti** santatiṃ. Vināsetvā vutte kiṃ kammavācākopo hotīti āha “sace panā”tiādi. **Na kuppātīti** na nassati. Kasmā pana kammavācā na kuppāti, nanu kammaṃ kopentī kammavācā kuppātīti āha “imāni hī”tiādi. Hi yasmā na kopenti, tasmā kammavācā na kuppātīti yojanā.

Yaṃ pana vacanaṃ suttantikatherā vadantīti sambandho. Kaccāyanādisuttantaṃ karontīti **suttantikā**, kaccāyanādayo, suttantikā ca te therā ceti **suttantikatherā.** **Na vaṭṭatīti** akkharavikāro na vaṭṭati. Vinayadharena kammavācā kātābbāti sambandho. **Yathāpāḷiyāti** bhagavatā yathāvuttāya pāḷiyā. **Byañjananiruttīyāti** byañjananiruttīyaṃ. **Itarathāti** vuttadosapariharaṇato aññena pakārena.

Akāle vā sāvetīti ettha **akālo** nāma anokāsoti āha “anokāse”ti. Anokāso nāma ñattianussāvanānaṃ pubbāparavitathanti āha “ñattiṃ aṭṭhapetvā”tiādi. Paṭhamameva ñattiṃ aṭṭhapetvā paṭhamameva anussāvanakammaṃ katvāti yojanā. “Paṭhamamevā”ti hi padaṃ pubbāparāpekkhaṃ. **Itti**tiādi nigamanaṃ.

486. Yā ekavīsati bhikkhū na gaṇhāti, ayaṃ **atikhuddakasīmā** nāmāti yojanā. **Ekavīsati bhikkhūti** abbhānakamme kammārahena saddhiṃ ekavīsati bhikkhū. Yattha sīmāyaṃ nisīdituṃ na sakkonti, ayaṃ **atikhuddakasīmā** nāmāti yojanā. **Nisīditunti** aññamaññassa hatthapāsaṃ avijahitvā parimaṇḍalākārena nisīdituṃ. **Tatthāti** atikhuddake. **Etthāti** sesasīmāsu. Yā sammatā hoti, ayaṃ **atimahaṭi** nāmāti yojanā. **Kesaggamattenāpīti** pisaddo tato atirekena pana pagevāti dasseti. Aghaṭitaṃ asambandhaṃ nimittaṃ imissāti **aghaṭitanimittā.** Khaṇḍanimittabhāvaṃ akhaṇḍanimittadassanena pākaṭaṃ karonto āha “puratthimāyā”tiādi. **Pubbakittitanti** paṭhamakittitaṃ. **Tatthevāti** uttarāya eva disāya. **Aparāpīti** pisaddo dutiyatthasampiṇḍanatto. Yā sammatā hoti, **khaṇḍanimittā** nāmāti yojanā. **Animittupaganti** yathābhūtakathanavisesanameva, na byavacchedavisesanaṃ tacasārādiggahaṇena animittupagabhāvassa pākaṭattā. **Antarāti** majjhe. Yā sammatā hoti, sā **chāyānimittā** nāma, animittā nāmāti yojanā.

Bahi ṭhito hutvā sammannatīti yojanā. Nimittāni pana bahi ṭhatvāpi kittetuṃ vaṭṭati. **Evam sammatāpīti** pisaddo asammataṃ pana pagevāti dasseti. **Sīmāya sīmanti** padānaṃ sambandhāpekkhattā, tassa ca asamānabhāvato tesam viṣuṃ viṣuṃ sambandhaṃ dassento āha “attano sīmāya paresaṃ sīma”nti. **Sambhindatīti** sambandhaṃ karoti. Ettha hi bhididhātu dvidhākaraṇatthavācako, dhātvatthabādhakena saṃyūpasaggena sambandhavācako hotīti daṭṭhabbaṃ. **Tatthāti** tāsū dvīsu sīmāsu. **Itti** evaṃ. **Tāsūti** sīmāsu.

487-8. Yampi kammappattachandārahalakkhaṇanti yojanā. **Tatthā**ti tassaṃ parisato kammavipattiyaṃ. **Tampī**ti kammappattachandārahalakkhaṇampi, vuttamevāti sambandho. **Tatthā**ti “cattāro bhikkhū pakatattā kammappattā”ti pāṭhe. **Anukkhittā**ti saṅghena ukkhepanīyakammasa akatattā anukkhittā. **Parisuddhasīlā**ti pārājikaṃ anajjhāpannattā parisuddhasīlā. Imehi padehi pakati attā sabhāvo etesanti **pakatattā**ti atthaṃ dasseti. “Kammassa arahā”ti iminā “**kammappattā**”ti padassa chaṭṭhīsamāsaṅca pattasaddassa arahaanucchavikatthabhāvaṅca dasseti. **Tehī**ti catūhi pakatattehi. **Etī**ti āgacchati. **Avasesā**ti catūhi pakatattehi avasesā. **Yassa panā**ti puggalassa pana. **Kammārahoti** kammassa araho.

489. **Etthā**ti paṇḍakādīnaṃ avatthubhāvadassanaṭṭhāne.

Apalokanakammakathā

495-6. **Tatthā**ti catūsu kammesu. **Etthā**ti osāraṇādīpāṭhe. **Padasiliṭṭhatāyā**ti loke padānaṃ siliṭṭhabhāvato. **Tatthā**ti osāraṇādīsu pañcasu. Kaṇṭakasāmaṇerassa yā sā daṇḍakammanāsanā atthi, sā nissāraṇāti yojanā. “Micchādiṭṭhiko hoti”ti vatvā tamevatthaṃ dassetuṃ “antaggāhikāya diṭṭhiyā samannāgato”ti vuttaṃ. Micchādiṭṭhi hi liṅganāsanāya kāraṇaṃ hoti. **Soti** sāmaṇero, “nissajjāpetabbo”ti pade kāritakammaṃ, vuttakammaṃ vā. **Taṃ laddhinti** dhātukammaṃ, avuttakammaṃ vā. Kinti kātābanti āha “evaṅca pana kammaṃ kātābba”nti.

Kātābākāraṃ dassento āha “saṅghaṃ bhante”tiādi. Yaṃ sahaseyyaṃ labhantīti yojanā. **Tassā**ti sahaseyyassa. **Alābhāyā**ti alābhatthāya. “Cara pire vinassā”ti iminā nissāraṇākāraṃ dasseti. Attho panassa hetṭhā vuttoyeva.

Soti samaṇero, osāretabboti sambandho.

Svāyanti so ayaṃ sāmaṇero, accayaṃ desetīti sambandho. **Soratoti** sundaraladdhiyaṃ rato, duladdhito vā suṭṭhu orato. **Yathā pureti** yathā pubbe rucati, tathāti yojanā. **Kāyasambhogasāmaggidānanti** kāyena ca sambhogena ca sāmaggīyā dānaṃ.

Evantiādi nigamaṇaṃ. Yasmā pana brahmadāṇḍo pañcasatikakkhandhake (cūlava. 445) channasseva pañṇatto, tasmā tasseva dātābboti āha “na kevala”ntiādi. **Esā**ti brahmadāṇḍo, aññopi yo bhikkhu viharati, tassapī dātābboti sambandho. Kinti dātābboti āha “evaṅca pana dātābbo”ti. Dātābākāraṃ dassento āha “saṅghamaṃjhe”tiādi.

Yaṃ vacanaṃ iccheyya, taṃ vacananti yojanā. **Khamāpentassā**ti saṅghaṃ khamāpentassa tassa bhikkhussāti yojanā.

Paṭisaṅkhāti paṭisaṅkhāya, ñāṇena paccavekkhitvāti attho.

Yanti avandiyakammaṃ, anuññātanti sambandho. Kena anuññātanti āha “bhagavatā”ti. Kismiṃ khandhake anuññātanti āha “bhikkhunikkhandhake”ti. Kesu vatthūsu anuññātanti āha “tena kho pana...pe... imesu vatthūsū”ti (cūlava. 411). Kiṃ katvā anuññātanti āha “dukkaṭaṃ pañṇāpetvā”ti. Kinti anuññātanti āha “anujānāmi...pe... kātābbo”ti. **Tassā**ti avandiyassa. “Na osāraṇādīnī”ti iminā evasaddassa chaḍḍetabbatthaṃ dasseti. **Tassā**ti kammalakkhaṇabhūtassa avandiyassa. **Tatthevā**ti bhikkhunikkhandhakeyeva. Nanti kammalakkhaṇaṃ. **Idhāpī**ti parivāre kammavaggepi.

Apāsādikanti apasādāvahaṃ, apasādajanaṃ vā.

Tatoti avandiyakaraṇato. **Imanti** bhikkhuṃ. **Vandiyanti** vanditabbaṃ, vandanaṃ vā.

Etthāti apalokanakamme, bhikkhunisaṅghamūlakam katvā paññattanti yojanā. **Bhikkhusaṅghassāpīti** pisaddo na bhikkhunisaṅghassevāti dasseti. **Panasaddo** sambhāvanattho, tathā bhikkhunisaṅghamūlakam paññattampīti attho, labhitabbabhāvaṃ vitthārena dassento āha “yaṃ hī”tiādi. Yaṃ apalokanakammaṃ karotīti yojanā. Appamattakavissajjakena pana dātabbānīti sambandho. **Tesanti** sūciādīnaṃ. **Soyevāti** appamattakavissajjakoyeva. **Tatoti** appamattakato. **Tatthāti** senāsanakkhandhakavaṇṇanāyaṃ (cūḷava. aṭṭha. 321). Vuttappakāraṃ gilānabhesajjampīti sambandho. **Yopi cāti** bhikkhupi ca hotīti sambandho. Tassa dātabbāti sambandho. **Tatruppādatoti** tasmiṃ mahāvāse uppādapaccayato, gahetvāti sambandho. “Pesalassā”tiādīnā dussilādīnaṃ dātuṃ na vaṭṭatīti dasseti.

Jaggāpetuṃ vaṭṭatīti ettha apucchitvā jaggāpetuṃ vaṭṭatīti āha “ayaṃ bhikkhū”tiādi. **Odissāti** uddisitvā.

Āsanagharaṃ vāti paṭimāgharaṃ vā, kārako manussoti sambandho. Upanikkhepato gahetvāti sambandho. **Saṅghikenapīti** pisaddo na kevalaṃ cetiyassa upanikkhepeneva, atha kho saṅghikenapīti dasseti.

Yāpanamattaṃ alabhantehi karontehīti yojanā, paribhuñjantehi hutvāti sambandho. “Vattaṃ karomā”tiādīnā “yāpanamatta”nti padassa atthaṃ dasseti. Vihāre ropitā ye phalarukkhatīti yojanā. **Yesanti** rukkhanāṃ. **Tesūti** rukkhesu. **Ye panāti** rukkhaṃ pana, apariggahitā hontīti sambandho. **Taṃ panāti** apalokanakammaṃ pana. Salākaṃ gaṇhanti etthāti **salākaggam**, ṭhānaṃ. “**Yāgaggabhattagga**”iti etthāpi eseva nayo. **Uposathaggeti** uposathassa gahaṇaṭṭhāne, uposathageheti attho. **Tatthāti** uposathagge. **Tanti** apalokanakammaṃ.

Yaṃ mūlatacapattaanṅkurapupphaphalakhādānīyādīti yojanā. **Antosīmāyāti** anto upacārasīmāya.

Sukatamevāti saṅghena katameva. **Uposathadivaseti** nidassanamattaṃ yasmiṃ kasmimci divasepi katattā.

Phalavārenāti rukkhanāṃ phalagahaṇavārena. **Rukkhaṃ dharantīti** rukkhaṃ tiṭṭhanti, saṃvijjanti vā. **Yehīti** bhikkhūhi ropitā, hontīti sambandho. **Sā eva katikāti** pubbe katā sā eva katikā, aññā katikā na kātabbāti adhippāyo.

Aññasmiṃ vihāreti rukkhanāṃ ṭhitavihārato aññasmiṃ vihāre. **Tesanti** rukkhanāṃ, sāmīti sambandho. **Yepīti** rukkhaṃpi, ropitāti sambandho. Aññato ṭhānatoti yojanā. **Tesūti** rukkhesu. **Etthāti** vihāre. **Tehi panāti** pariveṇasāmikehi bhikkhūhi pana. **Dasabhāganti** dasamabhāgaṃ. “Eseva nayo”ti iminā dasabhāgaṃ datvāti atthaṃ atidisati.

Sambhāvanīyabhikkhunoti sīlasutādīhi sambhāvanīyassa bhikkhuno. **Tatthāti** porāṇavihāre. **Mūleti** pubbe, ādikāleti attho. **Nikkukkuccenāti** “abhājitamida”nti kukkuccavirahena. **Khiyyanamattameva tanti** taṃ khiyyanaṃ khiyyanamattameva, na sāmaṇerānaṃ khiyyanaṃ ruhatīti attho.

Panasarukkanti kaṅṭakāphalarukkhaṃ. **Ayaṃ sāmīcīti** ayaṃ bhājetvā khādānaṃ anudhammatā. **Khāyitanti** khāditaṃ. Dvinnaṃ tiṇṇaṃ katikapaṭippassambhanaṃ nayena ñātuṃ sakkuṇeyyattā taṃ adassetvā ekasseva katikapaṭippassambhanaṃ dassento āha “ekabhikkhuke panā”tiādi. **Purimakatikāti** “yathāsukhaṃ paribhuñjituṃ rucati”ti (pari. aṭṭha. 495-496) pure katā katikā. **Tesanti** sāmaṇerānaṃ, phātikammanti sambandho. **Bhājetvāti** sāmaṇerānaṃ bhājetvā. Iminā sāmaṇerānaṃ phātikammaṃ na dātabbampi bhāgaṃ bhājetabbanti dasseti.

Sāmantagāmehīti āsannagāmehi, āgantvāti sambandho. Ekaṃ ambaṃ ekaṃ labujanti yojanā. Adiyyamāne dose dassite diyyamāne ānisamsampi atthato ñātabbanti dassento āha “adiyyamāne hī”tiādi.

Gaṇhantānaṃ manussānanti sambandho. **Tatoti** katikavattaṭṭhapanato. **Na vattabbā**ti phaladānakuladūsakattā na vattabbā. Kinti ācikkhitabbanti āha “nāḷikerādīni”tiādi. **Anu**vicarivāti padānamanukkamena vicarivā. **Upa**ḍḍhabhāgoti bhikkhūnaṃ laddhabhāgato upaḍḍho bhāgo. **Apaloketvā**ti saṅghaṃ āpucchitvā.

Maggagamiyasatthavāhoti maggaṃ gamiko satthavāho. **Soti** balakkārena gahetvā khādanto. **Chāyā**dīnantiādisaddena āramavanāni saṅgahetabbāni. **Sace atthī**ti sace attho atthi. **Phalabharitā**ti phalena paripuṇṇā. “Phalabhāritā”tipi pāṭho. Phalasaṅkhātena bhārena samannāgatāti attho. **Apaccāsī**santenāti tesam santikā dānapaṭidānaṃ apaccāsīsentena. **Pubbe vuttamevā**ti pubbe saṅghikaṭṭhāne “kuddho hi so”tiādinā vuttameva. **Etthā**ti puggalikaṭṭhāne.

Tanti phalārāmaṃ. **Soti** paṭibalo bhikkhu. **Bhāriyaṃ kamma**nti jagganakammaṃ bhāriyaṃ. **Ettakenā**ti tatiyabhāgaupaḍḍhabhāgamattena. Sabbaṃ phalārāmaṃ sambandho. **Mūlabhāga**nti paṭhamabhāgaṃ. “Dasabhāgamatta”nti iminā tadatthaṃ dasseti. **Datvā**ti saṅghassa datvā. **Soti** bhikkhu. **Akatāvā**santi pubbe akataṃ navam senāsaṃ. **Ārāma**nti saṅghassa ārāmaṃ. **Tehipī**ti nissitakehipi. Pisaddo ācariyaṃ apekkhati. **Tesanti** nissitakānaṃ. **Jaggita**kāleti jaggitānaṃ rukkhānaṃ pupphaphalabharitakāle. **Jaggana**kāleti jagganamattakāle, jagganamattameva, na jagganakāraṇā kiñci pupphaṃ vā phalaṃ vā hoti, tasmim kāleti attho. “Bahu”ntiādinā vāretabbākāraṃ dasseti.

Phātikammaṃ jagganto na atthīti yojanā. **Anāpucchitvāvā**ti saṅghaṃ anapaloketvāva. **Itī**ti evaṃ.

Ñattikammaṭṭhānabhede pana evaṃ vinicchayo vedittabboti yojanā. Osāreti saṅghamajjhaṃ paveseti imāya ñattiyāti **osāraṇā**.

Nissāriyati saṅghato bahi kariyati imāyāti **nissāraṇā**. **Ñatti uposatho nāmā**ti idaṃ kāraṇūpacāravasena vuttaṃ. Tenāha “uposathakammavasena ṭhapitā”ti. Eseva nayo **ñattipavāraṇā nāmā**ti etthāpi.

Anusāseyyātiādinā paṭhamapurisaeyyavibhattivasena ṭhapitā ñatti attanā paraṃ sammanituṃ ṭhapitā ñatti nāma. **Anusāseyyanti**ādinā uttamapurisaeyyamvibhattivasena ṭhapitā ñatti attanāva attānaṃ sammanituṃ ṭhapitā ñatti nāma. Attanāva attā vā paro vā sammaniyati imāya ñattiyāti **sammuti**. Nissaṭṭhapattacīvarādīni dīyanti anenāti **dānaṃ**, ñatti. Vaccaṃ anapekkhitvā vācakassa niyatanapuṃsakaliṅgattā napuṃsakaliṅgavasena vuttaṃ.

Āpatti paṭiggaṇhiyati anenāti **paṭiggaho**.

Paṭimukhaṃ upari kaḍḍhiyati imāyāti **paccukkaḍḍhanā**.

Kammamevāti lakkhiyati anenāti **kammalakkhaṇaṃ**.

“**Tathā**”ti padena “kammalakkhaṇaṃ nāmā”ti padaṃ atidisati. **Tatoti** sabbasaṅgāhikañattito. Parā dve ñattiyō kammalakkhaṇaṃ nāmāti yojanā. **Itī**tiādi nigamaṃ.

Ñattidutiyakammaṭṭhānabhede osāraṇādīnaṃ visesaṃ dassento āha “vaḍḍhassa licchavino”tiādi. Sīmāsammuti cātiādinā yojanā kātabbā.

Yā pana dve ñattidutiyakammavācā vuttāti yojanā. **Iti**tiādi nigamanam.

Ñatticatutthakammaṭṭhānabhede yojanāyā pākāṭoyeva.

497. Catuvaggakarāṇe kammetiādikāya desanāya sambandham dassento āha “iti kammāni cā”tiādi. Tattha **itī** evam dassetvāti sambandho. **Tassatthoti** tassa “catuvaggakarāṇe kamme”tiādivacanassa attho vedītabboti sambandho.

Iti kammavaggavaṇṇanāya yojanā samattā.

Atthavasavaggādivaṇṇanā

498. Evam kammavaggavaṇṇanam dassetvā tassānantare vuttāya “dve atthavase paṭiccā”tiādikāya desanāya anusandhim dassento āha “idānī”tiādi, idāni āraddhanti sambandho. Yāni tāni sikkhāpadānīti yojanā. **Diṭṭhadhammikaverānanti** diṭṭhadhamme pavattattā ca viramītabbattā ca diṭṭhadhammikānam verānam. **Samvarāyāti** ettha sampubbo varadhātu pidahanattho, āyasaddo ca tadatthoti āha “pidahanatthāyā”ti. **Vipākadukkhasaṅkhātānanti** pāṇātipātādīnam vipākabhūtānam dukkhasaṅkhātānam. **Samparāyikānanti** samparāye pavattānam. **Idhāti** imasmim sikkhāpadapaññattānisamsaṭṭhāne. “Vajjanīyabhāvato”ti iminā vajjetabbānīti **vajjanīti** vacanatham dasseti. Bhāyanti etehīti **bhayāni**. **Akkhamatṭhenāti** asahaṇīyatṭhena. “Akusalānīti vuccantī”ti iminā vipākadukkhaṇi phalūpacārena akusalāni nāmāti dasseti. Gaṇabandhabhedanatthāya sikkhāpadam paññattanti evameva pāṭho. Potthakesu pana “gaṇabhojanasikkhāpadam paññatta”nti pāṭho likhito. **Sabbatthāti** sabbasmim atthavasavagge. **Yanti** vacanam. **Etthāti** imasmim vagge.

Iti atthavasavaggavaṇṇanāya yojanā samattā.

499. Vattesu vattamāno puggalo osārīyati anenāti **osāraṇīyam**, kammaṃ. Tena vuttam “yena kammena osārīyati, tam kammaṃ paññatta”nti. “Yena kammena”tiādinā bhaṇḍanakārakādayo nissārīyanti anena kammenāti **nissāraṇīyanti** vacanatham dasseti.

500. Sattāpattikkhandhā paññattam nāmāti sambandho. **Antarāti** kakusandhādīnam tiṇṇam buddhānaṅca amhākaṃ bhagavato ca antare. “Sikkhāpade”ti iminā “apaññatte”ti padassa attham dasseti. Makkaṭṭivattuādivinītakathā anupaññattam nāmāti sambandho. “Sikkhāpade”ti iminā “paññatte”ti padassa attham dasseti. **Sabbatthāti** sabbasmim ānisamsavagge.

Iti ānisamsavaggavaṇṇanāya yojanā samattā.

501. Sabbasikkhāpadānam saṅgahanti sambandho. **Tatthāti** “nava saṅgahā”tiādi pāṭhe evamattho vedītabboti yojanā. “Vatthunā saṅgaho”ti iminā “vatthusmim, vatthūnam saṅgaho”ti attham nivāreti. **Etthāti** “vatthusāṅgaho”tiādi pāṭhe. **Hīti** vitthāro. Yasmā natthīti sambandho. **Sabbānīti** sikkhāpadāni. “Saṅgahitānī”ti iminā saṅgahitabboti **saṅgahoti** nibbacanam dasseti. **Evam tāvāti**tiādi nigamanam.

Yasmā pana saṅgahitāti sambandho.

Evametthātitiādinā khandhasamuṭṭhānaadhikaraṇasamathe sampiṇḍetvā nigamanam dasseti. **Etthāti** saṅgahavagge.

Iti samantapāsādikāya vinayasamvaṇṇanāya

Navasaṅgahitavaṇṇanāya yojanā samattā.

Niṭṭhitāti niṭṭhaṃ nipphattiṃ itā gatāti niṭṭhitā, atha vā niṭṭhe nipphattiyaṃ itā ṭhitāti niṭṭhitā. Casaddo avadhāraṇatto, niṭṭhitā evāti hi attho. **Anuttānathapadavaṇṇanā**ti anuttānānaṃ atthavantapadānaṃ, atthānaṃca padānaṃca vaṇṇanā.

Iti parivāraṇṇanāya yojanā samattā.

Niṭṭhitā ca pācityādivaṇṇanāya yojanāti.

Jādilañchitanāmenanekānaṃ vācīto mayā;
Parivāravīnayaṃ, samatto yojanāyā.

Nigamanakathāvaṇṇanā

Evam vinayasamvaṇṇanaṃ katvā idāni taṃ nigamento āha “ettāvata”tiādi. Tattha **ettāvata**ti ettakena “yo kappakoṭṭhiṃ appameyya”ntiādivacanato (pārā. aṭṭha. 1.ganthārambhakathā) paṭṭhaya “navasaṅgahitavaggavaṇṇanā niṭṭhitā”ti vacanapariyosānānaṃ akkharapadabyañjanānaṃ samudāyabhūtena vacanakkamena, samattāti sambandho.

Ubhatovibhaṅgakhandaḥaparivāravibhattidesananti ubhatovibhaṅgena ca khandhakena ca parivārena ca vibhajitabbadesanaṃ vinayapiṭakanti sambandho. **Nātho**ti bhikkhubhikkhunīnaṃ hitapaṭipattiṃ yācanaṭṭhena ca kilesānaṃ upatāpanaṭṭhena ca veneyyānaṃ hitasukhaṃ āsīnaṭṭhena ca cittissariyaṭṭhena ca nātho. **Veneyyanti** vinetabbaṭṭhena veneyyaṃ. **Jinoti** pañcamārānaṃ jitaṭṭhena jino. Ayaṃ panettha yojanā – nātho veneyyaṃ vinento jino ubhatovibhaṅgakhandaḥaparivāravibhattidesanaṃ yaṃ vinayapiṭakaṃ āhāti.

Samadhikasattavīsatisahassamattenāti saha adhikena sattasahassappamaṇena ca vīsatisahassappamaṇena ca ganthenāti sambandho. **Tassā**ti vinayapiṭakassa. **Samantapāsādikā**ti samantato pasādaṃ vahikā, janikā vā. Tatrāyaṃ yojanā – tassa samadhikasattavīsatisahassamattena ganthena samantapāsādikā nāma samvaṇṇanā samattāti.

Tatridanti tatra idaṃ. “Tatrā”ti padaṃ purimavacanāpekkhaṃ. Tatra “samantapāsādikā nāmā”ti vacaneti hi attho. **Samantapāsādikattasminti** paccattatthe cetam bhumavacanaṃ hoti “idampi sīlasmi”ntiādīsu (dī. nī. 1.194 ādayo) viya, samantapāsādikattanti attho. Ayaṃ panettha yojanātrā “samantapāsādikā nāmā”ti vacane samantapāsādikāya idaṃ samantapāsādikattaṃ hotīti ayaṃ samantapāsādikabhāvoti attho.

Ācariyaparaṃparatotiādīsu gāthāsu vuttaṃ navavidhaṃ visesanapadaṃ “na dissatī”ti padena sambandhitabbaṃ. **Sampassatanti** sammā passantānaṃ viññūnanti sambandho. **Yatoti** yasmā, na dissatīti sambandho. **Etthāti** samvaṇṇanāyaṃ. **Samantapāsādikāteva**ti samantapāsādikā iti eva nāma. **Vinayassāti** vinayapiṭakassa. **Vineyyadamanakusalenā**ti vineyyānaṃ damane chekena. **Lokanāthenāti** lokānaṃ nāthena. **Lokamanukampamānenāti** lokaṃ anukampamānena. Ayañhettha yojanā – ācariyaparaṃparato...pe... vibhaṅganayabhedadassanato sampassataṃ viññūnaṃ ettha kiñci apāsādikaṃ yato na dissati, tasmā vineyyadamanakusalena lokanāthena lokamanukampamānena bhagavatā vuttassa vinayassa ayaṃ samantapāsādikāteva samvaṇṇanā pavattāti.

Tissopi imā sīhaḷaṭṭhakathāyo sutvāti sambandho. Kassa santike sutanti āha “buddhamitto...pe... santike”ti. “Buddhamitto”ti nāmena vissutassa yasassino vinayaññussa dhīrassa therassa santike sutvāti yojanā. “Sutvā”ti padaṃ “āradhā”ti pade pubbakālakiriyaṃvisesanaṃ.

Mahāmeghavanuyyāne bhūmibhāge patiṭṭhito satthu mahābodhivibhūsito yo mahāvihāro atthīti yojanā.

Tassa mahāvihārassa dakkhiṇe disābhāge **padhānagharam** padhānagharanāmakaṃ uttamam sucicārittasīlena bhikkhusaṅghena sevitaṃ yaṃ parivenaṃ atthi, tattha kārayīti yojanā.

Konāmo kārayīti āha “uḷārakulasambhūto...pe... vissuto”ti. Tattha uḷārakulasambhūto saṅghupaṭṭhāyako sadā anākulāya saddhāya ratanattaye pasanno “mahānigamasāmi”ti vissuto upāsako kārayīti sambandho.

Kaṃ kārayīti āha “cāru...pe... sampannasalilāsaya”nti. Tattha **cārupākārasaṃcitaṃ** sobhena pākārena suṭṭhu citaṃ cinitaṃ manoramam **sītacchāyatarūpetam** sītacchāyena rukkhena upetaṃ **sampannasalilāsayaṃ** madhurajalādhāraṃ yaṃ pāsādaṃ kārayīti yojanā. Mahānigamasāmino tatra pāsāde vasatāmayāti sambandho.

Kaṃ uddisitvā kīdisā kā āraddhāti āha “sucisīlasamācāraṃ...pe... vinayavaṇṇanā”ti. Tattha sucisīlasamācāraṃ **buddhasirivhayaṃ** theram uddisitvā **iddhā** atthavinicchayādīhi paripuṇṇā yā vinayavaṇṇanā āraddhāti yojanā.

Kiṃnāmassa rañño katame saṃvacchare āraddhā, kismiṃ kāle pariniṭṭhitāti āha “pālayantassa... pe... pariniṭṭhitā”ti. Tattha sakalaṃ laṅkādīpaṃ nirabbudaṃ katvāti sambandho. Pālayantassa sirinivāsassa **siripālayasassino** rañño jayasamvacchareti sambandho. Samavāsatime kheme jayasamvacchare ayaṃ vinayasamvaṇṇanā āraddhā, **ekavīsamhi** rañño ekavāsatime saṃvacchare sampatte sati pariniṭṭhitāti yojanā.

Yathā attano saṃvaṇṇanā nirupaddavā sīghaṃ niṭṭhaṃ upagatā, evaṃ lokassa dhammūpasamhitā sīghaṃ gacchantūti āsisaṃ dassento āha “upaddavākule”tiādi. Tattha **upaddavākule** upaddavehi ākule **loke** sattaloke **nirupaddavato** upaddavavirahato yathā ayaṃ vinayasamvaṇṇanā ekasamvacchareneva niṭṭhaṃ upagatā, evaṃ sabbassa lokassa āraddhā sabbepi dhammūpasamhitā atthā nirupaddavā sīghaṃ niṭṭhaṃ gacchantūti yojanā.

Attanā samācitassa puñṇassa icchitatthe pariṇāmanaṃ dassento āha “ciraṭṭhitatthaṃ dhammassā”tiādi. Tattha dhammassa ciraṭṭhitatthaṃ imaṃ vinayasamvaṇṇanaṃ karontena saddhammabahumānena mayā yañca puñṇaṃ samācitaṃ, sabbassa tassa puñṇassa ānubhāvena sabbepi paṇino dhammarājassa bhagavato saddhammarasasevino bhavantu.

Saddhammo ciraṃ tiṭṭhatu, devo kāle **vassaṃ** vassanto ciraṃ **pajam** sattasamūhaṃ tappetu. Rājā dhammena medaniṃ rakkhatūti yojanā. **Itisaddo** parisamāpanattho. Iti pariniṭṭhaṃ suṭṭhu āpanaṃ daṭṭhabbantūti attho.

Saddhā ca buddhi ca vīriyañca **saddhābuddhivīriyāni**, visuddhāni ca tāni saddhābuddhivīriyāni ceti **visuddhasaddhābuddhivīriyāni**, paramāni ca tāni visuddhasaddhābuddhivīriyāni ceti **paramavisuddhasaddhābuddhivīriyāni**, tehi parimaṇḍito **paramavisuddhasaddhābuddhivīriyapaṭimaṇḍito**, tena, therenāti sambandho. Sīlañca ācāro ca ajjavañca maddavañca **sīlācārajjavamaddavāni**, tāni ādīni yesaṃ teti **sīlācārajjavamaddavādayo**, ādisaddena khantisoraccādayo saṅgaṇhāti, teyeva guṇāti **sīlācārajjavamaddavādiguṇā**, tesam samudayoti **sīlācārajjavamaddavādiguṇasamudayo**, tena **samudito** suṭṭhu pākaṭoti **sīlācārajjavamaddavādiguṇasamudayasamudito**, tena therenāti sambandho.

Sakasamayo ca samayantaro ca **sakasamayasamayantarā**, teyeva pana gahanasadisattā gahananti **sakasamayasamayantaragahaṇaṃ**, tassa ajjhogāhaṇaṃ **sakasamayasamayantaragahaṇajjhogāhaṇaṃ**, tasmim samattho **sakasamayasamayantaragahaṇajjhogāhaṇasamattho**. Tena therenāti sambandho. Visesena añjati pākaṭaṃ karotīti **viyatto**, puggalo, viyattassa idaṃ **veyyattiyam**, sati. Paññā ca veyyattiyañca

paññāveyyattiyam, tena samannāgatenāti sambandho. Samannāgatena therenāti yojanā.

Tīṇi piṭakānīti **tipiṭakam**, tameva pariyāpunitabbattā **pariyattīti tipiṭakapariyatti**, tassa pabhedo ettha satthusāsāneti **tipiṭakapariyattipabhedam**, tasmim. Saha aṭṭhakathāyāti **sāṭṭhakatham**, satthu sāsānam, tasmim satthusāsāneti sambandho. Satthuno pariyattipaṭipattipaṭivedhavasena tividham sāsānam **satthusāsānam**, byāsopi yujjateva, tasmim satthusāsāne “appaṭihata” itī padena sambandhitabbaṃ. Appaṭihataṃ ṇāṇaṃ **appaṭihatañāṇaṃ**, idaṃ tasmim vinayasamvaṇṇanākāle therassa paṭivedhañāṇābhāvato sutamayacintāmayañāṇaṃ sandhāya vuttanti daṭṭhabbaṃ. Appaṭihatañāṇassa pabhāvo etassāti **appaṭihatañāṇapabhāvo**, tena therenāti sambandho. Mahantaṃ veyyākaraṇametassāti **mahāveyyākaraṇo**, iminā sikkhāniruttiādīhi chaḷaṅge mahantaveyyākaraṇe therassa appaṭihatañāṇapabhāvataṃ dasseti, tena mahāveyyākaraṇena therenāti sambandho.

Karaṇaṃ vuccati ṭhānaṃ kariyati uccāriyati ettha, etenāti vā vacanatthena, karaṇassa sampatti **karaṇasampatti**, tāya janitaṃ **karaṇasampattijanitaṃ**. Sukhena theramukhato viniggataṃ **sukhaviniggataṃ**, karaṇasampattijanitena hetubhūtena sukhaviniggataṃ **karaṇasampattijanitasukhaviniggataṃ**. Madhuravacanañca udāravacanañca **madhurodāravacanaṃ**, pubbapade uttarapadalopo, iminā keṭubhapakaraṇe (subodhālaṃkāre 127-142 gāthāsu) vuttetu dasasu saddaḡuṇesu madhuratāḡuṇena ca udāratāḡuṇena ca samannāgatabhāvaṃ dasseti. Karaṇasampattijanitasukhaviniggatañca taṃ madhurodāravacanañceti **karaṇasampattijanitasukhaviniggatamadhurodāravacanaṃ**. Atha vā karaṇasampattijanitañca taṃ sukhaviniggatamadhurodāravacanañceti karaṇasampattijanitasukhaviniggatamadhurodāravacanaṃ. **Elam** vuccati duruttadoso, natthi elametassāti **nelā**, soyeva vaṇṇo **nelavaṇṇo**, tena yuttaṃ **nelavaṇṇayuttaṃ**, karaṇasampattijanitasukhaviniggatamadhurodāravacanaṃ nelavaṇṇayuttametassāti **karaṇasampattijanitasukhaviniggatamadhurodāravacanelavaṇṇayutto**, therō. Visesanaparapadasamāso, nelavaṇṇayuttakaraṇasampatti janitasukhaviniggatamadhurodāravacanaṃ hi attho, tena therenāti sambandho. Yuttañca parisāya sotena anurūpattā, muttañca parisāya visāradattāti **yuttamuttaṃ**, vacanaṃ, taṃ vadati sīlenāti **yuttamuttavādī**, tena therenāti sambandho.

Kammasassataucchedaissaranimmānādivasena nānā vādā etesanti **vādino**, nānāvādā janā, vādīnaṃ, vādīsu vā varo kammakiriyaṃvādattāti **vādivaro**, tena therenāti sambandho. Pāḷiyā atthaṃ vaṇṇetum samatthattā mahanto kavi **mahākavi**, tena therenāti sambandho.

Atthadhammaniruttipaṭibhānavasena pabhinnāya paṭisambhidāya parivāritoti **pabhinnapaṭisambhidāparivāro**, tasmim uttarimanussadhammeti sambandho. Cha abhiññā ca paṭisambhidā ca **chaḷabhiññāpaṭisambhidā**, tā ādayo yesaṃ teti **chaḷabhiññāpaṭisambhidādayo**, ādisaddena tevijjādayo saṅgaṇhāti. Chaḷabhiññāpaṭisambhidādayo pabhedā etassāti **chaḷabhiññāpaṭisambhidādippabhedo**, soyeva guṇo chaḷabhiññāpaṭisambhidādippabhedaguṇo, tena paṭimaṇḍito **chaḷabhiññāpaṭisambhidādippabhedaguṇapaṭimaṇḍito**, tasmim uttarimanussadhammeti sambandho. Uttarimanussānaṃ jhānalābhīdīnaṃ dhammo **uttarimanussadhammo**, atha vā manussānaṃ kusalakammapaṭhasaṅkhātadhammato uttarīti **uttarimanussadhammo**, jhānādīdhammo, tasmim, “suppatiṭṭhita” itī padena sambandhitabbaṃ. Suppatiṭṭhitā buddhi etesanti **suppatiṭṭhitabuddhino**, tesam therānanti sambandho. Therānaṃ vaṃse pakārena dippanti, padīpo viyāti vā **theravaṃsappadīpā**, tesam. Thiro sīlasamādhipaññāsāṅkhāto guṇo etesamatthīti **therā**, tesam, vaṃsālaṅkārabhūtenāti sambandho. Mahāvihāre vasanasīlā vasanadhammā, vasane sādhuḡārīti vā **mahāvihāravāsino**, tesam, therānanti sambandho. Vaṃse alaṅkāro, vaṃsassa vāti **vaṃsālaṅkāro**, so hutvā bhūto, vaṃsālaṅkārabhūvaṃ vā pattoti **vaṃsālaṅkārabhūto**, tena therenāti sambandho.

Vipulā ca sā visuddhā ceti **vipulavisuddhā**, visesanobhayapado, vipulavisuddhā buddhi etassāti **vipulavisuddhabuddhi**, tena therenāti sambandho. Nānameva **nāmadheyyaṃ**, gahitaṃ nāmadheyyametassāti **gahitanāmadheyyo**, tena therena katā samantapāsādikā nāma ayaṃ vinayasamvaṇṇanā tiṭṭhatūti sambandho.

Suddhacittassa tādino lokajeṭṭhassa mahesino “buddho”ti nāmampi yāva lokamhi pavattati, tāva lokanittaraṇesīnaṃ kulaputtānaṃ sīlavissuddhāya nayamaṃ dassenti lokasmiṃ tiṭṭhatūti yojanā.

Iti nigamanassa atthayojanā samattā.

Nigamanakathā

Ettāvatā ca –

Ratanapuṇṇanāmassa, purassa rājadhāniyā;
Dakkhīṇe munirūpassa, īsampaṅcīnanissite.

Yo vihāro sapāsādo, kārito rājadeviyā;
Yā vasatā mayā tatra, katā pācityādiyojanā.

Māpitaratnapuṇṇassa, sattaraseva rājino;
Jayavassetṭhārasamhi, sampattheyamaṃ suniṭṭhitā.

“Ratanapuṇṇā”tivhayassa rājadhānīnagarassa dakkhiṇasmiṃ disābhāge pañcayojanappamāṇe ṭhāne dvīhi mahātaḷākehi susobhitassa midhilaṇāmanagarassa puratthimasmiṃ disābhāge diyaḍḍhagāvutappamāṇe ṭhāne anekatālapantīhi susobhito catunnaṃ kulānaṃ ramaṇīyabhūto “**kaphrū**” iti voharito yo so mahāgāmo patitṭhito, tattha paṭisandhiyā jātena sīlādiguṇehi pasamsitena “**jāgaro**”ti garūhi gahitanāmadheyena tikkhattumaṃ rājūhi rājamuddinā lañchitena me katāyamaṃ pācityādivaṇṇanāya yojanā sampatte jinacakke terasādhikacatuvasasatādhikamaṃ dvisahassamaṃ, sakkarāje pana ekatiṃsādhikadvivasasatādhikamaṃ sahasamaṃ gimhāne jeṭṭhamāse juṇhapakkhassa pañcame sukkavāre niṭṭhamaṃ pattā anāyāsenāti.

Yojanāya imissāhamaṃ, racanassānubhāvato;
Bhaveyyānekajātīsu, piṭakattayadhārako.

Kusalo cubhayatthesu, parisāsu visārado;
Samijjhantu susaṅkappā, mayhaṅca sabbapāṇinaṃ.

Vappādimanatikkamma, sammā devo pavassatu;
Attajamiva rakkhantu, rājāno cāpi medininti.

Iti bhadantajāgarattherena katā

Pācityādivaṇṇanāya yojanā samattā.